


Mussau-Emira Bible



Portions of the Holy Bible in the Mussau-Emira Language of
Papua New Guinea

Mussau-Emira Bible
Portions of the Holy Bible in the Mussau-Emira Language of Papua New Guinea
Sampela hap Buk Baibel long tokples Mussau-Emira long Niugini

copyright © 2006, 2008, 2013, 2016, 2018 Wycliffe Bible Translators, Inc.

Language: Mussau-Emira

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2018-11-09

PDF generated using Haiola and XeLaTeX on 11 Nov 2022 from source files dated 30 Nov 2021
9cad943-c245-5983-a663-5b2655bf0449

Contents

Rutu	1
Jona	7
Matiu	11
Mak	73
Luk	113
Jon	177
Apostolo	222
Rom	279
1 Korint	306
2 Korint	331
Galaisia	348
Ipises	357
Pilipae	366
Kolosae	372
1 Tesalonika	378
2 Tesalonika	383
1 Timoti	387
2 Timoti	394
Taetas	400
Pilimon	404
Hibru	406
Jeimis	425
1 Pita	432
2 Pita	440
1 Jon	445
2 Jon	451
3 Jon	453
Jiud	455
Niaulia ngaotu	458
Malloeana inangari	488

Vuku eteva ta Rutu Inangari emuemua

Vuku eteva ta Rutu eaauliaa kiukiu eteae ta kateva vause rau evulula, ararina atea ta Rutu, aMoabi ia. Alumuna ateva ta Naomi aIsraeli ia. Nau eteva Naomi ghe kiriaa lao sio eIsraeli, Rutu ghe usiela. Rutu ghe apasungaala kinatama niaielousi eteva ta Naomi, ghe kasu vulila kapuna atoa me ghe saela eIsraeli, me ghe aimuli teela kapuira God ateva aIsraeli etoa. Ararina atea Rutu ghe namuula eIsraeli, ta poli tuvuna ta King Deivit me Iesu.

Nau Naomi ghe oghi siola tanganuena eBetlehem, Rutu ghe usiela. Isaa eBetlehem lalu ghe tarala taita ateva ararina atea ta Boasi. Mangalina ia taitanna ateva Naomi, me tale inlandari nipaopao Moses ghe pitila eaauliaa va mangalim ateva erooroo tani poli aoghi kosam, poli laghe uusila taita atoa. Boasi ghe ghelei ekapala isaa o voto me ghe laila ta Rutu, natuirarua amua ateva ghe mene ghaala kosane ateva Elimelek, taitanna ateva Naomi.

Tani kila amuemua

Rutu ghe karangailila ta Naomi 1

Rutu ghe tarala Boasi 2

Naomi ghe loela inlandari etingiu ta Rutu 3

Rutu me Boasi lalu ghe laila 4

Naomi me Rutu

¹ Nau ta namu ngatoa laghe aitoiaa aIsraeli etoa, paka maloo ateva ghe lutula. Taita ateva aBetlehem ia ta pai nge Juda ghe lao sio tani toka tau tale kateae masaliki eMoabi, ia me vausenna ateva me natuna taita alua.

² Taumattu ngateva o ararina atea ta Elimelek, vausenna ateva ta Naomi, me natuna taita alua arariirarua ta Maloni me Kilion. Ila ararimangali nge Eprata ila, me tanganueira eBetlehem ta pai nge Juda. Laghe siola eMoabi tani toka.

³ Vara me Elimelek ghe matela, ghe mate vulula vausenna ateva ta Naomi, me natuna taita alua. ⁴ Natuna taita alua lalu ghe laila. Lalu ghe ghaala vause nge Moabi elua, arariirarua ta Opa me Rutu. Laghe tokala ghe roola koti kasangauluae (10) ninamanama. ⁵ Vara me Maloni me Kilion lalu ghe mene matela, me Naomi nonga ghe tokala, poli taitanna ateva me natuna alua lotolu ghe mate akapala.

⁶ Naomi ghe nongola va laue ang ghe tau lao sio masi nau ta kapuna atoa me inana ang ghe mene oroi ila. Liuna avalua o ia me alumuna vause alua laghe aimonomonosiaala tani kasu vuli eMoabi. ⁷ Ang ghe kasukasu vuli nongina ghe tokatoka, ia me alumuna vause alua. Ngilotolu ghe kasukasu tani oghi lao eJuda, etapaa salana me ⁸ Naomi ghe uela etairarua va, “Amalu oghila, me amalu lao tanganueimalua. Amalu laa toka tee kinaimalua alua. Iaue aue eghelei voto masina etaimalua, nongina amalu ghe aitara ngamasinaaillieghila, me lo tee alua ngilalu ghe matela. ⁹ Iaue aue eaisausieiniemalua tani mene lai ppae. Me aue amalu toka masina tee!”

Naomi ghe ngusulaluelu, me lalu ghe sauua saela, me ngilalu ghe ngangngala. ¹⁰ Me lalu ghe uela etana va, “Angalu usio, me itolu lao ta kapum atoa.”

¹¹ Me Naomi ghe uela va, “Masina, amalu oghila, alumughu elua! Vaalua me amalu anna tani usieghi? Karika arooroo tani mene ssu righi natughu

taita va amalu ghaa me etaitaniimalua. ¹² Amalu oghila, alumughu elua, me amalu lao tanganueimalua. Ngaghele vause namuula. Karika arooroo tani mene ghaa teva taita. Arova aghele ghaa teva taita, ghaine nonga eleivoo, me ghele mene alutu toa natughu taita, ¹³ aue karika amalu ghele anna tani mene lai, me amalu ghele toila ta la ghele tani namuu? Karika aghannaa va eisaa avalua o, alumughu elua. Amalua mene masina, me aghi karika masina, ta poli Iaue ang ghe gheleila voto sesa ang ghele lutula tale maamaulueaghi.”

¹⁴ Me lalu ghe mene sauua saela tani mene ngala. Vara me Opa ghe ngusula alumuna vause ateva tani akorovaia, me ghe kaili emasinala etana. Rutu nonga karika ghe anna tani oghi vulu Naomi.

¹⁵ Me Naomi ghe uela va, “Tarala, iloam ange oghila tani laa tara kapuna atoa me kapuna goto atoa. Laa usia, me amalu oghi.”

¹⁶ Rutu ghe liula me ghe uela va, “Karika aghaloanna va uue va aoghi vuluo. Poli aue eaa ulao, aghi tee aue alao. Me eaa ulaa toka, aghi tee aue atoka. Kapum atoa aue kapughu ila, kapum Goto ateva, aue kapughu tee ia. ¹⁷ Eaa ulaa mate, aghi tee aue amate, me la kaia teeieghi. Nimate nonga ateva aue epolaitalua. Arova nganim kamekame, Iaue aue eliu aipolighi sesaaili.” ¹⁸ Nau Naomi ghe tarala va Rutu ghe arrekana tani usi, ghe vira ruula tani auliaa etana va eoghi.

¹⁹ Lalu ghe kasula, kasula me lalu ghe laa rekata sio eBetlehem. Nau lalu ghe lao sio eBetlehem, ila akapa taumattu ngatoa laghe soghieinielaluela. Me vause atoa laghe aikolomieinila va, “Tani koronna, va ia okae Naomi?”

²⁰ Me Naomi,* ghe uela etaira va, “Am rau mene kolo Naomi etaghi, am koloaghi va Mara† poli Vau ngepona ateva sarasarakanaaili ia ghe gheleila voto kaakaalanaaili‡ etaghi. ²¹ Oro peighi me aghe kasula. Iaue ang ghele ghaa oghieghi mae sio me ngaghele nim peisaanela. Vaalua me am kolokolo Naomi etaghi? Iaue ghe taueghi siola euu me ia sarasarakanaaili ia ghe gheleila voto sesa ta ngetaghi.”

²² Isaa o kiukiuna Naomi nau ghe oghi lao sio tanganuena, lalua me Rutu atala nge Moabi ia. Lalu ghe kasu vulila eMoabi, me lalu ghe laa rekata sio eBetlehem nau laghe tiuaala tani sai bali raisi.

2

Rutu ghe soula Boasi

¹ Kateva taumattu, tue peipeiena ia me namuu ia, ghe tokatoka eBetlehem, ararina atea ta Boasi. Mangalina ia Elimelek, taitanna ateva Naomi.

² Kateva nau Rutu atala nge Moabi ia ghe uela ta Naomi va, “Aghanna tani laa usi lo atoa la saisai bali raisi tapaa ngutana, me aghaa righi ta lo ateva taumattu aue eanna va aghaimuli tee kapuna atoa me aghaa llo ekaokao alokoi.”

Naomi ghe uela va, “Ue, alumughu, laa usi.” ³ Rutu ghe lao sio tani aimuli tee lo atoa laghe saisai bali raisi, me ghe reirei llo laghe aakao. Karika ghe kilakila va paa ngutana atea o umane ia Boasi, mangalina ia Elimelek.

⁴ Vara me Boasi ghe rekatala, ghe kasula eBetlehem. Me ghe uela ta tau ngai sai bali raisi etoa va, “Iaue aue etoka teeiem.”

Laghe liula me laghe uela va, “Iaue aue earangiseio.”

* **1:20:** Naomi Malloeana Naomi va masina. † **1:20:** Mara Malloeana Mara va kaakaalana.

‡ **1:20:** kaakaalanaaili Naomi ghe aulia ngavalua o ta poli ghe nnaala va, “Iaue ang ghe gheleila maamauluaaghi ang ghe aanasaailila, nau ghe tau vella taitannighi eteva me natughu elua lotolu ghe matela me karika righi tuvughu.”

⁵ Boasi ghe uela ta lo ateva ghe aaitoiaa tau ngai uungu etoa va, “See ia aliki vause ateva okae?”

⁶ Me kapuira tau ngai toitoi eteva tau ngai uungu etoa ghe liula me ghe uela va, “Aliko vause nge Moabi ia. Lalu ghe kasula eMoabi me Naomi. ⁷ Emae sio tani nongonongoaa va eaimuli tee lo atoa la saisai bali raisi me erei righi. Etiuaala arau elue talaua tani reirei, me ia okae ange vira mene lao sio tani ainoana toka tale ale paapali erighi.”

⁸ Vara me Boasi ghe uela ta Rutu va, “Natughu, unongo, urau mene laa rei bali raisi ta mene righi ppae paa ngutana, ureirei nonga oia. Utoka tee lo atoa vause la uungu oia. ⁹ Utara amasina paa ngutana la saisai bali raisi, me uaimuli teeila. Ngaghauliaala ta aliki taita atoa va la rau mene ghelei righi voto ta ngetam. Me arova uanna tani ropi, ulaa ropi tale aikaai manu eteva o aliki taita atoa la akuela.”

¹⁰ Vara me Rutu ghe suuiaala me ghe turruula tapaa kosa, me ghe uela ta Boasi va, “Aghi ativuu ieghi. Vaalua me angu kaakaarasi tani ghelei masi voto etaghi?”

¹¹ Me Boasi ghe liula me ghe uela etana va, “Ngaghe nongo akapala voto ughe gheleila ta alumum vause ateva nau taitainim ateva ghe matela, me vaalua ughe kasu vulila kinam, tamam me tanganuem, me ughe mae sio tani toka tee llo taumattu karika ukilakila. ¹² Iaue aue eliu masi uunguaam, me isaa akapa aipolim kapuira Goto ateva aIsraeli etoa aue etau aatu, poli ughe tuutuliela tani aitarainio.”

¹³ Rutu ghe uela ta Boasi va, “Masinaaili voto angu gheleila ta ngetaghi, vaughu eteva. Arongona ta karika masina aghi nongina kapum vause atoa tau ngai uungu ila, me angu gheleila voto masina etaghi. Nau uaippooa ngamasina teeieghila, egheleieghila aghateatea ngamasinala me nannaaghi tee emasinala.”

¹⁴ Nau ninamanama, Boasi ghe mene uela ta Rutu va, “Mae ghaa righi verete, me uasuu tale uaeni, me unama tee.”

Rutu ghe toka tee siola tau ngai uungu etoa, me ghe namanama teeilala. Boasi ghe tau lao sio bali raisi etana laghe tuu saela tale kuraa. Rutu ghe namala me ghe ssoiela, me kasina ghe oghi etokala. ¹⁵ Nau ghe mene lao sio tani mene reirei, Boasi ghe uela ta kapuna aliki taita atoa va, “Am tau velu Rutu me erei ekalakalangina tale isaa o llo ngam iri eitaua ngatinginala. Am rau mene sama anamuu teeia va epalata. ¹⁶ Me am ghaa righi bali raisi tale llo ngam iri eitaua ngatinginala, me am velu elokoi, me aue erei. Am rau mene tiu velua.”

¹⁷ Rutu ghe reireila tale bali raisi elomosi ta sinaka ateva ghe suula. Me ghe paruparuaala llo ghe reila. Ghe ghaala vorovoro bali raisi ghe roola kateva efa.* ¹⁸ Rutu ghe ghaala isaa o bali, me ghe lao sio elo ale, me ghe apasungaala ta alumuna. Ghe sau teela tapiri nginana ghe nama vulula elo sinaka.

¹⁹ Alumuna ghe kolomiela va, “Eaa ureireila tale nau eteva oia? Iaue earangise lo ateva taumattu etaraiola me eaikoloainiola.”

Rutu ghe uela va, “Areireila tale paa ngutana ateaee umana ia taumattu ngateva la ghasease Boasi etana.”

²⁰ Naomi ghe uela ta alumuna va, “Iaue aue earangiseia! Me Iaue karika ekakkaluaa kannaa inangari nialokoi ta lo atoa la tokatoka me lo atoa angila ghe matela.” Naomi ghe uela va, “Ia ona taumattu ngateva uunguaane va, ia esausitalua me tani ghaa oghitalua, ta kalakalanginaaili ia etaitalua.”

* **2:17:** efa Efa kateva keru erooroo tani kaai 22 lita.

²¹ Me Rutu atala nge Moabi ia ghe uela va, “Boasi euela etaghi va auungu tee kapuna atoa elomosi ta la ruu tani sai bali raisi ta ngumana.”

²² Naomi ghe uela ta alumuna va, “Alumughu, aue emasinaaili ta ughuungu tee kapuna tau ngai uungu etoa vause ila. Urau mene lao ta uma katoa, la rau tam laa ghaitara ngamasinaio.”

²³ Mausina avalua o me Rutu ghe kara ngaparasila ta kapuna tau ngai uungu etoa Boasi vause ila, elomosi ta laghe tani ruula tani sai bali raisi me uiti. Rutu ghe tokatoka tee alumuna vause ateva.

3

Rutu me Boasi tale liu ngai kuluki bali raisi

¹ Kateva nau Naomi ghe uela ta alumuna va, “Alumughu, aghanna tani pae teva taita, me ulai etana, me aue eaitarainio me utoka amasina. ² Ia o taita ateva Boasi etana, kapuna vause tau ngai uungu etoa ughe reirei teeilala, kalakalangina ia etaitalua. Ghaine eleivoo elaa kuluki bali raisi, liu ta la kuukuluki bali raisi. ³ Ulaa suusu, ukolikoli me uatoka righi unem aiaao masi ngusungusuaane, me usio kona ghaine euungu. Urau mene laa otuotu etana. Utani toi ta enamanama me eropi mua. ⁴ Nau eteva ange anna tani asekanua, utara tootoonga nongina eaa elaa ghaso. Me umange koukouna atiulu, me uaso sio kalakalaa ta komo kkena. Auena eauliaa va sa ateva umene gheleia.”

⁵ Rutu ghe liula me ghe uela va, “Masina, aue ausila ngakapa inangarim.”

⁶ Me Rutu ghe siola nongina la kuukuluki bali, me ghe ghelei ekapala voto alumuna vause ateva ghe auliaa tau lao sio.

⁷ Nau Boasi ghe ruula tani ropi me namanama, ghe masimasila. Vara me ang ghe anna tani asekanua. Ghe lao sio tani aso nongina laghe kaokao aitaaua bali raisi. Rutu ghe kasu emorooia ssola, me ghe mangela koukouna atiulu Boasi, me ghe aso siola ta komo kkena. ⁸ Elo matuaa voo me Boasi ghe soghila. Vara ghe kiria me ghe soghiaala vause ateva ghe asoaso ta komo kkena.

⁹ Me Boasi ghe uela va, “Io see?”

Me vause ateva ghe liula me ghe uela va, “Aghi Rutu, kapum vause tau ngai uungu ieghi. Pulela me uakoueghi me emannem ieghi, poli io mangalim ta Elimelek. Liuna avalua o me uunguaam tani sausieghe me aitarainaghi.”

¹⁰ Me Boasi ghe uela etana va, “Iaue aue earangiseio, natughu, poli angu apasungaala masi voto ghaine, ange lau ekapanaailila masi voto ughe gheleila ta Naomi. Me karika ughusiusi kkai aliki taita atoa, tue peipeiena ila me lo atoa karika peiira. ¹¹ Ghaine, natughu, urau mene matautu. Aue aghelei ekapa voto ukolomila. Ila akapa taumattu ngatoa tale masaliki eteae oia la kilakila va io eeleiaam me tokatokaam masinaaili. ¹² Koronna va aghi mangalina aghi taitanim ateva, me uunguaaghi tani ghaa oghio. Me mene kateva taumattu ararimangaliimami eitaaua, ia tee uunguaane tani sausio me ghaa oghio, poli ia kalakalanginaaili ia ta taitanim ateva. ¹³ Asola oia, me aue epai alaa pae ia o taumattu ngateva, me anongo va vaalua nannaane. Arova ealoanna tani aitarainio, masina. Arova karika, aghi aue aghaitarainio. Koronnaaili Iaue ang ghe kilala. Masina, asola oia me aue elue taluaa ukasu.”

¹⁴ Rutu ghe aso siola ta komo kkena Boasi. Ghe tam pai emasina elue taluaa me ghe totula. Me Boasi ghe uela va, “Karika toa la mene kila va vause ateva emae sio oia nongina la kuukuluki bali raisi.”

¹⁵ Boasi ghe uela va, “Ghaa mae sio tuku kaliom atiulu uvaovaoa, me upuleia me uposoa.” Boasi ghe kala tau lao sio bali raisi* me ghe sau etoka saela ta Rutu. Ghe ruula me ghe lao sio elo masaliki.

¹⁶ Nau Rutu ghe laa rekataa sio ta alumuna, alumuna ghe taraiela me ghe uela va, “Ane vaalua? Masina?” Rutu ghe aulia ngakapaailiila voto Boasi ghe gheleila. ¹⁷ Me Rutu ghe uela va, “Boasi ekala tau mae sio bali raisi. Euela va, ‘Karika erooroo va unim lao ta usau righi bali raisi me ughunusi lao.’”

¹⁸ Me Naomi ghe uela va, “Alumughu, unim matua atoka me utoitoi, poli karika ngitalu kilakila va sa ateva ninannaa ghaine elutu. Utara Boasi karika aue eainoana amasina lomose ta inangari evira masina.”

4

Boasi ghe laila ta Rutu

¹ Boasi ghe saela tale liu ngai veluvelu eitaue ngateva kona laghe kupikupi sso, me ghe toka siola. Karika masau, me ghe tarala mangaliiraru ateva me Elimelek, ia o ghe aaulieinia ang ghe reerekata me ghe uela va, “Ei! Mangali, mae toka sio mua!” Ghe lao sio me ghe toka siola.

² Me Boasi ghe kolola kasangaulu (10) namuu laghe aaitoiaa masaliki eteae okae me ghe uela va, “Am mae toka sio.” Me laghe toka siola. ³ Me ghe uela ta mangalina va, “Naomi ang ghe oghi mae sio, ghe kasula eMoabi. Me ealoanna va teva taumattu kapuna Elimelek, ia o mangaliitalue ia, epoli tuku kosane ateva. ⁴ Liuna avalua o, me auela va aghauliaa kiem. Arova ualoanna tani polia, upolia ta mataira namu ngatoa me taumattu ngatoa. Me arova utam aloanna tani polia, uauliaa etaghi me akila. Karika mene teva, ta italu nonga. Io tani kalakalanginaaili io, me auena aghi.”

Me ghe uela va, “Aue apolia.”

⁵ Boasi ghe uela va, “Arova upoli tuku kosa ateva ta Naomi, ughaa tee Rutu me evausenim ia. Me isaa o kosa elao ta natuna atoa lo ateva taumattu ang ghe matela.”

⁶ Me ia o taumattu ngateva ghe uela va, “Karika amene polia, ta karika aghaloanna va peighi elao ta mene katoa aliki karika va natughu ila. Io upolia me ughaa isaa o voto.”

⁷ Emua arau ta Israeli etoa, arova angila aloanna tani aipolia voto, tani auliaa, me aikolikoliaa righi voto, laghe gheelei evalua toko va taumattu ghe lullu velu unna aikasukasu, me ghe tautau lao ta mene kateva. Isaa o voto laghe gheelei eIsraeli.

⁸ Liuna avalua o me mangalina ateva Boasi ghe uela va, “Io upoli tuku kosa ateva,” me ghe llu tau lao sio kateva tana unna aikasukasu ta kkena.

⁹ Me Boasi ghe uela ta namu ngatoa me ila akapa taumattu ngatoa va, “Am akapa ngam tarala va voto kanna Elimelek, Maloni me Kilion, isaa o ghe tokatoka ta nimana Naomi, ghaine ngapolipoli ekapa. ¹⁰ Aghi ngaghaaghaa Rutu ia o vauseni nge Moabi eteva, Maloni ghe mate vuluela me evausenighi ia. Kosane Maloni aue etoka ta kapuna atoa. Liu ta la tokatoka, kapuna atoa karika la mene aikkaluaa ararina atea. Ghaine am akapaaili ngam tarala me ngam nongo akapaailiila voto.”

¹¹ Me ila akapa taumattu ngatoa me lo atoa laghe aaitoieinila laghe uela va, “Ue, ngami tarala me ngami nongola. Iaue aue eghelei emasina ta ia o vause ateva ang ghe mae sio ta ngetam. Aue ealutu oroi aliki, nongina

* **3:15:** Tale inangari nge Hibu, ghe kala tau lao sio bali raisi erooroo ghaonomo aikaai. Karika ita kilakila maamataniaane bali raisi erooroo ghaisaa.

tuvuita vause alua aIsraeli etoa ta Resolo me Lia. Me io aue unamuu ta ararimangali eteva eEprata, me aue la kila akapaio eBetlehem. ¹² Iaue aue etau aatu oroï aliki etaimalua. Aue la oroïeili nongina natuna atoa Peresi, natuirarua taita ateva Juda me Tama.”

¹³ Vara me Boasi ghe ghaala Rutu, me ghe vausenna iela me ghe aso teeiela, me Iaue ghe arangiseilaluela, me Rutu ghe kkaaila, me ghe ghaala aliki eteva taita ia. ¹⁴ Me vause atoa laghe uela ta Naomi va, “Ukkauaa Iaue poli ange tau aatu sio natum taita ateva ia o tuvum ia. Ia aue eaitarainio, me ararina ateaue aue enamuu ta aIsraeli etoa. ¹⁵ Alumum ealoannaailiio me io tee ualoannaailiia. Arova natum taita ghaitu, karika aue ughele ailousieinila nongina uaailousiaa alumum vause ateva. Liuna avalua o me ia o natum taita ateva ang ghele lutula, aue esausi tokatokaam, me aue eaitarainio nau uvause namuu.”

¹⁶ Naomi ghe saula aliki eteva. Ghe tokatoka teeia, me ghe aaitarainia. ¹⁷ Mene katoa vause laghe tokatoka aitauaa laghe uela va, “Naomi ang ghele saula aliki eteva taita ia,” me laghe asela ararina ate ta Obet. Tamane ia Jesi, me Jesi tamane ia King Deivit. ¹⁸ Vituu etoa ta Peresi:

Peresi ghe alutula Eseroni.

¹⁹ Eseroni ghe alutula Ram,
me Ram ghe alutula Aminadab.

²⁰ Aminadab ghe alutula Nasoni,
me Nasoni ghe alutula Salmoni.

²¹ Salmoni ghe alutula Boasi,
me Boasi ghe alutula Obet.

²² Me Obet ghe alutula Jesi,
me Jesi ghe alutula Deivit.

Vuku eteva ta Jona Inangari emuemua

Vuku eteva ta Jona, ie ppae ta mene katoa tana vuku propete, poli eaauliaa kiukiuna Jona, karika eaauliaa niuungu tani apasunga. Tee karika Jona nongina mene katoa propete, poli ghe nongo vulula God. God ghe suula Jona tani laa ppooaa eNinive, kinatama masaliki eteae eAsiria, tau ngai ssateeira ila aIsraeli etoa. Jona karika ghe nongo usilaala tani laa ppooaa etaira, poli ghe kilakila va God aue enim kkaluaa kaluira ssavoto, me karika aue etturu kinatama masaliki eteae eNinive.

God ghe apasungaala etaita ta vuku eteva oia va ie nonga eaitoia kosa akapa ateva, karika aIsraeli nonga atoa. Ghe suula kinatama kuukuu eteva ghe lao sio tale anua ateva nau Jona ghe iloula, ghe suula kko ateva tani asaangi Jona, me ghe aloannala va tau ngai ssateeira aIsraeli etoa la nna ngaioghioghiaa tale kaluira ssavoto.

Tani kila amuemua

Jona ghe ilou eisuliaala ta Iaue 1

Jona ghe looloo saela ta Iaue 2

Jona ghe lao sio eNinive, me taumattu ngatoa laghe aiesoala tale inangarina God 3

Jona ghe sessaiela poli Iaue ghe nna ngaioghioghiaala 4

Jona ghe ilou eisuliaala ta God

¹ Inangarina Iaue ghe mae sio ta Jona natuna ia Amittai. Ghe uela va, ² “Kasula me ulao eNinive, kinatama masaliki taatara atea. Ulaa ppooa ngaotu eeleiaaira karika masina, poli ataatara va ang ghe namungaili ila.”

³ Jona ghe anna tani ilou eisuliaa tee Iaue. Karika ghe lao sio eNinive, ta ghe lao ppae sio tale kateae ppae masaliki eTarsis. Ghe siola eJopa me ghe paela anua ateva ghe aloanna tani lao eTarsis. Ghe polila salana me ghe saesaela etana tani lao eTarsis, tani ilou eisuliaa tee Iaue.

⁴ Me Iaue ghe suula kinatama kuukuu ttasi eteva ghe lutu teelala elamana, ttasi vaoo ateva namungaili ia. Anua ateva ghaisa ngarighi ghe tapolapolaka. ⁵ Me tau ngai uungu etoa tale anua ateva laghe tiuaala tani matautu, me laghe kolokoloa nganamuu kapuira kuturu etoa. Me laghe tiuaala tani sau veluvelu sio ghinna atoa elamana tani ghelei oakana anua ateva.

Me Jona ghe siola arau eeu tale paa nganua ateva. Ghe laa sio aso me ghe asekanuela me ghe llusula. ⁶ Kapteni eteva ghe siola etana me ghe uela etana va, “Vaalu me uaseasekanua? Totula me ukolokoloaa kuturum eteva. Koti ia aue ealousiusi teeita me aue esausita, me karika aue ita mate.” ⁷ Me tau ngai uungu etoa tale anua ateva laghe uela va, “Ita piti arariita me ita kape nonga katengaata. Lo atea arari ita kapea akasina, ia aue ita kila va, ia o taumattu ngateva mausina me ngita sessa.” Laghe ghelei evaluela o, me ararina atea Jona ghe otuela.

⁸ Vara me laghe uela etana va, “Uauliaa kiemami mausi saa me voto sesa ange saetala? Saa uunguam? Me aliaa io, me eaa tanguem? Me see ila kapum atoa?”

⁹ Me ghe uela etaira va, “Aghi aHibru ieghi. Akakkauaa Iaue, God epona liu ghe gheleila paamanu eteva me kosa ateva.”

¹⁰ Jona ghe uela ta tau ngai uungu etoa tale anua ateva va, “Aghe ilou eisuliaala ta Iaue.” Laghe nongola me laghe matautu saasakiaala. Me laghe uela ta Jona va, “Vaalua me ughe gheleila voto oia sesaaili?”

¹¹ Laghe uela etana va, “Ami saa etam me aue lueiemami?” Poli ttasi eteva ange sesaaili.

¹² Me ghe uela etaira va, “Am saueghila me am sau velueghi sio elamana me aue luei, ta mausighi me kinatama ttasi eteva euviuviem.”

¹³ Me karika, ta tau ngai uungu etoa tale anua ateva laghe oseose paraparasi tani sso elae, me karika laghe rooroo, poli ttasi eteva ang ghe naanamungaili. ¹⁴ Vara me laghe kolokolo saela ta Iaue. Laghe ue va, “O Iaue, urau mene tau veluemami va ami mate, ta poli ngami ghaaghaa velu maamaulueane ia oia taumattu ngateva. Me urau mene tau velu righi voto sesa eailutua tale maamaulueaaimami, poli ngami uviuvi emate taumattu ngateva karika righi eeleiaane sesa, poli io Iaue, ughelei voto tale aloaloannaam.” ¹⁵ Laghe saula Jona me laghe sau velue siola elamana, me ghe lueila. ¹⁶ Tau ngai uungu etoa tale anua ateva laghe matautangailila Iaue. La ghe gheleila aiaavusuvusuena, me laghe auliaala inangariira nialokoi ta Iaue.

¹⁷ Iaue ghe suula kinatama kko ateva ghe olomila Jona. Ghe laa sso toka kotolu llaa me voo ta kova kko ateva.

2

Jona ghe looloo sae

¹ Elome tale kova kko ateva me Jona ang ghe looloo sae ta Iaue.

² Ghe ue va,

“Voto sesa eghe lutu teeieghila, liuna avalua o me aghe kolo taula Iaue, me eghe liula.

Aghe tokatoka tale voto ateva sesa ia, llo taumattu matena la tokatoka etana, me aghe kolokolo saela etam, me ughe nongoaghila.

³ Ughe sau velueghi sio mae arau euueili tale paamanu eteva.

Manu eteva ghe akoueghila me ugheleila kinatama kotoo atoa la ghasuula epona etaghi.

⁴ Aghe annaa va, angu ghe tiu velueghila tale taataram me karika,

ta aue aghi amene tara alem ale manga ateva.

⁵ Kotoo atoa la ghasuula epona etaghi, me egheleieghila gharighi tau ghele arropieghi me malionge ateva ghe akoueghila.

Me rarrasa ngelamana atoa la ghakou taliaala urughu eteva.

⁶ Aghe siola arau tale liue motouru etoa tale paamanu eteva.

Sesa voto ia nongina va atokatoka laalaa liu tale ale mata voovoo.

Iaue, io kapughu Goto io, ughe ghaa oghieghila me aghe kasu vulila sesa voto ateva.

⁷ Nau maamaulueaghi ange kapakapa, aghe annaala Iaue,

me aghe looloo saela etam tale alem ale manga ateva.

⁸ Llo taumattu ghe kakkaua kamena atoa kuturu, laghe kasu vulila aielousiaam ateva.

⁹ Aghanna tani kkaueinio tale nikkinari me tale niaiaavusuvusuena, tani tau sae ararim atea.
Isaa akapa voto aghe gheleila inangari nialokoi etana, aue aghelei.
Iaue nonga eroroo tani asaangita.”

¹⁰ Me Iaue ghe auliaala ta kko ateva, me kko ateva ghe laa sso lue atoka Jona elae.

3

Jona ghe lao sio eNinive

¹ Inangarina Iaue ghe mene mae sio ta Jona ghaluene va, ² “Kasula, me ulao eNinive, kinatama masaliki taatara atea. Ulaa ppooa ngaotu inangari atau aatu.”

³ Jona ghe aimuli teela inangarina Iaue me ghe lao sio eNinive, kinatama masaliki taatara ia. Uroroo tani kasu talia etana kotolu nau. ⁴ Jona ghe kasula me ghe laa rekata sio. Aitiuti eteva nau ghe rekatala eNinive, ghe tiuaala tani ppooa ta taumattu ngatoa. Ghe ue va, “Ghaatingaulu (40) nau aue eruu, me Ninive aue God euvi tuuturungia.” ⁵ Taumattu nge Ninive atoa laghe aiesoala ta God. Laghe samaa seela va, “Ita rau mene namanama, me ita rau mene ropi.” Me laghe asaala ghinna nialousiusi, namuu me aliki etoa.

⁶ Inangarina ghe laa rekata sio ta kingi nge Ninive ateva. Kingi eteva ghe tingina vulu saela aitokatokane ateva, me ghe llu vella unna aiaasae ateva, uneira ia namu ngatoa, me ghe asaala ghinna nialousiusi, me ghe toka siola tale au kura. ⁷ Me ghe uela va, “Am laa aulia ngakapa see eNinive va,

“Aghi me kapughu namu ngatoa ami uela va, karika teva taumattu me ghaata kkena emene ropi, me enamanama. ⁸ Am akapaaili taumattu me ghaata kkena atoa am asae ghinna nialousiusi. Am kolokolo anamuu sae ta God. Me am oghi vulu sesa gheeleiaaimim me am ruu tani kiiuaa mene kateva. ⁹ Arova ita ghelei evalua o, koti God aue eaikolikoliaa nannaane tani sessaia me karika ita mene mate.’ ”

¹⁰ Laghe oghi vulula eeleiaaira sesa, me God ghe tarala voto laghe gheleila, me ghe aikolikoliaala nannaane, me karika ghe gheleila voto ghe uela va eghelei.

4

Jona ghe sessaia tale kanna niaielousi God

¹ Jona ghe sessai saasakieiniela me ghe tam masimasila. ² Ghe looloo saela ta Iaue, ghe ue va, “O Iaue, karika aghe kasu vuli tanganueghi me aghe kilala va karika aue utturu eNinive. Liuna avalua o, me aghe ilou eisuliaala tani lao eTarsis. Aghe kilakila va io masinaaili io, me karika uroroo tani tturuu, me karika essai parasio. Unem niaielousi namungaili me gharovaeata ta uaikolikoliaa nannaam. ³ O Iaue, ughaa velu maamaulueaghi, poli arova amate aue emasina. Arova atam mate, karika aue emasina.”

⁴ Iaue ghe liula me ghe uela va, “Jona! Vaalua, masina ta esessaio?”

⁵ Jona ghe kupi vulu ghoala kinatama masaliki taatara atea, me ghe lao sio ta pai sinaka esae. Ghe gheleila natu paapali erighi tani toka me tani tara sa ateva ghe mene lutu tale kinatama masaliki taatara atea eNinive. ⁶ Vau ngepona Iaue ghe apinosala ngaapa atea, tani apallungia. Me ghe sausia, poli karika ghe annaa me ateaataa rigi masina. Jona ghe masimasiangailiia ia o ngaapa atea. ⁷ Vara elue talaua ta mene kateva nau, God ghe suula gharighi natu voto erarra tani laa nama amate ia o ngaapa atea, me emmate. ⁸ Nau ta sinaka ateva ghe saela, God ghe suula kuukuu

eteva aanasa ia ghe mae sio ta pai nge sinaka esae, me sinaka ateva ghe sinakila uruna ateva Jona, me matane ghe leeleela, me ang ghe anna tani katu. Me Jona ang ghe aanna va, “Arova amate aue emasina. Arova atam mate, karika aue emasina.”

⁹ Vara me God ghe uela ta Jona va, “Vaalua, masina ta esessaio tale ngaapa atea?”

Me Jona ghe liula me ghe uela va, “Ue! Ange sessaieiliieghila, me aghanna va arova aghele mate.” ¹⁰ Iaue ghe uela va, “Uaalousiusi tee ngaapa atea io karika ughe uungu aanasala etana, me karika ughe apinosaiela, ta ghe nim pinosala eleivoo, me mene kateva voo ghe mmatela. ¹¹ Aghi tee aghalousiusieili tee eNinive, ta oroieili taumattu ngatoa, tani ioila elaulau kateva ai ghaluengaulu airari (120,000). Me karika la rooro tani kila va eaa sesa me eaa masina, me oroinaaili tee ghaata kkena atoa.”

Masi kiukiu Matiu ghe pitiela Inangari emuemua

Matiu kateva ta kasangaulu ghalua (12) disaepolo, mene kateae ararina ta Livae. Mati u ghe tiuaala tani piti tuvuna atoa Iesu, aitiutiu ta Abraham, me ghe mae sio ta Deivit, me tee ekiukiuaa lutulutuaane Iesu. Ghe pitila oroieili voto Iesu ghe apasungaala ta taumattu ngatoa, me ghe polala tale ghalimae mutungi inangari: Iesu ghe aippooaala tale motouru (sapta 5-7), niloeloe ta disaepolo atoa (sapta 10), kiukiu niaimatoonga tale ararimangalina ateva epona liu (sapta 13), vaalua disaepolo atoa aue la toka (sapta 18), me maemaeane Iesu (sapta 24-25). Mati u ghe kaarasila tani apasunga vaalua Iesu ghe akoronala inangari tani aulia ngamuemua tale propete atoa.

Tani kila amuemua

Tuvuna atoa me lutulutuaane Iesu 1:1–2:23

Jon tau ngai asuu ia ghe aimonomosiaala salana Iesu 3:1–4:16

Iesu ghe uungula eGalilii me voto kalakalangina eGalilii 4:17–16:20

Inangari eaaitiutiu 4:17-25

Iesu ghe aippooaala tale motouru 5:1–7:29

Kasina mirikol Iesu ghe gheleila 8:1–9:34

Disaepolo atoa laghe uungula 9:35–11:1

Vaalua taumattu ghe tarala uunguaane Iesu 11:2–12:50

Iesu ghe apasungaala tale kiukiu niaimatoonga 13:1-53

Vaalua taumattu ghe nongola inangarina Iesu 13:54–16:20

Iesu ghe apasungaala ta disaepolo atoa 16:21–18:35

Iesu ghe uungula eJudia 19:1–25:46

Iesu ghe saela eJerusalem 19:1–20:34

Iesu ghe kupi ssola eJerusalem 21:1-22

Iesu me namu ngatoa ta aIsraeli etoa 21:23–23:39

Iesu ghe auliaala voto auena elutu 24:1–25:46

Matemateane me tototuaane Iesu 26:1–28:20

Nau Iesu ghe tokatoka eJerusalem 26:1-46

Laghe kunela Iesu me laghe gheleila niaisakei etana 26:47–27:26

Laghe avukala saela Iesu tale aikotoo 27:27-56

Laghe kaiaala Iesu me ghe totula tale nimate 27:57–28:20

Tuvuna atoa Iesu Karisto

(Luk 3:23-38)

¹ Lo ateva oia vuku eaauliaa tuvuna atoa Iesu Karisto. Iesu tuvuna ia Deivit. Me Deivit tuvuna ia Abraham.

² Abraham tamane ia Aisiki,

me Aisiki tamane ia Jekop,

me Jekop tamane ia Jiuda me tuena atoa me nengane atoa,

³ me Jiuda tamairarue ia Peres me Sera, kinairarua ta Tamar,

me Peres tamane ia Hesron,

me Hesron tamane ia Ram,

⁴ me Ram tamane ia Aminadab,

me Aminadab tamane ia Nason,

me Nason tamane ia Salmon,

- ⁵ me Salmon tamane ia Boas, kinna ta Reiab,
 me Boas tamane ia Obet, kinna ta Rutu,
 me Obet tamane ia Jesi,
⁶ me Jesi tamane ia King Deivit,
 me Deivit tamane ia Solomon,
 kinna Solomon manna akasina ia Uraea,
⁷ me Solomon tamane ia Rehoboam,
 me Rehoboam tamane ia Abia,
 me Abia tamane ia Eisa,
⁸ me Eisa tamane ia Jehosapat,
 me Jehosapat tamane ia Jehoram,
 me Jehoram tamane ia Usaea,
⁹ me Usaea tamane ia Jotam,
 me Jotam tamane ia Eihasa,
 me Eihasa tamane ia Hesikaea,
¹⁰ me Hesikaea tamane ia Manase,
 me Manase tamane ia Eimon,
 me Eimon tamane ia Josaea,
¹¹ me Josaea tamane ia Jehoiasin* me nengane atoa. Isaa o nau laghe
 soallotila aIsraeli etoa me laghe siola eBabilon.
¹² Ghe mene tiuaala nau eteva laghe siola eBabilon:
 Jehoiasin tamane ia Sealtiel,
 me Sealtiel tamane ia Serubabel,
¹³ me Serubabel tamane ia Abiut,
 me Abiut tamane ia Eliakim,
 me Eliakim tamane ia Eisor,
¹⁴ me Eisor tamane ia Sadok,
 me Sadok tamane ia Akim,
 me Akim tamane ia Eliut,
¹⁵ me Eliut tamane ia Eleasar,
 me Eleasar tamane ia Matan,
 me Matan tamane ia Jekop,
¹⁶ me Jekop tamane ia Josep, manna ia Meri, ta ngetana Meri Iesu ghe
 lutula, la aseasea va Mesaea ia.
¹⁷ Liuna avalua o me tuvuna atoa Abraham ghe tiuaala me ghe mae sio
 ta Deivit eroroo kasangaulu ghaata (14) vituu. Me ghe tiuaala ta Deivit me
 ghe ghaala nau eteva laghe siola eBabilon eroroo kasangaulu ghaata (14)
 vituu. Me ghe mene tiuaala nau laghe siola eBabilon me ghe ghaala nau ta
 Mesaea eroroo mene kasangaulu ghaata (14) vituu.

Lutulutuaane Iesu Karisto
(Luk 2:1-7)

¹⁸ Kiukiuna Iesu Karisto nau eteva ghe lutula, isaa avalua toko. Kinna
 ta Meri, laghe uela va aue eghaa Josep me emanna ia, me karika lalu ghe
 aso aitaaua me laghe tarala va tale sarasarakaniaane Spirit Manga ateva
 me Meri ghe kkaaila aliki eteva. ¹⁹ Josep ghulughuluena ia, ghe nongola va
 Meri ang ghe suusunuku, ghe tam annala tani ghelei epalata Meri ta mataira
 taumattu ngatoa, liuna avalua o me ghe nnaala va enim ruu einao inangari
 etingiu etairarua.

²⁰ Nau eteva Josep ghe annangaili llo, arovaeaata ta kapuna ensolo ateva
 Vau eteva ghe mae sio etana tale niasoasopoi eteae. Me ghe auliaala

1:5: Rutu 4:13-17. **1:6:** 2 Sam 12:24. **1:11:** 2 Ki 22-24; 2 Kro 36:10; Jer 27:20. * **1:11:** Tale
 inangari nge Grik, *Jekonia*, mene kateae ararina Jehoiasin. **1:12:** Esra 3:2. **1:18:** Luk 1:27, 35.

etana va, “Josep io tuvuna io Deiviti, urau mene matautu tani ghaa Meri va evausenimi ia. Unongo, ia o aliki eteva ekakkaaia ta kovana, Spirit Manga ateva ghe taue lao sio etana. ²¹ Alike eteva aue elutu etana, taita ia, me ukolo ararina ateae ta Iesu, poli ia aue easaangi kapuna taumattu ngatoa† tale kaluira ssavoto.”

²² Isaa akapa llo Vau eteva ghe auliaala ta propete ateva emua arau ang ghele kaurekatila, ghe uela va, ²³ “Am nongola, kateva vause karika ghe aso tee teva taita aue esunuku me emolena aliki eteva taita ia, me aue la kolo ararina ateae ta Immanuel” — malloeana va “God etokatoka teeita.”

²⁴ Nau eteva Josep ghe anguula, ghe gheleila voto kapuna ensolo ateva Vau eteva ghe auliaala etana, me ghe ghaala vause ateva. ²⁵ Me karika ghe aso teeila lomosina ta ghe molenaala aliki eteva, taita ia. Me ghe kolola ararina ateae ta Iesu.

2

Tau ngalomasaanga atoa laghe mae sio tani tara Iesu

¹ Meri ghe molenaala Iesu eBetlehem nge Jiudia nau ta King Herot. Iesu ang ghe lutula me emulina tau ngalomasaanga atoa, tale pai nge sinaka esae laghe mae sio eJerusalem ² me laghe aikolomaa see va, “Eaa ia aliki eteva ghe lutula, kapuira Kingi ia aJiu etoa? Ami ghe tarala kattona ateva tale pai nge sinaka esae ativilau, me ami mae sio tani kkaueinia.”

³ Nau eteva King Herot ghe nongola isaa o inangari ghe annangailiila, me tee ila akapa taumattu nge Jerusalem atoa, ila tee laghe anna ngatingina.

⁴ Vara me ghe kolola namu ngatoa tana pristi me tau ngalomasaanga atoa tale inangari nipaopao kapuira ila taumattu ngatoa, laghe mae sio tani velu eitauaa, me ghe kolomilala va eaa Mesaea ngateva aue elaa lutu. ⁵ Me laghe liula etana va, “Aue elutu eBetlehem nge Jiudia. Poli propete ateva ghe pitila inangari isaa avalua toko,

⁶ “Me io Betlehem tale kosa nge Jiuda,

karika tani ghaunaaili ararim ateae tale isaa akapaaili masaliki nge Jiuda,

ta poli ta ngetam aue taumattu ngateva namuu ia aue etingina.

Me ia aue eaitoiaa kapughu aIsraeli etoa.’ ”

⁷ Herot ghe nongola isaa o inangari me ghe suu eisuliaala inangari ta tau ngalomasaanga nge sinaka esae atoa va la laa taraia. Nau eteva laghe lao sio, ghe kolomi emasinailala va, “Elovisa am ghe tani tarala katto ateva ghe kaurekatila?” ⁸ Vara me ghe sungilala va, “Am lao sio eBetlehem, me am laa pae aotu va eaa ang ghele lutula ia o aliki eteva. Nau eteva am tani taraia am mene mae auliaa etaghi, me aghi tee alaa kkaueinia.”

⁹⁻¹⁰ Nau laghe ruula tani nongo inangarina Kingi, laghe kasula. Laghe laolao me laghe mene tarala katto ateva, laghe taraiela esinaka esae. Nau eteva laghe mene tarala katto ateva laghe masimasieiliila. Ia o katto ateva ghe muemueinila elao la me ghe tokala epona kona aliki eteva ghe asoaso.

¹¹ Tau ngalomasaanga atoa laghe kupi ssola tale ale ateva, me laghe tarala aliki eteva me kinna ta Meri. Laghe tturru siola me laghe kkaueiniela, me laghe otila uneira aikaai, me laghe kapela golo, frankinsens,* me murr† tani

1:21: Luk 1:31; 2:21. † **1:21:** Tale inangari nge Hibru, Iesu malloeana va “Iaue easaangi”. Iaue ararina ateae God tale Pokane ateva Inangari niaippooa ngaitauaa. Utara Eksodis 3:14-22. **1:23:** Ais 7:14. **1:25:** Luk 2:21. **2:2:** Nam 24:17. **2:6:** Maeka 5:2; Jon 7:42. **2:11:** Sams 72:10-15; Ais 60:6. * **2:11:** frankinsens frankinsens masi voto aighelei aiaavusuvusuena. † **2:11:** murr voto la raarariaa tale taumattu matena.

taula etana. ¹² God ghe auliaala kieira tale niasoasopoi va la rau mene lao nongina Herot etokatoka, me laghe lao ppae sio tale katikirighi salana me laghe lao sio tanganueira.

Josep, Meri me aliki eteva laghe siola eIjip

¹³ Laghe kasula, me kapuna ensolo ateva Vau eteva ghe rekataala ta Josep, tale niasoasopoi eteae. Ensolo ateva ghe uela etana va, “Totula, me ughaa aliki eteva me kinna, me amatolu kasu parasi sio eIjip. Am sio toka eIjip, aue aghauliaa etam va elovisa am mene kiri sae. Poli Herot epaepae aliki eteva tani uvi ematea.”

¹⁴ Josep ghe totula me ghe ghaala aliki eteva me kinna, me eleivoo arau laghe siola eIjip. ¹⁵ Josep ghe tokala eIjip me ghe ghaala nau eteva Herot ghe matela. Isaa o voto ghe lutula tani akaurekati llo Vau eteva ghe auliaala ta propete ateva emua arau. Ghe uela va, “Natughu taita ateva ghe tokatoka eIjip, me aghe mene kolo veluela eIjip.”

King Herot ghe auliaala va la uvi emate aliki taita atoa

¹⁶ Nau eteva Herot ghe kilala va tau ngalomasaanga atoa laghe kameala me karika laghe mene kiriaa lao sio, ghe sessai emateala, me ghe uela va la uvi emate isaa akapaaili natu ngaliki taita eBetlehem me llo masaliki etokatoka akalakalaa, aliki aneira ninamanama etittiuua ta ghaluae me esiosio aloi, poli tau ngalomasaanga atoa laghe uela va laghe tarala katto ateva ghe kaurekatila ghaluae ninamanama ang ghe lange sio. ¹⁷ Llo propete Jerimaea ghe auliaala ang ghele tani kauerekatila, ghe uela va,

¹⁸ “Laghe nongola lingi ngalo ateva eRama.

Laghe ngangngala me laghe ale amate,
Resol ghe ngangngala natuna atoa.

Karika ghe aloanna righi airuui ngalo,
poli ila akapa natuna atoa ngila ghe matela.”

Josep me Meri lalu ghe kiri saela eNasareti

¹⁹ Nau Herot ghe matela, ensolo ateva ghe rekatala ta Josep tale niasoasopoi eteae eIjip ²⁰ me ghe auliaala etana va, “Ughaa aliki eteva me kinna me amatolu mene sae eIsrael. Ta lo atoa laghe aaloanna tani uvi emate aliki eteva angila ghe mate akapala.”

²¹ Josep ghe totula me ghe ghaala aliki eteva me kinna me laghe saela eIsrael. ²² Vara me Josep ghe nongola va ouna ateva King ta Arkelaus ghe ghaala liuna ateva tamana ta Herot eJiudia me ghe matautula tani lao. Vara me God ghe auliaala kiena tale niasoasopoi eteae va erau mene toka eJiudia, me ghe saela eGalilii. ²³ Ghe lao sio tani toka tale masaliki eteae laghe aseasea va eNasareti. Isaa o llo propete atoa laghe auliaala ghe tani kaurekatila va, “La aseasea va aNasareti ia.”

3

Jon tau ngai aasuu ia

(Mak 1:1-8; Luk 3:1-9, 15-17; Jon 1:19-28)

¹ Tale isaa o nau Jon tau ngai aasuu ia ghe mae sio me ghe tokatoka tale voto karika righi taumattu etana eJiudia. Ghe poppooaa tale taumattu ngatoa. ² Ghe ue va, “Am nna ngaioghioghiaa poli ararimangali ngepona liu eteva ange aakalakalaa.” ³ Ia o taumattu ngateva ta Jon, God ghe aulieiniela ta propet Aisaea va,

“Tale voto ateva karika righi taumattu etokatoka etana, lingi ngalo taumattu ngateva ekolokolo, eue va,

‘Am aimonomosiaa salane atikirighi Vau eteva, am ghelei eghulughuluena akapa salane.’ ”

⁴ Unna aiaasae Jon laghe gheleila tale uu kamolo, me ghe ai-iriala paia eteae viliki vulumakao ia. Ghe namanama toto me iruena nge tapaa tuvui. ⁵ Tale isaa o nau taumattu nge Jerusalem me isaa akapa eJudia me taumattu ghe tokatoka kalakalaa tale ateo atea eJodan laghe mae sio ta Jon. ⁶ Laghe aaulia ngaotu kaluira ssavoto me ghe aasuula tale ateo atea eJodan.

⁷ Jon ghe taatara va oroieili Paresi me Sadiusi etoa laghe mae sio va easuula. Vara me ghe uela etaira va, “Am nongina va natuira iem katu ngatoa! See euela etaimim va am ilou vuli sessaiaane Vau eteva ange anna tani lutu etaimim? ⁸ Am kunea righi ueimim tani apasunga va ngam ghe vella kaluimim ssavoto. ⁹ Am rau mene ue va, ‘Ami tuvuna amami Abraham.’ Poli aghaauliaa etaimim va God eroroo tani ghelei isaa o atu etuvuna Abraham. ¹⁰ Kulum ateva aimonomosiaanna ia tani tue akatuu ai, me isaa o ai karika ekuukunea masi uene aue la tue me la sau velu sae tale kuraa atea.

¹¹ “Aghi aghaasuem tale manu tani apasunga va ngam ghe nna ngaioghioghiaala. Me taumattu ngateva auena emae, ia sarasarakaniaane elaulau sarasarakaniaa, karika masi taumattu ngieghi tani sau unna aikasukasu. Ia aue eaasuem tale Spirit Manga ateva me tale kuraa atea. ¹² Ia emaema arova taumattu ngateva eposoposo unna poko ateva aisaraki uiti, tani pola uiti me kou uiti. Me eatoka aitaava uiti tale ale ngai atoka uiti eteva, me aue evelu sae kou uiti tale kuraa atea karika eroroo tani pala.”

Jon ghe asuula Iesu (Mak 1:9-11; Luk 3:21-22)

¹³ Tale isaa o nau Iesu ghe kasula eGalilii me ghe mae sio eJodan va Jon easuua. ¹⁴ Jon ghe gheghelei rungania tani ue va, “Emaamasina arova io uasuueghi, vaalua me umae sio etaghi?”

¹⁵ Iesu ghe liula etana va, “Masina. Ghaine ughelei nongina aghauliaa. Tale isaa o salana, ita ghelei isaa akapaaili voto God ealoanna va ita ghelei.” Liuna avalua o me Jon ghe aimulisi teela inangarina Iesu. ¹⁶ Nau Jon ghe asuula Iesu, Iesu ghe laa sae tingina epona, me epona liu ghe otiela me ghe tarala Spiriti eteva kanna ia God ghe sio mae nongina ghila ateva valusu ia, me ghe toka saoaala etana. ¹⁷ Me epona liu kateva lingi ngalo ghe ue va, “Ia o natughu eteva aghaailousieinia, me masimasiaa ta ngetana namungaili.”

4

Satana ghe tootoongaala Iesu (Mak 1:12-13; Luk 4:1-13)

¹ Tale isaa o nau Spiriti eteva ghe ssoaala Iesu tale voto ateva karika righi taumattu etana va namu ngateva ta raroai etoa etootoongainia. ² Iesu ghe naela ghe roola ghaatingaulu (40) llaa me ghaatingaulu voo, me airuuruu tale isaa o nau, ghe maloola. ³ Vara me saikame ateva ghe mae sio tani rekataa etana, me ghe uela etana va, “Arova koronna va Natuna io God, uauliaa tale atu o me ekoli me everete.”

3:4: 2 Ki 1:8. **3:7:** Mat 12:34; 23:33. **3:9:** Jon 8:33, 39; Rom 4:12. **3:10:** Mat 7:19; Luk 13:6-9. **3:11:** Jon 1:26-27, 33; Apos 1:5. **3:16:** Jon 1:32. **3:17:** Sams 2:7; Ais 42:1; Mat 12:18; 17:5; Luk 9:35. **4:1:** Hib 2:18; 4:15. **4:2:** Eks 34:28.

⁴ Iesu ghe liula me ghe uela va, “Uru ngai Manga ateva eue va, ‘Karika taumattu ngatoa va la maamaulue nonga tale inana, karika, ta nau la aimulisi tee isaa akapaaili inangarina God aue la mauue.’”

⁵ Ghe aulia ngavaluela o, me namu ngateva ta raroai etoa ghe mene laoinie sio tale masaliki taatara ateaie manga ia.* Me ghe saeainiela tale pungani ale manga ateva, ⁶ me ghe uela etana va, “Arova koronna va Natuna io God, ulove velu sio, poli Uru ngai Manga ateva eauliaa va, “‘Aue esuu kapuna ensolo atoa

aue la sau evukalaio
me karika aue utaghua kekem tale atu.’”

⁷ Iesu ghe uela etana va, “Uru ngai Manga ateva emene ue va, ‘Urau mene tootoonga Vau eteva kapum Goto ia.’”

⁸ Namu ngateva ta raroai etoa ghe mene ghaaie saela tale motouru eteva iaaili epona, me ghe apasungaala patunganua namu ngakapa atoa tale kosa ateva oia, me masi voto atoa etaira. ⁹ Me ghe uela ta Iesu va, “Aue atau aatu isaa akapaaili voto angu tarala, arova ussuuiaa me ukkaueinieghi.”

¹⁰ Iesu ghe uela etana va, “Vellaio Satana, ta poli Uru ngai Manga ateva eauliaa va, ‘Ukkauaa Vau eteva kapum Goto ia, me uaimulisi teeia nonga.’”

¹¹ Me namu ngateva ta raroai etoa ghe kasu vuliela, vara me ensolo atoa laghe mae sio tani sausia.

Iesu ghe tiuaala tani uungu
(Mak 1:14-15; Luk 4:14-15)

¹² Nau eteva Iesu ghe nongola va Jon ie tale ale mata voovoo, ghe oghi lao sio eGalilii. ¹³ Ghe kasu vulila eNasareti me ghe lao sio tani toka eKapenium tale ateo talia ngateae tale kosaira ararimangali elua ta Sebulon me Naptalae. ¹⁴ Iesu ghe gheleila isaa o voto tani akauerekati inangari propet Aisaea ghe auliaala,

¹⁵ “Taumattu tale kosa nge Sebulon me Naptalae,
kosa etokatoka tale salana atikirighi elaa ghoa elamana, me kosa tale
pai kativilau tale ateo ateaie eJodan,
Galilii kosaira ia taumattu ngeleka atoa.

¹⁶ Isaa o taumattu etokatoka tale saurrom ateva
ngila ghe tarala paka mallanga ateva,

lo atoa la tokatoka tale saurrom masau ta Vau ngepona ateva†
mallanga ateva ang ghe llaala etaira.”

¹⁷ Tale isaa o nau Iesu ghe tiuaala tani ppooaa, ghe ue va, “Am nna ngaioghioghiaa, poli ararimangali eteva epona liu ange aakalakalaa.”

Iesu ghe kolola disaepolo ghaata
(Mak 1:16-20; Luk 5:1-11)

¹⁸ Iesu ghe kasukasu elaolao tale sama ateo talia ngateae eGalilii, me ghe tarala tue me nenga alua, Saemon la kolokoloa va Pita etana, me nengane ta Andru. Lalu ghe lukuluku ta tau ngelamana ilalua. ¹⁹ Me ghe uela ta ngetairarua va, “Amalu mae usieghi me aue agheleiemalua me amalu tau ngai luku taumattu.” ²⁰ Me arovaeata ta lalu ghe velu elokoila uvena me lalu ghe usiela.

²¹ Iesu ghe mene kasu tee lao sio me ghe mene tarala mene ghalua tue me nenga, Jon me Jeimis, natuna ilalua Sebedi, lalu ghe tokatoka tee tamairarua

4:4: Diut 8:3. * **4:5:** masaliki taatara ateaie manga ia Malloeana va Jerusalem. **4:6:** Sams 91:11-12. **4:7:** Diut 6:16. **4:10:** Diut 6:13. **4:12:** Mat 14:3; Mak 6:17; Luk 3:19-20. **4:15:** Ais 9:1-2. † **4:16:** Tale inangari nge Grik, voto ateva tootoo nimate. **4:17:** Mat 3:2; 19:27.

ta Sebedi, laghe anuunumi uneira uvena epona tale paanaka ateva, me Iesu ghe kololaluela. ²² Karika lalu ghe aitoila ta lalu ghe kkure vulula paanaka ateva me tamairarua me lalu ghe usiela.

Iesu ghe poppooaa me ghe gheeghelei emasina taumattu ngatoa
(Luk 6:17-19)

²³ Iesu ghe kasukasu ekapa see eGalilii, me ghe aapasunga tale aleira ale nivelu eitauaa me ghe poppooaa masi kiukiuna ararimangali eteva, me ghe gheeghelei emasina isaa akapa asease sessa atoa. ²⁴ Kiukiuna Iesu ghe lao akapa seela tale provinsi eteva eSiria, me taumattu ngatoa laghe maemaeaa asease tau sessa atoa, lo atoa ghe anoanongi ila, me lo atoa raroai etoa laghe kupilala, me lo atoa laghe oo, me lo atoa karakanna ila, me Iesu ghe ghelei emasinailala. ²⁵ Oroi ila taumattu nge Galilii etoa me taumattu tale Kasangauluae Masaliki Taatara, me aJerusalem atoa, me aJiudia ngatoa me lo atoa tale pai kativilau tale ateo atee eJodan, laghe usiusie see.

5

Iesu ghe aippooaa tale motouru

¹ Nau eteva Iesu ghe tarala taumattu ngatoa laghe oroieili ila, ghe saela tale motouru eteva, me ghe toka siola, me kapuna disaepolo atoa laghe mae sio etana. ² Me ghe tiuaala tani apasunga etaira va,

Niarangise
(Luk 6:20-23)

³ “Aue emasinaaili ta lo atoa la kilakila va masi uunguaane ateva God karika ia etaira me la aloannaaili tani ghaaia,

ta ararimangali ngepona liu eteva aue anueira ia.

⁴ Aue emasinaaili ta lo atoa la ghaalousiusi,

ta God aue airuui ngalo ia ta ngetaira.

⁵ Aue emasinaaili ta lo atoa la siosioaa nannaaira,

poli kosa akapa ateva aue kaluira ia.

⁶ Aue emasinaaili ta lo atoa la ghaaloannaaili ghulughuluena, nonginaaili lo ateva emaamaloo ealoannaaili tani namanama, me ekaakangngata tani ropi,

ta God aue eghelei eroorooaa aloannaaira.

⁷ Aue emasinaaili ta lo atoa la aalousiusi tee mene katoa,

ta God aue ealousiusi teeila.

⁸ Aue emasinaaili ta lo atoa urunguitaniira raarangisana,

ta aue la tara God.

⁹ Aue emasinaaili ta lo atoa la ghaalokoi luei,

ta God aue easela va natuna ila God.

¹⁰ Aue emasinaaili ta lo atoa la ghaaghaa mmarikana mausi masi gheegheleiaaira,

ta ararimangali ngepona liu eteva aue anueira ia.

¹¹ “Aue emasinaaili etaimim arova taumattu ngatoa la pilosiem, me la ghelei saasakiaa teeiem, me la ghaikameaa teeiem, poli ararighi eteae.

¹² Voto sesa laghe tani gheeghelei tee propete atoa emua arau, isaa oia la mene gheeghelei teeiem. Am masimasi etingina, ta aipoliimim namungaili isaa epona liu.

4:23: Mat 9:35; Mak 1:39; Apos 10:38. **4:24:** Mak 6:55. **4:25:** Mak 3:7-8. **5:3:** Ais 57:15.
5:4: Ais 61:2-3; Aotu 7:17. **5:5:** Sams 37:11. **5:6:** Ais 55:1-2. **5:10:** 1 Pita 3:14. **5:11:** 1 Pita 4:14. **5:12:** 2 Kro 36:16; Apos 7:52.

Uela me mallanga ateva
(Mak 9:50; Luk 14:34-35)

¹³ “Am uela am tale kosa ateva oia, me arova namina ateva uela ateva ekapa, o vaalua aue ita mene gheleia me emene tue namina? Ta ia o ange kapala maamasikaniaane. Taumattu ngatoa aue la nim sau velua me la sachieinia tale kosa ateva.

¹⁴ “Am mallanga am tale kosa ateva. Masaliki taatara atea etokatoka epona tale motouru, karika erooroo tani aisulia. ¹⁵ Me tee taumattu ngatoa karika la ghaarokoti kuraaira lam atea va la ghaatoka pakeainia tale keru. Ta la ghaatokaie sae tale aitiitinginane, ta etautau lao mallanga tale taumattu ngatoa tale ale ateva. ¹⁶ Ia avalua o me, am apasunga mallangiimim tale taumattu ngatoa, me aue la tara masi gheeleiaaimim, me aue la tau sae ararina atea Tamaimim epona liu.

Inangarina nipaopao God

¹⁷ “Am rau mene annaa va aghe mae sio tani ghaa velu inangari nipaopao me inangariira propete atoa. Karika! Aghe tam mae sio tani ghaa velu, ta aghe mae sio tani ghelei eroorooa. ¹⁸ Aghaaulia ngakoronna etaimim va elomarase me kosa ateva oia aue ekapa, me aue karika teva mata nginangari ghaunaaili tale inangari nipaopao aue ekapa, karika, lomosina ta llo God ghe auliaala tale inangari nipaopao etani lutu ekapa. ¹⁹ Arova see ia taumattu ngateva etam aimulisi tee tuku kateva tale inangari nipaopao me eapasunga ta mene katoa tana taumattu tani tam aimulisi tee, karika aue enamuu tale ararimangali ngepona liu eteva, me lo ateva eaimulisi tee, ia ararina atea aue enamuu tale ararimangali ngepona liu eteva. ²⁰ Aghaauliaa etaimim va, arova gheegheleiaaimim ghulughuluena etam lau masi gheegheleiaaira Paresi etoa me tau ngai aapasunga ngatoa tale inangari nipaopao, karika aue am sso tale ararimangali ngepona liu eteva.

Salana tani ghelei eghulughuluena inangari

²¹ “Ngam ghe nongo vella va laghe auliaala ta lo atoa emua arau va, ‘Am rau mene aiuvi emate. Me arova lo ateva eaiuvii emate aue elaa ghaisakei.’ ²² Me aghi aghaauliaa etaimim va, lo ateva esessaia ta nengane ateva, aue eaisakei, me see eue ta nengane va, ‘Alo kapakapa ateva,’ aue elaa ghaisakei ta kansolo atoa, me lo ateva eue ta nengane va, ‘Tau veevee ateva!’ aue kuraa atea eataia eGehenna.

²³ “Liuna avalua o me arova angu maemaeaa kalum aighelei masi aiaavususuena, me uannaa lao mua kapum ateva ghe annaa va ughe ghelei saasakiaala etana, ²⁴ uatoka sio mua kalum aighelei masi aiaavususuena me ulaa taraia me amalu mene sama aitauea, me auena umae ghelei masi aiaavususuena sae ta God.

²⁵ “Arova aissanim ateva ange laolao tani aulieinio ta tau ngai ghelei niaisakei eteva, ulaa tara parasia, me uauliaa etana va ualoanna va amalu kkaluaa llo voto amalu ghe gheleila karika masina, ta erau laa aulieinio ta tau ngai ghelei niaisakei eteva va elaa tauo ta polisi eteva, va elaa ghatokaio sso tale ale mata voovoo. ²⁶ Aghaaulia ngakoronna etam va karika aue ukupi ghoa tale ale mata voovoo lomosina ta utau ekapa lao viliki veu la ghase va utau lao.

Nilai sari

²⁷ “Ngam ghe nongo vella va laghe auliaala va, ‘Karika umene lai sari.’

²⁸ Me aghi aghaauliaa etaimim va, arova see ange tara ssaila vause ateva me ange annaa saasakiaala etana, ia ange lai sari teeiela tale urunguitanina ateva. ²⁹ Arova matam muenna ativilau eghaaghaaio lao tale ssavoto, uvaliki velua me usau velua. Emaamasina arova kateva nonga ia tuku voto tale vilikim evulla ia, me karika va isaa akapa vilikim elao eGehenna. ³⁰ Me arova nimam muenna atelange ange gheleila va angu lao sio tale ssavoto, usai kotooia me usau velua. Emaamasina arova kateva nonga ia tuku voto tale vilikim evulla ia, me karika va isaa akapa vilikim elao eGehenna.

Niairatii tale taita me vause
(*Mat 19:9; Mak 10:11-12; Luk 16:18*)

³¹ “Ngam ghe nongo vella va, ‘Arova taita ateva ange ratila vausenna ateva, eghelei tikirighi unna uru ngai tani apasunga va ange ratirati vause ateva me etau lao ta vause ateva.’ ³² Me aghi aghaauliaa etaimim va arova taita ateva enim rati vause ateva tale kasina ppae asease voto me karika tale uunguaa niailai salosalooa see, ia o taita ateva eghelei vause ateva aue eaikune taita, me lo ateva taita emene lai ta vause ateva o ange lai sarila.

Inangari nialokoi

³³ “Ngam ghe nongo vella va laghe auliaala ta lo atoa emua arau va, ‘Am rau mene kamekame nau ngam gheleila inangari nialokoi, me nau ngam gheleila inangari nialokoi ta Vau palepale ateva, utani aimulisi tee llo uaauliaa.’ ³⁴ Me aghi aghaauliaa etaimim, am rau mene auliaa sae inangari nialokoi, karika epona liu tee, poli aitokatokane ateva o God, ³⁵ me tale kosa ateva oia, poli God eaatingina saooa kkena etana, me am rau mene auliaa sae inangari nialokoi tee eJerusalem, ta kinatama masalikina ia Kingi eteva iaaili epona. ³⁶ Urau mene auliaa inangari nialokoi tale urum ateva, ta karika urooro tani ghelei katikirighi uu ngurum va eusousoana me evoovongiena. ³⁷ Am nim ue va ‘ue’ o ‘karika’, me karika am mene auliaa sae inangari nialokoi. Llo am nim mene auliaa, kanna sesa taumattu ngateva.

Am rau mene ailiuaa voto sesa
(*Luk 6:29-30*)

³⁸ “Ngam ghe nongo vella va laghe auliaala va, ‘Arova ughelei saasakiaa matana taumattu ngateva, eroo tani ghelei saasakiaa tee matam, me arova utumari kotoo ngalungaluna, eroo tani tumari kotoo tee ngalungalum.’ ³⁹ Me aghi aghaauliaa etaimim va am rau mene liu voto sesa ngila ghelei teeiemla, arova ngila posalala bbam muenna ativilau, umene kirio me la mene posala mene kativilau. ⁴⁰ Arova taumattu ngateva ange laoainio sio tale niaisakei me eue tale niaisakei va upolia tale unem sioto ateva, masina utau tee lao aiaasae ngeleka ateva. ⁴¹ Me arova la ue etam va usunuki ghinna me ukasuaa tale kateva kilomita, masina usunuki me ukasuaa lao ta ghalua kilomita. ⁴² Utau lao voto tale lo ateva elooloo, me urau mene aroo tale taumattu eanna tani ghaa voto pei niliu auena.

Uailousiaa tau ngai ssateem atoa
(*Luk 6:27-28, 32-36*)

⁴³ “Ngam ghe nongo vella va laghe auliaala va, ‘Uaielousiaa taumattu ngateva kalakalangina ia etam me ussa tee aissateem ateva.’ ⁴⁴ Me aghi

5:29: Mat 18:9; Mak 9:47. **5:30:** Mat 18:8; Mak 9:43. **5:31:** Diut 24:1-4; Mak 10:4. **5:32:** 1 Ko 7:10-11. **5:33:** Diut 23:21; Lev 19:12; Nam 30:2. **5:34:** Ais 66:1; Jms 5:12; Mat 23:22. **5:35:** Sams 48:2; Ais 66:1. **5:38:** Eks 21:24; Lev 24:20; Diut 19:21. **5:43:** Lev 19:18. **5:44:** Eks 23:4-5; Luk 23:34; Apos 7:60; Rom 12:14, 20.

aghaauliaa etaimim va am ailousiaa aissaniimim atoa, me am looloo sae va God aue esausi lo atoa la gheelei saasakieinam. ⁴⁵ Arova am ghelei evalua o, aue natuna am Tamaimim ateva etokatoka epona liu, ta ia egheeghelei sinaka esaesae tale taumattu sesa me masina, me egheeghelei vaoo ateva ekaakatuu tale ghulughuluena atoa me tale tam ghulughuluena atoa. ⁴⁶ Arova am ailousiaa lo atoa la ailousieinam, saa aipolipoli aue am ghaa? Tau ngai ghaa takis atoa la gheelei evalua tee o. ⁴⁷ Me arova am ue va, 'Elue talaua,' nonga ta kapuimim atoa, am nim gheelei nongina katoa la gheelei. Tau ngeleka tee atoa la gheelei evalua o! ⁴⁸ Am ghulughuluenaaili nongina Tamaimim ateva epona liu ghulughuluenaaili ia.

6

Vaalua tani aiparruuii

¹ “Am tani nanna ngamasina nau eteva am anna tani apasunga masi uunguaaimim ta mataira taumattu ngatoa va la tara. Arova am gheeghelei evalua o, karika aue am ghaa aipolipoli ta Tamaimim ateva etokatoka epona liu.

² “Liuna avalua o me nau eteva angu tautau lao voto ta lo atoa karika rigi peiira, urau mene ghelei nongina usimaghalua atoa, la saasama me la gheeghelei tale ale nivelu eitauaa me tale salana, va la taraila me la asaesae arariira. Aghaaulia ngakoronna etaimim va, ila o taumattu ngatoa angila ghe ghaala arau aipoliira. ³ Me io, nau eteva uparruu lo ateva karika rigi peina, ugheelei eisulia.* ⁴ Unem niaiparruuii unim ghelei eisulia, Tamam ateva etaatara voto ugheelei eisulia, me ia aue etau aatu aipolipoli etam.”

Nilooloo sae (Luk 11:2-4)

⁵ “Me nau am aloanna tani looloo sae, am rau mene ghelei nongina usimaghalua atoa. La ghaloannaaili tani looloo sae tale ale nivelu eitaua ngatoa me tale aighoughou tale salana va taumattu ngatoa la taraila. Aghaaulia ngakoronna etaimim va, ila o taumattu ngatoa angila ghe ghaala arau aipoliira. ⁶ Me io, nau eteva ualoanna tani looloo sae, ukupi sso tale alem atiulu, me ukavati atamana atea me io nonga ulooloo sae ta Tamam, me Tamam etaatara llo ugheeghelei eisulia aue etau aatu aipolim. ⁷ Me nau eteva am looloo sae, am rau mene auliaa oroieili inangari karika malloeana nongina tau ngeleka atoa. La annaa va arova la auliaa oroieili inangari aue kapuira goto atoa la nongola. ⁸ Am rau mene usi gheegheleiaaira, poli Tamaimim ateva ekilakila akasina llo voto am aloanna me am nim aaimuli tani kolomia. ⁹ Liuna avalua o me am looloo sae avalue toko va:

“Tamaimami epona liu

usausiemami tani oneoneaa ararim atea va manga ia,

¹⁰ ami aloanna va ararimangalim ateva emae,
me tale kosa ateva oia ami ghelei aloannaam
nongina epona liu.

¹¹ Utau rooroaa mae aneimami inana tale lo ateva oia nau.

¹² Ukkaluaa gheeleiaamami sesa,
nongina ami kakkaluaa lo atoa gheeleiaaira sesa etaimami.

¹³ Urau mene tau veluemami va ami lao tale nitootoonga,

5:48: Lev 19:2; Diut 18:13. **6:1:** Mat 23:5. * **6:3:** Tale inangari nge Grik, urau mene ghelei va nimam uaise atelange ekila va sa ateva nimam muenna atelange egheeleia. **6:5:** Mat 23:5; Luk 18:10-14. **6:7:** 1 Ki 18:26-29. **6:8:** Mat 6:32. **6:10:** Luk 22:42. **6:12:** Mat 6:14-15; 18:21-35. **6:13:** Luk 22:40; Jms 1:13; Jon 17:15; 2 Tes 3:3; 2 Tim 4:18.

me uakekkeliemami tale sesa taumattu ngateva.’†

14 Poli arova am kkaluaa kaluira ssavoto lo atoa la gheelei teeiem, aue Tamaimim epona liu aue ekkaluaa kaluimim tana ssavoto. 15 Me arova am tam kkaluaa kaluira ssavoto taumattu ngatoa, aue Tamaimim ateva karika aue ekkaluaa kaluimim tana ssavoto.”

Ninae

16 “Nau angam naela, am rau mene ghelei taataraimim va esesaaili nongina usimaghalua atoa la gheeghelei. Nau la naenae, la ghaloanna va taumattu ngatoa la kilaila, liuna avalua o me karika la gheelei er-aarangisanaila. Aghaaulia ngakoronna etaimim, ila o taumattu ngatoa angila ghe ghaala arau aipoliira. 17 Me io, nau unaenae usile urum ateva me upora matam 18 me karika aue taumattu ngatoa la tara kilai o va unaenae, ta Tamam ateva etaatara voto ita tam taatara eaaisulia, ie nonga aue ekila, me etau aatu aipolim.”

Uunguaa nighaa aitauaa ghinna

(Luk 12:33-34)

19 “Am rau mene ghaa aitauaa peiimim tale kosa ateva oia. Aue ane ateva enama ghinna me tee aue erroso me tau niainao atoa tee aue la rruti ale me la ainao. 20 Ta am atoka aitauaa peiimim epona liu, me aue karika ane ateva enama me tee karika aue erroso, me tau niainao atoa karika aue la rruti ale me la ainao. 21 Ta poli voto ateva peim etokatoka etana, aue urunguitanim tee ateva etoka etana.

Matam — lam tale vilikim

(Luk 11:34-36)

22 “Matam alua mallanga ilalua tale vilikim. Arova matam va masina, vilikim akapaaili aue epasu tale mallanga ateva. 23 Me arova matam va sesa, aue vilikim akapaaili aue saurrom. Liuna avalua o me arova mallanga ateva etam va saurromiena ia, aue saurrom ateva enamungaili.

Karika urooroo tani uungu ta ghalua vau

(Luk 16:13)

24 “Karika teva taumattu erooroo tani uunguu ta ghalua vau, ta aue tani ssa tee kateva me aue emasiaa kateva, me aue enongo usilaa kateva me eliu vilina ta mene kateva. Karika urooroo tani uungu ta God me viliki veu.

Urau mene ghelei nannaam va esio euu

(Luk 12:22-34)

25 “Liuna avalua o me aghaauliaa etaimim va, am rau mene annangaili maamauluaaimim va sa ateva aue am namaia, me am ropia, me am rau mene annangaili vilikiimim va sa ateva am asaeaa. Karika am kilakila va maulue ateva namuu ia ta matane God, me inana isaa euu, me vilikiimim isaa epona, me aiaasae isaa euu? 26 Am tara ghila atoa la looloo. Karika la pasapasa utana me karika la mukemuke atoka, ta Tamaimim ateva epona liu eangiinginila. Karika am kilakila va Tamaimim ateva, nannaane etaimim elaulau aitarane tale ghila atoa? 27 Me arova utoka annaa nonga sa ateva aue elutu tale maamauluaam, isaa o voto aue etau aatu maulue me umene toka tau lao?

28 “Vaalu me am annangaili aiaasae? Am tara palaoa ngatoa la piipinosa, karika la uungu me karika la gheeghelei kalioira. 29 Aghaauliaa etaimim va

† **6:13:** Kasina uru ngai laghe pitila, laghe mene uela va, ta poli ararimangali, sarasarakana me nitau sae isaa etam nau ekapa atoa, koronna. **6:14:** Mak 11:25-26. **6:16:** Ais 58:5-9. **6:19:** Jms 5:1-3. **6:20:** Mat 19:21; Luk 18:22. **6:25:** Plp 4:6; 1 Tim 6:6-8; 1 Pita 5:7. **6:26:** Mat 10:29-31; Luk 12:6-7. **6:29:** 1 Ki 10:4-7; 2 Kro 9:3-6.

molumoluaane Solomon masinaaili, me karika ta palaoa ngatoa, la laulau molumoluaane Solomon. ³⁰ God eaamolumolu evalua o rarrasa atoa, la piipinosa ghaine, me nimanaa la taula sae tale kura atea. Am rooro tani aikaaiiaa va aue eaamolumolu evaluateiem tee o, uneimim niaikaaiiaa ghaunaaili. ³¹ Liuna avalua o me am rau mene annangaili va, ‘Sa ateva aue ami namaia?’ me ‘Sa ateva aue ami ropia?’ me ‘Aue ami asae sa ateva?’ ³² Tau ngeleka atoa la iilou paepae isaa o voto, Tamaimim ateva epona liu ekilakila isaa o voto am tuutukuna etana. ³³ Mata ngemua ateva voto am gheleia, am pae mua ararimangalina ateva God me gheegheleiaane ghulughuluena tale maamauluaaimim, me ia aue etau aatu isaa o voto etaimim. ³⁴ Liuna avalua o me am rau mene annaa nimanaa, poli maamaataniaa nimanaa epei nimanaa. Me kateva kateva nau, rooroona ia tale maate.

7

Niaisakei

(Luk 6:37-38, 41-42)

¹ “Am rau mene ue va katoa nonga taumattu la gheelei ssavoto, ta God erau auliaa teeiem va am tee am gheelei ssavoto. ² Poli God aue eghelei niaisakei etaimim nongina am gheelei niaisakei ta katoa, me saa ase voto am gheelei ta mene kateva, God aue eghelei tee etaimim.

³ “Vaalua me utaata nonga tuku vongovongo arighi ta matana kapum ateva me karika uannaa tuku palanga ateva ta matam? ⁴ Vaalua me uue ta kapum ateva va, ‘Mae sio me aghaa velu tuku vongovongo arighi ta matam,’ me nau etoa tuku palanga ateva etokatoka ta matam? ⁵ Usimaghalue io! Ta ughaa velu ekasina mua tuku palanga ateva ta matam, me aue utaata amasina nau eteva ualoanna tani ghaa velu tuku vongovongo arighi ta matana kapum ateva.

⁶ “Am rau mene ghaa voto manga va am tau lao ta paua atoa, ta aue la kirila me la ametiem me la namaiem. Me tee am rau mene velu sio uneimim pel ta mosu etoa, ta aue la asa saasakiaa.

Ukolomi, upae me umirimiri

(Luk 11:9-13)

⁷ “Am kolomi me aue etau aatu; me am pae me aue am tara; me am mirimiri me atamana atea aue eotia. ⁸ Lo atoa la kookolomi, la ghaaghaa, me lo atoa la paepae, la taatara, me atamana eotioti ta lo atoa la mirimiri.

⁹ “See etaimim tamatama atoa, arova teva natum elooloo teva tuku verete, aue utau lao teva atu? ¹⁰ Me arova elooloo teva kko, aue utau lao teva katuu? ¹¹ Me gheegheleiaaimim sesa, me am kilakila tani tau lao masi voto ta natuimim atoa, am annaa va ghaisa ooroiaa voto Tamaimim ateva etokatoka epona liu etautau lao ta lo atoa la kookolomia? ¹² Tale isaa akapaaili voto, am ghelei lao ta katoa, llo am aloanna va la ghelei mae etaimim. Isaa o llo isaa tale inangari nipaopao me tale propete.

Ghauna arighi atamana

(Luk 13:24)

¹³ “Am kupi sso tale ghauna arighi atamana. Atamana atea namuu ia me salana atikirighi namuu ia elaolao tale voto sesa, me oroi taumattu la kupikupi sso etana. ¹⁴ Me atamana tani ghaa maulue ateva ghauna ia me

6:32: Mat 6:8. **6:33:** 1 Ki 3:11-14; Sams 37:4, 25; Rom 14:17. **7:1:** Rom 2:1; 1 Ko 4:5; Jms 4:11-12. **7:2:** Mak 4:24. **7:7:** Mak 11:24; Jon 14:13; 15:7; 16:23-24. **7:8:** 1 Jon 3:22; 5:14-15. **7:11:** Jms 1:17. **7:12:** Mat 22:39-40; Luk 6:31; Rom 13:8-10.

salane atikirighi masukasukaleaili ia tani usilainia, me karika oroi ila lo atoa la uusilainia.”

Ai eteae me uene
(Luk 6:43-44)

¹⁵ “Am paniem nonga tale propete kamekame atoa. Gheeieiaaira eleka masina nongina sipsipi etoa, me nannaaira elome la nannaa sesa tani ghelei saasakieinam nongina sesa paua ngetapaa tuvui etoa. ¹⁶ Tale ueira aue am kilaila. Karika teva taumattu elaa paapariki ue ngai tale uasa karasa me ue uasa tale ai rorroana. ¹⁷ Tale ie nonga o salana atikirighi, masi ngai eteae ekuukuneaa masi uene, me sesa ngai eteae ekuukuneaa sesa uene. ¹⁸ Masi ngai eteae karika erooroo tani kuneaa sesa ue ngai, me sesa ngai eteae karika erooroo tani kuneaa masi ue ngai, ¹⁹ ta isaa akapaaili ai karika ekuukuneaa masi uene la tuetuea katuu me la veluvelu sae tale kuraa. ²⁰ Am roo tani tara kila va see ila propete kamekame atoa tale gheeieiaaira, nongina am kilakila ai eteae tale uenenna.

Karika akilakiaiem
(Luk 13:25-27)

²¹ “Karika isaa akapa taumattu la aseaseaghi va, ‘Vau eteva,’ aue la kupi sso tale ararimangali ngepona liu eteva, karika. Ta lo atoa nonga la aimulisi tee gheeieiaane Tamaghi etokatoka epona liu aue la kupi sso tale ararimangali ngepona liu eteva. ²² Oroil ila lo atoa aue la mae etaghi tale airuuruu eteva nau, aue la ue etaghi va, ‘Vau eteva, Vau eteva, karika va ami ghe auliaa inangarina God tale ararim atea, me ami ghe tiutiu velu raroai etoa tale ararim atea, me ami ghe ghelei oroieili voto atoa sarasarakana ila laghe lutulutu tale ararim atea?’ ²³ Me aue aliu etaira va, ‘Karika akilakilaie. Am kasu emasalikaala, tau nighelei ssavoto am!’ ”

Ghalua ase nighelei ale
(Luk 6:47-49)

²⁴ “See ila lo atoa la nongonongo inangarighi me la uusilaa, ila nongina taumattu ngateva alomasaanga ia, ghe atulula alena ateva epona tale atu. ²⁵ Nau eteva vaoo ateva ghe sio mae, me ateo ghe akalala, me kuukuu eteva ghe lutula, laghe tonge poila ale ateva, ale ateva karika ghe katuula, poli ie tale atu korokorongana. ²⁶ Me see ila lo atoa la nongonongo inangarighi me karika la uusilaa, ila nongina alo kapakapa ateva tana taumattu ghe atulula alena ateva tale rira. ²⁷ Nau eteva vaoo ateva ghe sio mae, me ateo ghe akalala, me kuukuu eteva ghe mae sio, laghe gheleila ale ateva ghe katuula, me namungaili kaakatungaane.”

²⁸ Nau eteva Iesu ghe ruula tani auliaa isaa o voto, taumattu ngatoa laghe soghiaala llo ghe apasungaala, ²⁹ poli karika ghe aippooaa nongina tau ngai aapasunga ngatoa tale inangari nipaopao, ta nongina taumattu ngateva matuutuliena ia.

8

Iesu ghe ghelei emasinala tasussuku eteva
(Mak 1:40-45; Luk 5:12-16)

¹ Nau Iesu ghe kkureaala tale motouru eteva, taumattu ngatoa oroieili ila laghe usiela. ² Me taumattu ngateva, tasussukuna ia, ghe mae sio ta Iesu, me

7:15: Mat 24:24; Apos 20:29; 2 Pita 2:1. **7:16:** Gal 5:19-22; Jms 3:12. **7:19:** Mat 3:10; Luk 3:9; Jon 15:6. **7:20:** Mat 12:33. **7:21:** Luk 6:46; Jms 1:25. **7:23:** Sams 6:8; 2 Tim 2:19. **7:29:** Mak 1:22; Luk 4:32.

ghe suuiaala ta liue kkena Iesu me ghe uela va, “Vau eteva, arova ualoanna, urooroo tani ghelei eraarangisanaieghi ta mata God.”

³ Iesu ghe ssuaala nimane me ghe tuliela, me ghe uela etana va, “Aghaloanna; angu raarangisana.” Me gharavaea nonga ta ghe raarangisanala. ⁴ Me Iesu ghe uela etana va, “Urau mene auliaa ta teva voto elutula etam. Ulaio me ulaa ghasungainio ta pristi eteva, me ughelei aiaavususuena tani apasunga va vilikim ange raarangisanala, nongina Moses ghe auliaala. Me taumattu ngatoa aue la kila va angu raarangisanala.”

Iesu ghe ghelei emasinala kapuna tau ngai nongonongo anna ateva kateva namuu nge Rom

⁵ Nau eteva Iesu ghe ssola tale masaliki eteae eKapenium, kateva namuu ghe aaitoiaa kateva ai (100) tau ngai uvii ghe mae sio tani kolomia. ⁶ Ghe ue va, “Vau eteva, kapughu tau ngai nongonongo anna ateva ange karakanna alokoila elo ale, karika erooroo tani kasukasu, me vilikina atoa la mammarikana atingina.”

⁷ Iesu ghe uela etana va, “Aghi aue alaa ghelei emasinaia.”

⁸ Namu ngateva ghe liula etana va, “Vau eteva, karika masina ieghi va umae tanganueghi. Unim aippooaa me kapughu tau ngai nongonongo anna ateva emasina. ⁹ Aghi tee auungu ta namu ngatoa, me aghaaitoiaa katoa tani tau ngai uvii. Nau eteva aue ta kateva va, ‘Lao sio,’ elaolao, me aue ta kateva va, ‘Mae sio,’ emaemae. Me aghaauliaa ta kapughu tau ngai nongonongo anna ateva va, ‘Gheleila voto toko,’ egheeghelei.”

¹⁰ Nau eteva Iesu ghe nongola isaa o voto, ghe soghiaala me ghe uela ta lo atoa laghe ususia va, “Aghaaulia ngakoronna etaimim va karika aghe tara poi teva taumattu eIsrael kanna niaikaiaa namuu nongina lo ateva oia taumattu. ¹¹ Aghaauliaa etaimim va oroi ila lo atoa aue la mae akapa see tale kosa ateva oia, tani toka tee Abraham, Aisiki me Jekop tani namanama, tale ararimangali ngepona liu eteva. ¹² Me lo atoa aIsraeli ila laghe annaa va aue la kupi sso tale ararimangali eteva, me karika, ta aue la vella ghoa tale kinatama saurrom ateva, me aue la ghoa toka ngangngala me la aingeresia ngalungaluiru.”

¹³ Me Iesu ghe uela ta namu ngateva oia va, “Lao sio elo ale, voto aue elutu nongina angu aikaiaaala.” Me gharavaea ta tau ngai nongonongo anna ateva ghe masinala.

Iesu ghe ghelei emasinala oroi taumattu

(Mak 1:29-34; Luk 4:38-41)

¹⁴ Nau eteva Iesu ghe rekatala tanganue Pita, ghe tarala alumuna vause ateva Pita ghe asoaso tale komo, me vilikina ghe aanasa me matana ghe valavalanga. ¹⁵ Iesu ghe posola nimane, me mata valavalanga ateva ghe kapala, me ghe totu saela me ghe kaisila anna inana.

¹⁶ Nau sinaka ateva ang ghe suusu me oroieili ila lo atoa raroai etoa laghe tokatoka etaira, laghe maeainila sio etana va eghelei emasinaila, ghe nim aippooaa me raroai etoa laghe kupikupi ghoa, me ghe gheeghelei emasina tee tau sessa akapa atoa. ¹⁷ Isaa o voto ghe akauerekatila llo voto propete Aisaea ghe auliaala,
“Ia ghe ghaala kaluita saghuighuina,
me ghe saula kaluita sessa.”

8:4: Lev 14:1-32; Mat 9:30; Luk 17:14.

8:11: Luk 13:29.

8:12: Mat 22:13; 25:30; Luk 13:28.

8:17: Ais 53:4.

*Nitootoonga aue emae etam nau eteva uaimulisi tee Iesu
(Luk 9:57-62)*

¹⁸ Nau eteva Iesu ghe tarala taumattu ngatoa angila ghe ooroieili, ghe uela ta kapuna atoa va, “Ita kasu, ita lao ta pai kativilau.” ¹⁹ Angila ghe aloanna tani kasu, me tau ngai aapasunga ateva tale inangari nipaopao ghe mae sio, me ghe uela etana va, “Tisa, aghaloanna tani usio nongina eaa ulao.”

²⁰ Vara me Iesu ghe uela etana va, “Paua atoa aleira tale pake valienga, me ghila atoa aleira manee, me Natuna ateva Taumattu ngateva karika teva alena tani aso.”

²¹ Mene kateva tana kapuna disaepolo ghe uela etana va, “Vau eteva, tau velueghila me alaa kaiaa mua tamaghi.”

²² Iesu ghe uela etana va, “Usieghila me ratila lo atoa matena ila la kaiaa matena atoa.”

*Ttasi kuukuu eteva ghe kapala
(Mak 4:35-41; Luk 8:22-25)*

²³ Iesu ghe aikaaila tale paanaka ateva me kapuna disaepolo atoa laghe usiela, me laghe tiu ghoala. ²⁴ Elome tale ateo talia ngateae, paka kuukuu ttasi eteva ghe lutula. Paka kotoo atoa laghe aasuu kaakaai tale paanaka ateva, me Iesu ghe asekanue alokoila. ²⁵ Disaepolo atoa laghe anguniela, me laghe ue etana va, “Vau eteva, sausiemamila! Angita vuuvuluu!”

²⁶ Iesu ghe liula inangariira, me ghe uela etaira va, “Vaalua me am maamatautu, ghaunaaili aikaaiiaaimim?” Ghe tingina saela me ghe paola kuukuu ttasi eteva tale ateo talia ngateae, me kinatama luei eteva ghe asola.

²⁷ Taumattu ngatoa tale paanaka ateva, laghe soghiaala me laghe ue va, “Saa taumattu ia taumattu ngateva oia, ta ttasi eteva me paamanu eteva la nongonongo usilainia?”

*Iesu ghe ghelei emasinala tau raroai elua
(Mak 5:1-20; Luk 8:26-39)*

²⁸ Nau eteva Iesu ghe laa rekata sio tale pai kativilau, tale kosaira aGadara* ngatoa, me ghe sousoula taumattu ngalua lalu ghe kasula tale liu niaikkaiaa, raroai etoa laghe tokatoka etairarua. Taumattu ngatoa karika laghe laolao akalakalaa etairarua poli lalu ghe aaiuvii. ²⁹ Lalu ghe aaore me lalu ghe ue va, “Sa ateva ualoannaia etaimami, Natuna ateva God? Vaalua me umae sio tani ghelei saasakieinamami me karika ghe ghaa nau?”

³⁰ Mala masau nongina laghe tiitingina, tinaua mosu etingiu ghe tingina namanama. ³¹ Raroai etoa laghe kolomi esarasarakanala Iesu va, “Arova utiu veluemami, usuu tauemami lao ta mosu etoa.”

³² Me ghe uela etaira va, “Am lao sio.” Laghe kupi vulu ghoala taumattu ngalua me laghe laa sae kupi sso ta mosu etoa. Me tinaua atingiu ghe ttiroula, me laghe ilou velu siola tale vallae me laghe aoso velu siola tapaa manu me ghe arropi ematelala. ³³ Lo atoa laghe aaitaraa mosu etoa laghe iloula, me laghe lao sio tale masaliki eteae, me laghe kiukiuaa ngakapala kiukiuirarua. ³⁴ Nau eteva taumattu ngatoa tale ia o masaliki taatara atea laghe nongola kiukiu, ila akapa laghe mae sio tani sou Iesu me laghe aulia ngasararakanala ta Iesu va karika emene toka tale masalikiira atea.

8:20: 2 Ko 8:9. **8:21:** 1 Ki 19:20. **8:24:** Sams 4:8. **8:26:** Mat 14:31; Sams 89:9. * **8:28:** aGadara Kasina uru ngai laghe pitila, laghe ue va aGergesa, kasina laghe ue va aGerasa. **8:29:** Mak 1:24; Luk 4:41.

9

*Iesu ghe ghelei emasinala
taumattu ngateva karakanna ia
(Mak 5:1-20; Luk 8:26-39)*

¹ Iesu ghe aikaai ghoala tale paanaka ateva, me laghe lao sio tale pai kativilau, me laghe rekatala tale masalikina atea. ² Katoa taumattu laghe maeaa sio taumattu ngateva karakanna ia, me ghe asoaso tale komo atiulu. Nau eteva Iesu ghe tarala uneira niaikaaiaa, me ghe uela etana va “Urau mene annaa, natughu, kalum ssavoto ange kapala.”

³ Katoa tana tau ngai aapasunga tale inangari nipaopao laghe tingina nannaa me laghe aippooaa elome etaira va, “Ierai oia ange ghaala liuna ateva God.”

⁴ Iesu ghe kilala nannaaira me ghe uela va, “Vaalua me ninannaa sesa etokatoka tale urunguitaniimim? ⁵ Eaa teva voto malumina tani auliaa, tani ue va, ‘Kalum ssavoto ange kapala,’ o tani ue va, ‘Tingina saela me ukasu?’ ⁶ Me aghaaloanna va am tara kila, va Natuna ateva Taumattu ngateva matuutulienna teeia tani kkaluaa ssavoto tale kosa ateva.” Me ghe uela ta taumattu ngateva karakanna ia va, “Tingina saela, me usau komom, me ulao tanganuem.” ⁷ Me ia o taumattu ngateva ghe tingina saela me ghe lao sio tanganuena. ⁸ Nau eteva taumattu ngatoa laghe tarala isaa o voto, laghe soghiaala me laghe tau saela God, poli ghe tau lao sio matuutulienna tale taumattu ngatoa.

*Iesu ghe kolola Matiu
(Mak 2:13-17; Luk 5:27-32)*

⁹ Nau Iesu ghe kasukasu elaolao me ghe tarala taumattu ngateva ararina atea ta Matiu, ghe tokatoka tale natu ngale arighi aighaa takis ia me Iesu ghe uela etana va, “Mae usieghi,” me Matiu ghe tingina saela me ghe usiela.

¹⁰ Nau eteva Iesu ghe namanama tanganue Matiu, oroieili tau ngai ghaa takis atoa me tau ssavoto atoa laghe mae sio tani namanama teeia, me kapuna disaepolo atoa. ¹¹ Nau eteva Paresi etoa laghe tarala isaa o voto, laghe kookolomi kapuna disaepolo atoa Iesu va, “Vaalua me kapuimim tisa ngateva enamanama tee tau ngai ghaa takis atoa me tau ssavoto atoa?”

¹² Nau Iesu ghe nongola, ghe uela va, “Karika va lo atoa masina ila la anna va dokta etaraila, ta lo atoa nonga isikinna ila. ¹³ Me am lao me am laa pae aotu vaalua malloeana nau Uru ngai Manga ateva eue va, ‘Aghi aghaaloanna va am alousiusi tee mene kateva me karika va tani ghelei niaiaavususuena,’ poli karika aghe mae sio tani kolo ghulughuluena atoa ta aghe mae sio tani kolo tau ssavoto atoa.”

*Laghe kookolomi Iesu tale ninae atea
(Mak 2:18-27; Luk 5:33-39)*

¹⁴ Vara me kapuna disaepolo atoa Jon laghe mae sio me laghe kolomila Iesu va, “Vaalua me ami me Paresi etoa ami naena, me kapum disaepolo atoa karika?”

¹⁵ Iesu ghe liula me ghe uela va, “Kapuna atoa taumattu ngateva ange anna tani lai karika la aalousiusi nau eteva etokatoka teeila. Nau eteva aue emae me la ghaa velu taita ateva, ia o nau eteva aue la vira nae.

¹⁶ “Karika teva eghaaghaa tuku ouna ateva kalio va evabbai pokane ateva aiaasae, ta tuku ouna ateva kalio aue emene ghelei mara ateva tale pokane ateva aiaasae emara anamuu. ¹⁷ Karika teva taumattu etottoli ouna ueni

tale pokane ateva aikaai uaeni. Arova eghelei evalua o, aue ouna uaeni eghelei polaki aikaai uaeni eteva pokane ia, me uaeni eteva aue ekaoa me aikaai uaeni eteva aue esesa. Ta la tottoli ouna uaeni tale ouna ateva aikaai uaeni ta ilalua akapa aue lalu masina.”

Vause arighi matena ia me vause ateva isikinna ia
(Mak 5:21-43; Luk 8:40-56)

¹⁸ Nau eteva Iesu ghe aappooaa nonga me kateva namuu ghe mae sio me ghe suuiaala emua etana, me ghe uela va, “Natughu vause arighi ghaviri nonga oia ematela. Mae sio me ulaa saooa nimam etana me emene sakesake.” ¹⁹ Iesu ghe tingina saela me ghe usiela tee me kapuna disaepolo atoa.

²⁰⁻²¹ Vara me vause ateva rae ateva ghe iloueiniela tale kasangaulu ghaluae (12) ninamanama, ghe nannaa va, “Arova aghele nim poso unna aiaasae ngeleka ateva koti aue aghele masina.” Me ghe lao sio emuli ta Iesu me ghe posola euu tale sama unna aiaasae ngeleka ateva.

²² Iesu ghe kiriela me ghe taraiela me ghe uela etana va, “Urau mene matautu, natughu. Tale unem niaikaaiia etaghi angu masinala.” Tale ia o nau eteva vause ateva o ghe masinala.

²³ Nau eteva Iesu ghe kupi ssola tale alena ateva namu ngateva, ghe tarala lo atoa laghe vuuvuu flut atoa me taumattu ngatoa laghe aalousiusi etingina. ²⁴ Me ghe uela etaira va, “Am kupi ghoala. Vause arighi karika matena ia ta enim aseasekanua,” me laghe tiuaala tani kangainia. ²⁵ Nau eteva taumattu ngatoa laghe kupi ghoala eleka, Iesu ghe kupi ssola me ghe kune siola nimane vause arighi, me ghe totula. ²⁶ Kiukiuna vause arighi oia ghe kasu ekapa seela tale masaliki tale ia o distriki eteva.

Iesu ghe ghelei emasinala mata salusalu elua me paavoo ateva

²⁷ Nau eteva Iesu ghe mene kasukasu elaolao, mata salusalu elua lalu ghe usiela, me lalu ghe kolokolo. Lalu ghe ue va, “Io Natuna io Deivit, ualousiusi teeiengalua.”

²⁸ Nau eteva ghe kupi ssola tale ale ateva, mata salusalu elua lalu ghe usiela. Me Iesu ghe kolomilalueta va, “Amalu aikaaiia va arooro tani ghelei emasinaiemalua?”

Lalu ghe liula me lalu ghe uela va, “Ue, vau eteva.”

²⁹ Vara me ghe posola matairarua, me ghe uela va, “Tale uneimalua niaikaaiia, aue amalu taatara.” ³⁰ Me matairarua ghe mene taatarala. Iesu ghe aulia ngakorokoronganala etairarua va, “Karika amalu mene laa kiukiuaa see isaa o voto.” ³¹ Nau eteva lalu ghe kupi ghoala, lalu ghe kiukiueinie seela tale masaliki etoa.

³² Nau eteva angilalu ghe kasukasu, me laghe mene maeaa sio taumattu ngateva raroai eteva ghe kupiela me karika ghe rooro tani sama. ³³ Me nau eteva raroai eteva ghe kupi vulue ghoala, taumattu ngateva paavoo ia ghe samala. Taumattu ngatoa laghe tarala isaa o voto me laghe soghiaala, me laghe ue va, “Karika righi voto avalua o ghe lutu eIsrael.”

³⁴ Paresi etoa laghe ue va, “Enim tiutiu velu raroai etoa tale sarasarakaniaane kapuira namu ngateva raroai etoa.”

Tau ngai uungu etoa malaki ila

³⁵ Iesu ghe kasu ekapa seela tale masaliki taatara atoa me tale lutu ghauna masaliki. Ghe aapasunga tale aleira ale nivelu eitaaua me ghe poppooa

ngaotu masi kiukiu tale ararimangali ngepona liu eteva me ghe gheeghelei emasina isaa akapa asease sessa atoa. ³⁶ Nau ghe tarala taumattu ngatoa, ghe alousiusi teelala poli nannaaira maateaili me karika teva taumattu tani saasila me ila nongina sipsipi etoa karika teva aitoiira. ³⁷ Me ghe uela ta kapuna disaepolo atoa va, “Utana ateva ang ghele matuela, me tau ngai uungu etoa karika oroi ila. ³⁸ Liuna avalua o, am kolomi sae Vau tale tau ngai mukemuke atoa va emene sungi toa tau ngai mukemuke tani lao tale utana atingiu matuenna ia.”

10

Iesu ghe suula kasangaulu ghalua disaepolo tani laa uungu
(Mak 3:13-19; Luk 6:12-16)

¹ Iesu ghe kolo aitauaala kapuna disaepolo kasangaulu ghalua (12), me ghe tau lao sio matuutuliena tani tiu velu raroai etoa me tani ghelei emasina isaa akapa asease sessa atoa.

² Arariira toko kasangaulu ghalua (12) apostolo: Aitiutiu eteva ta Saemon (la kolokoloa va Pita) me nengane ta Andru, me Jeimis natuna ia Sebedi, me nengane ta Jon. ³ Me Pilip me Batolomiu, Tomas me Matiu tau ngai ghaa takis ia, me Jeimis natuna ia Alpeas, me Tadias, ⁴ me Saemon laghe aseala va Selot ia, me Jiudas Iskariot (ia auena ghe tau lao Iesu ta nimaira tau ngai ssateena atoa).

Iesu ghe auliaala inangari tani aimuli tee
(Mak 6:7-13; Luk 9:1-6)

⁵ Iesu ghe suula isaa oia kasangaulu ghalua, me ghe tau lao sio inangari niloeloe etaira va, “Nau eteva am kasu, am rau mene lao ta tau ngeleka ngatoa, me am rau mene sso tale masalikiira aSameria ngatoa. ⁶ Ta am lao ta aIsraeli etoa, ila nongina sipsipi etoa laghe rauela. ⁷ Nau am lao am ppooa ngavalua toko va, ‘Ararimangali ngepona liu eteva ange aakalakalaa.’ ⁸ Am ghelei emasina tau sessa atoa, me am totu matena atoa, me am ghelei eraarangisana tasussukuna atoa, me am tiu velu raroai etoa. Isaa o sarasarakana, aghe nim tau aatu sio, am nim mene taula, me karika am mene ghaa aipolipoli. ⁹ Nau eteva am kasu, am rau mene annaa tani ghaa righi viliki veu, golo me silva me kopa. ¹⁰ Am rau mene ghaa aikakkaai tale lo ateva o nikasu, me am rau mene ghaa ghalua aiaasae me aikasukasu, me aikkatulu. Poli emaamasina va tau ngai uungu eteva eghaaghaa anna inana ta lo atoa euungu etaira.

¹¹ “Arova ngam rekataala tale kateae masaliki, am pae lo ateva taumattu aue emasimasi tani aikoloainam, me am toka teeia, lomosina ta am kasu vuli ia o masaliki eteae. ¹² Nau eteva ngila aloannala va am toka teeila, am ue va, ‘Luei aue etoka etaimim.’ ¹³ Arova am kupi sso tale aleira masi taumattu ngatoa, am alokoi luei etaira, me arova karika, am mene ghaa oghi niarangise me luei etaira. ¹⁴ Arova toa la tam ghaaiem me la tam aloanna tani nongo usilaa inangariimim, am rariaa velu au kosa ateva ta kkeimim nau am kasu vuli ia o ale ateva o masaliki eteae. ¹⁵ Aghaaulia ngakoronna etaimim va, aue nau niaisakei eteva, God aue eapasunga maomaona nimmarikana tale masaliki eteae eSodom me eGomorra, me sesaaili tale ia o masaliki eteae. ¹⁶ Am nongo! Asungisungiem nongina

9:36: Sek 10:2; Nam 27:17; 1 Ki 22:17; Mat 14:14; Mak 6:34. **9:37:** Luk 10:2. **10:1:** Mak 6:7; Luk 9:1. **10:6:** Jer 50:6. **10:7:** Mat 3:2; 4:17; Luk 10:9, 11. **10:9:** Luk 10:4. **10:10:** Luk 10:7; 1 Ko 9:14. **10:12:** Luk 10:5-6. **10:14:** Luk 10:10-12; Apos 13:51. **10:15:** Mat 11:24; Jiud 7. **10:16:** Luk 10:3; Rom 16:19.

sipsipi etoa elome tale sesa paua ngetapaa tuvui etoa, liuna avalua o me am anguu taatara nongina katu ngateva, me am nongina tee ghila ateva valusu ia karika egheelei righi sesa.

Sesa nau aue emae
(Mak 13:9-13; Luk 21:12-17)

¹⁷ “Am tani taatara amasina poli taumattu ngatoa aue la kuneiem me la laoainam tale aleira ale nivelu eitauaa me la uetaiem. ¹⁸ Poli mausighi me aue la laoainam ta gavana ngatoa me kingi etoa, me ia o aue emasi nauimim tani aulia ngaotueghi etaira me ta tau ngeleka ngatoa. ¹⁹ Nau eteva la kuneiem, am rau mene annaa va sa ateva aue am aulieinia me vaalua aue am aippooaa. Ta God aue etau aatu inangari aue am auliaa. ²⁰ Ta karika va am aue am aippooaa ta aue Spirit Manga ateva kapuna ia Tamaimim ateva aue etau aatu inangari aue am auliaa.

²¹ “Taumattu ngatoa aue la tau velu tueira me nengaira atoa ta lo atoa aue la uvi ematela, me tamatama atoa aue la ghelei evalua tee o ta natuira atoa. Aliko etoa tee aue la ssa tee tamaira me kinaira atoa, me aue la uvi ematela. ²² Taumattu ngakapa atoa aue la ssa teeiem poli ararighi eteae. Me see etingina akorokorongana tale unna niaikaaiiaa tale airuuruu, maamauluaane aue esaanga. ²³ Arova la ghelei teeiem tale kateae masaliki, am kasu vulia me am mene lao ppae tale kateae masaliki. Aghaaulia ngakoronna va karika aue am ruu masaliki ekapa eIsrael me Natuna ateva Taumattu ngateva emae.

²⁴ “Tau ngai ghaa alomasaanga ateva karika namuu ia ta kapuna tau ngai aapasunga ngateva, me tee tau ngai nongonongo anna ateva karika namuu ia ta vauna ateva. ²⁵ Tau ngai ghaa alomasaanga ateva erooroo va enongina tau ngai aapasunga ateva, me tau ngai nongonongo anna ateva erooroo va enongina vauna ateva. Arova la aseaghi va aghi Belsibul, namuu ta raroai etoa, aue la tau tee sesa arari etaimim.

Tani matauta nonga God
(Luk 12:2-7)

²⁶ “Ia avalua o me am rau mene matautainila. Karika righi voto am aaituttuia va aue etam otu, isaa akapa voto pei niaisulia, aue la kila. ²⁷ Sa ateva aghaaulieinia eleivoo, am aulieinia ellaa me sa ateva aghaulia ngaghaunaie sso ta talingaimim, am sae tingina tale pungani ngale atoa me am auliaa. ²⁸ Am rau mene matauta lo atoa la anna tani uvi emateam, ta aue la nim turungi vilikiimim me karika aue la uvi emate maamauluaaimim. Ta am matauta nonga lo ateva erooroo tani turungi ekapa vilikiimim me maamauluaaimim eGehenna. ²⁹ Ghaluepai natu ghila la polipoli tale maketi tale kativilau nonga viliki veu me arova aloannaane God va karika teva emene mate, karika teva erooroo tani mate. ³⁰ Tee me isaa akapaaili uu nguruimim, God ekilakila va ghaisa akapa. ³¹ Ia avalua o me urau mene matautu ta maamauluaam namungaili ta matane God, elaulau ghila atoa.

³² “See eaulia ngaotu tale taumattu ngatoa tale kosa ateva oia va kapughu ia, aghi tee aue aghaulia ngaotu ta Tamaghi epona liu va ia kapughu ia. ³³ Arova lo ateva uauliaa ta katoa va karika ukilakilaieghi, aue aghauliaa tee ta Tamaghi epona liu va karika akilakilaio.

10:17: Mak 13:9-11; Luk 12:11-12; 21:12-15. **10:20:** Jon 14:26. **10:21:** Maeka 7:6; Mat 10:35; Mak 13:12; Luk 21:16. **10:24:** Luk 6:40; Jon 13:16; 15:20. **10:25:** Mat 9:34; 12:24; Mak 3:22; Luk 11:15. **10:26:** Mak 4:22; Luk 8:17. **10:28:** Jms 4:12; Rom 8:31. **10:31:** Mat 6:26. **10:33:** Mak 8:38; Luk 9:26; 2 Tim 2:12.

Karika aghe maeaa sio luei
(Luk 12:51-53; 14:26-27)

³⁴ “Am rau mene annaa va aghe maeaa sio luei tale kosa ateva oia, karika aghe maeaa sio luei ta aghe maeaa sio baenata ateva. ³⁵ Aghe mae sio tani ghelei va

“ taita ateva essa tee tamana ateva,
me vause ateva essa tee kinna ateva
me vause ateva essa tee alumuna vause ateva.

³⁶ Tau ngaissanira atoa karika aue la laa kasu emasau ta aue la tani kasu etoka elome tale paa ngaleira aitauaa.’

³⁷ “Lo ateva taumattu eaaielousiaa nonga tamane me kinna me natuna taita atoa me natuna vause atoa, me karika eaaielousieinaghi, karika emaamasina va kapughu disaepolo ia. ³⁸ Me lo ateva karika eaalona tani sunuki unna aikotoo ateva me eaimuli teeieghi, karika emaamasina va kapughu disaepolo ia. ³⁹ Arova teva easaangi maamauluaana, aue eraua, me arova eraua ta mausighi aue eghaa maulue ateva.

Aipolipoli
(Mak 9:41)

⁴⁰ “See eghaaghaaiem eghaaghaaieghi, me see eghaaghaaieghi, eghaaghaa lo ateva ghe sungieghila. ⁴¹ See eaikoloaa propete ateva poli propete ia aue eghaa aipolipoli nongina propete ateva eghaaghaa. Me see eaikoloaa tau ghulughuluena ateva poli tau ghulughuluena ateva kapuna ia God, aue eghaa aipolipolina tau ghulughuluena ateva. ⁴² Me arova see etara teva tale isaa oia disaepolo taumattu ngatoa la taatara aloila sio euu, me earopiropi teva ta poli kapughu disaepolo ia, aghaaulia ngakoronna va aue eghaa aipolipoli.”

11

Jon tau ngai aasuu ia ghe suula
disaepolo atoa tani laa tara Iesu
(Luk 7:18-35)

¹ Nau Iesu ghe ruula tani apasunga taula voto ta kapuna kasangaulu ghalua (12) disaepolo, ghe kasu vulila ia o voto ateva me ghe mene lao sio tani ppoosaa me apasunga tale masaliki taatara atoa eGalilii.

² Nau eteva Jon ghe tokatoka tale ale mata voovoo me ghe nongola voto Mesaea ngateva ghe ghelei, me ghe suula kapuna disaepolo atoa ³ tani laa kolomi Iesu va, “Io ia o taumattu ngateva God ghe uela va aue emae, o aue ami toi mene teva?”

⁴ Iesu ghe liula me ghe uela va, “Am oghe lao sio me am laa ghaulua ta Jon voto am tarala me am nongola. ⁵ Mata salusaluna atoa mataira eotila me vereverenna atoa la kasukasula, me lo atoa tasussukuna ila la raaranganala, me talinga volongo atoa la mene nongonongola, me matena atoa la totula, me llo taumattu karika peina la nongola masi kiukiu. ⁶ Me aue emasinaaili ta taumattu ngateva, unna niaiesoaa karika ekaakatuu vulueghi.”

⁷ Nau kapuna disaepolo atoa Jon laghe kasula, me Iesu ang ghe auliaa Jon ta taumattu ngatoa. Ghe ue etaira va, “Sa ateva am ghe lao sio tani taraia tale voto ateva karika righi taumattu etana? Pitpiti eteva ghe kuukuueinia?

⁸ Arova karika, tani sa ateva am ghe lao sio tani taraia? Teva taumattu

ghe molumolu tale masi ghinna? Karika, ta lo atoa la aasae masi ghinna la tokatoka tanganue king. ⁹ Tani sa ateva am ghe kasueiniela? Propete ateva? Ue, aghaauliaa etaimim va am ghe tarala propete ateva me emene laulau mene katoa propete. ¹⁰ Ia o taumattu ngateva, Uru ngai Manga ateva ghe aulieiniela nau ghe uela va,

“Tarala, aue asuu aikasuaa inangarighi eteva emuemueinio, me ia aue eaimonomosiaa ngamuemue alokoi salam.’

¹¹ Aghaaulia ngakoronna etaimim va elome ta lo atoa laghe lutula tale kosa ateva oia, karika teva erooro ta Jon ia o tau ngai aasuu ia. Me lo ateva karika teae ararina, me iaaili euu tale ararimangali ngepona liu eteva, elaulau Jon. ¹² Ghe tiuaala ta nauna Jon tau ngai aasuu ia me ang ghe mae sio ta nauita ghaine, sesa taumattu ngatoa la korokorongana tani sari ararimangali ngepona liu eteva tale nim aloaloannaaira. ¹³ Propete akapa atoa me inangari nipaopao laghe aulia ngaotula inangarina God ghe mae ghaa sio nau ta Jon. ¹⁴ Me arova am aiesoaa inangariira, Jon Elaija ta ngetana ia o laghe aulia ngamuemua alokoiela va aue emae. ¹⁵ Lo ateva talingane manee tani nongo, aue enongo.

¹⁶ “Sa ateva voto arooro tani auliaa me eaimatoonga taumattu tale lo ateva oia vituu? Ila nonginaaili aliki etoa la tokatoka tale liu nianamisi, katoa la ue lao ta mene lutu katoa va,

¹⁷ “‘Ami ghe vuuvuu kkinari nilai eteae etaimim, me karika am ghe lokuloku; ami ghe uuei kkinari tani kkinariaa matena atoa, me karika am ghe aalousiusi.’

¹⁸ Nau Jon ghe mae sio me karika ghe namanama me ghe tam ropiropi, laghe ue teeia va, ‘Raroai eteva ghe tokatoka etana.’ ¹⁹ Me Natuna ateva Taumattu ngateva ghe mae sio me ghe namanama me ghe ropiropi, laghe ue teeia va, ‘Tau ninamanama ia, me tau niropi sesa manu ia, kapuira ia aighaa takis atoa me tau ssavoto atoa.’ Me masi ninannaa kanna God eaapasunga va koronna ia tale maamauluaaira lo atoa la aaimuli teeia.”

*Alousiusi ta llo taumattu karika
la nanna ngaioghioghiaa
(Luk 10:13-15)*

²⁰ Iesu ghe sama anamuu teela llo masaliki taatara ghe gheleila oroian-naaili mirikol poli taumattuna karika ghe nna ngaioghioghiaa. ²¹ “Aue esesaaili ta ngetam, Korasin, me aue esesaaili ta ngetam, Betsaida! Marova mirikolo oia laghe gheleila eTaer me eSaedon, taumattu ngatoa aue laghe molu tale ghinna nialousiusi me au kura, tani apasunga va ngila ghe oghe vulula sesa gheegheleiaaira. ²² Aue emaomaona nimmarikana ta eTaer me eSaedon tale nau niaisakei eteva, me am karika. ²³ Me io, Kapenium? Uannaa va aue usae epona liu? Karika, io aue usioaili euu. Arova isaa o mirikol laghe gheleila etam va laghe gheleila eSodom, isaa oia nau Sodom ie tokatoka. ²⁴ Aghaauliaa etam va nau eteva God aue eghelei niaisakei, voto Sodom eghaa aue emala masina me io aue sesaaili.”

*Niainoana ta Iesu
(Luk 10:21-22)*

²⁵ Ia o nau eteva Iesu ghe uela va, “Atautauo sae Tamaghi, Vau ngepona liu io me kosa ateva, poli ughe aisuliaala isaa o voto tale lo atoa nannaaira

11:10: Mal 3:1; Luk 1:76. **11:12:** Luk 16:16. **11:14:** Mal 4:5; Mat 17:10-13; Mak 9:11-13.

11:19: Mat 9:14. **11:21:** Ais 23:1-18; Esik 26:1-21; 27:1-36; 28:1-26; Joel 3:4-8; Eimos 1:9-10; Sek 9:2-4. **11:23:** Ais 14:13-15; Aitiutiu 19:24-28. **11:24:** Mat 10:15; Luk 10:12. **11:25:** 1 Ko 1:26-29.

masina me lo atoa alomasaangaaili ila me ughe aulia ngaotula ta lutu ngaliki etoa. ²⁶ Ue Tamaghi, ugheelei isaa o voto tani aimuli tee masi aaloannaam.

²⁷ “Isaa akapa voto Tamaghi ghe atokala ta nimaghi, me karika teva ekilakila Natuna ta Tamana nonga. Me karika teva ekilakila Tamaghi ta Natuna nonga, me lo atoa Natuna ghe apasungaala Tamane etaira tale aloaloannaane.

²⁸ “Am mae etaghi, lo atoa ngam maamango polu am sausau llo maate, me aue atoa aatu niainoana etaimim. ²⁹ Am aimuli teeieghi me am ghaa alomasaanga etaghi me am uungu etaghi nongina vulumakao ateva euungu ta vauna ateva, poli aghi saghuighuina gheeleiaaghi me asiosiuua nannaaghi me maamaulueaimim aue eghaa niainoana. ³⁰ Poli gheeleiaaghi karika masukasukale me llo aue atoa aatu karika maate.”

12

Vau tale nau manga ateva

(Mak 2:23-28; Luk 6:1-5)

¹ Nau eteva o Iesu ghe kasu longotila tale utani uiti etingiu, tale nau manga ateva, kapuna disaepolo atoa laghe maamaloo, liuna avalua o me laghe ghaala kasina tani uiti me laghe tiuaala tani gholu. ² Nau Paresi etoa laghe tarailala laghe uela etana va, “Tarala! Kapum disaepolo atoa la gheelei voto karika masina tani ghelele tale nau manga ateva.”

³ Iesu ghe liula me ghe uela etaira va, “Koti karika am ghe ritila llo Deivit me kapuna atoa laghe ghelele nau laghe maamaloo? ⁴ Vaalua ghe ssola, ia me kapuna atoa, tale alena ateva God me laghe ghaala verete laghe amangala, pristi etoa nonga la rooroo tani nama, me laghe namala. ⁵ Me karika am ghe ritila tale inangari nipaopao eue va karika sesa arongona ta pristi etoa la uungu tale ale manga ateva ta nau manga ateva tani ghelele aiaavusuvusuena? ⁶ Aghaauliaa etaimim va lo ateva matuutuliena uunguaane, me enaanamuu vulu ale manga ateva ia oia tale ale manga ateva. ⁷ Karika am ghe kilala malloeana isaa o inangari va, ‘Aghi aghaaloanna va am alousiusi tee mene kateva me karika va tani ghelele niaiaavusuvusuena.’ Liuna avalua o me am ghe nim uela va sesa ila lo atoa karika righi sesa etaira. ⁸ Poli Natuna ateva Taumattu ngateva Vau ia tale nau manga ateva.”

Iesu ghe ghelele emasinale taumattu ngateva katelange nimane matena ia ta nau manga

(Mak 3:1-6; Luk 6:6-11)

⁹ Iesu ghe kasu vulila ia o masaliki eteae me ghe mene lao sio tale kateae masaliki me ghe kupi ssola tale aleira ale nivelu eitaua ngateva. ¹⁰ Taumattu ngateva, katelange nimane matena ia, ghe tokatoka me laghe kolomila Iesu va, “Uneita inangari nipaopao eue va masina tani ghelele emasinale ta nau manga ateva?” Poli laghe paepae salana tani laoa Iesu tale niaisakei.

¹¹ Me Iesu ghe uela etaira va, “Arova teva etaimim teva kiena sipsipi ghelele katuu velu sio tale teva liu ta nau manga ateva, karika aue ughele laa ghaaie sio? ¹² God aloaloannaane tale taumattu elaulau sipsipi eteva! Liuna avalua o me masina tani ghelele masi voto ta nau manga ateva.”

11:27: Mat 28:18; Jon 3:35; 17:2; 1:18; 10:15. **11:28:** Jer 31:25. **11:30:** 1 Jon 5:3. **12:1:** Diut 23:25. **12:2:** Eks 20:10. **12:3:** 1 Sam 21:1-6. **12:4:** Lev 24:5-9. **12:5:** Nam 28:9-10. **12:6:** Mat 12:41-42. **12:7:** Osea 6:6; Mat 9:13. **12:10:** Luk 14:3. **12:11:** Luk 14:5.

¹³ Me ghe uela ta ia o taumattu ngateva va, “Korosila nimam atelange.” Me ghe korosiela me nimane atelange ghe masinala nongina mene katelange.
¹⁴ Paresi etoa laghe kasula tani laa loe salana vaalua tani uvi emate Iesu.

Kapuna tau ngai nongonongo anna ateva God

¹⁵ Iesu ghe kilala sa ateva Paresi etoa laghe aloanna tani gheleia. Liuna avalua o me ghe kasu vulila ia o masaliki eteae. Oroienaaili taumattu ghe usiela me ghe ghelei emasinailala tale aneira isiki. ¹⁶ Iesu ghe aaulia ngakorokorongana ta ngetaira va la rau mene laa ghaotu va ia see. ¹⁷ Voto o ghe gheleila inangarina propete ateva Aisaea ghe kaurekatila, ghe uela va,
¹⁸ “Ia oia kapughu tau ngai nongonongo anna ateva, aghi aghe suitoon-

gainiela,
 me aghaaielousiangailiia, me nannaaghi emaamasinaaili ta polina;
 me aue aghatoka kalughu Spiriti eteva etana.

Me aue eaulia ngaotu voto ghulughuluena tale patunganue akapa atoa.
¹⁹ Karika aue eaissakeana me esama anamungaili ta tummatavanga.

²⁰ Aue eghelei voto masina tale taumattu saghuighuiena,
 me karika aue eghelei saasakiaa ta lo atoa karika sarasarakana ila.

Aue eghelei isaa o voto lomosina ta llo masina eapala llo sesa.

²¹ Patunganua akapa atoa aue la ghatoka tuutuliira tale ararina ateae.”

*Laghe ue va Iesu ghe uungu tee Belsibul
 (Mak 3:20-30; Luk 11:14-23; 12:10)*

²² Laghe maeaa sio taumattu ngateva raroai eteva ghe tokatoka etana me tee mata salusalu ia me paavoo ia. Iesu ghe ghelei emasinaiela me ghe samala me ghe taatarala. ²³ Me taumattu ngatoa laghe soghiaala voto ghe gheleila me laghe aikolomieinila va, “Koti taumattu ngateva oia natuna ia Deivit, va?”

²⁴ Nau Paresi etoa laghe nongola laghe uela va, “Tale sarasarakaniaane Belsibul, kapuira namu ngateva raroai etoa, me eghelei isaa o voto tani tiu velu raroai tale taumattu.”

²⁵ Iesu ghe kilala nannaaira me ghe uela etaira va, “Arova masaliki eteae eaipola, karika aue etoka amasina, me lo ateae masaliki taatara o ale eaaipola karika erooroo tani tingina akorokorongana. ²⁶ Arova Satana emene tiutiu velu Satana, aue eaipola, o vaalua ararimangalina ateva aue etingina? ²⁷ Me arova atiutiu velu raroai tale ararina ateae Belsibul, kapuim atoa tani taumattu laghe tiutiu velu raroai tale ararina ateae see? Ila aue la ghele auliaa va inangari am auliaa kamena. ²⁸ Me arova atiutiu velu raroai tale Spiriti eteva kanna ia God, eaapasunga va ararimangalina ateva God ang ghe mae sio ta ngetaimim.

²⁹ “Vaalua aue ughaa peina sarasarakana ateva taumattu tanganuena? Arova ughele iria mua, aue ughele roo tani ghaa peina.

³⁰ “Lo ateva karika kapughu ia, tau ngai ssateeghi ia, me lo ateva karika esaasausieghi tani atoka aitaaua, ia etani aatoka apolapola. ³¹ Liuna avalua o me aghaauliaa etaimim va God aue ekkaluaa isaa akapa ssavoto me inangari taumattu eaauliaa saasakiaa, me lo ateva eauliaa saasakiaa tale Spiriti eteva, God karika aue ekkaluaa. ³² Lo ateva eauliaa saasakiaa tee Natuna ateva Taumattu ngateva, God aue ekkaluaa kanna ssavoto, me lo ateva taumattu eauliaa saasakiaa tee Spirit Manga ateva, God karika aue ekkaluaa, tale nau oia me nau ngemuli.

*Sesa ngai eteae ekuukuneeaa uene sesa
(Luk 6:43-45)*

³³ “Arova uue va ai eteae masina ia, utani ue tee va uenena masina. Me arova uue va ai eteae sesa ia, utani ue tee va uenena sesa. Poli ai eteae la kilakila maamasinaane me sesaane tale uenena. ³⁴ Am nongina natuira iem katu ngatoa, vaalua aue am auliaa masi voto nau eteva sesa taumattu ngam? Taumattu ngateva epoppooaa voto ekasukasu tale urunguitanina ateva. ³⁵ Masi taumattu ngateva etautau mae masi voto ekaakaai elome etana, me sesa taumattu ngateva etautau mae sesa voto ekaakaai elome etana. ³⁶ Aghaauliaa etaimim va tale nau niaisakei eteva, taumattu ngatoa aue la ghauliaa ta God asease inangari laghe nim poppooaa. ³⁷ Poli tale inangarim God aue ekoloo va masi taumattu io o sesa taumattu io.”

*Paresi etoa laghe kokkolomi Iesu va eghelei righi niaimatoonga
(Mak 8:11-12; Luk 11:29-32)*

³⁸ Me Paresi etoa me tau ngai aapasunga tale inangari nipaopao atoa laghe uela ta Iesu va, “Tisa, ami anna tani tara righi niaimatoonga ughelei.”

³⁹ Iesu ghe liula me ghe uela etaira va, “Sesa taumattu ngam me karika am uusilaa aloannaane God, me am anna tani tara niaimatoonga. Saa ghe lutu teela propete ateva ta Jona, ie nonga o niaimatootonga ateva aue elutu. ⁴⁰ Nongina Jona ghe asola elome tale kova kko ateva kotolu llaa me kotolu voo, Natuna tee ateva Taumattu ngateva aue easo tale urunguitani kosa ateva kotolu llaa me kotolu voo. ⁴¹ Aue taumattu nge Ninive atoa la tingina tale niaisakei eitauaa teiem, me la ue va sesa am, poli aNinive atoa laghe nna ngaioghioghiaala, nau Jona ghe poppooaa etaira, me ia oia, lo ateva namuu ia ta Jona ange toka teeiemla. ⁴² Tale nau niaisakei, aue Kuin nge Saot ateva etingina tee lo ateva oia vituu, me aue eue va sesa am, poli Kuin ateva ghe kasu emasaueiliila tani mae nongo alomasaanganiaane Solomon, me lo ateva taumattu namuu ia ta Solomon ange toka teeiemla.

*Nau sesa spiriti eteva emene kiikiriaa mae
(Luk 11:24-26)*

⁴³ “Nau eteva sesa spiriti eteva ekupikupi ghoa tale taumattu ngateva, ekasukasu tale voto mallangona tani pae niainoana me nau etam tara ⁴⁴ eue va, ‘Amene kiri lao tale ale ateva aghe kasu vuliela.’ Nau elaa reerekata me etaatara va ale ateva karika toa etana me kaakalaa ngaraarangisana ia me elome masina tani toka etana. ⁴⁵ Me emene kasu, tani laa kolo ghaitu (7) sesa spiriti gheeleiaaira mene sesaaili. Me la kupi sso, me la sso tokatoka tale ale ateva. Gheeleiaane aue esesaaili, aue elau isaa akasina. Lo ateva oia vituu aue eghelei evalua o.”

*Kinna me nengane atoa Iesu
(Mak 3:31-35; Luk 8:19-21)*

⁴⁶ Nau Iesu ghe samasama tee taumattu ngatoa, kinna me nengane atoa laghe tiitingina eleka, laghe aloanna tani sama teeia. ⁴⁷ Kateva taumattu ghe auliaala etana va, “Kinam me nengam taita atoa eleka, la ghanna tani sama teeio.”

⁴⁸ Iesu ghe liula me ghe uela etana va, “See ia kinaghi me see ila nengaghi etoa?” ⁴⁹ Ghe suisui lao kapuna disaepolo atoa me ghe ue va, “Kinaghi me nengaghi etoa o. ⁵⁰ Lo ateva eghelei aloannaane Tamaghi epona liu, nengaghi ia me kapughu vause ia me kinaghi ia.”

12:33: Mat 7:16-20. **12:34:** Mat 3:7; 15:18; Luk 3:7; 6:45. **12:38:** Mat 16:1; Luk 11:16; Jon 6:30. **12:39:** Mat 16:4; Mak 8:12. **12:40:** Jona 1:17. **12:41:** Jona 3:5. **12:42:** 1 Ki 10:1-10. **12:45:** 2 Pita 2:20. **12:50:** Rom 8:29.

13

*Kiukiu niaimatoonga tale
tau ngai pasa katu ue ngai eteva
(Mak 4:1-20; Luk 8:4-15)*

¹ Ia nonga o nau eteva me Iesu ghe kupi ghoala tale ale ateva me ghe lao sio tani toka tale sama ateo talia ngateae. ² Oroiannaaili taumattu ghe mae sio ta ngetana, mausina avalua o me ghe saesaela tale paanaka ateva me ghe tokala etana me taumattu ngatoa laghe tiitingina elo samarra. ³ Ghe ppooaala oroiannaaili voto tale kiukiu niaimatoonga. Ghe uela va, “Am nongola! Tau ngai pasa katu ue ngai eteva ghe kasula tani pasa aina katu ue ngai. ⁴ Nau eteva ghe kaokaoaala katu ue ngai, kasina ghe katuula tapaa salana me ghila atoa laghe mae sio tani nama. ⁵ Kasina ghe katuula tale voto ateva sakolo ia, karika oroi kosa me arovaeaata nonga ta ghe pinosala, poli karika lluse ia. ⁶ Me nau sinaka ateva ghe saela ghe sinaki ematelala. Laghe matela poli oane karika ghe sio liula ta euu atu ia. ⁷ Kasina katu ue ngai ghe katuula elome tale uasa karasa. Laghe pinosala me uasa karasa ateva ghe kavili ematelala. ⁸ Me kasina katu ue ngai ghe katuula tale masi kosa me laghe kuneaala ueira, kasina ghe kuneaala kateva ai (100), kasina ghe kuneaala ghaonomongaulu (60), me kasina kotolungaulu (30). ⁹ Lo ateva talingane manee tani nongo, aue enongo.”

¹⁰ Disaepolo atoa laghe mae sio ta Iesu me laghe kolomiela va, “Vaalua me upoppooaa kiukiu niaimatoonga ta taumattu ngatoa?”

¹¹ Iesu ghe liula me ghe uela etaira va, “Alomasaanga tale voto eaaisulia tale ararimangali ngepona liu eteva, God ghe tau aatu etaimim, me ila karika. ¹² See righi voto etana, aue God emene taula me aue eghaa oroi voto, me lo ateva karika righi voto etana aue eghaa velu righi lutu voto etana. ¹³ Liuna avalua o me aghaauliaa voto etaira tale kiukiu niaimatoonga:

“Arongona ta la taatara me karika aue la tara kila,
me arongona ta la nongonongo me karika aue la nongo me aloira emasaanga.

¹⁴ Ta ngetaira me llo Aisaea ghe aulia ngamuemua alokoila aue ekaurekati. Ghe uela va,

“‘Aue am nongo me karika aue am kila;
aue am tara me karika aue am alomasaanga tee.

¹⁵ Urunguitaniira aue ekorokorongana,
me talingaira aue evolovolongina tani nongo,
me laghe akou rungaala mataira va karika la mene taatara.

Ta la rau tara nonga ta mataira,
me la nongo ta talingaira,
va la kila ta urunguitaniira,
me la kiri mae va aghelei emasinaila.’

¹⁶ Me am, niarangise etaimim, poli mataimim etaatara me talingaimim enongonongo. ¹⁷ Aghaaulia ngakoronna etaimim va oroi ila propete atoa me taumattu ghulughuluena laghe aloannaaili tani tara voto am taatara ghaine, me karika laghe tarala, me tani nongo voto am nongonongo ghaine, me karika laghe nongola.

¹⁸ “Am nongo malloeana kiukiu niaimatoongana atea ta tau ngai pasa katu ue ngai eteva: ¹⁹ Arova lo ateva enongonongo inangarina ararimangali eteva epona liu me alona etam maamasaangania, sesa taumattu ngateva

eghaaghaa velu voto tau ngai pasa katu ue ngai eteva epasapasa tale urunguitanina ateva. Nongina katu ue ngai ghe katuula tapaa salana. ²⁰ Me llo katu ue ngai ghe katuula tale voto ateva sakolo ia, nongina taumattu ngateva enongonongo inangari me arovaeaata ta eghaaghaa me emasimasi etingina. ²¹ Me poli karika righi oane, karika etiitingina liu nau eteva sesa nau me niaiuvii elutulutu teeia mausi inangarina God, me arovaeaata ta ekaakatuu. ²² Me llo katu ue ngai ghe katuula elome tale uasa karasa nongina taumattu ngateva enongonongo inangari me enannangaili voto kamena tale kosa ateva oia me ealoannaaili va isaa oia voto aue egheleia va etue peipeiena, me ekakkaluaa inangari tale ararimangali eteva. Liuna avalua o me karika righi uene. ²³ Me llo katu ue ngai ghe katuula tale masi kosa nongina taumattu ngateva enongonongo inangari me alona emaamasaanga ekuukuneeaa uene, kasina kateva ai (100), kasina ghaonomongaulu (60), me kasina kotolungaulu (30) oroiaane elaulau llo laghe pasa akasinala.”

Kiukiu niaimatoonga eauliaa ssa tuvui eteva

²⁴ Iesu ghe mene auliaala kateae kiukiu niaimatoonga. Ghe uela va, “Ararimangali ngepona liu eteva nongina taumattu ngateva ghe pasala katu ue ngai masina tale utana atingiu. ²⁵ Me vara taumattu ngakapa atoa laghe lao sio tani asekanua, me tau ngai ssateena ateva ghe mae sio tani pasa ssa tuvui eteva elome tale katu uit, me ghe kasula. ²⁶ Nau eteva katu uit ghe pinosala me ghe kuneaala uenenna, ssa tuvui tee ateva ghe pinosa teeilala.

²⁷ “Me kapuna tau ngai nongonongo anna atoa laghe lao sio me laghe uela ta tau ngumane va, ‘Vau eteva, ami annaa va ughe vella nonga katu uit tale umam utana atingiu, me vaalua ssa tuvui eteva ghe pinosala?’

²⁸ “Ghe liula me ghe uela va, ‘Tau ngai ssateeghi eteva ghe kaokaoaala.’

“Me tau ngai nongonongo anna atoa laghe kolomiela va, ‘Uanna va ami laa muke velu?’

²⁹ “Ghe uela va, ‘Karika. Am rau mukemuke velu ssa tuvui etoa, va am muke velu tee uit. ³⁰ Am tau vellaluela me lalu sae aitauaa me elaa ghaa nau nisai uit. Ia o nau eteva aue aghauliaa ta lo atoa la sai uit tani ghaa akasina ssa tuvui etoa me la iri eitaeinila me pei nitungiaa me la ghaa aitauaa uit me aue la laa ghatoka tale aleghi ale nginana ateva.’ ”

Kiukiu niaimatoonga atea tale katu ue ngai erighi (mastet)

(Mak 4:30-32; Luk 13:18-19)

³¹ Ghe mene auliaala kateae kiukiu niaimatoonga. Ghe uela va, “Ararimangali ngepona liu eteva nongina katu ue ngai erighi la kolokoloa va mastet, taumattu ngateva ghe ghaaiela, me ghe lao sio tani pasaia tapaa ngutana. ³² Arongona ta ghaunaaili ia tale isaa akapaaili katu ue ngai me nau epiipinosa, enaanamuu vulu ekapa isaa akapa ai laghe pasala eutana. Me ia oia ai etea ghila atoa la looloo la mae tokatoka tale laangina.”

Kiukiu niaimatoonga tale isti eteva

(Luk 13:20-21)

³³ Me ghe mene auliaala kateae kiukiu niaimatoonga. Ghe uela va, “Ararimangali ngepona liu eteva nonginaaili isti eteva vause ateva ghe ghaaiela me ghelei eitauaa teela palaoa oroieili lomosi ta palaoa ngateva ghe rrangala.”

³⁴ Iesu ghe aauliaa isaa akapa o voto ta taumattu ngatoa tale kiukiu niaimatoonga. Karika ghe aaulia ngamasalika teva voto ta ghe aauliaa nonga tale kiukiu niaimatoonga. ³⁵ Mausina avalua o me llo propete ateva ghe auliaala ghe kaurekatila. Ghe uela va, “Aghi aghaauliaa kiukiu niaimatoonga etaimim.

Me aue akiukiuaa voto aisulianna ghe tiuaala emua arau nau God ghe gheleila kosa ateva oia.”

Malloeana kiukiu niaimatoonga tale ssa tuvui eteva

³⁶ Nau ghe kasu vulila taumattu ngatoa, ghe ssola tale ale ateva. Me kapuna disaepolo atoa laghe lao sio etana me laghe uela etana va, “Uaulia ngamasina etaimami malloeana kiukiu niaimatoonga ngateae ta ssa tuvui eteva me utana atingiu.”

³⁷ Ghe liula me ghe uela etaira va, “Natuna ateva Taumattu ngateva ia o lo ateva ghe kaokaoaala masi ue ngai. ³⁸ Me paa ngutana atingiu eaaimatoonga kosa ateva, me masi ue ngai eaaimatoonga lo atoa natuna ila ararimangali eteva. Me ssa tuvui eteva eaaimatoonga natuna atoa sesa taumattu ngateva. ³⁹ Me Satana tau ngai ssateena ateva God ghe pasala ssa tuvui eteva. Me nau nisai uit eaaimatoonga airuuruu tale kosa ateva me tau ngai sai uiti etoa, la aaimatoonga ensolo atoa.

⁴⁰ “Nongina laghe muke vella ssa tuvui eteva me laghe tungie saela tale kuraa, airuuruu tale kosa ateva aue ia avalua o. ⁴¹ Natuna ateva Taumattu ngateva aue esuu kapuna ensolo atoa me aue la muke velu tale ararimangalina ateva voto akapa sesa etiituaa ssavoto me lo atoa la gheelei voto sesa. ⁴² Aue la sau vella sai tale paka kura ateaataaaili ia me aue niaingalaaii me niaingeresa ngalungalu elutu. ⁴³ Me ghulughuluena atoa taumattu aue la llaa nongina sinaka ateva tale ararimangalina ateva Tamaira ateva. Lo ateva talingane manee tani nongo, aue enongo.”

Kiukiu niaimatoonga tale masi voto laghe kaila

⁴⁴ “Ararimangali ngepona liu eteva nonginaaili aikaai viliki veu eteva laghe kaieiniela tale paa ngutana atea. Nau eteva taumattu ngateva ghe taraiela ghe mene aisulieiniela me tale masimasiaane ghe aitaua ngakapala peina me laghe polila, me ghe polila ia o paa ngutana atea.

⁴⁵ “Me tee ararimangali ngepona liu eteva nonginaaili tau bisnisi eteva ghe paepae pel tani poli. ⁴⁶ Nau eteva ghe tarala lo ateva pel masinaaili ia ghe lao sio, ghe aitaua ngakapala peina me laghe polila, me ghe polila ia o pel ateva.

Kiukiu niaimatoonga tale uvena atea

⁴⁷ “Ararimangali ngepona liu eteva nonginaaili uvena atea laghe velue siola tale ateo talia ngateae me ghe ghaala asease kko atoa. ⁴⁸ Nau eteva ghe pasula, tau luku etoa laghe aea ssola elae me laghe toka siola me laghe ghaala masi kko, laghe kaaila tale keru, me laghe sau vella llo sesa. ⁴⁹ Airuuruu tale kosa ateva aue ia avalue ia o, aue ensolo atoa la mae pola sesa atoa ta ghulughuluena atoa taumattu, ⁵⁰ aue la sau vella sai tale paka kura ateaataaaili ia me aue niaingalaaii me niaingeresa ngalungalu elutu.”

⁵¹ Iesu ghe kolomilala va, “Aloimim ange masaangala isaa o voto?”

Me laghe uela va, “Ue.”

⁵² Me ghe uela etaira va, “Liuna avalua o me isaa akapa tau ngai aapa-sunga tale inangari nipaopao laghe disaepolola tale ararimangali ngepona liu eteva nonginaaili taumattu ngateva eghaaghaa ouna me pokane masi voto tale rum atiulu la ghatoka masi voto etana tale alena ateva.”

Propete ateva la tam oneoneainia
(Mak 6:1-6; Luk 4:16-30)

⁵³ Nau eteva Iesu ghe ruula tani auliaa isaa o kiukiu niaimatoonga me ghe kasu vulila ia o voto ateva. ⁵⁴ Ghe lao sio tale masalikina tunga atea me ghe tiuaala tani apasunga ta taumattu ngatoa tale aleira ale nivelu eitauaa. Me laghe soghiaala voto ghe auliaa me ghe gheelei, me laghe kookolomi va, “Ia oia taumattu ngateva eaa ghe ghaala alomasaanga me sarasarakana tani ghelei mirikolo?” ⁵⁵ Ita kilakila va natuna ia tau ngai atulu ale ateva ia oia taumattu ngateva, me ararina atea kinna ta Meri me nengana atoa ta Jeimis, Josep me Saemon me Jiuda. ⁵⁶ Me kapuna vause akapa atoa la tokatoka teeita. Me arova eaa ghe ghaala isaa o voto?” ⁵⁷ Me ang ghe sessaila etana.

Me Iesu ghe uela etaira va, “Propete ateva la oneoneainia tale kasina ppae masaliki, me tale masalikina tunga atea me tanganuena, karika.”

⁵⁸ Karika ghe gheleila righi oroi mirikolo tale ia o masaliki etea poli karika laghe aikaaiaa etana.

14

Herot ghe annaa va Jon tau
ngai aasuu ia ta Iesu
(Mak 6:14-29; Luk 9:7-9)

¹ Isaa o nau, gavana ngateva Herot ghe nongonongo kiukiuna Iesu. ² Me ghe uela ta kapuna tau ngai uungu etoa va, “Ia oka taumattu ngateva Jon tau ngai aasuu ia etana ghe mene totula tale nimate! Liuna avalua o me sarasarakanaaili ia tani ghelei mirikolo.”

³ Poli emua akasina, Herot ghe suula inangari me laghe poso atokala Jon me ghe iriela me ghe atokaie ssola tale ale mata voovoo poli Herodias, vausenna ia tuena ta Pilip. ⁴ Poli Jon ghe ue ta Herot va, “Karika masina ta ughe lai sariela.” ⁵ Herot ghe anna tani uvi ematea me poli ghe maamatauta taumattu ngatoa ta ila laghe ue va Jon propete ia, liuna avalua o me karika ghe roola tani uvi ematea.

⁶ Nau eteva ghe rekatala tani nnaa nau eteva Herot ghe lutula etana, natuna vause ateva Herodias ghe ssiuaala ta mataira Herot me kapuna atoa, me Herot ghe masimasiangailiela, ⁷ me ghe auliaala inangari nialokoi me ghe aulia ngakoronnaailiila etana va aue etaula saa voto aue ekolomi. ⁸ Me kinna ghe auliaa tau lao sio ninanna ngateva me ghe uela va, “Ghaine arau aghaloanna uruna ateva Jon tau ngai aasuu ia tale tivilau terei.” ⁹ King ghe alousiusila, me poli ghe gheleila inangari nialokoi eteva ta mataira namu ngatoa, ghe auliaala va la taula llo ghe kolomila. ¹⁰ Me ghe suula soldia ngatoa me laghe sai pulela alona atiulu Jon tale ale mata voovoo. ¹¹ Laghe sau lao sio uruna ateva Jon tale terei etivilau me ghe taue lao sio ta aliki vause ateva. Ghe ghaaiela me ghe laoainie sio ta kinna. ¹² Kapuna disaepolo atoa Jon laghe mae sio tani ghaa vaulanna ateva Jon me laghe lao sio tani kaieinia. Me laghe lao sio tani auliaa ta Iesu.

*Iesu ghe anginila ghalima airari (5,000) taumattu
(Mak 6:30-44; Luk 9:10-17; Jon 6:1-14)*

¹³ Iesu ghe nongola isaa o voto ghe lutula me ia nonga me disaepolo atoa laghe aikaaila tale paanaka ateva tani lao tale vaara. Nau eteva taumattu ngatoa laghe nongola, laghe kasu vulila masalikiira me laghe kasuaala tani laa ghaimuli teeia. ¹⁴ Nau Iesu ghe ssola elae, ghe tarala oroieili taumattu ngatoa. Ghe alousiusi teeilala me ghe ghelei emasinailala tale aneira isiki.

¹⁵ Auena sinaka ateva ghe suu me disaepolo atoa laghe lao sio etana me laghe uela va, "Voto ateva oia vurunganna ia, me ange aaitarrauii. Sungi vella taumattu ngatoa me la lao tale masaliki taumattu etana me la laa poli righi aneira inana."

¹⁶ Iesu ghe liula me ghe uela va, "La rooroo tani toka. Am taula righi inana, me la nama."

¹⁷ Disaepolo atoa laghe uela va, "Ami posoposo ghalima nonga verete me ghalua kko."

¹⁸ Iesu ghe uela va, "Am maeaa sio etaghi." ¹⁹ Me ghe auliaala ta taumattu ngatoa va la toka sio tale rarrasa me ghe ghaala verete ghalima me kko alua, me ghe taatara saela epona liu me ghe kaili emasina saela, me ghe pirila, me ghe tau lao sio ta disaepolo atoa me ila laghe lao sio tani aikoiita ta taumattu ngatoa. ²⁰ Laghe namanamala me ghe ssoilala, me disaepolo atoa laghe kaai esokosokoiaala kasangaulu ghaluae (12) laka tale tapiri nginana ghe oghila. ²¹ Lo atoa laghe namanamala ghe roola ghalima airari (5,000) taita, karika iraira tee vause me aliki etoa.

*Iesu ghe kasula epona tale paamanu eteva
(Mak 6:45-52; Jon 6:15-21)*

²² Gheania nonga ta Iesu ghe auliaala va kapuna disaepolo atoa laghe aikaai tale paanaka ateva, me laghe muemue lao ta pai kativilau me ia ghe sungi velu mua taumattu ngatoa. ²³ Vara ghe sungi vellala, me ie nonga ghe saela tale motouru tani looloo sae. Ie nonga, me ghe aitarrauiila. ²⁴ Paanaka ateva ang ghe mala masau ghoala me kotoo atoa angila ghe uviuvia poli laghe sousou kuukuu eteva.

²⁵ Elopai me Iesu ghe laa ghoa rekata etaira ghe kasukasu epona tale paamanu eteva. ²⁶ Nau eteva disaepolo atoa laghe taraiela ta ghe kasukasu epona tale paamanu ghe moi saasakieinilala me laghe ue va, "Raroai ia!" Me laghe aapiia poli laghe maamatautu.

²⁷ Me gheania nonga ta Iesu ghe sama teeilala, me ghe uela va, "Am rau mene annaa, ta aghi oia. Am rau mene matautu."

²⁸ Me Pita ghe uela ta Iesu va, "Vau eteva! Arova koronna va io Iesu, uauliaa mae etaghi me akasu mae etam epona tale paamanu."

²⁹ Iesu ghe uela va, "Kkure sio mae."

Me Pita ghe kkure vulula paanaka ateva me ang ghe kasukasu elaolao ta Iesu epona tale paamanu. ³⁰ Me vara ghe tarala kotoo ateva me ang ghe maamatautu me ang ghe lullusu me ang ghe kolokolo, ghe ue va, "Vau eteva, asaangieghila!"

³¹ Gheania nonga ta Iesu ghe ssuaala nimane me ghe kunela Pita me ghe uela va, "Ghaunaaili unem niaikaaiiaa. Vaalua me eghaaghalua nannaam?"

³² Me nau eteva lalu ghe saesaela tale paanaka ateva me kuukuu eteva ghe kapala. ³³ Me lo atoa tale paanaka ateva laghe kkaueiniela, me laghe ue va, "Koronnaaili va Natuna io God."

Iesu ghe ghelei emasinala tau sessa atoa eGenesaret
(Mak 6:53-56)

³⁴ Laghe ose longotila me laghe kautula tale distriki eteva eGenesaret.
³⁵ Nau eteva taumattu ngatoa tale ia o masaliki eteae laghe tara kilala Iesu, laghe suula inangari ta mene katoa masaliki me taumattu ghe maeaa sio kapuira tau sessa etana. ³⁶ Me laghe tani kookolomi ekorokorongana ia va etau velu tau sessa atoa me la nim poso sama ghinnanina. Lo atoa laghe posoposo sama ghinnanina Iesu laghe maamasina.

15

Voto raarangisana me voto karika raarangisana
(Mak 7:1-23)

¹ Katoa Paresi me tau ngai aapasunga tale inangari nipaopao, laghe kasula eJerusalem me laghe mae sio ta Iesu tani kolomia va, ² “Mausi saa me kapum disaepolo atoa karika la ghaaimuli tee voto tuvuita atoa laghe apasungaala etaita va ita gheelei? Karika la porapora nimaira nau la namanama.”

³ Iesu ghe liula me ghe uela va, “Me vaalua me karika am aaimuli usi tee inangari nipaopao kanna God me am aaimuli usi tee voto tuvuumim atoa laghe apasungaala va am gheelei? ⁴ Poli God ghe uela va, ‘Am oneoneaa tamaimim me kinaimim,’ me, ‘Lo ateva ekaakasikiena tamana o kinna aue la uvi ematea.’ ⁵ Me am auliaa va arova kateva righi peina eroroo tani sausi tamana o kinna, me eue etairarua va, ‘Peighi tani sausiemalua ngagheleila inangari nialokoi tani taula ta Vau palepale,’ ⁶ am aapasunga va ia o taumattu ngateva karika eroroo tani oneoneaa tamana o kinna. Tale isaa o ase salana am gheelei inangarina God enim peepeisaane, ta am aaimuli usi tee auliaaira tuvuumim atoa. ⁷ Am usimaghalua am! Propet Aisaea ghe aulia ngakoronnala nau ghe aulia ngamuemua alokoila gheeleiaaimim, ghe uela va:

⁸ “Isaa oia taumattu la nim oneoneainaghi ta paaira me urunguitaniira masaueili etaghi.

⁹ Karika righi malloeana uneira nikkauaa poli la ghaapasunga llo nim kaluira taumattu ngatoa nonginaaili va kanna God.’ ”

¹⁰ Iesu ghe kolola taumattu ngatoa me ghe uela etaira va, “Am nongo me aloimim emasaanga! ¹¹ Saa llo voto ekupikupi sso elome tale paa taumattu ngateva, karika egheleia va etam raarangisana, ta saa llo voto epoppooaa ekupikupi ghoa tale paane ateva egheleia etam raarangisana.”

¹² Vara me disaepolo atoa laghe mae sio tani auliaa ta Iesu va, “Ukilakila va Paresi etoa esessaila tale inangari uauliaala?”

¹³ Iesu ghe liula me ghe uela va, “Isaa akapaaili voto eutana Tamaghi epona liu karika ghe pasala, aue emuke akapaaili. ¹⁴ Am rau mene annaa isaa o ase taumattu! Ila nongina mata salusalu, la ghaloanna tani apasunga salana ta katoa, me arova mata salusalu eteva ekatulaa mene kateva mata salusalu, ilalua akapa aue lalu kupi tale liu.”

¹⁵ Vara me Pita ghe uela va, “Eroroo va uauliaa malloeana isaa o inangari?”

¹⁶ Iesu ghe liula me ghe uela va, “Vaalua? Am tee aloimim karika ghe masaanga? ¹⁷ Karika am kilakila? Saa llo voto ekupikupi sso tale paa taumattu, esiosio tale kova taumattu, me emene kupikupi ghoa nau

taumattu ngateva elaa tiutiu. ¹⁸ Me saa llo voto ekupikupi ghoa tale paa taumattu, ekasukasu tale urunguita, isaa o voto egheeghelei taumattu ngateva etam raarangisana. ¹⁹ Tale isaa akapa voto urunguita ateva ealutu sesa ninanna, tani aiuvi emate, tani lai sari katoa maneeira, tani lai saasaloaa, niainao, inangari kamena me niauliaa saasakiaa. ²⁰ Isaa o voto egheeghelei taumattu ngateva etam raarangisana, me tani namanama me karika upora nimam, isaa o llo karika eghelei taumattu ngateva etam raarangisana.”

*Unna niaikaaiia vauseni nge Keinan ateva
(Mak 7:24-30)*

²¹ Iesu ghe kasu vulila lo atea o masaliki me ghe lao sio tale llo masaliki kalakalangina eTaer me eSaedon. ²² Vauseni nge Keinan ateva, ghe tokatoka tale ia o pai etivilau, ghe mae sio ta Iesu, me ghe sama anamuula va, “Vau eteva, Natuna io Deivit, ualously teeieghi! Natughu vause ateva raroai eteva etokatoka etana me egheelei saasakieinia.”

²³ Iesu karika poi ghe nim aaisaueinia. Kapuna disaepolo atoa laghe lao sio me laghe aauliaa etana va, “Sungi aoghiela! Eusiusita me egheelei kinatama mangalia ateva!”

²⁴ Iesu ghe liula me ghe uela va, “God ghe sungieghila nonga tani mae sausi lo atoa aIsraeli ang ghe raulala.”

²⁵ Vara me vause ateva ghe mae sio ghe suuiaala ta liue kkena Iesu, me ghe uela va, “Sausieghila, Vau eteva!”

²⁶ Iesu ghe liula me ghe uela va, “Karika masina tani tau lao aneira inana aliki etoa ta paua atoa.”*

²⁷ Vause ateva ghe liula me ghe uela va, “Koronnaaili, Vau eteva. Me paua tee atoa la namanama aneira vorovoro nginana vauira atoa ekaakatuu tale uneira tevoo.”

²⁸ Iesu ghe liula me ghe uela etana va, “Vause ateva, niaikaaiia etam namungaili! Saa llo voto ualoanna va elutu etam, aue elutu.” Ia arau o nau eteva, natuna vause ateva ghe masinala.

Iesu ghe ghelei emasinala oroieili tau sessa atoa

²⁹ Iesu ghe kasu vulila voto ateva o, me ghe lao akalakalangina sio tale ateo talia ngateae eGalilii. Ghe saela tale motouru eteva me ghe toka siola. ³⁰ Oroieili ila taumattu ngatoa laghe mae sio etana, laghe maeaa sio lo atoa kasukasuaaira sesa, mata salusalu, riu makeakeana, paavoo me oroieili ila tau sessa atoa, laghe atokailala tale liue kkena Iesu, me ghe ghelei emasinaaila. ³¹ Taumattu ngatoa laghe annangailiila nau laghe tarala paavoo atoa laghe samala, lo atoa riura makeakeana laghe korosilala, lo atoa kasukasuaaira sesa laghe masinala, me mata salusalu etoa ghe otila mataira. Me laghe tau saela kapuira Goto ateva aIsraeli etoa.

*Iesu ghe anginila ghaata airari (4,000) taita
(Mak 8:1-10)*

³² Iesu ghe kolola kapuna disaepolo atoa, me ghe uela va, “Aghaalously tee taumattu ngatoa, ta laghe toka aitauaa teeieghila kotolu nau, me ghaine karika righi inana va la nama. Karika aghaloanna tani suu vella me maloona ila, la rau taatarruu elaolao va la katuu etapaa salana.”

15:24: Mat 10:6. * **15:26:** paua atoa Ajiu etoa laghe annaa va ila muennaaili ila ta lo atoa karika va ajiu ila, me laghe kololala va ueili paua ila. Iesu ghe aimulisi tee auliaaira. Nau ghe auliaa, karika va ghe sessaia. Ghe nim anna tani tootoonga aikaaiaane vause ateva, karika va tani ghelei saasakiaa nannaane. **15:31:** Mak 7:37. **15:32:** Mat 14:14.

³³ Disaepolo atoa laghe kolomiela va, “Eaa ita ghele laa ghaa righi inana ghelei oroieili tale voto ateva oio vurunganna ia, me ita anginila taumattu ngatoa oio oroienaaili ila?”

³⁴ Iesu ghe kolomila va, “Ghaisa akapa verete am uunusi?”

Me laghe liula me laghe uela va, “Ghaitu (7) verete me lutu kko ghauna.”

³⁵ Me Iesu ghe auliaala ta taumattu ngatoa va la toka sio tale kosa. ³⁶ Vara me ghe ghaala ghaitu verete me kko, me ghe kaili emasina saela, ghe pirila, me ghe taula ta kapuna disaepolo atoa, me disaepolo atoa laghe tau lao sio ta taumattu ngatoa. ³⁷ Ila akapa laghe namanamala me laghe tuvula. Vara me disaepolo atoa laghe kaai aitauaala tapiri nginana ghe oghila, ghe roola ghaituae (7) laka. ³⁸ Ila akapa taita atoa laghe namanamala, ghe roola ghaata airari (4,000), karika laghe ioila vause atoa me aliki etoa. ³⁹ Vara me Iesu ghe suu vella taumattu ngatoa, me ghe aikaaila tale paanaka ateva, me ghe lao sio tale masaliki etoa kalakalangina ila tale distriki eteva eMagadan.

16

Laghe tani anna tani tara teva niaimatoongana

(Mak 8:11-13; Luk 12:24-56)

¹ Paresi etoa me Sadiusi etoa laghe lao sio ta Iesu, me laghe kolomiela va eapasunga teva niaimatoongana ngepona liu. Laghe auliaa llo tani nim tootoongainia.

² Ghe liula me ghe uela va, “Nau ange elo alai am ue va, ‘Aue masi nau poli karaane ateva eraeraeana,’ ³ me elue talaua am ue va, ‘Ghaine ettasi poli karaane ateva ange raeraeanala me ange aavoo.’ Am taatara kila kookoo ngateva me karika am taatara kila niaimatoonga tale nau. ⁴ Sesa taumattu ngam me karika am uusilaa aloannaane God, am anna tani tara niaimatoonga. Saa ghe lutu teela Jona, ie nonga o niaimatootoongana ateva aue elutu.” Vara me Iesu ghe kasu vulilala me ghe lao ppae sio.

Uneira isti Paresi me Sadiusi etoa

(Mak 8:14-21)

⁵ Nau laghe lao sio ta pai kativilau tale ateo talia ngateae me disaepolo atoa laghe tarala va laghe aikkaluaala verete. ⁶ Iesu ghe uela etaira va, “Am aikinikinitaa tani tara amasina uneira isti Paresi me Sadiusi etoa.”

⁷ Laghe aikolomieinila tani ue va, “Koti eaauliaa llo oia poli karika ita ghaala righi verete.”

⁸ Iesu ghe kilala sa ateva laghe aissakeana teeia me ghe uela etaira va, “Uneimim niaikaaiia ghaunaaili, vaalua me am aissakeana va poli karika righi verete? ⁹ Vaalua, aloimim karika ghe masaanga? Karika am anna ghalima verete ghe roola ta ghalima airari (5,000) me ghaisae keru am ghe kaaila? ¹⁰ Me karika am anna ghaitu verete ghe roola ta ghaata airari (4,000) taumattu me ghe roola ghaisae laka am ghe kaaila? ¹¹ Vaalua, me karika am kilakila va karika va aghaauliaa verete? Am aikinikinitaa tani tara amasina uneira isti Paresi me Sadiusi etoa.” ¹² Vara me laghe vira mene kilala va ghe aauliaa llo Paresi me Sadiusi etoa laghe aapasunga, me karika va la taatara amasina tale isti la ghelei tale verete.

Pita ghe auliaala va Iesu see ia

(Mak 8:27-30; Luk 9:18-21)

¹³ Nau Iesu ghe lao sio tale voto ateva kalakalangina ia eSiisaria Pilipae, ghe kolomila kapuna disaepolo atoa va, “Taumattu ngatoa la ue va see ta Natuna ateva Taumattu ngateva?”

¹⁴ Laghe liula me laghe uela va, “Katoa la ue va Jon tau ngai aasuu ia, me katoa la ue va Elaija, me katoa la ue va Jerimaea o mene katoa tani propete.”

¹⁵ Me ghe kolomilala va, “Me am, am ue va aghi see?”

¹⁶ Saemon Pita ghe liula me ghe uela va, “Io Mesaea io, Natuna io God ateva tokatoka liu ia.”

¹⁷ Iesu ghe liula me ghe uela va, “Niarangise etam Saemon natuna io Jona, poli karika teva taumattu eauliaa tau aatu llo ona ta Tamaghi etokatoka epona liu. ¹⁸ Me aghaauliaa etam va io Pita, me tale ia o atu eteva* aue aghatulu aleghe ale manga ateva etana, me atamana atea tale voto ateva aleira ia matena atoa karika erooroo tani apalaia. ¹⁹ Aue atau aatu kii eteva tale ararimangali ngepona liu eteva; saa llo ugheelei runga tale kosa ateva, aue la ghelei runga tee epona liu, me llo utautau velu tale kosa ateva aue la tau velu tee epona liu.” ²⁰ Me ghe paola kapuna disaepolo atoa va la rau mene laa ghauliaa see va ia Mesaea ia.

Iesu ghe auliaala va aue emate

(Mak 8:31–9:1; Luk 9:22-27)

²¹ Isaa o nau Iesu ghe tiuaala tani aulia ngamasalika ta kapuna disaepolo atoa va aue etani sae eJerusalem me aue esae ghaa oroieili mmarikana, ta namu ngatoa, me namu ngatoa ta pristi etoa me tau ngai aapasunga ngatoa tale inangari nipaopao, me aue la uvi ematea, me aue kotonna ateva nau, emene totu.

²² Pita ghe koloala me lalu ghe laa tingina ppae sio, me ghe tiuaala tani kisoia, ghe ue va, “Karika, Vau eteva! Isaa o voto karika erooroo tani lutu ta ngetam.”

²³ Iesu ghe kiriela me ghe uela ta Pita va, “Kasu vulieghila, Satana! Ugheelei rungarunga salaghi. Nannaam karika eanna voto kanna God ta voto kaluira taumattu ngatoa.”

²⁴ Vara me Iesu ghe uela ta kapuna disaepolo atoa va, “Lo ateva eanna tani usieghi, etani sioaa nannaane me erau mene nnainia nonga me esunuki unna aikotoo ateva, me eaimuli teeieghi. ²⁵ Poli see eanna tani asaangi maamauluaane aue eraua, me lo ateva maamauluaane eraua ta poli mausighi aue emene ghaa. ²⁶ Saa righi masi voto aue elutu arova taumattu ngateva ghele ghaa voto akapaaili tale kosa ateva me ghele rau maamauluaane? O sa ateva aue ghele tauela tani aikolikolieinia tani mene ghaa maamauluaane? ²⁷ Poli Natuna ateva Taumattu ngateva aue emae tee mallangina ateva Tamane me kapuna ensolo atoa me aue etaula aipoliira kateva kateva taumattu tale voto laghe gheleila. ²⁸ Aghaaulia ngakoronna etaimim va katoa oia am tiitingina, karika aue am mate me aue am tara Natuna ateva Taumattu ngateva emae tee ararimangalina ateva.”

17

Vilikina Iesu ghe mene isaa ppaela

(Mak 9:2-13; Luk 9:28-36)

16:14: Mat 14:1-2; Mak 6:14-15; Luk 9:7-8. **16:16:** Jon 6:69. **16:17:** Gal 1:15-16. **16:18:** Jon 1:42; Ips 2:20. * **16:18:** Tale inangari nge Grik, Pita la ue va *Petros*, malloeanina ta “atu”. **16:19:** Mat 18:18; Jon 20:23. **16:24:** Mat 10:38; Luk 14:27. **16:25:** Mat 10:39; Luk 17:33; Jon 12:25. **16:26:** Mat 4:8-9. **16:27:** Mat 25:31; Sams 62:12; Nitoka 24:12; Rom 2:6; Aotu 22:12.

¹ Ghaonomo (6) nau ghe lange sio me Iesu ghe kolola Pita, Jeimis me Jon nengana Jeimis, me ila nonga laghe saela tale motouru eteva saesaenaaili ia. ² Tale ia o voto ateva taataraane Iesu ghe aikolikoliaala emua ta mataira. Matana ghe lallaa arova sinaka ateva, me ghinnanina ghe usola arova mallanga ateva. ³ Vara me Moses me Elaija lalu ghe kaurekatila me lalu ghe tiuaala tani sama tee Iesu.

⁴ Me Pita ghe uela ta Iesu va, “Vau eteva, masinaaili ta ita sae mae oia. Arova uanna, aue aghelei kotolu ale paapali, kateva alem ia, me kateva alena ia Moses, me kateva Elaija.”

⁵ Pita ghe aippoosaa nonga me kookoo ngateva mallanginaaili ia ghe akoulala me lingi ngalo ateva elome tale kookoo ngateva ghe uela va, “Ia o natughu eteva aghaailousieinia, me masimasiaaghi ta ngetana namungaili. Am nongoa.”

⁶ Nau eteva disaepolo atoa laghe nongola, laghe aso siola tapaa kosa, mataira ghe tau siola eeu. Me laghe matautu etinginala. ⁷ Iesu ghe lao sio me ghe posolala me ghe uela etaira va, “Am totula. Am rau mene matautu.” ⁸ Nau eteva laghe atangaro saela, karika laghe tarala rigghi taumattu ta laghe tarala nonga Iesu.

⁹ Nau laghe mae siosio tale motouru, me Iesu ghe ttoieinilala va la rau mene auliaa ta mene teva saa llo laghe tarala lomosina ta Natuna ateva Taumattu ngateva etotu tale nimate.

¹⁰ Me disaepolo atoa laghe kolomiela va, “Vaalua me tau ngai aapasunga tale inangari nipaopao la ue va Elaija aue etani muemue mae?”

¹¹ Iesu ghe liula me ghe uela va, “Elaija aue emae akasina tani ghelei emasina akapa voto. ¹² Me aghaauliaa etaimim va Elaija ghe mae sio me karika laghe tara kilaiela, me laghe ghelei teeiela isaa akapa voto laghe anna tani ghelei etana. Tale ie nonga o salana atikirighi Natuna ateva Taumattu ngateva aue eghaa nimmarikana ta nimaira.” ¹³ Me nannaaira disaepolo atoa ghe vira mene masalikela tani kila va ghe auliaa Jon tau ngai aasuu ia etaira.

Taita arighi raroai eteva ghe tokatoka etana ghe masinala
(Mak 9:14-29; Luk 9:37-43)

¹⁴ Nau laghe rekatala nongina taumattu ngatoa, taita ateva ghe lao sio tani tara Iesu me ghe suuiaala emua ta Iesu. ¹⁵ Me ghe uela va, “Vau eteva, ualouslyusi tee natughu taita arighi, poli eoo me egheeleia esessaaili me oroaata ta ekaakatuu velu sae tale kuraa me tale manu tee. ¹⁶ Amaeainie sio ta kapum disaepolo atoa me karika la roola tani ghelei emasinaia.”

¹⁷ Me Iesu ghe liula me ghe uela va, “Am lo ateva oia vituu, karika rigghi uneimim niaiesoaa, nannaaimim me gheeleiaaimim karika ghulughuluena. Ghaisaata aue atoka aitauaa teeiem? Me aue ghaisaata aue atoiem va am aiesoaa? Am ghaa mae sio aliki eteva etaghi.” ¹⁸ Iesu ghe paola raroai eteva, me ghe kasu vulila aliki eteva me ia arau o nau eteva, aliki eteva ghe masinala.

¹⁹ Me disaepolo atoa laghe lao sio tani tara Iesu nau ie nonga me laghe kolomiela va, “Vaalua me ami karika ami roola tani tiu velu raroai eteva?”

²⁰⁻²¹ Iesu ghe liula me ghe uela va, “Poli uneim niaikaaiiaa ghaunaaili. Aghaaulia ngakoronna etaimim va, arova uneimim niaikaaiiaa naanangaane nongina katu ue ngai erighi ghaunaaili ia (mastet), am rooro

17:2: 2 Pita 1:16-18. **17:5:** Sams 2:7; Ais 42:1; Mat 3:17; Mak 1:11; Luk 3:22; Diut 18:15. **17:10:** Mal 4:5. **17:12:** Mat 11:14. **17:13:** Luk 1:17. **17:19:** Mat 10:1. **17:20-21:** Mat 21:21; Mak 11:23; Luk 17:6; 1 Ko 13:2.

tani ue ta motouru eteva o va, ‘Kasula ona me umene lao teke,’ aue ghele kasu. Aue am rooroo tani ghelei voto akapa.’*

*Aiaaghaluene Iesu ghe uela va
aue emene totu
(Mak 9:30-32; Luk 9:43-45)*

²² Nau eteva laghe mae aitaaua sio eGalilii me Iesu ghe uela etaira va, “Natuna ateva Taumattu ngateva aue la tauela ta nimaira taumattu ngatoa.
²³ Aue la uvi ematea me vara aiaakotonna ateva nau me aue emene totu.”
Nau disaepolo atoa laghe nongola laghe alousiusila.

Iesu ghe taula takis moni pei tale ale manga ateva

²⁴ Vara me Iesu me kapuna disaepolo atoa laghe laa rekata sio eKapenium, me lo atoa taumattu laghe ghaaghaa takis moni pei tale ale manga ateva laghe uela ta Pita va, “Kapuumim tisa ngateva eveluvelu takis tale ale manga ateva?”

²⁵ Me Pita ghe uela va, “Ue, eveluvelu.”

Me Pita ghe kupi ssola tale ale ateva, me Iesu ghe sama akasinala tani ue ta Pita va, “Saemon, uannaa va kingi etoa tale kosa ateva oia la ghaaghaa takis tale ase voto atoa ta see atoa, ta kapuira atoa o ta mene katoa ppae?”

²⁶ Me Pita ghe uela va, “La ghaaghaa takis ta mene katoa ppae.”

Me Iesu ghe uela etana va, “Mausina avalua o me kapuira atoa la tam tautaula takis. ²⁷ Ta rau gheleila va esessaila etaita, siola tale ateo talia ngateae me uvelu ghoa unem airrekati eteae. Me nau urrekati aitiutiu eteva kko, uoti paane ateva, me aue ughaa viliki veu etivilau. Ughaia me ulaa tauela etaira aipoli kaluitalua takis.”

18

*See aue enamuu?
(Mak 9:33-37; Luk 9:46-48)*

¹ Isaa o nau disaepolo atoa laghe lao sio ta Iesu me laghe kolomiela va, “See atoa namuu ila tale ararimangali ngepona liu eteva?”

² Iesu ghe kolola aliki erighi me ghe atinginaiela elome etaira. ³ Me ghe uela va, “Aghaaulia ngakoronna etaimim va am aikolikoliaa me am nongina lutu ngaliki etoa, arova karika, karika aue am kupi sso tale ararimangali ngepona liu eteva. ⁴ Liuna avalua o me lo ateva esioaa nannaane nongina aliki eteva o, namuu ia tale ararimangali ngepona liu eteva.

⁵ “Me see emasimasi tani ghaa lutu ngaliki etoa poli ararighi eteae eghaaghaa teeieghi. ⁶ Arova aliki erighi eaaiesoaa etaghi, me teva taumattu eghelei unna niaikaaiaa ekatuu, ghele masinaaili ta arova la ghele iri teva paka ngatu ta ngalona, me la ghele ghoa allusia elo malionge.

⁷ “Aue esesaaili ta taumattu tale kosa ateva mausi voto la ghelei me katoa tani taumattu uneira niaikaaiaa ekaakatuu. Isaa o voto aue elutu me aue esesaaili ta lo ateva taumattu eghelei voto o elutulutu. ⁸ Arova nimam o kekem egheleio me ukaakatuu tani ghelei voto sesa, usai kotoo me usau velu. Aue masina arova ughaa maulue me katelange kekem me nimam karika ia, me karika masina arova nimam me kekem masina me aue la sau veluo sae tale kura atea tokatoka liu ia. ⁹ Me arova teva matam egheleio me ukaakatuu tani ghelei voto sesa, uvaliki velua me usau velu, masina

* **17:20-21:** Kasina uru ngai laghe pitila, laghe piti teela, **21** Isaa o ase voto karika erooroo tani lutu arova karika ita tam nae me ita tam pure. **17:22:** Mat 16:21. **17:24:** Eks 30:13; 38:26. **18:1:** Luk 22:24. **18:3:** Mat 19:14; Mak 10:15; Luk 18:17. **18:5:** Mat 10:40; Luk 10:16; Jon 13:20. **18:8:** Mat 5:29-30.

tani ghaa maalua ta kateva nonga matam, me karika masina arova matam akapa alua me la sau veluo sae tale kuraa atea eGehenna.

*Kiukiu niaimatoonga atea tale
sipsipi eteva ghe rauela*

(Luk 15:3-7)

10-11 “Karika am mene tara aliki etoa va peisaane ila. Aghaauliaa etaimim va kapuira ensolo atoa la laa reerekataa ta matane Tamaghi epona liu.*

12 “Vaalua am annaa? Arova teva taumattu kiena sipsipi eroroo kateva ai (100) me kateva ghele tiu ppae, am annaa va karika aue ghele kasu vuli ghasiongaulu ghasio (99) tale voto saesaena me ghele kasu tani laa pae lo ateva ghe tiu ppaela? 13 Arova ghele taraia, aghaaulia ngakoronna etaimim va masimasiaane tale ia o sipsipi eteva namungaili me tale lo ghasiongaulu ghasio (99) karika laghe tiu ppaela. 14 Tale ia nonga o salana atikirighi Tamaim ateva† epona liu karika eanna va teva ta lutu ngaliki etoa eraua.

*Vaalua tani sausi tuem o nengam ateva eghelei voto sesa ta ngetam
(Luk 17:3)*

15 “Arova teva tuem o nengam eghelei teeio righi voto sesa, ulaa taraia me uauliaa voto sesa egheleila etam elome etaimalua nonga. Arova enongo usilainio, angu sausiela tani ghaa oghia. 16 Arova etam nongo usilainio, ughaa kateva o ghalua tani mene laa taraia me la rooroo tani auliaa va voto o koronna. 17 Arova etam nongo usilainila, am auliaa tale ale manga, me arova etam nongo usilaa tee ale manga, am tau velua, me enim toka nongina tau ngeleka ateva o tau ngai ghaa takis.

18 “Aghaaulia ngakoronna etaimim va voto llo am ghelei runga tale kosa ateva, aue la ghelei runga tee epona liu, me llo am tautau velu tale kosa ateva aue la tau velu tee epona liu.

19 “Amene auliaa etaimim va arova lo alua taumattu tale kosa ateva lalu mae aitaaua tale kateva nonga ninannaa me lalu kolomieghi tale righi voto aue Tamaghi epona liu aue ghele taula. 20 Poli arova ghalua o kotolu la maemae aitaaua tale ararighi etea, aghi atokatoka aitaaua teeila.”

Kiukiu niaimatoonga atea tale sesa tau ngai uungu eteva

21 Me Pita ghe mae sio ta Iesu me ghe kolomiela va, “Vau eteva, aue ghaisaata akkaluaa voto sesa ateva tueghi o nengaghi ghele ghelei etaghi, aue esae ta ghaituaata (7)?”

22 Iesu ghe liula me ghe uela va, “Aghaauliaa etam va karika va ghaituaata nonga, ta ghaitungauluaata me mene ghaitu (77).‡

23 “Liuna avalua o me ararimangali ngepona liu eteva nonginaaili kateva king ghe aloanna tani ghelei eghulughuluena uneira dinao kapuna tau ngai nongonongo anna atoa. 24 Nau ghe tiuaala, laghe maeaa sio ia o taumattu ngateva unna kinatama dinao ateva.§ 25 Poli karika ghe rooroo tani liu, vauna ateva ghe uela va la laa taua me la polia, ia me vausenna ateva me natuna atoa me peina akapa atoa, tani liu unna dinao ateva.

18:10-11: Hib 1:14; Luk 19:10. * **18:10-11:** Kasina uru ngai laghe pitila, laghe pitila 11 Poli Natuna ateva Taumattu ngateva ghe sio mae tani asaangi taumattu ghe rauela. Utara Luk 19:10.

† **18:14:** Kasina uru ngai laghe pitila, laghe pitila Tamaghi eteva. **18:15:** Luk 17:3; Gal 6:1.

18:16: Diut 19:15; Jon 8:17. **18:18:** Mat 16:19; Jon 20:23. **18:19:** Mak 11:24; Jon 15:7.

18:22: Luk 17:4. ‡ **18:22:** ghaitungauluaata me mene ghaitu (77) o ghaitungauluaata ghaitu (70 × 7). § **18:24:** Tale inangari nge Grik, kasangaulu airari (10,000) talent. Kateva talent eroroo 6,000 silva koen (denarius), me kateva silva koen aipolina kateva nau.

26 “Ia o tau ngai nongonongo anna ateva ghe suuiaala patu kkena emua etana me ghe annala va vauna ateva ealousiusi teeia me aue eliu ekapa voto. 27 Vauna ateva ghe alousiusi teeieia me ghe uela va vulla tani liu unna dinao, me ghe tau veluela me ghe kasula.

28 “Nau ghe kasula, ghe lao sio me ghe tarala kateva kapuna lalu ghe uungu eitauea ghe dinaola etana ta kateva ai (100) silva koen. Ghe poso atokaiela me ang ghe aloanna tani kii pule alona atiulu. Me ghe ue etana va, ‘Utani liu kalum dinao ateva.’

29 “Kapuna ateva lalu ghe uungu eitauea ghe suuiaala patu kkena emua etana me ghe anna va ghe alousiusi teeia me aue ghe liu unna dinao ateva.

30 “Me kapuna ateva ghe ratila, ghe tani atoka ssola taumattu ngateva tale ale mata voovoo lomosina ta ghe tani liula kanna dinao ateva. 31 Nau mene katoa tani tau ngai nongonongo anna laghe tara isaa o voto ghe lutula, nannaaira karika ghe masinala. Liuna avalua o me laghe aulia ngakapala voto ghe lutula ta vauira ateva.

32 “Me vauna ateva ghe mene koloala ia o tau ngai nongonongo anna ateva me ghe uela etana va, ‘Io sesa taumattu io. Aghe ghaa velu ekapala kalum dinao poli ughe ue va aghalousiusi teeio. 33 Vaalua me karika ughe mene alousiusi teela mene lo ateva kapum amalu ghe uungu eitauea nongina aghe gheleila etam?’ 34 Vauna ateva ghe sessaiela me ghe auliaala me lo atoa la ghaaitoiaa ale mata voovoo ateva va laghe ghelei teeia voto mmarikana lomosina ta etani liu ekapa kanna dinao.

35 “Tamaghi epona liu eghelei evalua o etaimim, arova am tam kkaluaa kateva tueimim me nengaimim tale urunguitaniimim.”

19

Tani airatii (Mak 10:1-12)

1 Nau eteva Iesu ghe ruula tani auliaa isaa o voto, ghe kasu vulila eGalilii me ghe lao sio tale distriki eteva eJudia ta pai kativilau eJodan. 2 Oroianaaaili taumattu ghe usiusia me ghe ghelei emasinailala tale ia o voto ateva.

3 Katoa Paresi laghe mae sio etana tani tootoongainia tale kateva nikokkolomi. Laghe uela etana va, “Uneita inangari nipaopao eue va masina arova taita ateva erooro tani rati vausenna ateva tale aloaloannaane?”

4 Ghe liula me ghe uela va, “Karika am ghe ritila va tale aitiutiu tale voto akapaaili lo ateva ghe gheleila voto ‘ghe gheleila taita me vause’? 5 Me God ghe uela va, ‘Liuna avalua o me taita ateva ekasukasu vuli tamane me kinna me ekaakateva nonga ilalua me vausenna ateva, me ilalua aue lalu kateva nonga tale vilikiiraru.’ 6 Karika va emene ghaaghalua ilalua, ta ekaakateva nonga ilalua. Liuna avalua o me llo God eatoka aitauea, karika teva taumattu emene pola.”

7 Me laghe kolomiela va, “Me vaalua me Moses ghe pitila va taita ateva erooro tani taula uru ngai niairatii ta vausenna ateva, me esungi velua?”

8 Iesu ghe liula me ghe uela va, “Moses ghe uela va am rooro tani rati vauseniimim poli urunguitaniimim korokoronganaaili, me aitiutiu tale voto akapaaili karika isaa avalua o. 9 Aghaauliaa kieimim va lo ateva erati

vausenna ateva nau karika tale uunguaa niailai salosalooa see, me emene ghaa mene teva vause, ange lai sarila.”

¹⁰ Disaepolo atoa laghe uela etana va, “Arova ia avalua o, aue emasina arova taita ateva erau mene lai.”

¹¹ Iesu ghe liula me ghe uela va, “Karika va taumattu ngakapa aue eghaa isaa oia inangari, ta llo nonga atoa God ghe akorokoronganailala tani ghaa isaa oia inangari. ¹² Poli katoa, nau laghe lutula laghe lutu saasakiaala me karika la rooroo tani lai. Me katoa taumattu laghe kaatilala, me katoa la tamanna tani lai poli la ghanna tani ghelei uunguaane ararimangali ngepona liu eteva. Lo ateva eroroo tani ghaa isaa oia inangari aue eghaa.”

*Natu aliki etoa me Iesu
(Mak 10:13-16; Luk 18:15-17)*

¹³ Me laghe maeaa sio lutu ngaliki etoa ta Iesu va esaoaa nimane etaira me epure etaira. Disaepolo atoa laghe kisokiso lo atoa laghe maeainila sio.

¹⁴ Me Iesu ghe uela va, “Am tau velu lutu ngaliki etoa, me la mae etaghi. Am rau mene ghelei rungainila poli ararimangali ngepona liu eteva kaluira ia lo atoa nongina ila o lutu ngaliki etoa.” ¹⁵ Ghe saoaala nimane etaira me ghe kasu vulila lo ateae o masaliki.

*Aliki taita ateva tue peipeiena ia
(Mak 10:17-31; Luk 18:18-30)*

¹⁶ Vara me kateva taita ghe mae sio ta Iesu me ghe kolomila Iesu va, “Tisa, saa arighi masi voto aue aghelei me aghaa maulue ateva tokatoka liu ia?”

¹⁷ Iesu ghe liula me ghe uela va, “Vaalua me ukokkolomi voto masina etaghi? Nim kateva nonga masina ia. Arova uanna tani ghaa maulue, unongo usilaa inangari nipaopao.”

¹⁸ Me taita ateva ghe kolomila Iesu va, “Sa ateva inangari nipaopao?” Iesu ghe liula me ghe uela va, “Urau mene aiuvi emate, urau mene lai sari, urau mene ainao, urau mene kamekame tale niaisakei, ¹⁹ uoneoneea tamam me kinam, me uaielousiaa taumattu ngateva kalakalangina ia etam nongina uaaielousieinio.”

²⁰ Me aliki taita ateva ghe uela va, “Isaa akapa voto ona ngaghe gheleila. Mene sa ateva voto karika aghe ghelei?”

²¹ Iesu ghe liula etana me ghe uela va, “Arova uanna tani ghulughulue-naaili, ulao me ulaa tau peim me la poli me ughaa viliki veu me utau lao ta lo atoa karika righi peiira, me aue utau peipeiena epona liu. Me umae usieghi.”

²² Nau eteva aliki taita ateva ghe nongo avaluela o, ghe alousiusila me ghe kasula, poli oroiannaaili peina.

²³ Me Iesu ghe uela ta kapuna disaepolo atoa va, “Aghaaulia ngakoronna etaimim va aanasaaili ta tue peipeiena atoa tani kupi sso tale ararimangali ngepona liu eteva. ²⁴ Me aghaauliaa etaimim va marova masukasukale ta teva kamolo tani kupi sso tale teae mata raum, aue emasukasukaleaili tee ta teva tue peipeiena tani kupi sso tale ararimangalina ateva God.”

²⁵ Disaepolo atoa laghe soghiaa saasakiaa teela isaa o inangari me laghe kolomila va, “Me see nonga eroroo tani saanga?”

²⁶ Iesu ghe taatara lao sio etaira me ghe uela va, “Ta taumattu ngatoa, karika la rooroo tani ghelei isaa o voto, me ta God, eroroo tani ghelei isaa akapa voto.”

²⁷ Pita ghe liula me ghe uela va, “Ami ghe kasu vuli ekapala voto tani mae usio! Saa nonga ateva aue ami ghaaia?”

²⁸ Iesu ghe uela etaira va, “Aghaaulia ngakoronna etaimim va, nau voto emene aikolikoliaa nau Natuna ateva Taumattu ngateva etoka tale masi aitokatokane ateva king, lo atoa am aaimuli teeieghi aue am toka tale kasangaulu ghalua (12) aitokatoka uneira namu ngatoa. Me aue am ghelei niaisakei tale kasangaulu ghalua ararimangali nge Israel. ²⁹ Me lo atoa laghe kasu vulila tanganueira, o tueira me nengaira atoa o tamaira me kinaira me natuira atoa o umaira paa ngutana ta poli ararighi eteae, aue la ghaa ailiuliu tale isaa o voto elau kateva ai (100), me aue la ghaa tee mauue ateva tokatoka liu ia. ³⁰ Me oroi ila taumattu ngatoa matuutuliena ila aue la sioaili euu, me see ila lo atoa arariira euu aue la matuutuliena.”

20

Kiukiu niaimatoonga atea tale tau ngai uungu

¹ Iesu ghe mene kiukiu tee lao sio va, “Aghaaulia ngavalua o poli ararimangali ngepona liu eteva nongina kateva tau kosa. Elue talau poopooa, ghe lao sio tani kolo tau ngai uungu etoa va la uungu tale umana utani uaeni. ² Ila oia tau ngai uungu etoa laghe masimasila tani ghaa kateva kateva silva koen* tale lo ateva o nau, me namu ngateva ghe sungilala tani laa uungu tale umana utani uaeni etingiu.

³ “Elue talau ta 9 kilok, namu ngateva ghe lao sio, me ghe tarala taumattu ngatoa laghe aaitokaa see nongina laghe veluvelu eitauaa. ⁴ Me eghe uela etaira va, ‘Am tee am rooroo tani laa uungu tale utani uaeni etingiu, me aue apoliem tale sa ateva ghulughuluena ia.’ ⁵ Me laghe kasula.

“Elo sinaka ta 12 kilok, me mene elo alai ta 3 kilok, namu ngateva ghe mene lao sio tani mene gheleila llo eghe ghelei. ⁶ Elo alai ta 5 kilok, ghe lao sio me ghe tarala kasina taumattu ghe aaitokaa see, me ghe kolomilala va, ‘Vaalu me ia oia nau eteva am nim tokala etana?’

⁷ “Me laghe uela va, ‘Karika teva taumattu etau mae sio righi niuungu etaimami.’

“Ghe uela etaira va, ‘Am tee am laa uungu tale utani uaeni etingiu.’†

⁸ “Elo alai ta 6 kilok me tau kosa ateva ghe auliaala ta kapuna tau ngai toitoi eteva va, ‘Kolola tau ngai uungu etoa me utau lao aipoliira. Utau lao aipoliira kateva kateva, utiuua ta lo atoa laghe airuuruula tani mae uungu, me elaa ruu ta lo atoa laghe aitiutiula tani mae uungu.’

⁹ “Lo atoa taumattu laghe tiuaala ta 5 kilok elo alai laghe mae sio me laghe ghaala kateva kateva silva koen. ¹⁰ Me nau eteva lo atoa laghe tiuaa ngakasinale laghe mae sio, laghe nnaala va laghe ghaa oroi viliki veu, me karika, ila tee laghe ghaala kateva kateva silva koen. ¹¹ Laghe tarala viliki veu laghe ghaala me ghe sessailala ta tau kosa ateva, me laghe tiuaala tani auliulieinia, laghe ue va, ¹² ‘Ta lo atoa la airuuruula tani uungu, la uungula nonga kateva aoa, me upolilala nongina upoliemamila. Ami gheleila kinatama niuungu eteva, ta ami tiuaala arau elue talau poopooa me sinaka ateva ange sinaki emateamamila.’

¹³ “Tau kosa ateva ghe nongola inangariira me eghe liu evaluela toko ta kateva kapuna tau ngai uungu va, ‘Kapughu, karika agheleila teva voto sesa etam. Karika ughe asokoi teeieghila va aue ughaa kateva silva koen?’

19:28: Mat 25:31; Luk 22:30; Aotu 3:21. **19:30:** Mat 20:16; Luk 13:30. * **20:2:** silva koen Silva koen (denarius) aipolina kateva nau. † **20:7:** Kasina uru ngai laghe pitila, laghe mene uela va, me aue apoli emasinaiem. **20:8:** Lev 19:13; Diut 24:15.

¹⁴ Ghaala aipolim me ukasu. Aghi aghe auliaala va la poli evaluateiem o lo atoa laghe airuuruula tani uungu, tale aloannaaghi. ¹⁵ Koti karika erooro va aghaimuli tee aloannaaghi tani aikoita uneghi viliki veu, va? Arova aghanna tani ghelei masi niuungu tale taumattu ateva oia, vaalua me esessaio?”

¹⁶ Iesu ghe uela ta kapuna disaepolo atoa va, “Isaa avalua o me oroi ila taumattu ngatoa matuutuliena ila aue la sioaili euu, me see ila lo atoa arariira euu aue la matuutuliena.”

*Aiaakotonna Iesu ghe uela va aue emate me emene totu
(Mak 10:32-34; Luk 18:31-34)*

¹⁷ Iesu ghe kasula me ghe laa saesae eJerusalem. Me nau eteva laghe laa saesae, Iesu ghe kolo apalluula nonga kapuna kasangaulu ghalua (12) disaepolo, me ghe auliaala etaira va, ¹⁸ “Am nongo, ita laa saesae eJerusalem, me aue la tau lao Natuna ateva Taumattu ngateva ta nimaira namu ngatoa tale pristi etoa me tau ngai aapasunga tale inangari nipaopao atoa, me aue la ghelei niaisakei etana, me la tingina aitauaa tani uvi ematea. ¹⁹ Aue la taue lao ta taumattu ngeleka atoa, me aue la kusiaa teeia, la uetaia, me la avukalaia tale aikotoo. Emuli tale kotolu nau, aue etotu.”

*Jeimis me Jon lalu ghe anna tani namuu
(Mak 10:35-45)*

²⁰ Emulina, kinairarua ateva natuna alua Sebedi me natuna alua lotolu ghe mae sio ta Iesu. Me kinairarua ghe suuiaala me ghe uela va ealoanna kateva voto ta Iesu.

²¹ Me Iesu ghe uela va, “Sa ateva uaaloannaia?”

Me vause ateva oia ghe uela va, “Aghaloanna va uue va ilalua oia natughu elua, lalu toka kalakalangina tale ararimangalim eteva, kateva tale pai muenna ativilau, me kateva tale pai uaise ativilau.”

²² Iesu ghe nongola isaa oia inangari me ghe liula tani ue va, “Karika amalu kilakila amasina llo amalu kookolomi. Amalu rooro tani ropi tale ia o kapa ateva nimmarikana etana aue aropi etana?”

Me lalu ghe uela va, “Ue, angalu rooro.”

²³ Iesu ghe uela etairarua va, “Koronna, aue amalu ropi tale uneghi kapa ateva, me tani toka tale pai muenna o uaise ativilau, aghi karika uunguaaghi tani tau aatu. Isaa o voto uneira isaa o taumattu Tamaghi ang ghe aimonomosiaa tau lao sio.”

²⁴ Nau eteva kasangaulu (10) disaepolo laghe nongola isaa o inangari tue me nenga alua lalu ghe kolomila Iesu, eghe sessailala. ²⁵ Iesu ghe kolo aitaueinilala me ghe uela etaira va, “Am kilakila, isaa o tau ngai toitoi tale tau ngeleka atoa, la ghelei taumattu enim uungu aanasa etaira. Me lo atoa matuutuliena ila, la ghelei saasakiaa ta taumattu ngatoa. ²⁶ Isaa o ase gheeleiaaira erau mene toka elome etaimim, karika. Lo ateva taumattu eaaloanna tani namuu elome etaimim, esio euu me eghelei nongina tau ngai nongonongo anna atoa. ²⁷ Me lo ateva taumattu ealoanna tani muemueinam, etani kapuimim tau ngai uungu. ²⁸ Nongina Natuna ateva Taumattu ngateva ghe tam sio mae va la uungu etana, karika, ta ghe sio mae tani uungu etaira me tani taula maamauluaane tani ghaa oghi oroi taita me vause.”

20:16: Mat 19:30; Mak 10:31.

20:18: Mat 16:21; 17:22-23.

20:21: Mat 19:28; Luk 22:30.

20:22: Mat 26:39; Jon 18:11.

20:25: Luk 22:25-26.

20:26: Mat 23:11; Mak 9:35.

20:28:

Luk 22:27; Plp 2:7.

*Iesu ghe ghelei emasinala
mata salusalu elua*

(Mak 10:46-52; Luk 18:35-43)

²⁹ Iesu me kapuna disaepolo atoa laghe kasu vulila masaliki taatara atea eJeriko, me oroieili taumattu ghe mene usiela. ³⁰ Me ghalua taumattu lalu ghe tokatoka tale sama salana atikirighi, mata salusalu ilalua. Me nau eteva lalu ghe nongola va Iesu ekasukasu emaemae, me namuu ta lalu ghe kolokoloa va, “Vau eteva, io Natuna io Deivit, ualousiusi teeiengalua!”

³¹ Nau eteva taumattu ngatoa laghe nongolaluela lalu ghe kolokolo, taumattu ngatoa laghe paopao rungainilalua va, “Amalu rau mene sama.” Me ilalu ghe kolokolo anamuu va, “Vau eteva, Natuna ateva Deivit, ualousiusi teeiengalua!”

³² Iesu ghe tinginala, ghe kololaluela me ghe uela va, “Saa llo amalu aloanna va aghelei etaimalua?”

³³ Lalu ghe uela etana va, “Vau eteva, angalu aloanna va uoti matangalua.”

³⁴ Iesu ghe alousiusi teeilaluela, ghe posola matairarua, me arovaeaata matairarua ghe taatarala, me lalu ghe usiela.

21

*Iesu ghe kupi ssola eJerusalem
arova kingi eteva*

(Mak 11:1-11; Luk 19:28-38; Jon 12:12-19)

¹ Nau eteva ngila ghe aakalakalaa eJerusalem me ngila ghe rekatala tale masaliki eteva eBetpeis tale motouru eteva eOliv, me Iesu ghe suula ghalua tani kapuna disaepolo. ² Ghe uela etairarua va, “Amalu muemuela me amalu lao tale masaliki etea ngeita taraie lao sio me arovaea ta aue amalu tara donki eteva me natuna ateva la iiri etinginailaluela. Amalu pulakailalua, me amalu maeainalua etaghi. ³ Arova teva ekolomiemalua, amalu ue etana va, ‘Vau eteva eanna tani ghelei uunguaane etairarua me aue arovaeaa nonga ta etau velulalua.’ ”

⁴ Isaa o voto ghe lutula tani ghelei inangarina propete ateva ghe kau-rekatila, ⁵ ghe uela va:

“Auliaala ta masaliki taatara atea eSaeon,

‘Am tara kapuimim kingi eteva emaemae etaimim,
esiosioaili eeu me eilou tale donki,
lo ateva donki aliki taita ia.’ ”

⁶ Disaepolo alua lalu ghe kasula tani ghelei voto Iesu ghe auliaala etairarua. ⁷ Lalu ghe maeaa sio donki eteva kinna ia me natuna ateva, me lalu ghe alokoi saela uneirarua aiaasae ngeleka etairarua, me Iesu ghe laa sae toka etairarua. ⁸ Oroianaaaili taumattu laghe lullu velu uneira aiaasae ngeleka me laghe pulepule alokoi tapaa salana, me katoa laghe saisai laa ngai me laghe aalokoi sio tapaa salana. ⁹ Lo atoa taumattu laghe muemueainia me lo atoa laghe aimuli etana laghe ovaova tani ue va,

“Tau sae ararina atea Natuna ateva Deivit!”

“Niarangise aue etoka ta lo ateva emaemae tale ararina atea Vau eteva!”

“Tau sae ararina atea God iaaili epona!”

¹⁰ Nau eteva Iesu ghe kupi ssola eJerusalem, taumattu ngakapa eJerusalem ghe soghieiniela, me laghe aikolomieinila va, “See okae?”

¹¹ Me lo atoa laghe kasukasu teeia laghe ue va, “Iesu oke, propete ia me aNasareti ia eGalili.”

*Iesu tale ale manga**(Mak 11:15-19; Luk 19:45-48; Jon 2:13-22)*

¹² Iesu ghe kupi ssola nongina ale ngeleka atiulu tale ale manga ateva me ghe sungi vella lo atoa laghe aaitauaa me laghe poppoli. Ghe sau etakila uneira tevoo atoa lo atoa laghe aikolikoliaa viliki veu me uneira aitokatoka lo atoa laghe aaitauaa ghila valusu va la poli. ¹³ Ghe uela etaira va, “Laghe pitila tale Uru ngai Manga ateva va, ‘Aleghi ale manga ateva la ghaseasea va ale ailooloo sae ia.’ Me am ngam eleiela arova ‘aleira ale niaisulia ia tau niainao atoa.’”

¹⁴ Mata salusalu etoa me tangorengorena atoa laghe mae sio tani taraia tale ale ngeleka atiulu tale ale manga ateva, me ghe ghelei emasinalala.

¹⁵ Namuu ta pristi etoa me tau ngai aapasunga atoa tale inangari nipaopao laghe tarala masi voto ghe ghelei me vaalua aliki etoa laghe aore tale ale ngeleka atiulu tale ale manga ateva tani ue va, “Tau sae ararina atea Natuna ateva Deivit,” me ghe sessai etinginailala.

¹⁶ Me laghe kolomila Iesu va, “Unongonongo llo aliki etoa la ghaulaa?”

Iesu ghe liula me ghe uela va, “Ue. Me koti karika am ghe ritila inangari laghe piti elokoila laghe uela va,

“Ughe aimonomosiaala lutu ngaliki etoa
va aue la tau sae ararim atea.’”

¹⁷ Ghe kasu vulilala me ghe kupi ghoala tale masaliki taatara atea me ia o voo ngateva ghe tokala tale masaliki eteva eBetani.

*Iesu ghe kasikienaala ai eteae (fig)**(Mak 11:12-14, 20-24)*

¹⁸ Elue talua poopooa ghe mene laa sosso tale masaliki taatara atea me ang ghe maamaloo. ¹⁹ Me ghe tarala fig atea ghe tiitingina tale sama salana atikirighi me ghe lao akalakangina sio etana me karika righi uenena, nim uruena ia, me ghe uela ta fig atea va, “Karika aue umene kunea righi uem.” Me arovaee ta fig atea ghe mmatela.

²⁰ Nau eteva disaepolo atoa laghe tarala isaa o voto laghe soghiaala me laghe kokkolomi va, “Vaalua me arovaee nonga ta emmatela?”

²¹ Iesu ghe liula me ghe uela etaira va, “Aghaulia ngakoronna etaimim va arova am aikaaiaa me karika nannaaimim eghaaghalua, karika aue am ghele ghelei nonga voto nongina llo elutula tale fig atea, ta am rooroo tani ue ta ia o motouru eteva va ekasu me eghoa katu elamana me aue ghele ghelei. ²² Arova am aiesoaa, aue am ghaa saa ase voto aue am kokkolomi tale nilooloo sae.”

*Nikokkolomi tale matuutulienaane Iesu**(Mak 11:27-33; Luk 20:1-8)*

²³ Iesu ghe kupi ssola tale ale ngeleka atiulu tale ale manga ateva, me nau ghe tiuaala tani apasunga, namu ngatoa ta pristi etoa me lo atoa laghe naanamuu ta taumattu ngatoa laghe mae sio etana, me laghe kolomiela va, “See ghe tau aatu sio matuutuliena etam, me see ghe sungiola tani mae ghelei isaa oia voto?”

²⁴ Iesu ghe liula me ghe uela etaira va, “Akolomiem mua tale kateva nikokkolomi, me arova am liu ia o nikokkolomi eteva, aue aghauliaa va see ghe tau mae sio matuutuliena etaghi. ²⁵ Ia Jon ghe asuu taumattu, see ghe tau lao sio matuutuliena etana, taumattu ngatoa, o God?”

Me laghe tiuaala tani aissakea elome etaira. Laghe ue va, “Arova ita ue va, ‘God,’ aue eue teeita va, ‘Me vaalua me karika am ghe aaiesoaa etana?’²⁶ Me arova ita ue va, ‘Ta nim taumattu,’ ita maamatauta taumattu ngatoa poli ıla akapa la ue va Jon propete ia.”

²⁷ Liuna avalua o laghe liula me laghe uela ta Iesu va, “Karika ami kilakila.”

Me Iesu ghe uela etaira va, “Aghi tee, karika aue aghauliaa etaimim va see ghe tau mae sio matuutuliena etaghi.

Kiukiu niaimatoonga atea ta tue me nenga alua

²⁸ “Vaalua am annaa tale kiukiu eteae toko? Kateva taumattu natuna taita alua ghe lao sio ta mua ateva, me ghe uela va, ‘Natughu, laa uungu tale utani uaeni.’

²⁹ “Me mua ateva ghe uela etana va, ‘Karika aue alao,’ vara me ghe nnaa aioghioghiaala me ghe lao sio.

³⁰ “Me tamairarua ghe mene auliaala isaa o inangari ta mene aiaaghaluena ateva aliki. Ia o lo ateva aliki ghe liula me ghe uela va, ‘Ue, namu ngateva, aue alao,’ me karika ghe lao sio.

³¹ “See ta ngetairarua ghe gheleila llo tamairarua ghe aloanna?”

Laghe liula me laghe uela va, “Aitiutiu eteva.”

Me Iesu ghe uela etaira va, “Aghaulia ngakoronna etaimim va aighaa takis atoa, me vause ngetapaa salana atoa ngeila muemueinam sso tale ararimangalina ateva God. ³² Poli Jon ghe mae sio etaimim tani apasunga salana ghulughuluena, me karika am ghe aiesoaa llo ghe auliaala, nim aighaa takis nonga atoa me vause ngetapaa salana atoa laghe aiesoaa. Me am ghe taatara poi voto me karika am ghe nanna ngaioghioghiaa me am ghe aiesoaa etana.

Kiukiu niaimatoonga tale sesa tau ngeutana atoa laghe aaitaraa utani uaeni etingiu

(Mak 12:1-12; Luk 20:9-19)

³³ “Am mene nongo kateae kiukiu niaimatoonga. Kateva taumattu ghe pasala utani uaeni etingiu tale kosane ateva, me ghe iri taliaala valavala atea me ghe kaila aiposoaa uaeni eteva, me ghe atulula aitiketike ateva, me ghe taue lao sio ta katoa tau ngeutana tani aitarainia, me ghe kasu emasaula.

³⁴ Nau utana atingiu ghe massola, ghe suula kapuna tau ngai nongonongo anna atoa tani laa ghaa righi uenenna utani uaeni etingiu.

³⁵ “Lo atoa laghe aitaraa utana atingiu laghe kune atokailala: laghe paru emaatela kateva, me laghe uvi ematela kateva, me aiaakotonna ateva laghe osaiela. ³⁶ Me ghe mene suu tau lao sio mene katoa tani kapuna tau ngai nongonongo anna etaira, oroiaaira elaulau lo atoa laghe lao akasina sio. Tau ngai toi utana atingiu laghe ghelei teeilala voto nongina lo atoa laghe muemueainilala. ³⁷ Airuuruu ghe suula natuna ateva tani lao etaira, poli ghe ue va, ‘Aue la oneoneaa natughu eteva.’

³⁸ “Me nau tau ngai toi utana atingiu laghe tarala natuna ateva, laghe sama aitauaala elome etaira va, ‘Lo ateva aue eghaa utana atingiu okae. Ita laa uvi ematea me ita ghaa voto aue peina.’ ³⁹ Mausina avalua o me laghe ghaaiela me laghe sau velue ghoala eleka tale utani uaeni etingiu me laghe uvi emateala.

⁴⁰ “Liuna avalua o me lo ateva umana ia utani uaeni etingiu nau erekata, sa ateva aue egheleia ta lo atoa laghe aaitarainia?”

⁴¹ Laghe liula me laghe uela va, “Aue eghelei voto sesaaili tale ila o sesa taumattu ngatoa, me aue emene taula utani uaeni etingiu ta mene katoa ppae lo atoa aue la taula uaeni etana nau la pariki.”

⁴² Iesu ghe uela etaira va, “Koti am ghe ritila tale Uru ngai Manga ateva, eue va,

“ ‘Atu eteva tau ngai atulu ale atoa laghe ratiela
ghe aitiutiula tale atu ekapa atoa tani suei ale ateva.

Vau eteva ghe gheleila isaa o voto,

me taataraane masinaaili ta mataita.’

⁴³ “Liuna avalua o me aghaauliaa etaimim va ararimangali eteva epona liu aue God eghaa velua etaimim me emene tauela ta lo atoa taumattu aue la nongo usilainia. ⁴⁴ Lo ateva aue ekatuu saooa tale ia o atu eteva aue etakotokoto, me arova atu eteva ekatuu saooa etana aue etaputuputu.”

⁴⁵ Nau eteva namu ngatoa ta pristi etoa me Paresi etoa laghe nongola ta Iesu ghe auliaala ia o kiukiu niaimatoongana atea, laghe kilala va ghe auliaa teeila. ⁴⁶ Laghe paepae tikirighi salana tani kunea, me laghe maamatauta taumattu ngatoa poli ila laghe ue va Iesu propete ia.

22

Kiukiu niaimatoongana atea tale ninamanama atea tale nilai etea (Luk 14:15-24)

¹ Iesu ghe mene poppooaa etaira tale kiukiu niaimatoonga, ghe ue va, ² “Ararimangali ngepona liu eteva nonginaaili kingi eteva ghe aimonomosiaala ninamanama atea tale nilai etea ta natuna. ³ Ghe suula kapuna tau ngai nongonongo anna atoa tani laa ghauliaa ta kolokolona atoa tale ia o ninamanama atea va la mae, me karika laghe annala tani mae.

⁴ “Me ghe mene suula katoa tani kapuna tau ngai nongonongo anna. Ghe uela etaira va, ‘Am laa ue ta kolokolona atoa va: Ngaghaimonomosiaala inana. Kieghi vulumakao atoa taita ila, me morona atoa natu vulumakao ngila uvila me pasila me isaa akapa voto ange aimonomosiaala. La mae tale ninamanama atea tale nilai etea.’

⁵ “Me karika laghe anna tani nongo me laghe aitiuaala. Kateva ghe lao sio ta ngumane, me kateva ghe lao sio tani ghelei voto aue eghaa viliki veu etana. ⁶ Me mene katoa laghe poso atokala kapuna tau ngai nongonongo anna atoa king me laghe ghelei teeilala voto karika masina, me laghe uvi ematelala. ⁷ King ghe sessaiela, me ghe suula kapuna tau ngai uvii etoa laghe lao sio tani tturu tau ngai uvii emate atoa, me laghe suluila masaliki taataraira atea.

⁸ “Me ghe uela ta kapuna tau ngai nongonongo anna atoa va, ‘Ninamanama atea tale nilai etea ange aimonomosiaala, me lo atoa aghe uela va la mae karika masina ila tani mae. ⁹ Am lao sio tapaa salana me am kolo sa ateva taumattu am rooro tani tara.’ ¹⁰ Liuna avalua o me tau ngai nongonongo anna atoa laghe lao sio tapaa salana me laghe kolola saa taumattu laghe roola tani tara, sesa me masina, me ale ngai namanama atiulu ghe pasula tale taumattu.

¹¹ “Me vara kingi eteva ghe kupi ssola tani tara taumattu ghe mae sio me ghe tarala kateva taumattu, karika ghe aasae koloso nilai etea. ¹² Me ghe kolomiela va, ‘Kapughu, vaalua ukupi sso mae nau karika uaasae teva koloso nilai?’ Me taumattu ngateva karika ghe samala.

¹³ “Me king ghe auliaala ta tau ngai uungu etoa va, ‘Am irila kkena me nimane, me am sau velue ghoa eleka tale aavoona me eghoa toka ngangngala me aingeresia ngalungaluna.’

¹⁴ “Poli oroi la kolokolo me malaki llo la suisuitoonga.”

Tani tau lao takis ta Siisa
(Mak 12:13-17; Luk 20:20-26)

¹⁵ Vara me Paresi etoa laghe kasula tani laa ghaimonomosiaa salana vaalua tani ghaa Iesu tale inangarina. ¹⁶ Laghe suula kapuira disaepolo atoa, me kapuna tee atoa Herot tani lao etana. Laghe uela etana va, “Tisa, io nau ekapa atoa uaauliaa nonga voto koronna me voto uaapasunga tale salane God, koronna ia, karika unannangaili saa llo taumattu ngatoa la annaa, me karika utaatara taumattu tale naanamungaane me uunguaane. ¹⁷ Auliaala etaimami io vaalua nannaam. Vaalua? Masina tani tau lao takis ta Siisa?”

¹⁸ Iesu ghe kilakila voto laghe ailoeaala karika masina, me ghe uela etaira va, “Am usimaghalua am, vaalua me am aloanna tani tootoongainaghi? ¹⁹ Am apasungaala viliki veu etivilau etaghi am tautau ta Siisa.” Me laghe maeaa sio viliki veu etivilau ta ngetana. ²⁰ Me ghe kolomilala va, “See tootoona ateva me ararina atea o?”

²¹ Laghe liula me laghe uela va, “Siisa.”

Me ghe uela etaira va, “Am taula llo voto kanna Siisa ta Siisa, me voto kanna God ta God.”

²² Laghe soghiaala isaa o inangari laghe nongola, liuna avalua o me laghe kasu vuliela.

Nikokkolomi tale nilai nau nimene totu tale nimate
(Mak 12:18-27; Luk 20:27-40)

²³ Tale ie nonga o nau eteva, Sadiusi etoa, karika la ghaaiesoaa tale nitotu tale nimate, laghe mae sio tee uneira nikokkolomi eteva. ²⁴ Laghe uela va, “Tisa, Moses ghe pitila etaimami va, arova taita ateva lailai ia emate me karika righi natuna, nengane aue eghaa vause ateva eraue vuluela, tani alutu natuna tuena. ²⁵ Ghaitu (7) tue me nenga laghe tokatoka teeiemami. Aitiutiu eteva ghe laila, me ghe matela. Me, poli karika righi natuna, nengane ghe mene ghaala vausenna ateva. ²⁶ Ase voto ateva o ghe mene lutula ta aiaaghaluene ateva taita me kotonna ateva, me ghe laa sio ruu tale aiaaghaituna ateva. ²⁷ Airuuruu me vause ateva ghe matela. ²⁸ Nau nitotu tale nimate, see aue evausenna ia ta ila o tue me nenga ghaitu, poli ila akapa laghe laila etana?”

²⁹ Iesu ghe liula me ghe uela etaira va, “Nannaaimim karika ghulughu-luena, poli karika am kilakila Uru ngai Manga ateva me sarasarakaniaane God. ³⁰ Nau nitotu tale nimate, taumattu karika aue elai; aue la nongina ensolo atoa epona liu. ³¹ Me tale tototuaaira lo atoa matena ila, karika am ghe ritila voto llo God ghe auliaala etaimim? ³² ‘Aghi kapuira Goto ieghi Abraham, Aisiki me Jekop.’ Karika va kapuira Goto ia matena atoa ta kapuira Goto ia lo atoa maulue ila.”

³³ Nau taumattu ngatoa laghe nongola laghe soghiaala llo ghe aapasunga.

Mata ngemua ateva inangari nipaopao
(Mak 12:28-34; Luk 10:25-28)

³⁴ Paresi etoa laghe velu eitauaala nau laghe nongola va inangarina Iesu ghe ghelei epaavoola Sadiusi etoa. ³⁵ Kateva etaira, muennaaili ia tale

inangari nipaopao, ghe toongiela tale ie toko nikokkolomi eteva. ³⁶ Ghe uela va, “Tisa, sa ateva inangari tale isaa o inangari nipaopao namuu?”

³⁷ Iesu ghe liula me ghe uela va, “Uaielousiaa Vaum ateva kapum Goto ia tale urunguitanim me tale maamauluaam me tale nannaam.’ ³⁸ Aitiutiu eteva o, me namuu ia tale isaa akapa inangari nipaopao. ³⁹ Me aiaaghaluene ateva, nongina aitiutiu eteva, ‘Uaielousiaa taumattu ngateva kalakalangina ia etam, nongina uaaielousieinio.’ ⁴⁰ Isaa akapa inangari nipaopao me lo inangari propete atoa laghe auliaala, etani laolao aitaaua tee ilalua o inangari nipaopao alua.”

See tuvuna ia Mesaea?

(Mak 12:35-37; Luk 20:41-44)

⁴¹ Tale ie nonga o nau eteva Paresi etoa laghe velu eitauaala me Iesu ghe kolomilala va, ⁴² “Vaalua am annaa ta Mesaea ngateva? See tuvuna ia?”

Laghe liula me laghe uela va, “Tuvuna ia Deivit.”

⁴³ Me ghe uela etaira va, “Me vaalua me Deivit, Spiriti eteva ghe tokala etana, me ghe kolola ia o taumattu ngateva va Vau ia? Ghe uela va,

⁴⁴ “Vau ngepona ateva ghe uela ta kapughu vau eteva va,

“Toka siola tale pai muenna ativilau,

lomose ta aghatoka sio lo atoa la sessa teeio euu,

me uatingina saooa kkem etaira.”’

⁴⁵ Arova Deivit ghe kolokoloa va ‘Kapuna vau eteva,’ vaalua me ghe mene nim tuvuna ia?” ⁴⁶ Karika teva ghe liula tani mene auliaa righi inangari. Ghe tiauala o, karika teva ghe mene anna tani kolomia tale mene righi nikokkolomi.

23

Aue esesaaili ta tau ngai aapasunga ngatoa tale inangari nipaopao me Paresi etoa

(Mak 12:38-40; Luk 11:37-52; 20:45-47)

¹ Vara me Iesu ghe uela ta taumattu ngatoa me kapuna disaepolo atoa va, ² “Tau ngai aapasunga ngatoa tale inangari nipaopao me Paresi etoa la tokatoka tale unna aitokatoka ateva Moses. ³ Liuna avalua o me am nongo usilaa me am ghelei ekapa voto la aauliaa etaimim, me am rau mene aimuli tee gheeleiaaira, poli voto la ghaauliaa karika la gheelei. ⁴ Inangariira aanasaaili tale taumattu ngatoa tani aimuli tee, nongina la aatoka sae voto maamatana karika kaakaai me iriiri emasina, ta pappaira taumattu ngatoa, me karika la aaloanna tani sausi tani sau.

⁵ “Isaa akapaaili voto la gheelei va taumattu ngatoa la taraila. La gheelei enamuu uneira lutu ngaikaai me la pitipiti inangarina ateva God me la kaakaai sio etana, me kalio atiulu la aakou uruira etana, euu tale aighoughou ghaata, la aavukala voto ghaata la kolokolo va tassel, tani apasunga va ila tau ngai kkauaa ila. ⁶ La ghaaloannaaili va taumattu ngatoa la oneoneainila, me la ghaaloannaaili tani toka tale uneira aitokatoka namu ngatoa elome tale ale nivelu eitauaa, me nongina namu ngatoa la namanama. ⁷ La aloanna va taumattu ngatoa la soula tale masi inangari nongina oroi taumattu etokatoka me la asela va Rabae.

⁸ “Me la rau mene aseam va Rabae, poli kateva nonga vauimim ateva,* me am tue me nenga am. ⁹ Me am rau mene ase teva taumattu tale kosa ateva

^{22:37:} Diut 6:5. ^{22:39:} Lev 19:18; Mat 7:12. ^{22:40:} Rom 13:10; Gal 5:14. ^{22:42:} Jon 7:42. ^{22:44:} Sams 110:1; Mat 26:64. ^{23:3:} Mal 2:7-8. ^{23:5:} Mat 6:1; Eks 13:9; Diut 6:8; Nam 15:38-39. * ^{23:8:} Kasina uru ngai laghe pitila, laghe mene uela va, ia Mesaea ia.

oia va tamaimi ia, poli kateva nonga Tamaim ateva ia epona liu. ¹⁰ Me la rau mene aseam va tau ngai aapasunga iem, poli kateva nonga tau ngai aapasunga ngateva, ia Mesaea ia. ¹¹ Me lo ateva namuu ia elome etaimim, ia kapuimim tau ngai nongonongo anna ia. ¹² Lo ateva taumattu eaaloanna tani saeaa ararina atea, ararina atea aue esio euu, me lo ateva taumattu esioaa nannaane euu, aue ararina atea esae epona.

¹³⁻¹⁴ “Aue esesaaili etaimim, tau ngai aapasunga ngatoa tale inangari nipaopao me Paresi etoa, am usimaghalua am! Karika am roo tani tau velu katoa taumattu tani sso tale ararimangali ngepona liu eteva me am, karika am kupikupi sso.†

¹⁵ “Aue esesaaili etaimim, tau ngai aapasunga ngatoa tale inangari nipaopao me Paresi etoa, am usimaghalua am! Am kasukasu ekapa see elae me elamana tani ghelei kateva taumattu eJiu, me nau angam ghaaiela, am gheeleia va etau ngai uungu ta raroai eteva, me sesa uunguaane elaulau uunguaaimim.

¹⁶ “Aue esesaaili etaimim, tau ngai katula ngatoa mata salusalu iem! Am ue va, ‘Arova teva eauliaa inangarina tani ue va, “Koronnaaili tale ale manga ateva,” isaa o inangari karika righi malloeanina, me arova teva eauliaa inangarina tani ue va, “Koronnaaili tale golo tale ale manga ateva,” etani ghelei nongina eaauliaa.’ ¹⁷ Am mata salusalu iem me alokapakapa am! Sa ateva namuu ia: golo, o ale manga ateva, eaamanga golo? ¹⁸ Me am ue tee va, ‘Arova teva eauliaa inangarina tani ue va, “Koronnaaili tale liu nighelei aiaavusuvusuena,” isaa o inangari karika righi malloeanina, me marova teva eauliaa inangarina tani ue va, “Koronnaaili tale isaa o voto epona tale liu nighelei aiaavusuvusuena,” etani ghelei nongina eaauliaa.’ ¹⁹ Am mata salusaluna am! Sa ateva namuu ia: voto epona la maemaeaa tani ghelei aiaavusuvusuena, o liu nighelei aiaavusuvusuena ateva eaamanga voto o? ²⁰ Liuna avalua o me lo ateva eauliaa inangari tani ue va, ‘Koronnaaili tale liu nighelei aiaavusuvusuena ateva,’ eaaulia ngakoronna tale liu nighelei aiaavusuvusuena me voto akapa etokatoka epona etana. ²¹ Me lo ateva eauliaa inangari tani ue va, ‘Koronnaaili tale ale manga ateva,’ eaaulia ngakoronna ta ale manga ateva me ta God, poli God etokatoka tale ale manga ateva. ²² Me lo ateva eue va, ‘Koronnaaili epona liu,’ eaaulia ngakoronna tale unna aitokatoka ateva God me lo ateva etokatoka etana.

²³ “Aue esesaaili etaimim, tau ngai aapasunga ngatoa tale inangari nipaopao me Paresi etoa, am usimaghalua am! Am tani ghelei emasinaaili aiaasokolo tale uneimim lutu voto ghaunaaili am ghaaghaa eutana, me karika am uusilaa maamasinaane inangari nipaopao nongina voto ghulughuluena me nialousiusi me uunguaa niaikaaiia. Isaa o voto am roo tani ghelei me karika am mene kkaluaa isaa o voto ghaunaaili. ²⁴ Alousiusi etaimim, tau ngai katula ngatoa mata salusalu iem! Me am nongina taumattu ngateva ghe anna tani ghaa velu looloo arighi tale ropina manu, me ghe tam taatara kamolo ateva tale ropina manu, me ghe ropi teeieia.

23:11: Mat 20:26; Mak 9:35; Luk 22:26. **23:12:** Job 22:29; Nitoka 29:23; Luk 14:11; 18:14.

† **23:13-14:** Kasina uru ngai laghe pitila, laghe uela va, 14 Aue esesaaili etaimim, tau ngai aapasunga ngatoa tale inangari nipaopao me Paresi etoa, am usimaghalua am! Am ghaaghaa aitautauaa peiira vause raue vulu etoa, me am kamekame tani ghelei aluseaili nilooloo sae. Nau eteva am lao tale niaisakei, aue am ghaa namungaili nimmarikana. Utara Mak 12:40; Luk 20:47. **23:16:** Mat 15:14.

23:22: Ais 66:1; Mat 5:34. **23:23:** Lev 27:30; Maeka 6:8.

²⁵ “Aue esesaaili etaimim, tau ngai aapasunga ngatoa tale inangari nipaopao me Paresi etoa, usimaghalua am! Am gheelei eraarangisana eleka tale kapa ateva me pelete ativilau, me elome pasu ia tale nikuruetu me nitam nanna ngamasina. ²⁶ Paresi etoa am mata salusalu iem! Am ghelei eraarangisana akasina elome tale kapa ateva me pelete ativilau, me auena eleka emene raarangisana tee.

²⁷ “Aue esesaaili etaimim, tau ngai aapasunga ngatoa tale inangari nipaopao me Paresi etoa, am usimaghalua am! Am nonginaaili liu niaikkaia ngateva la porapora araarangisanaailiila eleka me taataraane masinaaili ia, me elome, pasueili ia tale riu taumattu matena me voto atoa karika raarangisana ila. ²⁸ Tale ia o salana atikirighi, eleka etaimim am aapasunga ta taumattu ngatoa va ghulughuluena am, me karika poi, ta elome etaimim pasueili ia tale usimaghalua me sesa voto.

²⁹ “Aue esesaaili etaimim, tau ngai aapasunga ngatoa tale inangari nipaopao me Paresi etoa, am usimaghalua am! Am, am atuutulu liu niaikkaiaa uneira propete atoa me am aamolomolu atu niaimatoonga uneira ghulughuluena atoa, ³⁰ me am ue va, ‘Marova ita ghe tokatoka emua arau nau ta tuvuita atoa, karika aue ita ghe usi tani uvi emate propete atoa.’ ³¹ Am aaulia ngakoronna va tuvuum atoa laghe uvi ematela propete atoa, me am tee am uusilaa uunguaaira tuvuum atoa. ³² Gheleila am me am laa ruu emasina sa ateva tuvuum atoa laghe tiueiniela!

³³ “Otuena am me natuira am otuena atoa! Vaalua aue am kasu vuli sessaiaane God tale nau niaisakei eteae? ³⁴ Liuna avalua o me aue asuu propete atoa, me tau ngalomasaanga, me tau ngai aapasunga ngatoa. Katoa etaira aue am uvi ematela me am avukalaila sae tale aikotoo, me katoa aue am uetaila tale aleimim ale nivelu eitauaa, me katoa aue am laa paela see tale masaliki taatara atoa. ³⁵ Liuna avalua o me aue am ghaa sesa ngaipolipoli tale taumattu ghulughuluena tale kosa ateva am ghe uvi ematela. Etiitiuaa ta ghulughuluena ateva taumattu Eibol me eruuruu ta Sekaraea natuna ia Barakaea, ia o am ghe uvi emateala elome tale ale manga ateva me tale liu nighelei aiaavusuvusuena ateva. ³⁶ Aghaaulia ngakoronna va sesa ngaipolipolina isaa oia voto aue elutu tale lo ateva oia vituu.

³⁷ “Jerusalem, Jerusalem! Ughe uvi ematela propete atoa, ughe osala tau ngai kasuaa inangarina atoa God tale atu! Ghaisaata aghaloanna tani atoka aitaueinam kapughu taumattu ngatoa, nongina kina paolo ateva eaakou natuna atoa tale kaekaena, me karika am aaloanna! ³⁸ Liuna avalua o, me am nongola! God aue ekasu vuli alena ale manga ateva, me masalikiimim taatara ateae aue taunganua. ³⁹ Poli aghaauliaa etaimim va karika aue am mene taraieghi, lomosi ta nau eteva aue emae, me aue am ue va, ‘Niarangise ta lo ateva emaemae tale ararina ateae Vau eteva.’ ”

24

Aimatootoongana tale airuuruu tale nau (Mak 13:1-31; Luk 21:7-33)

¹ Iesu ghe kupi ghoala tale ale manga ateva me ang ghe kasukasu me kapuna disaepolo atoa laghe mae sio etana. Laghe anna tani apasunga ale atoa tale ale manga ateva. ² Iesu ghe kolomilala va, “Am taatara isaa oia ale? Koronnaaili aghaauliaa etaimim va karika teva atu aue etoka saooa ta mene

23:25: Mak 7:4. **23:27:** Apos 23:3. **23:28:** Luk 16:15. **23:31:** Apos 7:52. **23:33:** Mat 3:7; 12:34; Luk 3:7. **23:35:** Aitiitiu 4:8; 2 Kro 24:20-21. **23:38:** 1 Ki 9:7-8; Jer 22:5. **23:39:** Sams 118:26. **24:2:** Luk 19:44.

kateva. Aue taumattu ngatoa la puli reerekata isaa akapaaili oia voto.”

³ Nau Iesu ghe toka siola tale motouru eteva eOliv me kapuna disaepolo atoa laghe mae sio tani kolomi einaoa va, “Auliaala etaimami, lovisaa isaa oia voto elutu me saa righi aimatoonga aue elutu tani apasunga maemaeam me airuuruu tale kosa ateva?”

⁴ Iesu ghe liula me ghe uela va, “Am paniem teva taumattu erau kameam. ⁵ Poli oroi taumattu aue la mae tale ararighi eteae me la ue va, ‘Aghi Mesaea ieghi,’ me aue la kame oroi taumattu. ⁶ Aue am nongo niaiuvii me kiukiuna me am rau mene matauta isaa o voto, poli isaa o voto aue elutu me airuuruu tale kosa ateva auena emae. ⁷ Patunganua atoa aue la ghaiuvieinila me ararimangali etoa aue la ghaiuvieinila tee. Nimaloo atoa me rukeruke aue la lutu tale kasina patunganua tale kosa ateva. ⁸ Isaa o voto aue enim aitiutiu tale nimmarikana, nongina mmarrikana egghaaghaa kinna ateva aliki eteva nau elutulutu.

⁹ “Me aue la kuneiem me la tauem lao tani ghaa nimmarikana me aue la uvi emateam. Ila akapa patunganua atoa aue la ssa teeiem poli ararighi eteae. ¹⁰ Tale ia o nau eteva, oroieili taumattu ngatoa aue la oghi vulu uneira niaikaaiiaa, me aue la aissa elome etaira, me aue la aitaueinila lao ta tau ngai ssateira atoa. ¹¹ Me oroieili propete kamekame atoa aue la kaurekati me aue la kame oroieili taumattu. ¹² Poli ssavoto ateva aue enamungaili me niaielousi eteva tale oroi taumattu aue ekapa. ¹³ Me see etingina akorokorongana tale unna niaikaaiiaa tale airuuruu, maamauluaane aue esaanga. ¹⁴ Me ia oia masi kiukiu eteva tale ararimangali eteva epona liu, aue la ppoa ngakapaie see tale kosa ateva va taumattu ngakapa atoa aue la nongoa, vara me airuuruu tale kosa ateva evira mae.”

¹⁵ Iesu ghe mene auliaa tee lao sio va, “Kasina nau aue am tara voto propet Deniol ghe auliaala, va voto sesaaili aue elutu elome tale ale manga ateva, me eghelei taumattu ngatoa la kasu vulia me ale manga ateva aue enim toka (lo ateva taumattu aue eriti aue alona aue masaanga). ¹⁶ Nau am tara isaa o voto elutu, lo atoa elome eJudia am ilou sae tale motouru. ¹⁷ Lo ateva taumattu etokatoka eleka* tale ale ateva, erau mene kupi sso va esso ghaa righi ghinnanina tanguenua. ¹⁸ Karika mene teva taumattu eutana emene oghi lao tanguenua tani laa ghaa unna aiaasae ngeleka. ¹⁹ Alousiusi ta lo atoa la suusunuku me lo atoa la sussu tale isaa o nau! ²⁰ Am looloo sae va am rau mene ilou vuli niaiuvii eteae tale nau kkaili o tale nau manga ateva. ²¹ Tale isaa o nau taumattu ngatoa aue la ghaa nimmarikana namungaili, aue elau nongina emua arau tale aitiutiu tale kosa ateva me nau ghaine, me auena karika aue mene righi voto avalua o elutu. ²² Me marova God karika ghe nnaala tani atukuna isaa o nau, karika teva aue ghele saanga. Me poli enannangaili isaa o taumattu ghe suitoongaala, sesa nau aue etukuna. ²³ Tale isaa o nau, arova teva eue etaimim va, ‘Tarala! Mesaea ngateva toko,’ o, ‘Ie teke,’ am rou mene aikaaiaa. ²⁴ Ta poli katoa taumattu aue la mae me aue la kame va, ‘Aghi Mesaea ngateva’ mene katoa aue la kame va, ‘Aghi propete ieghi,’ aue la mae la ghelei aimatootoongana me voto tani apasunga sarasarakaniaaira tani kame taumattu Vau palepale ghe suitoongaala, kotiva isaa o voto aue eroo. ²⁵ Am nongola, llo oia ngaghe aulia ngamuemue alokoila etaimim, me auena elutu.

²⁶ “Liuna avalua o me arova la ue etaimim va, ‘Ie teke tale voto ateva

24:5: Mat 24:23-24; 1 Jon 2:18. **24:9:** Mat 10:22. **24:11:** Mat 24:5, 24; 1 Jon 4:1. **24:13:** Mat 10:22. **24:14:** Mat 28:19. **24:15:** Den 9:27; 11:31; 12:11. **24:17:** Luk 17:31. * **24:17:** Tale inangari nge Grik, eue va etokatoka epona tale pungani ale ateva. **24:21:** Den 12:1. **24:23:** Mat 24:5. **24:24:** Diut 13:1-3; 2 Tes 2:8-9; Aotu 13:13-14. **24:26:** Luk 17:23-24.

karika righi taumattu etana,' karika am mene lao. Me marova la ue va, 'Ie toko elome tale ale atiulu,' am rau mene aiesoaa. ²⁷ Poli nongina ravaravaia ateva eramerame aloi lao ta sinaka esae me sinaka esuu, aue enongina maemaeane Natuna ateva Taumattu ngateva. ²⁸ Kona eaa taumattu matena easoaso, taotaokko atoa la veluvelu eitaaua.

²⁹ "Nongina Uru ngai Manga ateva eue va, 'Nau isaa o sesa nau elange, arovaeangaili ta

“ ‘sinaka ateva aue esaurrom
me ulana ateva karika aue emallanga
me katto atoa aue la katuu
me voto atoa korokorongana ila elomarase aue la ghaisiisia.” ’

³⁰ "Tale ia o nau eteva aimatootoongane Natuna ateva Taumattu ngateva ekauerekati elomarase. Patunganua akapa atoa tale kosa ateva aue la alou-siusi, nau la tara Natuna ateva Taumattu ngateva aue emae tale urukookoo elomarase, tee sarasarakaniaane me kinatama mallangina ateva. ³¹ Me taue ateva aue eaangari enamungaili, me aue esuu kapuna ensolo atoa tani laa kolo aitaaua taumattu ngatoa, ghe suuilala va kapuna ila tale isaa akapanaaili patunganua tale kosa ateva.

³² "Am rooroo tani ghaa alomasaanga tale kiukiu niaimatoonga tale fig atea. Nau eteva am tara ai eteae ange tulutulu, am kila va masi nau tale sinaka ateva ange kalakalaala. ³³ Liuna avalua o, nau am tara isaa o voto, aue am kila va ange kalakalanginginala, tapaa ngatamana. ³⁴ Aghaaulia ngakoronna ta lo ateva oia vituu va karika poi aue ekapa me isaa o voto aue elutu. ³⁵ Elomarase me kosa ateva oia aue ekapa me inangarighi karika poi aue ekapa.

*Karika teva ekilakila nau
isaa o voto aue elutu*

(Mak 13:32-37; Luk 17:26-30, 34-36)

³⁶ "Me karika teva taumattu ekilakila ia o nau eteva me aoa ngateva tee, tee me ensolo atoa epona liu me Natuna,† ta Tamaghi nonga. ³⁷ Nongina ta nau Noa, aue emene nongina maemaeane Natuna ateva Taumattu ngateva. ³⁸ Tale isaa o nau auena manu ghagga ateva ghe mae, taumattu ngatoa laghe namanama me laghe ropiropi me taita me vause atoa laghe lailai me ghe ghaala nau eteva Noa ghe kupi ssola tale anua ateva. ³⁹ Me karika laghe kilakila sa ateva aue ghe lutu, lomosi ta manu ghagga ateva ghe mae sio, me ghe gga vellala. Isaa o voto aue nonginaaili maemaeane Natuna ateva Taumattu ngateva. ⁴⁰ Taita alua aue lalu uungu eutana: kateva aue la ghaaia me kateva aue la rati etokaia. ⁴¹ Ghalua vause aue lalu moomonnaa ngaputuputu katu uiti tani ghelei palaoa: kateva aue la ghaaia, me kateva la rati etokaia.

⁴² "Liuna avalua o, me am anguu taatara ta poli karika am kilakila nauna ateva Vauimim ateva aue emae etana. ⁴³ Am kila llo toko va, marova taumattu ngateva ekila va tau niainao ateva aue emae ainao tale alena ateva, aue etoka anguungu me karika aue etau velu alena ateva va tau niainao ateva errutia me ekupi sso. ⁴⁴ Liuna avalua o me am tee, am aimonomosiaa poli Natuna ateva Taumattu ngateva aue emae tale ia o nau eteva karika am nannaa va aue emae etana.

24:27: Mat 24:37-39. **24:28:** Luk 17:37. **24:29:** Ais 13:10; 34:4; Esik 32:7; Joel 2:10, 31; 2 Pita 3:10; Aotu 6:12-13. **24:30:** Sek 12:10; Aotu 1:7; Den 7:13. **24:31:** 1 Ko 15:52; 1 Tes 4:16.

24:34: Mat 16:28. **24:35:** Mat 5:18. **24:36:** Apos 1:7; 1 Tes 5:1-2. † **24:36:** Kasina uru ngai laghe pitila, karika laghe pitila me Natuna. **24:37:** Aitiutiu 6:5-8. **24:39:** Aitiutiu 7:21-23.

24:42: Mat 25:13. **24:43:** Luk 12:39-40; Aotu 16:15.

⁴⁵ “Lo ateva tau ngai uungu egheelei emasina uunguaane me alomasaanga ia tani aitaraa voto, vauna ateva erooroo tani atokaia tanganuena tani aitaraa kapuna tau ngai uungu etoa me tani taula aneira inana tale nau nighaa inana. ⁴⁶ Niarangise aue etoka tale lo ateva tau ngai nongonongo anna, vauna ateva etara va egheelei isaa o niuungu, nau eteva ekiriaa mae. ⁴⁷ Aghaaulia ngakoronna etaimim va aue eatokaia va eaitaraa ngakapaaili peina. ⁴⁸ Me arova tau ngai nongonongo anna ateva uunguaane sesa, aue eue ta urunguitanina ateva va, ‘Vaughu eteva karika aue emae parasi,’ ⁴⁹ me etiuua tani namanama me tani ropi sesa manu tee katoa, me etiuua tani uvi kapuna tau ngai uungu etoa la uungu eitaaua teeia. ⁵⁰ Ia o tau ngai nongonongo anna ateva kapuna vau eteva aue emae tale ia o nau eteva ennaa va karika aue emae etana. ⁵¹ Nau eteva emae, aue esai putuputua me eatoka teeie lao ta usiemaghalua atoa. Aue la ngala me la aingeresa ngalungaluiria.

25

Kiukiu niaimatoongana atea ta kasangaulu aliki vause

¹ “Tale nau eteva o ararimangali ngepona liu eteva aue nongina kasangaulu aliki vause. Laghe ghaala kurairam lam me laghe lao sio tani sou taita ateva elai. ² Ghalima etaira alokapakapa me ghalima alomasaanga. ³ Alokapakapa atoa laghe saula kurairam lam me laghe tam ghaa teela mene righi oeli. ⁴ Alomasaanga nonga atoa laghe ghaala uneira oeli laghe kaola tale uneira aikaai oeli me laghe sau teela kurairam lam. ⁵ Taita ateva elai ghe tam rekataa parasila me laghe mangoola. Liuna avalua o me laghe asekanuela me laghe llusula.

⁶ “Elo matuaa voo me laghe aaore me laghe ue va, ‘Lo ateva elai ange reerekata! Am kupi ghoa mae me am ghoa soua!’

⁷ “Me aliki vause atoa laghe totula me laghe kanukanuaala kurairam lam. ⁸ Alokapakapa atoa laghe uela ta alomasaanga atoa va, ‘Am tau mae sio righi uneimim oeli etaimami ta kuraimami lam ange palapala.’

⁹ “Laghe liula me laghe uela va, ‘Karika ami rooroo poli erau tam roo etaita. Am lao sio ta lo atoa ita polipoli etaira me am laa poli righi uneimim.’

¹⁰ “Nau laghe kasukasu elaolao tapaa salana, me taita ateva elai ghe rekataala. Llo ghalima aliki vause laghe aimanomanosiaala, laghe kupi eitaaua teeie ssola tale ninamanama atea tale nilai etea, me laghe kavatila atamana atea.

¹¹ “Vara me ghalima aliki vause laghe mene rekataala me ngila ghe kolokolo laghe ue va, ‘Namu ngateva, namu ngateva, otila atamana atea me ami kupi sso.’

¹² “Ghe liula me ghe uela va, ‘Aghaaulia ngakoronna etaimim va karika akilakilaiem.’ ”

¹³ Me Iesu ghe uela va, “Liuna avalua o me am tani anguu taatara poli karika am kilakila nau eteva me aoa ngateva.

Kiukiu niaimatoongana atea ta tau ngai nongonongo anna atoa laghe ghaala viliki veu

(Luk 19:11-27)

¹⁴ “Ararimangali eteva epona liu aue mene nongina taita ateva ghe anna tani kasu me auena emene kiri mae, me ghe kolola kapuna tau ngai nongonongo anna atoa me ghe taula peina etaira. ¹⁵ Kateva ghe taula

ghalima airari (5,000) gol koen me kateva ghalua airari (2,000) me mene kateva ghe taula kateva airari (1,000). Ghe tau roorooaa lao sio tale uunguaa kateva kateva erooroo tani ghelei me ghe kasula. ¹⁶ Lo ateva tau ngai nongonongo anna ghe ghaala ghalima airari arovaeea ta ghe kasula tani uungu tale unna tani viliki veu me ghe mene ghaala ghalima airari. ¹⁷ Me lo tee ateva tau ngai nongonongo anna ghe ghaala ghalua airari, ghe mene ghaala ghalua airari. ¹⁸ Me lo ateva tau ngai nongonongo anna ghe ghaala kateva airari ghe lao sio me ghe laa kai sio liu eteva tapaa kosa me ghe aisuliaala unna viliki veu vauna ateva.

¹⁹ “Oroi nau ghe lange sio me vauira ateva tau ngai nongonongo anna atoa ghe rekatala me ghe anna tani tara llo laghe gheleila tale viliki veu ghe tau lao sio etaira. ²⁰ Lo ateva tau ngai nongonongo anna ghe ghaala ghalima airari ghe lao tee sio mene ghalima ghe uunguaala, me ghe uela va, ‘Vau eteva! Ughe tau mae sio ghalima airari, me tarala, aghe uunguaala mene ghalima airari.’

²¹ “Vauna ateva ghe liula me ghe uela va, ‘Amasimasieinio, poli ugheelei emasina uunguaam. Poli ughe ghelei emasinale llo niuungu pisike, aue aghatokaio me uaitaraa oroi voto. Mae sio me umasimasi eitauaa teeieghi.’

²² “Lo tee ateva tau ngai nongonongo anna ghe ghaala ghalua airari, ie tee ghe lao sio me ghe uela va, ‘Vau eteva! Ughe tau mae sio ghalua airari me tarala, aghe ghaala mene ghalua.’

²³ “Vauna ateva ghe liula me ghe uela va, ‘Amasimasieinio, poli ugheelei emasina uunguaam. Poli ughe ghelei emasinale llo niuungu pisike, aue aghatokaio me uaitaraa oroi voto. Mae sio me uma masimasi eitauaa teeieghi.’

²⁴ “Vara me lo ateva tau ngai nongonongo anna ghe ghaala kateva airari ghe lao sio me ghe uela va, ‘Vau eteva, akilakila va io tau nisessaieili io, umukemuke voto utam pasapasa me ughaaghaa uiti karika ughe uungu aanasala etana. ²⁵ Liuna avalua o me aghe matautula, me aghe lao sio tani kai me aghe aisuliaala unem viliki veu tapaa kosa. Tarala peim isaa toko.’

²⁶ “Vauna ateva ghe liula me ghe uela va, ‘Io sesa tau ngai nongonongo anna io me mangoona io! Ukilakila poi va, amukemuke voto atam pasapasa me aghaaghaa uiti karika aghe uungu aanasala etana. ²⁷ Ughe roola tani laa ghalokoi uneghi viliki veu, tale ale aialokoi viliki veu, me nau eteva aghe rekata, aue aghe mene ghaa me tee righi laghe mene saooa sae.

²⁸ “ ‘Liuna avalua o me am ghaala kateva airari etana me am tau lao ta lo ateva unna kasangaulu airari (10,000). ²⁹ Poli see righi voto etana, aue God emene taula me aue eghaa oroi voto, me lo ateva karika righi voto etana, saa righi lutu voto etana, aue eghaa velu ekapa etana. ³⁰ Am sau velu ghoala mangoona ateva tau ngai nongonongo anna eleka. Aue la vella ghoa tale kinatama saurrom ateva, me aue la ghoa toka ngangngala me la aingeresia ngalungaluiria.’

Sipsipi etoa me meemea atoa

³¹ “Nau Natuna ateva Taumattu ngateva emae tale mallangina ateva tee me kapuna ensolo atoa, * aue etoka tale aitokatokane ateva king eaapasunga matuutulienaane. ³² Taumattu ngakapa atoa tale patunganua akapa atoa tale kosa ateva oia aue la mae velu eitauaa etana me aue epolaila nongina

25:21: Mat 24:45-47; Luk 16:10. **25:29:** Mat 13:12; Mak 4:25; Luk 8:18. **25:30:** Mat 8:12; Luk 13:28. **25:31:** Mat 16:27; 19:28. * **25:31:** ensolo atoa Katoa uru ngai laghe pitila, laghe pitila ensolo manga atoa. **25:32:** Esik 34:17; Aotu 20:11-13.

aitoi sipsipi eteva epolapola sipsipi etoa me meemee atoa. ³³ Aue eatingina sipsipi etoa ta pai muenna ativilau me meemee atoa ta pai uaise ativilau.

³⁴ “Me king aue eue ta lo atoa tale pai muenna ativilau va, ‘Am mae sio, Tamaghi ghe arangiseiemla. Ta ararimangali eteva ange kaakaluimi ia, tale nau eteva ghe tiuaala emua arau nau God ghe gheleila kosa ateva oia. ³⁵ Poli nau aghe maamaloo am ghe tautau mae inana etaghi, me nau aghe anna tani ropi am ghe aaropiropieghi, nau ouna aghi tale masalikiimim am ghe ghaaieghi lao tanganueimim. ³⁶ Nau karika ghinnanighi am ghe tautau mae ghinna etaghi. Nau aghe iisiki am ghe aaitarainaghi, aghe tokatoka tale ale mata voovoo am ghe mae taataraiaghi.’

³⁷ “Me ghulughuluena atoa taumattu aue la kolomia va, ‘Vau ngepona, lovisaa ami ghe taraiola ta ughe maamaloo me ami ghe anginiola, me ughe anna tani ropi me ami ghe tau aatu me ughe ropila? ³⁸ Lovisaa ouna io tale masalikiimami me ami ghe ghaaio lao sio tanganuemami, o karika ghinnanim me ami ghe tau aatu ghinna? ³⁹ Me lovisaa ami ghe taraiola ughe iisiki me ughe tokatoka tale ale mata voovoo me ami ghe atu taatarai?’

⁴⁰ “Me king aue eliu me eue etaira va, ‘Aghaaulia ngakoronna etaimim va, saa voto am ghe ghelei tee kateva nengaghi aliki mela ia, am ghe ghelei etaghi.’

⁴¹ “Me aue eue ta lo atoa tale pai uaise ativilau va, ‘Am kasu emasalikaala etaghi, nikasikiena etaimim, me ngam laolao tale kura atea tokatoka liu ia God ghe aimanomanosieiniela ta Satana me kapuna ensolo atoa. ⁴² Poli aghe maamaloo karika am ghe tautau mae inana etaghi, me nau aghe anna tani ropi karika am ghe aaropiropieghi. ⁴³ Ouna ieghi tale masalikiimim, karika am ghe aaikoloainaghi. Karika ghinnanighi, karika am ghe tautau mae righi ghinnanighi. Aghe iisiki me aghe tokatoka tale ale mata voovoo karika am ghe aaitarainaghi.’

⁴⁴ “Aue la kolomi va, ‘Vau ngepona, lovisaa ami ghe taraiola ughe maamaloo me ughe anna tani ropi me ouna io tale masalikiimami? Me lovisaa karika ghinnanim me ughe iisiki me ughe tokatoka tale ale mata voovoo me karika ami ghe sausiola?’

⁴⁵ “Aue eliu etaira va, ‘Aghaaulia ngakoronna etaimim va, nau karika am ghe ghelei ta kateva nengaghi aliki mela ia, isaa o voto, am ghe tam ghelei etaghi.’

⁴⁶ “Me aue la lao tale sesa nimmarikana ateva tokatoka liu ia me ghulughuluena atoa aue la lao tale maulue ateva tokatoka liu ia.”

26

Laghe aailoeaa Iesu tani uvi ematea (Mak 14:1-2; Luk 22:1-2; Jon 11:45-53)

¹ Nau eteva Iesu ghe ruula tani apasunga isaa akapa o voto, me ghe uela ta kapuna disaepolo atoa va, ² “Am kilakila va kasi ghalua nau me Pasova ngateva etiuuaa, me Natuna ateva Taumattu ngateva aue la taue lao me esae vukala tale aikotoo.”

³ Me namu ngatoa tale pristi etoa me namu ngatoa la muemua taumattu ngatoa laghe velu eitauaala tale alena ateva Kaeapas, namuu ia ta pristi ekapa atoa, ⁴ tani ailoaea vaalua la kune aisulia Iesu me la uvi ematea. ⁵ Me laghe mae sio nonga ta kateva ninannaa va la rau mene ghelei isaa o voto nau Pasova poli teae niaiuvii erau lutu.

*Vause ateva ghe kaola oeli ta Iesu eBetani
(Mak 14:3-9; Jon 12:1-8)*

⁶ Nau Iesu ghe tokala eBetani tanganue Saemon taita ateva emua arau anna tasussuku eteva, ⁷ laghe namanama me vause ateva ghe kupi sso mae tee masi aikakkaai eteva laghe gheleila tale atu eteva alabasta ia, ghe kaakaai llo masi ngusungusuaane me aipolina namungaili me ghe kaola ta uruna ateva Iesu.

⁸ Disaepolo atoa ghe sessailala nau laghe tarala llo ghe lutula me laghe ue va, “Eghelei elaelaeaala voto ita rooroo tani ghaa viliki veu etana. ⁹ Ghe roola va ghe tauela me aue laghe polia tale viliki veu oroi me isaa o viliki veu, laghe roo tani laa tau lao ta lo atoa karika tue peipeiena ila.”

¹⁰ Iesu ghe kilala nannaaira, me ghe liula me ghe uela va, “Vaalua me essaiem etana nau egheleila masi voto etaghi? ¹¹ Aue lo atoa karika tue peipeiena ila la toka teiem nau ekapa atoa, me aghi karika oroi nau aue atoka teiem. ¹² Ekaola voto masi ngusungusuaane etaghi tani aimanomanosieinaghi tale nau niaikkaia. ¹³ Aghaaulia ngakoronna va eaa aue la ppoaaa isaa o masi kiukiu tale kosa ateva, aue la ghauliaa tee masi gheeleiaane vause ateva oia, tani nnainia.”

*Jiudas ghe uela va aue etau lao Iesu
(Mak 14:10-11; Luk 22:3-6)*

¹⁴ Me kateva ta kasangaulu ghalua (12) disaepolo, la kolokoloa va Jiudas Iskariot, ghe lao sio ta namu ngatoa ta pristi etoa, ¹⁵ me ghe kolomilala va, “Aue am ghele polieghi ta ghaisa arova aghele tau aatu Iesu etaimim?” Me laghe tau lao sio kotolungaulu (30) viliki veu. ¹⁶ Ghe tiuaala tale ia o nau eteva, Jiudas ghe tiuaala tani tara teva masi nau aue etauela etaira.

*Iesu ghe namanama teela disaepolo atoa
(Mak 14:12-21; Luk 22:7-14, 21-23; Jon 13:21-30)*

¹⁷ Tale aitiutiu eteva nau tale nivelu eitauaa tale verete karika righi isti etana, disaepolo atoa laghe lao sio ta Iesu me laghe kolomiela va, “Uanna va eaa aloi ami laa ghaimonomosiaa ninamanama atea ta Pasova?”

¹⁸ Ghe uela etaira va, “Nau eteva am kupi sso tale masaliki taatara atea, aue am tara taumattu ngateva. Am ue etana va, ‘Tisa euela va: Nauna ange rekatala me eanna tani nama Pasova ngateva tee kapuna disaepolo atoa tanganuem.’” ¹⁹ Liuna avalua o me disaepolo atoa laghe gheleila voto nongina Iesu ghe auliaala, me laghe aipanipaniaala inana tale Pasova ngateva.

²⁰ Vara elo alai me Iesu ghe toka tee siola kasangaulu ghalua (12) kapuna disaepolo tale tevoo ainamanama ateva. ²¹ Laghe namanama me Iesu ghe uela etaira va, “Aghaaulia ngakoronna etaimim va kateva etaimim aue etauoghi lao ta tau ngai ssateeghi etoa.”

²² Nau disaepolo atoa laghe nongola, laghe alousiusieiliila me kateva kateva ghe kookolomia va, “Vau eteva, koti aghi, no?”

²³ Ghe liula me ghe uela va, “Kateva etaimim ita namanama aitauaa, ia aue etauoghi lao ta tau ngai ssateeghi etoa. ²⁴ Poli Natuna ateva Taumattu ngateva aue elao nongina Uru ngai Manga ateva eaauliaa va emate. Me alousiusi tale taumattu ngateva etautau lao Natuna ateva Taumattu ngateva ta tau ngai ssateena atoa. Aue ghele masina etana arova ghe tam lutula.”

²⁵ Jiudas, lo ateva taumattu aue ghe tau lao Iesu, ie tee ghe kolomila ghe uela va, “Koti aghi, no, va Rabae?”

Me Iesu ghe uela etana va, “Inangari isaa ona angu auliaala.”

Iesu ghe tau lao sio verete me uaeni ta kapuna disaepolo atoa
(Mak 14:22-26; Luk 22:15-20; 1 Ko 11:23-25)

²⁶ Laghe namanama me Iesu ghe ghaala verete ateva, me ghe kokkolomi saela ta God tani arangiseia, me ghe piriela me ghe taue lao sio ta disaepolo atoa, me ghe uela etaira va, “Am ghaala me am nama. Isaa oia verete malataughu.”

²⁷ Me ghe mene ghaala kapa uaeni eteva me ghe mene kaili emasina saela ta God me ghe tau lao sio etaira me ghe uela va, “Am akapa am ropi etana, ²⁸ poli uaeni eteva oia raeghi ia tani ghelei ouna inangari niaippooa ngaitauaa. Raeghi eteva aue eakalaa ta oroi taumattu ngatoa, tani kkaluaa sesa gheeleiaaira. ²⁹ Aghaauliaa etaimim va karika aue amene ropi righi uaeni lomosi ta aue amene ropi ouna uaeni teiem tale ararimangalina ateva Tamaghi.”

³⁰ Me laghe ueila kkinari eteae me laghe kupi ghoala tale masaliki taatara atea me laghe saela tale motouru eteva eOliv.

Iesu ghe aulia ngamuemua alokoila llo Pita aue eghelei
(Mak 14:27-31; Luk 22:31-34; Jon 13:36-38)

³¹ Iesu ghe uela etaira va, “Ghaine eleivoo am akapaaili aue am ilou vulieghi, poli Uru ngai Manga ateva eue va, “‘Aue auvi emate tau ngai toi sipsipi eteva me aue sipsipi etoa la ilou reerekataa.’

³² Me nau atotu tale nimate aue amuemue lao eGalilii me aue am laa taraieghi okae.”

³³ Pita ghe aulia ngaotula va, “Arova ila akapa la ilou vulio, aghi karika poi arooroo tani ilou vulio.”

³⁴ Iesu ghe liula me ghe uela va, “Pita, llo koronna isaa avalua toko va, ia o voo ngateva auena paolo ateva taita eaangari, aue uue akasina kotoluaata va karika ukilakilaieghi.”

³⁵ Me Pita ghe aasarasarakana tani ue va, “Karika poi arooroo tani ue va karika akilakilaio! Arova umate aghi tee aue amate teeio.” Ila akapa disaepolo atoa laghe aulia ngavalua o ta Iesu.

Iesu ghe looloo sae eGetsemeni
(Mak 14:32-42; Luk 22:39-46)

³⁶ Me Iesu ghe ghaala kapuna disaepolo atoa me laghe lao sio tale voto ateva la kolokoloa va eGetsemeni, me ghe uela etaira va, “Am toka oia me aghi aue amene kasu tee lao tani laa looloo sae.” ³⁷ Ghe kolola Pita me natuna alua Sebedi me ghe tiuaala tani alousiusieili, me ang ghe ateatea saasakiaa. ³⁸ Me ghe uela etairotolu va, “Maamauluaaghi ange sessaaili tee nialousiusi eteva, me egheleieghi arova amate. Am toka oia me am anguu taatara teeieghi.”

³⁹ Ghe kasu tee lao sio me ghe tturru siola tapaa kosa matane ghe tau siola me ghe tiuaala tani looloo sae. Ghe ue va, “Tamaghi, arova erooroo uakekkelieghi tale ia oia kapa nimmarikana ateva ange aanna tani ghaaieghi. Me karika umene ghelei tale aloaloannaaghi ta ughelei tale aloannaam.”

⁴⁰ Ghe kiriaa lao sio ta disaepolo kotolu me ghe tarailotolla ta lotolu ghe aseasekanua me ghe uela ta Pita va, “Karika erooroo va am nim anguu

taatara teeieghi ta kateva nonga aoa? ⁴¹ Am anguu taatara me am looloo sae ta God va karika am mene katuu tale nitootoonga. Nannaaimim eanna tani ghelei voto, me vilikiimim mangoona.”

⁴² Ghe kasu vulilala me ghe mene lao sio tani looloo sae, ghe ue va, “Tamaghi, arova ia oia kapa nimmarikana ateva etam kkelieghi me aropia, aue aghelei aloaloannaam.”

⁴³ Vara ghe mene kiriaa mae sio etairotolu me ghe mene saopilotolla ta latolu ghe aseesekanua, poli matairotolu ghe maamaateaili. ⁴⁴ Me ghe mene lao sio tani looloo sae aiaakotonna. Ghe auliaa inangari ang ghe auliaala mua.

⁴⁵ Ghe mene kiriaa lao sio ta disaepolo atoa me ghe uela etaira va, “Am aseesekanua me am kaakaarasi tani ainoana, va? Am tarala! Nau ange rekatala va Natuna ateva Taumattu ngateva ngila tautauela ta nimaira sesa taumattu ngatoa. ⁴⁶ Amotolu totula me ita kasu! Lo ateva etautaeuighi lao ta tau ngai ssateeghi etoa ange reerekata.”

Laghe kunela Iesu

(Mak 14:43-50; Luk 22:47-53; Jon 18:3-12)

⁴⁷ Nau ghe auliaala llo me Jiudas, kateva ta kasangaulu ghalua (12) disaepolo, ghe rekata teela taumattu ngatoa oroianaaaili ila me laghe posoposo baenata me tuku ngai. Namu ngatoa ta pristi etoa me namu ngatoa laghe sungilala. ⁴⁸ Lo ateva ghe taue lao sio etaira ghe auliaa tau lao sio naimatoongana ateva aue egheleia. Ghe uela va, “Lo ateva taumattu angusua, ia o lo ateva am kuneaia.” ⁴⁹ Liuna avalua o me Jiudas ghe lao sio ta Iesu me ghe uela va, “Rabae!” me ghe ngusuela.

⁵⁰ Me Iesu ghe uela etana va, “Kapughu, gheleila voto umae sio tani ghelei.”

Laghe kunela Iesu me laghe poso atinginaiela. ⁵¹ Kateva taumattu ghe tiitingina tee Iesu ghe ghaala baenata ateva me ghe sai patela talingane ativilau kateva kapuna tau ngai nongonongo anna namu ngateva ta pristi etoa.

⁵² Me Iesu ghe uela etana va, “Kaaila baenata ateva, poli lo atoa la aaiuvii tale baenata, aue la uvila tale baenata ateva. ⁵³ Karika ukilakila va arooroo tani kolomi sae Tamaghi tani tau sio oroianaaili ensolo atoa me arovaeea nonga ta aue ghele sungila? ⁵⁴ Me arova aghele ghelei, vaalua aue voto Uru ngai Manga ateva ghe auliaala aue ghele lutu ekoronna?”

⁵⁵ Me Iesu ghe uela ta taumattu ngatoa va, “Am annaa vara aghi tau ngai uvii me sari ghinna ieghi va am sau mae sio baenata me tuku ngai tani kuneieghi? Vaalua me karika am ghe kunekuneieghi nau aghe aapasunga nau ekapa atoa tale ale manga ateva? ⁵⁶ Isaa o voto ghe lutulutu tani rooaa inangariira propete atoa laghe piti elokoila tale Uru ngai Manga ateva.” Tale ia o nau eteva, disaepolo akapa atoa laghe kasu vuliela me laghe iloula.

Iesu ghe tinginala emua ta kansolo atoa

(Mak 14:53-65; Luk 22:54-55, 63-71; Jon 18:13-14, 19-24)

⁵⁷ Me taumattu ngatoa laghe kunela Iesu me laghe laoinie sio tanganue Kaeapas namuu ia ta pristi etoa, nongina tau ngai aapasunga ngatoa tale inangari nipaopao me namu ngatoa laghe velu eitauaala. ⁵⁸ Vara me Pita ghe aaimuli me karika ghe kalakalaa. Ghe kupi ssola tale valavala ateaie ghe taataliaa alena ateva namu ngateva tale pristi etoa me ghe toka tee siola tau ngai toitoi etoa. Ghe toitoi tani tara va sa ateva aue ghe lutu ta Iesu.

⁵⁹ Namu ngatoa ta pristi etoa, me kansolo akapa atoa, laghe paepae righi taumattu aue laghe aikamea righi voto tee Iesu me laghe uvi ematea. ⁶⁰ Oro i taumattu laghe ghaala tani auliaa tee Iesu tale inangari kamena, me kansolo atoa karika laghe tara poila righi voto laghe auliaa tee Iesu me laghe roo tani uvi ematea.

Vara me ghalua taumattu lalu ghe mae sio. ⁶¹ Lalu ghe uela va, “Taumattu ngateva oia ghe uela va, ‘Arooro tani rruti alena ale manga ateva God me aue aghatulua ta kotolu nonga nau.’”

⁶² Namu ngateva ta pristi etoa ghe tingina saela me ghe uela ta Iesu va, “Karika aue uliu inangariira? Vaalua tale inangari la ghaauliaa teeio?” ⁶³ Me Iesu ghe nim maamatuaa tingina.

Me namu ngateva ta pristi etoa ghe uela etana va, “Tale ararina atea God tokatoka liu ia, aghanna va uauliaa etaimami va koronna va io Mesaea, Natuna io God?”

⁶⁴ Iesu ghe liula me ghe uela va, “Ue, nongina angu auliaala. Aue am tara Natuna ateva Taumattu ngateva ta etoka sio tale pai muenna ativilau ta lo ateva sarasarakana ia, me esio tale karaane epona liu.”

⁶⁵ Vara me namu ngateva ta pristi etoa ghe rasila ghinnanina tani apasunga va ghe tam aloannala tani nongo, me ghe uela va, “Ange ghaala liuna ateva God! Karika ita mene aloanna mene righi taumattu tani auliaa mene righi inangariira poli ngam nongola voto ange auliaala. ⁶⁶ Vaalua am annaa?”

Laghe liula me laghe uela va, “Ange gheleila voto sesa erooro va emate.”

⁶⁷ Me laghe tiuaala tani kanusuaa matane Iesu me laghe tuutumaria me katoa laghe pooposalaia. ⁶⁸ Me laghe ue etana va, “Poli Mesaea io, uauliaa inangarina God va see ange posalaiola.”

Pita ghe uela va etam kilakila Iesu

(Mak 14:66-72; Luk 22:56-62; Jon 18:15-18, 25-27)

⁶⁹ Pita ghe tokatoka elome tale valavala atea ghe taataliaa alena ateva namu ngateva ta pristi etoa, me kapuna vause tau ngai nongonongo anna ateva ghe lao sio etana me ghe uela va, “Io tee ughe kasukasu tee Iesu aGalilii ia.”

⁷⁰ Me ta mataira akapa, Pita ghe liula me ghe uela va, “Karika akilakila isaa ona inangari uauliaa.”

⁷¹ Me ghe kupi ghoala tale atamana atea tale valavala atea me mene kateva vause tau ngai nongonongo anna ia ghe taraiela me ghe uela ta taumattu ngatoa va, “Ia oia taumattu ngateva ghe kasukasu tee Iesu aNasareti ia.”

⁷² Me Pita ghe mene uela va, “Karika!” Me ghe uela va, “Koronnaaili ta epona liu va karika akilakila ia ona taumattu ngateva.”

⁷³ Vara karika masau me lo atoa laghe tiitingina akalakalangingina teeia laghe uela etana va, “Koronnaaili va io kateva etaira, poli samasamaam arova aGalilii eteva.”

⁷⁴ Me Pita ghe uela va, “Koronnaaili ta God va karika akilakila ia ona taumattu ngateva!”

Vara me paolo ateva taita ia ghe aangarila. ⁷⁵ Arovaea ta Pita ghe annaala inangarina Iesu ghe uela va, “Auena paolo ateva taita ia eaangari, aue uue akasina kotoluaata va karika ukilakilaieghi.” Pita ghe kupi ghoala me ghe ngala alousiusieilila.

26:61: Jon 2:19-21. **26:63:** Ais 53:7; Mat 27:12. **26:64:** Sams 110:1; Den 7:13; Mat 24:30.
26:65: Mat 9:3; Jon 10:33. **26:66:** Lev 24:16; Jon 19:7. **26:67:** Ais 50:6; 53:5. **26:75:** Mat 26:34.

27

Laghe laooa sio Iesu ta Paelat (Mak 15:1; Luk 23:1-2; Jon 18:28-32)

¹ Elue talaua poopooa namu ngakapa atoa ta pristi etoa me namu ngatoa laghe mae sio nonga tale kateva ninannaa va la uvi emate Iesu. ² Laghe iriela me laghe kasueiniela tani laoainia ta Paelat gavanaa ia.

Jiudas ghe nauela (Apos 1:18-19)

³ Nau Jiudas, ia o taumattu ngateva ghe tau lao sio Iesu ta tau ngai ssateena atoa, ghe tarala va aue la uvi emate Iesu, ghe maateailiila ta nannaane me ghe mene laooa sio viliki veu erooro kotolungaulu (30) silva koen namu ngatoa ta pristi etoa me namu ngatoa laghe tau lao sio etana. ⁴ Ghe uela va, “Ngagheleila voto karika masina tani tau lao taumattu ngateva karika righi kanna ssavoto va la uvi ematea.”

Laghe liula me laghe uela va, “Ami saa etana? Uunguaam ona.”

⁵ Jiudas ghe sau velu elokoi siola viliki veu tale ale manga ateva me ghe kasula tani laa naua.

⁶ Namu ngatoa ta pristi etoa laghe ghaa siola viliki veu me laghe uela va, “Uneita loo eue va karika masina tani alokoi sso tale ale viliki veu, poli viliki veu rae llo oia.” ⁷ Liuna avalua o me laghe mae sio tale kateva ninannaa va, tale isaa o viliki veu aue la poli tuku kosa ateva kaluira ia lo atoa laghe ghelei sospena tale kosa me aue liu niaikkaiaaira ia ativuu etoa. ⁸ Liuna avalua o me tale isaa oia nau la aseasea va kosa tale rae ia. ⁹ Me llo voto propete Jerimaea ghe auliaala ghe kaurekatila, ghe uela va, “Laghe ghaala kotolungaulu silva koen, aipolipoli eteva taumattu nge Israeli etoa laghe aseala etana va la polia, ¹⁰ me tale isaa o viliki veu laghe polila tuku kosa ateva laghe ghelei sospena kosa etana, nongina Vau ngepona ateva ghe auliaala etaghi.”

Iesu ghe tinginala emua ta Paelat (Mak 15:2-15; Luk 23:3-5, 13-25; Jon 18:33–19:16)

¹¹ Vara me Iesu ghe tinginala emua ta Paelat gavana ia me ghe kolomiela va, “Io kingi io ta ajiu etoa?”

Iesu ghe liula me ghe uela va, “Ue, nongina uaauliaa.”

¹² Nau eteva namu ngatoa ta pristi etoa me namu ngatoa laghe auliaa teeia inangari emua ta matane Paelat, karika poi Iesu ghe liula. ¹³ Me Paelat ghe kolomiela va, “Karika unongonongo inangari la ghaauliaa teeio?” ¹⁴ Me karika poi Iesu ghe liula teva tuku inangari laghe auliaa teeia. Me gavana ghe soghiaala isaa o voto ghe tarala etana.

¹⁵ Kateva voto gavana ghe gheeleia nonga nau tale nivelu eitaua ngateae ta Pasova, ghe tautau velu lo ateva taumattu tale ale mata voovoo taumattu ngatoa laghe anna va etau velua. ¹⁶ Isaa o nau kateva taumattu, taumattu ngakapa atoa laghe kilakilaia va sesa taumattu ia, ghe tokatoka tale ale mata voovoo, ararina atea ta Barabas.* ¹⁷ Nau taumattu ngatoa laghe mae sio tani velu eitauaa, Paelat ghe kolomilala va, “Am alona va atau velu see me emene atu etaimim: Barabas o Iesu la kolokoloa va Mesaea etana?” ¹⁸ Poli Paelat ghe kilakila va laghe tam nannaa tee Iesu righi masina, liuna avalua o me laghe maeainie sio etana.

27:5: Apos 1:18-19; Mat 26:14-15. **27:9:** Sek 11:12-13. **27:12:** Ais 53:7. * **27:16:** Kasina uru ngai laghe pitila, laghe pitila va Iesu Barabas. **27:18:** Jon 11:47-48; 12:19.

¹⁹ Paelat ghe tokatoka tale aitokatoka ateva aighelei niaisakei ia, me vausenna ateva ghe suula inangari va, “Urau mene ghelei righi voto tale taumattu ngateva ona karika righi gheeleiaane sesa. Poli ia me ngaghaala oroieili mmarikana tale maamauluaaghi nau aghasoasopoila eleivoo.”

²⁰ Namu ngatoa ta pristi etoa me namu ngatoa laghe paapasali taumattu ngatoa va etau velu Barabas me euvi emate Iesu.

²¹ Gavana ghe kolomilala va, “See etairarua am anna va atau velua me emene atu etaimim?”

Laghe liula me laghe uela va, “Barabas.”

²² Me Paelat ghe kolomilala va, “O sa ateva aigheleia ta Iesu la aseasea va Mesaea ia?”

Ila akapa laghe liula me laghe uela va, “Uavukalaie sae tale aikotoo.”

²³ Me Paelat ghe kolomilala va, “Poli sa ateva voto sesa ghe gheleila?”

Vara me laghe tiuaala tani sama anamungaili va, “Uavukalaie sae tale aikotoo.”

²⁴ Nau Paelat ghe tarala va karika ang ghe rooroo tani ghelei righi llo, me niaikkaluu eetae ang ghe tiituaa, ghe ghaala manu me ghe porala nimane emua ta taumattu ngatoa me ghe uela va, “Karika righi inangarighi tale raena ateva taumattu ngateva oia. Sa ateva elutu etana uunguaaimim.”

²⁵ Taumattu ngatoa laghe liula me laghe ue va, “Utau velu rangane ateva etoka etaimami me natuimami etoa.”

²⁶ Me ghe tau vella Barabas ghe mene lao sio etaira me Iesu laghe uetaiela mua me ghe taue lao sio va la laa ghavukalaie sae tale aikotoo.

Soldia ngatoa laghe aanamisaa Iesu

(Mak 15:16-20; Jon 19:2-3)

²⁷ Me kapuna soldia ngatoa gavana laghe ghaala Iesu me laghe ssoainiela tanguena Gavana ngateva, me laghe kolo akapala soldia ngatoa me laghe tomuela. ²⁸ Laghe ghaa vella ghinnanina me laghe asae taula aiaasae ateva raeraeana ia, ²⁹ me laghe ghaala uasa rorroana me laghe navitaala kou nguru eteva me laghe atokaie saela ta uruna. Me laghe atinginala ai eteae ta nimane muenna atelange, me laghe suusuuaa emua etana me laghe piipilosia tani ue etana va, “Ei, kapuira kingi eteva ajiu etoa!” ³⁰ Laghe kaakanusua me laghe ghaala ai eteae ta nimane me laghe paruparu uruna ateva. ³¹ Nau laghe ruula tani anamisainia, laghe ghaa vella aiaasae ateva etana me laghe mene asae taula ghinnanina me laghe kasueiniela tani laa avukalaie sae tale aikotoo.

Laghe avukala saela Iesu tale aikotoo

(Mak 15:21-32; Luk 23:26-43; Jon 19:17-27)

³² Nau laghe laa ghoa eleka, laghe soula taumattu ngateva atala nge Saerini ia, ararina atea ta Saemon, me laghe aeala me laghe sungiela va esau aikotoo ateva. ³³ Laghe rekatala tale voto ateva ararina atea ta Golgota, malloeana va Voto ateva arova Riu uru taumattu ngateva. ³⁴ Tale ia o voto ateva laghe tau lao sio uaeni ta Iesu va eropi. Laghe kao aitauaa teela voto kaakaalina, me nau Iesu ghe tootongaala, ghe tam annala tani ropi. ³⁵ Nau laghe avukalaie saela tale aikotoo me laghe tiuaala tani anamisi tani aikoita ghinnanina. ³⁶ Me laghe toka siola tale ia o voto ateva tani toi etokaia va ghe tani mate. ³⁷ Epona nongina uruna ateva laghe pitila me laghe avukalala inangari laghe laoainie sio tale niaisakei etana eue va, “Ia oia Iesu, kapuira kingi ia ajiu etoa.” ³⁸ Taita alua lalu ghe aaiuvii me

lalu ghe ghaaghaa peiira taumattu ngatoa, lalua tee laghe avukala teeilalue saela, kateva ta pai muenna ativilau me kateva ta pai uaise ativilau. ³⁹ Me taumattu ngatoa laghe kasukasu tapaa salana, laghe aauliaa teeia inangari karika masina. Laghe ringaringa uruira, ⁴⁰ me laghe ue va, “Io urooro tani rruti ale manga ateva me umene atulua ta kotolu nonga nau, asaangiola me ukkure sio tale aikotoo ateva, arova Natuna io God.”

⁴¹ Namu ngatoa ta pristi etoa me tau ngai aapasunga ngatoa tale inangari nipaopao me namu ngatoa, ila tee laghe aauliaa teeia inangari. ⁴² Laghe ue va, “Eghe asaangila katoa, me karika erooro tani asaangia! Ia kapuira kingi ia aIsraeli etoa! Am tau veluela me ekkure sio tale aikotoo ateva me aue ami aiesoaa etana. ⁴³ Ghe aatoka tuutulina ta God. Tau veluela me ghaine God easaangia arova eaannaia, poli ghe ue va, ‘Aghi Natuna aghi God.’ ” ⁴⁴ Tale ie nonga o salana atikirighi tau niainao tee alua laghe avukala teeilalue saela tale aikotoo, lalu ghe aauliaa teeia inangari.

Matemateaaane Iesu

(Mak 15:33-34; Luk 23:44-49; Jon 19:28-30)

⁴⁵ Ghe tiuaala ta pai ngelo sinaka† me saurrom ateva ghe akoula kosa ateva, ghe roola kotolu aoa. ⁴⁶ Gharighi ghe 3 kilok‡ me Iesu ghe ngala anamungailiila me ghe uela va, “Eli, Eli, lama sabaktani?” malloeana va, “Kapughu Goto ateva, kapughu Goto ateva, vaalua me angu tau velueghila?”

⁴⁷ Nau katoa ta lo atoa laghe tiitingina akalakalagina laghe nongola, laghe uela va, “Ekolokolo Elaija.”

⁴⁸ Arovaea ta kateva ghe iloula tani laa ghaa tuku spans ateva me ghe asuuela tale uaeni kaakaalina me ghe apasapasaiela tale ai eteae me ghe taue saela va Iesu ghe mmua. ⁴⁹ Mene katoa laghe ue va, “Tau veluela me ie nonga evukala, me ita tara arova Elaija aue emae asaangia.”

⁵⁰ Me nau eteva Iesu ghe mene aore namungailiila me ghe tau vella maamauluane.

⁵¹ Tale ia o nau eteva, kalio atiulu ghe vuuvukala tale ale manga ateva ghe tarriila me ghe ghaluevilaula, ghe laa sae tiuaa epona me ghe laa sio ruu euu. Me kosa ateva ghe aisiisiaala me atu etoa laghe tapolapolakala.

⁵² Liengani niaikkaia ngatoa ghe otillala me oroi ila taumattu ngatoa manga ila laghe matela laghe totula me laghe mene mauuela, ⁵³ me laghe totu vulula liengani niaikkaiaa me vara Iesu ghe totula tale nimate me laghe aotuotula ta oroieili ila taumattu ngatoa tale masaliki taatara atea manga ia.

⁵⁴ Nau lo ateva tau ngai uvii ghe aaitoiaa kateva ai (100) tau ngai uvii me lo atoa laghe toitoi evukala Iesu, laghe tarala rukeruke ateva me isaa akapa voto ghe lutula, laghe matautu etinginala me laghe uela va, “Koronna taumattu ngateva oia Natuna ia God.”

⁵⁵ Oroil va use atoa laghe tiitingina amasau me laghe taatara. Laghe usilaa Iesu eGalilii tani aisausieinia. ⁵⁶ Elome ta ila o va use atoa, Meri aMakdala ia me Meri kinairarue ia Jeimis me Josep§ me kinairarua ateva natuna alua Sebedi.

Kaakaiaane Iesu

(Mak 15:42-47; Luk 23:50-56; Jon 19:38-42)

27:39: Sams 22:7; 109:25. **27:40:** Mat 26:61; Jon 2:19. **27:43:** Sams 22:8. † **27:45:** pai ngelo sinaka Tale inangari nge Grik, ghaonomina (6) ateva aoa. **27:46:** Sams 22:1. ‡ **27:46:** 3 kilok Tale inangari nge Grik, ta aiaaghasiona (9) ateva aoa. **27:48:** Sams 69:21. **27:51:** Eks 26:31-33; Hib 10:19-20. **27:55:** Luk 8:2-3. § **27:56:** Tale inangari nge Grik, Joses.

⁵⁷ Ghe elo alaila me taumattu ngateva, tue peipeiena ia, ararina ateaee Josep me tanganuena tale masaliki taatara ateaee eArimatia, ghe rekatala, ie tee kapuna disaepolo ia Iesu. ⁵⁸ Ghe lao sio ta Paelat me ghe kolomila Iesu etana. Me Paelat ghe uela va la tau lao Iesu etana. ⁵⁹ Josep ghe ghaala Iesu me ghe sumuela tale masi kalio raarangisana. ⁶⁰ Me ghe alokoiela tale unna liengani niaikkaia ngateae, ghe kaie ssola elome tale vallae. Ghe atakirila kinatama atu eteva tani tingina airungaa liengani niaikkaia ngateae, me ghe kasula. ⁶¹ Meri aMakdala ia me mene kateva Meri lalu ghe tokatoka tale kativilau pai nongina liengani niaikkaia ngateae.

Lo atoa laghe aaitoiaa liengani niaikkaia ngateae

⁶² Vara mene kateva nau, nau manga ia, me namu ngatoa ta pristi etoa me Paresi etoa laghe lao sio ta Paelat. ⁶³ Me laghe uela etana va, “Namu ngateva, ami nannaa ia o tau nikamekame ateva nau mauue ia ghe ue va, ‘Vara kotolu nau elange me aue amene totu.’” ⁶⁴ Liuna avalua o me uaulia ngasararakana me la tani ghelei ekorokorongana lienga niaikkaia ngateae lomosi ta kotolu nau elange, poli kapuna disaepolo atoa la rau laa ghainaoa me la laa ue ta taumattu ngatoa va ange totula tale nimate. Lo ateva o nikamekame aue sesaaili tale lo akasina ateva nikamekame.”

⁶⁵ Paelat ghe liula me ghe uela va, “Am ghaala tau ngaitoitoi etoa me am laa ghelei ekorokorongana liengani niaikkaia ngateae nongina vaalua am kilakila.” ⁶⁶ Liuna avalua o me laghe lao sio me laghe ghelei ekorokorongana liengani niaikkaia ngateae me laghe atokala aimatootoongana ateva tale atu eteva va arova teva eghaa velua, aue la kila, me laghe atinginala tau ngaitoitoi etoa tani aitoieinia.

28

Iesu ghe mene totula

(Mak 16:1-8; Luk 24:1-12; Jon 20:1-10)

¹ Nau eteva nau manga ateva ghe ruula, me elue talaua poopooa tale aitiutiu eteva tana nau, Meri aMakdala ia me mene kateva Meri lalu ghe lao sio tani taatara tale liengani niaikkaia ngateae.

² Paka rukeruke ateva ghe lutula nongina lalu ghe tiitingina ta kapuna ensolo ateva Vau palepale ghe sio mae epona liu me ghe atakiri vella atu eteva ghe ghelei runga liengani niaikkaia ngateae me ghe tokala epona tale atu eteva. ³ Mallanga ateva ta vilikina tani nonginaaili ravaravaia ateva me unna aiaasae usousoanaaili nongina karaane ateva. ⁴ Lo atoa laghe aitoiaa liu niaikkaia ngateva laghe matautu saasakiaala, laghe reterete me laghe katu ngalokoi siola tapaa kosa tani nonginaaili matena atoa taumattu laghe asoaso.

⁵ Vara me ensolo ateva ghe uela ta vause atoa va, “Am rau mene matautu. Akilakila va am aloanna tani tara Iesu, ia o ghe matela tale aikotoo. ⁶ Karika ia oia. Ange totula nongina ghe auliaala. Am lange sso tara nongina laghe alokoiela. ⁷ Gharovaeaata ta am kasu me am laa auliaa ta kapuna disaepolo atoa va ange totula tale nimate, me aue am taraia eGalili, ta ange muemue lao sio okae.”

⁸ Vause atoa laghe matautula me laghe pasula tale nimasimasi. Gharovaea ta laghe kasu vulila liengani niaikkaia ngateae me laghe masimasi etinginala tani laa ghauliaa kieira disaepolo atoa. ⁹ Nau eteva laghe laolao, Iesu ghe sousoulala me ghe uela etaira va, “Elue talaua.” Me laghe

mae akalakalaa sio tale liue kkena Iesu me laghe posoposo kkena me laghe kkaueiniela. ¹⁰ Me Iesu ghe uela etaira va, “Am rau mene matautu. Am laa ghaulaa ta tueghi me nengaghi etoa va la lao eGalilii me aue la laa taraieghi okae.”

Inangariira lo atoa laghe toitoi liengani niaikkaia ngateae

¹¹ Nau eteva vause atoa laghe kasukasu elaolao tau ngai uvii etoa laghe aaitoiaa liengani niaikkaia ngateae laghe ssola tale masaliki taatara atea me laghe aulia ngakapaailiila voto ghe lutula ta namu ngatoa ta pristi etoa.

¹² Nau eteva namu ngatoa ta pristi etoa laghe nongola, laghe kolo aitauaala namu ngatoa me laghe aippooa ngaitauaala tani ghelei rigghi salana va la poli tau ngai uvii etoa tale namuu viliki veu, me la nim usilaa nongina vaalua aue ila la ghaulaa. ¹³ Laghe uela ta tau ngai uvii etoa va, “Am ue va, ‘Kapuna disaepolo atoa Iesu la mae sio tani ainao Iesu eleivoo nau eteva ami ghe aseasekanua.’ ¹⁴ Me arova gavana ngateva enongo va am ue va am ghe asekanuela me laghe ainaola Iesu, am rau mene annaa. Aue ami aippooaa teeia me karika aue am ghaa rigghi maamatana etana.” ¹⁵ Tau ngai uvii etoa laghe ghaala viliki veu me laghe auliaala voto laghe uela va la ghaulaa, me ia o kiukiu eteae ghe kasu ekapa seela ta ajiu etoa tale ia o nau eteva.

*Kinatama niuungu eteva Iesu
ghe taue lao sio ta disaepolo atoa*

(Mak 16:14-18; Luk 24:36-49; Jon 20:19-23; Apos 1:6-8)

¹⁶ Vara me kasangaulu me kateva (11) disaepolo laghe lao sio eGalilii me laghe saela tale motouru eteva nongina ghe auliaala etaira va aue la laa taraia etana. ¹⁷ Nau eteva laghe taraiela laghe kkaueiniela, me katoa etaira laghe tam aikkaiaala va laghe tarala Iesu. ¹⁸ Vara me Iesu ghe mae sio etaira, me ghe uela etaira va, “Ngaghele ghaala nimatuutuliena akapa epona liu me tale kosa ateva oia. ¹⁹ Liuna avalua o me am kasu me am mene ghaa rigghi disaepolo tale patunganua akapa atoa me am asuula tale ararina atea Tamaghi me ta Natuna me tale Spirit Manga. ²⁰ Me am apasunga etaira tani nongo usilaa isaa akapaaili voto aghe auliaala etaimim me aue atoka teeiem tale nau ekapa atoa elaa ghaa airuuruu tale kosa ateva.”

Masi kiukiu Mak ghe pitiela Inangari emuemua

Masi kiukiuna Iesu Mak ghe pitiela ekiukiuaa uunguaane Iesu, matem-ateaane me tototuaane tale nimate. Vuku eteva ta Mak tukuna ia ta mene kotolu vuku masi kiukiu etana (Matiu, Luk me Jon), me ghe pitila oroi voto Iesu ghe gheleila tale llo voto ghe aapasunga. Mati, Luk me Jon laghe pitila mene kasina voto oroi Iesu ghe aapasungaala. Mak eauliaa oroi niuungu sarasarakana Iesu ghe gheleila tani ghelei emasina tau sessa atoa, me sungi velu raroai, me tani kkaluaa ssavoto. Mak eaauliaa va sarasarakaniaane Iesu isaa epona ta Satana me Iesu erooroo tani asaangi taumattu.

Masi kiukiu ta Mak, Jon Mak ghe pitila. Ia karika va kateva ta kasangaulu ghalua (12) kapuna disaepolo Iesu. Ia ghe uungu tee Pol me Banabas. Tau ngalomasaanga atoa emua arau laghe uela va ghe kilala oroi kiukiu ta Pita eRom, me isaa oia ghe pitila.

Tani kila amuemua

Inangarina Jon tau ngai aasuu ia 1:1-8

Niasuu me nitootoonga ta Iesu 1:9-13

Iesu eGalilii 1:14–9:50

Iesu ghe lao sio eGalilii me ghe saela eJerusalem 10:1-52

Unna nitootoonga me nimate Iesu tale airuuruu eteva uiki 11:1–15:47

Iesu ghe totula tale nimate 16:1-8

Iesu ghe otuotula ta kapuna disaepolo atoa 16:9-20

Jon tau ngai aasuu ia ghe poppooaa

(Mat 3:1-12; Luk 3:1-9, 15-17; Jon 1:19-28)

¹ Aitiutiu tale masi kiukiuna Iesu Karisto, natuna ia God. ² Isaa oia masi kiukiu nongina propet Aisaea ghe pitila:

“Nongola, aue asuu aikasuaa inangarighi eteva,
ia aue emuemueinio.

Ia aue eaimonomosiaa salam atikirighi.”

³ “Tale voto ateva karika righi taumattu ghe tokatoka etana, kateva lingi ngalo taumattu ekolokolo, eue va,

‘Am aimonomosiaala salane atikirighi Vau palepale. Am ghelei eghulughuluena akapa salane.’”

⁴ Jon, ia o taumattu ngateva uunguaane tani asuu taumattu, eghe lao sio tale voto ateva karika righi taumattu etana, me ghe poppooaa ta taumattu ngatoa va la nna ngaioghioghiaa, me la ghaa niasuu, me God aue ekkaluaa kaluira ssavoto. ⁵ Ila akapa eJiudia, me taumattu ngakapa atoa eJerusalem, laghe lao sio tani nongo Jon. Laghe aaulia ngaotu kaluira ssavoto, me Jon ghe asulala tale ateo atea eJodan. ⁶ Jon ghe aasae ghinnanina laghe gheleila tale uu kamolo, me ghe ai-iriala paisi eteae viliki vulumakao ia. Ghe namanama toto me iruena nge tapaa tuvui. ⁷ Eghe aaulia ngaotu va, “Kateva taumattu aue emae emuli ta ngetaghi, ia sarasarakaniaane elaulau sarasarakaniaaghi. Karika masi taumattu ngieghi va asuuiaa patu kkeghi, me apulaka oasa enaghinaghi unna aikasukasu. ⁸ Aghi aghaasuum tale manu, me ia aue easuum tale Spirit Manga ateva.”

*Jon ghe asuula Iesu**(Mat 3:13-17; Luk 3:21-22)*

⁹ Tale isaa o nau Iesu ghe kasula eNasareti eGalilii, me ghe lao sio, me Jon ghe asuuela eJodan. ¹⁰ Nau eteva Iesu ghe lau sae mae tale paamanu eteva, eghe tarala epona liu ghe otiela, me Spiriti eteva nongina ghila ateva valusu ia ghe sio mae ta ngetana. ¹¹ Epona liu kateva lingi ngalo ghe uela va, “Io natughu io, aghailousiangailio, me masimasiaaghi ta ngetam namungaili.”

*Satana ghe tootoongaala Iesu**(Mat 4:1-11; Luk 4:1-13)*

¹² Katengaata ta Spiriti eteva ghe suula Iesu ghe ssola tale voto ateva karika righe taumattu ta ngetana. ¹³ Iesu ghe tokala ghaatingaulu (40) nau, me Satana ghe mae sio tani tootoongainia. Eghe tokatoka tee ghaata kkena nge tapaa tuvui etoa, me ensolo atoa laghe sio mae tani sausia.

*Iesu ghe tiuaala tani ppooaa masi kiukiu**(Mat 4:12-17; Luk 4:14-15)*

¹⁴ Nau eteva laghe atoka ssola Jon tale ale mata voovoo, Iesu ghe lao sio eGalilii, me ghe tiuaala tani ppooaa masi kiukiuna God. ¹⁵ Eghe ue va, “Nau eteva God ghe aulieiniela ange rekatala, me ararimangalina ateva God ange kalakalanginala. Am nna ngaioghioghiaa, me am aikkaaiaa masi kiukiu.”

*Iesu ghe kolola disaepolo ghaata**(Mat 4:18-22; Luk 5:1-11)*

¹⁶ Iesu ghe kasukasu elaolao tale sama ateo talia ngateae eGalilii, me ghe tarala Saemon me nengana ta Andru. Lalu ghe lukuluku, poli tau ngelamana ilalua. ¹⁷ Iesu ghe uela ta ngetairarua va, “Amalu mae usieghi, me aue agheleiemalua me amalu tau ngai luku taumattu.” ¹⁸ Arovaeaata ta lalu ghe velu elokoila uneirarua uvena me lalu ghe usiela.

¹⁹ Iesu ghe mene kasu tau lao sio, me ghe tarala mene ghalua, Jeimis me nengana ta Jon, natuna ilalua Sebedi. Lalu ghe tokatoka tale olimoirarua paanaka ateva, me lalu ghe aaimonomosiaa uneirarua uvena. ²⁰ Nau Iesu ghe tarailaluela me ghe kololaluela, me lalu ghe tingina vulu saela tamairarua tale paanaka ateva tee tau ngai uungu etoa, me lalu ghe usiela.

*Iesu ghe ghelei emasinala taita ateva raroai eteva etana**(Luk 4:31-37)*

²¹ Laghe lao sio tale masaliki eteae eKapenium. Ta nau manga ateva, Iesu ghe ssola tale ale nivelu eitaua ngateva, me ghe aapasunga inangarina God ta taumattu ngatoa. ²² Nau eteva laghe nongola inangarina, laghe soghiaala, poli karika ghe aippooaa nongina tau ngai aapasunga ngatoa tale inangari nipaopao, ta nongina taumattu ngateva matuutuliena ia.

²³ Elome tale ale nivelu eitaua ngateva, kateva taumattu raroai eteva ghe tokatoka etana. Ghe sama anamungailiila me ghe uela va, ²⁴ “Iesu aNasareti io, umae sio tani ghelei sa ateva etaimami? Vara ughelei saasakieinamami? Akilakilaio, io manga io kapuna io God.” ²⁵ Iesu ghe uela ta raroai eteva va, “Umatua atoka, me ukupi vulue ghoa.” ²⁶ Me raroai eteva ghe soghesogheainiela, me ghe aore anamungailiila, me ghe kupi vulu ghoa mae taumattu ngateva. ²⁷ Taumattu ngatoa laghe soghiaala voto ateva o ghe lutula, me laghe tiuaala tani aippooaa elome ta ngetaira. Laghe ue va, “Sa ateva ange lutula? Taumattu ngateva oia ange auliaala ouna niapasunga,

me nongina taumattu ngateva matuutulienu aippooaane. Nau eaippooa tee, raroai etoa la nongonongoa.”²⁸ Arovaeaataa ili ta kiukiuna voto Iesu ghe gheleila ghe kasu ekapa seela eGalili.

Iesu ghe ghelei emasinala oroi taumattu

(Mat 8:14-17; Luk 4:38-41)

²⁹ Arovaeaata ta Iesu me taumattu ngatoa laghe kupi ghoa mae tale ale nivelu eitaua ngateva, me laghe lao sio tanganue Saemon me Andru, tee Jeimis me Jon. ³⁰ Alumuna vause ateva Saemon ghe iisiki, ghe asoaso tale komo poli vilikina ghe aanasa me matana ghe valavalanga. Vara me laghe auliaala ta Iesu va alumuna Saemon eiisiki. ³¹ Iesu ghe lao sio me ghe kunela nimane atelange, me ghe totu etokaiela. Aanasa ateva ghe kapala, me ia o vause ateva ghe kaisila aneira inana.

³² Ang ghe aaitarraui poli sinaka ateva ang ghe suula, me taumattu ngatoa laghe maeaa sio ta Iesu lo akapa atoa tau sessa ila me tee taumattu raroai etoa laghe tokatoka ta ngetaira. ³³ Taumattu ngakapa atoa tale masaliki eteae laghe velu eitauaala tale paa ngatamana atae tale ale ateva. ³⁴ Iesu ghe ghelei emasinala oroi tau sessa atoa, me ghe tiu vella oroi raroai etoa. Raroai etoa laghe kilakilaia, liuna avalua o me ghe pao rungainilala va karika la mene sama.

Iesu ghe poppooaa

(Luk 4:42-44)

³⁵ Elue talua poopooa Iesu ghe ghue totula, me ghe kasu vulila masaliki eteae, me ghe ssola tale kateva voto karika righi taumattu etana, me ghe tiuaala tani looloo sae. ³⁶ Saemon me kapuna atoa laghe aimulila tani laa paea. ³⁷ Nau laghe taraiela me laghe uela va, “Taumattu ngakapaaili etoa la paepaeo!”

³⁸ Iesu ghe liula me ghe uela va, “Ita lao tale mene kasina masaliki kalakalangina. Aghaloanna tani laa ppooaa tee etaira, poli mausina avalua o me aghe mae sio.” ³⁹ Eghe kasu ekapa seela tale masaliki eGalili me ghe poppooaa tale aleira ale nivelu eitauaa, me ghe tiutiu velu raroai etoa ta taumattu ngatoa.

Iesu ghe ghelei emasinala

tau tasussukuna ateva

(Mat 8:1-4; Luk 5:12-16)

⁴⁰ Kateva taita tau tasussukuna ia ghe mae sio ta Iesu, me namungaili ta ghe kolomila Iesu. Taita ateva oia ghe suuiaala ta liue kkena Iesu, me ghe uela va, “Marova ualoanna, uroo tani ghelei eraarangsanaieghi ta matane God.”

⁴¹ Iesu ghe alousiusi teeiela, me ghe saoa saela nimane atelange etana me ghe uela va, “Aghaloanna. Angu raarangsana!” ⁴² Katengaata ta tasussuku eteva ghe kapala, me taita ateva ghe masinala.

⁴³ Iesu ghe sungiela va ekasu parasi, me eghe aulia ngasarasarakana va, ⁴⁴ “Urau mene auliaa voto elutula etam. Ula me ula ghasarasarakana ta pristi eteva, me ughelei aiaavusuvusuena tani apasunga va vilikim ange raarangsana, nongina Moses ghe auliaala. Me taumattu ngatoa aue la kila va angu raarangsana.” ⁴⁵ Me nau taita ateva ghe kupi ghoala eghe auliaala ta taumattu ngatoa sa ateva ghe lutula etana. Ghe kiukiuaa ngakapa seela tale masaliki ghe lao sio etana. Liuna avalua o me Iesu karika ghe mene laolao tale tummatavanga, ta ghe nim tokatoka tale voto atoa

karika righi taumattu etaira, me taumattu ngatoa tale isaa akapa masaliki laghe mae taatarai.

2

Iesu ghe ghelei emasinala taumattu ngateva karakanna ia (Mat 9:1-8; Luk 5:17-26)

¹ Kasina nau ghe lange sio me Iesu ghe mene lao sio tale masalikina atea eKapenium, me taumattu ngatoa laghe nongola va etokatoka elome tale ale ateva. ² Taumattu ngatoa laghe pasula tale ale ateva, eghe ghoala arau etapaa ngatamana, me Iesu ghe poppooaa inangarina God. ³ Katoa taumattu laghe maeaa sio kateva taita, karakanna ia, ta Iesu. Ghaata etaira laghe saue mae sio. ⁴ Pasueili ale ateva, me karika laghe rooroo tani laooa ngakalakalaa tau sessa ateva ta Iesu. Liuna avalua o me laghe saula tau sessa ateva, me laghe saeainiela tale pungani ngale ateva, Iesu ghe tokatoka elome etana. Laghe ghaa vella kasina aiaakou tale pungani ngale ateva, me laghe tau siola tau sessa ateva tale komona atea elome tale ale ateva. ⁵ Iesu ghe tarala uneira niaikaaiaa va namuu, me ghe uela ta tau sessa ateva va, “Natughu, kalum ssavoto ange kapala.”

⁶ Katoa tani tau ngai aapasunga tale inangari nipaopao laghe tokatoka elome tale ale ateva laghe nongola, me laghe aannaa va, ⁷ “Vaalua me eaippooa ngavalua o? Ange ghaala liuna ateva God! Karika teva eroroo tani kkaluaa ssavoto, ta God nonga!”

⁸ Arovaeaata ta Iesu ghe kilala tale urunguitanina ateva, me ghe uela etaira va, “Vaalua me am nanna ngavalua o elome etaimim? ⁹ Sa ateva voto malumina tani auliaa ta taumattu ngateva karakanna ia? Tani ue va, ‘Kalum ssavoto ange kapala’ o tani ue va, ‘Tingina saela, me usau komom me ukasu’? ¹⁰ Me aghaloanna va am tara kila, va Natuna ateva Taumattu ngateva matuutuliena teeia tani kkaluaa ssavoto tale kosa ateva...” Vara me Iesu ghe taatara lao sio tale taumattu ngateva karakanna ia, me ghe uela va, ¹¹ “Aghaauliaa ta ngetam va tingina saela, me usau komom, me ulao tanganuem.” ¹² Taumattu ngateva ghe tingina saela, me ghe saula komona, me ghe kasula. Ila akapa taumattu ngatoa laghe tarala sa ateva ghe lutula, laghe soghiaala, me laghe tau saela ararina atea God, me laghe uela va, “Emua arau karika ami ghe taatara righi voto avalua oia, karikaaili!”

Iesu ghe kolola Livae (Mat 9:9-13; Luk 5:27-32)

¹³ Iesu ghe kupi ghoala tale ale ateva, me ghe kasukasu elaolao elosamarra tale kinatama ateo talia ngateae. Oroieili taumattu ngatoa laghe mene mae sio tani nongoa nau ghe aapasunga voto. ¹⁴ Eghe kasukasu elaolao me ghe tarala Livae, natuna Alpeas, ghe tokatoka tale natu ngale arighi aighaa takis ia, me Iesu ghe uela etana va, “Mae usieghi.” Ghe tingina saela, me ghe usila Iesu.

¹⁵ Nau Iesu ghe namanama tanganue Livae, oroi ila taumattu ngatoa aighaa takis ila, me tau ssavoto atoa, laghe lao sio tani namanama tee Iesu me kapuna disaepolo atoa, poli oroi ila lo atoa laghe usiusia. ¹⁶ Katoa tana taumattu tau ngai aapasunga ila tale inangari nipaopao, me taumattu tale Paresi ila, laghe tarala Iesu ghe namanama tee tau ngai ghelei ssavoto atoa me tau ngai ghaa takis atoa. Laghe uela ta kapuna disaepolo atoa va, “Vaalua me enamanama tee tau ngai ghaa takis me tau ssavoto atoa?”

¹⁷ Iesu ghe nongola inangariira me ghe uela ta tau ngai aapasunga ngatoa va, “Lo atoa masina ila karika la ghaloanna niaisausi. Tau sessa nonga atoa la laa taatara dokta. Karika aghe sio mae tani kolo ghulughuluena atoa taumattu. Aghe sio mae tani kolo tau ssavoto atoa.”

Inangarina Iesu me gheeleiaaira ajiu etoa karika elaolao aitaaua
(Mat 9:14-17; Luk 5:33-39)

¹⁸ Kateva nau kapuna disaepolo atoa Jon me kapuira tee atoa disaepolo Paresi etoa laghe naenae. Katoa tana taumattu laghe mae sio ta Iesu, me laghe kolomila va, “Vaalua me kapuna disaepolo atoa Jon me kapuira disaepolo tee atoa Paresi etoa la naenae, me kapum atoa disaepolo karika?”

¹⁹ Iesu ghe uela va, “Vaalua kapuna atoa taumattu ngateva ange anna tani lai la ghele nae? Karika la rooroo, nau taita ateva ange aloanna tani lai me etokatoka tee kapuna atoa, karika la naenae. ²⁰ Nau eteva aue emae me la ghaa velu taita ateva, ia o nau eteva aue la nae.

²¹ “Karika teva egghaaghaa tuku ouna ateva kalio, me evabbai teva tuku pokane aiaasae. Marova eghelei me nau eporaia, tuku ouna ateva aue egghauna, me eghelei mara ateva emene namuu. ²² Me karika teva taumattu etottoli kaai ouna uaeni tale pokane ateva aikaai. Marova eghelei evalua o, aue ouna uaeni eghelei polaki aikaai manu eteva, me aue ilalua akapa uaeni eteva me aikaaina ateva aue lalu peisaane. Karika, la kaokao ouna uaeni tale ouna aikaai.”

Vau tale nau manga ateva
(Mat 12:1-8; Luk 6:1-5)

²³ Kateva nau manga, Iesu ghe kasu valaala tale utana atingiu, utani uiti ia. Kapuna disaepolo atoa laghe kasukasu eitaaua teeia, me laghe ghaala kasina tani uiti me laghe namala. ²⁴ Paresi etoa laghe uela ta Iesu va, “Tarala, vaalua me la ghelei voto o, inangari nipaopao eue va karika masina tani ghelei tale nau manga ateva?”

²⁵ Iesu ghe liula inangariira me ghe uela va, “Vaalua, karika am ghe ritila kiukiuna atea Deivit ghe gheleila, nau ia me kapuna atoa laghe maloola? ²⁶ Nau ta Abiata, namuu ia tale pristi etoa, Deivit ghe kupi ssola tale alena ateva God, me ghe namala verete laghe amangala, pristi etoa nonga la rooroo tani nama, me ghe taula kasina ta kapuna atoa.”

²⁷ Iesu ghe mene auliaa tee lao sio va, “God ghe gheleila nau manga ateva mausi taumattu ngatoa, karika God ghe gheleila taumattu ngatoa mausi nau manga ateva. ²⁸ Liuna avalua o me Natuna ateva Taumattu ngateva ia tee Vau ia tale nau manga ateva.”

3

Iesu ghe ghelei emasinala taumattu ngateva tale nau manga ateva
(Mat 12:9-14; Luk 6:6-11)

¹ Iesu ghe mene kupi ssola tale kateva ale nivelu eitaaua, me kateva taita ghe tokatoka, katelange nimane matena ia. ² Katoa tau ngai ssateena Iesu mataira ghe laolao nonga ta Iesu va, Iesu aue eghelei emasinaia tale nau manga ateva, o karika. Laghe anna va marova eghelei emasinaia, aue la laoa Iesu tale niaisakei. ³ Iesu ghe uela ta taita ateva nimane atelange matena ia va, “Tingina saela, me umae toko.”

⁴ Me Iesu ghe kolomilala va, “Vaalua, tale inangari nipaopao, ita rooroo tani ghelei masi niuungu ta nau manga ateva, o tani ghelei sesa niuungu?”

Ita rooroo tani sausi mene kateva taumattu me erooroo tani toka amasina, o ita uvi ematea?" Tau ngai ssateena atoa Iesu karika laghe liu poila inangarina Iesu.

⁵ Iesu ghe aitaraa seela ta taumattu ngatoa me ghe sessaiela. Eghe tarala va karika righi niaielousi tale urunguitaniira, liuna avalua o me karika ghe masinala ta ngetana. Eghe uela ta taita ateva va, "Korosila nimam atelange." Taita ateva ghe korosila nimane atelange, me ghe masinala. ⁶ Nau Paresi etoa laghe tarala voto o ghe lutula, laghe kupi ghoala, me laghe lao sio tani tara kapuna atoa Herot. Laghe ailoeaala salana vaalua la rooroo tani uvi emate Iesu.

Oroieili taumattu ngatoa laghe aimuli teela Iesu

⁷ Iesu me kapuna disaepolo atoa laghe kasu vulila voto ateva o, me laghe lao sio tale ateo talia ngateae eGalilii. Tana taumattu ngatoa laghe aimuli teeiela. Taumattu tale distriki eteva eGalilii, eJudia, ⁸ eJerusalem, distriki eteva eIdumea, me pai kativilau tale ateo atea eJodan, me tale patunganue masau eTaer me Saedon, laghe nongola voto Iesu ghe gheleila, me oroieili taumattu laghe mene mae sio ta Iesu. ⁹ Iesu ghe uela ta kapuna disaepolo atoa va, "Am aimonomosiaala teva paanaka, poli oroieili taumattu ngatoa aue la mae, me aue la ghaisiriki tani mae taraieghi." ¹⁰ Poli ang ghe ghelei emasinala oroieili tau sessa atoa, liuna avalua o me oroi tau sessa atoa laghe aloanna tani mae akalakalaa me tani poso Iesu. ¹¹ Nau ekapa atoa lo atoa raroai etoa laghe tokatoka ta ngetaira laghe taatara Iesu, laghe tuuturru ta liue kkena me laghe samasama atingina me laghe ue va, "Io natuna io God." ¹² Iesu ghe aulia ngakorokorongana ta ngetaira va la rau mene aotu va ia see.

Iesu ghe kolola kasangaulu ghalua apostolo (Mat 10:1-4; Luk 6:12-16)

¹³ Iesu ghe saela tale motouru. Eghe kolola lo atoa ghe aaloannaailiila, me laghe mae sio ta ngetana. ¹⁴ Eghe suiotoongaala kasangaulu ghalua (12) taumattu va ila la toka aitaaua teeia, me ghe aselala va apostolo ila. Aue esungila tani ppooa ngakapa see inangarina ateva God, ¹⁵ me aue etau lao sarasarakana tani suu velu raroai etoa. ¹⁶ Eghe kolola kasangaulu ghalua: Saemon ta kateva, Iesu ghe aseala va Pita etana; ¹⁷ eghe kolo teela Jeimis me Jon, natuna ilalua Sebedi (eghe asela arariirarua aluae ta Boaneges, malloeana va "taumattu nongina palapalanga ateva eaangari"); ¹⁸ eghe kolo teela Andru, Pilip, Batolomiu, Matiu, Tomas, Jeimis natuna ia Alpeas, Tadius, Saemon laghe aseala va Selot ia, ¹⁹ me Jiudas Iskariot, ia auena ghe tau lao Iesu ta nimaira tau ngai ssateena atoa.

Iesu me Belsibul (Mat 12:22-32; Luk 11:14-23; 12:10)

²⁰ Iesu eghe lao sio tale ale ateva eghe tokatoka etana, me poli tana taumattu ngatoa laghe mene mae sio tani velu eitaaua, Iesu me kapuna disaepolo atoa karika righi nauira tani namanama. ²¹ Kapuna atoa Iesu laghe nongola voto eghe poppooa me ghe ghelei, me laghe mae sio tani kune velua, ta laghe ue va, "Ang ghe veevenala."

²² Katoa tau ngai aapasunga tale inangari nipaopao laghe kasula eJerusalem me laghe ue va, "Belsibul ange kupiela. Etiutiu velu raroai etoa tale sarasarakaniaane Belsibul, ia namuu ia tale raroai etoa."

²³ Iesu ghe kolo aitaueinilala me ghe auliaala kateae kiukiu niaimatoonga. Eghe uela va, “Vaalua, Satana erooroo tani sungi velu Satana?” ²⁴ Marova taumattu tale kateva patunganua la tam tingina aitauea, me niaiuvii eteae elutu, karika aue la korokorongana. ²⁵ Marova taumattu tale ale ateva la tam tingina aitauea me niaiuvii elutu, karika aue la korokorongana. ²⁶ Me marova Satana essa tee kapuna atoa aue ghalua ila, me eghalua atoka ila, karika aue la korokorongana. Aue la ruu ekilanga. ²⁷ Karika teva taumattu erooroo tani kupi sso tanganue taumattu ngateva sarasarakana ia me eghaa peina. Marova ealoanna, eiri etoka tau ngalena ateva, me evira ghaa peina. ²⁸ Aghaaulia ngakoronna etaimim va God aue ekkaluaa isaa akapa ssavoto me sesa ngingangari taumattu eaauliaa saasakiaa tee God. ²⁹ Me marova taumattu eaauliaa saasakiaa tale Spirit Manga ateva, God karika aue ekkaluaa isaa oia me auena. Ia oia lo ateva ssavoto aue etoka ta ngetana nau ekapa atoa.” ³⁰ Iesu ghe auliaala poli laghe ue va, “Raroai eteva etokatoka etana.”

*Kinna Iesu me kapuna atoa
(Mat 12:46-50; Luk 8:19-21)*

³¹ Kinna Iesu me nengane taita atoa laghe rekatala, me laghe nim suula inangari va eghoa taraila. ³² Oroieili taumattu ngatoa laghe tokatoka talieinia, me laghe uela ta ngetana va, “Kinam me nengam taita atoa me vause atoa eleka la paepaeo.”

³³ Iesu ghe liula me ghe uela va, “See ia kinaghi me see ila kapughu taita atoa?” ³⁴ Eghe aitaraa seela tale taumattu ghe taatalia ngatokaia, me ghe uela va, “Taumattu oia kinaghi me nengaghi ila! ³⁵ See eaimuli tee nannaane Tamaghi, ia nengaghi taita ia me nengaghi vause ia me kinaghi ia.”

4

*Kiukiu niaimatoonga tale tau ngai pasa
katu ue ngai eteva
(Mat 13:1-9; Luk 8:4-8)*

¹ Kateva nau Iesu ghe mene tiuaala tani apasunga tale sama ateo talia ngateae, me tana taumattu ngatoa laghe mae sio tani mene velu eitauea. Poli oroieili taumattu, Iesu ghe saesaela tale paanaka ateva, me ghe vukala ghoala elamana, me ghe toka siola, me taumattu ngatoa laghe tinginala elosamarra. ² Iesu ghe aapasunga oroieili voto tale kiukiu niaimatoonga. Ghe ue ta ngetaira va, ³ “Am nongola! Tau ngai pasa katu ue ngai eteva ghe lao sio tani pasa aina katu ue ngai. ⁴ Nau eteva ghe kaokaoaala katu ue ngai, kasina ghe katuula tapaa salana, me ghila atoa laghe namala. ⁵ Kasina tana katu ue ngai ghe katuula tale voto ateva sakolo ia, karika oroi kosa, gharovaeaata ta ghe pinosala, poli karika lluse ia. ⁶ Nau eteva sinaka ateva ghe saela, eghe sinaki ematela, poli oane karika ghe sio liula ta euu atu ia. ⁷ Kasina ghe katuula tale voto ateva uasa karasa atoa ta ngetana. Nau laghe pinosala, uasa karasa atoa laghe kavililala, karika laghe kunela. ⁸ Kasina katu ue ngai ghe katuula tale masi kosa. Nau laghe pinosala laghe kuneaala ueneira, kasina ghe kuneaala kotolungaulu (30), kasina ghaonomongaulu (60), me kasina kateva ai (100).” ⁹ Vara me ghe uela va, “Lo ateva talingane manee tani nongo, aue enongo!”

Mausina kiukiu niaimatoonga
(Mat 13:10-17; Luk 8:9-10)

¹⁰ Nau eteva Iesu nonga, me kasangaulu ghalua kapuna disaepolo, me mene katoa tana taumattu laghe tokatoka, me laghe kolomila Iesu tale malloeana kiukiu niaimatoonga. ¹¹ Iesu ghe liula me ghe uela va, “God ang ghe apasungaala etaimim voto eaaisulia tale ararimangalina ateva God, me tale taumattu ngeleka, isaa akapa voto aghaauliaa tale kiukiu niaimatoonga. ¹² Liuna avalua o me inangari tale Uru ngai Manga ateva aue elutu ekoronna, poli,

“ ‘aue la tara me karika aue la tara kila,
aue la nongo me karika aloira aue emasaanga,
la rau aikolikoliaa, me God ekkaluaa kaluira ssavoto.’ ”

Iesu ghe auliaala malloeana kiukiu niaimatoonga atea
(Mat 13:18-23; Luk 8:11-15)

¹³ Vara me Iesu ghe uela va, “Karika aloimim ange masaangaala kiukiu niaimatoonga atea? Vaalua aue aloimim emasaanga mene kasina kiukiu niaimatoonga? ¹⁴ Tau ngai pasa katu ue ngai eteva ghe pasala inangari eteva. ¹⁵ Kasina taumattu nongina katu ue ngai ghe katuula tale salana atikirighi. Nau la nongonongo inangarina ateva God, katengaata ta Satana emae ghaaghaa velu isaa o inangari. ¹⁶ Me katoa tana taumattu nongina katu ue ngai ghe katuula tale voto ateva sakolo ia. La nongonongo me la ghaaghaa me la masimasi. ¹⁷ Me nongina ai erighi ghauna oane karika esiosio liu, la masimasi nau eteva la nongonongo ta aitiutiu, va nau eteva la ghaaghaa maamatana mausi inangarina ateva God, la kaakatuu. ¹⁸ Lo tana katu ue ngai ghe katuula elome tale uasa karasa eaimatoonga taumattu la nongonongo inangarina God, ¹⁹ me nannaaira namungaili tale voto tale kosa ateva, nongina aloannaaira tani ghaa viliki veu me mene kasina voto. Isaa o voto tale kosa ateva ekaakavili ekatuu inangarina ateva God me karika epiipinosa va emene kuneaa righi ueneira. ²⁰ Me llo katu ue ngai ghe katuula tale masi kosa, eaimatoonga taumattu la nongonongo inangarina ateva God me la aiesoaa ta ngetana, me la kuukuneaa masi uene, kasina kotolungaulu, kasina ghaonomongaulu me kasina kateva ai.”

Taumattu ngatoa karika la paapakeaa
lam atea
(Luk 8:16-18)

²¹ Vara me Iesu ghe kolomilala va, “Vaalua! Nau eteva am ghaaghaa lam atea, am aatoka pakeainia tale aikaai eteva me tale aisalo, o am aatokaie sae tale aitiitinginane ateva? ²² Voto ghaine eaaisulia auena eotu tale tummatavanga, me isaa akapa voto taumattu egheelei eisulia, auena eotu. ²³ Lo ateva talingane manee tani nongo, aue enongo!”

²⁴ Iesu ghe mene auliaa tee lao sio va, “Inangari angam nongola, am nnaa parasi. Arova am ghelei emasina tale taumattu, Vau palepale aue emene liu ta ngetaimim, me aue emene saooa sae mene righi. ²⁵ See righi voto etana, aue God emene taula, me lo ateva karika righi voto etana aue eghaa velu righi lutu voto etana.”

Kiukiu niaimatoonga tale katu uiti

²⁶ Iesu ghe mene auliaa tee lao sio va, “Ararimangalina ateva God nongina taumattu ngateva ghe lao sio tani velu katu uiti tale utana atingiu,

²⁷ vara eleivoo taumattu ngateva ghe aseasekanua, me ellaa ghe laa ghelei mene kasina uunguaane, me katu uiti ghe pinosala, me ghe namuula, me taumattu ngateva karika ghe kilala vaalua ghe pinosala me ghe namuula. ²⁸ Kosa ateva nonga ghe apinosala — me emulina laghe kunela. Aitiutiu vulena ateva, vara me aikouna ateva, emulina ghe kuneaala uene. ²⁹ Nau eteva utana atingiu ghe matuennala, taumattu ngateva ghe lao sio tani sai uiti.”

*Kiukiu niaimatoonga tale
katu ue ngai erighi (mastet)*

(Mat 13:31-32; Luk 13:18-19)

³⁰ Iesu ghe mene auliaala va, “Aue ita kolomi va, ‘Ararimangalina ateva God vaalua ia? Vaalua aue ita aimatoongainia?’ ³¹ Ia nongina katu ue ngai erighi la kolokoloa va mastet. Nau eteva la pasapasaia tapaa kosa, ghaunaaili ia. ³² Nau la pasapasaia epiipinosa me enaanamungaili, karika nongina mene kasina katu ue ngai tale utana ateva. Laangina atoa namungaili ila, ghila atoa la rooroo tani laa toka palluu.”

*Iesu ghe aulia ngaotula inangarina
tale kiukiu niaimatoonga*

(Mat 13:34-35)

³³ Nau eteva Iesu ghe aulia ngaotu inangarina tale taumattu ngatoa, ghe auliaa tale kiukiu niaimatoonga ghe rooroo tale nongonongoaaira taumattu ngatoa. ³⁴ Karika ghe aulia ngamasalika teva voto ta ghe auliaa nonga tale kiukiu niaimatoonga. Nau eteva ia nonga me kapuna disaepolo atoa, me ghe auliaala malloeanina isaa o kiukiu niaimatoonga.

*Iesu ghe aippooaala me paka ttasi eteva
ghe kapala*

(Mat 8:23-27; Luk 8:22-25)

³⁵ Elo alai tale ia o nau eteva, Iesu ghe uela ta kapuna disaepolo atoa va, “Ita lao tale pai kativilau tale ateo talia ngateae.” ³⁶ Laghe kasu vulila taumattu ngatoa, me laghe saesaela tale paanaka ateva Iesu ang ghe saesae atokala etana, me laghe tiu ghoala. Mene kasina tana paanaka tee laghe tiu ghoa aitauaa teelala. ³⁷ Vara me paka ttasi eteva ghe tiuaala, me kotoo atoa laghe tiuaala tani sae tale paanaka ateva, me manu eteva ang ghe pasupasu tale paanaka ateva. ³⁸ Iesu ghe aseasekanua emuli tale paanaka ateva, ghe panukanala tale pilo ateva. Vara me laghe anguniela me laghe uela va, “Tisa, ghaisa ngarighi ita vuluu, me koti karika unannaa maamauluaaita va ita rau mate?”

³⁹ Iesu ghe anguula, me ghe paola ttasi eteva, me ghe uela ta kotoo atoa va, “Am matua avukalala!” me ttasi eteva ghe ruula, me luei eteva ghe asola. ⁴⁰ Vara me ghe kolomila kapuna disaepolo atoa va, “Vaalua me am maamatautu? Karika am ghe aikaaiaa?”

⁴¹ Laghe matautu saasakiaala, me laghe toka aikolomieinila va, “Saa taumattu ia taumattu ngateva oia, ta kotoo atoa me kuukuu eteva ngila nongo usilainiela?”

5

*Iesu ghe ghelei emasinala taumattu ngateva raroai etoa etana
(Mat 8:28-34; Luk 8:26-39)*

¹ Iesu me kapuna disaepolo atoa laghe laa rekata sio tale pai kativilau tale ateo talia ngateae, tanganueira aGerasa* ngatoa. ² Nau eteva ghe kkurela tale paanaka ateva, arovaeaata ta kateva taumattu raroai eteva ghe tokatoka etana ghe mae sio tani sou Iesu. Taita ateva oia ghe kupi ghoa mae tale voto ateva liu niaikkaiaa ia. ³ Eghe tokatoka tale isaa o voto, me karika teva taumattu ghe rooroo tani iri etokaia, me karika laghe rooroo tani iri etokaia tee tale sene. ⁴ Oroiaata laghe gheelei runga poi nimana me kekena tale sene, me ghe gheelei epatepate poli sarasarakanaaili ia. Karika teva taumattu ghe rooroo tani poso atokaia. ⁵ Nau ekapaaili tale voo me llaa eghe tokatoka tale voto ateva liu niaikkaiaa ia me tale motouru. Eghe ovaova atingina, me eghe saisai rirrii vilikina tale atu matakeregana.

⁶ Nau eghe tara amasau lao sio Iesu, eghe iloula tani laa sousou Iesu, me ghe suuiaala ta liue kkena Iesu. ⁷ Me namuu ta ghe samala me ghe uela va, “Iesu io natuna io God iaaili epona, sa ateva ualoanna tani gheleia etaghi? Aghaaulia ngakoronna tale ararina atea God va, karika umene ghelei saasakieinieghi.” ⁸ Poli Iesu ang ghe uela etana va, “Raroai eteva, kupi vulu ghoa mae taumattu ngateva.”

⁹ Vara me Iesu ghe kolomiela va, “See ararim atea?”

Me ghe uela va, “Ararighi etea ta Liijen, poli karika va aghi nonga, ta oroi iemami.” ¹⁰ Ghaisaata arau ghe kolomi esarasakanala Iesu va erau mene tiu vella va la kasu vuli ia o voto ateva.

¹¹ Karika masau tale tuku saesaena ateva tinaua mosu etingiu ghe tingina namanama. ¹² Raroai etoa laghe kolomi esarasakanala Iesu va, “Usungi veluemami sae tale mosu etoa, me ami sae kupi etaira.” ¹³ Iesu ghe tau vella raroai etoa laghe kupi vulu ghoa mae taita ateva, me laghe laa sae kupi sso tale mosu etoa. Katengaata ta tinaua atingiu ghe ttiroula, me laghe laa ghoa aoso velu sio tale vallae. Laghe katu velu siola tale ateo talia ngateae, me laghe matela. Tinaua atingiu eghe arropi ematelala ghe roola ghalua airari (2,000).

¹⁴ Lo atoa laghe aaitaraa mosu etoa laghe iloula. Laghe lao sio elo ale me tapaa ngutana, me laghe kiukiuuuala voto ghe lutula ta mene katoa taumattu, me taumattu ngatoa laghe mae sio tani tara voto ghe lutula. ¹⁵ Laghe rekatala ta Iesu me laghe tarala taumattu ngateva emua arau oroieili raroai etoa laghe tokatoka etana. Me ia oia, eghe aaitiitii, me nannaane masina me eghe tokatoka. Laghe taraiela, me laghe matautula. ¹⁶ Taumattu ngatoa laghe tarala voto Iesu ghe gheleila, me laghe kiukiuuuala taita ateva raroai etoa etana me Iesu ghe ghelei emasinaiela me voto ghe lutula tale tinaua mosu etingiu. ¹⁷ Nau eteva laghe nongola kiukiu, ila akapa laghe aulia ngasarasakanala ta Iesu va karika emene toka tale masalikiira atea, ta elao ppae tale kasina masaliki.

¹⁸ Nau Iesu ang ghe saesae tale paanaka ateva, taita ateva Iesu ghe tiu vella raroai etoa etana ghe kolomi esarasakanala Iesu va, “Aghaloanna tani usio.” ¹⁹ Iesu karika ghe annala. Ghe uela etana va, “Lao sio tanganuem me ta kapum atoa. Ulaa ghaulaa voto Vau eteva ghe gheleila tani sausio, me alousiusiaane etam.” ²⁰ Taita ateva ghe lao sio tanganuena, me ghe tiuaala tani auliaa inangari me voto Iesu ghe gheleila etana tale Kasangauluae Masaliki Taatara. Taumattu ngakapa atoa laghe nongola, me laghe soghiaala isaa o voto.

* **5:1:** aGerasa Kasina uru ngai laghe pitila, laghe uela va, aGadara, me kasina laghe uela va, aGergesa. **5:7:** Mak 1:24.

*Iesu ghe ghelei emasinala aliki vause arighi me vause namu ngateva
(Mat 9:18-26; Luk 8:40-56)*

²¹ Nau Iesu ghe mene lao sio tale pai kativilau tale ateo talia ngateae, oroi taumattu ngatoa laghe mene aimuli teeiela, nau ghe tokatoka elosamarra.

²² Kateva namuu tale ale nivelu eitaua ngateva, ararina atea ta Jaeras, ghe mae sio me ghe suuiaala ta liue kkena Iesu, ²³ me ghe kolomi esarasakanala Iesu va, “Natughu vause arighi gharighi tau emate. Aghaloannaaili va umae saooa nimam etana, me aue emasina me emene toka.” ²⁴ Me Iesu ghe usiela.

Oroieili taumattu ngatoa laghe usiusi Iesu, me laghe tomtomua. ²⁵ Kateva vause ie tee elome tale taumattu o, rae ateva eghe iiloueinia ghe roola kasangaulu ghaluae (12) ninamanama. ²⁶ Nau etoa ghe laa taatara dokta ngatoa. Laghe tootoonga tani sausia, me karika, ta laghe nim tautau lao oroi mmarikana. Unna viliki veu ghe nim kapakapa tani pae niaisausi, me karika ghe maamasina, me ang ghe nim sessaaili. ²⁷ Nau eghe nongola kiukiuna Iesu, eghe mae sio tani paea, me ie tee eghe tiitingina elome tale taumattu ngatoa pasueili ila me laghe tomtom Iesu. Eghe lao akalakangina sio emuli ta Iesu, me ghe posola unna aiaasae ngeleka ateva Iesu, ²⁸ poli eghe annaala va, “Marova anim poso unna aiaasae ngeleka ateva, aue amasina.” ²⁹ Katengaata ta rae ateva ghe iiloueinia ghe ruula, me ghe ateateaala va ghe masinala.

³⁰ Katengaata ta Iesu ghe ateateaala va kasina tani sarasarakaniaane tani ghelei emasina taumattu ghe kasula etana. Liuna avalua o me ghe kiriela me ghe uela va, “See eposola uneghi aiaasae ngeleka ateva?”

³¹ Kapuna disaepolo atoa laghe uela va, “Karika utaatara tana taumattu ngatoa la tomtomuo? Vaalua me ukookolomi va see eposola unem aiaasae ngeleka ateva?”

³² Iesu ghe kiriela me ghe aaitaraa see va see ghe posoala. ³³ Me vause ateva ghe kilala voto ghe lutula etana, me ang ghe maamatautu, me ang ghe reterete. Eghe mae sio me ghe suuiaala ta liue kkena Iesu, me ghe aulia ngakapala voto ghe lutula etana. ³⁴ Iesu ghe uela etana va, “Natughu, tale unem niaikaaiiaa etaghi angu masinala. Kasula, me urau mene annaa poli anem isiki eteva ange kapala.”

³⁵ Iesu ghe aippooaa nonga me taumattu ngatoa, kapuna ila namu ngateva tale ale nivelu eitaua ngateva, laghe rekatala. Laghe auliaala ta Jaeras va, “Natum ange matela. Vaalua me uanna tani ghelei Tisa va eainongieinia tani lao tanganuem?”

³⁶ Iesu karika ghe nongo usilaala. Eghe uela ta namu ngateva va, “Urau mene matautu. Uaikaaiiaa nonga.”

³⁷ Pita, Jeimis me Jon, nengana Jeimis, ilotolu nonga lotolu ghe lao aitaaua teei sio tanganue Jaeras, me eghe uela ta mene katoa taumattu va la rau mene usia. ³⁸ Laghe laa rekata sio tanganue namu ngateva, me Iesu ghe nongola niaingalaaii eteae, me ghe tarala taumattu ngatoa laghe ngangngala anamungaili. ³⁹ Eghe kupi ssola me ghe uela etaira va, “Vaalua me am ghelei niaingalaaii eteae, me am ngangngala atingina? Aliki eteva oia karika va ematela. Enim asesekanua.” ⁴⁰ Laghe rrila me laghe kangaala Iesu.

Eghe rrila me ghe sungi velu ekapaila ghoala eleka, me ghe kolola nonga kinna me tamane vause arighi me kapuna disaepolo kotolu, me laghe kupi ssola tale rum atiulu aliki eteva eghe asoaso etana. ⁴¹ Eghe kune siola

nimane aliki eteva me ghe uela va, “*Talita kum!*” (malloeana va, “Aliki vause arighi, aghauliaa etam va totula!”) ⁴² Katengaata ta aliki vause arighi ghe totu saela, me ghe kasukasula. Nau laghe tarala voto o ghe lutula, laghe soghiaala. Aliki vause arighi oia anna ninamanama kasangaulu ghaluae (12). ⁴³ Iesu ghe aulia ngasarasarakana etaira va karika la mene laa auliaa see voto o ghe lutula. Eghe uela va la tau lao righi inana, me aliki vause arighi enama.

6

ANasareti etoa laghe liula viliira ta Iesu (*Mat 13:53-58; Luk 4:16-30*)

¹ Iesu ghe kasu vulila masaliki eteae o, me ghe lao sio tale masalikina tuunga atea. Kapuna disaepolo atoa laghe aimuli teeila. ² Vara nau manga ateva, me ghe tiuaala tani apasunga voto tale taumattu ngatoa tale ale nivelu eitaua ngateva. Oroieili taumattu laghe nongola inangari, me laghe mene ounala tani nongo, me laghe uela va, “Ia oia taumattu ngateva, eaa ghe ghaala inangari oia? Vaalua ghe ghaala ase alomasaanga ateva oia? Me vaalua me eghelei tee mirikolo sarasarakanaaili?” ³ Nim tau ngai atulu ale ia, nenge? Natuna ia Meri tue me nenga ila me Jeimis, Josep,* Jiuda me Saemon. Kapuna vause atoa la tokatoka teeita.” Laghe aulia ngavalua o poli ghe sessaila etana.

⁴ Iesu ghe uela etaira va, “Propete ateva ararina atea tale isaa akapa masaliki. Me tale masalikina tuunga atea, me elome tale mangalina atoa, me tale alena tuunga ateva, karika teae ararina.” ⁵ Karika ghe rooro tani ghelei righi mirikolo okae. Eghe nim saoaala nimane tale taumattu karika oroi, me ghe ghelei emasinailala. ⁶ Eghe soghiaala uneira niaikaiaa ta ngetana karika namuu.

Iesu ghe tau lao sio niuungu ta 12 disaepolo (*Mat 10:1, 5-15; Luk 9:1-6*)

Me ghe lao ppae sio tale kasina masaliki tani apasunga. ⁷ Me ghe kolo aitauaala kasangaulu ghalua (12) disaepolo, me ghe sungilala ghalua ghalua. Ghe tau lao sio matuutuliena tani tiu velu raroai ta taumattu ngatoa.

⁸ Me ghe uela etaira va, “Am ghaa aikkatuluimim me am rau mene ghaa mene righi voto. Am rau mene ghaa righi inana, aikakkaai me righi viliki veu tale aikaai viliki veu. ⁹ Am asae aikasukasu, me karika am mene ghaa ghalua aiaasae. ¹⁰ Arova am rekata tale kateae masaliki, me am toka tale lo ateva ale, am toka o, lomosina ta am kasu vuli lo atea o masaliki. ¹¹ Me arova teae masaliki etam ghaaiem, me karika la ghaloanna tani nongo inangariimim, am kasu. Me nau eteva ngam aloanna tani kasu, am rariaa velu au kosa ta kekeimim, me aue la kila va voto la ghelei karika masina.”

¹² Disaepolo atoa laghe kasula tani ppooaa tale taumattu ngatoa va la nna ngaioghioghiaa. ¹³ Laghe tiutiu velu raroai, me laghe raarariaa oeli tale tau sessa atoa, me laghe ghelei emasinaila.

Herot ghe nongola kiukiuna Iesu (*Mat 14:1-12; Luk 9:7-9*)

¹⁴ King Herot ghe nongola kiukiu tale isaa o niuungu poli taumattu ngakapa atoa laghe kiukiuaa see Iesu, me katoa laghe uela va, “Jon tau ngai

6:2: Jon 7:15. * **6:3:** Josep Tale inangari nge Grik, Joses. **6:4:** Jon 4:44. **6:8:** Luk 10:4-11. **6:11:** Apos 13:51. **6:13:** Jms 5:14. **6:14:** Mat 16:14; Mak 8:28; Luk 9:19-20.

aasuu eteva ange totula tale nimate, liuna avalua o me sarasarakana ia tani ghelei mirikolo.”

¹⁵ Me katoa taumattu laghe ue va, “Ia Elaija.”

Mene katoa laghe ue va, “Ia propete ia, nongina mene katoa propete emua arau.”

¹⁶ Nau Herot ghe nongola ghe uela va, “Jon, ia o aghe sai pulela alona atiulu, ange mene sakesakela!”

Matemateane Jon tau ngai aasuu eteva

¹⁷ Ia Herot ghe suula inangari me laghe poso atokala Jon. Laghe iriela me laghe atokaiela tale ale mata voovoo mausi Herodias, vausenna ateva tuena ta Pilip, ghe mene lai sariela. ¹⁸ Poli Jon ghe uela ta Herot va, “Inangari nipaopao ateva eue va karika masina ta ughe mene lai sarila vausenna ateva tuem.” ¹⁹ Herodias ghe sessaieiliela ta Jon, me ghe aloannaailiila tani uvi ematea, me karika ghe rooroo. ²⁰ Herot ghe kaakaarasi tani aitaraa Jon, poli ghe maamatautangailiia ta ghe kilakila va Jon ghulughuluena ia me manga ia. Nau ghe nongonongo ta ghe aippooaa, ghe nannangaili me nannaane ghe maamaate,† me ghe aloannaaili tani nongo.

²¹ Masi nau eteva ghe rekatala ta Herodias nau Herot ghe gheleila kinatama ninamanama atea tani nnaa nau eteva Herot ghe lutula etana. Ghe gheleila ninamanama atea ta namu ngatoa la uungu ta gavman, namuu ta soldia ngatoa, me namu nge Galilii etoa. ²² Laghe toka namanama, me natuna aliki vause ateva Herodias ghe kupi ssola tani ssiuaa. Herot me lo atoa laghe namanama laghe masimasiangailiila nissiiua ngatea.

Herot ghe uela ta aliki vause ateva o va, “Sa ateva voto arova ukolomia etaghi, aue atau aatu.” ²³ Herot ghe auliaala inangari nialokoi va, “Sa ateva voto arova ukolomi aue atau aatu. Arova uue va atau aatu kativilau tale peighi, aue atau aatu.”

²⁴ Aliko vause ateva ghe kupi ghoala, me ghe lao sio tani kolomi kinna va, “Sa ateva voto asso kolomi king etana?”

Kinna ghe uela va, “Uso ue va, ‘Aghaloanna uruna ateva Jon tau ngai aasuu eteva.’ ”

²⁵ Arovaeaata ta aliki vause ateva ghe kiri ssola ta king me ghe uela va, “Ghaine arau aghaloanna uruna ateva Jon tau ngai aasuu ia tale tivilau terei.”

²⁶ King ghe nongola me ghe alousiusieiliila. Me poli ang ghe gheleila inangari nialokoi, me karika ghe aloanna tani palata ta mata namu ngatoa, karika ghe roola tani nongo vulu inangarina natuna Herodias. ²⁷ King karika ghe aitoila. Ghe suula soldia ngateva tani laa ghaa uruna ateva Jon. Soldia ngateva ghe lao sio tale ale mata voovoo me ghe sai pulela alona atiulu Jon. ²⁸ Ghe sau mae sio uruna ateva Jon tale terei etivilau me ghe taue lao sio ta aliki vause ateva. Me aliki vause ateva ghe laoainie sio ta kinna. ²⁹ Kapuna disaepolo atoa Jon laghe nongola isaa o voto Herot ghe gheleila ta Jon. Laghe lao sio tani ghaa vaulanna ateva Jon, me laghe lao sio tani kaieinia.

Iesu ghe anginila 5,000 taumattu

(Mat 14:13-21; Luk 9:10-17; Jon 6:1-14)

³⁰ Apostolo atoa laghe oghi mae sio, me laghe toka teela Iesu. Laghe kiukuaala voto laghe gheleila me inangari laghe auliaala ta taumattu ngatoa.

³¹ Iesu me kapuna apostolo atoa karika righi naira tani namanama, poli

6:18: Lev 18:16. † **6:20:** ghe nannangaili me nannaane ghe maamaate Kasina uru ngai laghe pitila, laghe uela va, ghe ghelei oroi voto. **6:30:** Luk 10:17.

oroieili taumattu ngatoa laghe mae taatara Iesu me laghe mene kasukasu. Liuna avalua o me Iesu ghe uela etaira va, “Ita lao ta pai kativilau karika righi taumattu etana, me am laa ghainoana.”

³² Ila nonga laghe kasula tale olimoira paanaka ateva tani lao tale vaara. ³³ Taumattu ngatoa laghe tarailala ta laghe tiu ghoala, me laghe kilailala. Me oroi taumattu tale kateae kateae masaliki laghe kilala voto ateva laghe laolao etana, me laghe kasu emuemuela tani lao. ³⁴ Nau Iesu ghe ssola elae, ghe tarala oroieili taumattu ngatoa. Ghe alousiisi teeilala, poli ila nongina sipsipi etoa karika teva aitoiira, me ghe tiuaala tani apasunga oroi voto etaira.

³⁵ Nau sinaka ateva ang ghe suusuu, kapuna disaepolo atoa laghe lao sio ta ngetana, me laghe uela va, “Ange voovoo, me voto ateva oia nim vaara ia. ³⁶ Sungi vellala me la lao tale righi masaliki kalakalangina, me la laa poli righi inana me la nama.”

³⁷ Iesu ghe liula me ghe uela va, “Am taula righi inana, me la nama.” Laghe uela va, “Ualoanna va ami laa poliaa velu ghalua ai silva koen[†] tani poli inana tani anginila?”

³⁸ Iesu ghe uela etaira va, “Ghaisa verete? Am laa tara.”

Nau laghe lao sio, laghe tarala verete ghalima me tee kko alua.

³⁹ Iesu ghe uela ta taumattu ngakapa atoa va, “Am laa toka sio tale rarrasa, me am toka tale uela.” ⁴⁰ Laghe tokala katoa kateva ai (100), me katoa ghalimangaulu (50). ⁴¹ Emulina Iesu ghe ghaala verete ghalima me kko alua, me ghe taatara saela epona liu me ghe kaili emasina saela, me ghe pirila, me ghe tiuaala tani taula ta kapuna disaepolo atoa va la taula. Me ghe koita teela kko alua. ⁴² Ila akapa ghe ssoilala nau laghe namanamala. ⁴³ Emulina kapuna disaepolo atoa laghe kaai esokosokoiaala tapiri verete me tapiri kko. Laghe kaaila laka erooroo kasangaulu ghaluae (12). ⁴⁴ Taita atoa laghe namala verete ghe roola ghalima airari (5,000).

*Iesu ghe kasula epona tale paamanu
(Mat 14:22-33; Jon 6:15-21)*

⁴⁵ Arovaeaata ta Iesu ghe auliaala va kapuna disaepolo atoa laghe aikaaila tale paanaka ateva, me la muemue lao eBetsaida ta pai kativilau, me ia etoka me esungi velu mua taumattu ngatoa. ⁴⁶ Vara ghe suu vella taumattu ngatoa, me ghe saela tale motouru tani looloo sae.

⁴⁷ Nau ang ghe voola, paanaka ateva ang ghe rekatala elome tale ateo talia ngateae, me Iesu nonga elae. ⁴⁸ Ghe taatara va disaepolo atoa laghe oseose poi, me kuukuu eteva ghe aaoghila. Auena ghe pai, me Iesu ang ghe soosokotila. Ghe kasukasu epona tale paamanu eteva, me ang ghe anna tani laula. ⁴⁹ Nau disaepolo atoa laghe tarala Iesu ghe kasukasu epona tale paamanu eteva, laghe annaa va raroaina ia teva taumattu, me angeila ghe aapiia, ⁵⁰ poli ila akapa laghe taraiela me laghe matautueiliila.

Arovaeaata ta Iesu ghe sama teeilala, me ghe uela va, “Am rau mene annaa, ta aghi oia. Am rau mene matautu.” ⁵¹ Me ghe aikaai teeilala, me kuukuu eteva ghe kapala, me disaepolo atoa laghe soghiaa saasakiaala ia o voto ateva ghe lutula. ⁵² Ta poli nannaaira karika marekate tani annaa me tani kila amasina malloeana verete.

*Iesu ghe ghelei emasinala oroi tau sessa eGenesaret
(Mat 14:34-36)*

6:34: Nam 27:17; Mat 9:36. **6:35:** Mak 8:1-9. [†] **6:37:** silva koen Silva koen ativilau (denarius) erooroo aipolina kateva nau. **6:46:** Luk 5:16. **6:49:** Luk 24:37. **6:51:** Mak 4:39.

⁵³ Iesu me kapuna disaepolo atoa laghe ose longotila me laghe kautuula tale distriki eteva eGenesaret, me laghe rekati evukalala olimoira paanaka ateva. ⁵⁴ Nau eteva laghe kkurela tale olimoira paanaka ateva, taumattu ngatoa laghe tara kilala Iesu, ⁵⁵ me laghe ilou ekapa seela eGenesaret tani laa ghauliaa ta mene katoa va Iesu ange rekataala. Me tau sessa atoa, laghe sausau teeila me komoira tani laoinila kona laghe nongonongo nongina eaa Iesu ghe tokatoka. ⁵⁶ Nau Iesu ghe laolao tale masaliki pisike me namuu masaliki me tale voto karika oroi masaliki etana, tau sessa atoa laghe aalokoila tale maketi, me laghe kookolomi esarasarakana Iesu, va eroroo va la poso sama ghinnanina, me lo atoa laghe posoposo laghe maamasina.

7

Voto tuvuir a toa laghe apasungaala (Mat 15:1-20)

¹ Paresi etoa me katoa tana tau ngai aapasunga tale inangari nipaopao, laghe kasula eJerusalem, laghe lao sio me laghe tomia Iesu. ² Laghe tarala va katoa tana disaepolo kapuna ila Iesu, karika laghe porala nimaira, me laghe tam uusilaa salana tani ghelei me la raarangisana. ³ (Poli Paresi etoa me ila akapa ajiu etoa laghe aimulisi tee voto tuvuir a toa laghe apasungaala, laghe tam rooroo tani namanama arova la tam pora amasina nimaira. ⁴ Inana laghe polipoli tale maketi, karika la rooroo tani nama, ta laghe vira porapora me laghe namanama. Laghe aaimuli tee mene kasina ase salana nongina vaalua tani pora airopi manu, me aiaku manu, me aituu inana.*)

⁵ Paresi etoa me tau ngai aapasunga tale inangari nipaopao laghe kolomila Iesu va, “Vaalua me kapum disaepolo atoa la tam aimuli usi tee voto tuvuir a toa laghe apasungaala etaita va ita ghelei, me la nim namanama me karika la porapora nimaira?”

⁶ Iesu ghe liula etaira me ghe uela va, “Koronnaaili voto Aisaea ghe auliaala nau ghe aulia ngamuemua alokoila gheleiaaimim, am usimaghalua am. Nongina Uru ngai Manga ateva eaauliaa, eue va, “Isaa oia taumattu la nim oneoneainaghi ta paaira me urunguitaniira masaeili etaghi.

⁷ Karika righi malloeana, uneira nikkauaa poli la ghasunga llo nim kaluira taumattu ngatoa nonginaaili va kanna God.’”

⁸ Iesu ghe uela etaira va, “Am tam aaimuli tee inangari nipaopao kanna God, ta am nongonongo uusilaa voto taumattu ngatoa laghe nim apasungala.

⁹ “Muennaaili iem tani rati inangari nipaopao kanna God, me am anna tani aimuli usi tee voto am, am gheeghelei. ¹⁰ Moses ghe uela va, ‘Am oneoneaa kinaimim me tamaimim,’ me ‘Lo ateva ekaakasikiena tamana o kinna aue la uvi ematea.’ ¹¹ Me am, am ue va taumattu ngateva eroroo tani aulia ngavalua toko ta kinna me tamana va, ‘Peighi tani sausiemalua ngagheleila inangari nialokoi tani taula ta God.’ ¹² Arova ange aulia ngavaluela o, am gheeghelei rungainia va erau mene sausi tamana me kinna. ¹³ Tale isaa o salana, am ghelei inangarina God enim peepeisaane, ta am aaimulisi tee aauliaaira tuvuumim atoa. Oroieili mene kasina asease voto am ghelei.”

Sa ateva etani ghelei taumattu ngateva me karika eraarangisana

^{7:2:} Luk 11:38. ^{7:4:} Mat 23:25. * ^{7:4:} Kasina uru ngai laghe pitila, laghe mene uela va, me tevoo. ^{7:6:} Ais 29:13. ^{7:10:} Eks 20:12; 21:17; Diut 5:16.

¹⁴ Iesu ghe mene kolo aitauaala taumattu ngatoa me ghe uela etaira va, “Am nongoaghi, me aloimim emasaanga. ¹⁵⁻¹⁶ Karika va voto ekasukasu eleka me esosso tale taumattu ngateva va egheeleia etam raarangisana. Saa llo ekupikupi ghoa, isaa o voto egheelei taumattu ngateva etam raarangisana.”†

¹⁷ Nau ghe kasu vulila taumattu ngatoa me ghe lao sio elo ale, me kapuna disaepolo atoa laghe lao sio tani kolomia tale isaa o kiukiu niaimatoonga. ¹⁸ Iesu ghe uela etaira va, “Am tee karika am kilakila sa ateva aghaaulieinia? Karika righi voto ekasukasu eleka me esosso tale taumattu ngateva egheeleia va etam raarangisana. ¹⁹ Poli voto o, karika esosso tale urunguitanina ateva ta esiosio ta kovane, me elaa kupikupi velu ghoa nau eteva elaa tiutiu.” (Tale isaa o inangari, Iesu ghe uela va isaa akapa inana raarangisana.)

²⁰ Me ghe mene uela va, “Saa llo voto ekupikupi ghoa tale taumattu ngateva, isaa o voto egheeleia etam raarangisana. ²¹ Elome tale urunguitani taumattu, voto sesa ekasukasu etana. Tani nnaa saasakiaa, me niailai salosalooa see, me tani ainao, me tani aiuvi emate, ²² tani lai sari kateva manna ateva, me tani ssaii, me mene kasina tani voto sesa. Me tani kamekame, me ninanna ngakorokorongana tani ghelei ssavoto marova ghaata kkena atoa, me tani kiiuaa kateva, me tani auliaa saasakiaa tee kateva, me tani tau sae ninannaa, me tani ghelei voto arova alo kapakapa ateva. ²³ Isaa o voto ekasukasu elome tale taumattu ngateva, liuna avalua o me egheeleia etam raarangisana.”

Vauseni nge Poenisia ngateva unna niaikaaiiaa
(Mat 15:21-28)

²⁴ Iesu ghe kasu vulila masaliki eteae me ghe lao sio tale kateae masaliki kalakalangina ia eTaer,† me ghe ssola elome tale kateva ale, me karika eghe aloanna va teva eghe kilaia, me karika ghe roola tani aisulia. ²⁵ Arovaeaata ta vause ateva, natuna ateva raroai eteva ghe tokatoka etana, ghe nongola va Iesu ange rekatala, me eghe ailuilui lao sio me ghe suuiaala ta liue kkena Iesu. ²⁶ Vause ateva karika ajiu ia, me ghe lutula ePoenisia elome tale patunganua ateva eSiria, ghe kookolomi esarasarakana Iesu tani tiu velu raroai eteva ta natuna aliki vause ateva.

²⁷ Iesu ghe uela etana va, “Ami tau ekasina lao inana ta aliki etoa, karika masina tani tau lao aneira inana aliki etoa ta paua atoa.”§

²⁸ Vause ateva ghe liula, me ghe uela va, “Koronna, vau eteva. Me paua atoa tee la namanama aneira vorovoro nginana aliki etoa tale pake tevo.”

²⁹ Me Iesu ghe uela etana va, “Ta poli angu aulia ngavaluela o, lao sio tanguem me ulaa tara natum, ta raroai eteva ange kasu vuliela.”

³⁰ Vause ateva ghe lao sio tanguena, me ghe tara alokoila natuna tale komona atiulu, me raroai eteva ang ghe kasu vuliela.

Iesu ghe otila talingana taumattu ngateva me samasamaane ghe masinala

³¹ Iesu ghe kasu vulila masaliki taatara atea eTaer me ghe saela eSaedon, me ghe kasu tee lao sio tale Kasangauluae Masaliki Taatara. Emulina ghe lao sio tale ateo talia ngateae eGalilii. ³² Taumattu ngatoa laghe maeaa sio

7:15-16: Apos 10:14-15. † **7:15-16:** Kasina uru ngai laghe pitila, laghe uela va, 16 Lo ateva talingane manee tani nongo, aue enongo! † **7:24:** Kasina uru ngai laghe pitila, laghe mene uela va, me eSaedon. § **7:27:** paua atoa Ajiu etoa laghe anna va ila muennaaili ila ta lo atoa karika va ajiu ila, me laghe kololala va ueili paua ila. Iesu ghe aaimulisi tee auliaaira. Nau ghe auliaa, karika va ghe sessaia. Ghe nim anna tani tootoonga aikaaiaane vause ateva, karika va tani ghelei saasakiaa nannaane.

tau sessa ateva ta Iesu, talingana volovolongina me tee paavoo ia, me laghe kolomila Iesu tani saooa nimana atelange tale taumattu ngateva.

³³ Iesu ghe kolola taumattu ngateva elome ta taumattu ngatoa, me lalu ghe kasu vulilala, me Iesu ghe siki laala vuuvuu nimana alua ta talingane aluelange. Iesu ghe mene kanusuila vuuvuu nimana alua me ghe posola ramuramuti paana ateva. ³⁴ Iesu ghe taatara saela epona liu, me ghe ainoana anamuula, me ghe uela ta taumattu ngateva va, “*Eppata!*” (malloeana va “Talingana eoti!”). ³⁵ Katengaata ta talingana taumattu ngateva ghe otila, me ghe sama amasinala.

³⁶ Iesu ghe paopao poila va, “Am rau mene kkai laa see,” me karika, ta laghe kakkai laa see. ³⁷ Taumattu ngatoa laghe soghia ngatinginala mirikolo ateva, me laghe uela va, “Ia oia taumattu ngateva, voto akapa egheelei, masinaaali. Ia nonga ghe gheleila taumattu talingana volovolongina laghe nongonongola me paavoo atoa laghe samala.”

8

Iesu ghe anginila 4,000 taumattu (Mat 15:32-39)

¹ Isaa o nau oroiannaaili taumattu ghe velu eitauaala, me karika righi inana tani nama. Me Iesu ghe kolola kapuna disaepolo atoa me ghe uela etaira va, ² “Aloghu eusiusi taumattu oia, poli ngeila ghe toka teeieghila kotolu nau, me karika righi aneira inana tani nama. ³ Arova maloona ila me asungila va la lao tanganueira, aue la taataruu elaolao ta poli katoa laghe kasu emasaeiliila.”

⁴ Me kapuna disaepolo atoa laghe liula me laghe uela va, “Voto ateva oia karika righi taumattu etana. Eaa aue ita laa ghaa verete me ita angini isaa oia taumattu?”

⁵ Iesu ghe kolomilala va, “Ghaisa verete am uunusi?”

Me laghe uela va, “Ghaitu (7).”

⁶ Me ghe uela ta taumattu ngatoa va la toka sio tapaa kosa. Me ghe ghaala verete ghaitu me ghe kaili emasina saela, me ghe pirila, me ghe tau lao sio ta kapuna disaepolo atoa va la laa ghaikoita, me laghe lao sio tani aikoita.

⁷ Me aneira lutu pisi tee paapakala karika oroi, ghe arangisela me ghe uela ta kapuna disaepolo atoa va la laa ghaikoita. ⁸ Taumattu ngatoa laghe namanamala me ghe ssoilala, me laghe kaaila ghaituae laka tale llo tapiri nginana laghe nama vulula. ⁹ Ghe roola ghaata airari (4,000) taumattu. Me ghe sungi vellala, ¹⁰ me katengaata ta ia me kapuna disaepolo atoa laghe aikaaila tale paanaka ateva, me laghe lao sio tale distriki eteva eDalmanuta.

Parsi etoa laghe aloannala tani tara teva niaimatootoonga (Mat 16:1-4)

¹¹ Parsi etoa laghe lao sio ta Iesu, me laghe kolomiela va eapasunga teva niaimatootoongana ngepona liu. Laghe aauliaa llo tani nim tootoongainia.

¹² Iesu ghe ateateaala maamatana me ghe uela va, “Vaalua me taumattu ghaine atoa am aloanna tani tara niaimatootoongana? Aghaaulia ngakoronna etaimim va karika aue am tara poi teva.” ¹³ Ghe kasu vulilala me ghe mene ghoala tale olimoira paanaka ateva, tani lao ta pai kativilau tale ateo talia ngateae.

Uneira isti Parsi etoa me Herot (Mat 16:5-12)

¹⁴ Disaepolo atoa laghe aikkaluaala me karika laghe saula verete. Kateva nonga ia lo ateva ghe kaakaaia tale paanaka ateva. ¹⁵ Iesu ghe aulia ngasarasarakana etaira va, “Am aikinikinitaa! Me am taatara amasina tale uneira isti Paresi etoa me Herot.”

¹⁶ Laghe tiuaala tani aippooaa elome etaira va, “Koti eaauliaa llo oia ta karika ita ghaala righi verete.”

¹⁷ Iesu ghe kilala sa ateva laghe aulieinia, me ghe kolomilala va, “Vaalua me am aauliaa va karika righi verete? Karika am ghe kila? Nannaaimim karika ghe oti? ¹⁸ Mataimim karika etaatara? Talingaimim karika enongongo? Karika am nannaa? ¹⁹ Nau eteva aghe pirila ghalima (5) verete tale ghalima airari (5,000) taumattu, ghaisae laka tapiri verete am ghe kaaila?”

“Kasangaulu ghalua (12),” laghe liula.

²⁰ Me ghe mene uela va, “Me nau eteva aghe pirila ghaitu (7) verete tale ghaata airari (4,000) taumattu, ghaisae laka am ghe kaaila tapiri verete etana?”

“Ghaitu,” laghe liula.

²¹ Me ghe kolomilala va, “Karika am ghe kila poi?”

Iesu ghe ghelei emasinala mata salusalu eteva eBetsaida

²² Iesu me kapuna disaepolo atoa laghe laa rekata sio eBetsaida. Taumattu ngatoa laghe maeaa sio mata salusalu eteva ta Iesu va ghe posoa me ghe masina. ²³ Iesu ghe kunela nimana atelange, me lalu ghe kasu tee tau lao sio. Iesu ghe kanusuila matana alua me ghe soaala nimane etana, me ghe kolomiela va, “Utaatara teva voto, o karika?”

²⁴ Taumattu ngateva ghe taatarala me ghe uela va, “Ataatara taumattu ngatoa arova ai etoa la kasukasu.”

²⁵ Iesu ghe mene posola matana taumattu ngateva me ghe taatarala, me ghe masinala me ghe tara amasinala voto atoa. ²⁶ Iesu ghe sungi velue lao sio tanguena, me ghe uela etana va, “Urau mene lao tapaa masaliki.”

Pita ghe auliaala va Iesu see ia

(Mat 16:13-20; Luk 9:18-21)

²⁷ Iesu me kapuna disaepolo atoa laghe saela tale kasina masaliki taatara kalakalangina eSiisaria Pilipae. Tapaa salana me Iesu ghe kolomila kapuna disaepolo atoa va, “Taumattu ngatoa la ue va aghi see?”

²⁸ Me laghe liula etana me laghe uela va, “Katoa taumattu la ue va io Jon tau ngai aasuu eteva; kasina eue va io Elaija; me mene katoa la ue va io kateva propete.”

²⁹ Iesu ghe mene kolomilala va, “Me am vaalua? Am uue va aghi see?”

Pita ghe liula etana va, “Io Mesaea io.”

³⁰ Iesu ghe paolala va karika la mene laa kkaila va ia see.

Iesu ghe auliaala mammarikanaane me matemateaane

(Mat 16:21-28; Luk 9:22-27)

³¹ Me Iesu ghe tiuaala tani tau lao alomasaanga ta kapuna disaepolo atoa, ghe ue va, “Natuna ateva Taumattu ngateva aue etani ghaa oroieili mmarikana. Namu ngatoa, me namu ngatoa ta pristi etoa, me tau ngai aapasunga ngatoa tale inangari nipaopao, aue la ratia. Aue la uvi ematea, me kotolu nau elange me aue etotu tale nimate.” ³² Ghe ghelei emasalikangailiila etaira, me Pita ghe koloala me lalu ghe laa tingina ppae sio me ghe tiuaala tani kisoia.

³³ Me Iesu ghe kiriela me ghe taatara lao sio ta kapuna disaepolo atoa, me ghe tiuaala tani kiso Pita. Ghe uela va, “Kasu vulieghila, Satana! Nannaam karika eannaa voto kanna God, ta voto kaluira taumattu ngatoa.”

³⁴ Me Iesu ghe kolola oroi taumattu me kapuna disaepolo atoa tani mae etana. Ghe auliaala etaira va, “Marova teva ealoanna tani usieghi, etani sioaa nannaane, me esunuki unna aikotoo ateva, me eaimuli etaghi.

³⁵ Me lo ateva ealoanna tani asaangi maamauluaane aue eraua, me lo ateva earau maamauluaane ta poli mausighi, me tee tale masi kiukiu, aue esaanga. ³⁶ Marova taumattu ngateva eghaa voto akapaaili tale kosa ateva me maamauluaane ekapa, vaalua isaa o voto aue esausia? Koti karika.

³⁷ Sa ateva taumattu ngateva aue etaue lao tani ghaa oghi maamauluaane?

³⁸ Vituu eteva oia karika la uusilaa aloannaane God, me la gheeghelei ssavoto, me lo ateva taumattu tale lo ateva oia vituu epalatainaghi me inangarighi, aue Natuna ateva Taumattu ngateva aue epalatainia nau aue esio tee mallangina ateva Tamane me kapuna ensolo atoa manga ila.

9

¹ “Aghaaulia ngakoronna etaimim va katoa etaimim oia am tiitingina, karika aue am mate me aue am tara ararimangalina ateva God emae tee sarasarakaniaane.”

Taataraane Iesu ghe aikolikoliaala (Mat 17:1-13; Luk 9:28-36)

² Ghaonomo (6) nau ghe lange sio me Iesu ghe kolola Pita, Jeimis me Jon, me ilaata nonga laata ghe saela tale motouru eteva saesaenaaili ia. Taataraane Iesu ghe aikolikoliaala ta matairotolu, ³ me ghinnanina ghe mallangala me ghe usousoanaailiila, karika poi teva taumattu tale kosa ateva erooro tani pora kalio va ghe uso avalua o. ⁴ Me lotolu ghe tarala Elaija me Moses lalu ghe kauerekatila me lalu ghe tiuaala tani sama tee Iesu.

⁵ Pita ghe uela ta Iesu va, “Tisa, masinaaili ta ita tokatoka oia. Angatolu ghelei kotolu ale paapali — kateva alem ia, me kateva alena ia Moses, me kateva Elaija.” ⁶ (Pita me kapuna alua lotolu ghe matautu saasakiaala, me ghe tam kilala va sa arighi voto tani auliaa.)

⁷ Me karaane ateva ghe mae sio, me tootoona ateva ghe akoulala, me lingi ngalo ateva elome tale karaane ateva ghe uela va, “Natughu eteva oia, aghaailousiangailiia. Am nongoa.”

⁸ Arovaeaata ta vara lotolu ghe mene taatara, me lotolu ghe luula mene ghalua. Lotolu ghe aaitaraa, me lotolu ghe tara nongala Iesu.

⁹ Nau laghe mae siosio tale motouru, Iesu ghe ttoieinilotolla va la rau mene auliaa ta toa saa llo laghe tarala lomosi ta Natuna ateva Taumattu ngateva etotu tale nimate. ¹⁰ Lotolu ghe nongo usilaala voto ghe ppoaala ta ngetairatolu, me vara lotolu nonga me ngilotolu ghe aikolomieinilotolu va vaalua me euela va etotu tale nimate.

¹¹ Me disaepolo kotolu lotolu ghe kolomila Iesu va, “Vaalua me tau ngai aapasunga ngatoa tale inangari nipaopao la ue va Elaija aue etani muemue mae?”

¹² Iesu ghe liula me ghe uela va, “Elaija aue emae amuemue tani ghelei emasina akapa voto. Me vaalua me Uru ngai Manga ateva eue tee va Natuna ateva Taumattu ngateva aue eghaa oroi voto sesa me aue la ratia?”

¹³ Aghaauliaa etaimim va Elaija ang ghe mae sio, me taumattu ngatoa ngeila ghe ghelei ekapala saa llo voto laghe anna tani ghelei etana, nongina Uru ngai Manga ateva eaauliaa.”

Iesu ghe ghelei emasinala taita arighi

(Mat 17:14-20; Luk 9:37-43)

¹⁴ Nau laata ghe sio mae tani mene tara katoa disaepolo, laghe tarala oroieili taumattu laghe tomtomla, me tau ngai aapasunga ngatoa tale inangari nipaopao laghe aissakeana teeila tale inangari. ¹⁵ Nau taumattu ngatoa laghe tarala Iesu, ila akapa laghe soghieiniela, me laghe iloula tani laa soua.

¹⁶ Iesu ghe kolomilala va “Sa ateva am aaissakeana teeia?”

¹⁷ Kateva elome tale uta taumattu ngatoa ghe liula me ghe uela va, “Tisa, amaeaa sio natughu eteva etam, poli raroai eteva etokatoka ta ngetana egheeleia karika esamasama. ¹⁸ Nau epoopotainia me usoso paane eghooa me eaaingeresa ngalungaluna me ekakkarakeana. Akolomila kapum disaepolo atoa va la suu velu raroai eteva etana, me karika la roola.”

¹⁹ Iesu ghe liula me ghe uela ta taumattu ngatoa va, “Am lo atoa oia taumattu, karika righi uneimim niaikaaiiaa, ghaisaa ta aue atoka teeiem? Me aue ghaisaata ta aue atoiem va am aiesoaa? Am maeaa sio aliki eteva etaghi.”

²⁰ Laghe maeaa sio aliki eteva ta Iesu, me nau raroai eteva ghe tarala Iesu ghe gheleila me aliki eteva ghe tiuaala tani oo, me ghe ghelei ekatungiela, me ghe tiuaala tani vilieinia tapaa kosa, me usoso paane ghe ghooa ta paane.

²¹ Iesu ghe kolomila tamane aliki eteva va, “Lovisaa isaa oia voto ghe tiuaala etana?”

Tamane ghe liula me ghe uela va, “Nau aliki aarau. ²² Oroiaata raroai eteva eanna tani uvi ematea. Egheeleia ekaakatuu saooa tale kura, me tale manu va earropia. Ualousiusi teeiengalua, me usausiengalua arova urooroo.”

²³ Iesu ghe liula me ghe uela va, “Vaalua me uue va, ‘Arova urooroo?’ Poli lo ateva eaikaaiiaa, erooroo tani ghelei ekapa voto.”

²⁴ Arovaeaata ta tamane aliki eteva ghe sama anamuula me ghe uela va, “Aghaikaaiiaa; me uasarasarakana uneghi niaikaaiiaa.”

²⁵ Nau Iesu ghe tarala va taumattu ngatoa ngeila ghe maemae akalakanginaaaili etana, me ghe paola raroai eteva; ghe uela va, “Raroai volovolongina me paavoo ateva, aghaauliaa etam va kupi vulu ghoa mae aliki eteva, me auena urau mene laa kupie sso.”

²⁶ Raroai eteva ghe piila me ghe gheleila aliki eteva ang ghe oo, me ghe kupi vulue ghoala. Aliko eteva taataraane nonginaaaili va ghe matela, oroi taumattu laghe taraiela laghe annaa va ang ghe matela. ²⁷ Iesu ghe kunela nimane atelange me ghe sausiela tani tingina, me ghe tinginala.

²⁸ Nau Iesu me kapuna disaepolo atoa laghe lao sio elo ale me ila nonga laghe tokatoka, me ngeila ghe kookolomi Iesu va, “Vaalua me ami karika ami roola tani tiu velu raroai eteva?”

²⁹ Iesu ghe liula me ghe uela va, “Nikokkolomi sae* nonga ateva erooroo tani tiu velu ia o ase lo ateva raroai. Karika mene tikirighi salana.”

Aiaaghaluene Iesu ghe uela va aue emene totu

(Mat 17:22-23; Luk 9:43-45)

9:13: Mat 11:14. **9:23:** Mat 21:21; Mak 11:23. **9:26:** Mak 1:26. * **9:29:** Kasina uru ngai laghe pitila, laghe uela va, Nikokkolomi sae me ninae.

³⁰ Laghe kasu vulila masaliki eteae o, me laghe lao tee sio eGalilii, me karika ghe mene anna va teva taumattu ghe kilaia, ³¹ poli ghe poppooaa tani apasunga ta kapuna disaepolo atoa, me ghe ue etaira va, “Natuna ateva Taumattu ngateva ngeila tautauela ta nimaira taumattu ngatoa, me aue la uvi ematea, me vara kotolu nau elange me aue emene totu.” ³² Karika aloira ghe masaangaala llo ghe auliaala, me laghe maamatautu tani kolomia.

Tani see namuu ia?
(*Mat 18:1-5; Luk 9:46-48*)

³³ Iesu me kapuna disaepolo atoa laghe lao sio eKapenium. Laghe kupi ssola tale ale ateva me Iesu ang ghe kookolomila va, “Sa ateva am aissakeana teeia tapaa salana?” ³⁴ Karika laghe aisauaala, poli nau laghe maemae tapaa salana, laghe aaissakeana va tani see etaira namuu ia.

³⁵ Iesu ghe toka siola me ghe kolo aitauaala kapuna disaepolo atoa me ghe uela va, “See eanna va emuemue, etani gheleia eairuuruu, me etau ngai uungu ta mene katoa.”

³⁶ Me ghe ghaala aliki erighi me ghe atinginaiela elome etaira, me ghe vaghuiela, me ghe uela etaira va, ³⁷ “See eannainaghi me eaikoloa aliki etoa, eaaikoloainaghi, me lo ateva taumattu eaikoloainaghi, karika va eaaikoloainaghi nonga, ta eaaikoloa tee Tamaghi ghe sungieghila tani sio.”

See karika aissaniita ia, kapuita ia
(*Luk 9:49-50*)

³⁸ Jon ghe uela va, “Tisa! Ami tarala taumattu ngateva etiutiu velu raroai eteva tale ararim atea, me ami paoala va eruu poli karika va ita me ia.”

³⁹ Iesu ghe uela etaira va, “Am rau mene paoa, poli lo ateva taumattu eghelei mirikol tale ararighi eteae karika aue ailuilui tani auliaa teeieghi righi voto sesa, ⁴⁰ poli see karika aissaniita ia, kapuita ia. ⁴¹ Aghaaulia ngakoronna etaimim va lo ateva taumattu etau aatu righi manu tale ararighi eteae va uropi, poli io kapuna io Karisto, aue eghaa aipolina.

Nitootoonga tani ghelei ssavoto
(*Mat 18:6-9; Luk 17:1-2*)

⁴² “Arova aliki erighi eaiesoaa etaghi, me teva taumattu eghelei unna niaikaaiiaa ekatuu, ghele masinaaili ta arova la ghele iri teva paka ngatu ta ngalona, me la ghele ghoa allusia elo malionge. ⁴³⁻⁴⁴ Arova nimam atelange egheleio me ukaakatuu tani ghelei voto sesa, usai kotooia, poli aue emasina ta ngetam arova nimam atelange takotoona me usso tale maulue ateva. Me aue esesaaili arova nimam atelange etokatoka me angu laolao tale Gehenna tale kura atea karika epalapala.† ⁴⁵⁻⁴⁶ Arova kekem atelange egheleio me ukaakatuu tani ghelei voto sesa, usai kotooia, poli aue emasina ta ngetam arova kekem atelange takotoona me ughaa maulue ateva, me esesaaili arova kekem atelange masina me angu laolao tale Gehenna tale kura atea karika epalapala.‡ ⁴⁷ Me arova teva matam egheleio me ughelei voto sesa, uvaliki velua. Emaamasina arova ukupi sso tale ararimangalina ateva God tee kateva nonga matam, me esesaaili arova matam akapa alua

9:30: Jon 7:1. **9:31:** Mak 8:31; 10:32-34. **9:32:** Luk 9:45. **9:35:** Luk 22:24-26; Mat 20:25-27; Mak 10:43-44. **9:37:** Mat 10:40. **9:40:** Mat 12:30; Luk 11:23. **9:41:** Mat 10:42. **9:43-44:** Mat 5:30. † **9:43-44:** Kasina uru ngai laghe pitila, laghe uela va, 44 tale ia o voto ateva, ‘ttoliti etoa karika la matemate, me kura atea karika epalapala.’ ‡ **9:45-46:** Kasina uru ngai laghe pitila, laghe uela va, 46 tale ia o voto ateva, ‘ttoliti etoa karika la matemate, me kura atea karika epalapala.’ **9:47:** Mat 5:29.

lalu tokatoka me la sau veluo sae tale kura atea eGehenna, ⁴⁸ tale ia o voto ateva,

“ ‘ttoliti etoa karika la matemate
me kura atea karika epalapala.’

⁴⁹ Taumattu ngakapa kura atea aue gheleila la raarangisana.

⁵⁰ “Uela ateva masina ia, me arova namina ateva ekapa, vaalua emene ghelei me aue emene tue namina? Karika erooroo. Am, am toka arova masi uela ateva tani toka amasina, me luei easo elome etaimim me mene katoa taumattu.”

10

Tani airatii (Mat 19:1-12)

¹ Iesu ghe kasu vulila masaliki etea, me ghe lao sio tale kativilau tale ateo atea eJodan, me tale distriki eteva eJudia. Oroi taita me vause laghe mae sio tani velu eitauaa ta Iesu. Me Iesu ghe aapasunga inangarina God ta ngetaira, nongina ghe ghelei nau etoa. ² Katoa Paresi laghe mae sio tani tootoonga Iesu tale nikokkolomi eteva va, “Uneita inangari nipaopao eue va masina arova taita ateva erati vausenna ateva, o karika?”

³ Iesu ghe liula me ghe uela va, “Saa inangari nipaopao Moses ghe tau aatu sio etaimim?”

⁴ Me laghe uela va, “Moses ghe pitila va taita ateva erooroo tani piti uru ngai niairatii, me etaue lao ta vausenna ateva, me esungi velua.”

⁵ Iesu ghe uela etaira va, “Moses ghe pitila llo inangari nipaopao etaimim poli urunguitaniimim korokoronganaaili. ⁶ Emua arau nau ta God ghe gheleila kosa ateva, ‘God ghe gheleila taita me vause.’ ⁷ ‘Liuna avalua o me taita ateva ekasukasu vuli tamane me kinna me ekaakateva nonga ilalua me vausenna ateva, ⁸ me ilalua aue lalu kateva nonga tale vilikiirarua.’ God ghe uela va karika va ghalua ilalua ta kateva nonga ilalua. ⁹ Liuna avalua o me voto God eaatoka aitauaa, karika mene teva taumattu emene pola.”

¹⁰ Nau eteva Iesu me disaepolo atoa laghe kiri lao sio elo ale, me disaepolo atoa ngila ghe mene kookolomi Iesu tale isaa o inangari. ¹¹ Me Iesu ghe uela etaira va, “Arova taita ateva ngeratila vausenna ateva me emene lai ppae ta kateva vause, elailai salosalooa, ta enim ghaaghaa mene kateva vause, me vausenna tuunga ateva ie etokatoka. ¹² Vause tee ateva arova erati taitanna ateva me elaa lai ta kateva ppae taita ia, ia tee elailai sari, ta enim ghaaghaa taita ateva me taitanna tuunga ateva ie etokatoka.”

Natu aliki etoa me Iesu (Mat 10:13-15; Luk 18:15-17)

¹³ Katoa vause me taita laghe maeaa sio lutu ngaliki etoa ta Iesu va esaoaa nimane etaira, me disaepolo atoa laghe paopaola. ¹⁴ Me nau eteva Iesu ghe tarailala, karika ghe masimasiaala kapuna disaepolo atoa me ghe uela va, “Am maeainila sio etaghi. Am rau mene tiu velu natu aliki etoa tani mae etaghi, ta ararimangalina ateva God tanganueira ia ase taumattu ngatoo nongina natu aliki etoa. ¹⁵ Aghaaulia ngakoronna etaimim va arova see karika eghaa ararimangalina ateva God nongina aliki etoa, karikaaili va aue elao tale ararimangalina ateva God.” ¹⁶ Me Iesu ghe sausau aliki etoa me ghe saasaoaa nimane etaira me ghe aarangiseila.

Tue peipeiena ateva
(Mat 19:16-30; Luk 18:18-30)

¹⁷ Nau Iesu ghe mene kasukasu elaolao tapaa salana, taumattu ngateva ghe iloula emuli etana me ghe suuiaala ta liue kkena Iesu, me ghe uela va, “Masi tisa ngateva, vaalua aghelei me aghaa maulue ateva etokatoka liu?”

¹⁸ Iesu ghe liula me ghe uela etana va, “Vaalua me ukolokoloaghi va masina ieghi? Karika teva masina ia ta God nonga. ¹⁹ Ukilakila inangari nipaopao, va karika umene aiuvi emate, karika umene lai sari, karika umene ainao, karika umene kamekame tale niaisakei, karika umene aikameaa tani ghaa voto, me uoneoneaa tamam me kinam.”

²⁰ Me ghe liula me ghe uela va, “Tisa, isaa ona inangari nipaopao ngaghe usilaala nau aliki taita aghi.”

²¹ Iesu ghe tara usiusiela me ghe aielousieiniela, me ghe uela etana va, “Kasina ateva voto karika ughe gheleiela. Lao sio me ulaa tau lao ghinnanim me la poli, me ulaa tau lao viliki veu ta lo atoa karika righi ghinnaniira, me aue utau peipeiena epona liu, me umae aimuli etaghi.”

²² Me taumattu ngateva oia nannaane ghe katungailiila tale isaa o inangari, me ghe alousiusila me ghe kasula, poli tue peipeiena ia.

²³ Me Iesu ghe aitarala me ghe uela ta kapuna disaepolo atoa va, “Tue peipeiena atoa aue aanasaaili etaira tani sso tale ararimangalina ateva God.”

²⁴ Me disaepolo atoa laghe soghiaala tani nongo inangarina Iesu. Iesu ghe mene ppoaaa tee tau lao sio va, “Aliko etoa, tani sso tale ararimangalina ateva God, aanasa ia. ²⁵ Marova masukasukale ta teva kamolo tani kupi sso tale teae mata raum, aue emasukasukaleaili tee ta teva tue peipeiena tani kupi sso tale ararimangalina ateva God.”

²⁶ Mausina avalua o me disaepolo atoa laghe soghiaa saasakiaa teeila inangarina Iesu me ngila ghe aaikolomieinila va, “Arova isaa avalua o, see nonga eroroo tani saanga?”

²⁷ Iesu ghe pasiaala matane etaira me ghe uela va, “Ta taumattu ngatoa, karika la rooroo, me ta God la rooroo, poli God eroroo tani ghelei ekapa voto.”

²⁸ Me Pita ghe tiuaala tani auliaa ta Iesu va, “Utara, ami ghe kasu vuli ekapannaailiila voto, me ami ghe aimuli teeiola.”

²⁹ Me Iesu ghe uela va, “Aghaaulia ngakoronna etaimim va see ia taumattu ngateva eamuemueieghe me uunguaa masi kiukiu me ghe kasu vulila tanganuena, tuena atoa, nengana atoa, kinna me tamane me natuna atoa me umane utana, ³⁰ aue eghaa sae ta kateva ai (100). God aue etau lao oroi voto etana. Nau ta etokatoka tale kosa ateva oia, voto aue eghaa aue eoroieili, me aue elau voto llo peina ghe kasu vulila, aue eghaa oroi ale me tuena me nengana me kinna me natuna me umana utana. Katoa taumattu aue la ghelei voto sesa etana, me emulina aue eghaa maulue ateva etokatoka liu. ³¹ Me oroi ila taumattu ngatoa matuutuliena ila aue la sioaili euu, me see ila lo atoa arariira euu aue la matuutuliena.”

Iesu ghe auliaala va aue emate me emene totu
(Mat 20:17-19; Luk 18:31-34)

³² Iesu me kapuna disaepolo atoa laghe mene kasukasu elaolao eJerusalem. Iesu ghe muemueainila me kapuna disaepolo atoa laghe soosoghiaa voto laghe taatara ta Iesu. Taumattu ngatoa laghe aaimuli usi tee Iesu me kapuna disaepolo atoa laghe maamatautu. Iesu ghe mene kolola

kasangaulu ghalua (12) kapuna disaepolo, me ghe mene aulia ngaotula voto aue elutu ta maamauluaane. ³³ Ghe uela va, “Am nongo! Nau eteva ngita laa sosso eJerusalem aue la tau lao Natuna ateva Taumattu ngateva ta nimaira namu ngatoa ta pristi etoa me tau ngai aapasunga tale inangari nipaopao atoa, me aue la ghelei niaisakei etana, me la tingina aitaaua tale niaisakei eteae va la uvi ematea. La ruu o, me la taue lao ta nimaira mene katoa ppae karika va aJiu ila. ³⁴ Me ila o katoa ppae taumattu aue la ghauliaa inangari niattara etana, la kanusueinia, me la uetaia, me la uvi ematea. Emate me vara aiaakotonna ateva nau, aue etotu.”

*Jeimis me Jon lalu ghe aloanna tani namuu
(Mat 20:20-28)*

³⁵ Jeimis me Jon, natuna ilalua Sebedi, lalu ghe mae sio ta Iesu me lalu ghe kolomiela va, “Tisa, angalu aloanna tani kolomio tale kateva voto, me angalu aloanna va ughelei ia o voto ateva etaingalua.”

³⁶ Me Iesu ghe kolomilalueta va, “Sa ateva amalu aloannaia va agheleia etaimalua?”

³⁷ Me lalu ghe uela etana va, “Nau eteva ukingi, kateva etaingalua etoka tale pai muenna ativilau, me kateva tale pai uaise ativilau.”

³⁸ Vara me Iesu ghe uela etairarua va, “Karika amalu tani kilakila amasina llo voto amalu kookolomieghi etana. Koti karika amalu rooroo tani ropi tale kapa ateva nimmarikana anga ghaainasiaa tani ropia? Me tani suu tale lo ateva nisuu anga ghaainasiaa tani suu etana?”

³⁹ Me lalu ghe uela ta Iesu va, “Angalu rooroo.”

Me Iesu ghe uela va, “Koronna. Kapa ateva anga ghaainasiaa tani ropia, aue amalu ropi tee etana, me nisuu eteva anga ghaainasiaa tani suu etana aue amalu suu etana. ⁴⁰ Me see ia lo ateva aue etoka tale pai muenna ativilau me tale pai uaise ativilau, karika uunguaaghi tani tau aatu; karika. Llo o aitokatoka God ang ghe aimonomosiaala va uneira ila taumattu ngatoa God aue sui toongainila.”

⁴¹ Nau eteva disaepolo kasangaulu (10) laghe nongola inangari Jeimis me Jon, eghe sessailala etairarua. ⁴² Me Iesu ghe kolo aitaueinilala me ghe uela etaira va, “Am kilakila va lo atoa arariira atea va namuu ila ta tau ngeleka atoa, ila la ghelei taumattu enim uungu aanasa etaira. Me lo atoa matuutuliena ila, la ghelei saasakiaa etaira. ⁴³ Isaa o ase gheleiaaira erau mene toka elome etaimim, karika. Lo ateva taumattu ealoanna tani namuu elome etaimim, esio euu me eghelei nongina tau ngai nongonongo anna atoa. ⁴⁴ Me see ia lo ateva ealoanna tani muemue etaimim, ia aue ekapuimim tau ngai uungu ia. ⁴⁵ Mausina avalua o, me Natuna ateva Taumattu ngateva karika ghe sio mae va taumattu ngatoa la uungu etana, karika. Ghe sio mae tani uungu etaira, me tani tau lao maamauluaane, tani ghaa oghi oroi taita me vause.”

*Iesu ghe ghelei emasinala mata salusalu eteva
(Mat 20:29-34; Luk 18:35-43)*

⁴⁶ Iesu me kapuna disaepolo atoa laghe rekatala eJeriko, laghe aso taula, me ngila ghe anna tani mene kasu eJeriko. Ia me kapuna disaepolo atoa me taumattu ngatoa oroieili ila laghe ususia. Me Batimease, natuna ia Timease, ghe tokatoka tale sama salana atikirighi. Mata salusalu ia me uunguaane tani loo viliki veu tale taumattu ngatoa. ⁴⁷ Me eghe nongola va

Iesu aNasareti ia ange rekatala, me ghe taila tani ovaova atingina va, “Iesu, natuna ia Deivit, ualouslyusi teeioghi!”

⁴⁸ Oroi ila taumattu ngatoa laghe kisokisoia me laghe ue etana va, “Urau mene sama.” Me eghe mene ovaova anamungaili va, “Natuna ateva Deivit, ualouslyusi teeioghi!”

⁴⁹ Me Iesu ghe tinginala, me ghe uela va, “Am kolo taue mae.”

Me laghe uela etana va, “Umasimasi, tingina saela, ange kolokoloo tani lao etana.” ⁵⁰ Vara me ghe uei vella unna aiaasae ngeleka ateva, me ghe tingina parasi saela me ghe lao sio ta Iesu.

⁵¹ Me Iesu ghe kolomiela va, “Sa ateva ualoannaia va agheleia etam?”

Me mata salusalu eteva ghe uela va, “Vau eteva! Aghaloanna tani taatara.”

⁵² Me Iesu ghe uela etana va, “Kasula, ta unem niaikaiaa ngeghelei emasinaiola.” Me arovaeaata ta matane alua ghe otila o, me ghe usila Iesu tapaa salana.

11

Iesu ghe ssola eJerusalem

(Mat 21:1-11; Luk 19:28-40; Jon 12:12-19)

¹ Nau eteva laghe mae akalakangina sio eJerusalem, me eBetpeis me eBetani, masaliki eluae tale motouru eteva eOliv, Iesu ghe suula kapuna disaepolo alua, ² me ghe uela va, “Amalu lao tale masaliki eteae ita taataraia ia o. Nau amalu rekata etana, amalu tara atingina natu donki eteva naunau etingina ia karika teva taumattu ghe sae toka me ghe ilou etana. Amalu pulakaia me amalu maeainia. ³ Arova teva taumattu eue etaimalua va, ‘Vaalua me amalu ghaaghaaia?’ amalu ue va, ‘Vau eteva ealoannaailia me auena emene oghieinie mae.’”

⁴ Me lalu ghe lao sio lalu ghe laa tara atingina sio natu donki eteva tapaa ngatamana tale ale ateva, tapaa salana, me lalu ghe pulakaiela. ⁵ Katoa laghe tiitingina laghe uela etairarua va, “Vaalua me amalu puupulaka donki eteva?” ⁶ Me lalu ghe auliaala saa llo Iesu ghe auliaala etairarua, me laghe tau vellalueta me lalu ghe kasula. ⁷ Lalu ghe laoainie sio ta Iesu. Lalu ghe alokoi saela uneirarua aiaasae ngeleka etana me Iesu ghe laa sae toka etana. ⁸ Me oroieili ila lo atoa laghe tiuaala tani llo velu uneira aiaasae ngeleka epona tale salana atikirighi. Mene katoa laghe laa saisai laa ootou, me laghe veluvelu epona tale salana atikirighi. ⁹ Lo atoa laghe kasukasu emua me lo atoa laghe ususia laghe ovaova tani ue va,

“Tau sae ararina atea God!

God aue earangise lo ateva emaemae elome tale ararina atea Vau ngepona ateva!”

¹⁰ “Niarangise tale ararimangalina ateva tuvuita ateva ta Deivit aue emae!”

“Tau sae ararina atea God iaaili epona!”

¹¹ Iesu ghe ssola eJerusalem, me ghe kupi ssola tale ale manga ateva, me ghe aaitaraa see tale voto atoa. Me ia o ang ghe elo alaila me Iesu ghe kiri lao sio eBetani tee me kapuna kasangaulu ghalua (12) disaepolo.

Iesu ghe kasikienaala fig atea

(Mat 21:18-19)

¹² Elue talaua, laghe kasu vulila eBetani, me Iesu ang ghe maamaloo.

¹³ Eghe taatara amasau lao sio me ghe tarala fig atea uruenaaili ia. Me ghe lao sio tani taraia va arova righi uene. Me nau eteva ghe laa rekataa sio,

ghe tarala va uruna nonga, poli karika ghe ghaa nauna tani kune. ¹⁴ Vara me Iesu ghe uela tale ai eteae va, “Karika teva aue emene nama righi uem!” Me kapuna disaepolo atoa laghe nongoala.

Iesu ghe kupi ssola tale ale manga ateva
(Mat 21:12-17; Luk 19:45-48; Jon 2:13-22)

¹⁵ Nau eteva laghe rekatala eJerusalem, Iesu ghe ssola tale ale manga ateva, me ghe tiuaala tani sungi veluvelu lo atoa laghe aaitauaa me laghe poppoli. Eghe sau etakila tevoo atoa uneira ila lo atoa laghe aaikolikoliaa viliki veu, me aitokatoka uneira lo atoa laghe aaitaraa valusu, ¹⁶ me karika poi ghe aalona va toa la sau longoti righi peiira eleka nongina ale manga ateva. ¹⁷ Vara me eghe tiuaala tani apasunga tale taumattu ngatoa. “Karika am ghe kilala llo laghe pitila tale Uru ngai Manga ateva, ghe uela va, “Aleghi ale manga ateva aue la ghasea va

ale ailooloo sae ia tale taumattu ngakapa atoa tale anua akapa atoa’? Me am, ngam gheeleiela ‘nongina va aleira ale niaisulia ia tau niainao atoa!’ ”

¹⁸ Namu ngatoa ta pristi etoa me tau ngai aapasunga ngatoa tale inangari nipaopao laghe nongola voto oia, me ngila ghe paepae righi salana tani uvi emate Iesu, me laghe maamatautainia, ta poli taumattu ngakapa atoa laghe oouna tee inangarina.

¹⁹ Elo alai tale ia o nau eteva, Iesu me kapuna disaepolo atoa laghe kasu vulila* masaliki taatara atea.

Taumattu eaiesoa ngakoronna me ekokkolomi sae aue eghaa voto
(Mat 21:20-22)

²⁰ Elue talaua poopooa, Iesu me kapuna disaepolo atoa laghe kasukasu elaolao, me laghe tarala fig atea ta ang ghe mmatela. Oane me ia akapaaili ai eteae ghe mmatela. ²¹ Pita ghe mene nnaa lao sio sa ateva Iesu ghe ppooainiela tale ai eteae. Ghe uela va, “Tisa, tarala, fig atea ughele kasikienainiela ange mmatela!”

²² Iesu ghe liula etaira me ghe uela va, “Am aiesoaa ta God. ²³ Aghaaulia ngakoronna etaimim va, see arova eue tale motouru eteva o va, ‘Ukasu me ughoa katu elamana,’ isaa o voto aue elutu etana, arova eaiesoaa tale urunguitanina ateva me karika eghaaghalua nannaane, voto o aue elutu. ²⁴ Liuna avalua o me aghaauliaa etaimim va, sa ateva am kolomia tale uneimim nilooloo sae, me am aiesoaa va angam ghaala, aue am ghaa me aue kaluimim. ²⁵⁻²⁶ Me nau am tingina me am looloo sae, am kkaluaa sesa katoa la ghelei etaimim, me Tamaimim ateva epona liu aue ekkaluaa tee gheleiaaimim sesa.”†

Nikokkolomi tale matuutulienaane Iesu
(Mat 21:23-27; Luk 20:1-8)

²⁷ Laghe kiriaa mae sio eJerusalem, me vara Iesu ghe kasukasu elome tale ale ngeleka etiulu tale ale manga ateva, me namuu ta pristi etoa me tau ngai aapasunga ngatoa tale inangari nipaopao me namu ngatoa laghe mae sio ta ngetana. ²⁸ Me laghe uela etana va, “See ghe tau aatu sio matuutuliena etam, me see ghe sungiola tani mae ghelei isaa oia voto?”

11:17: Ais 56:7; Jer 7:11. **11:18:** Mak 14:1. * **11:19:** Iesu me kapuna disaepolo atoa laghe kasu vulila Kasina uru ngai laghe pitila, laghe uela va, Iesu ghe kasu vulila. **11:23:** Mat 17:20.

11:24: Mat 7:7. **11:25-26:** Mat 6:14-15. † **11:25-26:** Kasina uru ngai laghe pitila, laghe uela va, 26 Marova am tam kkaluaa, Tamaimim ateva epona liu karika aue ekkaluaa tee eleiaaimim sesa. Utara Matiu 6:15.

²⁹ Me Iesu ghe uela etaira va, “Akolomiem mua tale kateva nikokkolomi, me arova am liu emasinaia, aue aghauliaa etaimim va see ghe tau mae sio matuutuliena etaghi. ³⁰ Am liu etaghi va see ghe tau lao sio matuutuliena ta Jon me ghe aasuu taumattu: Vau ngepona ateva o nim taumattu?”

³¹ Me ngeila ghe tingina aissakea va sa ateva la ghaulieinia etana, “Arova ita ue va, ‘Vau ngepona ateva,’ aue eue va, ‘Me vaalua me karika am ghe aaikaaiaa ta Jon?’ ³² Me arova ita ue va, ‘Nim taumattu’...” (Laghe maamatauta taumattu ngatoa, poli taumattu ngakapa atoa laghe annaa va Jon propete ia.)

³³ Liuna avalua o laghe liula me laghe uela ta Iesu va, “Karika ami kilakila.”

Me Iesu ghe uela etaira va, “Aghi tee, karika aue aghauliaa etaimim va see ghe tau mae sio matuutuliena etaghi.”

12

Kiukiu niaimatoonga tale sesa tau ngeutana atoa laghe aaitaraa utani uaeni etingiu

(Mat 21:33-46; Luk 20:9-19)

¹ Iesu ghe tiuaala tani aippoosaa tee taumattu ngatoa tale kiukiu niaimatoongana atoa va, “Kateva taumattu ghe pasala utani uaeni etingiu, me ghe iri taliaala valavala atea, me ghe kaila aimonnaa uaeni eteva, me ghe atulula aitetike ateva. Vara me ghe taue lao sio ta katoa tau ngeutana tani aitarainia, me ghe kasu emasaula. ² Nau eteva utana atingiu ghe matuela, ghe suula kateva kapuna tau ngai uungu tani laa tara lo atoa laghe aaitaraa utana atingiu me aue ghe ghaa righi ue uaeni. ³ Lo atoa laghe aaitaraa utana atingiu laghe llotiela, me laghe uvi saasakieiniela, me laghe sungi veluela, me karika ghe ghaala righi ue uaeni. ⁴ Vara me ghe mene suula mene kateva kapuna tau ngai uungu tani mene lao etaira. Laghe mene lloti etokaiela, me laghe paru rriila uruna ateva, me laghe apalataiela. ⁵ Ghe mene suula mene kateva, lo ateva o tau ngai uungu laghe uvi emateala. Oroieili ila lo atoa ghe mene sungilala kateva kateva ghe laolao; katoa laghe nim uvilala, me katoa laghe uvi ematelala.

⁶ “Kateva nonga ia taumattu ghe tokala, natuna ia ghe tani aaielousieinia, ghe airuuruula tani sungia ta ghe ue va, ‘Aue la oneoneaa natughu eteva.’

⁷ “Nau eteva lo atoa laghe aaitaraa utana atingiu laghe taraiela, laghe aippoosaa ngaitauaala elome etaira va, ‘Taumattu ngateva okae aue eghaa akapa llo oia. Ita uvi ematea, me ita ghaa utana atingiu me ekaluuta ia.’ ⁸ Laghe llotiela, me laghe uvi emateala, me laghe sau velue ghoala eleka tale utana atingiu.

⁹ “Sa ateva taumattu ngateva, umana ia utana atingiu, aue egheleia? Aue emae euvi ematela me emene tau lao utana atingiu ta katoa ppae. ¹⁰ Koti karika am ghe ritila tale Uru ngai Manga ateva? Eue va,

“ ‘Atu eteva tau ngai atulu ale atoa laghe ratiela
ghe aitiutiula tale atu ekapa atoa tani suei ale ateva;

¹¹ Vau palepale ghe gheleila isaa o voto
me taataraane masinaaili ta mataita.’ ”

¹² Namu ngatoa laghe nongola me laghe kilala va Iesu ghe aauliaa teeila tale kiukiu niaimatoonga. Laghe aloanna tani kunea, me laghe nim maamatauta taumattu ngatoa, me laghe tau veluela, me laghe kasula.

Tani tau lao takis ta Siisa
(Mat 22:15-22; Luk 20:20-26)

¹³ Laghe suula katoa tana Paresi me katoa tana kapuna Herot tani laa ghareaa Iesu va ghe ppoosaa righi inangarina, me laghe ghaaia me laghe laa ghatinaia tale niaisakei. ¹⁴ Nau laghe lao sio, laghe uela va, “Tisa, io nau ekapa atoa uaauliaa nonga voto koronna. Karika unannangaili saa llo taumattu ngatoa la annaa, me karika utaata taumattu tale naanamungaaia me uunguaaia, me uaapasunga ngakoronna salane God. Vaalua? Masina tani taula takis ta Siisa? Ita taula, o karika ita mene taula?”

¹⁵ Me ia ghe kilakilaaili va usimaghalue ila, me ghe uela etaira va, “Vaalua me am tootoongainaghi? Ghaa mae tivilau viliki veu me atara.” ¹⁶ Laghe tau lao sio viliki veu etivilau etana me ghe uela etaira va, “See tootoona ateva me ararina atea o?”

Me laghe uela va, “Siisa.”

¹⁷ Me Iesu ghe liula me ghe uela etaira va, “Am taula voto kanna Siisa ta Siisa, me voto kanna God ta God.”

Me laghe soghiaala tani nongo llo ghe auliaala.

Maulue ateva tale kosa ateva auena emae
(Mat 22:23-33; Luk 20:27-40)

¹⁸ Sadiusi etoa, karika la ghaaiesoaa tale nitotu tale nimate, katoa etaira laghe mae sio ta Iesu me laghe uela etana va, ¹⁹ “Tisa! Moses ghe piti elokoila va arova taita ateva lailai ia emate me karika righi natuna, nengane ateva aue eghaa vausenna ateva ang ghe raue vulueta, me aue natuirarua aitiutiu eteva aliki, la nnainia va natuna ia tuena. ²⁰ Tue me nenga ghaitu (7). Aitiutiu eteva ghe laila, me karika righi natuna me ghe matela. ²¹ Ghaluene ateva ghe ghaala vausenna ateva tuena, ghe raue vulueta. Me ie tee ghe mene matela nau karika righi natuna. Ase voto ateva o ghe mene lutula ta aiaakotonna ateva aliki. ²² Tue me nenga ghaitu laghe ghaala vause ateva, me karika righi natuna me laghe matela, me vause ateva ghe mate aruula. ²³ Nau nitotu tale nimate, see aue evausenna ia vause ateva o, poli ila akapa laghe laila etana?”

²⁴ Iesu ghe liula me ghe uela va, “Nannaaimim karika ghulughuluena, poli karika am kilakila Uru ngai Manga ateva me sarasarakaniaane God. ²⁵ Nau God aue etotu taumattu matena, taita atoa me vause atoa karika aue la lai; aue la nongina ensolo atoa epona liu. ²⁶ Me tale nitotu ta taumattu matena, karika am ghe ritila tale unna vuku eteva Moses, tale kiukiu natu ai erighi, God ghe uela va, ‘Aghi kapuna Goto ieghi Abraham, Aisiki me Jekop.’ ²⁷ God karika va kapuira Goto ia lo atoa taumattu matena ila, ta kapuira Goto ia lo atoa maulue ila. Am Sadiusi etoa, inangariimim nim kamena.”

Mata ngemua ateva inangari nipaopao
(Mat 22:34-40; Luk 10:25-28)

²⁸ Tau ngai aapasunga ngateva tale inangari nipaopao ghe usila tani nongo nau eteva Sadiusi etoa laghe sama teela Iesu. Ghe nongola va Iesu ghe liu emasinaailiila inangariira Sadiusi etoa. Liuna avalua o me ghe kolomila Iesu tale nikokkolomi eteva va, “Sa ateva inangari nipaopao mata ngemua ia me namuu ia tale isaa akapa inangari nipaopao?”

²⁹ Iesu ghe liula me ghe uela va, “Mata ngemua ateva voto va, ‘Israeli etoa, am nongo, Vau palepale ateva kapuimim ia, ia nonga vau tuungi ia. ³⁰ Uaielousiaa Vaum ateva kapum Goto ia tale urunguitanim ateva, me tale

maamauluaam, me tale nannaam, me tale sarasarakaniaam akapa.’ ³¹ Me aiaaghaluena ateva inangari nipaopao eue va, ‘Uaielousiaa taumattu ngat-eva kalakalangina ia etam, nongina uaielousieinio.’ Inangari nipaopao alua o, namuu ilalua tale isaa akapa inangari nipaopao.”

³² Me tau ngai aapasunga ngateva tale inangari nipaopao ghe uela va, “Masinaaili, tisa. Koronna llo inangari nguauliaala va Vau eteva epona liu ia nonga Vau palepale ia, karika mene teva nongina ia. ³³ Me ita aielousiaa Vau ngepona liu eteva tale urunguitaniita, me tale nannaaita, me tale sarasarakaniaaita, me ita aielousiaa taumattu ngatoa kalakalangina ila etaita, nongina ita aielousieinita. Poli masina tani aimuli tee inangari nipaopao alua o, me tani ghelei asease aiaavusuvusuena.”

³⁴ Iesu ghe nongo kilala alomasaanganiaane taumattu ngateva o, me ghe uela etana va, “Io karika masau io tale ararimangalina ateva God.” Ghe ruu evaluela o me ila akapa laghe matautula tani kolomi Iesu tale mene righi nikokkolomi.

*See tuvuna ia Mesaea?
(Mat 22:41-46; Luk 20:41-44)*

³⁵ Iesu ghe tokatoka elome tale ale manga ateva me ghe aapasunga voto ta taumattu ngatoa. Ghe ue va, “Vaalua me tau ngai aapasunga ngatoa tale inangari nipaopao la uue va Mesaea tuvuna ia Deivit? ³⁶ Me Spirit Manga ateva ghe tokala ta Deivit, me Deivit ghe uela va,

“Vau eteva ghe uela ta kapughu vau eteva va,
“Toka siola tale pai muenna ativilau
lomose ta aghatoka sio lo atoa la sessa teeio euu,
me uatingina saooa kkem etaira.”’

³⁷ Deivit ghe uela va Mesaea vauna ia. Vaalua me ghele mene tuvuna ia?”
Oroiannaaili taumattu laghe nongonongoa me laghe maamasiangaili llo ghe aauliaa.

*Tau ngai aapasunga atoa tale
inangari nipaopao
(Mat 23:1-36; Luk 20:45-47)*

³⁸ Nau Iesu ghe mene aapasunga, ghe uela va, “Am taatara amasina tale gheegheleiaaira, tau ngai aapasunga ngatoa tale inangari nipaopao. La ghaloanna nonga tani asae masi ghinna nongina namu ngatoa, me tani ghaa nioneoneaa tale tummatavanga. ³⁹ Me ila la ghaloanna tani toka tale masi aitokatoka uneira namu ngatoa tale ale nivelu eitaua ngatoa, me tale ninamanama atoa. ⁴⁰ Tisa ngatoa la kamekame vause atoa raue vulu ila me la ghainao peiira, me la ghaitaratarainila tani ghelei aluse nilooloo sae atoa. Nau niaisakei, aue la ghaa nimmarikana namungaili.”

*Kanna opring vause raue vulu eteva
(Luk 21:1-4)*

⁴¹ Iesu ghe ssola tale ale manga ateva me ghe toka siola ta pai kativilau tale voto ateva la kaakaai viliki veu, me ghe taatara taumattu ngatoa laghe kaakaai kaluira viliki veu. Oroi tau peipeiena atoa laghe kaakaai oroiaili kaluira viliki veu. ⁴² Vara me vause raue vulu eteva, karika tau peipeiena ia, ghe kaaila tapiri viliki veu eluevilau.

⁴³ Iesu ghe kolola kapuna disaepolo atoa me ghe uela etaira va, “Aghaaulia ngakoronna etaimim va ia o vause ateva ange kaaila oroi viliki veu tale aikaai viliki veu eteva, me katoa la kaaila malaki. ⁴⁴ Ta ila akapaaili, la

kaaila kasina nonga uneira viliki veu, me oroi isaa elo ale, me ia o vause ateva etau ekapa lao sio unna viliki veu tale aikaai viliki veu eteva, karika righi viliki veu tani mene poli righi peina.”

13

Aue la tturuu ale manga ateva

(Mat 24:1-2; Luk 21:5-6)

¹ Nau Iesu ghe kupi ghoala tale ale manga ateva, kateva tana kapuna disaepolo ghe uela etana va, “Tisa, tarala masi atu etoa namungaili ila, me masi ale atoa.”

² Iesu ghe liula me ghe uela va, “Utaatara kinatama ale okae? Karika teva atu aue etoka saooa ta mene kateva. Aue taumattu ngatoa la puli reerekata isaa akapaaili oia voto.”

Iesu ghe aulia ngaotula sesa nau aue emae

(Mat 24:3-14; Luk 21:7-19)

³ Nau eteva Iesu ghe nim tokatoka poi sio tale motouru eteva eOliv tale pai kativilau tale ale manga ateva, me Pita, Jeimis, Jon me Andru laghe mae sio tani kolomi einaoa, ⁴ laghe uela va, “Auliaala etaimami, isaa o voto lovisaa elutu? Me sa aimatootoongana aue elutu, me auena voto o emae?”

⁵ Iesu ghe uela etaira va, “Am paniem, teva taumattu erau kameam. ⁶ Oroi ila lo atoa aue la mae tale ararighi eteae, me aue la ue va, ‘Aghi oia Mesaea ngateva,’ me aue la kame oroieili taumattu ngatoa. ⁷ Me nau am nongo niaiuvii me kiukiuna, am rau mene matautu. Isaa o voto aue elutu, me airuuruu tale kosa ateva karika ghe mae. ⁸ Patunganua atoa aue la ghaiuvieinila; me ararimangali etoa aue la ghaiuvieinila tee. Aue rukeruke atoa la ruke kasina voto tale kosa ateva me maloo atoa aue la lutu tee. Isaa o voto aue enim aitiutiu tale nimmarikana, nongina mmarikana eghaaghaa kinna ateva aliki eteva nau elutulutu.

⁹ “Am oia am anguu taatara, ta isaa toko voto aue elutu. Am aue la kuneiem me la laoainiem tale liu niaisakei. Aue la mae la uviem tale ale nivelu eitauaa, me aue la ghatenginaiem emua ta gavana ngatoa me kingi etoa poli ararighi eteae, me aue am rooroo tani auliaa masi kiukiu tee etaira. ¹⁰ Me mata ngemua ateva voto, masi kiukiu oia etani lao akapa see tale patunganua akapa atoa. ¹¹ Nau eteva la kuneiem me la laoainiem tale liu niaisakei, karika am mene matautu, me am annaa va sa ateva aue am aulieinia; ia o nau eteva, am ppooaa voto God aue etau aatu tale nannaaimim. Poli inangari am ppooaa karika va inangariimim; ta inangarina Spirit Manga ateva.

¹² “Taumattu ngatoa aue la tau velu tueira me nengaira atoa ta lo atoa aue la uvi ematela, me tamaira atoa aue la ghelei tee ta natuira atoa. Aliko etoa tee aue la ssa tee tamaira me kinaira atoa, me aue la uvi ematela. ¹³ Taumattu ngakapa atoa aue la ssa teiem poli ararighi eteae. Me see etingina akorokorongana tale unna niaikaaiiaa tale airuuruu, maamauluaane aue esaanga.

Voto sesaaili aue emae

(Mat 24:15-28; Luk 21:20-24)

¹⁴ “Nau am tara voto sesaaili elutu tale voto karika liuna tani lutu me eghelei taumattu ngatoa la kasu me ale manga ateva aue enim toka, (lo ateva taumattu aue etara kila aue ealomasaanga) lo atoa elome eJudia am ilou

sae tale motouru. ¹⁵ Me karika teva etokatoka eleka tale alena ateva emene kupi sso elo ale me esso ghaa righi voto. ¹⁶ Karika teva eutana emene kiri lao tanganuena me elaa ghaa teva unna aiaasae ngeleka. ¹⁷ Alousiusi ta lo atoa la suusunuku me lo atoa la sussu tale isaa o nau! ¹⁸ Am looloo sae va voto o erau mene lutu tale nau kkaili, ¹⁹ poli voto sesa tale nau o, aue esesaaili tale isaa too nau ang ghe lao sio. Tale kosa ateva oia, karika aue emene righi ase nau evalua o, nongina aitiutiu nau God ghe gheleila kosa ateva me nau ghaine, me auena karika aue emene righi voto avalua o elutu. ²⁰ Arova Vau palepale ateva karika ghe nnaala tani atukuna isaa o sesa nau, taumattu ngakapa atoa aue la ghele raua, me poli enannangaili isaa o taumattu ghe suitoongaala, liuna avalua o me aue eatukuna isaa o nau. ²¹ Aue lo ateva o nau arova toa la ue etaimim va, ‘Tarala, Mesaea ngateva toko!’ me mene, ‘Tarala, ie too!’ karika am mene aikaaiaa inangariira. ²² Ta poli katoa taumattu aue la mae me aue la kame va, ‘Aghi Mesaea ngateva,’ me mene katoa aue la kame va, ‘Aghi propete ieghi’ aue la mae la ghelei aimatootoongana me voto tani apasunga sarasarakaniaaira tani kame taumattu Vau palepale ghe suitoongaala, kotiva isaa o voto aue eroo. ²³ Liuna avalua o me aghaauliaa va am taatara amasina, voto akapa oia ngaghe aulia ngamuemue alokoila etaimim, me auena elutu.

Maemaeane Natuna ateva Taumattu ngateva

(Mat 24:29-31; Luk 21:25-28)

²⁴ “Tale isaa o nau me sesa nau auena,

“ ‘sinaka ateva aue esaurrom,

me ulana ateva karika aue emallanga,

²⁵ me katto atoa elomarase aue la katuu,

me voto atoa korokorongana ila elomarase aue la ghaisiisia.’

²⁶ “Me aue la tara Natuna ateva Taumattu ngateva aue emae tale urukookoo. Emae tee korokoronganiaane me kinatama mallangina. ²⁷ Me aue esungi ensolo atoa la lao tale ghaata aighoughou tale kosa ateva tani kolo aitauaa lo atoa ghe suitoongainilala, tale kosa akapa ateva.

Am ghaa ninannaa tale fig atee

(Mat 24:32-35; Luk 21:29-33)

²⁸ “Am rooroo tani ghaa alomasaanga tale kiukiu niaimatoonga tale fig atee. Nau eteva am tara ai etee ange tulutulu, am kila va masi nau tale sinaka ateva ange kalakalaala. ²⁹ Liuna avalua o, nau eteva am tara isaa o voto, aue am kila va ange kalakalanginginala, tapaa ngatamana. ³⁰ Aghaaulia ngakoronna etaimim va lo ateva oia vituu karika poi aue ekapa me isaa o voto aue elutu. ³¹ Elomarase me kosa ateva oia aue ekapa me inangarighi karika poi aue ekapa.

Karika teva ekilakila nau isaa o voto aue elutu

(Mat 24:36-44)

³² “Me ia o nau eteva o aoa ngateva, karika teva ekilakilaia. Ensolo ngepona liu tee atoa karika la kilakila, me Natuna tee. Nim Tamaghi nonga ekilakila. ³³ Am anguu taatara me am aimonomosiaa* poli am tam kilakila va saa nau eteva isaa o voto aue emae. ³⁴ Nonginaaili taumattu ngateva ang ghe kasukasu vuli tanganuena, me ghe taula niuungu ta kapuna tau ngai nongonongo anna atoa. Ghe aikoitaala niuungu ta kateva

13:15: Luk 17:31. **13:17:** Luk 23:29. **13:19:** Den 12:1; Aotu 7:14. **13:22:** Aotu 13:13.

13:24: Ais 13:10; Joel 2:10, 31; 3:15; Aotu 6:12-13. **13:26:** Aotu 1:7. **13:27:** Mat 13:41.

* **13:33:** aimonomosiaa Kasina uru ngai laghe pitila, laghe uela va, aimonomosiaa me am looloo sae.

kateva etaira, me ghe uela ta lo ateva ghe aaitoiaa atamana atea va eanguu taatara.

³⁵ “Mausina avalua o me am anguu taatara atoka poli karika am kilakila va lovisaa tau ngalena emene kiriaa: aue elo alai, o eleivoo, o elopai, o elue talaua. ³⁶ Erau rekata parasi va etaraiem ta am aseasekanua. ³⁷ Voto aghaauliaa etaimim, aghaauliaa tee ta taumattu ngakapa atoa va, ‘Am anguu taatara atoka!’ ”

14

Laghe paepae salana tani uvi emate Iesu (Mat 26:1-5; Luk 22:1-2; Jon 11:45-53)

¹ Kasi ghalua nau me auena niimonomonosiaa tale nivelu eitaua ngateae ta Pasova ngateva me nivelu eitaua ngateae tale verete karika righi isti etana ghe mae, me namu ngatoa ta pristi etoa me tau ngai aapasunga ngatoa tale inangari nipaopao ngila ghe paepae righi salana tani kune aisulia Iesu me la uvi ematea. ² Laghe uela va, “Ita rau mene ghelei tale nau nivelu eitaua, ta taumattu ngatoa la rau tiuaa teae niuiuvii.”

Vause ateva ghe kaola llo masi ngusungusuaane ta uruna Iesu (Mat 26:6-13; Jon 12:1-8)

³ Iesu ghe tokatoka eBetani tale alena ateva Saemon emua arau anna tasussuku eteva. Nau Iesu ang ghe namanama, me vause ateva ghe sso tee mae aikakkaai eteva, laghe ghelelela tale atu eteva alabasta ia, pasu ia tale aiaaoo masi ngusungusuaane laghe ghelelela nonga tale oane natu ai erighi la koloa va nadi ia, aipolina namungaili. Ghe ghelei polakila aikakkaai eteva me ghe kaola aiaavusuvusuaane ateva ta uruna Iesu.

⁴ Katoa taumattu laghe tokatoka ghe sessailala me laghe aippooaa elome etaira va, “Vaalua me eruuruungia aiaaoo ateva masi ngusungusuaane? ⁵ La rooroo tani polia ta kotolu ai (300) silva koen,* me viliki veu la tau lao ta taumattu karika righi peiira.” Me laghe kisokisoia.

⁶ Me Iesu ghe uela va, “Ratiela! Vaalua me am poppooaa teeia? Ange ghelelela masi voto etaghi. ⁷ Llo taumattu karika peiira la tokatoka teeiem nau ekapa atoa. Am rooroo tani sausila nau eteva am aloanna. Aghi karika aue atoka teeiem nau ekapa atoa. ⁸ Nge ghelelela voto erooroo tani ghelei; ange kaola aiaaoo masi ngusungusuaane ta vilikighi tani aimonomonosiaa ngamuemua tale nikkaiaa. ⁹ Aghaaulia ngakoronna va eaa aue la ppoaa masi kiukiu eteva tale kosa ateva, aue la ghauliaa tee masi gheleleleane vause ateva oia, tani nnainia.”

¹⁰ Me Jiudas Iskariot, kateva ta kasangaulu ghalua (12) disaepolo, ghe lao sio ta namu ngatoa ta pristi etoa tani taula Iesu ta nimaira. ¹¹ Laghe nongo avaelua o me laghe masimasila, me laghe ghelelela inangari nialokoi va aue la taula righi viliki veu. Me Jiudas ghe tiuaala tani pae salana tani tau lao Iesu ta ngetaira.

Iesu ghe namanama teela kapuna disaepolo atoa (Mat 26:17-25; Luk 22:7-14, 21-23; Jon 13:21-30)

¹² Tale aitiutiu eteva nau tale nivelu eitaua tale verete karika righi isti etana, nau eteva laghe uviuvi emate Pasova sipsipi eteva, kapuna disaepolo atoa Iesu laghe mae sio me laghe uela etana va, “Eaa uanna va ami laa ghaimonomonosiaa voto me ughelei ninamanama atea ta Pasova?”

13:35: Luk 12:38. **14:3:** Luk 7:37-38. * **14:5:** silva koen Silva koen ativilau (denarius) erooroo aipolina kateva nau. **14:7:** Diut 15:11. **14:8:** Jon 19:40. **14:12:** Eks 12:6.

¹³ Liuna avalua o me ghe suula ghalua tani kapuna disaepolo. Ghe uela etairarua va, “Amalu lao tale masaliki taatara atea, me nau amalu tara taumattu ngateva, esuusunuki aikaai manu eteva, amalu usia. ¹⁴ Lo ateva ale elaa kupi sso etana, amalu ue ta tau ngalena va, “Tisa euela va: Eaa ia lo atiulu rum aue atoka etana, me aue anama Pasova ngateva tee kapughu disaepolo atoa?” ¹⁵ Me aue eapasunga rum atiulu epona namuu ia, me ngeila aimonomosiaa ngatokaiela. Amalu aimonomosiaa aneita inana tale ia o rum atiulu.”

¹⁶ Disaepolo alua lalu ghe lao sio tale masaliki taatara atea, me lalu ghe saopi ekapala voto Iesu ghe auliaala. Me lalu ghe aipanipaniaala inana tale Pasova ngateva.

¹⁷ Vara elo alai me Iesu me kasangaulu ghalua disaepolo laghe rekatala. ¹⁸ Laghe tiuaala tani namanama, me Iesu ghe uela etaira va, “Aghaaulia ngakoronna etaimim va kateva etaimim aue etaueghi lao ta nimaira tau ngai ssateghi etoa. Taumattu ngateva ia oia ange namanama teeieghi.”

¹⁹ Disaepolo atoa laghe tiuaala tani alousiusi, me kateva kateva etaira ghe kokkolomi Iesu va, “Koti aghi, no?”

²⁰ Ghe liula me ghe uela va, “Kateva ta kasangaulu ghalua kapughu disaepolo, ita namanama aitaaua. ²¹ Poli Natuna ateva Taumattu ngateva aue elao nongina Uru ngai Manga ateva eaauliaa va emate. Me alousiusi tale taumattu ngateva etautau lao Natuna ateva Taumattu ngateva ta tau ngai ssateena atoa. Aue ghele masina etana arova ghe tam lutula.”

Iesu ghe tau lao sio verete me uaeni ta disaepolo atoa

(Mat 26:26-30; Luk 22:15-20; 1 Ko 11:23-25)

²² Laghe namanama, me Iesu ghe ghaala verete ateva me ghe kaili emasina saela, me ghe piriela me ghe taue lao sio ta disaepolo atoa, me ghe uela va, “Am ghaala. Isaa oia verete malataughu.”

²³ Me ghe mene ghaala kapa uaeni eteva, me ghe kaili emasina saela ta God, me ghe taue lao sio etaira, me ila akapa laghe ropila tale ia o kapa uaeni eteva.

²⁴ Me ghe uela etaira va, “Uaeni eteva oia raeghi ia tani ghelei ouna inangari niaippooa ngaitaua me aue eakalaa tani sausi oro taumattu. ²⁵ Aghaaulia ngakoronna etaimim va karika aue amene ropi uaeni lomosi ta aropi ouna uaeni tale ararimangalina ateva God.”

²⁶ Me laghe ueila kkinari etea, me laghe kupi ghoala tale masaliki taatara atea me laghe saela tale motouru eteva eOliv.

Iesu ghe aulia ngamuemua alokoila

llo Pita aue eghelei

(Mat 26:31-35; Luk 22:31-34; Jon 13:36-38)

²⁷ Iesu ghe uela ta kapuna disaepolo atoa va, “Am akapaaili aue am ilou vulieghi, nongina Uru ngai Manga ateva eaauliaa. Eue va, ‘Aue auvi emate tau ngai toi sipsipi eteva, me sipsipi etoa aue la ilou reerekataa.’ ²⁸ Me nau atotu tale nimate aue amuemue lao eGalilii me aue am laa taraieghi okae.”

²⁹ Me Pita ghe uela va, “Arova ila akapa la ilou vulio, aghi karika poi arooro tani ilou vulio.”

³⁰ Iesu ghe liula me ghe uela etana va, “Aghaaulia ngakoronna etam va, ia o voo ngateva auena taita ateva paolo eaangari ghaluaata, aue uue akasina kotoluaata va karika ukilakilaieghi.”

³¹ Pita ghe aikaaia ngakoronganaaili liuna avalua o me ghe uela va, “Aue amate teeio, me karika arooroo tani ue va karika akilakilaio.” Ila akapa inangariira nongina Pita.

Iesu ghe looloo sae eGetsemeni

(Mat 26:36-46; Luk 22:39-46)

³² Iesu me kapuna disaepolo atoa laghe lao sio tale voto ateva la kolokolo Getsemeni etana, me Iesu ghe uela ta kapuna disaepolo atoa va, “Am toka oia, me alaa looloo sae.” ³³ Me ghe kolola Pita, Jeimis me Jon va la usia, me nannaane ghe tiuaala tani maate, me ang ghe ateatea saasakiaa. ³⁴ Me ghe uela etairatolu va, “Maamauluaaghi ange sessaaili tee nialousiusi eteva, me egheleieghi arova amate. Am toka oia me am anguu taatara.”

³⁵ Ghe nim kasu tee lao sio, me ghe tau siola paane, me ang ghe looloo sae va, arova erooroo, isaa o sesa nau eghele kkelia. ³⁶ Me ghe uela va, “Abba,† Tamaghi, isaa akapa voto urooroo tani ghelei. Ughaa velu kapa nimmarikana ateva etaghi, me urau mene ghelei tale aloaloannaaghi ta ughelei tale aloaloannaam.”

³⁷ Ghe kiriaa lao sio ta disaepolo kotolu me ghe tarailotolla ta latolu ghe aseasekanua, me ghe uela ta Pita va, “Saemon, uaseasekanua? Karika urooroo tani anguu ta nim teva aoa? ³⁸ Am anguu taatara me am looloo sae ta God va karika am mene sso tale nitootoonga. Nannaimim eanna tani ghelei voto, me vilikiimim mangoona.”

³⁹ Me ghe mene kasula tani looloo sae nongina ghe ghelei muela. ⁴⁰ Vara ghe mene kiriaa mae sio etairotolu me ghe mene saopilotolla ta latolu ghe aseasekanua, poli matairotolu ghe maamaateaili. Me karika latolu ghe kilakila sa ateva tani aulieinia.

⁴¹ Ghe kiriaa mae sio aiaakotonna me ghe uela etairotolu va, “Amotolu aseasekanua me amotolu maamatua ngatoka, va? Ange roola! Nau eteva ange rekatala. Am tarala, Natuna ateva Taumattu ngateva ngeila tautauela ta nimaira sesa taumattu ngatoa. ⁴² Amotolu totula me ita kasu! Lo ateva etautauoghi lao ta tau ngai ssateieghi etoa ange reerekata.”

Jiudas ghe tau lao sio Iesu ta tau ngai ssateena atoa

(Mat 26:47-56; Luk 22:47-53; Jon 18:3-12)

⁴³ Nau Iesu ghe samasama nonga me Jiudas, kateva ta kasangaulu ghalua (12) disaepolo, ghe rekata teela taumattu ngatoa. Laghe posoposo baenata atoa me tuku ngai etoa. Namu ngatoa ta pristi etoa, me tau ngai aapasunga ngatoa tale inangari nipaopao, me namu ngatoa laghe sungilala.

⁴⁴ Lo ateva ghe taue lao sio etaira ghe auliaala aimatootoongana ateva va, “Lo ateva taumattu angusua, ia o lo ateva am kuneia me am kasueinia.”

⁴⁵ Nau ghe rekatala, ghe lao sio arau ta Iesu me ghe uela va, “Rabae!” me ghe ngusuela. ⁴⁶ Laghe kuneieila me laghe poso atinginaiela. ⁴⁷ Kateva tana taumattu ghe tiitingina ghe ghaala iemana baenata ateva, me ghe sai patela talingana ativilau kateva kapuna tau ngai nongonongo anna namu ngateva ta pristi etoa.

⁴⁸ Iesu ghe liula me ghe uela etaira va, “Am annaa va aghi tau niainao aghi, va am maeaa sio iemaimim baenata me tuku ngai tani ghaaieghi? ⁴⁹ Nau etoa aghe tokatoka teiem tale ale manga tani apasunga, me karika am ghe kunekuneieghi. Me masina, inangari tale Uru ngai Manga ateva

14:31: Jon 11:16. **14:32:** Jon 18:1. **14:34:** Jon 12:27. **14:36:** Mak 10:38; Jon 6:38. † **14:36:** Tale inangari nge Aramaik, “Abba” malloeana va “Tamaghi”. **14:49:** Luk 19:47; 21:37; Jon 18:20.

ghaine elutu ekoronna.” ⁵⁰ Me ila akapa disaepolo atoa laghe aitiuaala, me laghe ilou vuliela.

⁵¹ Kateva aliki taita ghe ususia, ghe aaitiitiaa nonga kalio atiulu usousoana ia, nau laghe kune teeiela ⁵² ghe vella kaliona atiulu usousoana ia me ghe nim iloula karika kaliona.

Kansolo atoa laghe kookolomi Iesu

(Mat 26:57-68; Luk 22:54-55, 63-71; Jon 18:13-14, 19-24)

⁵³ Laghe ghaala Iesu me laghe laoinie sio ta namu ngateva ta pristi etoa. Namu ngatoa ta pristi etoa, namu ngatoa, me tau ngai aapasunga ngatoa tale inangari nipaopao, laghe velu eitauaala. ⁵⁴ Pita ghe aaimuli me karika ghe akalakalaa ta Iesu. Vara me ghe ssola tale valavala atea ghe taataliaa alena ateva namu ngateva tale pristi etoa. Ghe toka tee siola kapuira tau ngai toitoi etoa pristi etoa tale sama kura atea me ghe maamaruu.

⁵⁵ Namu ngatoa ta pristi etoa me kansolo atoa laghe tootoongala tani pae teva taumattu ghe auliaa righi sesa gheeleiaane Iesu me laghe uvi ematea, me karika laghe tarala teva. ⁵⁶ Katoa taumattu laghe auliaa inangari kamena tee Iesu, me inangariira laghe poppooaa karika ghe laolao aitauaa.

⁵⁷ Vara me katoa etaira laghe tinginala me laghe aikamea teela Iesu tani ue va, ⁵⁸ “Ami ghe nongola ta ghe uela va, ‘Aghi aue arruti velu ale manga ateva taumattu ngatoa laghe atulueta ta nimaira, me elome tale kotolu nau aue aghatulu mene kateva, karika taumattu aue atulua ta nimaira.’ ” ⁵⁹ Me isaa o tee inangari laghe gheleila ghe aikasakasaliaala me ghe aitiuaala.

⁶⁰ Vara me namu ngateva ta pristi etoa ghe tinginala emua etaira me ghe kolomila Iesu va, “Karika aue uliu inangariira? Vaalua tale inangari la ghaauliaa teeio?” ⁶¹ Me Iesu ghe nim maamatuaa tingina me karika poi ghe liula inangariira.

Me namu ngateva ta pristi etoa ghe mene kolomiela va, “Koronna va io Mesaea ngateva, natuna io Goto ateva taumattu ngatoa la tautau sae niarangise etana?”

⁶² Iesu ghe liula me ghe uela va, “Ue, aghi! Aue am tara Natuna ateva Taumattu ngateva ta etoka sio tale pai muenna ativilau ta lo ateva sarasarakana ia, me esio tale karaane epona liu.”

⁶³ Namu ngateva ta pristi etoa ghe rasila ghinnanina, me ghe uela va, “Karika ita mene aloanna mene righi taumattu tani auliaa mene righi inangari. ⁶⁴ Ngam nongola ange ghaala liuna ateva God. Sa ateva am aloanna va ita gheleia etana?”

Laghe uela va, “Ange gheleila ssavoto, ita uvi ematea.” ⁶⁵ Me katoa etaira laghe tiuaala tani kanusua; laghe iri rungaala matane tale kalio, me laghe tuutumaria ta nimaira, me laghe ue va, “Arova propete io, uauliaa va see ange uviuvio!” Me lo atoa la ghaitaraa ale manga ateva laghe ghaaiela me laghe tiuaala tani posalaia.

Pita ghe uela va etam kilakila Iesu

(Mat 26:69-75; Luk 22:56-62; Jon 18:15-18, 25-27)

⁶⁶ Pita ghe tokatoka euu, elome tale valavala atea, me kateva vause kapuna tau ngai uungu ia namu ngateva ta pristi etoa ghe mae sio etana.

⁶⁷ Nau eteva ghe tarala Pita ta ghe maamaruu, ghe lao akalakalangina sio me ghe taatara lao sio etana me ghe uela va, “Io tee ughe kasukasu tee Iesu aNasareti ia.”

⁶⁸ Pita ghe uela va, “Karika poi akilakila isaa ona inangari uaauliaa.” Me ghe kasula me ghe kupi ghoala tale atamana atae. Vara me taita paolo ateva ghe aangarila.†

⁶⁹ Me ia o vause ateva tau ngai uungu ia ghe mene taraiela me ghe uela ta lo atoa laghe tiitingina teeia va, “Kateva tee o.” ⁷⁰ Me Pita ghe mene uela va, “Karika.”

Karika masau me lo atoa laghe tiitingina kalakalaa laghe uela ta Pita va, “Koronna io kateva etaira, poli io aGalilii io.”

⁷¹ Me Pita ghe aulia ngakorokorongana va, “Koronnaaili karika akilakila taumattu ngateva ona am aulieinia. Arova anim kamekame, God aue eghelei righi voto sesa etaghi.”

⁷² Vara me taita paolo ateva ghe mene angari eghaluenela, me Pita ghe annaala inangarina Iesu ghe uela va, “Auena paolo taita ateva eaangari ghaluaata aue uue akasina kotoluaata va karika ukilakilaieghi.” Me ghe ngala alousiusieiliila.

15

Laghe laoa sio Iesu ta Paelat

(Mat 27:1-2, 11-14; Luk 23:1-5; Jon 18:28-38)

¹ Elue talaua poopooa, namu ngatoa ta pristi etoa, namu ngatoa, me tau ngai aapasunga ngatoa tale inangari nipaopao, laghe velu eitauaala me laghe mae aitauaa sio nonga tale kateva ninannaa. Laghe irila Iesu, me laghe kasueiniela tani laoinia ta Paelat.

² Paelat ghe kolomiela va, “Io kingi io ta aJiu etoa?”

Me Iesu ghe uela va, “Ue, nongina uaauliaa.”

³ Me namu ngatoa ta pristi etoa laghe ppoaala ta Paelat oroi voto karika masina ta Iesu. ⁴ Me Paelat ghe mene kolomiela va, “Karika aue uliu? Tarala, oroi inangari ngeila auliaa teeio.”

⁵ Me Iesu karika ghe liula inangarina, me Paelat ghe soghiaala gheeleiaane.

Paelat ghe uela va la ghavukala sae Iesu tale aikotoo

(Mat 27:15-26; Luk 23:13-25; Jon 18:39-19:16)

⁶ Paelat ghe gheelei kateva ase voto nau ekapa atoa nau Pasova ngateva. Ghe tautau velu lo ateva taumattu, taumattu ngatoa la ghanna va ekupi ghoa tale ale mata voovoo. ⁷ Taumattu ngateva, ararina atae ta Barabas, ghe tokatoka tale ale mata voovoo, ia me mene katoa taumattu, poli laghe aiuvii teela gavmani me laghe uvi ematela katoa tana taumattu. ⁸ Taumattu ngatoa laghe lao sio ta Paelat me laghe uela etana va eghelei voto nongina eghelei.

⁹ Paelat ghe kolomilala va, “Am anna va atau velu kapuira kingi eteva aJiu etoa?” ¹⁰ Poli Paelat ghe kilakila va namu ngatoa ta pristi etoa laghe sessaila ta Iesu poli taumattu ngakapa atoa laghe maamasiaa Iesu, liuna avalua o me laghe maeainie sio tale liu niaisakei. ¹¹ Namuu ta pristi etoa laghe suusulungi taumattu tani ue sae ta Paelat va erau mene tau velu Iesu, ta la ghanna va etau velu Barabas.

¹² Me Paelat ghe mene kolomilala va, “Sa ateva am anna va agheleia ta lo ateva am ue va kapuira kingi ia aJiu etoa?”

† **14:68:** Kasina uru ngai laghe pitila, karika laghe pitila va, Vara me taita paolo ateva ghe aangarila. **15:1:** Luk 22:66. **15:5:** Ais 53:7; Mak 14:61. **15:11:** Apos 3:13-14.

¹³ Laghe ovaova atingina tani ue sae va, “Uavukalaie sae tale aikotoo!”

¹⁴ Paelat ghe kolomilala va, “Poli sa? Sa ateva voto sesa ghe gheleila?”

Me laghe mene ovaova anamuu tee lao sio tani ue va, “Avukalaie saela tale aikotoo!”

¹⁵ Poli Paelat ghe aanna tani ghelei emasimasi taumattu ngatoa, liuna avalua o me ghe tau vella Barabas, me ghe taula Iesu ta soldia ngatoa, me laghe uetaiela mua me ghe vira mene tauela va la ghavukalaie sae tale aikotoo.

Soldia ngatoa laghe auliaa teela Iesu tale inangari

(Mat 27:27-31; Jon 19:2-3)

¹⁶ Soldia ngatoa laghe ssoaala Iesu tale tanganuena Gavana ngateva, la kolokoloa va Praetorium ateva, me laghe kolo aitauaala soldia ngatoa me laghe mae akapa sio. ¹⁷ Laghe asaela aiaasae ateva ghueghuenna ia ta Iesu me laghe navitaala kou nguru eteva tale uasa ateva rorroana ia, me laghe atokaie saela ta uruna Iesu. ¹⁸ Me laghe uue etana va, “Ei, kapuira kingi eteva aJiu etoa!” ¹⁹ Me laghe parula uruna ateva tale ai eteae, me laghe kanusuiela, me kateva kateva etaira ghe suusuuiiaa ta liue kkena Iesu tani tau lao ninamu ngateae etana. ²⁰ Laghe ruu ekapala tani attara ta Iesu, me laghe ghaa vella aiaasae ateva ghueghuenna ia laghe asae tau lao sio etana, me laghe asae taula ghinnanina, me laghe ghaaie lao sio tani laa avukalaie sae tale aikotoo.

Laghe avukala saela Iesu tale aikotoo

(Mat 27:32-44; Luk 23:26-43; Jon 19:17-27)

²¹ Saemon atala nge Saerini ia, natuna ta Aleksanda me Rufus, ghe rekata mae sio me ghe aloanna tani kupi sso, me soldia ngatoa laghe aeala me laghe sungiela va esau aikotoo ateva unna ia Iesu. ²² Laghe ghaala Iesu me laghe laoainie sio tale voto ateva ararina atea ta Golgota, malloeana va “Voto ateva arova Riu uru taumattu ngateva”. ²³ Laghe tau lao sio uaeni laghe kaai teela murr ta Iesu, me ghe tam aloannala tani ropi. ²⁴ Me laghe avukala saela Iesu tale aikotoo, me laghe tiuaala tani anamisi tani aikoita ghinnanina.

²⁵ Ta 9 kilok elue talaua* laghe avukala saela Iesu tale aikotoo. ²⁶ Me laghe pitila inangari me laghe avukala tee saela. Laghe pitila laghe uela va, “Terai oia kapuira Kingi ia aJiu etoa.” ²⁷⁻²⁸ Laghe avukala tee saela taita alua lalu ghe aaiuvii me lalu ghe ghaaghaa peiira taumattu ngatoa, kateva ta pai muenna ativilau, me kateva ta pai uaise ativilau.† ²⁹ Taumattu ngatoa laghe kasukasu tapaa salana laghe aauliaa teeia inangari karika masina. Laghe samasama ringaringa me laghe uela va, “Ei! Io oia ughe uela va urooroo tani rruti ale manga ateva me umene atulua ta kotolu nonga nau, ³⁰ erooroo va ghaine uasaangio me ukkure vulu sio aikotoo ateva?”

³¹ Namu ngatoa ta pristi etoa me tau ngai aapasunga ngatoa tale inangari nipaopao laghe aamammarasaia tani ue elome etaira va, “Ghe asaangi katoa, me karika erooroo tani asaangia! ³² Arova Mesaea ia, kapuira kingi ia aIsraeli etoa, ghaine etani kkure vulu sio aikotoo ateva, me aue ita aiesoaa

15:21: Rom 16:13. **15:24:** Sams 22:18. * **15:25:** 9 kilok elue talaua Tale inangari nge Grik, aiaakotonna ateva aoa. **15:27-28:** Ais 53:12. † **15:27-28:** Kasina uru ngai laghe pitila, laghe uela va, 28 Inangari tale Uru ngai Manga ateva laghe pitila ange lutu ekoronala va, “Laghe ioi teeie la va, ie tee sesa taumattu ia.” (Luk 22:37) **15:29:** Sams 22:7; 109:25; Mak 14:58.

etana nau ita tara.” Tau niainao me tau niaiuviu tee alua, lalu ghe aauliaa teeia inangari.

Iesu ghe matela

(Mat 27:45-56; Luk 23:44-49; Jon 19:28-30)

³³ Tale pai ngelo sinaka ativilau[†] me saurrom ateva ghe mae sio, ghe akoula kosa ateva ghe roola kotolu aoa. ³⁴ Me ta 3 kilok elo alai[§] Iesu ghe sama anamungailiila me ghe uela va, “Eloi, Eloi, lama sabaktani?” (malloeanina va, “Kapughu Goto ateva, Kapughu Goto ateva, vaalua me angu tau velueghila?”)

³⁵ Nau katoa taumattu laghe tiitingina akalakalangina laghe nongola isaa o inangari, laghe uela va, “Am nongola, ekolokolo Elaija.”

³⁶ Me kateva taumattu ghe iloula tani laa asuu tuku spans ateva tale uaeni kaakaalina, me ghe apasapasaiela tale ai eteae, me ghe taue saela va Iesu ghe mmua. Ghe uela va, “Ita toitoi mua, me ita tara va kotiva Elaija esio me eghaa velue sio.”

³⁷ Me Iesu ghe ovaova anamungailiila, me inoane ghe kapala.

³⁸ Kalio atiulu ghe vuuvukala tale ale manga ateva ghe tarriila elome, ghe tiuaala epona me ghe laa sio ruu euu. ³⁹ Me nau lo ateva tau ngai uvii eaitoiaa kateva ai (100) tau ngai uvii, ghe tiitingina emua ta Iesu, ghe nongola Iesu ghe samala, me ghe tarala vaalua ghe matela, soldia ngateva ghe uela va, “Koronnaaili taumattu ngateva oia Natuna ia God!”

⁴⁰ Katoa tana vause laghe tiitingina amasau me laghe taatara. Elome etaira Meri aMakdala ia, Salome, me Meri kinairarue ia Jeimis ghauna me Joses. ⁴¹ Nau Iesu ghe tokatoka eGalilii, ila o vause atoa laghe aaimuli teeia me laghe saasausia, me mene oroi katoa vause laghe mae aitaaua teeie sio eJerusalem.

Laghe alokoila Iesu tale lienga niaikkaia ngateae

(Mat 27:57-61; Luk 23:50-56; Jon 19:38-42)

⁴² Nau ghe elo alaila ta nau niaimonomonosia ngateva, lo ateva nau emuli ia ta nau manga ateva, ⁴³ Josep, tanganuena tale masaliki taatara ateae eArimatia, namuu ia ta Kansolo atoa, me ie tee ghe toitoi ararimangalina ateva God, karika ghe moiela tani sso tara Paelat. Ghe loola Iesu tani laa kaieinia. ⁴⁴ Paelat ghe soghila tani nongo va gharovaeaata ta ghe matela, me ghe kolola namu ngateva ta soldia ngatoa, me ghe kolomiela va, “Ange matela?” ⁴⁵ Nau namu ngateva ghe uela va ange matela, Paelat ghe uela va Josep eroroo tani ghaa Iesu. ⁴⁶ Josep ghe polila masi kalio atiulu usousoana ia, ghe ghaa velu siola Iesu tale aikotoo. Me ghe sumuela, me ghe laoainie sio tani alokoia tale lienga niaikkaia ngateae laghe kaie ssola elome tale vallae. Ghe atakirila atu eteva tani atingina runga liu eteva. ⁴⁷ Me Meri aMakdala ia me Meri kinna ia Joses lalu ghe tarala nongina laghe alokoieila.

16

Iesu ghe totula tale nimate

(Mat 28:1-8; Luk 24:1-12; Jon 20:1-10)

¹ Nau eteva nau manga ateva ghe kapala, Meri aMakdala ia, Salome me Meri kinna ia Jeimis, laghe polila oeli masi ngusungusuaane tani laa rariaa

[†] 15:33: pai ngelo sinaka ativilau Tale inangari nge Grik, ghaonomina (6) ateva aoa. 15:34: Sams 22:1. § 15:34: 3 kilok elo alai Tale inangari nge Grik, aiaaghasio (9) ateva aoa. 15:36: Sams 69:21. 15:40: Luk 8:2-3.

ta vilikina Iesu. ² Elue talaua poopooa tale aitiutiu eteva nau, laghe lao sio tale lienga niaikkaia ngateae nau sinaka ateva ang ghe saela. ³ Laghe kasu aaikolomi va, “See aue eatakiri velu atu eteva tale paa lienga atea?”

⁴ Vara laghe taatarala, me laghe tarala va karika teva atu tale paa lienga niaikkaia ngateae, me atu eteva namungaili ia ang ghe toka ppae lao sio. ⁵ Laghe kupi ssola tale paa lienga niaikkaia ngateae, me laghe tarala aliki taita ateva ghe tokatoka tale pai muenna ativilau, ghe aasae ghinna usousoana, me laghe matautula.

⁶ Aliko taita ateva ghe uela etaira va, “Am rau mene matautu. Am paepae Iesu aNasareti ia, ia o ghe matela tale aikotoo. Ange totula, karika ia oia. Am tarala voto ateva laghe alokoiela etana. ⁷ Am laa auliaa ta kapuna disaepolo atoa, me Pita tee, va Iesu ange muemue lao sio eGalili. Aue am sio taraia okae, nongina ghe auliaala etaimim.”

⁸ Gharovaeata ta laghe kupi velu ghoala, me laghe kasu vulila paa lienga niaikkaia ngateae, me laghe iloula. Kovaira ghe tallula, me laghe reterete. Karika laghe aippooa, ta laghe maamatautu.

*Iesu ghe aotuotula ta Meri aMakdala ia
(Mat 28:9-10; Jon 20:11-18)*

⁹ * Nau Iesu ghe totula elue talaua poopooa, tale aitiutiu eteva nau, ghe aotuotue akasinala ta Meri aMakdala ia, ia, ia o Iesu ghe ghaa vella raroai ghaitu (7) etana. ¹⁰ Vause ateva o ghe lao sio ghe auliaala ta lo atoa laghe tokatoka tee Iesu, me laghe aale amate teeia. ¹¹ Me nau laghe nongola Meri ghe uela va Iesu ang ghe sakesakela, me ia ghe taraiela, karika laghe aiesoala.

*Iesu ghe aotuotula ta mene ghalua disaepolo
(Luk 24:13-35)*

¹² Emulina ghe mene aotuotula ta ghalua kapuna disaepolo lalu ghe kasukasu elaolao tale salana atikirighi, me taatarane ghe isaa ppaela. ¹³ Lalu ghe kiri lao sio ta mene katoa kapuna disaepolo tani auliaa, me karika laghe aiesoala.

*Iesu ghe mene aotuotula ta kasangaulu kateva disaepolo
(Mat 28:16-20; Luk 24:36-49; Jon 20:19-23; Apos 1:6-8)*

¹⁴ Emulina ghe mene aotuotula ta kasangaulu kateva (11) kapuna disaepolo, nau laghe namanama. Karika ghe masimasieinilala poli karika laghe aaiesoainia me urunguitaniira korokoronganaaili, ta poli karika laghe aaiesoaa lo atoa laghe auliaa va Iesu ange totula.

¹⁵ Me ghe uela etaira va, “Am lao tale kosa akapa ateva, me am laa ppooaa masi kiukiu tale taumattu ngakapa atoa. ¹⁶ Lo ateva taumattu aue eaiesoaa me la ghasuua, aue esaanga. Lo ateva karika eaiesoaa aue eaisakei me eghaa nimmarikana. ¹⁷ Lo atoa la ghaiesoaa aue la ghelei naimatootoongana: Tale ararighi eteae aue la ghaa velu raroai etoa, me aue la ghaippooaa tale oroieili asease nisama. ¹⁸ Aue la poso katu ngatoa ta nimaira. Arova la ropi righi manu sesaaili, karika la rooroo tani mate. Aue la poso tau sessa atoa me tau sessa atoa aue la masina.”

16:7: Mat 26:32; Mak 14:28. * **16:9:** Llo akasina alua tani vuku pokane laghe piti ekasinala ta nimaira, karika urooroo tani tara Mak 16:9-20. Oro katoa tau ngalomasaanga la aikaaiaa va karika Mak ghe pitiela. Katoa tani taumattu laghe nim tara ssola tale mene kasina kiukiu elome tale Uru ngai Manga ateva me laghe nim piti mae sio ta vuku eteva ta Mak. **16:14:** 1 Ko 15:5. **16:15:** Apos 1:8. **16:16:** Apos 2:38. **16:17:** Apos 2:4; 8:7. **16:18:** Luk 10:19; Apos 28:3-6.

*Iesu ghe saela epona liu
(Luk 24:50-53; Apos 1:9-11)*

¹⁹ Emuli nau Vau eteva Iesu ghe ruula tani aippoaaa teeila, God ghe ghaaiela, me ghe saela epona liu, me ghe tokala tale pai muenna ativilau ta God. ²⁰ Disaepolo atoa laghe lao sio tani ppooa ngakapa see. Vau Palepale ghe uungu eitauaa teeila tani ghelei aiematootoongana atoa tani asarasarakana inangariira.

Masi kiukiu Luk ghe pitiela Inangari emuemua

Luk karika va kateva kapuna disaepolo Iesu, ta dokta ia, ghe kasukasu eitauaa tee Pol. Luk ghe pitila ghalua vuku, Masi Inangarina me Gheegheleiaaira Apostolo atoa, me lalu auliaa kiukiuna Iesu me aitiutiu etoa ninamanama tale ale manga atoa. Eaauliaa oroi voto ghe lutula tale tokatokane Iesu, me inangarina Iesu. Etiuaa tale lutulutuaane Jon tau ngai asuu ia, me eruu tale tottotuaane Iesu. Luk karika ajiu ia, me eapasunga vaalua Iesu eaaloanna taumattu karika ajiu ila, lo atoa karika tue peipeiena ila, lo atoa ajiu laghe kolokolola va “tau ngai ghelei ssavoto ila”, me lo atoa karika arariira. Eaauliaa tee nilooloo sae, Spirit Manga ateva, me nimasimasi.

Tani kila amuemua

Inangari tani tiuaa *1:1-4*

Lutulutuaane Iesu me nau aliki ia *1:5-2:52*

Jon tau ngai asuu ia me Iesu *3:1-4:13*

Iesu ghe uungula eGalilii *4:14-9:50*

Iesu ghe saela eJerusalem *9:51-19:10*

Iesu ghe uungula eJerusalem *19:11-21:38*

Matemateaane me tottotuaane Iesu *22:1-24:53*

Aitiutiu

¹ Namu ngateva Tiopilus, kasina ninamanama ang ghe lao sio, oroi taumattu laghe tootoongaala tani piti kiukiuna voto Vau eteva ghe gheleila me ghe lutula elome etaimami. ² Laghe aaimuli tee inangariira lo atoa laghe tarala isaa o voto ta mataira. Laghe tiula ta nau voto ghe tani tiuaala. Isaa o taumattu ghe uungu tale inangarina ateva Vau ngepona ateva me ila laghe tau mae sio isaa oia kiukiu. ³ Liuna avalua o me aghi tee aghaloanna tani piti eghulughuluena isaa o kiukiu me aghasaokie atu ta ngetam. Aghe uungula oroi nau tani kolomi emasina vaalua isaa o inangari ghe tani tiuaala. Namu ngateva, isaa oia voto ngapitila isaa akapaaili koronna. ⁴ Utara me aue ukila amasina va isaa o inangari laghe apasungaala etam koronna akapa.

Ensolo ateva ghe uela ta Sekaraea va Jon aue elutu

⁵ Nau Herot kingi ia eJiudia, kateva pristi ghe tokatoka, ararina atea ta Sekaraea, tuvuna ia Abija, me vausenna ateva, ararina atea ta Elisabet, ie tee tuvuna ta Eron. ⁶ Ilalua ghulughuluena ilalua ta matane Vau eteva. Lalu ghe aaimuli tee kanna inangari nipaopao me inangarina Vau eteva me karika righi gheeleiaairarua sesa ta matane. ⁷ Me tee, karika righi natuirarua ta poli Elisabet kina ngere ia, me tee lalu ghe taita namuula me vause namuula.

⁸ Kateva nau, kapuna atoa Sekaraea, laghe uungu tani ghelei uunguaaira pristi etoa, me Sekaraea, ie tee ghe uungu. ⁹ Vara me laghe gheleila kasina salana tani kila va saa pristi eteva esso tale rum manga atiulu tani sso ghelei asu eteva masi ngusungusuaane esae ta Vau eteva. Laghe gheleila isaa o voto me laghe kilala va aue Sekaraea esso. ¹⁰ Nau ghe ghelei isaa o voto

tani ghelei asu eteva masi ngusungusuaane, taumattu ngatoa laghe looloo sae eleka, elome tale vanisi eteva tale ale manga ateva.

¹¹ Vara me ensolo ateva kapuna ia Vau eteva ghe otuotula ta Sekaraea. Ghe tiitingina tale pai muenna ativilau tale olta ngateva laghe gheeghelei asu eteva masi ngusungusuaane etana. ¹² Sekaraea ghe tarala ensolo ateva, me ghe soghieiniela, me ghe matautula. ¹³ Me ensolo ateva ghe uela etana va, “Sekaraea, urau mene matautu. Vau eteva ang ghe nongola kalum nilooloo sae etana. Vausenim ateva ta Elisabet aue eghaa aliki eteva taita ia me uase ararina ateae ta Jon. ¹⁴ Nimasimasi aue etoka ta ngetaimalua me aue amalu toka amasina. Oroi tee taumattu aue emasimasi poli aliki eteva aue elutu, ¹⁵ poli ia aue enamuu ta taataraane Vau eteva, me erau mene ropi uaeni me manu sarasarakana. Aue Spirit Manga ateva etoka etana nau ia ta kova kinna, me nau ekapa atoa. ¹⁶ Ia aue ekatulaa oroi taumattu nge Israeli etoa me aue la mene kiri me la oghi lao ta Vau eteva kapuira God ia. ¹⁷ Uunguaane me sarasarakaniaane aue nongina Elaija, me aue emuemue ta Vau eteva. Aue eghelei tamatama atoa me natuira atoa la mae aitauaa, me aue la kateva nonga, me aue eghelei emasina nannaaira lo atoa karika la nongonongo usilaa me aue la ghaa masi ninannaa nongina lo atoa ghulughuluena ila. Aue eghelei taumattu eaimonomosiaa tale maemaeane Vau eteva.”

¹⁸ Me Sekaraea ghe kolomila ensolo ateva va, “Vaalua arooroo tani kila va inangarim koronna, poli ngaghe taita namuula me vausenighi tee ateva ang ghe vause namuula?”

¹⁹ Me ensolo ateva ghe liula me ghe uela va, “Aghi Gabriel. Atiitingina emua ta matane Vau eteva me ia esungieghila tani sio auliaa isaa oia masi inangari ta ngetam. ²⁰ Unongo! Poli karika uaaiesoaa inangarighi, aue upaavoo. Karika aue usama lomosi ta voto aghauliaala aue elutu. Inangarighi aue elutu ekoronna tale nau Vau eteva eaaloanna.”

²¹ Me taumattu ngatoa laghe toitoi poi Sekaraea me ngila ghe nannaa va sa ateva ange lutula me karika ange kupikupi ghoa parasi tale rum manga atiulu. ²² Vara me ghe kupi ghoa mae, me karika ghe roola tani aippooaa teeila, me laghe nim kilala va koti ange tarala teva nitaatara ie nonga ange kilaiela tale rum manga atiulu, poli ghe nim suisui me ghe aimatoonga ta nimane, ta ghe paavoola.

²³ Vara nauna tani uungu ghe ruula, me Sekaraea ghe oghi lao sio tanganuena. ²⁴ Emuli tale isaa o nau, me vausenna ateva ta Elisabet ang ghe suusunuku, me ghe tam aotuotu poila ghe roola ghalima ulana. ²⁵ Ghe uela va, “Vau eteva ghe alousiusi teeieghila, me ang ghele gheleila ia oia voto ateva ange lutu etaghi, tani ghaa velu nipalata ateva etaghi ta mataira taumattu ngatoa.”

Ensolo ateva ghe auliaala kiena Meri va Iesu aue elutu

²⁶ Tale aiaaghaonomina ateva (6) ulanina Elisabet nau ghe suusunuku, Vau eteva ghe suula ensol Gabriel tani sio tale natu masaliki erighi eGalilii, ararina ateae ta Nasareti. ²⁷ Ghe lao sio tani tara aliki vause ateva, karika ghe aso tee poi teva taita, ararina ateae ta Meri. Laghe aseainiela va elai ta Josep, tuvuna ia Deivit. ²⁸ Ensolo ateva ghe lao sio etana me ghe uela va, “Elue talaua etam! God ang ghe arangiseiola, me Vau eteva etokatoka teeio.”

²⁹ Meri ghe soghiaala tani nongo isaa o inangari, me ghe annangailiila va tani saa inangari llo oia. ³⁰ Me ensolo ateva ghe uela va, “Meri, urou mene matautu. Vau eteva aue eghelei masi voto etam. ³¹ Unongo! Aue ukkaai aliki eteva taita ia, me uase ararina atea ta Iesu. ³² Ia aue enamuu, me aue la koloa va Natuna ateva Lo ateva Iaaili Epona. Me Vau eteva God aue egheleia ekingi nongina tuvuna ta Deivit. ³³ Ia aue namuu tale ararimangalina ateva Jekop nau ekapa atoa, me ninamu ngateae etana karika aue ekapa.”

³⁴ Me Meri ghe kolomila ensolo ateva va, “Isaa o voto, vaalua aue elutu, poli karika aghe aso tee poi teva taita?”

³⁵ Me ensolo ateva ghe liula inangarina me ghe uela va, “Aue Spirit Manga ateva emae toka etam, me sarasarakaniaane Lo ateva Iaaili Epona aue eakouo. Ia o aliki eteva aue umolenainia aue emanga, me aue la koloa va Natuna ia God. ³⁶ Unongo, mangalim ta Elisabet ang ghe vause namuula, me ia oia ekakkaai me aue emolena, aliki eteva taita ia. Nau to ang ghe lao sio, laghe ue va karika erooro tani ghaa aliki. Me ia oia esuusunuku ang ghele ghaonomola (6) ulanina. ³⁷ Poli karika teva voto God etam rooro tani ghelei.”

³⁸ Me Meri ghe uela va, “Unongo, aghi kapuna vause tau ngai uungu ieghi Vau ngepona ateva. Erooro tani ghelei etaghi voto nongina uauliaa.” Vara me ensolo ateva ghe kasu vuliela.

Meri ghe lao sio tani tara Elisabet

³⁹ Kasina nau ghe lange sio tale isaa o nau, Meri ghe ailuiluila tani lao tale voto ateva oroi motouru etana tale kateae ppae natu masaliki tale masaliki eteae ejiudia. ⁴⁰ Me ghe kupi ssola tanganuena Sekaraea me ghe tarala Elisabet me ghe uela va, “Elo alai etam.” ⁴¹ Nau Elisabet ghe nongola Meri ghe samasama teeia, aliki eteva ta kovane namungaili ta ghe aisiisiaala, me Spirit Manga ateva ghe pasula ta Elisabet. ⁴² Me ghe sama anamungailiila tani ue va, “Vau eteva ang ghe tau aatu sio niarangise elaulau niarangise etautau ta mene katoa vause. Ia ona aliki eteva ukaakaia aue eghaa niarangise ta Vau eteva. ⁴³ Kalughu sa ateva me kinna ateva Vaughu eteva ange mae sio tani taraieghe? ⁴⁴ Nau eteva anongola ta usamala, arovaeaata ta aliki eteva ta kovaghi emasimasila me eaisiisiaala. ⁴⁵ God aue earangiseio poli ughe aiesoala voto Vau eteva ghe uela va aue elutu ta ngetam.”

Kkinarina atea Meri

- ⁴⁶ Meri ghe uela va,
 “Maamauluaaghi etautau sae ararina atea Vau eteva,
⁴⁷ me urunguitanighi eteva emasimasiangaili God ta eaasaangieghi.
⁴⁸ Aghi nim tau ngai uungu ieghi etana, karika teae ararighi, me ghe taraieghila tale maamasinaane.
 Ia oia vituu eteva me llo auena vituu aue la ue va Vau eteva ghe arangiseieghila,
⁴⁹ Lo ateva sarasarakanaaili ia ghe gheleila voto namungaili etaghi, me ararina atea manga ia.
⁵⁰ Eaapasunga masi aalousiusiaane ta lo atoa la oneoneainia aue etoka ghelei evalua o tale ia oia vituu eteva me llo auena vituu.
⁵¹ Ghe gheleila kinatama voto ta nimana,
 me ta lo atoa la tautau sae nannaaira, aue egheleila la ghaitiuaa see.
⁵² Ghe atoka siola lo atoa taumattu namu ngila me sarasarakanaaili ila

- me ghe atingina saela lo atoa taumattu karika righi arariira.
- ⁵³ Ghe tautau masi voto ta lo atoa taumattu maloona ila, me lo atoa tau peipeiena ila, ghe sungisungi vella, nim ila laghe kasukasu karika laghe ghaaghaa righi voto.
- ⁵⁴ Ghe sausila kapuna tau ngai nongonongo anna atoa ta Israeli etoa, poli eannaa alousiusiaane
- ⁵⁵ ta Abraham me lo atoa tuvuna auena la lutu, nongina ghe auliaala ta tuvuita atoa.”
- ⁵⁶ Meri ghe toka teela Elisabet ghe roola kotolu ulana me ghe vira mene kiriaa lao sio tanganuena.

Lutulutuaana Jon tau ngai aasuu ia

- ⁵⁷ Nauna Elisabet tani molena, me ghe molenaala aliki eteva taita ia.
- ⁵⁸ Lo atoa taumattu tanganueira aitauaa me kapuna atoa, laghe nongola kiukiu vaalua Vau eteva aalousiusiaane ta Elisabet. Laghe masimasi eitauaa teeieala.
- ⁵⁹ Aiaaghaoaluna (8) ateva nau, taumattu ngatoa laghe mae sio tani velu eitauaa tani iso aliki eteva, me laghe aloanna tani ase ararina atea ta Sekaraea, poli ararina ia tamane. ⁶⁰ Kinna aliki eteva ghe uela va, “Karika! Ararina atea ta Jon.”
- ⁶¹ Me laghe uela etana va, “Karika teva kapuimim ararina ia arari etea ona.”
- ⁶² Me laghe aaimatoonga ta nimaira tani kolomi tamana aliki eteva va saa arari etea ealoannaia. ⁶³ Sekaraea ghe aimatoongaala etaira va la ghaa taula teva aipitipiti me epiti inangarina. Inangarina ghe pitila ghe uela va, “Aliko eteva, ararina atea ta Jon.” Taumattu ngatoa laghe soghiaala voto laghe tarala. ⁶⁴ Arovaeaata ta God ghe otila paane ateva Sekaraea, me Sekaraea ghe samala, me ghe mene tiuaala tani sama me ghe tau saela ararina atea God. ⁶⁵ Me lo atoa masaliki kalakalangina ila laghe tarala isaa o voto ghe lutula, me ghe moilala, me kiukiu ghe kasu ekapa seela, me lo akapa atoa laghe tokatoka tale voto ateva oroi motouru etana eJiudia, laghe nongo akapala. ⁶⁶ Lo akapa atoa taumattu laghe nongola, laghe nnaa sosso laala isaa o kiukiu, me laghe aaikolomieinila va, “Aliko eteva oia, aue saa taumattu nau enamuu?” Poli laghe tarala va sarasarakaniaane Vau eteva ghe toka aitauaa teeieala.

Kkinarina atea Sekaraea

- ⁶⁷ Spirit Manga ateva ghe pasula ta Sekaraea, tamane aliki eteva, me ghe aulia ngamuemua alokoila inangari tani ue va,
- ⁶⁸ “Ita tau sae ararina atea Vau eteva, kapuira Goto ia Israeli etoa, poli ghe mae sio tani sausi kapuna taumattu ngatoa me ghe poli aoghi teeilala.
- ⁶⁹ Ghe tau mae sio kateva taumattu sarasarakanaaili ia tani sausita elome ta tuvuna atoa Deivit, kapuna tau ngai nongonongo anna ateva God.
- ⁷⁰ Nongina ghe gheleila inangari nialokoi ta propete atoa manga ila me ila laghe auliaala emua arau,
- ⁷¹ va aue easaangita ta tau ngai ssateeita atoa, me ta nimaira lo atoa esessaieiliila etaita.
- ⁷² Ta poli aalousiusiaane ghe sausila tuvuita atoa, me eannaa inangari manga emua arau ghe aulia ngalokoila

- ⁷³ ghe auliaala inangari nialokoi ta tuvuita ateva ta Abraham.
- ⁷⁴ Eanna tani asaangita ta nimaira tau ngai ssateeita atoa me ita kkaueinia me ita rau mene matautu.
- ⁷⁵ Liuna avalua o me nau ekapa atoa, nau sakesake ita, ita kasu tale salana manga me ghulughuluena ta matane.
- ⁷⁶ Me io, natughu, aue la ghaseo va kapuna propete io Vau eteva; me io aue umuemuea Vau eteva tani aimonomosiaa salane atikirighi,
- ⁷⁷ tani ghelei masalika tale kapuna taumattu ngatoa, vaalua tani saanga me eghaa velu kaluira ssavoto,
- ⁷⁸ tale aalousiusiaane kapuita Goto ateva, me mallanga ngepona liu eteva aue esio etaita
- ⁷⁹ tani tau mae mallanga ateva tale taumattu ngatoa la tokatoka tale saurrom me tootoo nimate ateva
- me tani aitaraa kasukasuaaita tani lao tale salana luei.”
- ⁸⁰ Ia o aliki eteva ghe namuula, me alomasaanganiaane ghe sarasarakanaailiila, me ghe tokatoka tale voto ateva karika righi taumattu etana, elomosina ta ghe vira mene ghaala nauna tani ppooaa tale taumattu nge Israeli etoa.

2

Lutulutuaane Iesu (Mat 1:18-25)

¹ Tale isaa o nau, Siisa Augustus ghe alokoila kateva inangari va la ghaa akapa arariira taumattu ngatoa. ² Nau eteva Kuirinius gavana ia eSiria, laghe gheleila aitiutiu eteva sensis. ³ Liuna avalua o me isaa akapa taumattu ghe oghioghi lao tale masaliki tuvuiria atoa, me gavmani ghe ghaaghaa arariira.

⁴ Poli Josep ararimangalina aitauaa tee Deivit, liuna avalua o me ghe kasu vulila masaliki eteae eNasareti nge Galilii, me ghe saela eJudia tale masalikina atea Deivit, la kolokoloa va Betlehem, tani alokoi ararina atea. ⁵ Ia me vause ateva laghe aseainiela va eghaaia, ararina atea ta Meri, lalu ghe saela va gavmani ghe ghaa arariiraru. Isaa o nau Meri ghe suusunuku. ⁶ Ilalua eBetlehem me ghe ghaala nauna Meri tani molena, ⁷ me ghe molenaala natuna aitiutiu eteva aliki taita ia, me ghe ghiisainiela tale kalio me ghe alokoie siola tale aikaai aneira inana ateva vulumakao atoa, poli isaa akapa ale aiasoaso ghe pasula.

Ensolo atoa laghe auliaala kieira tau ngai toi sipsipi etoa

⁸ Eleka tale masaliki eteae eBetlehem, katoa tana tau ngai toi sipsipi laghe aaitoiaa kieira ghaata kkena tale voto ateva rarrasa etana, eleivoo. ⁹ Me kateva kapuna ensolo Vau eteva ghe rekataala etaira me mallangina ateva ghe talieinilala me laghe matautu saasakiaala. ¹⁰ Ensolo ateva ghe uela etaira va, “Am rau mene matautu, poli amae sio tani auliaa kieimim tale masi kiukiu. Isaa oia inangari aue eghelei isaa akapa taumattu la masimasieili. ¹¹ Ia oia nau eteva aliki eteva, aiasaangimim ia, ange lutula tale masalikina atea Deivit, ia Mesaea ia, me Vau ia. ¹² Vaalua aue am kilaia, aue am taraia ghiighisainia tale kalio, me easoaso tale aikaai aneira inana ateva vulumakao atoa.”

¹³ Arovaea nonga ta mene katoa ensolo oroianaaaili ila la tokatoka epona liu, laghe kaurekatila, me laghe tingina teela ia o ensolo ateva, me laghe tiuaala tani kkaua ararina atea God, laghe ue va,

¹⁴ “Ita tau sae ararina atea Vau eteva epona liu me tale kosa ateva luei aue etoka ta lo atoa God emaamasieinila.”

¹⁵ Nau ensolo atoa laghe kasu vulilala, me laghe saela epona liu, me tau ngai toi sipsipi etoa laghe aippooa ngaitauaala va, “Ita kasu me ita lao eBetlehem, me ita laa tara isaa o voto ange lutula, Vau eteva eauliaala.”

¹⁶ Laghe ailuiluila tani kasu, me laghe laa saopi sio Meri me Josep me aliki eteva, ghe asoaso tale aikaai aneira inana ateva vulumakao atoa. ¹⁷ Nau eteva laghe taraiela, laghe auliaa seela inangarina aliki eteva, ensolo ateva ghe auliaala etaira. ¹⁸ Me ila akapa taumattu ngatoa laghe nongola kiukiu tau ngai toi sipsipi etoa laghe auliaala, me laghe soghiaala. ¹⁹ Meri ghe ailokoia ngakapala isaa o inangari tale urunguitanina, me nau ekapa atoa ghe annaa. ²⁰ Tau ngai toi sipsipi etoa laghe oghiaala, me laghe tau saela ararina atea God, me laghe masimasiangailiila God, poli isaa akapa voto ensolo ateva ghe auliaala, laghe tarala me laghe nongola, nongina ghe auliaala.

Laghe asela ararina atea Iesu

²¹ Aiaaghaoaluna (8) ateva nau laghe isola aliki eteva, me laghe asela ararina atea ta Iesu, kinna karika ghe kaaia me ensolo ateva ghe ase alokoila ararina atea.

Simion me Anna lalu ghe tarala Iesu tale ale manga ateva

²² Ghe ghaala nau ta Josep me Meri tani raarangisana, tani aimulusi tee inangari nipaopao Moses ghe piti elokoila. Liuna avalua o me lalu ghe saula aliki eteva, me laghe saela eJerusalem tani apasungainia ta Vau eteva.

²³ Lalu ghe anna tani aimuli tee Uru ngai Manga ateva eue va, “Isaa akapa aliki taita aitiutiu tani lutu, la taula lao me la ghamangaila ta Vau eteva.”

²⁴ Lalu ghe saela tani ghelei aiaavususuvusua, nongina inangarina Vau eteva ghe auliaala va, “Ghila alua nongina alikao alua, o valusu elua, lalu vira mene naanamuu.”

²⁵ Isaa o nau kateva taumattu ghe tokatoka eJerusalem, ararina atea ta Simion, ghe ghelei nonga voto ghulughuluena, me ghe aaimuli tee God. Spirit Manga ateva ghe tokatoka ta ngetana. Ghe toitoi ia o taumattu ngateva aue alona eusi Israeli etoa. ²⁶ Spirit Manga ateva ang ghe aotula etana va karika aue emate lomosi ta etara mua kapuna Mesaea ngateva Vau eteva. ²⁷ Spirit Manga ateva ghe katulainiela me ghe kupi ssola tale ale ngeleka atiulu tale ale manga ateva, me kinna me tamane Iesu lalu ghe maeaa sio ia o aliki eteva Iesu etana, tani ghelei voto inangari nipaopao eaauliaa. ²⁸ Me Simion ghe sauela me ghe kalopiela, me ghe tau saela ararina atea God, me ghe uela va,

²⁹ “Vau eteva, aghi kapum tau ngai nongonongo anna ieghi, ia oia urooro tani tau velueghi tale luei, nongina ughe auliaala.

³⁰ Mataghi ange tarala kalum niasaangi eteva,

³¹ ughe aimanomanosieiniela ta mataira isaa akapa taumattu ngatoa,

³² ia mallanga ia eaapasunga Vau eteva ta mene katoa patunganue namuu, me aue la gharuaa kapum taumattu nge Israeli etoa.”

³³ Tamana me kinna Iesu lalu ghe soosoghiaa voto Simion ghe aauliaa tee Iesu. ³⁴ Me Simion ghe arangiseilaluela, me ghe uela ta Meri va, “Ia oia natum ateva aue eghelei oroi taumattu nge Israeli, katoa aue la mate, me katoa aue la saanga, aue etoka tani aimatootoongana ta taumattu ngatoa, me karika poi aue la annaia, ³⁵ me aue eghelei nannaaira aisuliaane aue eotu. Me io, Meri, alousiusiaam aue enongina baenata ateva epasapasa urunguitanim ateva.”

³⁶ Vause ateva, propete ia, ghe vause namungailiila, ararina atea ta Anna, natuna ia Panuel, tale ararimangali eteva ta Asa, ie tee ghe tokatoka tale ale manga ateva. Nau ghe laila ghe toka teela taitanna ateva ghaituae (7) ninamanama nonga me taitanna ateva ghe raue vuluela. ³⁷ Taitanna ateva ghe raue vuluela, me ghe tokala ghe roola ghaoalungaulu ghaatiaa (84) anna ninamanama, me ghe kakkaua tale ale manga ateva ellaa me eleivoo, me ghe naenae me ghe looloo sae tale nau laghe suitoongaala va la lao aitauaa etana tale ale manga. ³⁸ Nau Simion ghe aaiippoaa tee Meri me Josep, Anna ghe rekatala, me ghe tiuaala tani tau sae God, me ghe aauliaa aliki eteva ta lo atoa laghe toitoi kapuira tau ngai asaangi eteva Israeli etoa.

Josep me Meri lalu ghe kiriaa siola eNasaret

³⁹ Nau Josep me Meri lalu ghe ghelei ekapala voto tale inangarina Vau eteva, me lalu ghe mene oghi siola tanganueirarua eNasareti, ta pai nge Galilii. ⁴⁰ Ia o aliki eteva ang ghe naanamuu, me sarasarakana ia, alomasaanga ia, me God ghe aarangiseia.

Iesu elome tale ale manga

⁴¹ Isaa akapaaili ninamanama, tamana me kinna Iesu lalu ghe saesae eJerusalem tale nivelu eitaua ngateae, laghe aseasea va Pasova. ⁴² Nau anna ninamanama Iesu ghe kasangaulu ghaluaela (12), laghe saela tale nivelu eitaua ngateae, nongina laghe gheelei arau. ⁴³ Nau nivelu eitaua ngateae ghe ruula, tamane me kinna ngila ghe mene ooghiaa tani lao tanganueira, me taita arighi ta Iesu ghe tokala eJerusalem. Karika lalu ghe kilala. ⁴⁴ Lalu ghe anna va Iesu ghe kasukasu tee mene katoa taumattu. Laghe kasula ghe roola kateva nau, me lalu ghe tiuaala tani paea. Lalu ghe aaikolomainie see, ta mangaliirarua atoa me kapuirarua atoa. ⁴⁵ Nau karika lalu ghe taraiela, lalu ghe mene oghiaa lao sio eJerusalem tani mene paea. ⁴⁶ Ghalua nau ghe lange sio, me lalu ghe taraiela elome tale ale manga, ghe tokatoka tee tau ngai aapasunga ngatoa. Ghe nongonongola, me ghe kookolomila tale nikokkolomi. ⁴⁷ Lo atoa laghe nongonongoa laghe soosoghiaa aalomasaanganiaane, me vaalua ghe liuliu uneira nikokkolomi. ⁴⁸ Nau eteva kinna me tamane lalu ghe taraiela, lalu ghe soghieiniela, me kinna ghe uela etana va, “Natughu, vaalua me ughe ghelei evaluateiengaluela o? Angalua me tamam angalu ghele nannangailiio nau eteva angalu ghele paepaeo.”

⁴⁹ Ghe kolomilaluela va, “Vaalua me amalu paepaeaghi? Amalu rooro tani kila va aghi tale alena ateva Tamaghi.” ⁵⁰ Karika lalu ghe kila amasinala malloeana voto ghe auliaala etairarua.

⁵¹ Me ghe usilaluela, me laghe siola eNasareti, me nau ekapa atoa ghe nongonongo usilainilalua. Me kinna ghe ailokoia ngakapaailila isaa o voto tale urunguitanina ateva. ⁵² Me Iesu ghe naanamuu, me aalomasaanganiaane tee ghe laa saesae, me God me taumattu ngatoa laghe aaloannaailiia.

3

Jon tau ngai aasuu ia ghe aimonomosiaala salana atikirighi
(*Mat 3:1-12; Mak 1:1-8; Jon 1:19-28*)

¹ Tale aiaakasangaulu ghalimae (15) atee ninamanama ta Taiberias Siisa tani aitoiaa eRom, me Pontius Paelat gavana ia eJudia, me Herot ghe aaitoiaa eGalili, me tuena ta Pilip ghe aaitoiaa eIturea me eTrakonitis, me Lisantias ghe aaitoiaa eAbilen — ² isaa o nau Annas me Kaeapas namuu ilalua ta pristi etoa ta aJiu etoa, me isaa o nau tee, Jon natuna Sekaraea ghe tokatoka tale voto ateva karika righi taumattu ta ngetana, me inangarina God ghe mae sio etana. ³ Jon ghe kasukasu ekapa see tale masaliki eJodan, kalakalaa tale ateo atee, me ghe poppooaa ta taumattu ngatoa va la nna ngaiooghioghiaa me la ghaa niasuu, me God aue ekkaluaa kaluira ssavoto.

⁴ Nongina propet Aisaea ghe pitila emua arau, ghe uela va, “Tale voto ateva karika righi taumattu etokatoka etana, lingi ngalo taumattu ngateva ekolokolo, eue va,

‘Am aimonomosiaa salane atikirighi Vau eteva,
am ghelei eghulughuluena akapala salane.

⁵ Aue la rovii liu me voto saesaena pei nikai emasina,
me llo salana viloviloana pei nighelei eghulughuluena
me voto sesaaili aue la ghelei emasina.

⁶ Me taumattu ngakapa atoa aue la tara kanna niasaangi God.’ ”

⁷ Oroienaaili taumattu ghe mae sio ta Jon va easuula, me Jon ghe uela etaira va, “Am nongina va natuira iem katu ngatoa! See euela etaimim va am ilou vuli sessaiaane Vau eteva ange anna tani lutu etaimim? ⁸ Am kunea righi ueimim tani apasunga va ngam ghe vella kaluimim ssavoto. Am rau mene ue va, ‘Ami tuvuna amami Abraham.’ Poli aghaauliaa etaimim va God erooro tani ghelei isaa o atu etuvuna Abraham. ⁹ Kulum ateva aimonomosiaanna ia tani tue akatuu ai, me isaa o ai karika ekuukunea masi uene aue la tue me la sau velu sae tale kuraa atee.”

¹⁰ Me taumattu ngatoa laghe kolomila Jon va, “O sa ateva ami gheleia?”

¹¹ Jon ghe uela etaira va, “Arova ghalua unem sioto, utau lao teva ta lo ateva karika teva unna, me arova righi anem inana, uparruu mene katoa.”

¹² Tau ngai ghaa takis atoa tee laghe mae sio va easuula, me laghe uela ta Jon va, “Tisa, ami vaalua ami ghelei?”

¹³ Jon ghe uela etaira va, “Am ghaa lo viliki veu gavmani eue va am ghaa, am rau mene nim ghaa righi ta aloaloannaaimim.”

¹⁴ Me katoa tana soldia laghe kolomiela va, “Me ami, sa ateva ami gheleia?”

Jon ghe uela etaira va, “Am rau mene amatautu taumattu ngatoa tani ghaa uneira viliki veu, me am rau mene aikameaa. Am masimasi tee aipoliimim.”

¹⁵ Ila akapa taumattu ngatoa laghe toitoi Mesaea ngateva, laghe nannaa va koti Jon Mesaea ia. ¹⁶ Jon ghe uela etaira va, “Aghi aghaasuue tale manu, me mene kateva aue emae, ia sarasarakaniaane elaulau sarasarakaniaa ghi. Karika masi taumattu ngieghi tani pulaka unna ai-iri aikasukasu. Ia aue easuue tale Spirit Manga ateva me tale kuraa atee. ¹⁷ Aue emae arova taumattu ngateva eposoposo unna poko ateva aisaraki uiti ia tani pola uiti tale kou uit, me aue eatoka aitaaua uiti tale ale ngai atoka uiti eteva, me aue evelu sae kou uiti tale kuraa atee karika erooro tani pala.” ¹⁸ Tale oroi asease salana, Jon ghe poppooaa masi kiukiu tale taumattu ngatoa.

¹⁹ Me Herot ia o gavana ia,* Jon ghe uela etana va, “Karika masina ta ughe lai sarila Herodias, poli vausenni ia tuem.” Oroi mene kasina ase gheeleiaane sesa ²⁰ me Herot ghe gheleila voto ateva sesaaili ia, nau ghe atoka ssola Jon tale ale mata voovoo.

Iesu ghe ghaala niaasuu
(*Mat 3:13-17; Mak 1:9-11*)

²¹ Nau Jon ghe aasuu taumattu ngatoa, ghe asuu teela Iesu. Epona liu ghe otiela nau Iesu ghe looloo sae, ²² me Spirit Manga ateva ghe sio mae ta Iesu nongina ghila ateva, valusu ia. Me lingi ngalo ateva epona liu ghe uela va, “Io natughu io, aghaailousiangailiio me masimasiaaghi ta ngetam namungaili.”

Arariira tuvuna atoa Iesu
(*Mat 1:1-17*)

²³ Nau Iesu ghe tiuaala uunguaane koti anna ninamanama kotolungauluae (30). Taumattu ngatoa laghe anna va natuna ia Josep,

Josep natuna ia Heli,

²⁴ me Heli natuna ia Matat,
me Matat natuna ia Livae,
me Livae natuna ia Melki,
me Melki natuna ia Jannai,
me Jannai natuna ia Josep,

²⁵ me Josep natuna ia Mattataeas,
me Mattataeas natuna ia Eimos,
me Eimos natuna ia Nahum,
me Nahum natuna ia Esli,
me Esli natuna ia Naggai,

²⁶ me Naggai natuna ia Mahat,
me Mahat natuna ia Mattataeas,
me Mattataeas natuna ia Semein,
me Semein natuna ia Josek,
me Josek natuna ia Joda,

²⁷ me Joda natuna ia Joanan,
me Joanan natuna ia Resa,
me Resa natuna ia Serubabel,
me Serubabel natuna ia Sealtiel,
me Sealtiel natuna ia Neri,

²⁸ me Neri natuna ia Melki,
me Melki natuna ia Addi,
me Addi natuna ia Kosam,
me Kosam natuna ia Elmadam,
me Elmadam natuna ia Er,

²⁹ me Er natuna ia Josua,
me Josua natuna ia Eliesa,
me Eliesa natuna ia Jorim,
me Jorim natuna ia Mattat,
me Mattat natuna ia Livae,

³⁰ me Livae natuna ia Simion,
me Simion natuna ia Jiuda,
me Jiuda natuna ia Josep,

3:19: Mat 14:3-4; Mak 6:17-18. * **3:19:** gavana Tale inangari nge Grik, *Tetrak*, lo ateva taita ghe aaitoiaa kateva patunganue namuu tale ghaatiae patunganue namuu. **3:22:** Jon 1:32. **3:23:** Luk 4:22; Jon 6:42.

me Josep natuna ia Jonam,
 me Jonam natuna ia Eliakim,
³¹ me Eliakim natuna ia Melea,
 me Melea natuna ia Menna,
 me Menna natuna ia Mattata,
 me Mattata natuna ia Naetan,
 me Naetan natuna ia Deivit,
³² me Deivit natuna ia Jesi,
 me Jesi natuna ia Obed,
 me Obed natuna ia Boasi,
 me Boasi natuna ia Salmon,
 me Salmon natuna ia Nason,
³³ me Nason natuna ia Aminadab,
 me Aminadab natuna ia Admin,
 me Admin natuna ia Arni,
 me Arni natuna ia Hesron,
 me Hesron natuna ia Peres,
 me Peres natuna ia Jiuda,
³⁴ me Jiuda natuna ia Jekop,
 me Jekop natuna ia Aisiki,
 me Aisiki natuna ia Abraham,
 me Abraham natuna ia Tera,
 me Tera natuna ia Nahor,
³⁵ me Nahor natuna ia Seruk,
 me Seruk natuna ia Reu,
 me Reu natuna ia Pelek,
 me Pelek natuna ia Eber,
 me Eber natuna ia Sela,
³⁶ me Sela natuna ia Keinan,
 me Keinan natuna ia Apaksat,
 me Apaksat natuna ia Sem,
 me Sem natuna ia Noa,
 me Noa natuna ia Lemek,
³⁷ me Lemek natuna ia Metiusila,
 me Metiusila natuna ia Inok,
 me Inok natuna ia Jaret,
 me Jaret natuna ia Mahalalel,
 me Mahalalel natuna ia Kenan,
³⁸ me Kenan natuna ia Enos,
 me Enos natuna ia Set,
 me Set natuna ia Adam,
 me Adam natuna ia God.

4

*Namu ngateva ta raroai etoa
 ghe tootoongaala Iesu
 (Mat 4:1-11; Mak 1:12-13)*

¹ Iesu ghe lau sae mae tale ateo atea eJodan, me Spirit Manga ateva ghe pasula etana, me ghe ssoainiela tale voto ateva karika rigi taumattu etana.

² Namu ngateva ta raroai etoa ghe tootoongaala Iesu tale ghaatingaulu (40) nau. Isaa o nau karika ghe namanama poila, me airuuruu tale isaa o nau ghe maloola.

³ Namu ngateva ta raroai etoa ghe mae sio ta Iesu me ghe uela va, “Arova koronna va Natuna io God, uauliaa tale atu etiulu o me ekoli me everete.”

⁴ Iesu ghe liula me ghe uela va, “Uru ngai Manga ateva eaauliaa va, ‘Karika taumattu ngatoa va la maamaulue nonga tale inana.’ ”

⁵ Namu ngateva ta raroai etoa ghe saeaala Iesu tale motouru tani apasunga patunganue namu ngakapa atoa tale kosa ateva oia, me tale ia o tuku nau erighi ghe apasunga ngakapala kosa ateva. ⁶ Me ghe uela ta Iesu va, “Aue atau aatu matuutuliena, me unamuu tani aitaraa isaa o voto. Ta aghe ghaala isaa akapa o voto, me arova aghaloanna tani taula ta see, aue ataula. ⁷ Isaa o voto aue peim arova usuuiaa me ukkaueinaghi.”

⁸ Iesu ghe liula me ghe uela va, “Uru ngai Manga ateva eue va, ‘Ukkaua Vau eteva kapum Goto ia, me uaimulusi teeia nonga.’ ”

⁹ Ghe mene saeaala Iesu tale pungani ale manga ateva eJerusalem, me ghe uela va, “Arova Natuna io God, ulove velu sio. ¹⁰ Ta Uru ngai Manga ateva eue va,

“‘Ia aue esuu kapuna ensolo atoa
tani sio aitaranga masinaailiio,

¹¹ Me aue la sau evukalaio me
karika aue utaghua kekem tale atu.’ ”

¹² Iesu ghe uela etana va, “Uru ngai Manga ateva eue va, ‘Urau mene tootoonga Vau eteva kapum Goto ia.’ ”

¹³ Namu ngateva ta raroai etoa ghe ruu ekapala unna nitotoonga ta Iesu, me ghe kasu vuliela tani mene toi mene teva masi nau ppae.

Iesu ghe tiuaala niuungu eGalili (Mat 4:12-17; Mak 1:14-15)

¹⁴ Iesu ghe ghaala sarasarakana tale Spirit Manga ateva, me ghe kiri lao sio eGalili, me kiukiuna ghe lao sio tale masaliki ekapa atoa. ¹⁵ Ghe aapasunga tale aleira ale nivelu eitaua ngatoa, me ila akapa laghe aarueinia.

Laghe tiu vella Iesu eNasaret (Mat 13:53-58; Mak 6:1-6)

¹⁶ Iesu ghe lao sio eNasareti nongina ghe namuula, me tale nau manga ghe ssola tale ale nivelu eitaua ngateva, nongina eghe gheelei nau ekapa atoa, me ghe tingina saela tani riti Uru ngai Manga ateva. ¹⁷ Me laghe taula vuku eteva unna ia propete Aisaea, laghe aseasea va skrol, ghe pulakaiela, me ghe paela inangari Aisaea ghe pitila, ¹⁸ ghe uela va,

“Spiriti eteva ta Vau eteva etokatoka etaghi,
poli eghe suitoongainaghila
tani ppooaa masi inangari ta lo atoa karika peiira.

Me ghe sungieghila tani ppooaa va la ghaa velu lo atoa tale ale mata voovoo,
mata salusalu etoa aue la taatara,

tani ruu maamatana ta lo atoa la gheelei sesa etaira,

¹⁹ me tani aulia ngaotu va nauna oia Vau eteva tani asaangi kapuna taumattu.”

²⁰ Iesu ghe mene talila skrol ateva, me ghe taue lao sio ta lo ateva ghe aaitaraa skrol atoa, me ghe toka siola tani ppooaa. Ila akapa laghe pasiaala mataira etana, ²¹ me Iesu ang ghe aauliaa etaira va, “Inangari oia tale Uru ngai Manga ateva ange koronnala ghaine tale nongonongoaaimim.”

²² Laghe soghiaala tani nongo masi inangari ghe kupi ghoa mae ta paane, me laghe masimasila, me laghe aaikolomieinila va, “Ia oia natuna Josep, o karika?”

²³ Iesu ghe auliaala etaira va, “Akilakila va aue am ue ta tuku inangari eteva va, ‘Io dokta io, ughelei emasinaio mua.’ Me aue am ue etaghi va, ‘Ughelei mua righi voto oia tanguem, nongina ami ghe nongola ughe ghelei voto eKapenium.’”

²⁴ Ghe mene uela va, “Aghaaulia ngakoronna etaimim va karika toa la rooro tani oneoneaa teva propete tanguueira aitauea me ia. ²⁵ Aghaaulia ngakoronna va oroi vause raue vulu eIsraeli nau ta Elaija, nau karika teva vaoo tale kotoluae (3) ninamanama me ghaonomo (6) ulana, me paka maloo ateva ghe asola eIsraeli. ²⁶ Vau eteva ghe tam suula Elaija va ghe lao ta teva aIsraeli, ta ghe lao sio tale masaliki eteae eSarepat, ta vause raue vulu eteva elome tale patunganue namu ngateae eSaedon. ²⁷ Me tee, oroi taumattu nge Israeli, isiki tasussuku eteva ghe ghaailala, nau ta propete ateva Elaisa, karika laghe raarangisanala, me Naaman nonga, aSiria ia, ghe raarangisanala.”

²⁸ Lo atoa elome tale ale nivelu eitaua ngateva laghe nongola inangarina me ghe sessaieiliilala. ²⁹ Laghe tingina saela, me laghe kuneielala, me laghe ae velue ghoala eleka tale masaliki taatara atea, me laghe saeainiela tale motouru eteva. Laghe aloanna tani bbi velue sio tale vallae. ³⁰ Me Iesu ghe kasula ta mallomeira, me ghe kasu vulilala.

Iesu ghe ghelei emasinala taita ateva raroai eteva etana
(Mak 1:21-28)

³¹ Iesu ghe lao sio eKapenium, masaliki taatara ia eGalilii. Vara nau manga ateva ghe mae sio, me ghe tiuaala tani apasunga inangarina God ta taumattu ngatoa. ³² Laghe soghiaala voto ghe auliaa, ta nonginaaili taumattu ngateva matuutuliena ia.

³³ Elome tale ale nivelu eitaua ngateva, taita ateva, raroai eteva ghe tokatoka etana. Ghe sama anamuula, ³⁴ me ghe uela va, “Iesu aNasareti io, umae sio tani ghelei sa ateva etaimami? Vara ughelei saasakieinamami? Akilakilaio, io manga io kapuna io God.”

³⁵ Iesu ghe uela va, “Urau mene sama! Kupi ghoa mae!” Ghe kupi ghoala, me ghe gheleila taumattu ngateva ghe katuula elome ta taumattu ngatoa, me karika ghe vakovakola.

³⁶ Ila akapa laghe soghiaala tani nongo me tara, me ngila ghe aippooaa elome etaira va, “Saa voto llo oia? Matuutuliena me sarasarakana inangarina! Epoppooaa ta raroai etoa, me la kupikupi ghoa!” ³⁷ Kiukiuna Iesu ghe lao sio tale mene kasina masaliki.

Iesu ghe ghelei emasinala oroi taumattu
(Mat 8:14-17; Mak 1:29-34)

³⁸ Iesu ghe kupi ghoala tale ale nivelu eitaua ngateva, me ghe lao sio tanguue Saemon. Alumuna Saemon ghe iisiki, vilikina ghe aanasa atingina me matana ghe valavalanga. Laghe aulieiniela ta Iesu va esausia. ³⁹ Iesu ghe tingina valaala ta komona vause ateva, me ghe paola isiki eteva, me ghe kapala. Vause ateva ghe masinala, ghe totula, me ghe kaisila aneira inana.

⁴⁰ Nau sinaka ateva ang ghe suusu, laghe maea ngakapa sio taumattu asease isiki etaira, tani ghaa niaisausi ta Iesu. Ghe nim saasaoaa nimana etaira me laghe maamasina. ⁴¹ Raroai etoa laghe kupikupi vulu ghoa taumattu ngatoa, me laghe samasama anamungaili, laghe ue va, “Io Natuna io God.” Iesu ghe paopaola me ghe ue ta raroai etoa va, “Am rau mene sama,” poli ila raroai etoa la kilakila va ia Mesaea ia.

Iesu ghe poppooaa
(Mak 1:35-39)

⁴² Elue talaua poopooa Iesu ghe ssola tale voto ateva karika righi taumattu etana, me laghe paepaea. Nau laghe taraiela, laghe auliaala etana va erau mene kasu. ⁴³ Ghe uela etaira va, “Karika apoppooaa nonga etaimim. Atani ppooaa masi kiukiuna ararimangalina ateva God ta mene kasina masaliki taatara, mausina avalua o me Tamaghi ghe sungieghila.” ⁴⁴ Liuna avalua o me ghe poppooaa tale ale nivelu eitaua ngatoa eJudia.

5

Iesu ghe kolola aitiutiu etoa tana disaepolo
(Mat 4:18-22; Mak 1:16-20)

¹ Kateva nau, Iesu ghe tiitingina elosamarra tale ateo talia ngateae eGenesaret, me oroieili taumattu ngatoa laghe mene tomuela, tani nongo inangarina ateva God. ² Me Iesu ghe tarala paanaka aluepai, lalu ghe vuuvukala tale ateo talia ngateae, me tau ngai pae kko atoa laghe kkure vululaluela, me laghe porapora uneira uvena. ³ Me ghe aikaaila tale gharighi paanaka, unna ia Saemon, me ghe uela ta Saemon va esiki tee ghoa paanaka arighi mala masau elosamarra. Me ghe toka siola tale paanaka arighi, me ghe mene tiuaala tani apasunga.

⁴ Nau ghe ruula tani sama, me ghe uela ta Saemon va, “Ose tee ghoala elo malionge, me am velu sio uneimim uvena aighaa kko.”

⁵ Saemon ghe liula tani ue va, “Namu ngateva, eleivoo ami tootoonga poila tani luku, me karika poi ami ghaala teva, me elue talaua teeiemamila. Me poli angu auliaa, aue amene ghoa velu sio isaa oia uvena.”

⁶ Me nau eteva laghe velu siola uneira uvena, laghe ghaala oroieili kko, me uneira uvena ghaisa ngarighi ghe tarrii. ⁷ Vara me angila ghe palepale lao mene kasina kapuira, laghe vuuvukala tale mene kateva paanaka, tani mae sausila. Me laghe mae sio, laghe kaaila kko tale paanaka alua, me ghaisa ngarighi lalu ghe vuluu.

⁸ Nau eteva Saemon Pita ghe tara avaluela o, ghe tturrula ta liue kkena Iesu, me ghe uela va, “Vau eteva, kasu vulueghila; ta aghi tau ssavoto ieghi.”

⁹ Poli ia me kapuna atoa laghe soghiaala voto oia, nau laghe tarala, ¹⁰ me tee Jeimis me Jon, natuna ilalua Sebedi, lalu ghe uungu eitauaa tee Saemon.

Me Iesu ghe uela ta Saemon va, “Karika umene matautu: aue llo to nau emaemae, aue utau ngai luku taumattu.” ¹¹ Me nau eteva laghe ssola elae, laghe kasu vulula isaa akapa voto me laghe usiela.

Iesu ghe ghelei emasinala
tau tasussukuna ateva
(Mat 8:1-4; Mak 1:40-45)

¹² Kateva nau, Iesu ghe tokatoka tale kateae masaliki, me kateva taumattu, anna tasussuku eteva, ghe tarala Iesu, me ghe suuiaala ta liue kkena Iesu,

me ghe uela etana va, “Vau eteva, marova ualoanna, urooroo tani ghelei eraarangisanaieghi ta mata God!”

¹³ Iesu ghe ssuaala nimana, me ghe posoala, me ghe uela va, “Aghaaloanna. Angu raarangisanala!” Arovaeaata ta tasussuku eteva ghe kasu vulila taumattu ngateva.

¹⁴ Iesu ghe uela etana va, “Urou mene kiukiu ta teva taumattu, ta ulaa tara mua pristi eteva, me ia aue eauliaa ta taumattu ngatoa va angu raarangisanala, me ughelei sae aiaavusuvusuena, nongina Moses ghe auliaala.”

¹⁵ Me kiukiuna Iesu ghe kasu ekapa seela, me oroieili taumattu ghe mae sio tani nongoa, me ghe ghelei emasinailala. ¹⁶ Me oroiaata nau ghe kasukasu vuli taumattu ngatoa, me ghe laolao tale voto karika righi taumattu etana, me ghe looloo sae.

*Iesu ghe ghelei emasinala
tangorengorena ateva*

(Mat 9:1-8; Mak 2:1-12)

¹⁷ Kateva nau, Iesu ghe mene aapasunga, me katoa Paresi me tau ngai aapasunga ngatoa tale inangari nipaopao, laghe mene mae sio tani toka. Laghe kasula eJerusalem, me isaa akapa lutu masaliki eGalilii me eJudia. Me sarasarakaniaane Vau eteva ghe toka aitaava teela Iesu, tani ghelei emasina lo atoa laghe iisiki. ¹⁸ Katoa taumattu laghe sau mae sio kateva taita. Ia oia taita ateva riuna atoa matena ila, me ghe asoaso tale komona atiulu. Laghe aaloanna tani saue sso tale ale ateva tani taue lao ta Iesu. ¹⁹ Me poli oroieili taumattu ghe tokatoka, me karika righi salana tani ssoainia, laghe saue saela epona tale pungani ngale ateva, laghe ghaa vella aiaakou, me laghe taue siola tee komona atiulu elome ta taumattu ngakapa atoa, me emua ta Iesu.

²⁰ Nau eteva Iesu ghe tarala uneira niaiesoaa, me ghe uela ta taumattu ngateva va, “Kapughu, kalum ssavoto ange kapala!”

²¹ Tau ngai aapasunga ngatoa tale inangari nipaopao, me Paresi etoa, laghe tiuaala tani nnaa elome tale nannaaira va, “Saa taumattu ia ierai oia me eaauliaa saasakiaa tee God, nau egheeleia va eaairooa tee God! Poli God nonga erooroo tani kkaluaa ssavoto!”

²² Iesu ghe kilala nannaaira, me ghe uela etaira va, “Vaalua me am nanna isaa ona ase voto tale urunguitaniimim? ²³ Vaalua, malumina tani ue va, ‘Kalum ssavoto ange kapala,’ o tani ue va, ‘Tingina saela, me ukasu?’ ²⁴ Ghaine aghaloanna va am tara kila, va Natuna ateva Taumattu ngateva matuutuliena teeia tani kkaluaa ssavoto tale kosa ateva.” Me Iesu ghe uela ta taumattu ngateva oia va, “Aghaauliaa etam va, tingina saela, me usau komom, me ulao tanganuem!” ²⁵ Katengaata ta taumattu ngateva ghe tingina saela, ta mataira taumattu ngakapa atoa, ghe saula komona ghe asoaso etana, me ghe lao sio tanganuena, me ghe tau saela ararina ateae God. ²⁶ Taumattu ngakapa atoa laghe soghiaala isaa oia voto ghe lutula. Laghe matautula, me ila tee laghe tau saela God, laghe ue va, “Ngami tarala kateva ase voto ghaine!”

*Iesu ghe kolola Livae
(Mat 9:9-13; Mak 2:13-17)*

²⁷ Emulina, Iesu ghe laolao, me ghe tarala tau ngai ghaa takis eteva, ararina ateae ta Livae, ghe tokatoka tale natu ngale arighi aighaa takis ia.

Iesu ghe uela etana va, “Mae usieghi.” ²⁸ Livae ghe tingina saela, ghe kasu vuli ekapaailiila voto, me ghe usiela.

²⁹ Me Livae ghe gheleila kinatama ninamanama atea tanganuena mausi Iesu, me tale ninamanama atea, oroieili tau ngai ghaa takis atoa, me mene katoa taumattu, laghe toka aitauaa teeilalueta. ³⁰ Paresi etoa me tau ngai aapasunga ngatoa tale inangari nipaopao, ila tee Paresi ila, angila ghe samasama anamuu kapuna disaepolo atoa Iesu. Laghe ue va, “Vaalua me am namanama me am ropiropi, aitauaa tee tau ngai ghaa takis atoa me tau ssavoto atoa?”

³¹ Me Iesu ghe liula inangariira me ghe uela va, “Karika va masina atoa la laa taatara dokta, ta isikinna atoa. ³² Karika aghe sio mae tani kolo ghulughuluena taumattu, ta aghe sio mae tani kolo tau ssavoto atoa tani nna ngaioghioghiaa.”

Iesu ghe auliaala uunguaa ninae

(Mat 9:14-17; Mak 2:18-22)

³³ Me taumattu ngatoa laghe uela ta Iesu va, “Oroiaata nau, kapuna disaepolo atoa Jon laghe naenae, me laghe looloo sae, me kapuira disaepolo tee atoa Paresi etoa, la gheelei evalua o. Me io, kapum disaepolo atoa la tam naenae.”

³⁴ Me Iesu ghe uela va, “Marova kateva taita ealoanna tani lai, koti aue am auliaa ta kapuna atoa va la rau mene namanama, nau eteva ia o taita ateva etokatoka teeila? Karika! ³⁵ Me auena, nau la vira ghaaghaa velu taita ateva, ia o nau eteva, la vira nae.”

³⁶ Iesu ghe auliaa teela kateae kiukiu niaimatoonga etaira va, “Marova pokane ateva aiaasae ange tarrila, karika teva taumattu erooro tani mene rasi ouna ateva aiaasae, tani samapi tarrii eteva tale pokane ateva aiaasae. Marova egheelei evalua o, aue eghelei kiikiiuaa ouna ateva aiaasae, me tee ia o ouna ateva aiaasae, karika aue masina tee pokane ateva aiaasae. ³⁷ Karika teva taumattu etottoli kaai ouna uaeni tale pokane ateva aikaai gheelei tale viliki meemee. Marova egheelei evalua o, aue ouna uaeni eghelei polaki aikaai eteva, me aue ilalua akapa uaeni eteva me aikaaina ateva aue lalu peisaane. ³⁸ Liuna avalua o me la tottoli kaai ouna uaeni tale ouna aikaai manu gheelei tale viliki meemee. ³⁹ Me lo atoa taumattu la ropiropi pokane uaeni, karika aue la aloanna ouna. La ue va, ‘Llo pokane masinaaili.’ ”

6

Vau tale nau manga ateva

(Mat 12:1-8; Mak 2:23-28)

¹ Kateva nau manga, Iesu ghe kasu longotila tale utani uiti etea. Kapuna disaepolo atoa laghe ghaala kasina tana uiti, me laghe sapisapulaa vella vilikina ta nimaira, me laghe namala. ² Katoa tana Paresi laghe uela etaira va, “Vaalua me am gheelei voto ona, inangari nipaopao eue va karika masina tani ghelele tale nau manga ateva?”

³ Iesu ghe liula me ghe uela etaira va, “Koti karika am ghe ritila kiukiuna atea Deivit, nau ia me kapuna atoa laghe maloola, ⁴ me ghe ssola tale alena ateva God, me ghe ghaala verete laghe amangala, me ghe namala, me ghe tau lao sio tee ta lo atoa laghe kasukasu teeia. Isaa oia verete karika erooro va nim taumattu enama, ta pristi nonga atoa.” ⁵ Me Iesu ghe uela etaira va, “Natuna ateva Taumattu ngateva Vau ia tale nau manga ateva.”

*Iesu ghe ghelei emasinala taumattu ngateva nimana atelange matena ia
(Mat 12:9-14; Mak 3:1-6)*

⁶ Mene kateva nau manga, Iesu ghe kupi ssola tale ale nivelu eitaua ngateva tani ppooaa, me kateva taita ghe tokatoka, nimane muenna atelange matena ia. ⁷ Tau ngai aapasunga ngatoa tale inangari nipaopao, me Paresi etoa, laghe taatara usiusi Iesu, laghe aloanna tani kila va aue eghelei emasina tau sessa atoa ta nau manga ateva, o karika. Laghe paepae righi salana tani laooa Iesu tale niaisakei. ⁸ Me Iesu ang ghe kila vella nannaaira, me ghe uela ta taumattu ngateva, nimana atelange matena ia, va, “Tingina saela, me la taraio.” Me ghe tingina saela.

⁹ Me Iesu ghe uela etaira va, “Aghaloanna tani kolomiem kateva voto. Emaamasina tani ghelei masi voto, o sesa voto, ta nau manga ateva? Tani asaangi maamauluaa kateva taumattu, o tani turungia?”

¹⁰ Ghe aitara ngakapa seela etaira, me ghe uela ta taumattu ngateva va, “Korosila nimam atelange.” Me ghe gheleila, me nimana atelange ghe masinala nongina emua arau. ¹¹ Me tau ngai aapasunga ngatoa tale inangari nipaopao, me Paresi etoa, ghe sessai etinginailala. Me angila ghe aailoe va, “Sa ateva ita gheleia ta Iesu?”

*Iesu ghe kolola 12 apostolo
(Mat 10:1-4; Mak 3:13-19)*

¹² Kateva nau tale isaa o nau, me Iesu ghe saela tale motouru tani looloo sae, ghe looloo saela ta God tale ia o voo ngateva, lomosi ta ghe paila. ¹³ Nau eteva ghe paila, ghe kolo aitaualala kapuna disaepolo atoa, me ghe suitoongaala kasangaulu ghalua (12), me ghe mene aselala va apostolo ila. ¹⁴ Kateva ta Saemon (Iesu ghe aseala va Pita etana), me ghe kolo teela Andru, tue me nenga ilalua me Saemon, me Jeimis, me Jon, me Pilip, me Batolomiu, ¹⁵ me Matiu me Tomas, Jeimis natuna ia Alpeas, me Saemon laghe asease Selot etana, ¹⁶ me Jiudas natuna ia Jeimis, me Jiudas Iskariot, ia auena ghe tau lao Iesu ta nimaira tau ngai ssateena atoa.

*Iesu ghe ghelei emasinala oroieili
taumattu ngatoa
(Mat 4:23-25)*

¹⁷ Iesu me ila o kapuna disaepolo atoa, laghe sio mae tale motouru eteva, me laghe tinginala tale malaale. Ia, me oroieili kapuna disaepolo atoa, me oroieili tee taumattu, laghe kasula tale distriki eteva eJiudia, me masaliki taatara ateae eJerusalem, me tale samarra ateva kalakalangina tale masaliki taatara aluae eTaer me eSaedon, ¹⁸ laghe mae sio tani nongoa, me laghe maeaa tee sio kapuira tau sessa atoa va la masina. Me lo atoa tee sesa spiriti eteva ghe tokatoka etaira, Iesu ghe ghelei emasinailala. ¹⁹ Me oroieili taumattu angila ghe paepaea tani nim tulia, poli sarasarakana ghe kasukasu etana, me ghe ghelei emasina akapailala.

*Nimasimasi me nialousiusi
(Mat 5:1-12)*

²⁰ Iesu ghe taatara lao sio ta kapuna disaepolo atoa, me ghe uela va, “Aue emasinaaili ta lo atoa karika tue peipeiena am, poli ararimangalina ateva God kaluimmi ia.

²¹ Aue emasinaaili ta lo atoa ghaine am maamaloo, ta auena essoiem.

Aue emasinaaili ta lo atoa ghaine am aalousiusi, ta auena am kanga.

²² Aue emasinaaili etaimim nau eteva taumattu ngatoa la sessa teeiem, me nau eteva la aatoka apolapolaiem, me la lakolakoam, me la ue va, 'Io sesa taumattu io,' mausi Natuna ateva Taumattu ngateva!

²³ "Am rooroo tani masimasi nau eteva llo o elutu, me am loku, me am masimasi, poli namungaili aipoliimim etoitoiem epona liu. Nongina emua arau, tuvaira atoa laghe gheleila isaa oia voto ta propete atoa.

²⁴ "Me am lo atoa tue peipeiena am, aue esesaaili etaimim, poli nimasimasi ghaine am ghaaghaa, auena ekarika.

²⁵ Me am lo atoa ghaine esossoiem, aue esesaaili etaimim; auena am maloo!

Me lo atoa ghaine am kangkanga, aue esesaaili etaimim; auena am alousiusi me am ngala!

²⁶ Me marova taumattu ngakapa atoa la aasaesae arariimim, aue esesaaili etaimim; nongina emua arau, tuvaira atoa laghe gheleila isaa oia voto ta propete kamekame atoa.

Tani ailousiaa tau ngai ssateeita atoa
(Mat 5:38-48; 7:12)

²⁷ "Me aghaauliaa ta lo atoa am nongonongo, va am ailousiaa tau ngai ssateeimim atoa, am ghelei masi niuungu ta lo atoa la sessa teeiem. ²⁸ Am arangise lo atoa la poppooaa saasakiaa teeiem, me am pure ta lo atoa la aloanna tani ghelei saasakieiniem. ²⁹ Me marova teva eposala kativilau bbam, utau lao mene kativilau me eposala teeia; me marova teva taumattu ealoanna tani ghaa unem aiaasae ngeleka ateva, masina eghaa tee unem sioto ateva. ³⁰ Utau lao peim ta lo ateva ekolomio, me marova lo ateva ange ghaala righi peim, urau mene kolomia va emene kiriaa mae. ³¹ Am ghelei voto ta mene kateva taumattu nongina am aloanna va emene ghelei mae etaimim.

³² "Marova am ailousiaa nonga lo atoa la aailousieiniem, vaalua me am aaloanna tani ghaa nimasimasi? Poli tau ngai ghelei ssavoto atoa tee la ailousiaa lo atoa la aailousieinila! ³³ Me marova am ghelei emasina ta lo atoa la ghelei emasina etaimim, vaalua me am aaloanna tani ghaa nimasimasi? Tau ngai ghelei ssavoto tee atoa, la ghelei evalua o! ³⁴ Me marova am tau viliki veu nonga ta lo atoa am nannaa va ila aue la mene liu etaimim, vaalua me am aaloanna tani ghaa nimasimasi? Tau ngai ghelei ssavoto tee atoa la tautau viliki veu ta tau ngai ghelei ssavoto atoa, me ila tee la annaa va aue la ghaa ailiuli! ³⁵ Am ailousiaa tau ngai ssateeimim atoa, me am ghelei masi voto etaira; am aiparruaa viliki veu, me am rau mene nnaa va am mene ghaa ailiuna. Poli am, aue am ghaa namungaili aipolipoli, me aue natuna iem lo ateva Iaaili Epona. Ta eghelei masina ta lo atoa karika la kaakaili emasina me lo atoa sesa gheeleiaaira. ³⁶ Am alousiusi tee mene katoa taumattu, nongina Tamaimim ateva ealousiusi teeiem."

Am rau mene auliaa katoa gheeleiaaira
(Mat 7:1-5)

³⁷ Iesu ghe mene uela va, "Am rau mene ue va katoa nonga taumattu la ghelei ssavoto, me God karika aue eue teeiem va am tee am ghelei ssavoto; am rau mene sunganaa tau lao sesa aipolipoli ta kateva; me God karika aue esunganaa tau aatu sesa aipolipoli etaimim. Am kkaluaa gheeleiaa kateva

taumattu, me God aue ekkaluaa gheeleiaaimim. ³⁸ Am parruu, aue God emene tau aatu etaimim; ekaai, me emonnaa tau sio, me emene kaai, me aue epasu, me aue ekao velu kasina. Llo am tautau lao ta katoa, aue God emene tau aatu nongina am tautaula.”

³⁹ Iesu ghe kiukiuuuala kateae kiukiu niaimatoonga, “Teva mata salusalu karika erooroo tani katulaa mene teva mata salusalu; marova egheelei, aue lalu katuu velu sio tale liu eteva. ⁴⁰ Tau ngai ghaa alomasaanga ateva karika namuu ia ta kapuna tau ngai aapasunga ngateva. Nau ange kila akapala voto, aue enongina kapuna tau ngai aapasunga ngateva.

⁴¹ “Vaalua me utaata nonga vovovongo ta matana kapum ateva, me karika utaata paka palanga ateva ta matam? ⁴² Vaalua me ualoanna tani ue ta kapum ateva va, ‘Kapughu, aghaaloanna tani ghaa velu tuku vovovongo ateva ta matam,’ me io karika urooroo tani tara paka palanga ateva ta matam? Usimaghalue io, ughaa velu mua paka palanga ateva ta matam, me utaata amasina tani ghaa velu tuku vovovongo ateva ta matana kapum ateva.

*Ai eteae me uene
(Mat 7:17-20; 12:34-35)*

⁴³ “Masi ai eteae karika ekuukuneeaa sesa ue ngai, tee sesa ai eteae karika ekuukuneeaa masi ue ngai. ⁴⁴ Isaa akapa ai la taatara kila tale ueira la kuukuneeaa. Karika am ghaaghaa ue ngai tale uasa karasa atikirighi, me ue uasa tale ai rorroana atea. ⁴⁵ Masi taumattu ngateva eaapasunga masi voto tale masi urunguitanina ateva, me sesa taumattu ngateva, sesa voto eghooa tale llo sesa etokatoka tale urunguitanina ateva. Sesa voto taumattu ngateva egheelei, etokatoka tale urunguitanina ateva, eaapasunga nau eteva eaaippooaa.”

*Tau ngalomasaanga ateva me alo kapakapa ateva lalu ghe atulula ale alua
(Mat 7:24-27)*

⁴⁶ Iesu ghe mene auliaa tee lao sio va, “Vaalua me am aseaseaghi va, ‘Vau eteva,’ me karika am gheelei nongina aghaauliaa? ⁴⁷ Aue aghapasunga va saa taumattu ia lo ateva emaemae etaghi, me enongonongo inangarighi, me eaimulusi tee. ⁴⁸ Ia nongina lo ateva taumattu ghe kai liu siola, me ghe atulula alena ateva epona tale atu. Nau eteva ateo atea ghe ghoala, me ghe akala poila ale ateva, karika poi ghe aisiisiaala, poli ghe atulu ekororonganaailiela. ⁴⁹ Me lo ateva taumattu enongonongo inangarighi, me karika egheelei, ia nongina lo ateva taumattu ghe atulula alena ateva tale kosa karika kororongana. Me nau eteva ateo atea ghe ghoala, me ghe akalala ale ateva, ale ateva ghe katuula, me ghe akalainiela.”

7

*Aikaiaane kapuira namu ngateva
tau ngai uvii etoa*

(Mat 8:5-12; Jon 4:43-54)

¹ Nau eteva Iesu ghe ruula tani auliaa isaa o voto ta nongonongoa taumattu ngatoa, me ghe ssola eKapenium. ² Kateva namuu ghe aaitoiaa kateva ai (100) tau ngai uvii, kapuna tau ngai nongonongo anna ateva ghe isikila, me ghe aailousiangailiia, me ang ghe aainasiaa tani mate. ³ Namu ngateva ta tau ngai uvii etoa ghe nongola va Iesu ang ghe rekatala, me ghe suula namuu ta aJiu etoa, tani laa koloa va emae ghelei emasina

kapuna tau ngai nongonongo anna ateva. ⁴ Nau laghe lao sio ta Iesu laghe aipoopoliangaili tani kolo Iesu, me laghe ue va, “Utani sausia, ⁵ poli eailousiangailiita ajiu etoa, me ghe sausitala tani atulu aleita ale nivelu eitaua ngateva.” ⁶ Liuna avalua o me Iesu ghe usilala.

Ang ghe aakalakalaa tanganuena, me namu ngateva ta tau ngai uvii etoa ghe suula kapuna atoa tani laa ue etana va, “Vau eteva, urau mene nnaa. Karika masina ieghi va umae tanganueghi. ⁷ Mausina avalua o me karika ataataraioghi va masi taumattu ieghi tani mae taraio. Anim anna va uppooaa teva tuku inangari, me aue kapughu tau ngai nongonongo anna ateva emasina. ⁸ Aghi tee auungu ta namu ngatoa, me aghaaioiaa katoa tani tau ngai uvii. Arova aue ta kateva va, ‘Lao sio,’ aue elao, va aue va, ‘Mae sio,’ aue emae, me arova aghele ue ta kapughu tau ngai nongonongo anna ateva va, ‘Gheleila llo toko,’ egheelei.”

⁹ Iesu ghe soghieiniela nau ghe nongoala. Ghe kiriela, me ghe taatara lao sio ta taumattu ngatoa laghe aaimuli teeia, me ghe uela va, “Aghaauliaa etaimim va ia oia ase niaikaiaa ngateva namuu ia, karika aghe tara poia eIsraeli.” ¹⁰ Me taumattu ngatoa ghe sungilala, laghe oghi lao sio elo ale, me laghe tarala tau ngai nongonongo anna ateva, ta ang ghe masinala.

Iesu ghe totula natuna aliki taita ateva vause raue vulu eteva

¹¹ Kasina nau ghe lange sio, me Iesu ghe lao sio tale masaliki eteae eNain. Kapuna disaepolo atoa me tana taumattu ngatoa laghe usiela tani lao. ¹² Nau ang ghe reerekata tale namu ngateae atamana tale ia o masaliki eteae, me ngeila ghe sausau emae ghoaa taumattu ngateva matena ia. Vause ateva raue vulu ia, ie nonga o natuna ateva ghe matela. Me oroieili taumattu tale ia o masaliki eteae laghe usiusi kinna. ¹³ Nau Vau eteva ghe taraiela, urunguitanina ateva ghe alousiusi teeila, me ghe uela etana va, “Urou mene ngala.”

¹⁴ Ghe lao sio tale aisalo atea laghe sausaua etana, me ghe posoala, me lo atoa laghe sausaua laghe matua atinginala. Me ghe uela va, “Taita ateva, aghaauliaa etam va totula!” ¹⁵ Taumattu ngateva matena ia ghe totu etokala, me ghe tiuaala tani sama. Me Iesu ghe taue lao sio ta kinna.

¹⁶ Taumattu ngatoa laghe soghiaala, me laghe tau saela God, me laghe ue va, “Propete ateva namuu ia ange rekataala elome etaita. Me God ange mae sio tani sausi kapuna taumattu ngatoa.” ¹⁷ Isaa o kiukiuna Iesu ghe kasu ekapa seela eJudia, me tale distriki kalakalangina eJudia.

Iesu me Jon tau ngai aasuu ia (Mat 11:2-19)

¹⁸ Kapuna disaepolo atoa Jon laghe aulia ngakapala isaa o kiukiu etana. Ghe kolola ghalua, ¹⁹ me ghe sungilaluela va lalu laa kolomi Vau eteva va, “Io ia o taumattu ngateva laghe uela va aue emae, o aue ami mene toi ppae mene teva?”

²⁰ Nau lalu ghe laa rekata sio ta Iesu, lalu ghe uela ta Iesu va, “Jon tau ngai aasuu ia esungiengaluela tani mae kolomio va, ‘Io ia o taumattu ngateva laghe uela va aue emae, o ami mene toi ppae mene teva?’ ”

²¹ Ia o nau eteva, Iesu ghe ghelei emasinala oroi taumattu tau sessa, me lo atoa raroai etoa laghe tokatoka etaira, me ghe gheleila mata salusaluna atoa laghe taatarala. ²² Ghe liula ta lo atoa Jon ghe sungilala va, “Am oghi lao sio, me am laa ghauliaa ta Jon llo ngam tarala, me ngam nongola. Mata

salusaluna atoa la taatarala, me vereverenna atoa la kasukasula me tasusukuna atoa la raarangisanala, me talinga volongo atoa la nongonongola, me matena atoa la totula, me lo atoa karika peiira la nongola masi kiukiu. ²³ Me aue emasinaaili ta taumattu ngateva, unna niaiesoaa etam kaakatuu vulueghi.”

²⁴ Vara me lo atoa Jon ghe sungilala laghe kasula, me Iesu ghe tiuaala tani auliaa Jon ta taumattu ngatoa. Ghe ue va, “Sa ateva am ghe ssola tani taraia tale voto ateva karika rigghi taumattu etana? Pitpiti eteva ghe kuukuueinia? ²⁵ Arova karika, tani sa ateva am ghe kasueiniela tani sso taraia? Teva taumattu ghe aasae rigghi masi ghinna? Karika va isaa avalua o, ta lo atoa la asae masi ghinna, me la tokatoka tale masi nitoka, la tokatoka tanganuena king. ²⁶ Tani sa ateva am ghe kasula tani sso taraia? Propete ateva? Aghaauliaa etaimim va ue, me emene laulau mene katoa propete. ²⁷ Ia o taumattu ngateva, Uru ngai Manga ateva ghe aaulieinia nau ghe uela va,

“ ‘Tarala, aue asuu aikasuaa inangarighi eteva emuemueinio, me ia aue eaimonomosiaa ngamuemue ngalokoi salam.’

²⁸ Aghaauliaa etaimim va, ta lo atoa laghe lutula tale kosa ateva oia, karika teva erooroo ta Jon. Me lo ateva karika teae ararina, me iaaili euu tale ararimangalina ateva God, elaulau Jon.”

²⁹ (Taumattu ngakapa atoa, me tau ngai ghaa takis atoa, nau laghe nongola inangarina Iesu, laghe akoronnala va salane God koronna, poli Jon ghe asuulala. ³⁰ Paresi etoa me lo atoa tau ngalomasaanga ila tale inangari nipaopao, laghe ratila aloaloannaane God etaira poli karika va Jon ghe asuulala.)

³¹ Me Iesu ghe mene uela va, “Sa ateva voto arooroo tani auliaa me eaimatoonga taumattu tale lo ateva oia vituu? Me ila saa taumattu ngila? ³² Ila nonginaaili aliki etoa la tokatoka tale liu nianamisi, katoa la ue lao ta mene lutu katoa va,

“ ‘Ami ghe vuuvuu kkinari nilai eteae etaimim, me karika am ghe lokuloku; ami ghe uuei kkinari nialousiusi, me karika am ghe ngangngala.’

³³ Nau Jon tau ngai aasuu ia ghe mae sio, me karika ghe namanama verete, me karika ghe ropiropi uaeni, am ue va, ‘Raroai eteva ghe tokatoka etana.’

³⁴ Me nau Natuna ateva Taumattu ngateva ghe mae sio, me ghe namanama, me ghe ropiropi, am ue va, ‘Tau ninamanama ia, me tau niropiropi ia, me kapuira ia tau ngai ghaa takis atoa, me tau ssavoto atoa.’ ³⁵ Masi ninannaa kannaa God eaapasunga va koronna ia tale maamauluaaira lo akapa atoa la aaimuli teeia.”

Vause ateva sesa gheegheleiaane ghe kaola masi aiaaoo ta Iesu

³⁶ Kateva Paresi ghe kolola Iesu va ghe laa namanama teeia tanganuena. Liuna avalua o me Iesu ghe lao sio tanganuena, me ghe lao sio tale tevoo tani namanama. ³⁷ Kateva vause tale ia o masaliki eteae, tau ngai ghelei ssavoto ia, ghe nongola va Iesu ghe namanama tanganuena Paresi eteva. Liuna avalua o me ghe ghaa lao sio aikaai eteva alabasta ia, pasu ia tale aiaaoo masinaaili ngusungusuaane. ³⁸ Ghe suuiaala emuli ta liue kkena Iesu, me ghe tiuaala tani ngala, me ghe apposi kkena Iesu tale rarum matane, me ghe

uluulu tale uu nguruna, me ghe nguungusuaa kkena, me ghe kaokao masi aiaaoo.

³⁹ Paresi eteva ghe koloala ghe tarala isaa o voto, me ghe tiuaala tani nna ngainao elome etana va, “Arova taumattu ngateva oia va propete ia, aue ghele kila va see eposoposoa, ta vause ateva oia tau ssavoto ia.”

⁴⁰ Iesu ghe liula etana me ghe uela va, “Saemon, aghanna tani auliaa kateva voto ta ngetam.”

Saemon ghe liula me ghe uela va, “Tisa, aulieiniela.”

⁴¹ Iesu ghe kiukiuuuala kiukiu eteae, ghe uela va, “Taumattu ngalua lalu ghe ghaala viliki veu pei niliu ta kateva taumattu. Kateva ghe ghaala ghalima ai (500) silva koen, me mene kateva ghe ghaala ghalimangaulu (50). ⁴² Karika teva etairarua ghe roola tani liu unna viliki veu lao taumattu ngateva. Liuna avalua o me ghe uela va unna viliki veu pei niliu enim vulla. See etairarua aue eailousiangaili ia o taumattu ngateva?”

⁴³ Saemon ghe liula me ghe uela va, “Aghannaa va koti lo ateva taumattu, unna viliki veu pei niliu oroi.”

Iesu ghe liula me ghe uela va, “Angu aulia ngakoronnala.”

⁴⁴ Vara me ghe kiriela, me ghe taatara lao sio ta vause ateva, me ghe uela ta Saemon va, “Tarala vause ateva o. Amae sio tanguem, me karika utau mae sio righi manu aipora kkeghi. Eporala kkeghi tale rarum matane, me eulula tale uu nguruna. ⁴⁵ Karika unguueghila nau arekatala, me ia, nau akupi sso mae arau, karika ghe ruu poi tani ngusu kkeghi. ⁴⁶ Io karika ukaola righi oeli ta urughu, me ia ekaola llo masi ngusungusuaane ta kkeghi. ⁴⁷ Liuna avalua o me aghauliaa etam va kanna ssavoto oroieili, ange kapala, liuna avalua o me ailousiaane namungaili. Me lo ateva karika oroi llo laghe kkaluaala etana, aielousiaane karika namuu.”

⁴⁸ Me Iesu ghe uela ta vause ateva va, “Kalum ssavoto ange kapala.”

⁴⁹ Mene katoa laghe kololala tani mae namanama, laghe ue elome etaira va, “See etana ierai, me eue va ekakkaluaa ssavoto?”

⁵⁰ Iesu ghe uela ta vause ateva va, “Kalum niaikaiaa ange asaangiola. Kasula tale luei.”

8

Vause atoa laghe kasukasu tee Iesu

¹ Emulina, Iesu ghe lao sio tale mene kasina masaliki taatara me llo masaliki ghauna, tani ppooaa masi kiukiu tale ararimangalina ateva God. Kasangaulu ghalua (12) disaepolo laghe usiusia, ² me tee lo atoa vause Iesu ghe tiu vella raroai etoa me ghe ghaa vella isiki etoa etaira; Meri aMakdala ia, lo ateva vause ghaitu (7) raroai laghe kupi ghoala etana; ³ Joana vausenna ia Kusa (Kusa ia namuu ia ta lo atoa laghe aaitaraa voto tale paa ngalena ateva Herot); Susana; me oroila mene katoa vause. Ila laghe saasausi Iesu me kapuna atoa tani tau lao peiira me viliki veu tani sausi niuungu.

Kiukiu niaimatoongana tale tau ngai pasa katu ue ngai eteva (Mat 13:1-9; Mak 4:1-9)

⁴ Taumattu ngatoa laghe kasukasu tale masaliki taatara atoa tani mae tara Iesu. Nau laghe oroieili ila, me Iesu ghe auliaala kiukiu niaimatoongana atea, ghe uela va, ⁵ “Tau ngai pasa katu ue ngai eteva ghe kasula tani pasa katu ue ngai. Nau eteva ghe kaokaoaala katu ue ngai, kasina katu ue ngai ghe katuula tapaa salana, me laghe asala me ghila atoa laghe namala. ⁶ Kasina ghe katuula tale voto ateva sakolo ia. Nau eteva ghe piipinosa, ghe

mallela me ghe mmatela, ta poli euu atu ia, me karika righi manu. ⁷ Kasina ghe katu ssola elome tale uasa karasa atoa, me nau eteva laghe pinosa aitauaa teela uasa karasa atoa, uasa karasa atoa laghe kavili ematelala. ⁸ Kasina ghe katuula tale masi kosa. Ghe pinosala me ghe kuneaala katu ue ngai ghe roola kateva ai (100), me ghe laula ooroiaa llo katu ue ngai ekasina ghe kaokaoaala.”

Nau eteva ghe ruula tani kiukiu, ghe sama anamuula me ghe uela va, “Lo ateva talingane manee tani nongo, aue enongo.”

Mausina kiukiu niaimatoongana
(Mat 13:10-17; Mak 4:10-12)

⁹ Kapuna disaepolo atoa Iesu laghe kolomiela tale malloeanina kiukiu niaimatoongana atea. ¹⁰ Iesu ghe uela va, “Alomasaanga tale voto eaaisulia tale ararimangalina ateva God, Tamaghi ghe tau aatu sio etaimim, me ta mene katoa aghaauliaa kiukiu niaimatoonga, poli, “‘La taatara, me karika aue la tara kila; la nongonongo me karika la aalomasaanga tee.’

Iesu ghe auliaala malloeanina kiukiu niaimatoongana atea
(Mat 13:18-23; Mak 4:13-20)

¹¹ “Malloeanina kiukiu niaimatoongana atea ia avalua toko va: Katu ue ngai eaaimatoonga inangarina ateva God. ¹² Llo ghe katuula etapaa salana eaaimatoonga lo atoa la nongonongo, vara me namu ngateva ta raroai etoa emaemae, me eghaaghaa velu inangari tale urunguitaniira. Liuna avalua o me karika aue la aikaiaa me la saanga. ¹³ Llo tale voto ateva sakolo ia, aue la masimasi tani nongo inangarina God, me aikaiaaira karika aluse, ta poli karika righi oaira. Nau nitootoonga emae, aue la katuulu God. ¹⁴ Llo katu ue ngai ghe katu ssola elome tale uasa karasa eaaimatoonga lo atoa la nongonongo, me nau la tokatoka, la nannangaili asease voto atoa, me la aloanna tani tue peipeiena, me la aloanna tani ghaa voto aue eaamasimasi maamauluaaira, me isaa o voto aue ekavili ekatungila. Me karika aue la kunea righi uene. ¹⁵ Katu ue ngai tale masi kosa eaaimatoonga lo atoa masina nannaaira me urunguitaniira masina, la nongonongo aikaiaa inangari, me la posoposo parasi tale inangarina ateva God me la kuukunea masi ue ngai.

Lam atea tale aitiitinginane ateva
(Mak 4:21-25)

¹⁶ “Karika teva eaarokoti lam atea me eaakou rungainia tale teva aiaku manu, me eaatoka pakeainia tale aisalo. Ta eaatokaie sae tale aitiitinginane ateva, me lo atoa la kupi sso tale ale ateva, aue la taatara etana. ¹⁷ Me karika righi voto eaaisulia va aue etam otu, me karika righi voto la aituttuia va aue etam otu, va taumattu ngakapa atoa karika aue la kila. ¹⁸ Lo ateva righi voto etana, God aue emene tau lao kasina etana; me lo ateva karika righi voto etana, voto eannaa va isaa etana, God aue eghaa velu etana.”

Iesu, kinna me nengane atoa
(Mat 12:46-50; Mak 3:31-35)

¹⁹ Vara me kinna Iesu me nengane atoa laghe mae sio tani tara Iesu, karika laghe roola tani lao akalakalangina ta Iesu, poli oroieili taumattu ngatoa. ²⁰ Katoa laghe auliaala ta Iesu va, “Kinam me nengam atoa ila eleka, me la ghaloanna tani taraio.”

²¹ Iesu ghe liula me ghe uela va, “Lo atoa la nongonongo inangarina ateva God me la gheelei uunguaane, ila kinaghi ila me nengaghi ila.”

Iesu ghe paola ttasi eteva me ghe lueila
(Mat 8:23-27; Mak 4:35-41)

²² Kateva nau Iesu me kapuna disaepolo atoa laghe aikaaila tale paanaka ateva, me Iesu ghe uela va, “Ita lao tale pai kativilau tale ateo talia ngateae.” Vara me laghe tiu ghoala. ²³ Nau eteva laghe oseose elaolao, Iesu ghe asekane alokoila, me ghe llusula. Paka kuukuu ttasi eteva ghe lutu teeilala, me ang ghe aavuluu paanaka ateva, me laghe tokala tale paka nimoia.

²⁴ Disaepolo atoa laghe angunila Iesu me laghe uela va, “Vau eteva, vau eteva, ngita raaraua!”

Iesu ghe tingina saela me ghe paola kuukuu eteva me paka kotoo atoa laghe aakope, me ttasi eteva ghe kapala, me luei eteva ghe asola. ²⁵ Ghe kolomila kapuna disaepolo atoa va, “Vaalua karika righi aikaiaaimim?”

Tale nimoia laghe soghiaala voto oia ghe lutula, me ngila ghe aaikolomieinila va, “Saa taumattu ia lo ateva oia? Esamasama tee ttasi eteva me kotoo atoa, me la nongonongo usilainia.”

Iesu ghe ghelei emasinala taumattu ngateva raroai etoa etana
(Mat 8:28-34; Mak 5:1-20)

²⁶ Laghe ose lao sio tanganue aGerasa* ngatoa, tale mene pai kativilau eGalilii. ²⁷ Nau Iesu ghe tingina ssola elae, taita ateva, raroai etoa laghe tokatoka etana, tale masaliki taatara atea, ghe ghoa mae tani sou Iesu. Oro nau ang ghe lao sio ghe tam aasae righi ghinna, me ghe tam tokatoka tale teva ale ta ghe tokatoka tale liu niaikkaiaa. ²⁸ Nau ghe tarala Iesu ghe aore anamungailiila, me ghe tturru siola ta liue kkena Iesu, me namungaili ta ghe samala me ghe uela va, “Sa ateva ualoannaia etaghi Iesu, Natuna io God iaaili Epona? Aghaaloanna va urau mene ghelei righi sesa etaghi!” ²⁹ Poli Iesu ghe aulia ngasarasarakana ta raroai etoa va la kupi vulu ghoa ia o taumattu ngateva. Oroiaata raroai etoa ngila ghe tokala etana, liuna avalua o me nau laghe iriiri poi nimane me kkena tale sene, me taumattu ngateva ghe aaitoiaa poia, ghe gheeghelei patepate sene, me raroai etoa laghe kookoueinie see tale voto karika righi taumattu etana.

³⁰ Iesu ghe kolomiela va, “See ia ararim atea?”

Ghe liula va, “Aghi Liijen,” ta oroi raroai etoa laghe tokatoka etana. ³¹ Me laghe aipoopolia ta Iesu va ghe rau mene suu vella lao tale liu eteva karika aioghioghi etana.

³² Oroieili mosu ghe tingina suesue see tale motouru. Raroai etoa laghe kookolomi esarasarakanaaili ta Iesu va etau vella me la laa kupi sso ta mosu etoa, me Iesu ghe tau vellala. ³³ Nau eteva raroai etoa laghe kasu vulila taumattu ngateva oia, laghe kupila mosu etoa, me mosu etoa laghe aikarati velu siola tale voto ateva sionsiona ia, me laghe aoso velu siola tale ateo talia ngateae, me ghe arropi ematelala.

³⁴ Lo atoa laghe aaitaraa mosu, laghe tarala vaalua isaa o voto ghe lutula. Laghe iloula tani laa kkailaa tale masaliki taatara atea, me mene kasina lutu masaliki kalakalangina. ³⁵ Me taumattu ngatoa laghe lao sio tani tara isaa o voto ghe lutula. Nau eteva laghe mae sio ta Iesu, laghe tarala taumattu ngateva ia o raroai etoa laghe kasu vuliela, ghe tokatoka ta liue kkena Iesu, ghe molu etokala, me nannaane ang ghe masinala; me laghe matautula.

³⁶ Lo atoa laghe tarala, laghe auliaala kiukiuna taumattu ngateva oia, raroai

* **8:26:** aGerasa Kasina uru ngai laghe pitila, laghe ue va aGergesa, kasina laghe ue va aGadara.

etoe etana, saa voto ghe lutula, me ghe masinala. ³⁷ Isaa avalua o me taumattu tale masaliki eteae eGerasa me llo masaliki kalakalaa etana, laghe kolomila Iesu va ekasu, poli paka nimoia ateva ghe ghaailala. Iesu ghe aikaaila tale paanaka ateva, me laghe aimonomosiaala tani kasu.

³⁸ Taumattu ngateva raroai etoe laghe kasu vuliela, ghe aloannaaili tani usi Iesu. Iesu ghe sungi aaoghiela, me ghe uela etana va, ³⁹ “Ukiri lao tanganuem, me ulaa ghaulaa saa voto God ghe gheleila etam.” Liuna avalua o, taumattu ngateva oia ghe lao sio tanganuena, me ghe kiukiuuuala tale masaliki taatara atea saa voto Iesu ghe gheleila etana.

Vause arighi matena ia me vause ateva isikina ia
(*Mat 9:18-26; Mak 5:21-43*)

⁴⁰ Nau eteva Iesu ghe oghiaala, taumattu ngatoa laghe souela tale nimasimasi, poli ila akapa laghe aloanna tani taraia. ⁴¹ Taumattu ngateva ararina atea ta Jaeras, namuu ia tale ale nivelu eitaua ngateva, ghe mae sio, me ghe suuiaala ta liue kkena Iesu, poli ghe aloannaaili va Iesu ghe usia, me lalu ghe lao tanganuena, ⁴² poli kateva nonga ia natuna aliki vause ateva, anna ninamanama eroroo kasangaulu ghaluae (12), me ang ghe aainasiaa tani mate.

Nau eteva Iesu ang ghe laolao, taumattu ngatoa laghe tomtomua. ⁴³ Me vause ateva rae ateva ghe iiloueinia ghe roola kasangaulu ghaluae (12) ninamanama, ie tee elome ta taumattu ngatoa. Ghe rungiala unna viliki veu tani ghaa niaisausi,† me karika teva ghe roola tani ghelei emasinaia. ⁴⁴ Ghe keola emuli ta Iesu, me ghe posola euu tale sama unna aiaasae ateva Iesu, me katengaata nonga ta rae ateva ghe ruula tani ilou.

⁴⁵ Iesu ghe kolomila va, “See etulieghila?”

Nau eteva laghe uela va karika poi teva ghe tuliela, Pita ghe uela va, “Vau eteva, taumattu ngatoa oroieili ila, me la aikerreii tani atu etam.”

⁴⁶ Me karika ta Iesu ghe mene uela va, “Kateva etulieghila; aghateateaala va kasina tani sarasarakana ange kasula etaghi.”

⁴⁷ Me vause ateva, ghe kilala va karika ghe roola tani aisulia, ghe moiela, me ghe lao sio tani suuiaa ta liue kkena Iesu. Ta mata taumattu ngatoa, ghe auliaala mausi saa, me ghe tulila Iesu, me vaalua arovaeaata nonga ta ghe masinala. ⁴⁸ Iesu ghe uela ta vause ateva va, “Natughu, tale unem niaikaiaa etaghi angu masinala. Kasula tale luei.”

⁴⁹ Nau eteva Iesu ghe aippooaa, me taumattu ngateva ghe kasula tanganuena Jaeras, ia o namuu ia tale ale nivelu eitaua ngateva, ghe rekatala. Ghe uela va, “Natum vause arighi ange matela. Urou mene ghelei va emene aanasa ta tisa ngateva.”

⁵⁰ Iesu ghe nongola, me ghe uela ta Jaeras va, “Urou mene matautu; unim aikaiaa, me aue emasina.”

⁵¹ Nau eteva ghe rekatala tanganuena Jaeras, ghe tam aloannala righi taumattu tani usie sso elo ale, ta Pita nonga me Jeimis, Jon, me tamane me kinna aliki vause arighi, ila nonga laghe ssola. ⁵² Taumattu ngatoa laghe ngangngala, me laghe aalousiusi teeia. Iesu ghe uela va, “Angenna ngam ngalala. Aliko vause arighi karika ematela, ta enim aseasekanua.”

⁵³ Laghe kangainiela, ta laghe kilakila va aliki vause ateva matena ia. ⁵⁴ Iesu ghe kune siola nimane atelange, me ghe uela va, “Aliko erighi, totula!”

⁵⁵ Aliko vause arighi ghe sakesakela, me arovaeaata ta ghe laa sio totu, me ghe tingina saela. Me Iesu ghe uela etaira va la tau lao righi inana, me

† **8:43:** Kasina uru ngai laghe pitila, karika laghe uela va Ghe rungiala unna viliki veu tani ghaa niaisausi. **8:48:** Luk 7:50.

enama. ⁵⁶ Tamane me kinna lalu ghe soghiaala tani tara, me Iesu ghe aulia ngakorokorongana etairarua va lalu rou mene auliaa ta righi taumattu isaa o voto ghe lutula.

9

Iesu ghe suula 12 disaepolo (*Mat 10:5-15; Mak 6:7-13*)

¹ Iesu ghe kolo aitauaala kasangaulu ghalua (12) kapuna disaepolo, me ghe taula sarasarakana me nimatuutuliena etaira tani ghaa velu raroai, me tani ghaa velu isiki ta taumattu ngatoa. ² Me ghe sungilala tani laa ppooa ngaotu ararimangalina ateva God, me tani ghelei emasina tau sessa atoa. ³ Ghe uela etaira va, “Am rau mene ghaa righi voto nau am kasu. Karika mene tiulu aikkatulu tani kkatulu, teva aikaai ghinna, me righi inana me viliki veu, me karika am mene ghaa ghalua aiaasae. ⁴ Me arova am laa toka tale lo ateva ale, am toka elaa ghaa nau am kasu vuli lo ateae o masaliki. ⁵ Me arova karika la ghaaiem, am kasu. Nau am kasu, am rariaa velu kosa ta kkeimim, me aue la kila va voto laghe gheleila karika masina.” ⁶ Me disaepolo atoa laghe kasula tani laa ppooaa see masi inangari tale kateae kateae masaliki, me tani ghelei emasina tau sessa atoa.

Herot ghe aloanna tani kila va Iesu tani see ia (*Mat 14:1-12; Mak 6:14-29*)

⁷ Gavana ngateva Herot ghe nannangaili ta ghe nongola oroieili voto Iesu ghe ghelei, poli laghe uue va Jon ang ghe mene totula tale nimate, ⁸ me katoa laghe uue va Elaija ghe kaurekatila, me katoa laghe uue va kateva ta propete atoa emua arau ang ghe mene totula. ⁹ Liuna avalua o me Herot ghe ue va, “Jon ngaghe auliaala me laghe sai pulela alona atiulu, me tani see ia taumattu ngateva oia, amene nongonongo uunguaane?” Me ghe aaloanna tani taraia.

Iesu ghe taula inana ta 5,000 taumattu (*Mat 14:13-21; Mak 6:30-44; Jon 6:1-14*)

¹⁰ Apostolo atoa laghe kiriaa mae sio ta Iesu, me laghe aulia ngakapala voto laghe gheleila. Ghe ghaailala, me ila nonga laghe lao sio tale masaliki taatara ateae eBetsaida. ¹¹ Nau taumattu ngatoa laghe nongola va ang ghe kasula, laghe aimulila etana. Ia ghe masimasieinilala, me ghe tiuaala tani ppooaa ararimangalina ateva God etaira, me ghe ghelei emasina tau sessa atoa.

¹² Auena sinaka ateva ghe suu, me kasangaulu ghalua (12) disaepolo laghe lao sio, me laghe uela ta Iesu va, “Sungi vellala, me la lao tale righi masaliki, o paa ngutana, tani laa poli righi inana me la nama, me la ghaso. Ta voto ateva oia ita tokatoka etana vurunganna ia.”

¹³ Iesu ghe uela etaira va, “Am, am taula righi inana, me la nama.”

Laghe liula me laghe uela va, “Ghalima nonga verete me ghaluepai kko. Ualoanna va ami laa poli see righi aneira inana?” ¹⁴ Erooroo ghalima airari (5,000) taita oia ghe tokatoka.

Iesu ghe uela ta disaepolo atoa va, “Am laa ghauliaa etaira va la laa toka aitauaa sio ghalimangaulu (50) taumattu ta kateae uela.” ¹⁵ Disaepolo atoa laghe auliaala, me laghe toka siola tale uela. ¹⁶ Iesu ghe ghaala verete ghalima me kko aluepai, me ghe taatara saela epona liu, me ghe kaili emasina saela, me ghe pirila, me ghe taula ta disaepolo atoa tani laa

koita ta taumattu ngatoa. ¹⁷ Laghe namala, me ila akapa laghe tuvula, me disaepolo atoa laghe kaai esokosokoiaala tapiri nginana, ghe roola kasangaulu ghaluae (12) laka.

Pita ghe aulia ngaotula va Iesu tani see ia
(Mat 16:13-19; Mak 8:27-29)

¹⁸ Kateva nau Iesu ghe puupure, me kapuna disaepolo atoa laghe tokatoka teeia, me ghe kolomilala va, “Taumattu ngatoa la uue va aghi tani see?”

¹⁹ Laghe liula me laghe uela va, “Katoa la ue va io Jon tau ngai aasuu ia, me katoa la ue va io Elaija, me katoa la ue va io kateva ta propete atoa emua arau ang ghe mene totula.”

²⁰ Me ghe kolomilala va, “Me am, am ue va aghi see?”

Me Pita ghe liula me ghe uela va, “Io kapuna Mesaea ngateva God.”

Iesu ghe uela va aue emate me emene totu
(Mat 16:20-28; Mak 8:30-9:1)

²¹ Iesu ghe paolala va karika la mene laa ghauliaa see va ia see. ²² Me ghe uela va, “Natuna ateva Taumattu ngateva aue eghaa oroieili mmarikana, me namu ngatoa, me namu ngatoa ta pristi etoa, me tau ngai aapasunga ngatoa tale inangari nipaopao, aue la liu viliira etana, me aue la uvi ematea. Me aue kotonna ateva nau, emene totu.”

²³ Vara me ghe uela ta kapuna disaepolo atoa va, “Arova lo ateva ealoanna tani usieghi, etani sioaa nannaane, me esunuki unna aikotoo ateva nau ekapa atoa, me eaimuli etaghi. ²⁴ Ta poli arova lo ateva eannaa nonga maamauluaane, aue eraua. Me arova lo ateva eraua ta poli mausighi, aue esaanga. ²⁵ Me arova lo ateva eghaa voto akapaaili tale kosa ateva, me maamauluaane ekapa, vaalua isaa o voto aue esausia? ²⁶ Arova lo ateva taumattu epalatainaghi me inangarighi eteva, aue Natuna ateva Taumattu ngateva epalatainia, nau eteva emae tee maamallangiaane, me maamallangiaane Tamane, me tee kapuna ensolo atoa manga ila. ²⁷ Aghaulia ngakoronna etaimim va katoa oia etaimim am tiitingina, karika aue am mate, me aue am tara ararimangalina ateva God.”

Vilikina Iesu ghe mene isaa ppaela
(Mat 17:1-8; Mak 9:2-8)

²⁸ Koti ghaoalu (8) nau ghe lange sio, nau ghe ppoaala llo inangari, me ghe kolola Pita me Jon me Jeimis, me laghe saela tale motouru tani looloo sae. ²⁹ Ghe looloo sae, me taatara matane ghe isaa ppaela, ghinnanina ghe usousoanaailiila, me ghe ravaravaienaailiila. ³⁰⁻³¹ Vara me ghalua taumattu, Moses me Elaija, lalu ghe kaurekatila tale mallanginaane ateva God, me lalu ghe samasama tee Iesu. Lalu ghe aauliaa saa llo voto aue elutu etana eJerusalem, me vaalua aue ekasu vuli kosa ateva oia. ³² Matana Pita me mene ghalua tana kapuna ghe maamatana tani asekanu. Me nau laghe totula, laghe tarala mallanga ateva ta matana Iesu, me mene ghalua lalu ghe tiitingina teeia. ³³ Me nau lalu ghe aloanna tani kasu vuli Iesu, me Pita ghe uela ta Iesu va, “Vau eteva, masina ta ngeita tokala oia, me angatolu atulu ale paapali kotolu, kateva alem ia, me kateva alena ia Moses, me kateva Elaija.” Pita ghe auliaala isaa o inangari, me karika ghe kilakila sa ateva ghe aulieinia.

9:19: Luk 9:7-8. **9:20:** Jon 6:68-69. **9:22:** Luk 9:44; 18:32-33. **9:23:** Mat 10:38; Luk 14:27.

9:24: Mat 10:39; Luk 17:33; Jon 12:25. **9:26:** Mat 10:33; Luk 12:9. **9:30-31:** Luk 9:22. **9:32:**

2 Pita 1:16-18.

³⁴ Nau Pita ghe aauliaa isaa o inangari, me urukookoo ateva ghe akoulala, me ngilotolu ghe maamatautu. ³⁵ Lingi ngalo ateva ghe mae sio tale urukookoo ateva, ghe uela va, “Ia o taita ateva natughu ia, ngaghe suitoongainiela. Am nongoa.” ³⁶ Nau lingi ngalo eteva ghe ruula, me laghe tara nongala Iesu. Nau laghe oghi sio mae, karika laghe auliaa poila ta mene toa tale voto laghe tarala.

Iesu ghe ghelei emasinala taita arighi raroai eteva ghe tokatoka etana
(Mat 17:14-18; Mak 9:14-27)

³⁷ Ghe paila ta mene kateva nau, nau eteva laghe sio mae tale motouru eteva, me laghe tarala oroieili taumattu ngatoa, laghe mae sio tani sou Iesu. ³⁸ Kateva etaira ghe samala me ghe uela va, “Tisa! Mae tara natughu eteva, ta kateva nonga natughu, me ughelei emasinaia. ³⁹ Nau eteva raroai eteva ekupikupia, esamasama anamungaili, me egheeleia eoo, me usouso paane eghoa, me eghelei saasakiaa vilikina, me karika poi ekasukasu vuli parasia. ⁴⁰ Anim auliaa poila ta kapum disaepolo atoa tani ghaa velu raroai eteva, me karika la roola.”

⁴¹ Iesu ghe liula me ghe uela va, “Am lo ateva oia vituu, karika righi uneimim niaiesoaa, nannaaimim me gheeleiaaimim karika ghulughuluena. Ghaisaata aue atoka teiem, me ghaisaata aue asau sesa gheeleiaaimim? Ghaa mae natum ateva.”

⁴² Nau aliki eteva ghe maemae, me raroai eteva ghe sau velu elokoie siola tapaa kosa, me ghe tiuaala tani oo. Iesu ghe paola raroai eteva, me ghe ghelei emasinala aliki eteva, me ghe tauela ta tamana. ⁴³ Ila akapa taumattu ngatoa laghe soghiaala tani tara sarasarakaniaane God.

Ghaluene Iesu ghe uela va aue emate
(Mat 17:22-23; Mak 9:30-32)

Taumattu ngakapa atoa laghe nannangaili isaa akapa voto Iesu ghe gheleila, me Iesu ghe uela ta kapuna disaepolo atoa va, ⁴⁴ “Am nongo amasina sa ateva aghaaulieinia ta ngetaimim, va Natuna ateva Taumattu ngateva aue la taue lao ta nimaira taumattu ngatoa.” ⁴⁵ Karika laghe alomasaanga teela malloeanina inangari Iesu ghe auliaala, ta malloeanina ghe aaisulia etaira. Laghe maamatautu tani kolomia.

See aue enamuu?
(Mat 18:1-5; Mak 9:33-37)

⁴⁶ Kateva nau, laghe aaissakeana va tani see aue enamuu etaira. ⁴⁷ Iesu ghe kilala nannaaira, liuna avalua o me ghe ghaala aliki erighi, me ghe mae atingina valainie sio etana. ⁴⁸ Vara me ghe uela etaira va, “See umasimasi tani aikoloaa aliki etoa tale ararighi eteae, ughaaghaa teeieghi, me ughaaghaa tee lo ateva ghe sungieghila. See etaimim esio euu, ia namuu ia etaimim.”

See karika tau ngai ssateeimim ia, kapuimim ia
(Mak 9:38-40)

⁴⁹ Jon ghe liula me ghe uela va, “Vau eteva, ami ghe tarala taumattu ngateva, ghe sungi vella raroai etoa tale ararim atea, me ami ghe tootoonga tani pao rungania, poli karika va eusiusita.”

⁵⁰ Iesu ghe uela va, “Am rau mene paoa, ta lo ateva karika esessa teita, kapuita ia.”

aSameria ngatoa karika laghe aloanna va Iesu ghe lao tanganueira

⁵¹ Nauna Iesu ang ghe aakalakalangina tani sae epona liu, me ghe annaaili tani sae eJerusalem. ⁵² Ghe sungi emuemuela katoa kapuna tani laa ghaimanomanosieinila tale kateae masalikiira aSameria ngatoa. ⁵³ Karika laghe aloanna tani aikoloainia, ta poli ghe aloanna tani sae eJerusalem. ⁵⁴ Disaepolo alua ta Jeimis me Jon, lalu ghe tarala ta laghe ghelei evaluela o, me lalu ghe kolomila Iesu va, “Vau eteva, ualoanna va ami kolo sae kura atea epona liu, me esio ataila?”* ⁵⁵ Iesu ghe kiriela, me ghe paolalueta,† ⁵⁶ me laghe mene lao sio ta mene kateae masaliki.

Iesu ghe auliaala vaalua tani aimuli teeia

(Mat 8:19-22)

⁵⁷ Nau laghe kasukasu elaolao tapaa salana, kateva taumattu ghe uela ta Iesu va, “Aghaloanna tani usio nongina eaa ulao.”

⁵⁸ Iesu ghe liula me ghe uela va, “Paua nge tapaa tuvui etoa tue liuira, me ghila atoa aleira, me Natuna ateva Taumattu ngateva karika teva alena tani laa ghasekanua etana.”

⁵⁹ Me ghe uela ta mene kateva taumattu va, “Mae usieghi.”

Me taumattu ngateva ghe liula me ghe uela va, “Vau eteva, utau velueghi mua, me alaa kaiaa tamaghi.”

⁶⁰ Iesu ghe uela etana va, “Utau vella matena atoa la laa kaiaa matena atoa. Me ukasu, me ulaa ghaulaa see ararimangalina ateva God.”

⁶¹ Kateva ghe uela ta Iesu va, “Aghi aghaloanna tani usio, me utau velueghi mua, me alaa ghakorova kapughu etoa tanganueghi.”

⁶² Iesu ghe liula me ghe uela etana va, “Arova teva taumattu eoseose me etaatara lao emuli, karika erooroo tani uungu tale ararimangalina ateva God.”

10

Iesu ghe suula 72

¹ Emulina tale isaa o voto, Vau eteva ghe mene suitoongaala ghaitungaulu ghalua (72),* me ghe sungi emuemueilala ghalua ghalua ta ngetaira, tani lao akapa see tale masaliki taatara, me tale masaliki auena ghe lao etana. ² Ghe uela ta ngetaira va, “Utana atingiu ang ghele matuela, me tau ngai uungu etoa karika oroi ila. Liuna avalua o, am kolomi sae Vau tale tau ngai mukemuke ateva, va emene sungi toa tau ngai mukemuke, tani lao tale utana atingiu matuenna ia. ³ Am kasula! Asungisungiem nongina natu sipsipi etoa la tiitingina tee sesa paua ngetapaa tuvui etoa. ⁴ Karika am mene ghaa aikaai viliki veu, aikaai ghinna, o aiaasae tale keke. Karika am mene tingina aippooaa elaolao etapaa salana.

⁵ “Nau am kupi sso tale ale ateva, am ue akasina va, ‘Luei etoka tale ale ateva oia.’ ⁶ Marova teva taumattu tale luei etokatoka, kaluimim luei aue easo ta ngetana; marova karika, aue luei eteva eoghi atu ta ngetaimim. ⁷ Am toka tale ia o ale ateva, marova la tau aatu inana me manu, am ghaa,

9:54: 2 Ki 1:9-16. * **9:54:** Kasina uru ngai laghe pitila, laghe uela va Vau eteva, ualoanna va ami kolo sae kura atea epona liu, me esio ataila, nongina Elaija ghe gheleila? Utara 2 Kingi etoa 1:10-12. † **9:55:** Kasina uru ngai laghe pitila, laghe uela va me ghe uela etairarua va, “Karika amalua kilakila saa spiriti eteva etoka etaimalua. ⁵⁶ Natuna ateva Taumattu ngateva karika ghe sio mae tani uvi emate taumattu, ta tani asaangila.” **9:61:** 1 Ki 19:20. **10:1:** Mak 6:7. * **10:1:** Kasina uru ngai laghe pitila laghe uela va, ghaitungaulu (70). **10:2:** Mat 9:37-38; Jon 4:35. **10:3:** Mat 10:16. **10:4:** Mat 10:7-14; Mak 6:8-11; Luk 9:3-5. **10:7:** 1 Ko 9:6-14; 1 Tim 5:18.

poli emaamasina va tau ngai uungu eteva eghaa aipolipoli tale uunguaane egheelei. Karika am mene kasu ekapa see tale ale atoa.

⁸ “Nau am lao tale masaliki taatara me la ghaaiem, am nama inana la tau aatu. ⁹ Am ghelei emasina tau sessa atoa, me am ue ta ngetaira va, ‘Ararimangalina ateva God ange kalakalanginginala etaimim.’ ¹⁰ Me marova am sso tale masaliki taatara, me la ratiem, am lao tale tummatavanga, me am ue va, ¹¹ ‘Kosa tale masalikiimim etokatoka tale kkengalua, ngangalu raarariaa velu poli ngam ratiengaluela. Me am kila isaa oia voto: Ararimangalina ateva God ange aakalakalaala.’ ¹² Aghaauliaa ta ngetaimim va, aue nau niaisakei eteva, God aue eapasunga maomaona nimmarikana tale masaliki eteae eSodom, me sesaaili tale lo atea oia masaliki!

*Nialousiusi ta lo atoa masaliki taatara
karika la nanna ngaioghioghiaa*

(Mat 11:20-24)

¹³ “Aue esesaaili ta ngetam, Korasin! Aue esesaaili tee ta ngetam, Betsaida! Marova mirikolo oia laghe gheleila eTaer me eSaedon, taumattu ngatoa aue laghe molu tale ghinna nialousiusi me au kura, tani apasunga va ngila ghe oghi vulula sesa gheeleiaaira. ¹⁴ Aue emaomaona nimmarikana ta eTaer me eSaedon tale nau niaisakei eteva, me am karika. ¹⁵ Me io, Kapenium, uannaa va aue usae epona? Karika, io aue usioaili euu.

¹⁶ “See enongonongoam, enongonongoaghi; me see eratiem, eratiratiegghi, me see eratiratiegghi, eratirati lo ateva ghe sungieghila.”

¹⁷ Kasina nau ghe lange sio, me ghaitungaulu ghalua (72)[†] taumattu, laghe oghi mae sio tee nimasiasi, me laghe uela va, “Vau eteva, raroai etoa tee laghe nongonongo usilainamami, nau ami ghe auliaa voto tale ararim atea.”

¹⁸ Eghe liula me ghe uela va, “Aghe tarala Satana ghe katuula nongina ravaravaia ateva ghe sio mae epona liu. ¹⁹ Ngaghe tau aatu sio sarasarakana tani asa katu me onioni, me tani apala tau ngai ssateem ateva; karika righi voto aue eghelei saasakieinam. ²⁰ Karika am mene masiasi va raroai etoa la nongonongo usilainam, ta am masiasi va arariimim laghe piti elokoila epona liu.”

Iesu ghe masiasi

(Mat 11:25-27; 13:16-17)

²¹ Tale ia o nau eteva, Iesu ghe pasula tale nimasiasi kanna Spirit Manga ateva, me ghe uela va, “Atautauo sae, Tamaghi, Vau ngepona liu io me kosa ateva, poli ughe aisuliaala isaa oia voto ta tau ngalomasaanga atoa, me angu aotuotula ta natum natu aliki etoa. Ue Tamaghi, ugheelei isaa o voto tani aimuli tee masi aaloannaam.

²² “Tamaghi ang ghe tau mae sio isaa akapa voto oia etaghi. Karika teva ekilakila va see ia Natuna, Tamane nonga; me karika teva ekilakila va see ia Tamane, Natuna nonga, me lo atoa Natuna ghe suitoongainilala, me ghe apasungaala Tamane etaira.”

²³ Eghe kiriela me ghe aulia ngainaola ta kapuna disaepolo atoa va, “Niarangise tale lo atoa taumattu la taatara voto am taatara. ²⁴ Aghaauliaa ta ngetaimim va oroieili propete atoa me kingi etoa laghe aaloanna tani

10:8: 1 Ko 10:27. **10:11:** Apos 13:51; 18:6. **10:12:** Aitiutiu 19:24-25; Mat 10:15; 11:24. **10:16:** Mat 10:40; Luk 9:48; Jon 5:23. [†] **10:17:** Kasina uru ngai laghe pitila laghe uela va, ghaitungaulu (70). **10:18:** Jon 12:31; Aotu 12:8-9. **10:19:** Sams 91:13; Mak 16:18. **10:20:** Plp 4:3; Aotu 3:5. **10:22:** Jon 3:35; 10:15.

tara voto am taatara ghaine, me karika laghe tarala, me laghe aaloanna tani nongo voto am nongonongo ghaine, me karika laghe nongola!”

Kiukiu niaimatoongana ta masi taumattu nge Sameria ngateva

²⁵ Kateva nau, kateva taumattu, muennaaili ia tale inangari nipaopao, ghe tingina saela tani tootoonga Iesu tale kateva nikokkolomi. Ghe uela va, “Tisa, sa ateva agheleia tani ghaa maulue ateva tokatoka liu ia?”

²⁶ Iesu ghe liula me ghe uela va, “Sa ateva laghe pitiela tale inangari nipaopao? Saa kilakilaam ta ngetana?”

²⁷ Eghe liula me ghe uela va, “Uaielousiaa Vaum ateva kapum Goto ia tale urunguitanim ateva, me tale maamauluaam, me tale sarasarakaniaam, me tale nannaam; me uaielousiaa tee taumattu ngateva kalakalangina ia etam, nongina uaielousieinio.”

²⁸ Iesu ghe liula me ghe uela va, “Inangari angu liula koronnaaili; ughelei isaa o voto, me aue utoka.”

²⁹ Eghe aloanna tani apasunga va ia ghulughuluena ia, me ghe kolomila Iesu va, “See ia taumattu ngateva kalakalangina ia etaghi?”

³⁰ Iesu ghe liula me ghe uela va, “Kateva taumattu ghe kasula eJerusalem tani sio eJeriko, me tau niainao atoa laghe uviela. Laghe ghaa velu ekapala ghinnanina, laghe uviela, me laghe kasu vuli elokoiela, me ghaisa ngarighi ghe mate. ³¹ Pristi eteva ghe usilaala ie nonga o salana atikirighi. Nau ghe tarala taumattu ngateva uviuvina ia, ghe keoa ngalokoiela, me ghe kasula.

³² Tee me Livae ateva, nau eteva ghe mae sio tale ia o voto ateva taumattu ngateva ghe asoaso etana, ghe taraiela, me ghe keoa ngalokoiela. ³³ Vara me taumattu nge Sameria ngateva, ie tee ghe usilaala ia o salana atikirighi. Ghe mae sio nongina taumattu ngateva ghe asoaso; nau ghe taraiela, ghe alousiusi teeiela. ³⁴ Ghe lao akalakalaa sio ta ngetana, me ghe kaola oeli me uaeni ta vilikina, me usaina, me ghe ghiisila. Ghe sau etokaie saela tale kiena donki eteva, † me ghe laoinie sio tale ale aiasoaso ateva me ghe aitarainiela. ³⁵ Elue talaua, ghe tau lao sio ghaluevilau viliki veu ta tau ngai toitoi eteva, me ghe uela va, ‘Uaitarainia, me marova uaitarainia tee tale mene righi peim, aue amae aliu voto akapa ughe gheleila ta ngetana.’

³⁶ “See ta ngetairotolu uannaa va ia kalakalangina ia ta taumattu ngateva, tau niainao atoa laghe uviela?”

³⁷ Tau ngalomasaanga ateva tale inangari nipaopao ghe liula me ghe uela va, “Ia o taumattu ngateva ghe alousiusi teeiela.”

Iesu ghe uela va, “Lao sio, me ughelei nongina ia o taumattu ngateva ghe gheleila.”

Iesu tanganue Mata me Meri

³⁸ Nau Iesu me kapuna disaepolo atoa laghe kasukasu elaolao, me laghe rekatala tale masaliki eteae. Vause ateva, ararina atea ta Mata, ghe kolola lao sio tanganuena. ³⁹ Nengana vause ateva, ararina atea ta Meri, ghe toka siola ta liue kkena Vau eteva, tani nongoa ta ghe aaiippoaa. ⁴⁰ Mata ghe aaivengevengesi, poli ia nonga ghe aaimonomosiaa inana. Ghe mae sio, me ghe uela va, “Vau eteva, emaamasina va aghi nonga aghaimonomosiaa inana, me nengaghi enim tokatoka? Auliaala, me emae sausieghi!”

10:25: Mat 22:35-40; Luk 18:18. **10:27:** Diut 6:5; Lev 19:18. **10:28:** Lev 18:5. † **10:34:** Karika va kateva nonga donki taumattu nge Sameria ghe iilou etana. Ghe iilou ta kateva, me ghe kaakaai peina ta mene kasina donki. **10:39:** Jon 11:1; 12:2-3.

⁴¹ Vau eteva ghe liula me ghe uela va, “Mata, Mata, unannaa oroieili voto,
⁴² me kateva nonga voto ateva ualoannaia, me karika ia etam. Meri ange aloannala ia o voto ateva masina ia, me karika aue aghaa velua etana.”

11

Iesu ghe apasungaala vaalua tani looloo sae
(*Mat 6:9-15; 7:7-11*)

¹ Kateva nau Iesu ghe looloo sae tale kateva voto, me nau ghe ruula, kateva kapuna disaepolo ghe uela etana va, “Vau eteva, uapasunga etaimami vaalua tani looloo sae, nongina Jon ghe aapasunga ta kapuna disaepolo atoa.” ² Iesu ghe uela etaira va, “Nau am looloo sae, am looloo sae avalua toko va,

“Tamamami, usausiemami tani oneoneaa ararim atea va manga ia, ami aloanna va ararimangalim ateva esio.

³ Utau roorooa mae anemami inana tale kateva kateva nau.

⁴ Me ukkaluaa kaluimami ssavoto, nongina ami kakkaluaa lo akapa atoa la gheelei sesa voto etaimami, me urau mene tau veluemami va ami lao tale nitotoonga.’ ”

⁵ Iesu ghe mene uela etaira va, “Arova teva kapum ghele mae rekataa etam elomatuaa voo, me ughele laa kolomi mene teva kapum va, ‘Aghaloanna va utau mae verete kotolu, ⁶ poli kapughu eteva ekasu emasaula, me ange mae sio tanganueghi, me karikaaili righi inana etaghi va atau lao.’

⁷ “Arova kapum ateva ghele liu etam va, ‘Urau mene angunainaghi. Anga kavatila atamana atea. Aghi me natughu etoa angami asekanuela. Atam rooroo tani totu va atau aatu voto ualoanna.’ ⁸ Aghaauliaa etaimim va karika aue ghele totu me ghele tau aatu verete, me poli uarrekanana tani toka kookolomia, aue ghele totu, me ghele tau aatu voto akapaaili ualoanna, poli karika upaapalata tani toka kookolomi nau ekapa atoa.

⁹ “Aghaauliaa etaimim va am kolomi, me aue etau aatu, me am pae, aue am tara, me am mirimiri, aue atamana atea eotia. ¹⁰ Lo atoa la kookolomi, la ghaaghaa, me lo atoa la paepae, la taatara, me atamana eotioti ta lo atoa la mirimiri.

¹¹ “Arova teva natum elooloo teva kko, aue ughele taula teva katuu etana? ¹² O arova ghele loo teva otolu ghila, aue ughele tau lao teva onioni? ¹³ Am arova sesa gheegheleiaaimim, me am kilakila tani tau lao masi voto ta natuimim atoa, aue Tamaimim ateva epona liu aue etau sio Spirit Manga ateva oroiaata ta lo atoa la kookolomia.”

Iesu me Belsibul
(*Mat 12:22-30; Mak 3:20-27*)

¹⁴ Iesu ghe tiu vella raroai eteva tale taumattu ngateva ghe gheeleia me taumattu ngateva ghe tam samasama. Nau raroai eteva ghe kupi vulu ghoala taumattu ngateva, me ghe tiuaala tani sama, oroieili taumattu ngatoa laghe soghiaala ia o voto ateva Iesu ghe gheleila. ¹⁵ Me katoa laghe ue va, “Etiutiu velu raroai etoa tale sarasarakaniaane Belsibul, kapuira namuu ia raroai etoa.” ¹⁶ Me katoa laghe nim anna tani tootoonga Iesu. Laghe kookolomia tale righi aimatootoongana ngepona liu.

¹⁷ Me Iesu ghe kilakila nannaaira, me ghe uela etaira va, “Lo ateva ararimangali eaaipola, karika aue etoka liu, me lo ateva pamili eaaipola aue ila tee la ghaituua. ¹⁸ Arova ararimangalina ateva Satana eghaluevilau ia,

vaalua aue etingina aitaaua? Aghaauliaa etaimim poli am ue va atiutiu velu raroai tale sarasarakaniaane Belsibul. ¹⁹ Me arova atiutiu velu raroai tale ararina ateae Belsibul, kapuim atoa tani taumattu laghe tiutiu velu raroai tale ararina ateae see? Ila aue la ghele auliaa va inangari am auliaa kamena. ²⁰ Ta poli arova atiutiu velu ta nimane God, eaapasunga va ararimangalina ateva God ang ghe sio mae ta ngetaimim.

²¹ “Nau eteva lo ateva taumattu sarasarakana ia, me eposoposo ghinna niaiuvii, aue eaitara ngamasina alena ateva, me ghinnanina aue etoka amasina. ²² Me arova sarasarakanaaili eteva taumattu emae tee ghinna niaiuvii, aue euvia, me eghaa velu ekapa ghinna niaiuvii me eaikoita peina ta mene katoa taumattu.

²³ “Lo ateva karika kapughu ia, tau ngai ssateeghi ia, me lo ateva karika esaasausieghi tani atoka aitaaua, ia etani aatoka apolapola.

Sesa spiriti eteva ghe mene oghi mae sio

(Mat 12:43-45)

²⁴ “Nau sesa spiriti eteva ekasukasu vuli taumattu ngateva, ekasukasu ekapa see tale voto mallangona, epaepae teva voto aue eainoana etana. Va etam rooroo tani tara teva voto tani ainoana, ange ue va, ‘Amene oghi lao tale ale ateva aghe tokatoka etana.’ ²⁵ Nau ange laa rekataa sio va ange tarala alena ateva raarangisana ia, me elome masina tani toka etana, ²⁶ liuna avalua o me aue emene kasu tani laa kolo ghaitu (7) sesa spiriti gheeleiaaira mene sesaaili. Me aue la kupi sso, me la sso toka tale ale ateva. Gheeleiaane taumattu ngateva esesaaili, elaulau llo gheeleiaane akasina.”

Niarangise koronna

²⁷ Nau Iesu ghe aippooaa, me vause ateva ghe tokatoka teeila ghe sama anamuula, me ghe uela ta Iesu va, “Niarangise etokatoka ta lo ateva vause ghe kaaiola, me ghe ssuola.”

²⁸ Iesu ghe liula me ghe uela va, “Koronnaaili inangarim, me kinatama niarangise ta lo atoa la nongonongo me la uusilaa inangarina God.”

Laghe kolomila niaimatoonga ngateva

²⁹ Nau taumattu ngatoa ngeila ghe ooroi, Iesu ghe uela va, “Lo ateva oia vituu, karika va masi taumattu ngam, ta am anna nonga tani tara niaimatoonga. Saa ghe lutu teela Jona, ie nonga o niaimatootoongana ateva aue elutu. ³⁰ Nongina emua arau ta nau Jona, ia ghe aimatootoongana ta taumattu nge Ninive, aue enongina Natuna ateva Taumattu ngateva tale lo ateva oia vituu. ³¹ Tale nau niaisakei, aue Kuin nge Saot ateva etingina tee lo ateva oia vituu, me aue eue va sesa am, poli Kuin ateva ghe kasu emasauelila tani mae nongo alomasaanganiaane Solomon, me lo ateva taumattu namuu ia ta Solomon ange toka teeiemla. ³² Aue taumattu nge Ninive atoa la tingina tale niaisakei eitaaua teeiem, me la ue va sesa am, poli aNinive atoa laghe nna ngaioghioghiaala, nau Jona ghe poppooaa etaira, me ia oia, lo ateva namuu ia ta Jona ange toka teeiemla.

Mallanga

(Mat 5:15; 6:22-23)

³³ “Karika teva eaarokoti kuraane lam ateae va eaatoka aisulieinia, o eaakou rungania tale teva aikaai manu,* ta eaatokaie sae epona tale aitiitinginane ateva, me nau taumattu ngatoa la kupi sso, aue la rooroo

11:22: Kol 2:15. **11:23:** Luk 9:50. **11:27:** Luk 1:28, 42, 48. **11:29:** Mat 16:4. **11:31:** 1 Ki 10:1-10. **11:32:** Jona 3:5-10. **11:33:** Mak 4:21; Luk 8:16. * **11:33:** Kasina uru ngai laghe pitila, karika laghe uela va, o eaakou rungania tale teva aikaai manu.

tani tara mallangina ateva. ³⁴ Matam alua emaamallangi vilikim. Arova matam va masina, vilikim akapaaili aue epasu tale mallanga ateva, va nau matam nge sesala, isaa akapa vilikim aue esaurromiena. ³⁵ Liuna avalua o me ukaarasi tani aimonomosiaa, poli mallanga ateva etam karika va saurrom ia. ³⁶ Liuna avalua o me arova vilikim akapaaili emallanga me karika mene teva tuku vilikim saurromiena, isaa akapaaili aue emallanga, nonginaaili lam ateaemaamallanga etam.”

Ghaonomo voto sesaaili
(*Mat 23:1-36; Mak 12:38-40; Luk 20:45-47*)

³⁷ Nau Iesu ghe ruula tani aippooaa, me kateva Paresi ghe koloala tani laa namanama tanguena. Iesu ghe usiela me ghe lao sio tale tevo ateva tani namanama. ³⁸ Paresi eteva ghe soghiaala tani tara va Iesu ghe tam pora akasinala nimana, nongina gheeleiaaira Paresi etoa, me ghe nim namanama.

³⁹ Me Vau eteva ghe uela etana va, “Am Paresi etoa, am porapora araangisana uneimim kapa me pelete eleka, me elome etaimim kuruetuna am, me sesaaili iem. ⁴⁰ Am alo kapakapa am! Am tam kilakila va lo ateva ghe gheleila eleka ghe ghelei teela elome? ⁴¹ Me am taula saa llo voto elome tale uneimim aikakkaai ta lo atoa karika peiira, me aue isaa akapaaili voto aue eraangisana etaimim.

⁴² “Aue esesaaili etaimim Paresi etoa, poli am tautau lao aiaasokolo tale lutu voto ghaunaaili am ghaaghaa eutana, me am kakkaluaa tani ghelei voto ghulughuluena me tani aielousiaa God. Am ghelei ekapa voto tani ghelei ghulughuluena voto, me tani aielousiaa God, me tee tani taula aiaasokolo.

⁴³ “Aue esesaaili etaimim Paresi etoa, poli am tani aloannaaili aitokatoka ngemua tale ale nivelu eitauaa, me am aloanna va taumattu ngatoa la souem me la ue va, ‘Elue talaua’ me ‘Elo sinaka’ etaimim tale maketi.

⁴⁴ “Aue esesaaili etaimim, ta am nongina liu niaikkaia ngateva taumattu ngatoa la kasukasu saooa etana, me la tam kilakila va liu niaikkaia ia.”

⁴⁵ Kateva tau ngai aapasunga tale inangari nipaopao ghe liula, me ghe uela va, “Tisa, nau eteva uaauliaa isaa oia voto, uaauliaa teiemami.”

⁴⁶ Iesu ghe liula me ghe uela va, “Am tau ngai aapasunga iem tale inangari nipaopao, aue esesaaili etaimim, poli inangariimim aanasaaili tale taumattu ngatoa tani aimuli tee, nongina am aatoka sae voto maamatanaaili ta katoa, me karika la roorroo tani sau, me karika am saausila.

⁴⁷ “Aue esesaaili etaimim ta am atuutulu atu niaimatoonga tale liu niaikkaiaaira propete atoa, tuvuim atoa laghe uvi ematelala. ⁴⁸ Am aulia ngaotu va am masimasiaa saa voto tuvuim atoa laghe gheleila nau laghe uvi ematela propete atoa. Liuna avalua o me am atuutulu atu niaimatoonga tale pongasovaira. ⁴⁹ Liuna avalua o me tale aalomasaanganiaane God ghe uela va, ‘Aue asungi tau lao propete atoa me apostolo atoa, katoa aue la uvi saasakieinila, me katoa aue la uvi ematela.’ ⁵⁰ Liuna avalua o me lo ateva oia vituu, aue la ghaa sesa ngaipolipoli mausi propete akapa atoa laghe uvi ematelala emua arau, tale aitiutiu tale kosa ateva, ⁵¹ ghe tiuaala ta matemateane Eibol, me ghe mae sio ta Sekaraea, laghe uvi emateala tale mallome liu nighelei aiaavususuena me tale rum manga atiulu. Aghaaulia ngakoronnaaili etaimim va lo ateva oia vituu aue eghaa sesa aipolipoli.

⁵² “Aue esesaaili etaimim lo atoa alomasaangaaili iem tale inangari nipaopao, poli am ghe ghaa vella kii eteva tani ghaa alomasaanga, me am, karika am sosso, me lo atoa vara la kupi sso, am ghelei rungainila.”

⁵³ Me nau Iesu ghe kasu vulila ia o voto ateva me Paresi etoa me tau ngai aapasunga ngatoa tale inangari nipaopao laghe sessaieililala, me laghe kookolomi oroieili nikokkolomi. ⁵⁴ Laghe sassaia tani nongo va ghe auliaa righi sesa inangari.

12

Am paniem tale gheeleiaaira usimaghalua atoa

¹ Nau eteva oroi airari taumattu laghe mae aitauaa sio, laghe aisiriki tani tara, me Iesu ghe tiua ngakasinala tani aippooaa tee kapuna disaepolo atoa. Ghe uela va, “Am taatara amasina tale uneira isti Paresi etoa, usimaghalue ia. ² Karika righi voto am aaituttuia va aue etam otu, isaa akapa voto pei niaisulia, aue la kila. ³ Liuna avalua o, me voto ngam auliaala tale voo ngateva aue la nongo ellaa, me voto ngam aulia ngaghaunala tale paa ngaleimim, aue la aulia ngaotu tale tummatavanga.

God nonga ita matautainia (Mat 10:28-31)

⁴ “Aghaauliaa etaimim, kapughu etoa, am rau mene matauta lo atoa la uvi emateam, poli auena karika mene righi uunguaaira etaimim. ⁵ Aue aghapasunga lo ateva am matautainia. Am matauta lo ateva matuutuliena ia tani uvi emate taumattu, me tani sau velula sae tale Gehenna. Aghaauliaa etaimim va am matautainia! ⁶ God karika erooroo tani aikkaluaa kateva ta ghalima natu ghila aipoliira erooroo ghaluevilau viliki veu. ⁷ Ekilakila ghaisa uu ngurum tale urum ateva. Urau mene matautu, ta maamauluaam namungaili ta matane God, elaulau ghila atoa.

Aulia ngaotu Iesu ta taumattu ngatoa (Mat 10:32-33; 12:32; 10:19-20)

⁸ “Aghaauliaa etaimim, va lo ateva eaulia ngaotu ta taumattu ngatoa va kapughi ia, aue Natuna ateva Taumattu ngateva eaulia ngaotua ta kapuna ensolo atoa God va ia kapuna ia. ⁹ Lo ateva taumattu eue va karika ekilakilaieghi, aue aghauliaa ta kapuna ensolo atoa God va karika akilakilaia. ¹⁰ Me lo atoa la auliaa tee Natuna ateva Taumattu ngateva, aue God ekkaluaa. Me lo atoa la auliaa saasakiaa tee Spirit Manga ateva, God karika aue ekkaluaa.

¹¹ “Nau eteva la ssoainiem tale liu niaisakei, emua ta namu ngatoa me taumattu matuutuliena, am rau mene matautu tani nnaa va, ‘Vaalua ami liu inangari, me sa ateva ami aulieinia?’ ¹² ta Spirit Manga ateva, tale ia o nau eteva, aue eapasunga sa ateva aue am aulieinia.”

Kiukiu niaimatoongana tale tau peipeiena ateva alo kapakapa ia

¹³ Kateva elome tale taumattu ngatoa ghe uela etana va, “Tisa, uauliaa ta tueghi eteva me eaikoita peina tamaingalua etaingalua.”

¹⁴ Iesu ghe liula va, “See ghe uela va aghi aghelei niaisakei, me akoita voto etaimalua?” ¹⁵ Vara me ghe uela etaira va, “Am taatara amasina, me am tingina akorokorongana. Am rau mene raungaa peimim, poli karika aue am ghaa maulue ateva tale peimim.”

¹⁶ Me ghe auliaala kiukiu niaimatoongana atea etaira va, “Kateva taita tue peipeiena ia, kosane ateva ghe apinosala oroieili masi inana atoa tale kateae ninamanama. ¹⁷ Ghe nannaa va, ‘Sa ateva agheleia? Karika teva ale tani atoka aitauaa aneghi inana.’

¹⁸ “Vara me ghe uela va, ‘Aghelei evalua toko, va arruti alegghi ale ngingana atoa, me amene atulu righi namuu, me aghatoka aitaaua sso aneghi inana me peighi. ¹⁹ Me aghauliaa etaghi va, “Aghi ngaghaala oroieili masi voto atoa, aue la toka oroieili ninamanama. Aghainoana, anamanama, aropi, me amasimasi.” ’

²⁰ “God ghe uela etana va, ‘Alo kapakapa ateva! Ghaine eleivoo aghaa velu maamauluaam, me see eghaa voto ughe aimonomosiaala?”

²¹ “Aue enongina avalua o tale tue peipeiena atoa la ghaaghaa oroieili voto, me karika la nannaa God.”

Am rau mene ghelei nannaaimim va ekatuu

(Mat 6:19-21, 25-34)

²² Vara me Iesu ghe uela ta kapuna disaepolo atoa va, “Liuna avalua o, me aghaauliaa etaimim va, am rau mene annaa maamauluaaimim me am ue va, ‘Sa ateva ami namaia,’ me am rau mene annaa vilikiimim, me am ue va, ‘Sa ateva ami asaea?’ ²³ Karika am kilakila va maulue ateva namuu ia ta matane God, me inana isaa euu, me vilikiimim isaa epona, me aiaasae isaa euu? ²⁴ Am tara ghila atoa. Karika la pasapasa, me karika la mukemuke, me karika righi aleira tani atoka aneira inana, ta God eangiinginila. Am taumattu ngatoa namuu iem ta matana God. ²⁵ See etaimim enannangaili erooro tani ghelei maamauluaane emene toka tee lao? Karika poi! ²⁶ Ta poli karika am rooro tani ghelei isaa o lutu voto, vaalua me am nannaa mene kasina voto?

²⁷ “Am tara vaalua palaoa ngatoa la piipinosa. Karika la uungu aanasa tani ghaa peiira. Aghaauliaa etaimim va molumoluaane Solomon masinaaili, me palaoa ngatoa, la laulau molumoluaane Solomon. ²⁸ God eaamolumolu evalua o rarrasa atoa, la piipinosa ghaine, me nimanaa la taula sae tale kura atea. Am rooro tani aikaaiaa va aue eaamolumolu evalueiem tee o, ghauna uneimim niaikaaiaa. ²⁹ Karika am mene atoka nannaaimim va sa ateva am namaia, me sa ateva am ropia. Am rau mene nnaa isaa o voto. ³⁰ Ta poli taumattu tale kosa ateva la iilou paepae isaa o voto, me Tamaimim epona liu ekilakila va sa ateva am tuutukuna etana. ³¹ Am pae ararimangalina ateva God, me aue etau aatu isaa o voto etaimim.

³² “Am rau mene matautu, lutu lo atoa sipsip karika oroieili iem, ta poli Tamaimim epona liu emasimasi tani tau aatu ararimangalina ateva etaimim. ³³ Am taula peiimim me la poli, me viliki veu am taula ta lo atoa karika righi peiira. Me am ghaa lo ateva aikkaai viliki veu karika aue epoka, me am ghaa ghinnani ngepona liu, karika aue esesa, me karika teva tau niainao erooro tani ainao, me karika aue eavu. ³⁴ Ta poli voto ateva peiimim etokatoka etana, aue urunguitaniimim tee ateva aue etoka etana.

Am toka anguenguu

(Mat 24:45-51)

³⁵ “Am aimonomosiaa tale niuungu. Am ghelei kuraimim lam etoka ramerame, ³⁶ nongina lo atoa tau ngai nongonongo anna, la toitoi vauira ateva tani kiri mae tale nisigha ngateae. Nau eteva emae, me emirimiri etapaa ngatamana, gharovaeata nonga ta aue la oti, me ekupi sso. ³⁷ Niarangise etoka ta lo atoa tau ngai uungu, vauira ateva etaraila va karika la aseasekanua, nau emae. Aghaaulia ngakoronna etaimim va aue emolu tani aipanipaniaa aneira inana kapuna tau ngai nongonongo anna atoa, me aue la mae tale tevoo ateva, me etau lao inana etaira. ³⁸ Niarangise aue etoka ta lo atoa tau ngai uungu vauira ateva etara va la aaimonomosiaa,

marova emae elomatuaa voo, o elopai. ³⁹ Am nim nnaa va marova taumattu ngateva ekilakila nau eteva tau niainao ateva emae etana, karika aue ghele tau velu alena ateva va ghele rrutia. ⁴⁰ Am tee am aimonomosiaa, ta poli Natuna ateva Taumattu ngateva aue emae tale nau eteva karika am nannaa va aue emae etana.”

⁴¹ Pita ghe kolomila va, “Vau eteva, uaauliaa ia ona kiukiu niaimatoon-gana ateae etaimami, o ta taumattu ngakapaaili etoa?”

⁴² Iesu ghe liula va, “See ia lo ateva egheelei emasina uunguaane, me alo-masaanga ia tani aitaraa voto, aue eaitara ngakapaaili tau ngai nongonongo anna atoa, tani taula inana tale nau nighaa inana. ⁴³ Niarangise aue etoka tale lo ateva tau ngai nongonongo anna, vauna ateva etara va egheelei isaa o niuungu, nau eteva ekiriaa mae. ⁴⁴ Aghaaulia ngakoronna etaimim va aue eatokaia va eaitara ngakapaaili peina. ⁴⁵ Me marova ia o tau ngai nongonongo anna ateva ennaa va, ‘Vaughu eteva karika aue emae parasi,’ me etiuua tani uvi mene katoa tau ngai nongonongo anna, me etiuua tani namanama, me ropi uaeni, me nannaane eaisavisavila, ⁴⁶ aue kapuna vau ateva ia o tau ngai nongonongo anna ateva emae, tale ia o nau eteva eannaa va karika aue emae etana, aue esai putuputua me eatoka aitauaa teeia me lo atoa karika la aikaaiiaa.

⁴⁷ “Lo ateva tau ngai nongonongo anna ekilakila sa ateva vauna ateva ealoanna va egheleia, me karika eaimonomosiaa tani ghelei, aue vauna ateva euvi saasakieinia. ⁴⁸ Me lo ateva karika ekilakila sa ateva vauna ateva ealoannaia etana, me egheelei voto sesa, ia o lo ateva karika aue la uvi saasakieinia. Lo atoa laghe taula oroi voto, la ghanna tani ghaa oroi voto etaira, me lo ateva laghe taula oroieili voto va eaitaraa, aue la ghanna oroieili voto va eliu etaira.

Karika va luei ta niaipolapolaii

(Mat 10:34-36)

⁴⁹ “Aghe mae sio tani tau kura ateae tale kosa ateva oio, me aghannaaili va arova ghele rame. ⁵⁰ Me aue asuu tale kateva ase niaasuu, me ngamamarikana teeia, lomosi ta niaasuu eteae eruu etaghi. ⁵¹ Am annaa va aghe mae sio tani tau luei tale kosa ateva? Karika! Aghaauliaa etaimim va, karika va luei, ta niaipolapolaii. ⁵² Ange tiitiuaa oia me ange laolao; aue ghalima taumattu tale kateva pamili aue la aitiuaa, kotolu aue lotolu ssa tee ghalua, me ghalua aue lalu ssa tee kotolu. ⁵³ Aliko taita ateva aue essa tee tamane, me tamane aue essa tee natuna aliko taita ateva. Me aliko vause ateva aue essa tee kinna, me kinna aue essa tee natuna aliko vause ateva. Vause ateva aue essa tee alumuna vause ateva, me alumuna vause ateva aue essa tee vause ateva.”

Tani kila nau

(Mat 16:2-3; 5:25-26)

⁵⁴ Ghe uela ta taumattu ngatoa va, “Nau am taatara urukookoo esaesae ta pai sinaka esuu, gharovaeata nonga ta am ue va, ‘Aue evaoo,’ me evavaoo.* ⁵⁵ Me nau eteva am taatara kuukuu eteva emaemae ta saot, am ue va, ‘Aue aanasa ateva elutu’, me aanasa ateva emaemae.† ⁵⁶ Am usimaghalua am! Am kilakila tani tara kila voto euu me eunaakookoo, me vaalua me karika am rooroo tani tara kila nau etiulu oia?

12:39: Mat 24:43-44; 1 Tes 5:2. **12:44:** Mat 25:21, 23. **12:47:** Jms 4:17. **12:50:** Mak 10:38-39. **12:53:** Maeka 7:6; Mal 4:6. * **12:54:** EIsraeli, vaoo ateva elaa ghaitoka ta pai sinaka esuu, ta poli paamanu eteva (Mediterranean), ia tee ta pai sinaka esuu. † **12:55:** EIsraeli, aanasa ateva emaemae ta pai saot ativilau, ta poli voto ateva aanasa ia, karika oroi voto epiipinosa etana.

⁵⁷ “Vaalua me am, karika am rooroo tani kila saa voto ghulughuluena?
⁵⁸ Marova ngamalu laolao tale niaisakei me teva aissanim, utootoonga tani kkaluaa etana etapaa salana, ta erau laoainio ta lo ateva egheelei niaisakei, va etauro lao ta polisi etoa, va la atokaio sso tale ale mata voovoo.
⁵⁹ Aghaauliaa etam va karika aue ukupi ghoa lomosina ta utau ekapa lao viliki veu la ghase va utau lao.”

13

Nna ngaioghioghiaa o umate

¹ Tale ia o nau eteva, katoa tana taumattu laghe auliaala ta Iesu vaalua Paelat ghe uvi ematela katoa tana aGalilii nau eteva laghe gheelei sae aiaavususuvusuaena ta Vau ngepona ateva. ² Iesu ghe liula etaira me ghe uela va, “Poli ila o aGalilii etoa laghe mate avaluela o, am annaa va ila sesaaili kaluira ssavoto, me lo atoa oia aGalilii karika laghe matela? ³ Aghaauliaa etaimim va karika! Arova am tam nna ngaioghioghiaa, am tee aue am mate.
⁴ Vaalua tale kasangaulu ghaoalu (18) taumattu nge Siloam laghe matela nau aitiketike ateva ghe katu sauaala ta ngetaira? Am annaa va gheeleiaaira sesaaili ta mene lo atoa eJerusalem? ⁵ Aghaauliaa etaimim va karika! Arova am tam nna ngaioghioghiaa, am tee aue am mate.”

Kiukiu naimatoongana tale ai eteae (fig)

⁶ Iesu ghe auliaala kateae kiukiu naimatoongana ta taumattu ngatoa, ghe uela va, “Kateva taumattu, aina fig atea ghe tiitingina tale umana paa ngutani uaeni etingiu. Ghe lao sio tani taatara poi va ghe tara righi uene me karika ghe tarala righi. ⁷ Ghe uela ta kapuna tau ngai pasa utana atingiu va, ‘Tarala, kotoluae ninamanama aghe mae taatara vara aghe tara righi uene, me karika poi righi ataatara. Tue veluela! Vaalua me enim ruurungia inanina kosa ateva?’

⁸ “Tau ngai pasa utana atingiu ghe liula me ghe uela va, ‘Vau eteva, rati etinginaiela, me emene tingina kateae ninamanama. Aue amene kai talieinia, me amene kuukumui poia. ⁹ Marova ekune tale mene kateae ninamanama, aue emasinaaili. Marova karika, aue ita tue velua.’ ”

Iesu ghe ghelei emasinala vause ateva poupouena ia tale nau manga ateva

¹⁰ Kateva nau manga, Iesu ghe aapasunga tale kateva ale nivelu eitauaa.
¹¹ Vause ateva raroai eteva ghe tokala ta ngetana ghe roola kasangaulu ghaoaluae (18) ninamanama; raroai eteva ghe gheeleia ghe poupou tani kasu, me karika ghe rooroo tani korosia. ¹² Nau eteva Iesu ghe taraiela, eghe kolua mae sio etana, me ghe uela va, “Vause ateva, angu masinala tale voto ghe gheelei saasakieinio.” ¹³ Eghe saoaala nimane ta ngetana, me katengaata ta ghe korosiela, me ghe tiuaala tani tau sae God.

¹⁴ Kateva tana namuu tale ale nivelu eitaua ngateva ghe sessaiela ta Iesu, poli ghe ghelei emasinala vause ateva ta nau manga ateva, ghe samala me ghe uela ta taumattu ngatoa va, “Nauita ghaonomo tani ghelei uunguaaita, am mae tale isaa o nau va la ghelei emasinaiem, karika va ta nau manga ateva!”

¹⁵ Vau eteva ghe liula me ghe uela etana va, “Usimaghalua am! Am oia, aue am ghele pulaka kieimim vulumakao o donki, me aue am ghele laa gharopiropi tale nau manga ateva. ¹⁶ Vaalua, karika ita rooroo tani sausi ia oia vause ateva tale nau manga ateva? Poli ie tee natuna vause ia Abraham, Satana ghe ghaaiela ghe roola kasangaulu ghaoaluae (18) ninamanama.”

¹⁷ Ailiuliu tale inangarina ghe ghelei epalatala tau ngai ssateena atoa, me taumattu ghe taatara masi voto ghe ghelei, laghe masimasi.

Kiukiu niaimatoongana tale katu ue ngai erighi me isti eteva
(*Mat 13:31-33; Mak 4:30-32*)

¹⁸ Vara me Iesu ghe kolomila va, “Vaalue ia ararimangalina ateva God? Aue asuimatoongainia tale sa ateva? ¹⁹ Ia nongina katu ue ngai erighi la kolokoloa va mastet, taumattu ngateva ghe ghaala katu ue ngai erighi, ghe pasaiela tale umana utana atingiu. Ai erighi ghe pinosala, me ghe namungailiila, me ghila atoa laghe gheleila aleira tale laangina.”

²⁰ Iesu ghe mene kolomila va, “Sa ateva aue asuimatoonga ararimangalina ateva God etana? ²¹ Ia avalua toko, va vause ateva ghe ghaala isti me ghe ghelei eitauaa teela oroieili palaoa lomosi ta palaoa ngateva ghe rrangala.”

Ghauna atea atamana
(*Mat 7:13-14, 21-23*)

²² Iesu ghe laolao see tale masaliki taatara atoa, me tale ghauna atoa masaliki, ghe aapasunga elaolao ta taumattu ngatoa, me ghe lao sio eJerusalem. ²³ Kateva taumattu ghe kolomiela va, “Vau eteva, karika oroi taumattu aue esaanga?”

Iesu ghe uela etaira va, ²⁴ “Am sarasarakana tani kupi sso tale atamana atea ghauna ia; poli oroieili taumattu ngatoa aue la tootoonga tani kupi sso, me karika aue la roo. ²⁵ Namuu tale ale ateva aue etingina, me eghoa kavati atamana atea; me aue am tingina eleka, me am mirimiri, me am kolokolo tale atamana atea, me aue am ue va, ‘Namu ngateva, otila atamana atea etaimami!’

“Aue eliu etaimim me eue va, ‘Karika akilakilaiem va am see iem!’

²⁶ “Aue am liu me am ue va, ‘Ami ghe namanama me ropiropi eitauaa teeio; ughe aapasunga tale masalikiimami!’

²⁷ “Aue emene ue va, ‘Karika akilakilaiem va am see iem. Am kasu vulieghila, am akapa sesa gheleiaaimim!’

²⁸ “Aue am ngala me am aingeresia ngalungaluimim, nau am tara Abraham, Aisiki me Jekop, me propete akapa atoa tale ararimangalina ateva God, me am, aue la tiu veluem! ²⁹ Taumattu aue ekasu tale sinaka esae me sinaka esuu, me tale mene ghaluevilau pai not me saot tale kosa ateva, aue la mae tale tevoo ateva tale kinatama ninamanama atea tale ararimangalina ateva God. ³⁰ Nongola! Kasina taumattu arariira euu aue la matuutuliena, me kasina taumattu matuutuliena ila aue la sioaili euu.”

Iesu ghe alousiusi teela eJerusalem
(*Mat 23:37-39*)

³¹ Ia o nau eteva katoa tana Paresi laghe mae sio ta Iesu, me laghe uela etana va, “Ukasu vuli voto ateva oia, me ulao ppae tale mene teae masaliki, poli Herot ealoanna tani uvi emateo.”

³² Iesu ghe liula etaira me ghe uela va, “Am laa ghauliaa etana tau nikamekame ateva okae va, ‘Aghi aue atiu velu raroai etoa, me aue aghelei emasina taumattu ghaine me nimanaa, me tale aiaakotonna ateva nau, aue aruu uunguaaghi.’ ³³ Karika aue atoka, ghaine, nimanaa me luevo; koronnaaili karika teva propete aue emate eleka eJerusalem!

³⁴ “Jerusalem, Jerusalem! Ughe uvi ematela propete atoa, ughe osala tau ngai kasuaa inangarina atoa God tale atu! Oroiaata aghaaloanna tani atoka

aitaueinam kapughu taumattu ngatoa, nongina kina paolo ateva eaakou natuna atoa tale kaekaena, me karika am aaloanna! ³⁵ Liuna avalua o, me am nongola! God aue ekasu vuli alena ale manga ateva, me masalikiimim taatara ateaue aue eturungia. Aghaauliaa etaimim va karika aue am mene taraieghi, lomosi ta nau eteva aue emae, me aue am ue va, ‘Niarangise ta lo ateva emaema tale ararina ateaue Vau eteva.’ ”

14

Iesu ghe ghelei emasinala taumattu ngateva ghe airrongoi

¹ Kateva nau manga, Iesu ghe lao sio tani namanama tanganue kateva namuu ta Paresi etoa, me taumattu ngatoa karika laghe ghaaghaa velu mataira ta Iesu. ² Taita ateva, nimane me kkena ghe rorongoi, ghe tokatoka emua ta Iesu. ³ Iesu ghe kolomila tau ngai aapasunga tale inangari nipaopao me Paresi etoa va, “Vaalua uneita inangari nipaopao eaauliaa, masina tani ghelei emasina teva taumattu tale nau manga ateva, o karika?” ⁴ Karika laghe liu poila. Iesu ghe posola taita ateva, me ghe ghelei emasinaiaela, me ghe sungi veluela.

⁵ Vara me ghe uela etaira va, “Arova teva etaimim, teva natuna o kiena ghaata kkena, ghele katuu velu sio tale liu eteva tale nau manga ateva, karika aue am ghele ae velue sae parasi?” ⁶ Karika laghe roola tani liu inangarina.

Iesu ghe uela va ita siuaa nannaaita

⁷ Iesu ghe taatara vaalua katoa tana namuu ta Paresi etoa laghe taatara masi liuira tani toka, me ghe auliaala lo ateaue oia kiukiu niaimatoongana ta taumattu ngakapa atoa: ⁸ “Nau eteva kateva ange koloola tani lao tale ninamanama eteaue, karika umene tara masi aitokatoka va utoka ta ngetana. Karika ukilakila va mene kateva taumattu la kolo teeie la mene namuu teeia ta ngetam. ⁹ Lo ateva, unna ninamanama ateaue, ghe kolo akapaiemaluela, aue emae etam me eue va, ‘Tinginala, me ierai etoka sio!’ Aue upalata, nau la ghaaio me la ghoa atokaio emuli. ¹⁰ Nau eteva ngila koloola, ulaa toka sio tale aitokatoka ateva emuli. Nau lo ateva, unna ninamanama ateaue, emae, eue va, ‘Kapughu, mae sio, me ulaa toka tale masi aitokatoka ateva.’ Isaa o voto aue eghelei, masi ararim ateaue emua tale taumattu ngakapa atoa tale lo ateaue o nivelu eitauea. ¹¹ See ualoanna tani saeaa nannaam, aue God eatokaio sio eue, me see usiuaa nannaam aue God eatokaio sae epona.”

¹² Iesu ghe uela ta taumattu ngateva unna ninamanama ateaue va, “Nau eteva ualoanna tani ghelei ninamanama, urau mene kolo kapum atoa, tuem atoa, nengam atoa, mangalim atoa, o taumattu tue peipeiena, poli auena la mene koloo me la liu voto ughe gheleila ta ngetaira. ¹³ Nau ughelei ninamanama ateaue, ukolo lo atoa karika righi peiira, tokatoka ngeuu etoa, kke tapakase atoa, me mata salusaluna atoa; ¹⁴ aue ughaa niarangise, poli ila karika la rooroo tani liu voto ughelei ta ngetaira. God aue eliu, tale nau eteva tau ghulughuluena atoa aue la totu tale nimate.”

Kiukiu niaimatoongana tale paka ninamanama ateaue (Mat 22:1-10)

¹⁵ Nau eteva kateva tana taumattu ghe tokatoka tale ia o ninamanama ateaue ghe nongola isaa oia inangari, me ghe uela ta Iesu va, “Niarangise aue

eghaa lo atoa aue la toka tale paka ninamanama atea tale ararimangalina ateva God!”

¹⁶ Iesu ghe uela etana va, “Kateva taumattu ghe aimonomosiaala kinatama ninamanama atea, me ghe suula inangari ta oroi taumattu va la mae. ¹⁷ Ghe ghaala nau ninamanama, me ghe suula kapuna tau ngai nongonongo anna ateva va elaa kolo taumattu ang ghe uela va la mae, ta voto akapa ang ghe aimonomosiaala.

¹⁸ “Ila akapa laghe tiuaala tani aikamekameaa me laghe auliaa vaalua me karika laghe roola tani lao. Aitiuti eteva ghe uela ta tau ngai nongonongo anna ateva va, ‘Aghe polila tuku kosa ateva. Aghaloanna tani laa taraia. Alousiusi, ta karika aue amae.’

¹⁹ “Mene kateva ghe uela va, ‘Aghe polila kasangaulu (10) kieghi vulumakao, me alaolao tani taraila, me atoongainila tani uungu, alousiusi ta karika aue amae.’

²⁰ “Mene kateva ghe uela va, ‘Amina laila, o karika arooro tani mae.’

²¹ “Tau ngai nongonongo anna ateva ghe lao sio, me ghe auliaala ta vauna ateva. Vau eteva ghe sessaiela, me ghe uela etana va, ‘Ailuila, me ukasu parasi me ulao tale liu nivelu eitauaa, me tale salana atoa tale masaliki taatara, me ukolo mae lo atoa karika righi peiira, tokatoka ngeuu etoa, mata salusaluna atoa, me kke tapakase atoa.’

²² “Tau ngai nongonongo anna ateva ghe kasula tani ghelei llo vauna ateva ghe auliaala, me nau ghe kiriaa mae sio, ghe uela va, ‘Inangarim ngami gheleila, me oroi aitokatoka karika righi taumattuna.’

²³ “Vauna ateva ghe uela va, ‘Ula tale salana namuu, me ukkele valaa tale ghauna salana, me ukolo asarasarakana taumattu ngatoa, me la mae, me la ghasasu aieghi eteva. ²⁴ Aghaauliaa etaimim va karika poi teva taumattu aghe kolo akasinala, aue la nama aneghi inana!’ ”

*Taumattu ngateva enannaa ngamasina me eaimuli tee Iesu
(Mat 10:37-38)*

²⁵ Oroieili taumattu ngatoa laghe usi see Iesu. Ghe kiriela me ghe uela etaira va, ²⁶ “Lo ateva ualoanna tani aimuli teeieghi, karika urooro va ukapughu disaepolo arova utam rooro tani rati etoka tamam me kinam, vausenim ateva me natum atoa, tuem atoa me nengam atoa, me maamauluaam. ²⁷ See karika urooro tani sunuki unem ateva tani aikotoo, me umae aimuli etaghi, karika urooro tani kapughu disaepolo.

²⁸ “Arova teva etaimim eaimonomosiaa tani atulu ale ateva, etokatoka sio mua, me etara mua va ghaisa aipolina, me tani tara va viliki veu rooroona tani ruu ale ateva, o karika. ²⁹ Arova etiuua ale ateva me etam rungia, taumattu ngatoa aue la amammarasa, ³⁰ me la ue va, ‘Ia o taumattu ngateva ghe tiuaala ale ateva, me karikaaili ang ghe roola tani rungia!’

³¹ “Arova kingi eteva ange laolao tani aiuvvii, me kapuna tau ngai uuvi etoa erooro kasangaulu airari (10,000), aue etoka mua, me eannaa va erooro tani laa aiuvvii tee mene kateva kingi, kapuna tau ngai uuvi etoa erooro ghaluengaulu airari (20,000), me aue apalaia, o karika? ³² Arova karika erooro, aue esungi kapuna tau ngaikasuaa inangari etoa tani laa sou kingi eteva, me la loo luei nau eteva masau ila. ³³ Tale ia nonga o salana atikirighi, karika teva etaimim erooro tani kapughu disaepolo, arova etam oghi vulu peina akapaaili.

*Uela ateva karika righi namina
(Mat 5:13; Mak 9:50)*

³⁴ “Uela ateva masina ia, me marova ekapa namina, vaalua urooroo tani mene ghelei me emene tue namina? ³⁵ Ia o ase uela ateva karika ita rooroo tani ghelei righi voto etana, liuna avalua o me la nim sausau velu.

“Lo ateva talingane manee tani nongo, aue enongo.”

15

Kiukiu niaimatoongana tale sipsipi eteva ghe rauela

(Mat 18:12-14)

¹ Kateva nau, tau ngai ghaa takis atoa me tau ssavoto atoa, laghe mae sio tani nongo Iesu. ² Paresi etoa me tau ngai aapasunga tale inangari nipaopao atoa, laghe tiuaala tani auliuliaa Iesu, laghe ue va, “Ia oia taumattu ngateva ealoanna tau ssavoto atoa tani toka, me tani namanama teeila.”

³ Me Iesu ghe auliaala etaira kiukiu niaimatoongana atea etaira. Ghe uela va, ⁴ “Arova kateva etaimim kiena sipsipi erooroo kateva ai (100), me kateva etaira ghele raua, am annaa va karika aue ghele kasu vuli ghasiongaulu ghasio (99) sipsipi nongina la ghele namanama, me ghele laa pae lo ateva ghe rauela, lomosi ta aue ghele taraia? ⁵ Nau eteva ghele taraia, aue ghele masimasi, ghele saua, me ghele alokoie sae ta pappana, ⁶ me ghele saue lao tanganuena. Aue ghele kolo kapuna akapa atoa, me lo atoa la tokatoka kalakalaa teeia, me ghele ue ta ngetaira va, ‘Masimasiaaghi namungaili, poli ngatarala kieghe sipsipi eteva ghe rauela. Am mae masimasi teeieghi!’ ⁷ Aghaauliaa etaimim va, tale isaa o ase salana, namungaili nimasimasi elutulutu epona liu, nau eteva kateva tana tau ssavoto enanna ngaioghioghiaa ta ghasiongaulu ghasio (99) taumattu ghulughuluena, karika righi kaluira ssavoto va la nna ngaioghioghiaa.

Kiukiu niaimatoongana tale viliki veu etivilau ghe rauela

⁸ “Marova teva vause unna kasangauluvilau (10) viliki veu, me ghele rau kativilau, sa ateva aue ghele gheleia? Aue ghele arokoti kurane lam atea, me ghele kkala tani paea amasinaaili alena ateva, lomosi ta ghele taraia. ⁹ Nau ghele taraia, ghele kolo kapuna atoa, me lo atoa la tokatoka akalakalangina tanganuena, me ghele ue va, ‘Masimasiaaghi namungaili, ta ngatarala uneghe viliki veu etivilau ghe rauela. Am mae masimasi eitauaa teeieghi!’ ¹⁰ Tale ia o ase salana atikirighi, aghaauliaa etaimim va ensolo atoa kapuna ila God, masimasiaaira namungaili, nau eteva kateva tana tau ssavoto enanna ngaioghioghiaa.”

Kiukiu niaimatoongana tale aliki taita ateva ghe rauela

¹¹ Iesu ghe mene uela va, “Taumattu ngateva, natuna taita alua. ¹² Muli eteva taita ghe uela ta tamane va, ‘Tamaghi, tau mae peighi nau umate aue aghaa.’ Me tamairarua ghe koitaala peirarua natuna taita alua.

¹³ “Karika masau nau ghe lange sio me muli eteva taita ghe tau ekapala peina laghe polila, ghe ghaala viliki veu, me ghe kasula tani lao tale masau patunganue namuu. Ghe tiuaala tani poli aloannaane, ¹⁴ me unna viliki veu ghe kapala, me tale isaa o nau, paka maloo ateva ghe tinginala, me ghe karikala righi peina. ¹⁵ Liuna avalua o me ghe lao sio tani pae niuungu. Kateva taumattu tale ia o patunganue namu ngateae ghe sungiela tani laa ghaitoiaa mosu etoa me eanginila. ¹⁶ Eghe aloannaaili tani nama righi inana aneira mosu etoa, poli karika teva ghe tautau lao righi inana va ghe nama.

¹⁷ “Nau eteva masi ninannaa ghe ghaaiela me ghe uela va, ‘Kapuna tau ngai uungu etoa tamaghi oroieili aneira inana, me aghi oia maloo ateva ange ghelei emateaghi! ¹⁸ Akasu, me alao ta tamaghi, me aue alaa ue va, “Tamaghi, aghe ghelei saasakiaala ta mata God, me ta matam. ¹⁹ Karika masina aghi va uaseaghi va natum ieghi; uaseaghi va marova kateva kapum tau ngai uungu.” ’ ²⁰ Ghe tingina saela, me ange laolao ta tamane.

“Masau ia tanganue tamane, me tamane ghe taraiela; urunguitanina ateva ghe pasula tale nialousiusi, me ghe ilou lao sio tani sou natuna, me ghe llotiela me ghe ngusuela.

²¹ “Aliko taita ateva ghe uela va, ‘Tamaghi, aghe ghelei saasakiaala ta mata God, me ta matam. Karika masina aghi va uaseaghi va natum ieghi.’

²² “Me tamane ghe uela ta kapuna tau ngai uungu etoa va, ‘Am ailuiluila! Am maeaa sio teva aiaasae masinaaili, me easae. Am atokala teva ringi ta vuuvuu nimane, me am asae taula lua aikasukasu ta kkena. ²³ Am laa ghaa morona ateva natu vulumakao, me am uvi ematea, me ita namanama aitaaua teeia, me ita masimasi. ²⁴ Poli ia oia natughu taita ateva ghe matela, me ange mene sakesakela, me ghe rauela, me ange rekatala.’ Me laghe tiuaala tani masimasi.

²⁵ “Karika masau, me natuna mua ateva taita ghe oghiaa mae sio etapaa ngutana. Eghe kasukasu emaemae, ang ghe kalakalangina elo ale, me ghe nongola paka mangalia ateva tale nikau me niloku. ²⁶ Ghe kolola kateva tani aliki, me ghe kolomiela va, ‘Vaalua me la ghelei mangalia ateva okae?’

²⁷ “Aliko eteva ghe liula me ghe uela va, ‘Nengam ateva ange rekatala. Tamam euvi ematela morona ateva natu vulumakao, poli nengam ange mae sio tani rekataa etana, me ange masimasi.’

²⁸ “Mua ateva taita ghe sessaiela, me ghe tam aloannala tani sso elo ale. Tamane ghe ghoa mae tani aipoopoliaa poi teeia. ²⁹ Ghe liula ta tamane me ghe uela va, ‘Tarala, ninamanama atoa ngaghe uungula etam nonginaaili tau ngai nongonongo anna ateva, me karika poi aghe nongonongo vulu inangarim. Sa ateva ughe taue mae sio etaghi? Karika poi va ughe tau mae sio arova nim teva natu meemee va aghe ghelei teae ninamanama, me aghe masimasi eitaaua tee kapughu etoa! ³⁰ Me natum taita ateva oia ghe nim lao sio tani rungia see peim tale vause ngetapaa salana atoa, me nau erekatala, ughuvi ematela morona ateva natu vulumakao va eanna ia!’

³¹ “Tamane ghe liula me ghe uela va, ‘Natughu, io utokatoka teeieghi nau ekapa atoa, isaa akapa peighi peim. ³² Me ita velu eitaaua me ita tani masimasi, poli nengam ghe matela, me ange sakesakela, me ghe rauela, me ange rekatala.’ ”

16

Kiukiu niaimatoongana atea tale taumattu ngateva ghe aaitoiaa tau ngai uungu etoa

¹ Iesu ghe uela ta kapuna disaepolo atoa va, “Kateva tau peipeiena, kapuna tau ngai uungu eteva, laghe ue va karika masina ia, ta karika ghe aaitara ngamasina peina kapuna namu ngateva. ² Kapuna namu ngateva ghe koloala me ghe kolomiela va, ‘Vaalua tale inangari anongonongo la ghaauliaa teeio? Laa ghaimonomosiaa kiukiuna uunguaam tale peighi uaaitaraa, poli karika urooro tani mene aitaraa peighi.’

³ “Tau ngai uungu eteva ghe nnaala va, ‘Kapughu namu ngateva ange ghaaghaa velu niuungu etaghi. Sa ateva agheleia? Karika sarasarakana

ieghe tani kaikai me palatanna ieghe tani nim loo viliki veu. ⁴ Ngakilala sa ateva agheleia, me nau eteva aruu tale niuungu, taumattu ngatoa aue la ghaikoloainaghi nau alao tanganueira.’

⁵ “Liuna avalua o me ghe kolokolo kateva kateva tale taumattu laghe nim ghaala voto ta vauna ateva. Ghe kolomila aitiutiu eteva va, ‘Ghaisa kalum voto ughe nim ghaala ta vaughu eteva?’

⁶ “Lo ateva taumattu ghe nim ghaala voto ghe liula me ghe uela va, ‘Ghaoalu ai (800) galon* oliv oeli.’

“Tau ngai uungu eteva ghe uela etana va, ‘Ghaala uru ngai etikirighi laghe pitila kalum voto ughe nim ghaala ta vaughu eteva, me arovaeaata ta utoka sio, me upiti nonga ghaata ai (400).’

⁷ “Me ghe kolomila mene kateva va, ‘Ghaisa kalum voto ughe nim ghaala?’

“Me taumattu ngateva ghe uela va, ‘Kateva ai (100) aikaai uiti.’

“Tau ngai uungu eteva ghe uela etana va, ‘Ghaala uru ngai eteva laghe pitila kalum voto ughe nim ghaala etana, me upiti nonga ghaoalungaulu (80).’

⁸ “Nau vauna ateva ghe kilala voto kapuna sesa tau ngai uungu eteva ghe gheleila, ghe arueiniela, poli ghe gheleila voto tau muenna nonga atoa la gheelei. Taumattu tale kosa ateva oia muennaaili ila tale ase salana tani ghelei uunguaaira, me taumattu tale mallanga atoa karika. ⁹ Aghaauliaa etaimim va am ghinaghina masi voto tale kosa ateva tani ghelei, me eoroi kapuimim. Me nau eteva isaa o voto ekapa aue la masimasi tani ghaaiem tale voto ateva tokatoka liu ia.

¹⁰ “Lo ateva la atoka tuutuliira etana tale lutu voto pisike, aue la atoka tee tuutuliira tee etana tale namuu voto. Me lo ateva etam gheelei voto koronna tale lutu voto pisike, karika aue eghelei voto koronna tale llo voto namuu. ¹¹ Arova karika la ghaatoka tuutuliira etaimim tani aitaraa masi voto tale kosa ateva, karika teva aue eatoka tuutulina etaimim tani ghaa voto koronna. ¹² Me arova la tam aatoka tuutuliira va am rooroo tani aitaraa katoa peiira, karika teva aue ghele tau aatu righi voto va ghele peimim.

¹³ “Karika teva tau ngai nongonongo anna erooroo tani uungu ta ghalua vau, poli aue ghele ssa tee kateva, me ghele aielousiaa kateva. O aue ghele nongo usilaa kateva, me ghele liu vilina ta mene kateva. Karika am rooroo tani uungu ta God me viliki veu.”

*Inangari nipaopao me
ararimangalina ateva God
(Mat 11:12-13)*

¹⁴ Paresi etoa, la ghaielousiangaili viliki veu, nau laghe nongola isaa o inangari, laghe tiuaala tani amammarasa Iesu. ¹⁵ Iesu ghe uela etaira va, “Am, am nim aaloanna tani aitaratarainam tani ghelei masi voto ta mata taumattu ngatoa, me karika, ta God nonga ekilakila urunguitaniimim, poli voto masinaaili ta mata taumattu ngatoa, sesaaili ta matane God.

¹⁶ “Inangari nipaopao me inangariira propete atoa laghe pitila, ghe laa ghaa sio nau ta Jon, me ghe tiuaala tale nau etiulu o, masi inangari tale ararimangalina ateva God laghe tiuaala tani ppooa ngaotua, me taumattu ngakapa atoa laghe annaaili tani kupi sso etana. ¹⁷ Elomarase me kosa ateva lalu rooroo tani kapa, me teva tuku voto ghaunaaili tale inangari nipaopao karika erooroo tani kapa.

* **16:6:** Tale inangari nge Grik, kateva ai bath. **16:10:** Luk 19:17-26. **16:13:** Mat 6:24. **16:15:** Mat 23:28; Luk 18:9-14. **16:16:** Mat 11:12-13. **16:17:** Mat 5:18.

18 “Lo ateva erati vausenna ateva me elai ta mene teva vause ange lai sarila. Me lo ateva taita emene ghaa vause ateva oia laghe rati etokaiela, ia tee ange lai sarila.

Tau peipeiena ateva me Lasarus

19 “Kateva tau peipeiena ghe molumolu me ghe aasae masi ghinna atoa, me ghe gheelei ninamanama nau ekapa atoa. 20 Tapaa ngatamana tale valavala atea tanganuena, tau nilooloo ateva, ararina atea ta Lasarus, laghe mae aatokaia, pasu ia tale usai. 21 Ghe anna va enama llo inana aue ekatuu tale unna tevoo ateva tue peipeiena ateva. Me tee paua atoa laghe mae raarameaa usaina.

22 “Ghe ghaala nau eteva, tau nilooloo ateva ghe matela, me ensolo atoa laghe saue lao sio, me laghe laa ghalokoi valainie sio ta Abraham.† Tau peipeiena tee ateva ghe matela, me laghe kaieiniela. 23 Tale Hades, ghe aateatea paka mmarikana ateva, me vara ghe sae taatara, me ghe tarala Abraham masaueili ia, me Lasarus ghe tokatoka valaa etana. 24 Ghe kolokolo saela etana me ghe uela va, ‘Tamaghi Abraham, alom eusieghi me usuu Lasarus tani asuu elo vena tale vuuvuu nimane ateva tale manu me esio amakarrii ramuramuti paaghi eteva, poli aghateatea paka mmarikana tale kura atea oia.’

25 “Abraham ghe liula me ghe uela va, ‘Natughu, unnaa nau ta sakesake, io ughe ghaaghaa masi voto, nau Lasarus ghe ghaaghaa voto sesa. Me ghaine ange tokatoka amasina oia, me io angu ghaaghaa mmarikana. 26 Me tee, elome etaimami me io, paka salesalena ateva easoaso. Lo atoa la anna tani kasu oia me la ghatu ona, karika la rooro, me lo tee atoa la anna tani kasu ona me la mae etaimami, karika aue la roo.’

27 “Ghe liula me ghe uela va, ‘Tana aghaloannaaili, Tamaghi, va usuu Lasarus me elao tangane tamaghi, 28 poli ghalima nengaghi, me Lasarus elaa ghaulaa kieira, poli ila tee la rau mae tale voto ateva oia sesaaili ia.’

29 “Abraham ghe liula me ghe uela va, ‘Inangariira Moses me propete atoa isaa okae etaira; aue la nongola.’

30 “Tau peipeiena ateva ghe uela va, ‘Karika, Tamaghi Abraham! Arova teva ang ghe matela ghele lao etaira, aue la ghele nna ngaioghioghiaa tale kaluira ssavoto.’

31 “Abraham ghe uela etana va, ‘Arova la tam rooro tani nongo Moses me propete atoa, karika aue la akoronna voto, arova teva ghele totu tale nimate, me ghe auliaa etaira.’ ”

17

*Ssavoto
(Mat 18:6-7)*

1 Iesu ghe uela ta kapuna disaepolo atoa va, “Voto egheelei taumattu ekaakatuu tale ssavoto ange ailutua, me aue esesaaili ta taumattu ngateva egheelei voto oia elutulutu! 2 Aue ghele masinaaili etana marova la ghele iri atu etiulu maate ia ta ngalona, me la ghele ghoa allusia elo malionge, ta erau ghele teva aliki va unna niaikaaiia ekatuu. 3 Am panien tale voto am gheelei!

“Marova tuem ateva o nengam ateva egheelei ssavoto, uaulia ngakororongana etana, me marova enna ngaioghioghiaa, ukkaluaa. 4 Marova eghele teeio voto karika masina ghaituaata (7) tale kateva nau, me emae

† 16:22: Ajiu etoa laghe anna va epona liu ghulughuluena atoa taumattu la tokatoka tale ninamanama atea. Lo ateva etokatoka tee sio Abraham, eaapasunga va ia namuu ia. 17:3: Mat 18:15.

kkaluaa ghaituaata, me eue va, ‘Nganna ngaioghioghiaala,’ ukkaluaa voto egheelei teeio etana.”

Niaikaaiaa

⁵ Apostolo atoa laghe uela ta Vau eteva va, “Ughelei unemami niaikaaiaa me enamuu.”

⁶ Vau eteva ghe liula va, “Marova uneimim niaikaaiaa naanamungaane nongina katu ue ngai erighi ghaunaaili ia (mastet), am rooroo tani ue ta ai eteae o va etammuti tee uane, me emene ghoa pinosa elamana, aue ghele roo tani nongo usilainiem.

Uunguaane tau ngai nongonongo anna ateva

⁷ “Marova kateva etaimim kapuna tau ngai nongonongo anna ateva euungu etapaa ngutana, o eaaitaraa kiem sipsipi, nau ekiriaa mae elo ale, vaalua, aue uailuiluieinia tani namanama? ⁸ Karika! Aue ughele ue etana va, ‘Uaimonomosiaa aneghi inana, me uaipanipaniaa, me ukaisi tau mae aneghi inana, me uaku ateoghu me anamanama me aropi, me auena umina namanama me uropi.’ ⁹ Vaalua, karika aue ukaili emasina tale uunguaane ange gheleila? ¹⁰ Nim nongina am, nau ngam gheleila voto God eaauliaa etaimim tani ghelei, airuuruu am nim ue va, ‘Uunguaamami arau, poli ami nim tau ngai nongonongo anna iemami erau.’ ”

Iesu ghe ghelei emasinala 10 tau tasussuku (lepa)

¹¹ Iesu ghe mene laa saesae eJerusalem, ghe kasu eloi lao sio tale aioloa ngateva eSameria me eGalilii. ¹² Ghe kasukasu elaolao tale masaliki eteae, me kasangaulu (10) taita aneira tasussuku eteva, laghe sousouela, laghe tingina amasaula, ¹³ me laghe kolokolo atingina tani ue va, “Iesu! Namu ngateva! Alousiusi teeiemamila!”

¹⁴ Nau Iesu ghe tarailala, me ghe uela va, “Am lao sio, me am laa apasungainam ta pristi etoa.” Laghe kasukasu elaolao, me laghe raarangisanala.

¹⁵ Kateva etaira, nau ghe tarala va ghe raarangisanala, ghe oghi lao sio, me namungaili ta ghe tau saela God. ¹⁶ Ghe lao sio me ghe suuiaala ta liue kkena Iesu, me ghe kaili emasinala etana. Taita ateva oia aSameria ia.

¹⁷ Iesu ghe uela va, “Kasangaulu (10) taumattu la raarangisanala, me eaa ghasio (9)? ¹⁸ Vaalua me taitani ngeleka ateva, ia nonga emae sio tani amasina ta God?” ¹⁹ Iesu ghe uela etana va, “Tingina saela me ukasu; unem niaikaaiaa ange ghelei emasinaiola.”

Maemaeea ararimangalina ateva God

(Mat 24:23-28, 37-41)

²⁰ Katoa tana Paresi laghe kookolomi Iesu va lovisa ararimangalina ateva God aue emae. Ghe liula me ghe uela va, “Ararimangalina ateva God karika aue emae nongina am, am taatara. ²¹ Karika teva aue eue va, ‘Tarala, ie toko!’ o, ‘Ie teke!’ ta ararimangalina ateva God ia oia elome ta ngetaimim.”

²² Vara me ghe uela ta kapuna disaepolo atoa va, “Nau too emaemae, aue am aloannaaili tani tara Natuna ateva Taumattu ngateva tale teva nau, me karika aue am taraia. ²³ Katoa aue la ue etaimim va, ‘Tarala, ie teke!’ o, ‘Tarala, ie toko!’ Karika am mene akoronnila va am usilaa. ²⁴ Poli nongina ravaravaia ateva eravaravaia elomarase, me emammallanga akapa tale pai etoa, aue enongina Natuna ateva Taumattu ngateva tale nauna ateva. ²⁵ Aitiutiu aue eateatea mmarikana, me taumattu tale lo ateva oia vituu aue la ratia.

²⁶ “Me nauna Natuna ateva Taumattu ngateva aue enongina nau Noa. ²⁷ Taumattu ngatoa laghe namanama me ropiropi, taita me vause atoa laghe lailai, me ghe ghaala nau eteva Noa ghe kupi ssola tale anua ateva, me manu ghagga ateva ghe mae sio, me ghe tturungi ekapailala.

²⁸ “Aue enongina tee nau ta Lot. Taumattu ngatoa laghe namanama, ropiropi me laghe aaiipoliaa peiira, laghe pasapasa, me laghe atuutulu. ²⁹ Me nau eteva Lot ghe kasu vulila eSodom, kura atea me atu ramerame ghe sio mae epona liu, ghe tturungi ekapailala.

³⁰ “Aue enongina nau eteva Natuna ateva Taumattu ngateva emae rekata. ³¹ Tale ia o nau eteva, taumattu ngateva etokatoka eleka tale ale ateva, erau mene kupi sso tanganuena va eso ghaa peina; aue enongina tee taumattu ngateva euungu tapaa ngutana, erau mene oghi ghoa tanganuena. ³² Am annaa sa ateva ghe lutula ta vausenna ateva Lot! ³³ See etootoonga tani asaangi maamauluaane, aue erau; me see earau maamauluaane, aue esaanga. ³⁴ Tale ia o nau eteva, aghauliaa etaimim va, aue ghalua taumattu lalu aso tale katea nonga aisalo eleivoo: kateva aue la ghaaia, me kateva aue la rati elokoia. ³⁵⁻³⁶ Ghalua vause aue lalu ghelei putuputu palaoa: kateva aue la ghaaia, me kateva la rati etokaia.”*

³⁷ Disaepolo atoa laghe kolomiela va, “Vau eteva, llo oia eaa aue elaa lutu?”

Iesu ghe liula me ghe uela va, “Nongina eaa matena ateva taumattu easoaso, paka ghila atoa la veluvelu eitauaa.”†

18

Kiukiu niaimatoongana atea ta vause raue vulu eteva me tau ngai ghelei niaisakei eteva

¹ Iesu ghe auliaala kiukiu niaimatoongana atea ta disaepolo atoa tani apasunga etaira va la tani looloo sae tale nau ekapa atoa, me karika la mene sio asoasoa. ² Me ghe uela va, “Tale katea masaliki tau ngai ghelei niaisakei eteva, karika ghe maamatauta God ateva, me tee karika ghe oneoneaa tee kasina taumattu. ³ Me tee vause raue vulu eteva, ie tee elome tale masaliki etea, ghe maemae nonga ta tau ngai ghelei niaisakei eteva. Ghe aaloannaaili va esausia, tale aloalonnaane. Ghe ue etana va, ‘Usausieghi tale tau ngai ssateieghi eteva.’

⁴⁻⁵ “Kasina nau ang ghe lange sio, karika ghe aloanna tani nongoa me sausia, vara me ghe nnaala va, ‘Arongona ta karika aoneoneaa God me taumattu tee atoa, me poli vause raue vulu eteva oia etautau mae maate etaghi, asausia, poli erou toka maemae nonga va eghelei emangoieghi.’ ”

⁶ Vau eteva ghe uela va, “Am nongo inangarina sesa tau ngai ghelei niaisakei eteva ghe auliaala. ⁷ Am annaa va God karika aue eghele sausi kapuna atoa ghe aimatoongainilala, la looloo sae etana tale llaa me voo? Vaalua, am annaa tee va aue ghele aippetana tani sausila? ⁸ Aghauliaa etaimim va arovaeangaili ta aue ghele sausila. Tale isaa o salana, nau Natuna ateva Taumattu ngateva aue esio tale kosa ateva, aue etara righi taumattu eaiesoaa etana?”

Kiukiu niaimatoongana atea ta Paresi eteva me tau ngai ghaa takis ateva

17:28: Aitiutiu 18:20; 19:25. **17:31:** Mat 24:17-18. **17:32:** Aitiutiu 19:17, 26. **17:33:** Luk 9:24. * **17:35-36:** Kasina uru ngai laghe pitila, laghe mene pitila va, 36 Ghalua aue lalu uungu etapaa ngutana: kateva aue la ghaaia; me kateva la rati etokaia. (Mat 24:40) † **17:37:** Paka ghila atoa, la aseasela va valsa, la namanama nonga voto ang ghe matela me mauuna. **18:1:** Kol 4:2; 1 Tes 5:17.

⁹ Kasina taumattu la nannainila nonga va ila ghulughuluena ila, me katoa taumattu karika. Iesu ghe kiukiuuuala etaira ia oia kiukiu niaimatoongana atea, ghe uela va, ¹⁰ “Ghalua taumattu lalu ghe saela tale ale manga ateva tani looloo sae, kateva taumattu Paresi ia, me kateva tau ngai ghaa takis ia. ¹¹ Taumattu tale Paresi eteva ghe tingina saela me ghe looloo saela, me ghe aauliaa masi uunguaane. Ghe uela va, ‘God, aghi akaakaili emasina etam va aghi karika nongina lo atoa taumattu la ainao, gheeleiaaira karika masina, me la lailai sari, me nongina ia o tau ngai ghaa takis ateva. ¹² Ghaluaata tale ghaitu (7) nau anaenae, me atautau aiaasokolo tale voto akapa aghaaghaa.’

¹³ “Tau ngai ghaa takis ateva ghe tingina amasaula, me ghe sioaala nannaane, me ghe looloo saela, ghe uela va, ‘God, ualouslyusi teieghi, poli aghi tau ssavoto aghi.’

¹⁴ “Aghaauliaa etaimim va ia oia taumattu ngateva, karika nongina Paresi eteva, nau ghe kasula tani lao tanganuena, God ghe taraiela va ia ghulughuluena ia. See esaeaa nannaane, aue God etaue sio euu, see esioaa nannaane euu, God aue eanamunamunganeia.”

Natu aliki etoa me Iesu
(*Mat 19:13-15; Mak 10:13-16*)

¹⁵ Taumattu ngatoa laghe maeaa sio natuira raaraina atoa ta Iesu, va esaoaa nimane etaira me earangiseila. Disaepolo atoa laghe tarailala me laghe pao rungainilala. ¹⁶ Me Iesu ghe kolola natu ngaliki etoa laghe mae sio etana me ghe uela va, “Am tau velu natu aliki etoa la mae etaghi, karika am mene ghelei rungainila. Ta poli ararimangalina ateva God anueira ia taumattu ngatoa nongina natu ngaliki etoa. ¹⁷ Aghaaulia ngakoronnaaili, va arova see karika eghaa lo ateva o ararimangalina God nongina natu aliki etoa, karika aue esso etana.”

Tau peipeiena ateva
(*Mat 19:16-30; Mak 10:17-31*)

¹⁸ Kateva namuu ghe mae sio ta Iesu, me ghe kolomiela va, “Masi tisa ngateva, vaalua aroo tani ghelei, me aghaa lo ateva o maulue tokatoka liu ia?”

¹⁹ Iesu ghe liula me ghe uela etana va, “Vaalua me uue va masina ieghi? Karika teva masina, ta God nonga masina ia. ²⁰ Ukilakila inangari nipaopao eue va, ‘Karika umene lai sari, karika umene aiuvi emate, karika umene ainao, me tee karika umene kamekame tale niaisakei, uoneoneaa tamam me kinam.’”

²¹ Ghe uela ta Iesu va, “Isaa ona voto ngaghe aimuli teela nau aliki ieghi arau.”

²² Nau Iesu ghe nongola isaa o inangarina, ghe uela etana va, “Kateva voto karika ughe gheleia. Utau lao peim la poli, me ughaa viliki veu me ulaoa ta taumattu karika righi peiira. Arova ughelei evalua o, aue utau peipeiena epona liu, me umae aimuli teieghi.”

²³ Me nau ghe nongola isaa o inangari, ghe alousiusila, ta poli ia tau peipeiena ia. ²⁴ Iesu ghe taatara lao sio etana, me ghe uela va, “Aanasaaili ta tau peipeiena ateva tani kupi sso tale ararimangalina ateva God! ²⁵ Poli marova masukasukale ta teva kamolo tani kupi sso tale teae mata raum, aue emasukasukaleaili tee ta teva tue peipeiena tani kupi sso tale ararimangalina ateva God.”

²⁶ Taumattu ngatoa laghe nongoala, me laghe kolomiela va, “See nonga erooroo tani saanga?”

²⁷ Iesu ghe liula me ghe uela va, “Voto taumattu karika erooroo tani ghelei, God nonga erooroo.”

²⁸ Pita ghe uela etana va, “Tarala, ngami ghe kasu vulila tanganueimami me peimami tani aimuli teeio!”

²⁹ Iesu ghe uela ta ngetaira va, “Aghaaulia ngakoronna etaimim va, arova teva taumattu ekasu vuli tanganuena, manna, tuena atoa, nengana atoa, kinna me tamana me natuna atoa, mausi ararimangalina ateva God, ³⁰ aue God etau lao etana oroieili peina tale nau oia, me nau aue emae, eghaa lo ateva maulue tokatoka liu ia.”

Iesu ghe aulia ngamuemuela matemateaane
(*Mat 20:17-19; Mak 10:32-34*)

³¹ Iesu ghe kolo aitauala kapuna kasangaulu ghalua (12) disaepolo, me ghe uela etaira va, “Ngita laa saesae eJerusalem, me isaa akapa inangari propete atoa laghe piti emuemuela ta Natuna ateva Taumattu ngateva aue ekoronna. ³² Aue la taue lao ta taumattu ngeleka atoa, me aue la kusiaa teeia, me kangainia, me kanusua, la parua, me la uvi ematea. ³³ Emuli tale kotolu nau, aue etotu.”

³⁴ Aloira disaepolo atoa karika ghe maamasaanga tee inangarina. Mal-loeana inangari ghe aaisulia, karika laghe kilakila sa ateva Iesu ghe aaulieinia etaira.

Tau nilooloo ateva mata salusalu ia
ghe taatarala

(*Mat 20:29-34; Mak 10:46-52*)

³⁵ Nau Iesu ang ghe mae akalakalaa sio eJeriko, mata salusalu eteva ghe tokatoka tale sama salana atikirighi, uunguaane tani looloo. ³⁶ Ghe nongonongo oroieili taumattu ngatoa laghe kasukasu elangelange nongina ghe tokatoka, me ghe samala, me ghe kolomilala va sa ateva ange lutula.

³⁷ Laghe uela etana va, “Iesu aNasareti ia toko ekasukasu emaemae.”

³⁸ Me ghe kolokolo va, “Iesu, natuna io Deivit, ualousiusi teeieghi!”

³⁹ Taumattu ngatoa laghe muemue, laghe paopaoa va, “Urou mene sama.” Me karika, ta ghe mene kolokolo anamuula tani ue va, “Natuna ateva Deivit, ualousiusi teeieghi!”

⁴⁰ Iesu ghe tinginala, me ghe uela va, “Taumattu ngateva emae etaghi.” Nau ghe mae akalakalaa sio, Iesu ghe kolomiela va, ⁴¹ “Sa ateva ualoanna va agheleia etam?”

Ghe liula me ghe uela va, “Vau eteva, aghaloanna tani taatara.”

⁴² Vara me Iesu ghe uela etana va, “Angu taatarala; tale kalum niaikaiaa angu masinala.” ⁴³ Ia arau o me ghe taatarala, me ghe aimulila ta Iesu, ghe tautau sae ararina atea God. Nau taumattu ngatoa laghe taraiela, ila tee laghe tau saela ararina atea God.

19

Iesu me Sakies

¹ Iesu ghe ssola eJeriko, me ang ghe mene aainasiaa tani kasu. ² Kateva taumattu ghe tokatoka okae, ararina atea ta Sakies, namuu ia ta lo atoa uunguaaira tani ghaa takis, me tue peipeiena ia. ³ Ghe aloanna tani tara va Iesu saa taumattu ia, me karika ghe rooroo, ta poli tukunaaili ia, me oroieili

taumattu ngatoa. ⁴ Liuna avalua o me ghe ilou emuemuela me ghe saela ai eteae ta ghe kilakila va Iesu aue ghe mae avalua o.

⁵ Nau Iesu ghe rekatala tale ia o ai eteae, ghe taatara saela, me ghe uela va, “Sakies, kkure parasi sio mae, ta ghaine atani laa toka teeio tanguem.”

⁶ Gharavaea nonga ta ghe kkure siola, me ghe masimasieiliila me ghe kolola Iesu va lalu lao tanguena.

⁷ Nau taumattu ngatoa laghe tara avaluela o, laghe tiuaala tani auli-
ulieinia tani uue va Iesu ange lao sio tani toka tee tau ssavoto ateva.

⁸ Sakies ghe tingina saela me ghe uela ta Iesu va, “Vau eteva, aue ataula kasina peighi ta lo atoa karika righi peira. Me arova aghe kamekame me aghe ghaaghaa peira taumattu ngatoa, aue aliu ghaatiaata.”

⁹ Iesu ghe uela etana va, “God ange asaangila taumattu tale lo ateva oia ale, poli ia tee taumattu ngateva oia, tuvuna ia Abraham. ¹⁰ Poli Natuna ateva Taumattu ngateva ghe sio mae tani pae me asaangi taumattu ghe raela.”

Kiukiu niaimatoongana tale

10 tau ngai nongonongo anna

(Mat 25:14-30)

¹¹ Nau eteva laghe nongonongo isaa o inangari Iesu ghe auliaa, me ghe mene tiuaala tani auliaa kateae kiukiu niaimatoongana, ta poli ang ghe reerekata eJerusalem, me taumattu ngatoa laghe anna va Iesu aue ekingi tale ia arau o nau eteva. ¹² Ghe uela va, “Kateva namuu ghe lao sio tale patunganue namuu masau tani ghaa ninamuu va ekingi, me auena emene kiri mae. ¹³ Ghe kolola kasangaulu (10) kapuna tau ngai nongonongo anna me ghe tau lao sio kativilau gol koen* ta kateva kateva etaira. Me auena ghe kasu, ghe uela etaira va, ‘Am uungu tani mene saooa mene righi lomose ta amene kiri mae.’

¹⁴ “Taumattu ngatoa tale masalikina atea karika laghe masimasieiniela, me laghe suula kasina etaira tani laa auliaa va, ‘Karika ami aaloanna va ierai enamuu etaimami.’

¹⁵ “Me karika, ta ghe ghaala ninamu ngateae va ekingi, me ghe kiri lao sio tanguena. Ghe kolola kapuna tau ngai nongonongo anna kasangaulu me tani tara va ngila ghe uunguaala mene righi viliki veu tani saooa tale llo laghe ghaa akasinala o karika.

¹⁶ “Aitiutiueteva ghe lao sio me ghe uela va, ‘Namu ngateva, unem gol koen ativilau, aghe uunguaala me aghe mene ghaala kasangauluvilau.’

¹⁷ “Vauna ateva ghe liula va, ‘Masi uunguaam, poli ughe ghelei emasinala tale pisike niuungu, aue uaitaraa kasangauluae masaliki taatara.’

¹⁸ “Aiaaghalua ateva ghe lao sio me ghe uela va, ‘Namu ngateva, unem gol koen ativilau, aghe uungula me aghe mene gheleila ghalimavilau.’

¹⁹ “Me ghe uela etana va, ‘Me io, aue uaitaraa ghalimae masaliki taatara.’

²⁰ “Mene kateva kapuna tau ngai nongonongo anna ghe lao sio me ghe uela va, ‘Unem gol koen ativilau toko. Aghe suumi elokoiela tale tuku tapiri kalio ateva. ²¹ Aghe matautainiola ta io karika masi taumattu io, unim ghaaghaa voto karika kalum, me unim mukemuke voto karika ughe pasala.’

²² “Namu ngateva ghe liula me ghe uela etana va, ‘Aue uaisakei tale isaa o inangari uauliaa, io sesa tau ngai nongonongo anna io. Ughe kilakila va aghi karika masi taumattu ieghi, anim ghaaghaa voto karika kalughu,

19:7: Luk 15:2. **19:8:** Eks 22:1; Nam 5:6-7. **19:9:** Apos 16:31; Luk 13:16. **19:10:** Luk 15:4; Jon 3:17; 1 Tim 1:15. * **19:13:** gol koen Tale inangari nge Grik, *mina*. Kateva mina eroorooa aipolipoli ta kotolu ulana. **19:17:** Luk 16:10.

me anim mukemuke voto karika aghe pasala. ²³ Vaalua me karika ughe alokoi ssola uneghi viliki veu tale ale aialokoi viliki veu eteva? Me nau eteva ngaghe kiriaa mae sio aue aghele ghaa tee llo laghe saooa saela tee me llo aghe tau aatu.'

²⁴ "Me ghe auliaala ta lo atoa laghe tiitingina akalakalaa va, 'Am ghaa vella unna gol koen ativilau, me am taue lao ta lo ateva ghe ghaala kasangauluvilau gol koen.'

²⁵ "Laghe uela va, 'Namu ngateva, ia ang ghe ghaala kasangauluvilau!'

²⁶ "Me ghe liula me ghe uela va, 'Aghaauliaa etaimim va lo ateva euungu aanasa tale voto laghe taula aue la mene saooa mene kasina, me lo ateva karika euunguaa voto laghe taula etana aue la ghaa velu saa voto isaa etana.

²⁷ Me isaa o taumattu karika laghe aloanna va aghi akapuiru kingi, am ghaaila mae me am uvi ematela emua ta ngetaghi.' "

Iesu ang ghe aakalakalaa eJerusalem

(Mat 21:1-11; Mak 11:1-11; Jon 12:12-19)

²⁸ Nau eteva Iesu ghe ruula tani auliaa llo oia, me ghe kasu emuemuela tani sae eJerusalem. ²⁹ Nau eteva ang ghe aakalakalaa tale masaliki elua eBetpeis me eBetani tale motouru eteva la kolokolo va Oliv, ghe sungila disaepolo alua, ³⁰ me ghe uela etairarua va, "Amalu lao tale ia o masaliki eteae. Me nau amalu kupi sso tale masaliki eteae, aue amalu tara atingina natu donki eteva iriiri etingina ia, karika teva taumattu ghe sae toka ta ngetana me ghe iloueinia. Amalu pulakaia, me amalu maeainia oia. ³¹ Marova teva ekolomiemalua va, 'Vaalua me amalu puupulakaia?' amalu ue etana va, 'Vau eteva eaaloannaia.' "

³² Nau lalu ghe lao sio, lalu ghe tarala va llo Iesu ghe auliaala, ghe koronnala. ³³ Nau lalu ghe puupulakaia, tau kiena ghe kolomilalueta va, "Vaalua me amalu puupulaka natu donki eteva?"

³⁴ Lalu ghe liula me lalu ghe uela va, "Vau eteva eaaloannaia."

³⁵ Lalu ghe laoainie sio ta Iesu, me lalu ghe pulela uneirarua aiaasae ngeleka epona tale ghaata kkena ateva, me laghe sausila Iesu tani sae toka sae etana. ³⁶ Nau eteva Iesu ghe iilou elaolao, taumattu ngatoa laghe aalokoi aiaasae ngeleka tapaa salana.

³⁷ Nau eteva ang ghe aakalakalaa tale voto ateva nongina salana atikirighi ghe laa siosio tale motouru eteva eOliv, ila akapaaili lo atoa laghe usiisi Iesu laghe tiuaala tani masimasieili. Laghe kikkinari enamungaili tani kkauaa sae God, ta poli laghe annaa isaa o mirikol laghe tarala Iesu ghe gheleila.

³⁸ "Aue God eghelei emasina ta kingi eteva emaemae tale ararina atea Vau ngepona ateva!"

"Luei etoka epona liu, me ita tau sae ararina atea God iaaili epona!"

³⁹ Katoa elome tale ila o taumattu ngatoa Paresi ila laghe ue ta Iesu va, "Tisa, pao rungaala kapum disaepolo atoa!"

⁴⁰ Iesu ghe liula me ghe uela etaira va, "Aghaauliaa etaimim va, marova la matua atoka, aue atu etoa la sama anamungaili tani tau sae ararighi eteae."

⁴¹ Nau eteva ang ghe aakalakalaa me ghe taatara siola eJerusalem, ghe alousiisi teeiela. ⁴² Me ghe uela va, "Jerusalem, ghaine tale nau eteva oia aghaloanna va arova ughele kila sa ateva ghele gheleio me ughele toka tale luei. Me karika, ta isaa o voto eaaisulia etam, me karika urooro tani tara kila. ⁴³ Nau too emaemae aue tau ngai ssateem atoa, aue la atulu aivatvati eteva, me la talieinio, me la toka rungainio tale pai ekapa. ⁴⁴ Aue

la tturungio, io me taumattu ngatoa la tokatoka elome etam. Karika aue la rati etoka tiulu atu va aue emene toka saooa ta mene tiulu, ta poli karika ughe kilala nau eteva God ghe mae sio tani sausio.”

Iesu elome tale ale manga ateva

(Mat 21:12-17; Mak 11:15-19; Jon 2:13-22)

⁴⁵ Iesu ghe ssola tale ale ngeleka atiulu tale ale manga ateva, me ghe ameti velu ghoala lo atoa laghe aaitauaa me laghe aaipoliaa elome. ⁴⁶ Me ghe uela etaira va, “Uru ngai Manga ateva eue va, ‘Aleghi eteva aue eale ailooloo sae ia,’ me ngam gheleuela va ‘aleira ale niaisulia ia tau niainao atoa.’ ”

⁴⁷ Nau ekapa atoa ghe aapasunga asease voto tale ale manga. Namu ngatoa ta pristi etoa me tau ngai aapasunga tale inangari nipaopao, me lo atoa laghe muemueaa taumattu ngatoa, laghe paepae salana tani uvi emate Iesu. ⁴⁸ Me karika laghe rooroo, poli taumattu ngatoa laghe aloannaaili tani nongo Iesu.

20

Nikokkolomi tale matuutulienaane Iesu

(Mat 21:23-27; Mak 11:27-33)

¹ Kateva nau Iesu ghe aapasunga ta taumattu ngatoa elome tale ale ngeleka atiulu tale ale manga ateva, ghe poppooaa masi inangari, me namu ngatoa ta pristi etoa, tau ngai aapasunga atoa tale inangari nipaopao me lo atoa la muemueaa taumattu ngatoa, laghe mae akalakalaa sio etana. ² Me laghe uela etana va, “See ghe tau aatu sio matuutuliena etam, me see ghe sungiola tani mae ghelei isaa oia voto?”

³ Iesu ghe liula me ghe uela va, “Aghi tee amene kolomiem, me am liu mae etaghi. ⁴ See ghe tau lao sio matuutuliena ta Jon tani asuu, taumattu ngatoa, o God?”

⁵ Laghe ailoele me laghe uela va, “Marova ita ue va, ‘God,’ aue eue va, ‘Me vaalua me karika am ghe aaiesoaa ta ngetana?’ ⁶ Me marova ita ue va, ‘Taumattu ngatoa,’ taumattu ngakapa atoa aue la osaita tale atu, ta ila, la ghaaiesoaa va Jon propete ia.”

⁷ Me laghe liula tani ue va, “Karika ami kilakila va see ghe taula matuutuliena.”

⁸ Me Iesu ghe uela etaira va, “Aghi tee karika aue aghauliaa va see ghe tau mae sio matuutuliena etaghi.”

Kiukiu niaimatoongana tale sesa tau ngeutana atoa laghe aaitaraa utani uaeni etingiu

(Mat 21:33-46; Mak 12:1-12)

⁹ Me ghe tiuaala tani kiukiuuaa kateae kiukiu niaimatoonga. Ghe uela va, “Kateva taumattu ghe pasala utani uaeni etingiu, ghe taue lao sio ta katoa tau ngeutana tani aitarainia, me ghe kasu emasauelila tani laa toka see.

¹⁰ Ghe ghaala nau eteva tani pariki utani uaeni etingiu, me ghe sungila kateva kapuna tau ngai uungu tani laa ghaa righe ue uaeni tale utani uaeni etingiu, me lo atoa laghe aaitaraa utana atingiu laghe uvi emaamateala me laghe sungi aaoghiela; karika ghe ghaala righe voto. ¹¹ Ghe mene sungila mene kateva tau ngai uungu; me laghe mene uvi emaamateala, me laghe apalataiela me laghe sungi aaoghiela; ie tee karika ghe ghaala righe voto.

¹² Aiaakotolu eteva tau ngai uungu laghe uvi saasakieiniela me laghe sau velue ghoala eleka.

¹³ “Me tau ngumana ghe nnaala va, ‘Sa ateva agheleia? Aue asungi lo ateva natughu taita aghaailousiangailiia, me koti aue la oneoneainia.’

¹⁴ “Nau eteva lo atoa laghe aaitaraa utani uaeni etingiu laghe tarala natuna ateva tau ngumana ghe maemae, laghe aailoe va, ‘Ia oia taumattu ngateva, auena eghaa peina tamane. Ita uvi ematea, me ita, aue ita ghaa akapa utana atingiu.’ ¹⁵ Me laghe sau velue ghoala eleka me la ghe uvi emateala.

“Sa ateva tau ngumana aue egheleia ta ngetaira? ¹⁶ Aue emae me euvi emate akapa lo atoa laghe aaitaraa utani uaeni etingiu, me etau lao utana atingiu ta mene kasina ppae taumattu.”

Me nau eteva taumattu ngatoa laghe nongola isaa oia inangari, laghe uela va, “Karika emene ghelei evalua o!”

¹⁷ Iesu ghe taatara lao sio etaira me ghe kolomilala va, “Isaa oia voto laghe pitila tale Uru ngai Manga ateva, malloeainina avalue toko?

“‘Ia o atu eteva tau ngai atulu ale atoa laghe ratiela ghe aitiutiula tale atu ekapa atoa tani suei ale ateva.’

¹⁸ See ukatuu saooa tale ia o atu eteva, aue utakotokoto. Me arova ia oia atu eteva ekatuu saooa sae etam, aue utaputupu.”

¹⁹ Me tau ngai aapasunga tale inangari nipaopao atoa me namu ngatoa ta pristi etoa laghe kilala va Iesu ghe auliaala kiukiu niaimatoonga mausi gheeleiaaira, me angila ghe paepae va vaalua la kunea. Karika laghe roola, ta laghe maamatauta taumattu ngatoa.

Tani tau lao takis ta Siisa
(*Mat 22:15-22; Mak 12:13-17*)

²⁰ Tau ngalomasanga tale inangari nipaopao atoa me namu ngatoa ta pristi etoa laghe paepae salana tani kune Iesu. Laghe suula katoa tani gheleila va voto laghe aauliaa vara mene koronna. Laghe annaa tani ghaaia tale inangari ghe aauliaa, me la rooro tani taue lao ta Gavana. ²¹ Vara me laghe kolomiela va, “Tisa, ami kilakila va inangarim me llo uaapasunga koronna. Karika uaaimassiaa, me uaapasunga ngakoronna salane God. ²² Vaalua uannaa? Inangari nipaopao eue va masina etaita tani tau lao takis ta Siisa o karika?”

²³ Iesu ang ghe kila vella kamekameaaira taumattu ngatoa oia laghe anna tani ghelei, me ghe uela etaira va, ²⁴ “Am apasungaala tivilau viliki veu etaghi. See tootoona ateva me ararina atae o etana?”

Me laghe uela va, “Siisa.”

²⁵ Iesu ghe uela etaira va, “Liuna avalua o me am tau lao llo voto kanna Siisa, me llo voto kanna God am tau lao ta God.”

²⁶ Karika laghe roola tani ghaaia tale inangarina ghe aauliaa tale matavanga. Laghe soghiaala llo ghe liula me laghe paavoola.

Matena atoa aue la totu
(*Mat 22:23-33; Mak 12:18-27*)

²⁷ Sadiusi etoa, karika la ghaiesoaa tale nitotu tale nimate, katoa etaira laghe mae sio ta Iesu me laghe kolomiela kateva nikokkolomi. ²⁸ Laghe uela va, “Tisa, Moses ghe pitila va, ‘Arova taita ateva emate vulu vausenna ateva, me karika teva natuirarua, teva tuena o nengane taita etani ghaa vause ateva, me ealutu righi natuna lo ateva taita ang ghe matela.’ ²⁹ Ia avalua o, me ghaitu (7) taita tue me nenga laghe tokatoka. Mua ateva ghe ghaala vause ateva, me karika teva natuna, me ghe matela. ³⁰ Aiaaghaluene ateva taita, ³¹ vara me aiaakotolu eteva ghe mene ghaala vause ateva, me ghe

nim isaa avaluela o, me taita ghaitu oio laghe mate akapala, karika laghe alutula righi aliki. ³² Airuuruu, vause ateva tee ghe matela. ³³ Isaa avalua o, me nau la totu tale nimate, nongina uauliaa, see aue evausenna ia, poli ila akapa laghe laila etana?”

³⁴ Iesu ghe liula me ghe uela va, “Taumattu tale nau etiulu oia la lailai. ³⁵ Me lo atoa Vau ngepona ateva aue etaraila va ila ghulughuluena ila va la totu tale nimate, me la toka tale nau ekapa atoa, karika aue la mene lai, ³⁶ poli karika aue la mene mate. Aue la nongina ensolo atoa. Ila natuna ila God, poli laghe totula tale nimate. ³⁷ Moses tee ghe apasungaala etaita va taumattu la matemate aue la mene totu. Tale kiukiu eteae ghe pitiela tale nau eteva ghe tarala natu ai erighi ghe ataataia, ghe uela va, ‘Vau ngepona ateva kapuna Goto ia Abraham, me kapuna Goto ia Aisiki, me kapuna Goto ia Jekop.’ ³⁸ Me God ateva, karika va kapuira ia lo atoa matena ila, karika. Kapuira ia lo atoa maulue ila, poli ta taataraane God ila akapa maulue ila.”

³⁹ Kasina tau ngai aapasunga tale inangari nipaopao laghe liula me laghe uela va, “Masinaaili, Tisa!” ⁴⁰ Me karika laghe mene roo poila tani kolomi mene righi nikokkolomi.

See tuvuna ia Mesaea?

(Mat 22:41-46; Mak 12:35-37)

⁴¹ Me Iesu ghe uela etaira va, “Vaalua me la ue va Mesaea tuvuna ia Deivit?

⁴² Poli ia Deivit ghe uela ta vuku eteva ta Sams va,
“ ‘Vau ngepona ateva ghe uela ta kapughu Vau eteva va,
“Toka siola tale pai muenna ativilau

⁴³ Iomose ta aghatoka sio lo atoa la sessa teeio euu,
me uatingina saooa kkem etaira.” ’

⁴⁴ Isaa avalua o, me Deivit ekolokoloa va kapuna Vau eteva. Vaalua me mene tuvuna ia?”

Am paniem ta tau ngai aapasunga ngatoa tale inangari nipaopao

(Mat 23:1-36; Mak 12:38-40; Luk 11:37-54)

⁴⁵ Nau eteva taumattu ngakapa atoa laghe nongonongo, me Iesu ghe uela ta kapuna disaepolo atoa va, ⁴⁶ “Am paniem tale tau ngai aapasunga atoa tale inangari nipaopao. La aloannaaili tani asae masi ghinna me nongina namu ngatoa, me la tingina kasu see, me la aloanna va taumattu ngatoa la soula tale masi inangari nongina oroi taumattu etokatoka. Me la aloannaaili tani toka tale uneira aitokatoka namu ngatoa elome tale ale nivelu eitauaa me nongina namu ngatoa la namanama. ⁴⁷ La ghaaghaa aitautauaa peiira vause raue vulu etoa, me la kamekame tani ghelei aluseaili nilooloo sae. Nau eteva la lao tale niaisakei, aue la ghaa namungaili nimmarikana.”

21

Unna viliki veu vause ateva raue vulu ia ghe taula ta God

(Mak 12:41-44)

¹ Tale ale manga ateva, Iesu ghe atangarola me ghe tarala taumattu ngatoa tue peipeiena ila, laghe veluvelu viliki veu tale aikaai viliki veu eteva. ² Me ghe tara teela vause ateva raue vulu ia, karikaaili righi peina, ghe velu kaaila tapiri viliki veu eluevilau.* ³ Me ghe uela va, “Aghaaulia ngakoronna etaimim va ia o vause ateva raue vulu ia karika peina, ange kaaila oroi viliki veu, me ngeapalala katoa. ⁴ Poli katoa oia oroieili uneira viliki veu

^{20:37}: Eks 3:6. ^{20:42}: Sams 110:1. * ^{21:2}: Tale inangari nge Grik, ghaluevilau lepton. Lepton ghaunaaili etivilau viliki veu, nongina kativilau toea, me 100 lepton erooroo kateva denarius. ^{21:3}: 2 Ko 8:12.

etokatoka, me la nim vella nonga kasina tale aikaai eteva. Me ia o vause ateva karikaaili tivilau eoghi elokoila, ange kapaailila viliki veu eposoposo tani poli anna inana.”

Iesu ghe auliaala vaalua aue la tturuu ale manga ateva

(Mat 24:1-2; Mak 13:1-2)

⁵ Katoa laghe aaruaa ale manga ateva. Laghe ue va, “Masinaaili taataraane atu, me kasina masi voto laghe tau lao sio ta God tani amolumolu emasina ia o ale ateva.” Me Iesu ghe uela va, ⁶ “Isaa o llo am aaruaa — nau too emaemae karika teva atu aue etoka saooa ta mene kateva. Aue taumattu ngatoa aue la puli reerekata isaa akapaaili oia voto.”

Sesa nau me niaiuviu aue mae

(Mat 24:3-14; Mak 13:3-13)

⁷ Me laghe kolomila va, “Tisa, aue lovisa isaa oia voto aue elutu? Me saa voto aue elutu tani apasunga va ange naula?”

⁸ Iesu ghe liula me ghe uela va, “Am paniem teva taumattu erau mene kameam. Poli oroi taumattu aue la mae tale ararighi eteae, me la ue va, ‘Aghi Mesaea ieghi.’ Me aue la ghauliaa va nau ange mae akalakalaa sio, me am rau mene aimuli teeila. ⁹ Am rau mene matautu nau am nongo niaiuviu me niamakatakata. Isaa o voto etani lutu ekasina me karika la ghaaimatoonga va airuuruu tale kosa ateva, ange rekatala.”

¹⁰ Eghe mene auliaa tee lao sio etaira va, “Anua atoa aue la aiuvieinila, me ararimangali etoa tee. ¹¹ Kinatama rukeruke atoa aue la lutu tale kosa ateva. Maloo atoa aue la lutu tale kasina masaliki me sessa atoa aue la lutu. Aue niaimatoonga sesaaili me matautuna aue elutu elomarase.

¹² “Emua ta isaa akapa o voto, aue la kuneiem me aue am ghaa nimmarikana, me la laoainiem tale ale nivelu eitaua ngatoa tani aisakei, me la atokaiem tale ale mata voovoo. Aue la ghaaiem tani atinginaiem emua ta mata kingi etoa me gavana ngatoa tani aisakei, mausi ararighi eteae.

¹³ Isaa avalua o me aue eoti salaimim tani ppooaa aikaiaaimim ta ngetaghi.

¹⁴ Liuna avalua o am rau mene aimonomosiaa va saa inangari aue am liu etaira, ¹⁵ ta aghi aue atoa aatu inangari tani ppooaa me alomasaanga, me tau ngai ssateeimim atoa karika aue la rooroo tani liu. ¹⁶ Tamaimim me kinaimim, tueimim atoa me nengaimim atoa, me mangaliimim atoa me kapuimim atoa, ila tee aue la tauem lao ta tau ngai ssateeimim atoa, me aue la uvi emate katoa etaimim. ¹⁷ Ila akapaaili aue la ssa teeiem poli ararighi eteae. ¹⁸ Me karikaaili tikirighi uu nguruimim aue eraua. ¹⁹ Am tingina akorokorongana, me aue am ghaa maulue ateva tokatoka liu ia.

Iesu ghe auliaa teela vaalua aue la tturuu eJerusalem

(Mat 24:15-21; Mak 13:14-19)

²⁰ “Nau eteva am tara eJerusalem tau niaiuviu etoa angila taatalieinia, aue am kila va eJerusalem nauna ange kalakalaala va la turungia. ²¹ Tale ia o nau eteva, lo atoa elome eJudia am ilou sae tale motouru, me see atoa elome eJerusalem am kupi ghoa me am ilou. Me see atoa am tokatoka tale paa ngutana, karika am mene kupi sso eJerusalem. ²² Poli nau tani ghaa aipolipoli tale sesa gheeleiaaira aJerusalem atoa me voto laghe piti elokoila tale Uru ngai Manga ateva ange lutulutu. ²³ Alousiusi ta lo atoa la suusunuku me lo atoa la sussu tale isaa o nau! Poli namungaili voto sesa tale ia o masaliki eteae, me sessaiaane God aue etoka tale isaa o taumattu.

²⁴ Katoa aue la uvi ematela tale baenata, me katoa aue la ghaaila nongina karavusu etoa tani lao tale kasina anua, anueira ativuu etoa, me aue anueira ativuu etoa la asa tau sio eJerusalem lomosina ta nauira eruu.

Maemaeaane Natuna ateva Taumattu ngateva

(Mat 24:29-31; Mak 13:24-27)

²⁵ “Aue niaimatootoongana aue elutu tale sinaka ateva me ulana ateva me katto atoa. Tale kosa ateva, taumattu tale anua atoa aue la matautu me karika aue la alomasaanga tee lingi niaangarina manu eteva me manu ghagga ateva. ²⁶ Me taumattu aue ennangaili me la matautu poli la kila va voto sesa ange maemae tale kosa akapa ateva, poli God aue eghelei voto atoa korokorongana ila elomarase la ghaisiisia. ²⁷ Tale ia o nau eteva aue la tara Natuna ateva Taumattu ngateva esio tale urukookoo tee sarasarakaniaane me kinatama mallangina ateva. ²⁸ Nau isaa o voto etiuua tani lutu, am tingina sae me am masimasi, poli nauna Vau ngepona tani asaangiem ange akalakalaala.”

Kiukiu niaimatoongana tale fig atea

(Mat 24:32-35; Mak 13:28-31)

²⁹ Me Iesu ghe mene auliaala kateae kiukiu niaimatoongana, “Am tarala fig atea me mene kasina tana ai. ³⁰ Nau eteva utara ange vubbuleaa uruna, angu kilala va masi nau tale sinaka ateva ange aakalakalaa. ³¹ Liuna avalua o me nau eteva am tara isaa o voto, aue am kila va maemaeaane Natuna ateva Taumattu ngateva nongina kingi ange aakalakalaa.

³² “Aghaaulia ngakoronna etaimim va ia oia vituu eteva karika poi aue ekapa me isaa o voto aue elutu. ³³ Elomarase me kosa ateva aue lalu kapa, me inangarighi eteva karika poi aue ekapa.

³⁴ “Am tani taatara amasina. Am rau mene laa ropi see sesa manu va am veeveena, me am rau mene annaa voto tale kosa ateva, ta erau gheleiem va am katuu, me am nim soghi ta ia o nau eteva erekata, ³⁵ am nannaa va karika aue emae etana. Isaa o voto aue elutu tale taumattu ngakapa atoa la tokatoka tale kosa ateva. ³⁶ Nau ekapa atoa am anguu taatara me am looloo sae va aue am sarasarakana tani saanga tale isaa oia voto ange anna tani lutu, me am rooroo tani tingina emua ta matane Natuna ateva Taumattu ngateva.”

³⁷ Ellaa Iesu ghe aapasunga tale ale manga ateva, vara elo alai ghe sae asoaso tale motouru eteva eOliv. ³⁸ Vara elue talaua poopooa, taumattu ngakapa atoa laghe maemae tale ale manga ateva tani nongoa.

22

Jiudas ghe aloannala tani taula Iesu

(Mat 26:1-5, 14-16; Mak 14:1-2, 10-11; Jon 11:45-53)

¹ Nau nivelu eitaua ngateae tani nama verete karika righi isti etana ang ghe aakalakalaa, la kolokoloa va “Pasova.” ² Namu ngatoa ta pristi etoa me tau ngai aapasunga ngatoa tale inangari nipaopao laghe paepae righi salana tani uvi eisulia Iesu, me laghe maamatauta taumattu ngatoa. ³ Satana ghe kupila Jiudas la kolokoloa va Iskariot, ia tee kateva ta kasangaulu ghalua (12) disaepolo. ⁴ Liuna avalua o me ghe kasula tani laa aippoaa tee namu ngatoa ta pristi etoa me namu ngatoa ta polisi etoa, laghe aaitoiaa ale manga ateva, va vaalua erooroo tani tau lao Iesu etaira. ⁵ Laghe

masimasiangailiela me laghe uela etana va, “Aue ami tau aatu righi viliki veu.” ⁶ Jiudas ghe aloannala me ghe tiuaala tani pae righi salana tani ghelei va la kune Iesu, nau taumattu ngatoa karika ila.

Niaipanipaniaa tale Pasova ngateae

(Mat 26:17-25; Mak 14:12-21; Jon 13:21-30)

⁷ Ang ghe ghaala nau eteva tale nivelu eitauaa tale verete karika righi isti etana, me nau niuvi emate sipsipi, me la nama tale ia o Pasova ngateva.

⁸ Iesu ghe uela ta Pita me Jon va, “Amalu kasu me amalu laa aipanipaniaa ninamanama atea ta Pasova.” ⁹ Lalu ghe kolomiela va, “Eaa uanna va angalu laa aipanipanieinia?”

¹⁰ Ghe liula me ghe uela va, “Nau eteva amalu laa sosso tale masaliki taatara atea, aue amalu sou taita ateva esuusunuki manu tale aikaai manu eteva. Nau eteva amalu taraia, amalu usie sso tale ale ateva. ¹¹ Me amalu ue ta lo ateva alena ateva va, ‘Tisa ngateva eanna tani kila va eaa ia rum atiulu enama inani Pasova tee kapuna disaepolo atoa.’ ¹² Me aue ia eapasunga rum atiulu, ia epona tale ale ateva namuu ia, voto akapa isaa etana. Amalu sae aipanipaniaa inana etana.”

¹³ Lalu ghe kasula me lalu ghe lao sio, me lalu ghe tarala voto Iesu ghe auliaala etairarua, me lalu ghe aipanipaniaala inana tale Pasova ngateva.

Disaepolo atoa laghe namanama teela Iesu

(Mat 26:26-30; Mak 14:22-26; 1 Ko 11:23-25)

¹⁴ Nau eteva ghe ghaala nau ninamanama, me Iesu me apostolo atoa laghe lao sio tale tevoo tani namanama. ¹⁵ Me ghe uela etaira va, “Aghaaloannaaili tani namanama teeiem tale lo ateva oia Pasova, me auena aghaa nimmarikana. ¹⁶ Ta poli aghaauliaa etaimim va karika aue amene namanama tale mene teva Pasova lomose ta malloeanina koronna elutu tale ararimangalina ateva God.”

¹⁷ Iesu ghe ghaala kapa uaeni eteva, me ghe kaili emasina saela ta God, me ghe uela va, “Am ghaala, me am aikoita see elome etaimim. ¹⁸ Ta poli aghaauliaa etaimim va, karika aue amene ropi righi uaeni lomosina ta God aue eaitoia ngakapa kosa ateva.”

¹⁹ Iesu ghe mene ghaala verete ateva, me ghe kaili emasinala, me ghe pirila, me ghe taue lao sio ta kapuna disaepolo atoa, me ghe uela va, “Isaa oia verete ateva malataughu ia, ngatautau aatu. Nau am namaia, am annainaghi nau ekapa atoa.”

²⁰ Nau laghe ruula tani namanama, tale ia o salana atikirighi, ghe mene ghaala kapa ateva airopiropi ia, me ghe uela va, “Ia oia ouna ateva inangari niaippooa ngaitauaa tale raeghi eteva aue eakalaa etaimim. ²¹ Me lo ateva aue etaueghi lao ta tau ngai ssateeghi etoa, ie tee oia tale tevoo ateva. ²² Ta poli Natuna ateva Taumattu ngateva aue elao nongina God ghe uela va elao, me alousiusi ta lo ateva ange tautau velua.” ²³ Me laghe tiuaala tani aikolomieinila va see etaira ange ghelei evalua o.

See aue tani namuu?

²⁴ Karika masau, me angila ghe mene aissakeana tee ninamu ngateae va see etaira aue tani namuu. ²⁵ Iesu ghe uela etaira va, “Kapuiria kingi etoa tau ngeleka atoa, la ghelei taumattu enim uungu aanasa etaira, me lo atoa la aitarainila, la ghaaloanna va taumattu ngatoa la asaesae arariira. ²⁶ Me am, karika am mene ghelei nongina ila la gheghelei.

Ta lo ateva etaimim namuu ia, etani sio euu nongina teva aliki, me lo ateva emuemuaa niuungu, etani nongina teva tau ngai nongonongo anna. ²⁷ Am annaa va, see tani namuu ia? Lo ateva etokatoka tale tevo me enamanama, o lo ateva ekaakaisi anna inana? Lo ateva etokatoka tale tevo me enamanama. Aghi atokatoka elome etaimim nongina tau ngai nongonongo anna ateva. ²⁸ Am, am ghe toka teeieghila, nau aghe ghaala nitootoonga. ²⁹ Me nongina Tamaghi ghe tau mae sio ararimangalina ateva tani aitarainia, ngamene tautau aatu ararimangali eteva etaimim tani aitarainia. ³⁰ Liuna avalua o me aue am namanama me am ropi tale uneghi tevo ateva tale ararimangalighi eteva, me aue am toka tale uneira aitokatoka namu ngatoa, me am ghelei niaisakei tale kasangaulu ghalua (12) ararimangali nge Israel.”

*Iesu ghe uela va Saemon Pita aue eue va karika ekilakilaia
(Mat 26:31-35; Mak 14:27-31; Jon 13:36-38)*

³¹ Vara me Iesu ghe mene uela va, “Saemon, Saemon, aghaauliaa etam va Satana ange kolomila va etootoongainam nongina la sausau kirikiri uit. ³² Me aghe looloo saela mausim Saemon, va unem niaikaaiiaa karika emene katuu. Me nau eteva ukiriaa mae etaghi, uakorokorongana nengam atoa.”

³³ Pita ghe liula ta Iesu me ghe uela va, “Vau eteva, aghi aaipanipaniaa tani usio tani lao tale ale mata voovoo me tani mate teeio.”

³⁴ Iesu ghe liula me ghe uela va, “Aghaauliaa etam Pita, va auena paolo ateva taita ia eaangari elopai, aue uue akasina kotoluaata va karika ukilakilaieghi.”

³⁵ Vara me Iesu ghe kolomilala va, “Ia o nau eteva aghe sungiemla tani laa ppooaa masi kiukiu, me karika am ghe ghaala righi aikaai viliki veu, me aikaai ghinna, o aiaasae tale keke, am ghe annala mene righi voto?”

Laghe liula me laghe uela va, “Karika.”

³⁶ Me ghe uela etaira va, “Isaa oia arova righi uneimim aikkaai viliki veu, am ghaa tee me uneimim aikkaai ghinna, me arova karika righi iemaimim baenata, am tau uneimim aiaasae ngeleka ateva me la polia, me am poli iemaimim. ³⁷ Ta poli Uru ngai Manga ateva eue va, ‘Laghe ioi teeieghila va, ie tee sesa taumattu ia,’ me aghaauliaa etaimim va, isaa o voto aue elutu etaghi. Nongina saa voto laghe pitila va aue elutu etaghi, ange maemae ta ekaurekati ekapa.”

³⁸ Disaepolo atoa laghe ue va, “Vau eteva, tarala, ghalua toko baenata.”
Me ghe uela etaira va, “Ange roola.”

*Iesu ghe looloo sae tale motouru eteva eOliv
(Mat 26:36-46; Mak 14:32-42)*

³⁹ Iesu ghe kupi ghoala me ghe mene saela tale motouru eteva eOliv tani mene looloo sae nongina arau ghe gheeghelei, me disaepolo atoa laghe usiela. ⁴⁰ Nau eteva laghe laa sae rekata, ghe uela etaira va, “Am looloo sae va karika am mene katuu tale nitootoonga.” ⁴¹ Me ghe kasu vulilala, me ghe lao tee sio, maamasauaane nongina ughele osaosa tiulu atu, me ghe suuiaa siola patu kkena me ghe tiuaala tani looloo sae. ⁴² Ghe looloo sae avalua toko va, “Tamaghi, arova uanna, ughaa velu kapa nimmarikana ateva etaghi. Me ughelei nongina aloaloannaam, me karika va aloaloannaaghi.” ⁴³ Ensolo ateva ghe kasula epona liu ghe sio mae tani akorokoronganaia. ⁴⁴ Iesu ghe ateateaala maamatana namungaili, me karika ghe aamaomao tani looloo

sae. Ghe aapaka, me aapaka ateva ghe akaakalaa sio tale kosa ateva tani nonginaaili rae ateva.*

⁴⁵ Ghe tingina saela nau eteva ghe ruula tani looloo sae, me ghe lao sio ta disaepolo atoa, me ghe tarailala va laghe aseasekanua, poli nialousiusi ghe ghelei emangoolala. ⁴⁶ Ghe kolomilala va, “Vaalua me am aseasekanua? Am anguula, me am looloo sae va karika am mene katu tale nitootoonga.”

Jiudas ghe aitauaala Iesu

(Mat 26:47-56; Mak 14:43-50; Jon 18:3-11)

⁴⁷ Nau ghe tingina aippooaa me tana taumattu ngatoa laghe rekatala. Jiudas, kateva ta kasangaulu ghalua (12) disaepolo, ghe muemueinila. Ghe mae akalakalaa sio ta Iesu, tani ngusua. ⁴⁸ Me Iesu ghe uela etana va, “Aghaalousiusi teeio Jiudas, ta vara umene ngusungusueghi tale masi niaingusu, me karika ta angu aaitauaa Natuna ateva Taumattu ngateva ta tau ngai ssateena atoa.”

⁴⁹ Nau eteva lo atoa laghe tiitingina tee Iesu laghe tarala sa ateva aue elutu, me laghe uela va, “Vau eteva, erooroo va ami aiuvii tale baenata?”

⁵⁰ Me kateva etaira ghe sai patela talingana muenna ativilau kapuna tau ngai nongonongo anna ateva namu ngateva ta pristi etoa.

⁵¹ Iesu ghe uela va, “Ange roola!” Me Iesu ghe tulila talingana taumattu ngateva, me ghe mene masinala.

⁵² Iesu ghe uela ta namu ngatoa ta pristi etoa, me polisi etoa laghe aaitaraa ale manga ateva, me lo atoa la muemueaa taumattu ngatoa, laghe mae sio tani kuneia va, “Am annaa va aghi amuemua tau niainao atoa, va am mae sio tee tuku ngai me baenata tani kuneieghi? ⁵³ Me isaa o nau ekapaaili aghe tokatoka teeiem tale ale manga ateva, me karika am ghe kunekuneieghi? Nau eteva oia ange nauimmi iela, nau eteva sarasarakaniaa saurrom ateva ange muemueinamla.”

Pita ghe uela va etam kilakila Iesu

(Mat 26:57-58, 69-75; Mak 14:53-54, 66-72; Jon 18:12-18, 25-27)

⁵⁴ Laghe kuneieia, me laghe kasueinieia. Laghe laoainie sio tale alena ateva namu ngateva ta pristi etoa. Pita ghe aaimuli, me masaeuili ia etana.

⁵⁵ Katoa taumattu laghe gheleila kura atea elome tale valavala atea, me laghe toka taliaala etana. Me Pita ghe toka teeila siola. ⁵⁶ Vause ateva tau ngai nongonongo anna ia ghe taraiela ta ghe tokatoka nongina kura atea ghe ramerame, me ghe tara sossolainieia, me ghe uela va, “Ia tee, ia o taumattu ngateva ghe kasukasu teeia.”

⁵⁷ Pita ghe ssakeaala me ghe uela ta vause ateva va, “Karika poi akilakilaia.”

⁵⁸ Karika masauna arighi me mene kateva ghe taraiela, me ghe ue etana va, “To tee kateva etaira.”

Me Pita ghe uela ta taita ateva va, “Karika va aghi tee.”

⁵⁹ Kateva aoa ghe lange sio me kateva etaira ghe mene uela va, “Koronaaaili, ia oia taumattu ngateva ghe ususia, ta ie tee aGalili ia.”

⁶⁰ Me Pita ghe uela ta taumattu ngateva va, “Karika akilakila sa ateva uaaulieinia.” Nau eteva ghe tingina aippooaa me paolo ateva taita ia ghe aangarila. ⁶¹ Vau eteva ghe kirieia me ghe taatara lao sio ta Pita, me Pita ghe annaala inangarina Vau eteva ghe auliaala etana ghe uela va, “Ghaine auena paolo ateva taita ia eaangari, aue kotoluaata uue va

* **22:44:** Kasina uru ngai laghe pitila, karika laghe pitila ves 43-44. **22:54:** Mak 14:53-54.

utam kilakilaieghi.” ⁶² Liuna avalua o me ghe kupi ghoala, me ghe ngala alousiusieiliila.

Lo atoa laghe aaitoiaa Iesu laghe piipilosia
(Mat 26:67-68; Mak 14:65)

⁶³ Lo atoa laghe aaitoiaa Iesu laghe tiuaala tani pilosia, me laghe uviuvia.
⁶⁴ Laghe sum rungaala matane, me laghe kookolomia va, “Uauliaa inangarina God va see ange posalaiola.” ⁶⁵ Me laghe aauliaa oroieili inangari karika masina tani auliaa teeia.

Iesu ghe tinginala emua ta kansolo atoa
(Mat 26:59-66; Mak 14:55-64; Jon 18:19-24)

⁶⁶ Nau eteva ghe paila, namu ngatoa me namu ngatoa ta pristi etoa me tau ngai aapasunga ngatoa tale inangari nipaopao, laghe toka aitauaala me laghe ssoaala Iesu etaira. ⁶⁷ Me laghe uela va, “Arova Mesaea io, uauliaa etaimami.”

Me Iesu ghe liula me ghe uela va, “Arova aghauliaa etaimim, karika poi aue am aiesoaa etaghi. ⁶⁸ Me arova aghele kolomiem va vaalua nannaaimim tale Mesaea, karika poi aue am ghele liu. ⁶⁹ Me nau too emaemae karika masau me aue Natuna ateva Taumattu ngateva aue etoka tale pai muenna ativilau ta God ateva sarasarakanaaili ia.”

⁷⁰ Laghe kolomiela va, “Ia avalua o, me io Natuna io God?”

Ghe liula me ghe uela va, “Ngam auliaala va aghi Natuna aghi God.”

⁷¹ Laghe uela va, “Sa ateva inangari ita mene laa pae ta mene righi taumattu? Ta angita tani nongola ta paane.”

23

Laghe laoa sio Iesu ta Paelat
(Mat 27:1-2, 11-14; Mak 15:1-5; Jon 19:28-38)

¹ Vara me ila akapa kansolo atoa laghe tingina saela me laghe kasueiniela, laghe laoa sio ta Paelat. ² Me laghe tiuaala tani auliaa teeia. Laghe ue va, “Ngami ghe tarala taumattu ngateva etiitiuaa ppae kasina ninannaa tani ghelei saasakiaa tokatoka taumattu. Karika ealoanna va ami tau lao takis ta Siisa, me eue va ia Mesaea ngateva, kingi ia.”

³ Paelat ghe kolomila Iesu va, “Io kapuira kingi io aJiu etoa?”

Iesu ghe liula me ghe uela va, “Ue, nongina uauliaa.”

⁴ Paelat ghe auliaala ta namu ngatoa ta pristi etoa me taumattu ngatoa va, “Karika ngatarala righi sesa gheeleiaane taumattu ngateva oia.”

⁵ Me laghe aaulia ngasarakana va, “Ekasukasu ekapa see oia ejiudia, me etiitiuaa voto sesa tale voto eaapasunga tale taumattu ngatoa. Ghe tiuaala eGalilii me ange mae sio eriere.”

Paelat ghe suu tau lao sio Iesu ta King Herot

⁶ Tale nongonongoane Paelat tale isaa o voto, ghe kolomila va, “Taumattu ngateva oia aGalilii ia, o karika?” ⁷ Nau eteva ghe kilala va Iesu ghe tokatoka tale pai etivilau King Herot ghe aaitarainia, ghe sungi taue lao sio ta Herot. Isaa o nau, Herot ghe sae mae eJerusalem.

⁸ Nau eteva Herot ghe tarala Iesu, ghe masimasieiliila, ta poli ang ghe aloanna vella tani taraia. Poli tale uunguaane ghe nongonongo, me ghe aloannaaili tani taraia eghelei righi mirikol. ⁹ Eghe kolomiela tale oroi nikokkolomi, me Iesu karika ghe liu poila. ¹⁰ Namu ngatoa ta pristi etoa me tau ngai aapasunga ngatoa tale inangari nipaopao laghe tiitingina,

laghe aauliaa teeia inangari sarasarakanaaali. ¹¹ Herot me kapuna tau ngai uvii etoa laghe piipilosia, laghe kangkangainia, me laghe amolumolu emasinaaailiela, me laghe sungiela ghe mene lao sio ta Paelat. ¹² Ia o nau eteva, Paelat me Herot lalu ghe aikapukapuaala, poli nau too ang ghe lao sio lalu ghe aaisessaii.

Paelat ghe uela va Iesu emate

(Mat 27:15-26; Mak 15:6-15; Jon 18:39-19:16)

¹³ Paelat ghe kolo aitauaala namuu ta pristi etoa, namu ngatoa me taumattu ngatoa. ¹⁴ Me ghe uela etaira va, “Am maeaa sio taumattu ngateva oio etaghi poli am ue va ia etiitiuaa ppae kasina ninannaa tani ghelei saasakiaa tokatoka taumattu. Ghe tiitingina emua etaimim me aghe kolomiela kasina nikokkolomi, me aghe tarala va karika righi gheeleiaane sesa. ¹⁵ Ta nim nongina Herot ange sungi aaoghie mae sio etaita. Am taatara va karika righi sesa gheeleiaane va eghaa nimate. ¹⁶⁻¹⁷ Liuna avalua o anim parua, me atau velua.”*

¹⁸ Katengaata nonga ta laghe aiovaova ngalokoila tani ue va, “Ukasuaa taumattu ngateva ona, me utau velu Barabas emae etaimami!” ¹⁹ (Barabas laghe atokaie ssola tale ale mata voovoo, ta poli ia ghe muemua niamakatakata tale masaliki taatara, me ghe aiuvi ematela.)

²⁰ Poli aaloannaane tani tau velu Iesu, Paelat ghe mene kolo taula taumattu ngatoa. ²¹ Me laghe ovaova atingina me laghe ue va, “Avukalaie saela tale aikotoo!”

²² Aiaakotonna ghe mene uela etaira va, “Poli saa? Sa ateva voto sesa taumattu ngateva oio ghe gheleila? Karika ngaghe tarala righi gheeleiaane sesa va emate, liuna avalua o aparua me atau velua.”

²³ Laghe ovaova me laghe akorokorongana va esae vukala tale aikotoo. Uneira niaore ghe koronnala. ²⁴ Paelat ghe nnaala va eaimuli tee aaloannaaira. ²⁵ Ghe tau vella taita ateva laghe aloannaiela ghe tokatoka tale ale mata voovoo mausi ghe muemua niamakatakata me ghe aiuvi ematela, me ghe taula Iesu tale aaloannaaira.

Laghe avukala saela Iesu tale aikotoo

(Mat 27:32-44; Mak 15:21-32; Jon 19:17-27)

²⁶ Nau eteva tau ngai uvii etoa laghe kaakasueinia elaolao, laghe kune atokala Saemon atala nge Saerini ia, ghe rekata sae mae me ghe aloanna tani sso tale masaliki taatara atea. Me laghe tau lao sio aikotoo ateva etana va esaua, me eaimuli tee Iesu. ²⁷ Oroieili taumattu ngatoa laghe aaimuli tee Iesu, me elome etaira vause atoa laghe aalousiusi teeia. ²⁸ Iesu ghe kirielala me ghe uela etaira va, “Vauseni nge Jerusalem atoa, am rau mene alousiusi teeieghi. Am alousiusi teiem me natuim atoa. ²⁹ Ta poli kateva nau aue emae, aue am ue va, ‘Nimasimasi tale vause atoa kina ngere ila, lo atoa karika righi natuira, me lo atoa karika laghe sussu.’ ³⁰ Tale isaa o nau, “‘Aue la kolo motouru etoa va, “Am katu saoaala etaimami!”

me saesaena atoa va, “Am akouemamila!”

³¹ Taumattu ngatoa la ghelele teeieghi, me karika aghe gheleila righi voto sesa. Alousiusi etaimim arova auena la ghelele teeiem, poli am ghe gheleila voto sesa.”

³² Mene ghalua taumattu, gheeleiaairarua sesa, laghe ghaa teeilaluela tani laa uvi ematelalua. ³³ Nau eteva laghe lao sio tale voto ateva la

* **23:16-17:** Kasina uru ngai laghe pitila, laghe uela va **17** Me etani tau velu kateva taumattu elao etaira tale nivelu eitaua ngateae la kolokolao va Pasova. **23:29:** Luk 21:23. **23:30:** Osea 10:8; Aotu 6:16.

kolokoloa va “Voto ateva arova Riu uru taumattu ngateva” etana, tale ia o voto ateva laghe avukalaie saela tee lo alua gheeleiaairarua sesa, kateva tale pai muenna ativilau, me kateva tale pai uaise ativilau. ³⁴ Iesu ghe uela va, “Tamaghi, ukkaluaa, ta poli karika la kilakila va voto ateva la gheeleia sesaaili ia.”† Me tau ngai uvii etoa laghe tiuaala tani anamisi tani aikoita ghinnanina.

³⁵ Taumattu ngatoa laghe tingina taatara, me namu ngatoa laghe attara teeia. Me laghe ue va, “Ghe asaangila katoa, tau veluela me easaangia, kotiva kapuna Mesaea ia God, me God ghe suitoongainiela.”

³⁶ Tau ngai uvii tee atoa laghe saela, me laghe piipilosia, me laghe tau lao sio manu eteva sarasarakana ia, ³⁷ me laghe ue va, “Kotiva kapuira kingi io aJiu etoa, uasaangio.”

³⁸ Epona etana laghe pitila tuku inangari eteva va, “Ierai oia kapuira kingi ia aJiu etoa.”

³⁹ Kateva ta lo alua gheeleiaairarua sesa ghe aauliaa tee Iesu va, “Karika io va Mesaea io? Uasaangio me uasaangi teeiengalua!”

⁴⁰ Mene kateva ghe sessaiela tani nongo, me ghe uela va, “Karika umaamatauta God? Poli kateva nonga ia aipolipoli eteva angita ghaaiela. ⁴¹ Italua, italu ghaaghaa aipolipoli tale gheeleiaaitalua sesa. Me ia oio taumattu ngateva karika righi sesa gheeleiaane!”

⁴² Vara me ghe uela va, “Iesu, unnainaghi nau eteva umae tale arariman-galim ateva.”

⁴³ Iesu ghe liula me ghe uela va, “Aghaaulia ngakoronna etam, ghaine angu toka teeieghila tale umana utana atingiu God.”

Matemateane Iesu

(Mat 27:45-46; Mak 15:33-41; Jon 19:28-30)

⁴⁴ Pai ngelo sinaka ativilau‡ ghe mae sio, me saurrom ateva ghe akou ekapala kosa ateva lomosina ta 3 kilok elo alai,§ ⁴⁵ ta poli sinaka ateva ghe saurromienala tale ia o voto ateva. Me kalio atiulu ghe vuuvukala tale ale manga ateva ghe tarriila me ghe ghaluevilaula. ⁴⁶ Iesu ghe sama anamuula me ghe uela va, “Tamaghi, maamauluaaghi ngatautau aatu ta nimam.” Nau eteva ghe auliaala llo me ghe ainoana aruula me ghe matela.

⁴⁷ Kapuira namu ngateva tau ngai uvii etoa ghe tarala isaa o voto ghe lutula, ghe tau saela God me ghe uela va, “Koronna, ia oia taumattu ngateva tau ghulughuluena ia.” ⁴⁸ Oroi taumattu laghe mae sio laghe tarala sa ateva ghe lutula, laghe aalousiusi me laghe kasula. ⁴⁹ Me lo atoa laghe kilakilaia me vause atoa laghe usiela arau eGalilii laghe tiitingina amasau, me laghe tarala sa ateva ghe lutula.

Laghe kaiaala Iesu

(Mat 27:57-61; Mak 15:42-47; Jon 19:38-42)

⁵⁰ Kateva taita, ararina atea ta Josep, ia kateva ta kansolo atoa me masi taumattu ia me ghulughuluena ia, ⁵¹ karika ghe lao aitauaa tee sio nannaaira kansolo atoa laghe nnaala me voto laghe gheleila. Tanganuena tale masaliki taatara atea eArimatia, kateae uneira masaliki taatara aJiu etoa. Me ghe toitoi tani tara ararimangalina ateva God. ⁵² Ghe lao sio ta Paelat me ghe kolomila Iesu etana. ⁵³ Me ghe ghaaiela me ghe

23:34: Sams 22:18. † **23:34:** Kasina uru ngai laghe pitila, karika laghe pitila isaa oia inangari.

23:35: Sams 22:7-8. **23:36:** Sams 69:21. ‡ **23:44:** Pai ngelo sinaka ativilau Tale inangari nge Grik, ghaonomina (6) ateva aoa. § **23:44:** 3 kilok elo alai Tale inangari nge Grik, ta aiaaghasiona

(9) ateva aoa. **23:45:** Hib 6:19-20; 10:19-20.

sumuela tale kalio, me ghe alokoiela tale lienga atea laghe kai essola tale atu. Karika laghe alokoi poi teva taumattu etana. ⁵⁴ Nau eteva oia nau niaimonomonosiaa ia, me nau manga ateva ang ghe aakalakalaa.

⁵⁵ Vause atoa laghe mae aitauea tee sio Iesu eGalilii laghe mene usila Josep, laghe tarala lienga atea, me laghe tarala vaalua laghe alokoie ssola. ⁵⁶ Vara me laghe lao sio tanganueira, laghe aimonomonosiaala voto masi ngusungusuaane. Me laghe ainoanala tale nau manga ateva nongina inangari nipaopao eaauliaa.

24

Iesu ghe mene totula

(Mat 28:1-10; Mak 16:1-8; Jon 20:1-10)

¹ Me tale aitiutiu eteva nau, elue talua poopoo, vause atoa laghe ghaala voto masi ngusungusuaane laghe aimonomonosiaala me laghe lao sio tale lienga niaikkaia ngateae. ² Me laghe tarala atu eteva angila ghe atakiri veluela nongina laghe atingina rungaala atamani lienga niaikkaia ngateae. ³ Laghe kupi ssola me karika laghe tarala Vau eteva Iesu. ⁴ Laghe tingina nannaa, vara me laghe tarala taita alua lalu ghe tiitingina akalakalaa etaira, mallanga ateva tale ghinnaniirarua. ⁵ Vause atoa oia laghe matautula, me laghe tturru siola tapaa kosa, me taita alua oia lalu ghe uela etaira va, “Vaalua me am paepae taumattu sakesake nongina taumattu matena? ⁶ Karika ia oia; ange totula! Am rooroo tani annaa nongina ghe auliaala etaimim nau eteva ghe tokatoka arau eGalilii. ⁷ Ghe uela etaimim va, ‘Aue la tau lao Natuna ateva Taumattu ngateva ta nimaira tau ngai ghelei ssavoto atoa, me aue la avukalaie sae tale aikotoo ateva, me aue kotonna ateva nau aue emene totu.’” ⁸ Me laghe nnaala isaa oia inangari Iesu ghe auliaala.

⁹ Me laghe kasu vulila lienga niaikkaia ngateae. Nau eteva laghe kiriaa lao sio, laghe kiukiuuua isaa oia voto ta kasangaulu kateva (11) disaepolo, me mene katoa taumattu. ¹⁰ Meri aMakdala ia, Joana, me Meri kinna Jeimis, me mene kasina vause, laghe auliaala isaa oia voto ta apostolo atoa. ¹¹ Me laghe nannaa va vause atoa laghe auliaa kapa atoa, me karika laghe aiesoala inangariira. ¹² Vara me Pita ghe tingina saela me ghe ilou lao sio tale lienga niaikkaia ngateae, ghe turruaa siola me ghe tarala nonga kalio, me ghe oghiaa lao sio tanganuena, me ghe nnangailiila isaa o voto ghe lutula.

Nikasu tani lao Emmaus

(Mak 16:12-13)

¹³ Ie nonga o nau eteva ghalua tana kapuna Iesu lalu ghe laolao tale kateae masaliki la asease va Emmaus, erooroo kasangaulu kateva (11) kilomita* tani kasu eJerusalem me tani lao etana, ¹⁴ me lalu ghe kiukiuua isaa akapa oia voto ghe lutula. ¹⁵ Lalu ghe aaikolomi me lalu ghe kiukiu, me Iesu ghe sokotilaluela me ghe kasu eitauea teeilaluela; ¹⁶ God ghe ghelei rungainilaluela va lalu rau mene tara kila Iesu.

¹⁷ Iesu ghe uela etairarua va, “Sa ateva amalu kiukiueinia nau eteva amalu kasukasu emaemae?”

Lalu ghe tinginala, me taatarairarua ghe alousiusinnala. ¹⁸ Kateva etairarua, ararina atea ta Kliopas, ghe liula me ghe uela etana va, “Koti io nonga kateva taumattu eJerusalem karika ukilakila saa voto ghe lutula isaa to nau ang ghe lao sio, no?”

¹⁹ Iesu ghe kolomilaluela va, “Saa voto?”

23:56: Eks 20:10; Diut 5:14. **24:6:** Luk 9:22. * **24:13:** kasangaulu kateva (11) kilomita Tale inangari nge Grik, 60 stadia.

Lalu ghe liula me lalu ghe uela va, “Voto ghe lutula ta Iesu aNasareti ia. Ia oia taumattu ngateva propete ia, me inangarina me gheeleiaane sarasarakana ta matane God me taumattu ngatoa. ²⁰ Kapuita namu ngatoa ta pristi etoa me mene katoa tau ngai toitoi laghe tau veluela me laghe uvi emateala tale aikotoo. ²¹ Ami ghe nannaa va ia oia taumattu ngateva aue ghe ghaa oghi ita aIsraeli etoa! Me tee, ghaine ange kotonna atevala nau isaa oia voto ghe lutula. ²² Me tee, katoa kapuimami vause la asoghisoghiemamila; nau la siola nongina laghe alokoila Iesu, ²³ me karika la taraiela. La oghila, me la uela va la tara nongala ensolo alua, me ensolo alua lalu uela va ange totula. ²⁴ Me katoa kapuimami la lao sio nongina laghe alokoila Iesu, me la tarala va koronna llo vause atoa la ghauliaala, poli karika la taraiela.”

²⁵ Me Iesu ghe uela etaira va, “Alokapakapa iemalua? Aanasaaili iemalua tani aiesoaa voto akapa propete atoa laghe auliaala! ²⁶ Karika amalu kilakila va Mesaea etani ghaa mua nimmarikana tale isaa o voto me auena ekupi sso tale mallangina ateva?” ²⁷ Vara me Iesu ghe kiri tau lao sio etairarua saa voto laghe auliaala ekiukiueinia elome tale Uru ngai Manga akapa ateva. Etiitiuaa tale unna vuku Moses me voto propete atoa laghe pitila.

²⁸ Vara angilotolu ghe reerekata tale masaliki eteae lalu ghe laolao etana, me Iesu ang ghe gheelei va ghe kasu vulilalua. ²⁹ Me angilalu ghe gheelei rungarungainia tani ue va, “Ita ghaso. Sinaka ateva ange laa siosio, me ghaisa ngarighi evoo.” Me ghe kupi ssola tani toka teeilalua.

³⁰ Nau eteva ghe toka aitaaua teeilalue siola tale tevoa ateva, ghe ghaala verete, ghe kaili emasinala, ghe pirila me ghe tiuaala tani tau lao etairarua. ³¹ Me matairarua ghe otila, me lalu ghe tara kilaiela, me ghe aikapakapaaiila tale taatarairarua. ³² Me angilalu ghe aikolomieinilalua va, “Karika va isaa oia voto eataatala tale urunguitaniitalua nau eteva esamasama teeitalua tapaa salana me nau ekiri tau mae sio Uru ngai Manga ateva etaitalua.”

³³ Arovaeangaili ta lalu ghe tingina saela me lalu ghe kiriaa siola eJerusalem. Me lalu ghe tarala kasangaulu kateva disaepolo me mene katoa kapuira taumattu laghe tokatoka aitaaua ³⁴ me laghe ue va, “Koronna! Vau eteva ange totula me erekataala ta Saemon.” ³⁵ Me taita alua lalu ghe kiukiuuua sa ateva ghe lutula tapaa salana, me vaalua lalu ghe tara kilala Iesu nau eteva ghe pirila verete.

Iesu ghe rekataala ta disaepolo atoa

(Mat 28:16-20; Mak 16:14-18; Jon 20:19-23; Apos 1:6-8)

³⁶ Nau eteva laghe toka kiukiuua isaa o voto me katengaata ta Iesu ghe tingina polakila elome etaira, me ghe uela etaira va, “Luei aue etoka aitaaua teeiem.”

³⁷ Laghe soghila me laghe matautula, ta laghe annaa va laghe tarala raroaina ateva Iesu. ³⁸ Ghe uela etaira va, “Vaalua me am soghila? Vaalua me nannaaimim eghaaghalua? ³⁹ Am tarala nimaghi me kekeghi. Aghi oia! Am posoaghila me am tara; raroai eteva karika righi malatauna me riuna, nongina aghi!”

⁴⁰ Nau eteva ghe auliaala voto oia me ghe apasungaala nimane me kekena. ⁴¹ Laghe masimasieiliila me laghe soghila tani tara Iesu, me karika laghe aaiesoaa va voto laghe tarala koronna, me Iesu ghe kolomilala va, “Righi

aneimim inana?” ⁴² Laghe tau lao sio tuku kko arighi laghe tungi esaela tale kura, ⁴³ ghe ghaaiela, laghe taatara me ghe namaiela.

⁴⁴ Ghe uela etaira va, “Isaa oia voto ngaghe auliaala etaimim nau eteva aghe tokatoka teeiem. Isaa akapa voto laghe piti elokoila elome tale kanna inangari nipaopao Moses, propete atoa me Sams, etani lutu ekoronna.”

⁴⁵ Me ghe otila nannaaira va la tara kila Uru ngai Manga ateva. ⁴⁶ Ghe uela etaira va, “Isaa o voto laghe piti elokoila va: Mesaea aue emmarikana me aue emate, me aue emene totu tale nimate tale kotonna ateva nau, ⁴⁷ me aue la ppoaaa ninna ngaioghioghiaa tale ararina atea, me nikkaluaa tale uunguaa ssavoto, aue erooa ngakapa kosa ateva, etiuua eJerusalem. ⁴⁸ Am oia am ghe tarala me aue am ppoaaa isaa oia voto. ⁴⁹ Aghi aue asungi tau aatu sa ateva Tamaghi ghe aulieiniela tale inangari nialokoi; am toka arau oia tale masaliki taatara atea lomose ta am ghaa sarasarakana aue ekasu epona liu.”

Iesu ghe saela epona liu
(Mak 16:19-20; Apos 1:9-11)

⁵⁰ Vara me ghe kasueinilala, me laghe lao sio eBetani, ghe atingina saela nimana epona me ghe arangiseilala. ⁵¹ Nau eteva ghe aarangiseila, me ghe kasu vulilala me God ghe ghaaie saela epona liu. ⁵² Me laghe kkaueiniela, me laghe oghi lao sio eJerusalem tee nimasimasi. ⁵³ Laghe nim tokala o tale ale manga ateva me laghe tautau sae ararina atea God.

Masi kiukiu Jon ghe pitila Inangari emuemua

Jon kateva ta kasangaulu ghalua (12) disaepolo, me easeasea va “lo ateva disaepolo Iesu ghe ailousieinia”. Ghe pitila masi kiukiu tale ia oia vuku eteva poli ghe aloannala va taumattu la aiesoaa ta Iesu me la ghaa mauue ateva tokatoka liu ia (20:31). Jon epoppooaa Iesu va Inangari eteva, ghe tokatoka tee God emua arau.

Jon karika ghe pitila teva kiukiu niaimatoonga, ta ghe pitila kasina mirikol Iesu ghe gheleila, me easeasela va “niaimatoongana atoa”, me ghe pitila voto Iesu ghe apasungaala etaira. Ghe pitila oroieili inangari tale saa voto Iesu ghe apasungaala ta kapuna disaepolo atoa tale ia o voo ngateva laghe kuneiela, me oroï voto ta Spirit Manga ateva. Jon eaauliaa va ghe tarala Iesu nau ghe matela, me ghe mene taraiela nau ghe totula tale nimate.

Tani kila amuemua

Aitiutiu inangari 1:1-18

Iesu ghe uungu me ghe aapasunga 1:19–12:50

Taumattu ngatoa laghe aaulia ngaotu Iesu 1:19-51

Aitiutiu tale uunguaane Iesu 2:1–4:54

Niaimatoongana atoa me taumattu la sessa tee Iesu 5:1–7:52

Vause ailai salosalooa eteva 7:53–8:11

Iesu ghe apasungaala me ghe gheleila niaimatoongana atoa 8:12–10:42

Iesu ghe totula Lasarus tale nimate, me ghe ssola eJerusalem 11:1–12:50

Matemateaane me tottotuaane Iesu 13:1–20:31

Airuuruu eteae ninamanama tee Iesu 13:1-30

Iesu ghe apasungaala ta disaepolo atoa 13:31–16:33

Iesu ghe looloo sae mausi disaepolo atoa 17:1-26

Laghe kunela Iesu, laghe gheleila niaisakei, me Iesu ghe matela 18:1–19:42

Tottotuaane Iesu 20:1-31

Iesu, Pita me Jon 21:1-25

Inangari eteva ghe taumattula

¹ Emua arau, nau karika righi voto ghe lutu, Inangari eteva ghe tokatoka. Ghe tokatoka tee God, me ie tee Goto ia. ² Emua arau, ia ghe tokatoka tee God.

³ Tale ia o Inangari eteva God ghe ghelei ekapala voto. Karika righi voto God ghe gheleila aue ghe lutu arova Inangari eteva karika ia. ⁴ Mauue ateva etokatoka ta ngetana, me mauue ateva, mallangiira ia taumattu ngatoa. ⁵ Ia o mallanga ateva, elallaa tale saurrom ateva, me saurrom ateva karika erooroo tani ghelei epalaia.*

⁶ God ghe suula taumattu ngateva, ararina atea ta Jon. ⁷ Ghe mae sio tani auliaa mallanga ateva oia ta taumattu ngatoa, poli ghe aloanna va ila akapa la ghaiesoaa inangarina. ⁸ Jon karika va mallanga ia. Ia ghe nim mae sio tani ppoaa ngaotu inangarina mallanga ateva. ⁹ Mallanga ateva koronna ia ghe sso mae tale kosa ateva, me emaamallanga tale taumattu ngakapa atoa.

1:1: Jon 17:5; 1 Jon 1:1-2; Aotu 19:13. **1:3:** 1 Ko 8:6; Kol 1:16-17; Hib 1:2. **1:4:** Jon 5:26. **1:5:** Jon 3:19. * **1:5:** tani ghelei epalaia o tani tara kilaia. **1:6:** Mat 3:1; Luk 1:13-17, 76. **1:9:** Jon 8:12.

¹⁰ Ia o Inangari eteva ghe tokala oia tale kosa ateva, me arongona ta God ghe gheleila kosa ateva tale ia o Inangari eteva, me karika teva ghe kilakilaia. ¹¹ Ghe tani mae sio tanganuena, me kapuna atoa karika laghe aikoloainiela. ¹² Katoa tana taumattu laghe aikoloainiela, me laghe aiesoala etana, me tale ararina atea. Liuna avalua o, me ghe tau lao sio niavauvau etea va ila natuna ila God. ¹³ Karika va natuna ila God tale raeira taumattu ngatoa, me aloannaaira taita atoa me vause atoa, me nanna taita atoa. Nim ia God ghe gheleilala va natuna ila.

¹⁴ Inangari eteva ghe taumattula, me ghe toka teiemamila. Ami ghe tarala naanamunganiaane ateva tale ie nonga o Natuna ateva, Tamana ghe sungiela. Ia pasu ia tale maamasinaane me inangari koronna.

¹⁵ Jon ghe aulieiniela nau ghe sama anamungailiila me ghe uela va, “Ia oia taumattu ngateva aghe aulieinia va aue emae. Ia namuu ia etaghi, me aghi ghauna aghi etana, poli ia ghe tokala arau, me avirina aghe lutula.” ¹⁶ Poli pasu ia tale maamasinaane, liuna avalua o me ita ghaaghaa asease niarangise. ¹⁷ Poli God ghe tau lao sio inangari nipaopao ta Moses, me Moses ghe tau mae sio etaita, me Iesu Karisto ghe tau lao sio maamasinaane me inangari koronna. ¹⁸ Karika poi teva ghe tara God. Natuna nonga, ia koronna ia va Goto ia me kalakalanginaaili ia ta Tamana, ia ghe apasungaala etaita va God vaalue ia.

*Jon tau ngai aasuu ia ghe aulia ngaotula Iesu
(Mat 3:1-12; Mak 1:2-8; Luk 3:15-17)*

¹⁹ Ajiu etoa laghe suula pristi etoa me Livae† atoa eJerusalem tani laa kolomi Jon va ia see. ²⁰ Jon karika ghe aisuliaala etaira, me ghe uela etaira va, “Karika aghi va Mesaea ieghi.”

²¹ Laghe mene kolomiela va, “Io Elaija?”

Ghe liula me ghe uela va, “Karika.”

Me laghe mene kolomiela va, “Io Propete io?”

Ghe mene liula me ghe uela va, “Karika.”

²² Vara me laghe uela etana va, “Me uue va io see? Me ami laa ghauliala ta lo atoa la sungiemamila tani mae kolomi va io see.”

²³ Jon ghe liula tale inangarina propet Aisaea ghe uela va, “Aghi lingi ngalo taumattu ngateva ekolokolo tale voto ateva karika righi taumattu etokatoka etana ghe ue va, ‘Ghelei eghulughuluenala salane atikirighi Vau eteva.’”

²⁴ Elome tale lo atoa laghe lao sio tani kolomi Jon, katoa etaira Paresi ila.

²⁵ Laghe kolomiela va, “Vaalua me uasuu taumattu me karika va Mesaea etam, karika va Elaija etam me karika va Propete io?”

²⁶ Jon ghe uela etaira va, “Aghi aghaasuem tale manu, me kateva elome etaimim karika am kilakilaia. ²⁷ Arongo ta aghi aghe muemue mae sio, me karika masi taumattu ngieghi tani pulaka velu oasa tale unna aikasukasu elua, ia aue eaimuli etaghi.”

²⁸ Isaa o voto ghe lutula eBetani tale pai kativilau eJodan, nongina Jon ghe aasuu.

Natuna sipsipi eteva God

²⁹ Mene kateva nau me Jon ghe tarala Iesu ghe maemae aloi etana me ghe uela va, “Am tarala! Taumattu ngateva oia, natuna sipsipi ia God! Ia aue eghaa velu ssavoto tale kosa ateva. ³⁰ Ia aghe aulieiniela etaimim, nau aghe

1:13: Jon 3:3-6; 2:11; 1 Pita 1:23. **1:14:** Plp 2:7. **1:17:** Eks 34:28; Rom 6:14. **1:18:** Eks 33:20; Jon 6:46; 1 Tim 6:16. † **1:19:** Livae Livae etoa laghe saasausi tani uungu tale ale manga ateva. **1:21:** Diut 18:15, 18; Mat 11:14. **1:23:** Ais 40:3. **1:27:** Jon 1:15. **1:29:** Ais 53:6-7; 1 Pita 1:18-19. **1:30:** Jon 1:15.

ue va, ‘Kateva taumattu aue emae, ia namuu ia ta ngetaghi, poli ghe tokala arau, me avirina aghe lutula.’ ³¹ Karika aghe kilala va ia see, ta anim aasuu taumattu tale manu va aue aIsraeli etoa la taraia.”

³² Jon ghe aulia ngaotula ta taumattu ngatoa, ghe uela va, “Aghi tee okae, me aghe tarala Spiriti eteva ghe kasula epona liu nonginaaili va ghila ateva valusu ia ghe mae sio toka etana. ³³ Karika aghe kilala va ia see, ta lo ateva ghe sungieghila tani asuuem tale manu eghe uela etaghi va, ‘Aue utara Spiriti eteva esio toka tale kateva taumattu, me aue ukila va ia o taumattu ngateva aue easuuem tale Spirit Manga ateva.’ ³⁴ Aghi aghe tarala isaa o voto ghe lutula. Liuna avalua o me aghaauliaa etaimim va ia Natuna ia God.”

Aitiutiu etoa kapuna disaepolo Iesu

³⁵ Mene kateva nau Jon me ghalua tana kapuna disaepolo latolu ghe tiitingina aitaaua. ³⁶ Nau ghe tarala Iesu ghe kasukasu elaolao me ghe uela va, “Am tarala! Ia o natuna sipsipi eteva God!”

³⁷ Ilalua o disaepolo alua lalu ghe nongola, me lalu ghe lao sio tani aimuli tee Iesu. ³⁸ Iesu ghe kiriela me ghe tarailaluela, me ghe uela va, “Sa ateva amalu aloannaia?”

Lalu ghe liula me laghe uela va, “Rabae, eaa utokatoka?” (Ta inangari nge Hibru, “Rabae” malloeana va “tisa”.)

³⁹ Iesu ghe liula me ghe uela va, “Amalu usieghila, me amalu laa tara.”

Lalu ghe usiela tani laa tara nongina Iesu ghe tokatoka. Ang ghe 4 kilokola elo alai,† me laghe toka teeiela vara me ghe voola.

⁴⁰ Andru, nengane ia Saemon Pita, kateva ta ilalua o taumattu ngalua lalu ghe nongola Jon, me lalu ghe usila Iesu. ⁴¹ Aitiutiu eteva voto Andru ghe ghelelela, ghe kasula tani pae tuena ta Saemon Pita tani auliaa etana va, “Ngami ghe tarala Mesaea ngateva.” (Ta inangari nge Hibru, malloeana “Mesaea” elaolao aitaaua tee samasama nge Grik va “Karisto.”) ⁴² Andru ghe laooa sio tuena ta Iesu. Me nau Iesu ghe taraiela, ghe uela va, “Saemon natuna io Jon. Aue la kolo ararim atea ta Kepas” (malloeana ta inangari nge Grik va Pita, atu ia).

Iesu ghe kolola Pilip me Nataniel

⁴³ Vara ghe pai saela ta mene kateva nau, me Iesu ang ghe anna tani lao eGalilii. Nau ta ghe lao sio, ghe paela me ghe tarala Pilip, me ghe uela etana va, “Mae usieghi.”

⁴⁴ Pilip atala nge Betsaida ia, tanganueirarua Andru me Pita. ⁴⁵ Pilip ghe paela me ghe tarala Nataniel me ghe uela etana va, “Ngami tarala taumattu ngateva Moses ghe pitila me ghe aulieiniela tale inangari nipaopao, me propete atoa laghe piti emuemue alokoila maemaeane, Iesu ta ngetana, natuna ia Josep aNasareti ia.”

⁴⁶ Me Nataniel ghe kolomiela va, “Righi masi voto elutulutu eNasareti?”

Pilip ghe liula me ghe uela va, “Mae sio me ulaa tara.”

⁴⁷ Nau Iesu ghe tarala Nataniel ghe kasukasu emaemae etana me ghe uela va, “Tarala! Taumattu ngateva o, ia taumattu koronna ia ta aIsraeli etoa, karika egheelei me eaauliaa voto kamena.”

⁴⁸ Nataniel ghe kolomila Iesu va, “Vaalua ughe kilaieghila?”

Iesu ghe liula me ghe uela va, “Ngaghe taraiola nau Pilip ghe koloola ta ughe tokatoka tale liue fig atea.”

1:32: Mat 3:16. 1:34: Mat 3:17. 1:36: Jon 1:29. † 1:39: 4 kilokola elo alai Tale inangari nge Grik, aiaakasangalua ateva aoa. 1:40: Mat 4:18-20. 1:42: Mat 16:18. 1:45: Diut 18:18; Ais 7:14; 9:6; Jer 23:5; Esik 34:23.

⁴⁹ Me Nataniel ghe uela va, “Tisa, io Natuna io God, me io kingi nge Israeli io.”

⁵⁰ Iesu ghe liula me ghe uela va, “Uaikaaiiaa etaghi poli auela va aghe taraiola ughe tokatoka tale liue fig atae? Aue utara mene kasina voto namungaili aue elutu. ⁵¹ Aghaaulia ngakoronna etaimim va aue am tara epona liu aue eotia, me kapuna ensolo atoa God aue la siosio me la saesae ta Natuna ateva Taumattu ngateva.”

2

Nisigha ngateae eKena

¹ Ghalua nau ghe lange sio me Meri, kinna Iesu, ghe siola tale nisigha ngateae tale masaliki eteae eKena ta pai nge Galilii. ² Laghe aloanna va Iesu me kapuna disaepolo atoa la usi sio tale nisigha ngateae. ³ Nau uaeni ghe kapala, kinna ghe lao sio tani auliaa ta Iesu va, “Uaeni ange kapala.”

⁴ Iesu ghe liula me ghe uela va, “Vause ateva, urau mene auliaa voto va aghelei, ta naughu karika ghe mae.”

⁵ Kinna ghe uela ta tau ngai nongonongo anna atoa va, “Am ghelei saa voto eauliaa etaimim.”

⁶ Elome tale ale ateva, ghaonomo (6) aikaai manu laghe gheleila tale atu ghe tokatoka, uneira ajiu etoa aiporapora nau la ghaloanna tani aimuli tee uneira lo. Kateva aikaai manu eroroo tani kaai koti kateva ai (100) lita.

⁷ Iesu ghe uela ta tau ngai nongonongo anna atoa va, “Am aku kaai manu esae pasu tale aikaai manu.” Me laghe gheleila voto ghe auliaala.

⁸ Me Iesu ghe mene uela va, “Am akula righi me am laa tau ta lo ateva eaaitoiaa ninamanama atae.” Tau ngai nongonongo anna atoa laghe gheleila voto Iesu ghe auliaala.

⁹ Taumattu ngateva ghe aaitoiaa ninamanama atae ghe tootoongala manu ang ghe uaenila. Karika ghe kilala va eaa laghe ghaala; tau ngai nongonongo anna atoa laghe akula manu, ila nonga laghe kilala. Vara me tau ngaitoi ninamanama atae ghe kolola lo ateva taita ghe laila, ¹⁰ me ghe uela etana va, “Ila akapa taumattu ngatoa la ghaaikoita ngakasina masi uaeni, me nau taumattu ngatoa la ropiropi, me nannaaira ange aisavisavilaala, me la vira mene tautau lao llo uaeni karika tani masina. Me io, uarongi etokala masinaaili uaeni, me angu vira mene maeaa sio.”

¹¹ Ia o niaimatoongana ateva Iesu ghe gheleiela, aitiutiu ia tale isaa akapa niaimatoonga. Ghe gheleiela eKena ta pai nge Galilii. Tale ia o nau eteva Iesu ghe apasungaala sarasarakaniaane, me kapuna disaepolo atoa laghe aiesoala etana.

¹² Vara me Iesu ghe kasula eKena me ghe siola eKapenium, ia, kinna, nengane atoa me kapuna disaepolo atoa. Laghe tokala kasina nau tale ia o masaliki eteae.

Iesu ghe ameti vella taumattu ngatoa laghe poppoli me laghe aitaaua voto tale ale manga ateva

(Mat 21:12-13; Mak 11:15-17; Luk 19:45-46)

¹³ Nivelu eitaaua ta nau Pasova uneira ajiu etoa ang ghe aakalakalaa, liuna avalua o me Iesu ghe saela eJerusalem. ¹⁴ Ghe tarala taumattu ngatoa elome tale valavala atae tale ale manga ateva, laghe aitaaua me aipoliaa vulumakao me sipsipi me valusu. Ghe tara teela lo atoa laghe aaiokolikoliaa viliki veu. ¹⁵ Iesu ghe ghaala uasa me ghe gheleila uip ateva, me ghe ameti

velu ghoala taumattu ngatoa tale ale manga ateva, tee me kieira ghaata kkena, me ghe sau etakila uneira tevoo atoa lo atoa laghe aikolikoliaa viliki veu, me uneira viliki veu ghe kao reerekataala. ¹⁶ Me ghe uela ta lo atoa laghe aitaaua ghila valusu va, “Am ghaala valusu me am kasu. Am rau mene ghelei alena ateva Tamaghi va arova maketi ia.”

¹⁷ Me disaepolo atoa laghe annaala sa ateva Uru ngai Manga ateva ghe aulieiniela, ghe uela va, “Aielousiaaghi tale alem ateva eramerame elome etaghi arova kura atea.”

¹⁸ Namuu ta aJiu etoa laghe kolomila Iesu va, “Sa ateva aimatootoongana aue ugheleia tani apasunga etaimami va io ughe ghaala matuutulienu tani ghelei isaa o voto angu gheleila ghaine?”

¹⁹ Iesu ghe liula me ghe uela va, “Am rruti ale manga ateva o, me aue aghatulua ta kotolu nonga nau.”

²⁰ Me aJiu etoa laghe uela va, “Ghe roola ghaatingaulu ghaonomo (46) ninamanama laghe gheleila ale manga ateva, me io aue unim gheleia ta kotolu nonga nau?” ²¹ Ta ale manga ateva Iesu ghe aulieinia, vilikina ia. ²² Liuna avalua o me nau God ghe totuela tale nimate, kapuna disaepolo atoa laghe nnaala inangarina ghe auliaala, me laghe aiesoala tale Uru ngai Manga ateva tee me inangari Iesu ghe auliaala.

Iesu ghe kilakila eeieiaaira taumattu ngatoa

²³ Nau ghe tokatoka eJerusalem tale nivelu eitaau ngateae ta nau Pasova, oroi taumattu laghe aikaaiiala ta Iesu poli laghe tarala ghe gheleila niaimatoonga. ²⁴ Iesu ghe kilakila saa voto elome tale maamauluaaira, liuna avalua o me karika ghe aatoka tuutulina etaira. ²⁵ Karika teva ghe rooroo tani auliaa ta ngetana va saa taumattu ila, poli ghe kilakila urunguitaniira.

3

¹ Kateva taumattu, ararina atea ta Nikodimas, Paresi ia me namuu ia ta aJiu etoa. ² Kateva nau, nau ang ghe aitarrauiila, Nikodimas ghe lao sio tani tara Iesu, me ghe uela va, “Tisa, ami kilakila va God ghe sungiola tani sio apasunga voto etaimami, poli karika teva erooroo tani ghelei niaimatoonga ughelei, arova God karika etokatoka teeia.”

³ Iesu ghe liula me ghe uela va, “Aghaaulia ngakoronna etam va, karika teva erooroo tani kupi sso tale ararimangalina ateva God, arova karika etam lutu ppae.”

⁴ Me Nikodimas ghe kolomila va, “Vaalua aue lo ateva taumattu ang ghe namuula emene lutu? Erooroo tani kupi sso ta kova kinna me emene lutu eghaluene?”

⁵ Iesu ghe liula me ghe uela va, “Aghaaulia ngakoronna etam va, arova uanna tani sso tale ararimangalina ateva God, utani lutu tale manu me Spiriti eteva. ⁶ See elutulutu tale taumattu, taumattu ia, me see elutulutu tale Spiriti eteva, spiriti ia. ⁷ Urau mene soghiaa inangarighi nau aue va, ‘Am tani lutu ppae.’ ⁸ Kuukuu eteva ekuukuu ekapa see tale voto ealoanna tani lao etana. Arongona ta urooroo tani nongoa, me karika ukilakila va eaa ekasukasu me eaa elaolao. See elutu tale Spiriti eteva, ia nongina kuukuu eteva, karika teva erooroo tani tara kilaia.”

⁹ Me Nikodimas ghe kolomila Iesu va, “Vaalua isaa o voto aue elutu?”

¹⁰ Iesu ghe liula me ghe uela va, “Vaalua me io tau ngai aapasunga io ta aIsraeli atoa, me karika ukilakila isaa o voto? ¹¹ Aghaaulia ngakoronna etam va ami, ami kilakila sa ateva ami aaulieinia poli ngami ghe tarala. Karika teva etaimim aue ealoanna voto ami aauliaa. ¹² Arova am tam aiesoaa nau aghaauliaa etaimim voto oia tale kosa ateva, vaalua aue am ghele aiesoaa nau aghele auliaa voto epona liu? ¹³ Karika teva ghe sae epona liu. Natuna ateva Taumattu ngateva nonga ghe kasula epona liu, me ghe sio mae tale kosa ateva. ¹⁴ Nongina Moses ghe avukala saela katu ngateva tale voto ateva karika righi taumattu etokatoka etana, Natuna ateva Taumattu ngateva aue esae vukala, ¹⁵ tani tau lao maulue ateva etoka nau ekapa atoa ta lo atoa aue la ghaikaaiaa ta Natuna ateva Taumattu ngateva.”

¹⁶ Poli God ghe aaielousiangaili taumattu tale kosa ateva oia, liuna avalua o me ghe tau mae sio Natuna ateva, kateva nonga ia, me see aue eaikaaiaa etana karika aue emate, ta aue eghaa maulue ateva etokatoka nau ekapa atoa. ¹⁷ Karika va God ghe suula Natuna tani sio tale kosa ateva oia tani ghelei niaisakei ta taumattu tale kosa ateva. Ghe sungiela tani sio asaangi taumattu. ¹⁸ Lo ateva eaikaaiaa ta ngetana, karika aue eghaa sesa aipolipoli tale niaisakei, me lo ateva etam aikaaiaa ta ngetana aue evira ghaa sesa aipolipoli tale niaisakei, ta poli karika eaikaaiaa tale ararina atea Natuna ateva God. ¹⁹ Niaisakei etea ia avalua toko: Mallanga ateva ghe mae sio tale kosa ateva, me taumattu ngatoa la ghaloanna saurrom, me karika la ghaloanna mallanga, poli gheeleiaaira sesa. ²⁰ Lo atoa taumattu la ghelei voto sesa la tam maamasiaa mallanga ateva, me karika la ghaloanna tani mae etana, poli mallanga ateva eaapasunga voto la ghelei. ²¹ Me lo atoa la tokatoka tale voto koronna, aue la lao tale mallanga ateva, poli la ghaaloanna va mene katoa taumattu la kila va voto la ghelei God eghelei taula.

Iesu me Jon tau ngai aasuu ia

²² Vara me Iesu me kapuna disaepolo atoa laghe siola eJiudia, ghe toka teeilala, me ghe aasuu taumattu. ²³ Jon tee ghe aasuu taumattu tale voto ateva la kolokolo Aenon ta ngetana, kalakalaa tale masaliki etea eSalim, poli ia o voto ateva manu ia. Me oroi taumattu ghe mae sio ta Jon, me Jon ghe asuulala. ²⁴ (Isaa o nau Herot karika ghe atoka sso Jon tale ale mata voovoo.) ²⁵ Vara me kapuna disaepolo atoa Jon me kateva tana aJiu laghe tiuaala tani aissakeana tee saa tikirighi salana nisuu me niporapora la usilaa nau la ghaloanna tani aimuli tee uneira lo. ²⁶ Kapuna disaepolo atoa Jon laghe lao sio ta Jon me laghe uela etana va, “Tisa, taumattu ngateva ghe toka teeiola ta pai kativilau tale ateo atea eJodan me ughe aauliaa kiukiuna, ia oia ange aasuu taumattu, me ila akapa ngeila laolao ta ngetana.”

²⁷ Jon ghe liula me ghe uela va, “Karika teva taumattu erooroo tani ghaa righi voto, arova God epona liu etam anna va eghaa. ²⁸ Am ghe nongoaghila nau aghe ue etaimim va, ‘Karika va aghi Mesaea ieghi. Aghi God ghe sungieghila tani muemueainia.’ ²⁹ Nau taita ateva elilai vause ateva, lalu lai me ia aue vausenna ia. Me lo ateva taita euiiuitnesi, ie tee emasimasi nau enongonongo kapuna ateva elilai, nongina aghi nimasimasi eteva elome etaghi namungaili ia. ³⁰ Emaamasina va ararina atea esae epona, me ararighi etea esio euu.”

3:14: Nam 21:9; Jon 8:28; 12:32. **3:15:** Jon 20:31. **3:16:** Jon 3:36; 10:28; Rom 5:8; 8:32; 1 Jon 4:9-10. **3:17:** Luk 19:10. **3:18:** Jon 5:24. **3:19:** Jon 1:5, 9; 8:12. **3:22:** Jon 4:1-2. **3:28:** Jon 1:20; Mat 11:10.

³¹ Lo ateva ghe kasula epona liu me ghe sio mae, ia epona, me elaulau isaa akapa voto. Taumattuna kosa ateva oia egheelei gheeleiaa kosa ateva, me eaauliaa voto tale kosa ateva. Me lo ateva ghe kasula epona liu, ia epona tale taumattu ngakapa atoa. ³² Eaauliaa poi voto ghe tarala me ghe nongola, me karika teva eaaiesoaa inangarina. ³³ Me lo ateva eaiesoaa inangarina eaapasunga va God koronna ia. ³⁴ Poli lo ateva God ghe sungiela eaauliaa inangarina God, me God ghe tau lao sio Spiriti eteva etana, karika erooroo tani kapa. ³⁵ Tamane eaailousiaa Natuna, liuna avalua o me ghe taula isaa akapa voto ta ngetana. ³⁶ Lo ateva eaikaaiaa ta Natuna, maulue ateva aue etoka liu etana. Lo ateva etam nongo usilainia, karika aue eghaa lo ateva o maulue, me God sessaiaane etana aue etoka nau ekapa atoa.

4

Iesu me vauseni nge Sameria ngateva

¹ Iesu* ghe kilala va Paresi etoa ngeila ghe nongola va ia ang ghe ghaaghaa oroi taumattu tani asuu, me Jon karika. ² Me karika va Iesu ghe aasuu, ta kapuna disaepolo atoa.

³ Iesu ghe kasu vulila eJudia, me ang ghe mene laa saesae eGalilii. ⁴ God ghe aloanna va eusilaa salana atikirighi esosso elome eSameria. ⁵ Ghe kasukasu elaolao me ghe rekatala tale masaliki eteae la kolokoloa va Sika eSameria, kalakalangina ia tale tuku kosa ateva Jekop ghe taue lao sio ta natuna ta Josep emua arau. ⁶ Ateo kaikai eteae Jekop ghe kaiela ghe asoaso tale masaliki eteae Iesu ghe kasukasu elaolao etana. Vara me ang ghe maamangoo poli ghe kasula tale aluse salana, me ghe toka siola kalakalangina tale ateo kaikai eteae. Ang ghe pai ngelo sinakala.†

⁷ Kateva vauseni nge Sameria ghe mae sio tani aku, me Iesu ghe uela etana va, “Aku tau mae sio righi manu, me aropi.” ⁸ (Kapuna disaepolo atoa laghe ssola elo masaliki tani poli inana.)

⁹ Vauseni nge Sameria ngateva ghe uela etana va, “Io ajiu io me aghi vauseni nge Sameria ngaghi. Vaalua me ulooloo manu etaghi?” (Ghe auliaala llo poli ajiu etoa me aSameria ngatooa karika laghe samasama aitaaua.)

¹⁰ Iesu ghe liula me ghe uela va, “Arova ughele kila masi voto God eanna tani tau aatu, me ughele kila tee lo ateva ekookolomio tani ropi, aue ughele kolomia tale llo ateo etautau mae maulue.”

¹¹ Me vause ateva ghe uela va, “Namu ngateva, karika teva unem aiakueku, me ateo ateaie sio liuna ia, me eaa aue ulaa ghaaia lo ateaie ateo etau mae maulue? ¹² Tuvuimami eteva ta Jekop ghe kaiela ateoimami eteae oia, me natuna atoa me kieira ghaata kkena atoa laghe ropiropi etana. Koti io namuu io ta Jekop, va?”

¹³ Iesu ghe liula me ghe uela va, “Lo atoa aue la ropi tale ia oia ateo kaikai eteae, aue la mene aloanna tani ropi. ¹⁴ Me lo ateva eropi tale ateo ateaie aghi aue atauela, karika aue emene kangngata tani ropi. Lo ateaie ateo aue atauela aue etoka etana nonginaaili lo ateaie ateo enim toka akaakalaa me karika ematimati, me aue etaula maulue ateva karika ekapakapa.”

¹⁵ Me vause ateva ghe uela ta Iesu va, “Namu ngateva, utau mae ia o ateo ateaie, me auena arau mene aloanna tani ropi va amene mae aku oia.”

3:31: Jon 8:23. **3:32:** Jon 3:11. **3:35:** Mat 11:27; Jon 5:20. **3:36:** Jon 3:16-18; 1 Jon 5:12.

4:1: Jon 3:22. * **4:1:** Iesu Kasina uru ngai laghe pitila, laghe uela va Vau eteva. **4:5:** Aitiutiu

33:19; Jos 24:32. † **4:6:** pai ngelo sinaka Tale inangari nge Grik, ghaonovina (6) ateva aoa. **4:9:**

Esra 4:1-5. **4:10:** Jon 7:37-38; Aotu 21:6. **4:12:** Jon 8:53. **4:14:** Jon 6:35.

¹⁶ Me Iesu ghe uela etana va, “Lao sio me ulaa kolo taitanim ateva, me amalu mae.”

¹⁷ Me vause ateva ghe uela va, “Karika teva taitanighi.”

Me Iesu ghe uela va, “Uaulia ngakoronna va karika teva taitanim. ¹⁸ Poli angu ghe ghaa muela ghalima taita, me lo ateva taita utokatoka teeia karika va taitanim ia. Liuna avalua o me inangarim uauliaa koronnaaili.”

¹⁹ Me vause ateva ghe uela va, “Namu ngateva, ngakilala va io propete io. ²⁰ Tuvuimami etoa la kakkaua tale ia o motouru eteva, me am aJiu etoa, am ue va masaliki nikkaua ngateae eJerusalem.”

²¹ Iesu ghe uela etana va, “Uaiesoaa inangarighi va aue kateva nau ta isaa to nau emaemae karika aue am kkaua Tamaita ateva tale ia o motouru eteva me eJerusalem. ²² Am aSameria ngatoa, karika am kilakila see am kaakaueinia. Ami aJiu etoa, ami kilakila God ateva ami kaakaueinia, poli ta aJiu etoa aue niasaangi emae. ²³ Me nau ie emaemae me ange rekatala va Spiriti eteva kanna ia God aue eghelei taumattu la rooroo tani kkaua God tale koronna. Tamaita ateva ealoanna va isaa o ase taumattu la kaueinia. ²⁴ God spiriti ia, me lo atoa la kaakaueinia, Spirit Manga ateva ekaakatulainila tani kkaua tale voto koronna.”

²⁵ Me vause ateva ghe uela va, “Akilakila va Mesaea ngateva aue emae (la kolokoloa va Karisto etana). Nau emae aue eaulia ngamasinaaili ekapa voto etaimami.”

²⁶ Me Iesu ghe uela etana va, “Aghi oia asamasama, aghi oia taumattu ngateva uaaulieinia.”

²⁷ Isaa o nau me kapuna disaepolo atoa ngila ghe kiriaala, me laghe soghiaala tani tara Iesu ghe samasama tee vause ateva. Me karika teva ghe kookolomia va, “Sa ateva ualoannaia?” me, “Vaalua me usamasama teeia?”

²⁸ Vause ateva ghe velu etokala ateona aikaai manu eteva, me ghe ilou ssola tale masaliki eteae, me ghe uela ta taumattu ngatoa va, ²⁹ “Am mae sio, me am laa tara taumattu ngateva, eaulia ngakapala voto agheelei. Koti ia Mesaea ia?” ³⁰ Taumattu ngatoa tale masaliki eteae laghe lao sio tani taraia.

³¹ Nau isaa o voto ghe lutulutu, me kapuna disaepolo atoa Iesu laghe ue etana va, “Tisa, namanamala mua.”

³² Iesu ghe liula me ghe uela etaira va, “Aneghi tani inana karika am kilakila.”

³³ Disaepolo atoa laghe tiuaala tani aikolomieinila va, “Teva taumattu emae sio tani anginia?”

³⁴ Iesu ghe uela etaira va, “Inana anamanama nau agheelei uunguaane lo ateva ghe sungieghila, me tani ruu isaa o niuungu ghe uela va aghelei.

³⁵ Am roo tani ue va, ‘Kasi ghaata ulana me ita laa ghaa inana tale utana atingiu.’ Aghaauliaa etaimim va am taatara sso, me am tara utana atingiu ang ghele matuela, me ang ghele roola tani ghaa inanina. ³⁶ Lo ateva taumattu euungu tani ghaa inana tapaa ngutana eghaaghaa arau aipolina, me eghaaghaa aitauaa inana aue etoka nau ekapa atoa. Liuna avalua o me lo ateva epasapasa inana me lo ateva eghaaghaa, ilalua akapa lalu masimasi. ³⁷ Koronnaaili ia tuku inangari eteva eue va, ‘Kateva epasapasa, me mene kateva emukemuke.’ ³⁸ Ngasungisungiem tani laa ghaa inana tale utana atingiu, katoa ppae ghe matela uunguaaira etana, me am, am ghe nim ssola tani ghelei eruu uunguaaira.”

³⁹ Oro i taumattu nge Sameria tale ia o masaliki erighi laghe aikaaiaala ta Iesu poli vause ateva ghe uela va, “Ia oia taumattu ngateva eaulia ngakapala voto agheelei.” ⁴⁰ Laghe lao sio tani kolomi esarasarakana Iesu va emene toka teeila mua. Liuna avalua o me Iesu ghe mene toka teeilala ghalua nau. ⁴¹ Ghe mene oro i taumattu nge Sameria ghe aikaaiaala ta Iesu poli inangarina laghe nongola.

⁴² Me laghe ue ta vause ateva va, “Karika va ami aikaaiaa ta Iesu poli isaa o inangari uauliaala etaimami. Ami tee ngami nongoala, me ngami kila akoronnala va ia aue easaangi taumattu ngatoa tale kosa ateva.”

Iesu ghe ghelei emasinala natuna taita arighi kateva namuu
(Mat 8:5-13; Luk 7:1-10)

⁴³ Iesu ghe toka teela aSameria ngatoa ghalua nau, me ghe kasu vulilala tani mene sae eGalilii. ⁴⁴ Iesu ghe auliaala va, propete ateva, la oneoneainia tale kasina ppae masaliki, me tanganuena karika. ⁴⁵ Liuna avalua o, nau ghe saela eGalilii, laghe masimasila va etoka teeila, poli ila tee laghe saela tale nivelu eitaua ngateae eJerusalem, me laghe tarala voto Iesu ghe gheleila.

⁴⁶ Nau ia eGalilii, Iesu ghe mene lao sio eKena, masaliki eteae ghe gheleila manu ghe uenila. EKapenium, kateva namuu, kapuna tau ngai uungu ia kingi, natuna taita arighi ghe iisiki. ⁴⁷ Nau eteva ghe nongola va Iesu ang ghe kasula eJiudia me ang ghe rekatala eGalilii, ghe lao sio tani tara Iesu, me tani koloa va esio ghelei emasina natuna, poli ang ghe ainasiaa tani mate.

⁴⁸ Iesu ghe uela etana va, “Karika am rooroo tani aikaaiaa, arova am tam tara niaimatoonga me mirikolo atoa.”

⁴⁹ Me taumattu ngateva ghe uela va, “Namu ngateva, italu sio tara parasi natughu, me erau mate.”

⁵⁰ Me Iesu ghe uela etana va, “Natum aue etoka. Kasula, me ulaa taraia.” Namu ngateva ghe aiesoaala inangarina Iesu, me ghe kasula. ⁵¹ Karika ghe rekata eKapenium, me kapuna tau ngai uungu etoa laghe sousouela tapaa salana tani auliaa etana va natuna ang ghe masinala. ⁵² Me ghe kolomilala va lovisa ghe masinala, me laghe uela va, “Ghalailloo ta 1 kilok† aanasa ateva ghele kapala.”

⁵³ Me tamane ghe kilala va ia o nau eteva ghalailloo Iesu ghele uela va, “Natum aue etoka.” Taumattu ngateva me lo atoa elome tale paa ngalena ateva, laghe aiesoaala ta Iesu.

⁵⁴ Aiaaghaluene ateva o niaimatoongana Iesu ghe gheleila nau ghe kasula eJiudia me ghe saela eGalilii.

5

Iesu ghe ghelei emasinala tangorengorena ateva

¹ Kasina nau ang ghe lao sio me Iesu ghe saela eJerusalem tale mene kateva uneira nivelu eitauaa ajiu etoa. ² EJerusalem kateae atamana laghe aseasea va Atamani Sipsipi ia. Kalakalaa tale atamana atea, ateo talia ngateae taumattu ngatoa laghe kaiela ghe asoaso, ghalima varandaane, me ta samasamaaira aHibru etoa laghe aseasea va Betesda.* ³⁻⁴ Oro i tau sessa ghe asoaso akalakalaa tale ia o ateo talia ngateae, katoa mata

4:42: 1 Jon 4:14. 4:44: Mat 13:57. 4:45: Jon 2:23. 4:46: Jon 2:1-11. 4:47: Mat 8:5-6.

4:48: Jon 2:18; 1 Ko 1:22. 4:50: Mat 8:13. † 4:52: 1 kilok Tale inangari nge Grik, ghaituna (7) ateva aoa. 4:54: Jon 2:11. * 5:2: Betesda Kasina uru ngai laghe pitila, laghe uela va, Betsata, me kasina laghe ue va, Betsaida.

salusalu ila me katoa tangorengore ila me katoa vilikiira matena.[†] ⁵ Kateva taumattu ghe tangorengorela kotolungaulu ghaoaluae (38) ninamanama, ie tee ghe asoaso akalakalaa tale ateo talia ngateae. ⁶ Iesu ghe tarala ia o taumattu ngateva ghe asoaso, ghe kilala va ang ghe tangorengorela oroi ninamanama, me ghe uela etana va, “Ualoanna tani masina?”

⁷ Tangorengorena ateva ghe liula me ghe uela ta Iesu va, “Namu ngateva, karika teva tani saueghi, me elaa sau velueghi sio tale ateo talia ngateae nau eaisiisia. Vara atootoonga, me karika arooroo, ta mene katoa ppae taumattu la siosio akasina.”

⁸ Iesu ghe uela etana va, “Tingina saela, usau komom, me ukasu.”
⁹ Gharavaeaata ta taumattu ngateva ghe masinala, ghe saula komona, me ghe tiuaala tani kasu.

Isaa o voto ghe lutula tale nau manga ateva. ¹⁰ Liuna avalua o me nau ajiu etoa laghe tarala ia o taumattu ngateva ghe masinala, me laghe uela etana va, “Ghaine nau manga ateva. Karika masina tani sau komom etana.”

¹¹ Ghe liula me ghe uela va, “Lo ateva taumattu eghelei emasinaieghila, euela va asau komoghu me akasu.”

¹² Me laghe kolomiela va, “See ia taumattu ngateva euela etam va usau komom me ukasu?”

¹³ Taumattu ngateva ghe masinala karika ghe kilala va see ghe ghelei emasinaieghila, poli oroiannaaili taumattu, me Iesu ang ghe aisavisavilainiela elome tale taumattu ngatoa.

¹⁴ Emulina Iesu ghe ssola tale ale manga ateva, me ghe paela me ghe tarala taumattu ngateva. Me ghe uela etana va, “Tarala, angughe masinala. Isaa oio nau urau nim ghelei ssavoto va llo sesaaili emene lutu ta ngetam.” ¹⁵ Ghe lao sio me ghe laa ghauliaa sio ta ajiu etoa va Iesu ghe ghelei emasinaieghila.

¹⁶ Liuna avalua o me ajiu etoa laghe tiuaala tani ghelei voto sesaaili ta Iesu, poli ghe ghelei isaa o voto tale nau manga ateva. ¹⁷ Iesu ghe uela va, “Tamaghi euungu me karika ghe ruu, me aghi tee auungu.” ¹⁸ Ajiu etoa laghe aloannaaili tani uvi emate Iesu, poli karika va ghe ghelei laelaeaa nonga nau manga ateva, me poli ghe ue tee va Tamane ta God, ghe gheleia va lalu ghe aairooaa me God.

Natuna ateva God namuu ia, me ie tee erooroo tani ghelei niuungu

¹⁹ Iesu ghe uela ta ajiu etoa va, “Aghaaulia ngakoronna etaimim va Natuna ateva God karika erooroo tani ghelei voto ta nannaane, ta eghelei nonga voto etaatara ta Tamane eghelei. Isaa akapa voto Tamane eghelei, Natuna tee ateva eghelei. ²⁰ Tamana eaaielousiaa Natuna, liuna avalua o me isaa akapa voto eghelei, eaapasunga etana. Me ealoanna va am soghiaa, liuna avalua o me aue emene apasunga taula mene kasina paka voto. ²¹ Nongina Tamane etottotu taumattu matena, me etautau lao maulue etaira, Natuna tee etautau lao maulue ta taumattu tale aloaloannaane. ²² Tamane karika eghelei niaisakei ta teva taumattu. Ghe taula ta Natuna va ie nonga eghelei niaisakei tale isaa akapa taumattu. ²³ Liuna avalua o me taumattu ngakapa atoa aue la tau sae ararina atea Natuna ateva God, nongina la tautau sae ararina atea Tamane. Lo ateva etam tautau

† **5:3-4:** Kasina uru ngai nau laghe pitila, laghe ue teela va, laghe toitoi nau manu eteva ghe aisiisia. **4** Kasina nau kapuna ensolo ateva Vau ngepona ateva ghe siosio, ghe aisiisia manu eteva, me lo ateva ghe siosio akasina tale ateo talia ngateae, nau ghe aisiisia, arova saa ase isiki etana, ghe maamasina. **5:8:** Mat 9:6. **5:10:** Jer 17:21-22; Nia 13:19. **5:18:** Mat 26:4; Jon 7:1; 10:30. **5:19:** Jon 5:30. **5:22:** Jon 5:27; Apos 10:42. **5:23:** Plp 2:10-11; 1 Jon 2:23.

sae ararina ateae Natuna, karika etautau sae ararina ateae Tamane, ia ghe sungiela.

²⁴ “Aghaaulia ngakoronna etaimim va lo ateva enongo inangarighi, me eaikaaiiaa ta lo ateva ghe sungieghila va asio, maamauluaane aue etoka amasina nau ekapa atoa, me karika aue eghaa sesa aipolipoli tale niaisakei, poli ang ghe kasu vulila nimate, me ang ghe tokala tale maulue. ²⁵ Aghaaulia ngakoronna etaimim va aue kateva nau, me nau eteva oia ange rekatala, lo atoa taumattu laghe matela, aue la nongo lingi ngalona ateva Natuna ateva God, me lo atoa taumattu la nongoa, aue la ghaa maulue. ²⁶ Maulue ateva etokatoka ta Tamane, me ghe tauela ta Natuna, me maulue ateva etokatoka tee ta Natuna. ²⁷ Tamane ghe avauvauela me ghe tau lao sio niuungu tani ghelei niaisakei tale taumattu, poli Natuna ia Taumattu ngateva.

²⁸ “Am rau mene nnangaili inangari oio aghaauliaa, poli aue nau to emaemae lo atoa taumattu la asoaso tale liu, aue la nongo lingi ngalona ateva Natuna ateva Taumattu ngateva, ²⁹ me aue la totu tale liu. Lo atoa laghe ghelei masi voto, aue la totu me la ghaa maulue, me lo atoa laghe ghelei sesa voto, aue la totu me la ghaa sesa aipolipoli. ³⁰ Karika arooroo tani ghelei voto tale aloaloannaaghi. Aghaaimuli tee inangarina lo ateva ghe sungieghila. Me ia eaauliaa tau mae vaalua aghelei niaisakei. Niaisakei aghelei ghulughuluena, poli karika aghaimuli tee nannaaghi.”

Mene katoa laghe aaulia ngaotu tee va Iesu saa taumattu ia

³¹ Iesu ghe mene uela va, “Arova aghi nonga aghaaulia ngaotu uunguaaghi me gheeleiaaghi, taumattu ngatoa la rau mene aiesoaa inangarighi aghaauliaa. ³² Mene kateva tee eaaulia ngaotu uunguaaghi me gheeleiaaghi, me akilakila va inangarina koronna.

³³ “Am ghe suula taumattu tani laa kolomi Jon, me Jon ghe auliaala voto koronna etaira. ³⁴ Aghi karika atuutuli inangariira taumattu ngatoa, mausina me aghaauliaa inangari oia poli aghaaloanna va am saanga. ³⁵ Jon nongina lama ateae eramerame me emaamallanga, me am ghe masimasi tani ghaa isaa o mallanga, vara karika masau me ngam ghe maamango.

³⁶ “Isaa o voto Jon ghe auliaala eaaimatoonga mae etaghi, me karika erooroo tale voto isaa oia nau aghelei. Isaa akapa o niuungu, Tamaghi ghe tau mae sio va aghelei me aruu. Isaa o niuungu aghelei eaaulia ngaotu ta taumattu ngatoa va Tamaghi ghe sungieghila tani sio oia. ³⁷ Tamaghi, ia o ghe sungieghila tani sio, ie tee eaaulia ngaotueghi. Am karika am ghe nongo poi lingi ngalona ateva, me karika am ghe tara taataraane, ³⁸ me inangarina tee karika elome tale maamauluaaimim, poli karika am aiesoaa tale taumattu ngateva ghe sungiela, me ghe sio mae oia. ³⁹ Tale nannaaimim am annaa va inangari tale Uru ngai Manga ateva aue etau aatu maulue tokatoka liu ia, liuna avalua o me am paepae me am ritiritia. Me Uru ngai Manga ateva eaaulieinaghi, ⁴⁰ me karika am aloanna tani mae etaghi va am ghaa maulue.

⁴¹ “Karika aghanna va taumattu ngatoa la arueinaghi. ⁴² Akilakilaiem va aielousiaane ateva God karika ia etaimim. ⁴³ Aghe sio mae ta ararina ateae Tamaghi, me karika am anna inangarighi, me arova teva ghele mae tale aloaloannaane, arovaeaata ta aue am ghele anna tani nongo inangarina. ⁴⁴ Vaalua aue am aikaaiiaa? Poli am anna nonga va kapuimim atoa la arueinam, me karika am anna niaruaa God nonga erooroo tani tau aatu.

⁴⁵ “Karika am mene nnaa va aghi aue aghauliaa gheeleiaaimim sesa ta Tamaghi. Ia o Moses am annaa va aue esausiem, ia aue eauliaa sesa gheeleiaaimim. ⁴⁶ Arova am ghele aiesoaa tale inangarina Moses, aue am ghele aiesoaa tee tale inangarighi, poli inangari ghe pitila eaaulieinaghi. ⁴⁷ Arova karika am aiesoaa tale inangari ghe pitila, vaalua aue am aiesoaa inangarighi?”

6

Iesu ghe anginila 5,000 taumattu (*Mat 14:13-21; Mak 6:30-44; Luk 9:10-17*)

¹ Vara me Iesu ghe mene lao sio ta pai kativilau tale ateo talia ngateae eGalilii, mene kateae ararina ta Taiberias. ² Oroianaaaili taumattu laghe usiela, poli laghe taraiela ghe gheleila niaimatoonga tani ghelei emasina tau sessa atoa. ³ Iesu ghe saela tale motouru tani toka tee kapuna disaepolo atoa. ⁴ Pasova ngateva, nivelu eitauaa ia ta ajiu etoa, ang ghe aakalakalaa.

⁵ Nau Iesu ghe atangarola me ghe tarala taumattu ngatoa laghe maemae etana, me ghe uela ta Pilip va, “Eaa ita laa ghaa verete me ita angini isaa oia taumattu?” ⁶ Ghe auliaala isaa o voto tani tootoonga unna niaikaaiiaa Pilip, me Iesu ang ghe kila vella sa ateva aue egheleia.

⁷ Pilip ghe uela va, “Arova ita ghele poli verete ta ghalua ai (200) silva koen,* karika aue ghele roo. Marova ita ghele taula tuku gharighi ta kateva kateva taumattu, karika aue ghele roo akapa etaira.”

⁸ Kateva kapuna disaepolo, Andru etana, tue me nenga ilalua me Saemon Pita, ghe uela ta Iesu va, ⁹ “Kateva aliki oia anna bali verete ghalima me anna kko ghalua. Me karika aue eroo tani sausi tani angini ekapa taumattu oia oroianaaaili.”

¹⁰ Iesu ghe uela ta kapuna disaepolo atoa va la ghauliaa ta taumattu ngatoa me la toka sio. Oroianaaaili rarrasa etana ia o voto ateva, me oroi tee taita atoa, ghe rooroo ghalima airari (5,000). ¹¹ Nau laghe toka siola, Iesu ghe ghaala verete, me ghe kaili emasina saela ta God, me ghe taula ta kapuna disaepolo atoa va la laa ghaikoita. Ghe ghelei evaluate teela o tale kko. Me ila akapa laghe roola tale inana.

¹² Nau ghe ssoilala tani namanama, Iesu ghe uela ta kapuna disaepolo atoa va la kaai eitauaa tapiri nginana, me erau nim vulla nonga. ¹³ Disaepolo atoa laghe ghaa aisokosokoiaala tapiri nginana laghe nama vulla tale verete ghalima, me laghe kaaila kasangaulu ghaluae (12) laka isaa o inana ghe oghila ta ghe ssoilala.

¹⁴ Taumattu ngatoa laghe tarala isaa o niaimatoonga Iesu ghe gheleila, me laghe ue va, “Koronna, ia propete ateva laghe uela va aue emae tale kosa ateva oia.” ¹⁵ Iesu ghe kilala va laghe anna tani gheleia va ghe kapuira kingi ia, me karika aloannaane Iesu. Liuna avalua o me ghe kasu vulilala, me ie nonga ghe saela tale motouru.

Iesu ghe kasula epona tale manu (*Mat 14:22-27; Mak 6:45-54*)

¹⁶ Pai ngelo alai, kapuna disaepolo atoa Iesu laghe siola elamana tale ateo talia ngateae. ¹⁷ Laghe aikaaila tale paanaka ateva, me laghe tiuaala tani ose tani lao eKapenium. Ang ghe aaitarrauii me Iesu ghe tam laa rekata etaira. ¹⁸ Kuukuu eteva ghe tiuaala, me ttasi eteva ghe lutula tale paamanu

5:46: Apos 3:22. * **6:7:** silva koen Silva koen ativilau (denarius) aipolina kateva nau. **6:15:** Jon 18:36.

eteva. ¹⁹ Nau ta disaepolo atoa laghe osela ghe roola 5-6 kilomita† me laghe tarala Iesu ghe kasukasu epona tale paamanu eteva. Ghe kasukasu emaemae etaira me ngeila ghe maamatautu etingina. ²⁰ Me Iesu ghe uela etaira va, “Aghi oia. Am rau mene matautu.” ²¹ Me disaepolo atoa laghe vira mene masimasila tani kaai, me arovaeaata ta paanaka ateva ghe ssola elae nongina eaa laghe aloanna tani lao.

Taumattu ngatoa laghe paepae Iesu

²² Vara ghe paila ta mene kateva nau, me taumattu ngatoa elamana ta pai nge sinaka sae tale ateo talia ngateae laghe kilala va ghalailloo kateva nonga paanaka ghele vuuvukala, me nau disaepolo atoa laghe aikaaila, Iesu ghe tam aikaai teeilala. ²³ Mene katoa tani paanaka nge Taiberias laghe mae sio nongina Vau eteva ghe kaili emasinala tale verete me laghe namala. ²⁴ Taumattu ngatoa laghe tarala va Iesu me kapuna disaepolo atoa karika ila, liuna avalua o me laghe aikaaila tale isaa o paanaka me laghe lao sio eKapenium tani pae Iesu.

Iesu verete maulue ia

²⁵ Laghe laa rekata sio tale pai kativilau tale ateo talia ngateae, me laghe tarala Iesu, me laghe kolomiela va, “Tisa, lovisaa umae sio oia?”

²⁶ Iesu ghe liula me ghe uela etaira va, “Aghaaulia ngakoronna etaimim va karika am paepaeaghi poli am taatara niaimatoonga agheelei, ta nim mausi inana am namanama me esossoiem. Liuna avalua o me am paepaeaghi. ²⁷ Am rau mene uungu tani ghaa llo inana esesa. Am uungu tani ghaa lo ateva inana etautau aatu maulue etokatoka liu, Natuna ateva Taumattu ngateva aue etau aatu ia o inana ateva, poli Tamane ta God ghe anamunamungainiela tani ghelei isaa o voto.”

²⁸ Vara me laghe uela etana va, “Saa righe voto ami ghelei, me aue ami roo tani ghelei niuungu God ealoanna?”

²⁹ Me Iesu ghe liula me ghe uela etaira va, “Kateva nonga niuungu God ealoannaia, va am aikaaiata tale taumattu ngateva God ghe sungiela tani mae.”

³⁰ Liuna avalua o me laghe mene uela va, “Sa ateva niaimatoonga aue ughelei me aue ami tara, me ami aikaaiata ta ngetam? Me saa niuungu aue ughelei? ³¹ Nongina tuvumami etoa, nau ila tale voto ateva karika righe taumattu etokatoka etana, laghe namanama mena, nongina Uru ngai Manga ateva eue va, ‘Moses ghe tau lao sio inana ngepona liu eteva va la namaia.’”

³² Liuna avalua o me Iesu ghe uela etaira va, “Aghaaulia ngakoronna etaimim va karika va Moses ghe tau aatu sio isaa o verete ngepona liu. Tamaghi nonga etautau aatu lo ateva verete ngepona liu koronna ia. ³³ Lo ateva verete God etautauela, ia o taumattu ngateva ghe kasula epona liu tani tau lao maulue tale taumattu tale kosa ateva.”

³⁴ Me laghe uela etana va, “Namu ngateva, utau mae ia o verete ateva tale nau ekapa atoa.”

³⁵ Iesu ghe liula me ghe uela va, “Aghi ia o verete ateva etautaula maulue. Lo ateva emae etaghi, karika aue emaloo, me lo ateva eaikaaiata etaghi, karika aue eanna tani mene ropi. ³⁶ Ngaghe auliaala etaimim me ngam ghe taraieghila, me karika am aikaaiata etaghi. ³⁷ Isaa akapa taumattu Tamaghi etautau mae etaghi, aue la mae etaghi, me karika poi arooro tani sungi velu teva. ³⁸ Karika aghe kasula epona liu tani sio ghelei nannaaghi. Aghe

† **6:19:** 5-6 kilomita Tale inangari nge Grik, 25 o 30 stadia. **6:27:** Jon 6:48-58. **6:29:** 1 Jon 3:23. **6:30:** Mat 16:1; Jon 2:18. **6:31:** Eks 16:14-15; Nam 11:7-9; Sams 78:24. **6:35:** Jon 4:14.

sio mae tani ghelei nannaane lo ateva ghe sungieghila. ³⁹ Nannaane lo ateva ghe sungieghila va karika teva ta lo atoa ghe taula mae sio etaghi emene raua. Eanna va atotula, me la ghaa maulue nau airuuruu tale kosa ateva. ⁴⁰ Aloannaane Tamaghi va ila akapa lo atoa la tara Natuna me la ghaikaaiaa etana, la ghaa maulue ateva etokatoka nau ekapa atoa me aghi aue atotula me la ghaa maulue tale airuuruu tale kosa ateva.”

⁴¹ Vara me aJiu etoa laghe tiuaala tani olueinia tale inangari, poli Iesu ghe uela va, “Aghi verete ateva ghe kasula epona liu.” ⁴² Laghe ue va, “Taumattu ngateva oia Iesu etana, natuna ia Josep, ami kilakila tamana me kinna, vaalua me eue va ghe kasula epona liu?”

⁴³ Iesu ghe uela etaira va, “Am rau mene olueinaghi. ⁴⁴ Karika teva erooroo tani mae etaghi arova Tamaghi, ia o ghe sungieghila, etam gheleia tani mae etaghi. Me arova teva emae etaghi, aghi aue atotua, me eghaa maulue tale airuuruu eteva nau. ⁴⁵ Kateva propet ghe pitila ghe uela va, ‘God aue eapasunga voto tale isaa akapa taumattu.’ Liuna avalua o me lo atoa la nongonongo usilaa Tamaghi me la ghaaghaa alomasaanga etana, aue la mae etaghi. ⁴⁶ Karika mene teva taumattu ghe tarala Tamaghi, ta llo nonga ateva ghe tokatoka teeia, me ghe sio mae. Nim ie nonga, me mene karika teva. ⁴⁷ Aghaaulia ngakoronna etaimim va lo ateva eaikaaiaa etaghi, maulue ateva tokatoka liu ia etokatoka etana. ⁴⁸ Aghi verete ateva etautau maulue ateva. ⁴⁹ Tuvuimim atoa laghe namala mena tale voto ateva karika righi taumattu etokatoka etana, vara me laghe matela. ⁵⁰ Me lo ateva verete ghe kasula epona liu me ghe sio mae, lo ateva enamaia, karika aue emate. ⁵¹ Aghi verete maulue ieghi, aghe kasula epona liu. Lo ateva enama ia o verete ateva aue etoka nau ekapa atoa. Me ia o verete ateva aue atauela, malataughu eteva. Aghe taue lao sio tale taumattu tale kosa ateva oia, me aue la roo tani ghaa maulue.”

⁵² Nau eteva aJiu etoa laghe nongola isaa o inangarina, ghe sessailala, me laghe ue va, “Vaalua aue etau mae malatauna, me ita nama?”

⁵³ Iesu ghe liula me ghe uela etaira va, “Aghaaulia ngakoronna etaimim va karika am rooroo tani ghaa maulue, arova am tam nama malatauna Natuna ateva Taumattu ngateva, me am tam ropi raena ateva. ⁵⁴ Lo ateva taumattu enama malataughu, me eropi raeghi eteva, aue eghaa maulue ateva tokatoka liu ia, me aue atotua, me eghaa maulue tale airuuruu tale kosa ateva. ⁵⁵ Poli malataughu eteva inana tuungia, me raeghi eteva ateo tuungia. ⁵⁶ Lo ateva enama malataughu, me eropi raeghi, etokatoka teeieghi, me aghi atokatoka teeia. ⁵⁷ Tamaghi, aita maulue ia, ghe sungieghila tani sio, me atokatoka poli Tamaghi etautau mae maulue. Liuna avalua o me lo ateva enamaieghi, mausighi me aue eghaa maulue. ⁵⁸ Lo ateva o verete ghe kasula epona liu karika nongina lo ateva verete tuvuimim atoa laghe namaiela, me ngeila ghe matela. See enama lo ateva oia verete aue etoka nau ekapa atoa.” ⁵⁹ Isaa o inangari Iesu ghe aauliaa me ghe aapasunga tale aleira ale nivelu eitauaa aJiu etoa eKapenium.

Inangari maulue ateva

⁶⁰ Oroil ila lo atoa disaepolo laghe nongola me laghe uela va, “See aue enongo, poli aanasaaili inangari eaauliaa?”

⁶¹ Iesu ghe kilala sa ateva kapuna disaepolo atoa laghe annainia, liuna avalua o me ghe kolomilala va, “Vaalua me isaa o inangari ange ghelei

saasakiaala aikaaiimim? ⁶² Vaalua ta arova am ghele tara Natuna ateva Taumattu ngateva ghele sae nongina ghe kasula? ⁶³ Spirit Manga nonga ateva etautau lao maulue tale taumattu. Sarasarakaniaa taumattu karika aue eghelei righi llo. Isaa o inangari aghaauliaa etaimim ekasukasu tale Spirit Manga ateva, me etautau aatu maulue ateva. ⁶⁴ Me katoa etaimim karika am aikaiaa.” (Iesu ghe auliaa llo poli ang ghe kila vella va see karika aue eaikaaiaa etana, me ang ghe kila teela see aue etaue lao ta nimaira tau ngai ssateena atoa.) ⁶⁵ Me Iesu ghe uela etaira va, “Mausina avalua o me aghaauliaa etaimim, va karika teva eroroo tani mae etaghi, arova Tamaghi etam gheleia tani mae.”

⁶⁶ Poli isaa o inangarina Iesu ghe auliaala me oroi kapuna disaepolo laghe liula viliira ta Iesu, me laghe ruula tani usia.

⁶⁷ Iesu ghe kolomila kapuna kasangaulu ghalua (12) disaepolo va, “Am tee am aloanna tani kasu vulieghi?”

⁶⁸ Saemon Pita ghe liula me ghe uela va, “Vau eteva, ami mene lao ta see? Poli inangari maulue ateva tokatoka liu ia, ia etam. ⁶⁹ Ami aikaiaa etam, me ami kilakilaaili va io taumattu ngateva manga ia kapuna ia God.”

⁷⁰ Iesu ghe liula me ghe uela va, “Am oia kasangaulu ghalue iem aghe suitoongainiemla, me kateva etaimim nongina raroai eteva!” ⁷¹ Iesu ghe aauliaa Jjudas, natuna ia Saemon Iskariot, ie tee elome ta kasangaulu ghalua kapuna disaepolo, me ia aue etau lao Iesu ta tau ngai ssateena atoa.

7

Nengane atoa Iesu karika laghe aaiesoaa etana

¹ Vara me Iesu ghe kasu seela eGalilii, me karika ghe aloanna tani sae eJiudia, poli aJiu etoa laghe anna tani uvi ematea. ² Nau ang ghe aakalakalaa tani velu eitauaa me aJiu etoa laghe ghelei lutu ale kamekame.* ³ Nengane atoa Iesu laghe ue etana va, “Kasula me usae eJiudia, me kapum disaepolo atoa aue la tara uunguaam ugheelei. ⁴ Lo ateva eanna va taumattu ngatoa la kilaia karika eaaisulia va eghelei voto. Liuna avalua o me emasina va ughelei tale tummatavanga me kosa akapa ateva aue ekilaio.” ⁵ Nengane atoa laghe aulia ngavaluela o, poli ila tee karika laghe aaikaaiaa ta Iesu.

⁶ Iesu ghe uela etaira va, “Naughu karika ghe mae. Am nauimim etokatoka arau. ⁷ Taumattu tale kosa ateva oio karika aue la ssa teeiem. Aue esessaila nonga etaghi, poli aghaaulia ngaotu gheeleiaaira karika masina. ⁸ Am saela tale nivelu eitaua ngateae. Karika aue asae poli naughu karika ghe mae.” ⁹ Ghe auliaala isaa o inangari, me ghe tokala eGalilii.

Iesu ghe lao sio tale nivelu eitaua ngateae nau laghe ghelei ale kamekame

¹⁰ Vara nengana atoa laghe kasula tani sae tale nivelu eitaua ngateae, me Iesu ghe vira aimulila. Kasukasuaane karika toa laghe kilaiela, ghe nim kasu einaola tani sae. ¹¹ Tale ia o nivelu eitaua ngateae, namuu ta aJiu etoa ngila ghe paepae Iesu, me laghe aikolomainie see va, “Eaa ia?”

¹² Ta polina me taumattu ngatoa ngila ghe auliuliueinia. Katoa laghe ue va, “Iesu masi taumattu ia.” Me katoa laghe ue va, “Enim kamekame taumattu ngatoa.” ¹³ Karika teva ghe auliaa isaa o inangari ta mata ngoroi etoa, poli laghe maamatauta kapuira namu ngatoa aJiu etoa.

6:64: Jon 13:11. **6:65:** Jon 6:44. **6:68:** Mat 16:16. **7:1:** Jon 5:18. **7:2:** Lev 23:34.

* **7:2:** ale kamekame AJiu etoa laghe ghelei lutu ale kamekame tani aso etana tani nnaa vaalua tuvaira atoa laghe tokatoka nau laghe kasukasuu tee Moses. Utara Levitikos 23:33-43. **7:5:** Apos 1:14.

¹⁴ Laghe ghaa longotila tale ia o nivelu eitaua ngateae, me Iesu ghe tiuaala tani apasunga voto ta taumattu ngatoa tale ale ngeleka atiulu tale ale manga ateva. ¹⁵ Namuu ta ajiu etoa laghe soghiaala tani nongoa, me laghe ue va, “Vaalua me ekilakila oroi voto nau karika teva ghe apasungaala etana?”

¹⁶ Iesu ghe liula me ghe uela va, “Karika aghaapasunga nim nannaaghi. Voto aghaapasunga kanna lo ateva ghe sungieghila. ¹⁷ Arova teva eannaaili tani aimuli tee aloannaane God, aue ghele kila va voto aghaapasunga ekasukasu ta God, me karika va nim kalughu. ¹⁸ Lo ateva taumattu eauliaa nannaane enim aloanna tani ghelei ararina ateae, me lo ateva ealoanna tani tau sae ararina ateae lo ateva ghe sungiela, voto eaauliaa koronna, karika kamena. ¹⁹ Moses ghe tau aatu sio inangari nipaopao etaimim, me karika teva etaimim eaaimuli tee. Mausi saa me am anna tani uvi emateaghi?”

²⁰ Taumattu ngatoa laghe ue etana va, “Raroai eteva etam. See eanna tani uvio?”

²¹ Iesu ghe liula me ghe uela va, “Aghe gheleila kateva voto, me am ghe soghieiniela. ²² Moses ghe uela etaimim va am iso natuimim taita atoa (karika va tani Moses ghe auliaala, ta tuvumim atoa). Me am isoisoila tale nau manga ateva. ²³ Arova am rooroo tani iso aliki eteva tale nau manga ateva, tani nongo usilaa inangari nipaopao kanna Moses ghe auliaala, o vaalua esessaiem etaghi, poli aghe ghelei emasina akapala vilikina taumattu ngateva tee tale nau manga ateva? ²⁴ Am rau mene auliaa gheleia taumattu tale taataraimim, am ghelei niaisakei tale ghulughuluena salana.”

Taumattu ngatoa laghe anna tani kila va Iesu tani saa taumattu ia

²⁵ Katoa tana taumattu nge Jerusalem laghe ue va, “Ia oia taumattu ngateva la paepaea tani uvia? ²⁶ Tarala, epoppooaa ta mata ngoroi etoa, me karika la ghelei righi voto etana. Koti namu ngatoa la kilakila akoronna va ia Mesaea ia. ²⁷ Me iekai ita kilakila tanganuena, me Mesaea ngateva, karika aue ita kila va eaa tanganuena.”

²⁸ Iesu ghe aapasunga tale ale manga ateva, me ghe sama anamungailila, me ghe uela va, “Am annaa vara am kilakilaieghi, me vara am kilakila tanganueghi. Aghi karika aghe mae sio tale aloaloannaaghi. Lo ateva ghe sungieghila koronna ia, me am, karika am kilakilaia. ²⁹ Aghi akilakilaia, poli aghe tokatoka teeia, me ghe sungieghila tani sio.”

³⁰ Katoa taumattu laghe anna tani kuneaia, me karika laghe roola tani kuneaia, poli nauna karika ghe mae. ³¹ Oroi taumattu ghe aikaaiaala etana, me laghe ue va, “Arova Mesaea ngateva esio, koti voto aue eghelei aue elau llo ia oia taumattu ngateva eghelei?”

Laghe suula polisi etoa tani mae kune Iesu

³² Nau Paresi etoa laghe nongola taumattu ngatoa laghe aissakeana, laghe lao sio tani tara namuu ta pristi etoa, ila me namuu ta pristi etoa laghe suula polisi etoa tani laa kune Iesu.

³³ Me Iesu ghe uela etaira va, “Karika oroi nau aue atoka teeiem, me amene kasu tani sae ta lo ateva ghe sungieghila. ³⁴ Aue am pae poieghi, me karika aue am taraieghi, poli voto ateva alao etana am karika am rooroo tani lao etana.”

7:15: Mat 13:54; Luk 2:47. **7:16:** Jon 12:49; 14:10. **7:18:** Jon 8:50. **7:19:** Apos 7:53; Rom 2:21-24. **7:20:** Jon 8:48; 10:20. **7:22:** Lev 12:3; Aitiutiu 17:9-13. **7:23:** Jon 5:8-10, 16. **7:27:** Jon 7:41; 9:29. **7:28:** Mat 11:27; Jon 8:55. **7:30:** Jon 7:44. **7:34:** Jon 8:21; 13:36.

³⁵ Taumattu nge Jiu etoa laghe tiuaala tani aikolomieinila va, “Eaa aue elao me karika aue ita taraia? Koti aue elao tale llo masaliki aGrik atoa la ghaaitoiaa, me katoa tani kapuita la tokatoka etana. Koti aue mene laa ghasungu ta aGrik atoa. ³⁶ Saa malloeana inangarina nau eue va, ‘Aue am pae poieghi, me karika aue am taraieghi’, me ‘Voto ateva alao etana am karika am roorroo tani lao etana?’”

Iesu ghe auliaala ateo atea mauue ia

³⁷ Airuuruu tale ia o nivelu eitaua ngateae, kinatama nauira ateva, Iesu ghe tinginala, me ghe sama anamungailiila me ghe uela va, “Lo ateva ukaakangata tani ropi, umae etaghi me uropi. ³⁸ Lo ateva eaikaiaa etaghi, aue ateo atea mauue ia aue eakalaa elome tale urunguitanina ateva, nongina Uru ngai Manga ateva eaauliaa.” ³⁹ Iesu ghe aauliaa Spirit Manga ateva va lo atoa la aikaiaa etana aue la ghaaia. Isaa o nau Spirit Manga ateva karika ghe mae, poli God karika ghe tau sae Iesu.

Taumattu ngatoa ghe ghalueilala

⁴⁰ Katoa taumattu laghe nongola isaa o inangari Iesu ghe aauliaa etaira me laghe uela va, “Koronna, taumattu ngateva oia, ia o propete ateva Moses ghe aulieiniela.” ⁴¹ Mene katoa laghe ue va, “Ia oia taumattu ngateva Mesaea etana.” Mene katoa laghe ue va, “Karika va Mesaea ngateva aue ekasu eGalilii. ⁴² Uru ngai Manga ateva eue va Mesaea ngateva aue elutu ta mangalina atoa Deivit, me aue elutu eBetlehem, ia o masalikina ia Deivit.” ⁴³ Taumattu ngatoa ghe ghalueilala tale ninannaa ta poli Iesu. ⁴⁴ Katoa ngila ghe anna tani kunea, me karika teva ghe roola.

Namu ngatoa karika laghe aikaiaala ta Iesu

⁴⁵ Polisi etoa laghe laa rekata sio, me namuu ta pristi etoa me Paresi etoa laghe kolomilala va, “Vaalua me am tam maeaa sio Iesu?”

⁴⁶ Polisi etoa laghe liula me laghe uela va, “Karika teva taumattu eroorroo tani aippooa nongina taumattu ngateva okae.”

⁴⁷ Me Paresi etoa laghe uela va, “Ae! Am tee ange kamekameam? ⁴⁸ Ngam tarala va teva namuu ta aJiu etoa me Paresi etoa eaaikaiaa etana? ⁴⁹ Lo atoa la ghaikaiaa etana karika la kilakila inangari nipaopao, me God ang ghe kasikienainilala.”

⁵⁰ Nikodimas, ia o ghe lao akasina sio ta Iesu, ie tee ghe tokatoka me ghe uela va, ⁵¹ “Uneita inangari nipaopao eue va, ita rau mene ghelei righi voto ta teva taumattu, ita tani nongo mua va sa ateva ghe gheleiela.”

⁵² Me laghe uela etana va, “Koti io tee aGalilii io? Uriti Uru ngai Manga ateva, me utara va karika teva propete aue ekasu eGalilii.” ⁵³ † *Me laghe tiu reerekataala tani lao tanganeira.*

8

¹ *Iesu ghe saela tale motouru eteva ararina atea eOliv.* ² *Elue talaua poopooa ghe mene ssola tale ale manga ateva, me taumattu ngakapa atoa laghe mene mae sio tani taraia, me ghe toka siola, me ghe tiuaala tani apasunga etaira.* ³ *Vara me Paresi etoa me tau ngai aapasunga ngatoa tale*

7:37: Lev 23:36; Ais 55:1; Jon 4:14. **7:38:** Ais 58:11. **7:39:** Jon 16:7; 20:22; Apos 2:4. **7:40:** Jon 6:14. **7:41:** Jon 1:46. **7:42:** Sams 89:3-4; Maeka 5:2. **7:46:** Mak 1:22. **7:48:** Jon 12:42. **7:50:** Jon 3:1-2. **7:52:** Jon 7:41-42. † **7:53:** Llo akasina uru ngai laghe pitila, karika laghe pitila Jon 7:53-8:11. Oroilila lo atoa laghe pitila kiukiu etea ta Jon 7:53, me kasina laghe piti seela. Kasina laghe pitiela elome ta Jon 7:36 me Jon 7:37, me kasina laghe pitiela ta airuuruu ta Jon 21:25, me mene kasina laghe pitiela emuli ta Luk 21:38.

inangari nipaopao ngila ghe reerekataa vause ateva etana. Laghe taraiela ghe aso teela taita ateva karika manna ia, me laghe atinginaiela elome ta mata taumattu ngatoa. ⁴ Me laghe uela ta Iesu va, “Tisa, ia oia vause ateva easoaso tee taita ateva karika manna ia, me ami ghaaiela. ⁵ Tale inangari nipaopao Moses ghe uela va ia oia ase vause ateva eghelei evalua o pei nikumu ematea. Me io, aue uue va saa?” ⁶ Laghe aaulia ngavalua o tani tootoonga Iesu, me saa llo ghe auliaa aue laghe tingina etana tani ghelei niaisakei etana.

Iesu ghe tturru siola euu, me ghe tiuaala tani pitipiti tale vuuvuu nimane ateva nonginaaili va karika ghe nongonongola. ⁷ Laghe mene kookolomia, me Iesu ghe tinginala, me ghe uela etaira va, “Lo ateva elome etaimim etam ghelei righi voto sesa, ughaa tiulu atu, me io uaitiutiu tani kumua.” ⁸ Vara me ghe mene tturru siola euu, me ghe mene tiuaala tani pitipiti.

⁹ Me lo atoa laghe nongola, laghe tiuaala tani kasu kateva kateva, ghe tiuaala ta namu ngatoa, me ghe laa ruu sio tale airuuruu eteva taumattu. Me Iesu nonga me vause ateva lalu ghe tokala. ¹⁰ Iesu ghe mene tingina saela, me ghe uela etana va, “Eaa ila? Karika teva eanna tani tau aatu sesa aipolipoli etam?”

¹¹ Ghe liula me ghe uela va, “Karika teva, namu ngateva.”

Me Iesu ghe uela va, “Aghi tee atam anna tani tau aatu sesa aipolipoli etam. Kasula, me unim ruu tani ghelei ssavoto.”

Iesu mallanga ia tale kosa ateva

¹² Iesu ghe mene uela ta taumattu ngatoa va, “Aghi mallanga ieghi tale kosa ateva oia. Lo ateva eaimuli teeieghi, karika aue ekasu tale saurrom ateva, ta aue eghaa lo ateva o mallanga etautau aatu mauhue.”

¹³ Paresi etoa laghe nongola, me laghe uela ta Iesu va, “Io nonga uaaulia ngaotu gheeleiaam me uunguaam. Liuna avalua o me inangarim karika koronna.”

¹⁴ Iesu ghe liula me ghe uela va, “Koronna va aghaulieinaghi nonga, me inangarighi koronna. Ta poli akilakila tanganueghi me eaa alaolao, me am, am tam kilakila tanganueghi me eaa aue alao. ¹⁵ Am, am gheelei niaisakei tale taumattu nongina gheeleiaa kosa ateva, me aghi karika. Karika aghelei niaisakei tale teva taumattu. ¹⁶ Arova aghele ghelei niaisakei aue aghele ghelei ekoronna poli karika va aghi nonga aue aghele ghelei, ta aghi me Tamaghi ghe sungieghila aue angalu ghele ghelei. ¹⁷ Uneimim inangari nipaopao eue va, arova ghalua taumattu lalu auliaa inangariirarua me elao aitauea, isaa o inangari am vira kaili ekoronna. ¹⁸ Aghi aghaaulia ngaotu uunguaaghi me gheeleiaaghi, me Tamaghi, ia o ghe sungieghila, ie tee eaauliaa uunguaaghi me gheeleiaaghi.”

¹⁹ Vara me laghe kolomiela va, “O eaa ia tamam?”

Iesu ghe liula me ghe uela va, “Arova am kilakilaieghi, aue am ghele kila Tamaghi, me poli am tam kilakilaieghi, karika aue am kila Tamaghi.” ²⁰ Iesu ghe aauliaa isaa o inangari kalakalaa tale ale atiulu laghe kaakaai viliki veu etana tale ale manga ateva. Karika teva taumattu ghe anna tani kuneia, poli nauna karika ghe mae.

Karika am rooro tani lao nongina alaolao

8:5: Lev 20:10; Diut 22:22-24. **8:7:** Diut 17:7. **8:11:** Jon 5:14. **8:12:** Ais 49:6; Jon 1:4-9; 9:5; 12:46. **8:14:** Jon 5:31-32; 7:28. **8:15:** Jon 12:47. **8:16:** Jon 5:30; 8:29. **8:17:** Diut 19:15. **8:18:** 1 Jon 5:9. **8:20:** Jon 7:30.

²¹ Iesu ghe mene uela etaira va, “Aue akasu vuliem, me aue am pae poioghi, me am mate tee kaluimim ssavoto. Karika am rooroo tani lao nongina aue alao.”

²² Ajiu etoa laghe aikolomieinila va, “Vaalua me eue va, ‘Karika am rooroo tani lao nongina aue alao’? Koti enim aloanna tani uvi ematea, no?”

²³ Iesu ghe uela etaira va, “Am, tanganueimim oia euu, me aghi, tanganueghi epona liu, me am taumattu tale kosa ateva oia, me aghi karika. ²⁴ Aghaauliaa etaimim va aue am mate tee kaluimim ssavoto, poli arova am tam aiesoaa va aghi see, aue am mate tee kaluimim ssavoto.”

²⁵ Me laghe kolomiela va, “Io see io?”

Me Iesu ghe uela etaira va, “Aghi ia o taumattu ngateva aghe aulieiniela etaimim emua arau. ²⁶ Oroiannaaili voto arooroo tani auliaa tani aotu gheeleiaaimim karika masina, me tani ghelei niaisakei etaimim. Ta lo ateva aghaaulieinia koronna ia, poli lo ateva ghe sungieghila koronna ia, me aghi aghaulia ngaotu tale taumattu tale kosa ateva saa voto aghe nongola etana.”

²⁷ Karika laghe kilakila va Iesu ghe aauliaa Tamane. ²⁸ Iesu ghe ue etaira va, “Nau eteva aue am avukala sae Natuna ateva Taumattu ngateva, me aue am vira mene kila va aghi see. Me karika agheelei righi voto ta nannaaghi, ta agheelei nonga voto Tamaghi ghe apasungaala. ²⁹ Lo ateva ghe sungieghila etokatoka teeieghi. Karika etautau velueghi va aghi nonga atokatoka, poli nau ekapa atoa agheeghelei llo voto ealoanna.” ³⁰ Nau taumattu ngatoa laghe nongola inangarina, oroi ila lo atoa laghe aikaiaala etana.

Koronna inangari aue egheleiem am toka amasina

³¹ Vara me Iesu ghe uela ta lo atoa ajiu laghe aiesoaa etana va, “Arova nau ekapa atoa am aimuli tee inangarighi, am aue kapughu disaepolo tuungi iem, ³² me aue am kila koronna inangari, me llo koronna aue gheleiem am ruu tani nim uungu ta katoa me karika am tokatoka tale aloannaaimim.”

³³ Laghe liula me laghe uela va, “Ami tuvumami ta Abraham, karika teva etaimami enim uungu me karika etokatoka tale aloaloannaane. Vaalua me uue va, ‘Aue am ruu tani uungu ta katoa?’”

³⁴ Iesu ghe liula me ghe uela va, “Aghaaulia ngakoronna etaimim va lo ateva enim toka gheelei voto sesa, ia tau ngai uungu ia tale voto llo sesa, karika etokatoka tale aloannaane. ³⁵ Tau ngai nongonongo anna ateva enim tokatoka tau tee vauna ateva. Natuna nonga ateva vauna ateva aue etoka teeia nau ekapa atoa. ³⁶ Arova natuna ateva egheleiem am ruu tani uungu ta katoa, aue am vira ruu tani uungu ta katoa. ³⁷ Akilakila va tuvuna am Abraham, me poli inangarighi karika elome tale urunguitaniimim, me am aloanna tani uvi emateaghi. ³⁸ Voto aghe tarala ta Tamaghi, aghaauliaa. Voto am ghe nongola ta tamaimim ateva am gheeghelei.”

Am tamaimim ateva ta Satana

³⁹ Laghe liula me laghe uela ta Iesu va, “Ami tuvumami eteva ta Abraham.”

Me Iesu ghe uela etaira va, “Arova tuvuna am Abraham aue am ghele ghelei voto nongina Abraham ghe gheelei. ⁴⁰ Nau eteva aghaauliaa voto koronna aghe nongola ta God, am aloanna tani uvi emateaghi. Abraham karika ghe gheelei evalua o. ⁴¹ Am, am tani gheelei nonginaaili tamaimim ateva.”

Me laghe uela etana va, “Vara natu ngerengere iemami? Ami kateva nonga tamaimami God ta ngetana.”

⁴² Iesu ghe uela etaira va, “Arova natuna iem God, aue am ghele aielousieinaghi, poli aghe kasula nongina etokatoka. Karika nim nannaaghi va aghe sio mae, ia ghe sungieghila tani sio. ⁴³ Vaalua me karika am nongonongo kila inangarighi? Poli karika am rooroo tani nongo inangarighi, ⁴⁴ am tamaimim ateva ta Satana, poli am aloanna tani ghelei voto ealoanna. Ia emua arau ghe aiuuvi ematela, me karika eaauliaa righi koronna poli karika righi koronna etana. Nau eaauliaa kamena, euusila ngarau gheegheleiaane kamena. Poli ia ekamekame, o tamaira akapa ia lo atoa la kamekame. ⁴⁵ Ta poli aghaauliaa voto koronna, karika am aikaaiaa etaghi. ⁴⁶ Teva etaimim erooroo tani auliaa righi gheeleiaaghi karika masina? Arova aghauliaa koronna, vaalua me am tam aikaaiaa ta ngetaghi? ⁴⁷ Lo atoa natuna ila God, aue la nongo usilaa inangarina, me am, karika am aloanna tani nongo inangarina, poli karika va natuna am God.”

Iesu me Abraham

⁴⁸ Me ajiu etoa laghe liula me laghe uela ta Iesu va, “Inangariimami ami aauliaa koronna va io aSameria io, me raroai eteva etokatoka etam, va?”

⁴⁹ Iesu ghe liula me ghe uela va, “Karika teva raroai etaghi, ta anim tautau sae ararina atea Tamaghi, me am aasiosio ararighi eteae. ⁵⁰ Me aghi karika aghanna tani ghelei ararighi eteae. Kateva nonga eanna tani tau sae ararighi eteae, me ia tau ngai ghelei niaisakei ia. ⁵¹ Aghaaulia ngakoronna etaimim va arova lo ateva enongo usilaa inangarighi, ia o taumattu ngateva karika aue etara nimate.”

⁵² Me ajiu etoa laghe uela etana va, “Ia oia ngami kilala va raroai eteva etokatoka etam, poli Abraham me mene katoa propete ngila ghe matela. O me uue va, ‘Lo atoa la nongo usilaa inangarighi karika aue la ateatea nimate.’ ⁵³ Vara io va namuu io ta tuvumimami eteva ta Abraham me mene katoa propete ngila ghe matela? Vara mene see etam?”

⁵⁴ Iesu ghe liula me ghe uela va, “Arova aghele tau sae ararighi eteae, ararighi eteae nim kapa ia. Me Tamaghi, ia o am ue va kapuimim Goto ia, etautau sae ararighi eteae. ⁵⁵ Am karika am kilakilaia. Aghi nonga akilakilaia. Arova aghele ue va karika akilakila, aue aghele kamekame nongina am tau nikamekame iem. Aghi akilakilaia, me anongonongo usilaa inangarina. ⁵⁶ Tuvumim ateva ta Abraham ghe masimasieilila tani tara isaa oia naughu. Nau eteva ghe tarala ghe masimasieilila.”

⁵⁷ Me ajiu etoa laghe uela etana va, “Meie! Anem ninamanama karika ghe nim sae ta ghalimangauluae (50), me vaalua ughe tarala Abraham?”

⁵⁸ Iesu ghe uela etaira va, “Aghaaulia ngakoronna etaimim va auena Abraham ghe lutu, aghi ngaghe toka vella arau!” ⁵⁹ Me ngila ghe reirei atu tani kumua. Iesu ghe aisuliaala, me ghe kupi ghoala tale ale manga ateva.

9

Iesu ghe ghelei emasinala mata salusalu eteva

¹ Iesu ghe kasukasu elaolao, me ghe tarala taumattu ngateva ghe lutu emata salusalula. ² Kapuna disaepolo atoa laghe kolomiela va, “Tisa, vaalua me ghe mata salusalunala, poli ia kanna ssavoto, o tamana me kinna?”

8:44: 1 Jon 3:8. **8:46:** 2 Ko 5:21; 1 Pita 2:22. **8:47:** 1 Jon 4:6. **8:48:** Mak 3:21-22. **8:51:** Jon 5:24. **8:58:** Jon 1:1. * **8:58:** Iesu ghe ghaala ararina atea God, nongina Eksodis 3:14 eaauliaa. **9:2:** Esik 18:20; Luk 13:2, 4.

³ Iesu ghe liula etaira me ghe uela va, “Karika va ia kanna ssavoto, o tamana me kinna, ta mausi aue taumattu ngatoa la tara uunguaane God etana. ⁴ Aue ita ghelei uunguaane lo ateva ghe sungieghila tani mae ghelei. Ellaa ita tani uungu, va nau eleivoo, karika teva erooro tani uungu. ⁵ Nau atokatoka oia tale kosa ateva, aghi mallanga aghi tale kosa ateva.”

⁶ Nau ghe aippooaa, me ghe kanusuila tuku kosa ateva, va ghe maramarakanala, me ghe atavainie saela tale matana alua, ⁷ me ghe uela etana va, “Kasula, me ulaa pora matam tale ateo atea kaikaina ia, ararina atea ta Siloam.” (Malloeana Siloam va “sungieghila”.) Ghe porala matana, me ghe kiriaala, me ghe taatara.

⁸ Kapuna atoa me lo atoa laghe taataraia ta ghe toka looloo, laghe ue va, “Karika va ia okae taumattu ngateva ghe toka looloo nonga tapaa ngatamana tale ale manga ateva?” ⁹ Katoa laghe ue va, “Ia oio taumattu ngateva.”

Mene katoa laghe ue va, “Karika, arova taataraane va ia okae.”

Ia ghe uela va, “Aghi oia.” ¹⁰ Laghe kolomiela va, “Vaalua me matam ghe taatarala?”

¹¹ Ghe liula me ghe uela va, “Taumattu ngateva la kolokoloa va Iesu etana, ghe ghelei emaramarakanala tuku kosa ateva, me ghe atavainie saela ta mataghi, me ghe uela etaghi va, ‘Ulaa pora matam tale ateo atea eSiloam.’ Aghe lao sio va aghe porala mataghi, me aghe taatarala.”

¹² Laghe kolomiela va, “Eaa ia, ia ona taumattu ngateva uaulieinia?”

Ghe liula me ghe uela etaira va, “Karika anga kilala.”

¹³ Laghe laooa sio taumattu ngateva mata salusalu ia ta Paresi etoa. ¹⁴ Ia o nau eteva nau manga ia Iesu ghe ghelei emaramarakanala tuku kosa ateva, me ghe gheleila matana alua lalu ghe taatarala. ¹⁵ Paresi tee atoa laghe kolomiela va, “Vaalua utaatarala?”

Ghe uela etaira va, “Ghe atava saela kosa maramarakana ta mataghi, me aghe lao sio tani pora mataghi, me aghe taatarala.”

¹⁶ Katoa Paresi laghe ue etana va, “Taumattu ngateva oia karika va God ghe sungieghila, poli etam aitaraa nau manga ateva.”

Mene katoa laghe ue va, “Vaalua sesa taumattu ngateva erooro tani ghelei righi niaimatoonga?” Ghe ghaluela nannaaira me laghe aitiuaala.

¹⁷ Laghe mene ue ta mata salusalu eteva va, “Io, vaalua nannaam etana, ta poli ghe otila matam alua?”

Ghe uela va, “Ia propete ia.”

¹⁸ Poli ajiu etoa laghe tam aikaaiaa inangarina mata salusalu eteva, va ia mata salusaluna ia, me ghe mene taatarala, laghe suula inangari ta tamana me kinna va lalu mae. ¹⁹ Angila ghe kookolomi tamana me kinna va, “Ierai natuimalue ia? Amalu ghe ue va ghe lutu emata salusalunala? Me vaalua me ghaine etaatarala?”

²⁰ Tamana me kinna lalu ghe liula etaira va, “Angalu kilakilaia va natungalua ia ta ghe lutu emata salusalunala. ²¹ Vaalua me ghaine etaatarala, angalu tam kilakila va see ghe otila matana alua. Am kolomia, ta namuu ia, me ia aue eauliaa etaimim.” ²² Lalu ghe aulia ngavalua o poli lalu ghe maamatauta namuu ta ajiu etoa, ta namuu ta ajiu etoa laghe ue va arova lo atoa la ue va Iesu Mesaea ia, aue la tiu vella tale ale nivelu eitaua ngateva, me karika aue la mene mae kkaua teeila. ²³ Liuna avalua o tamana me kinna lalu ghe uela va, “Am kolomia, ta namuu ia.”

²⁴ Laghe mene kolola mata salusalu eteva ghe mae sio. Me laghe uela etana va, “Utau sae God,* poli ami kilakila taumattu ngateva ona va tau ngai gheelei ssavoto ia.”

²⁵ Ghe liula etaira va, “Arova tau ngai gheelei ssavoto ia o karika, atam kilakila. Kateva nonga voto akilakilaia va, aghi mata salusalu ieghi, me isaa oia ngataatarala.”

²⁶ Laghe mene kolomiela va, “Saa llo ghe gheleila etam, me vaalua ghe otila matam?”

²⁷ Ghe liula etaira va, “Ngaghe auliaa muela etaimim, me karika am ghe aloanna tani nongo. Vaalua me am aloanna tani mene nongo? Koti am tee, am anna va ekapuna disaepolo iem?”

²⁸ Paresi etoa laghe auliaa saasakiaala etana. Laghe uela etana va, “Io nonga kapuna disaepolo io, ami kapuna disaepolo iemami Moses. ²⁹ Ami kilakila va God ghe aippooaa teela Moses. Me ia ona taumattu ngateva, ami tam kilakila tanganuena.”

³⁰ Taita ateva oia ghe liula etaira va, “Ngasoghiaala inangariimim! Am ue va am tam kilakila tanganuena, me ia oia taumattu ngateva ghe otila mataghi elua. ³¹ Ita kilakila va God etam rooroo tani nongo usilaa tau ngai gheelei ssavoto atoa, me arova lo ateva ekakkaua God me eaimuli usi tee aloannaane God, ia aue God enongo usilainia. ³² Emua arau nau kosa ateva ghe tiuaala, karika ita ghe nongo poila righi taumattu ghe lutu esalusalunala me matana ghe mene otila. ³³ Arova ghe tam kasula ta God, karika erooroo tani ghelei righi voto.”

³⁴ Me laghe liula me laghe uela etana va, “Ughe lutula tale ssavoto, me vaalua me uanna tani apasunga voto etaimami!” Me laghe tiu veluela va karika emene mae kkaua teeila.

³⁵ Iesu ghe nongola va ngila ghe tiu veluela. Nau ta ghe paeala me ghe taraiela, ghe uela etana va, “Uaikaaiia ta Natuna ateva Taumattu ngateva?”

³⁶ Me taumattu ngateva o ghe kolomila va, “Namu ngateva, auliaala etaghi va see ia, ia ona taumattu ngateva, me aue aghaikaaiia ta ngetana.”

³⁷ Iesu ghe uela etana va, “Angu ghe taraiela, me ia oia esamasama teeio.”

³⁸ Me taumattu ngateva o ghe uela va, “Vau eteva, aghaikaaiia,” me ghe suuiaala ta liue kkena Iesu me ghe kaueiniela.

³⁹ Iesu ghe uela va, “Aghesio mae tale kosa ateva tani ghelei niaisakei ta taumattu ngatoa, me aue lo atoa mata salusaluna ila la taatara, me lo atoa la taatara la mata salusaluna.”

⁴⁰ Katoa Paresi laghe tokatoka me laghe nongola llo Iesu ghe auliaala, me laghe kolomiela va, “O ami tee mata salusalu iemami?”

⁴¹ Iesu ghe liula me ghe uela va, “Arova mataimim salusaluna, karika aue ghele righi kaluimim ssavoto, me poli am ue va, ‘Ami taatara,’ liuna avalua o me kaluimim ssavoto, ie etokatoka etaimim.”

10

Iesu masi tau ngai toi sipsipi ia

¹ Iesu ghe mene uela va, “Aghaaulia ngakoronna etaimim va lo ateva taumattu, karika ekupikupi sso tale atamani valavala sipsipi eteae, ta etattakole tale valavala ateae, tau niainao ia, me aisari katoa ghinnaniira ia. ² Lo ateva taumattu ekupikupi sso tale atamana ateae, ia tau ngai toi sipsipi ia. ³ Tau ngai toi atamana ateae etaatara kila tau ngai toi sipsipi eteva, me eotioti atamana ateae, me tau ngai toi sipsipi eteva ekupikupi sso,

* **9:24:** Utau sae God Utara Josua 7:19. **9:31:** Sams 34:15. **9:34:** Sams 51:5. **9:40:** Mat 15:14.

me sipsipi etoa la nongonongo kila lingi ngalona ateva. Ekolokoloa arariira kiena sipsipi etoa, me ekuukupieinila ghoa eleka. ⁴ Nau eteva ekuukupia ngakapa ghoa kiena sipsipi, me emuemueinila, me kiena sipsipi etoa la ghaaimuli teeia, poli la nongonongo kila lingi ngalona ateva. ⁵ Karika la rooroo tani usi mene teva ppae taumattu. Me aue la ghele ilou vuli teeia, poli karika la nongonongo kila lingi ngalona ateva.” ⁶ Iesu ghe auliaala ia o kiukiu niaimatoongana atea, me nannaaira karika ghe masalike teela voto ghe auliaala etaira.

⁷ Liuna avalua o me Iesu ghe mene uela etaira va, “Aghaaulia ngakoronna etaimim va aghi atamani sipsipi etoa ieghi. ⁸ Lo atoa laghe muemue mae akasina sio etaghi, tau niainao ila me aisari ghinna ila, me sipsipi etoa karika laghe nongo kilailala. ⁹ Aghi atamana ieghi. Lo ateva ekupikupi sso etaghi aue esaanga. Aue esso me eghoa, me aue eghaa masi inana. ¹⁰ Tau niainao ateva emaemae tani ainao, me tani aiuvvii emate, me tani tturuu. Me aghi aghe mae sio va la ghaa maulue, me maamauluaaira epasu tale masi voto. ¹¹ Aghi masi tau ngai toi sipsipi ieghi. Masi aitoi sipsipi eteva, etautau maamauluaane tani sausi kiena sipsipi etoa. ¹² Polipolina ateva taumattu, nau eteva sesa paua ngetapaa tuvui eteva emaemae tani nama sipsipi etoa, aue eilou vuli sipsipi etoa, poli karika va tau ngai toi sipsipi ia, me karika va kiena tuungi ila. Me paua ateva aue ghele namaila me ghele ameti reerekatainila. ¹³ Ia o taumattu ngateva eilou vuli sipsipi etoa poli enim uungu tani ghaa viliki veu, me karika nannaane tani aitaraa sipsipi.

¹⁴ “Aghi masi aitoi sipsipi ieghi. Akilakila kieghi sipsipi, me ila la kilakilaieghi, ¹⁵ nongina Tamaghi ekilakilaieghi, me aghi akilakila Tamaghi, me atautau maamauluaaghi tani sausi kieghi sipsipi etoa. ¹⁶ Mene katoa tana kieghi sipsipi, karika ila elome tale ia oia valavala atea. Aue atani ghaaila, me la mae kupi sso, me ila tee aue la nongo lingi ngaloghu eteva, me aue ekateva nonga ila, me ekateva nonga tau ngai toiira. ¹⁷ Tamaghi eailousieinaghi, poli aue atau velu maamauluaaghi, me auena amene ghaa. ¹⁸ Karika teva erooroo tani ghaa velu maamauluaaghi. Aghi atautau velu maamauluaaghi, me aghi nonga matuutuliena aghi tani tau velu maamauluaaghi me matuutuliena aghi tani mene ghaa. Tamaghi ghe auliaa tau mae isaa oia inangari va aghelei.”

¹⁹ Isaa o inangarina ghe gheleila me ajiu etoa ghe ghalueilala. ²⁰ Oroi ila taumattu ngatoa laghe ue va, “Raroai eteva etokatoka etana, me veeveena ia. Vaalua me am anna tani nongo inangarina?”

²¹ Me katoa laghe ue va, “Lo ateva raroai eteva etokatoka etana karika erooroo tani auliaa isaa o voto. Raroai eteva karika erooroo tani oti mataira salusaluna atoa.”

Ajiu etoa karika laghe aaiesoaa ta Iesu

²² Nau eteva tani nnaa lao nau laghe tau saela ale manga ateva ghe rekatala. Ia o nivelu eitaua ngateae ghe lutulutu tale nau kkaili eJerusalem, ²³ me Iesu eleka tale ale manga ateva ghe kasukasu tale varanda ngateva laghe asease Solomon etana. ²⁴ Me ajiu etoa laghe mae sio tani tingina talieinia me ngila ghe ue etana va, “Lovisaa uauliaa kiemami? Ange matemate toitoiaaimami. Arova io Mesaea ngateva, uaulia ngamasina etaimami.”

²⁵ Iesu ghe liula me ghe uela etaira va, “Aghaauliaa etaimim, me karika am aaiesoaa. Niuungu aghe ghelei tale ararina atea Tamaghi eaauliaa

va aghi see ieghi. ²⁶ Am tam aaiosoa poli karika va kieghe sipsipi iem. ²⁷ Kieghe etoa sipsipi la nongonongo kila lingi ngalochu eteva. Akilakilaila me la ghaaimuli teeieghi. ²⁸ Atautaula maulue ateva etokatoka nau ekapa atoa, me karika aue la mate. Karika teva erooroo tani ghaa vella ta nimaghi. ²⁹ Tamaghi, ghe taula mae sio etaghi, enaanamuu vulu isaa akapaaili taumattu, me karika teva erooroo tani ghaa vella ta nimane Tamaghi. ³⁰ Aghi me Tamaghi kateva nonga iengalua.”

³¹ Me ajiu etoa ngila ghe mene reirei atu tani kumua. ³² Me Iesu ghe uela etaira va, “Aghe apasungala oroiannaaili masi niuungu kanna Tamaghi. Am anna tani kumueghi tale mausi sa ateva tale isaa o niuungu?”

³³ Ajiu etoa laghe liula me laghe uela va, “Karika ami anna tani kumuo poli isaa o voto, ta poli uaauliaa saasakiaa tee God, poli nim taumattu io, me uue va io God.”

³⁴ Me Iesu ghe liula me ghe uela etaira va, “Karika am ghe ritila tale uneimim inangari nipaopao, eue va, ‘Aghe uela va am goto iem’? ³⁵ Emua arau God ghe ppoaala inangarina ta taumattu ngatoa me ghe uela va goto ila. Inangarina God tale Uru ngai Manga ateva karika eaikolikoliaa. ³⁶ Me aghi, Tamaghi ghe amangaieghila me ghe sungieghila tani sio tale kosa ateva oia. Liuna avalua o me aue va Natuna ieghi God. Vaalua me am ue va aghaauliaa saasakiaa ta God? ³⁷ Am rau mene aiesoaa etaghi arova atam gheelei uunguaane Tamaghi. ³⁸ Arova am tam aiesoaa etaghi, am aiesoaa tale niuungu agheelei, poli agheelei uunguaane Tamaghi, me aue am kila va Tamaghi etaghi me aghi ta Tamaghi.” ³⁹ Laghe mene anna tani kuneia, me karika laghe roola.

⁴⁰ Me Iesu ghe mene oghi lao sio, me ghe lau longotila eJodan, me ghe lao sio tale voto ateva Jon ghe aasuu taumattu etana, me ghe tokala tale ia o voto ateva. ⁴¹ Me oroieili taumattu ghe mae sio etana. Laghe ue va, “Koronna va Jon ghe tam gheleila teva niaimatoonga, me voto ghe auliaala tale ia oia taumattu ngateva koronna akapa.” ⁴² Tale ia o voto ateva oroi taumattu ghe aiesoala ta Iesu.

11

Lasarus ghe matela

¹ Kateva taumattu, Lasarus etana, ghe iisiki. Ghe tokatoka eBetani, tanganueirarua Meri me tuena ta Mata. ² Meri ia o vause ateva ghe kaola voto masi ngusungusuaane ta kkena Vau eteva, me ghe ulula tale uu nguruna, ia o Meri kapuna taita ateva oia ta Lasarus ghe iisiki. ³ Liuna avalua o me kapuna vause alua lalu ghe suula inangari ta Iesu tani auliaa kiena va, “Vau eteva, unongo, masi kapum ateva eiisiki.”

⁴ Nau eteva Iesu ghe nongola, ghe uela va, “Ia okae isiki eteva karika aue eruu tale nimate. Enim lutula tani apasunga sarasarakaniaane God, me la tau tee sae ararina atea Natuna ateva God.” ⁵ Iesu ghe aielousiangaili Mata me nengane ta Meri me Lasarus. ⁶ Liuna avalua o, nau eteva Iesu ghe ghaala inangari va Lasarus eiisiki, ghe mene tokala ghalue nau nongina ghe tokatoka arau.

⁷ Vara me ghe uela ta kapuna disaepolo atoa va, “Ita kasu me ita mene sae ejiudia.”

⁸ Me kapuna disaepolo atoa laghe uela etana va, “Tisa, vaalua me umene anna tani sae eJiudia, aJiu etoa okae ghalavoo nonga laghe anna tani kumu emateo tale atu?”

⁹ Iesu ghe uela etaira va, “Karika am kilakila va kasangaulu ghalua (12) aoa ta kateva nau? Arova lo ateva ekasu ellaa, karika aue etaghueinia, poli etaatara tale mallanga ateva tale kosa ateva. ¹⁰ Me arova lo ateva taumattu ekasu eleivoo, aue etaghueinia, poli karika etaatara teva mallanga.”

¹¹ Vara ghe ruula tani auliaa llo me ghe mene uela etaira va, “Kapuita ateva ta Lasarus enim sio aseasekanua, me anga laa siosio oia tani angunia.”

¹² Me disaepolo atoa laghe uela etana va, “Vau eteva, arova enim sio aseasekanua, aue emasina.” ¹³ Iesu ghe auliaa va ang ghe matela, me ila laghe annaa va ghe auliaa niasekanue atea ta ghainoana etana.

¹⁴ Me Iesu ghe vira mene aulia ngamasinala va, “Lasarus ang ghe matela. ¹⁵ Nau eteva aghannainam anim masimasi va karika aghe toka teeiela, poli isaa o voto aue egheleiem am aiesoaa. Ita kasu, me ita sio taraia.”

¹⁶ Vara me Tomasi, kateae ararina laghe kolokoloa va Palue ia, ghe uela ta disaepolo akapa atoa va, “Elauo! Ita akapa ita usia, me ita laa mate teeia.”

Iesu etottotu taumattu matena me etautaula maulue

¹⁷ Nau eteva Iesu ghe laa rekata sio eBetani, ghe nongola va ang ghe asola ghaata nau tale lienga niaikkaia. ¹⁸ Betani kalakalangina ia eJerusalem, maamasauaane eroroo nim kotolu nonga kilomita. ¹⁹ Oro i aJiu etoa laghe mae sio tani aippooaa me toka tee Mata me Meri tani aale amate, poli kapuirarua taita ateva ghe matela. ²⁰ Nau eteva Mata ghe nongola va Iesu ang ghe rekatala, ghe lao sio tani soua, me Meri ghe tokala elo ale.

²¹ Me Mata ghe uela ta Iesu va, “Vau eteva, arova ughe tokatoka oia, kapughu taita ateva karika aue ghe mate. ²² Me ia oia akilakila va arova ughele kolomi righi voto ta God, aue ghele tau aatu.”

²³ Iesu ghe uela etana va, “Kapum taita ateva aue emene sakesake.”

²⁴ Mata ghe uela etana va, “Akilakila va aue etotu tale nau taumattu ngatoa aue la totu tale liu, tale airuuruu tale nau.”

²⁵ Iesu ghe uela etana va, “Aghi atottotu taumattu matena, me atautau lao maulue. Lo ateva eaiesoaa etaghi, arova emate, aue emene sakesake. ²⁶ Lo ateva etokatoka me maulue ia, arova eaikaiaa etaghi, karika aue emate. Uaaiesoaa tale isaa oia inangari?”

²⁷ Mata ghe uela ta Iesu va, “Ue, Vau eteva. Aghaaiesoaa va io Natuna io God, me io Mesaea io, ia o laghe uela va aue emae.”

Iesu ghe alousiusi teela Lasarus me ghe ngalaiela

²⁸ Mata ghe ruula tani ppooaa isaa o inangari me ghe lao sio tani tara Meri, me ghe aulia ngainaola etana va, “Tisa ange rekatala, me eanna tani taraio.”

²⁹ Nau eteva Meri ghe nongola, arovaeaata ta ghe tinginala, me ghe lao sio tani tara Iesu. ³⁰ Iesu karika ie ghe mae rekata. Ghe aaitoka see tale voto ateva Mata ghe lao sio tani soua etana. ³¹ AJiu etoa laghe tokatoka tee Meri elo ale tani alousiusi eitauaa teeia. Vara me laghe taraiela ta ghe tinginala, me ghe ailuiluila tani kupi ghoa. Laghe usiela, poli laghe annaa va ang ghe laolao tani ngala nongina laghe alokoila taumattu ngateva matena ia.

³² Nau eteva Meri ghe laa rekata sio nongina Iesu ghe tiitingina, ghe taraiela, me ghe suuiaala ta liue kkena, me ghe uela va, “Vau eteva, arova ughe tokatoka oia, kapughu taita ateva karika aue ghe mate.”

³³ Iesu ghe tarala Meri me aJiu etoa laghe ngangngala me ghe sessaiela, me ie tee ang ghe anna tani ngala. ³⁴ Me ghe uela va, “Eaa am ghe alokoieia?” Me laghe uela etana va, “Vau eteva, mae sio me ulaa tara.”

³⁵ Me Iesu ghe ngalala.

³⁶ AJiu etoa laghe ue va, “Am tarala, Iesu eailousiangaili Lasarus.”

³⁷ Me katoa laghe ue va, “Ghe ghelei emasinala mata salusaluna ateva, me vaalua me karika ghe roola va ghe sausi Lasarus va karika ghe mene mate?”

Iesu ghe totula Lasarus tale nimate

³⁸ Iesu ghe mene sessaiela nau eteva ghe kasukasu elaolao nongina laghe alokoila Lasarus. Tale voto ateva liengani niaikkaia ia me laghe atoka rungaala atu eteva etana. ³⁹ Iesu ghe uela va, “Am ghaa vella atu eteva.”

Me Mata, kapuna vause ia tau raua, ghe uela va, “Vau eteva, aiaaghaatane ateva oia nau ang ghe asola tale liu. Nei mauuna ateva ang ghe tiuaala.”

⁴⁰ Me Iesu ghe uela etana va, “Auela va saa etam? Auela va arova uaaiesoaa, ghaine utara sarasarakaniaane God.”

⁴¹ Vara me laghe ghaa vella atu eteva. Me Iesu ghe taatara saela epona me ghe uela va, “Tamaghi, akaakaili emasinaaili ta ughe nongola kalughu nikokkolomi. ⁴² Me akilakila va nau ekapa atoa unongonongoaghi, me poli mausi taumattu toko la tiitingina, liuna avalua o me ngamene aauliaa isaa oia inangari me aue la ghaiesoaa va io ughe sungieghila tani sio.”

⁴³ Nau eteva ghe ruula tani auliaa llo, me ghe kolokolo anamungailiila me ghe uela va, “Lasarus, kupi ghoa mae!” ⁴⁴ Me ia o taumattu ngateva ghe matela ghe kupi ghoa mae. Nimane me kkena sumsum tale kalio la sumsumaa matena atoa, me matane sumsum tale mene tuku kateva kalio.

Iesu ghe uela va, “Am pulaka vella tapiri kalio, me am tau velua me ekasu.”

Namu ngatoa laghe tingina aitauaala tani uvi emate Iesu

(Mat 26:1-5; Mak 14:1-2; Luk 22:1-2)

⁴⁵ Oroil ila aJiu etoa laghe mae sio tani alousiusi tee Meri, laghe tarala ia o voto ateva Iesu ghe gheleiela, me laghe aiesoala etana. ⁴⁶ Me katoa etaira laghe lao sio tani tara Paresi etoa tani auliaa etaira sa ateva Iesu ghe gheleiela. ⁴⁷ Namu ngatoa ta pristi me Paresi etoa laghe lao sio tani kolo kansolo atoa.

Me laghe velu eitauaala me laghe uela va, “Sa ateva ita gheleia, poli taumattu ngateva oia ange ghelei oroi niamatoonga? ⁴⁸ Arova ita tau velua, me ita tam ghelei rungania, taumattu ngakapa atoa aue la ghaikaiaa etana, me aue aRom atoa la mae, me la uvi tuuturungita, me la ghaa velu ale manga ateva.”

⁴⁹ Kateva taumattu elome etaira, ararina atea ta Kaeapas, ia namuu ia ta pristi etoa tale ia o ninamanama atea, ghe uela va, “Am oia, karika am kilakila righi voto! ⁵⁰ Am tee, karika am kilakila va emaamasina arova kateva nonga taumattu ghele mate tani ghaa liuira akapa taumattu ngatoa, me karika masina arova taumattu ngakapa ghele mate.”

⁵¹ Karika Kaeapas ghe nim auliaa isaa o inangari tale aloannaane, poli ia namuu ia ta pristi etoa tale ia o ninamanama atea, me ghe aulia ngamuemua alokoila inangari o va Iesu aue emate tani sausi taumattu ngakapa atoa. ⁵² Karika va aue emate ta aJiu nonga atoa, ta mene katoa tani natuna God la tokatoka see, aue egheleila la velu eitauaa me ekateva

nonga ila. ⁵³ Ghe tiuaala tale ia o nau eteva, namu ngatoa laghe tiuaala tani aippooaa tee salana vaalua tani uvi ematea.

⁵⁴ Poli isaa o voto me Iesu ghe ruula tani kasu ta mata ngoroi etoa elome ta aJiu etoa. Ghe ssola tani toka tau tale masaliki eteae eEpraim, kalakalangina tale voto ateva karika righi taumattu ta ngetana, ia me kapuna disaepolo atoa.

⁵⁵ Pasova ngateva ang ghe aakalakalaa. Oroieili taumattu nge Jiu etoa la tokatoka amasau eJerusalem laghe tiuaala tani rekata eJerusalem tani ghelei eraarangisanaila me auena Pasova ngateva ghe tiuaa. ⁵⁶ Laghe paepae Iesu me laghe ssola kona ale manga ateva, me laghe tiuaala tani aikolomieinila. Laghe ue va, “Am annaa va aue emae tale ia oia nivelu eitaua ngateae?” ⁵⁷ Namuu ta pristi etoa me Paresi etoa laghe uela ta taumattu ngatoa va, arova lo ateva etara Iesu, elaa ghaulienia etaira. Ia o salana atikirighi laghe annaa va aue la kune Iesu ta ngetana.

12

Meri ghe kaola voto ateva masi ngusungusuaane ta kkena Iesu eBetani (Mat 26:6-13; Mak 14:3-9)

¹ Kasi ghaonomo (6) nau ghe tokatoka me ghe laa ghaa nau Pasova, Iesu ghe mene siola eBetani, tanganue Lasarus, ia o Iesu ghe totuela tale nimate.

² Laghe gheleila ninamanama atea tani amasimasi Iesu. Mata ghe aaikoita see inana, me Lasarus ghe tokatoka tee taumattu ngatoa laghe mae sio tani namanama tee Iesu. ³ Meri ghe ghaala botolo ateva ghe kaakaai voto masi ngusungusuaane laghe gheleila nonga tale oane natu ai erighi la aseasea va nadi ia me aipolina namungaili, me ghe kaoala ta kkena Iesu, me ghe uluulu kekena tale uu nguruna, me masi neina ateva ghe rooaala ale ateva tani aao.

⁴ Me kateva kapuna disaepolo, Jiudas Iskariot etana, ia aue etau lao Iesu ta tau ngai ssateena atoa, ghe uela va, ⁵ “Vaalua me karika am rooroo tani tauela va la poli ia okae voto ateva masi ngusungusuaane ta kotolu ai (300) silva koen,* me am ghele taula ta lo atoa karika righi peiira?” ⁶ Jiudas ghe aauliaa isaa o inangari karika va poli ghe annaa llo taumattu karika righi peiira, ghe auliaa poli ia tau niainao ia, me ia ghe posoposo aikaai viliki veu eteva, me kasina nau ghe aainao etana.

⁷ Iesu ghe liula me ghe uela etana va, “Tau veluela, poli eeatoka ia oia voto ateva masi neina, me aue elaa ghaa nau eteva aue amate, me la laa kaieinaghi. ⁸ Lo atoa karika righi peiira, la tokatoka teeiem nau ekapa atoa, me aghi, karika aue atoka teeiem nau ekapa atoa.”

Namuu ta pristi etoa laghe aailoe tani uvi emate Lasarus

⁹ Oroieili aJiu etoa laghe kilala va Iesu eBetani. Liuna avalua o me laghe lao sio karika mausi Iesu nonga va laghe lao sio. Laghe lao tee sio poli laghe aloanna tani tara tee Lasarus, ia o Iesu ghe totuela tale nimate. ¹⁰ Liuna avalua o me namuu ta pristi etoa laghe aailoe va la uvi emate tee Lasarus, ¹¹ ta mausi Lasarus me oroieili aJiu etoa ngeila ghe liuliu viliira ta pristi etoa, me ngeila ghe aaikaaiiaa ta Iesu.

Iesu ghe kupi ssola eJerusalem nonginaaili kingi eteva (Mat 21:1-11; Mak 11:1-11; Luk 19:28-40)

11:53: Jon 5:18. **12:1:** Jon 11:1, 43. **12:2:** Luk 10:40. **12:3:** Luk 7:37-38. * **12:5:** silva koen Silva koen ativilau (denarius) kateva nau aipolina. **12:8:** Diut 15:11. **12:11:** Jon 11:45.

¹² Vara mene kateva nau, me oroieili taumattu laghe saela eJerusalem tale Pasova ngateva, me laghe nongo teela va Iesu aue emae tee tale ia o nivelu eitaua ngateae. ¹³ Liuna avalua o me laghe ghaala uru ootou, me laghe lao sio tani sou Iesu tapaa salana. Laghe aaore me laghe ue va, “Ita tau sae ararina atea God! God aue eghelei masi voto ta ia oia taumattu ngateva ghe mae sio tale ararina atea! Ia kingi ia ta aIsraeli etoa!” ¹⁴ Iesu ghe ghaala donki eteva, me ghe laa sae toka etana, nongina inangari laghe pitila tale Uru ngai Manga ateva va,

¹⁵ “Natuna aliki vause ateva Saeon, urau mene matautu.

Am tara kapuimim kingi eteva emaemae
eiilou tale natu donki eteva.”

¹⁶ Isaa o nau kapuna disaepolo atoa karika laghe kilakila malloeana isaa o voto, me nau eteva God ghe vira mene tau saela ararina atea Iesu, me laghe vira mene nnaala voto Uru ngai Manga ateva ghe auliaala, me vaalua me taumattu ngatoa laghe gheleila isaa o voto ta ngetana.

¹⁷ Lo atoa taumattu laghe tarala Iesu ghe kolola Lasarus tani kupi ghoa tale lienga niaikkaia ngateae, laghe auliaa isaa o voto laghe tarala. ¹⁸ Taumattu ngatoa laghe nongola ia o niaimatoongana ngateva ghe gheleila, liuna avalua o me laghe ghoala tani soua tapaa salana. ¹⁹ Paresi etoa laghe tarala isaa o voto me laghe ue va, “Tarala! Llo ita anna tani ghelei karika ita rooroo, poli taumattu ngakapa tale kosa ateva ngila ususia.”

Katoa taumattu nge Grik laghe anna tani tara Iesu

²⁰ Katoa taumattu nge Grik laghe sae teela eJerusalem tani kkaua ta nau nivelu eitaua ngateae. ²¹ Laghe lao sio tani tara Pilip aBetsaida ia eGalilii, me laghe kolomiela va, “Namu ngateva, ami aloanna tani sama tee Iesu.” ²² Pilip ghe lao sio tani auliaa ta Andru, me lalu ghe lao sio tani tara Iesu, me lalu ghe auliaala etana.

²³ Iesu ghe liula me ghe uela va, “Ange ghaala nauna God tani tau sae ararina atea Natuna ateva Taumattu ngateva. ²⁴ Aghaaulia ngakoronna etaimim va, arova la tam pasa katu uiti eteva tale kosa ateva va emate, aue nim kateva nonga aue etoka. Me arova emate, aue eapinosa oroiannaaili uit. ²⁵ Lo ateva eaaielousiaa maamauluaane, aue eraua. Me lo ateva etam aloanna maamauluaane tale kosa ateva oia, eghelei tani ghaa maulue ateva etokatoka liu ia. ²⁶ Lo ateva taumattu esaasausieghi, eaaimuli teeieghi me voto ateva atokatoka etana, ie tee aue etoka aitaaua teeieghi etana. Lo ateva taumattu esaasausieghi, Tamaghi etautau sae ararina atea.

Aue la avukala sae Natuna ateva Taumattu ngateva

²⁷ “Ia oia voto maateaili ange lutulutu tale maamauluaaghi, me ngananangaili, me karika akilakila sa ateva atani aulieinia. Koti aue va, ‘Tamaghi, ughaa velu isaa o llo voto maamaatana.’ Karika! Ta poli isaa o voto maamaatana me aghe sio mae va elutu etaghi. ²⁸ Tamaghi, utau sae ararim atea!”

Vara Iesu ghe auliaa isaa o inangari me lingi ngalo ateva ghe kasula epona liu ghe uela va, “Ngaghe tau saela ararighi etea me aue amene ghelei.” ²⁹ Taumattu ghe tiitingina teeia laghe nongola, me katoa laghe uela va palapalanga ateva, me katoa laghe ue va, “Ensolo ateva ghe sama teeila.”

³⁰ Me Iesu ghe uela etaira va, “Ia o lingi ngalo ateva eppooaala inangari tani sausiem, karika va esaasausieghi. ³¹ Taumattu tale kosa ateva oia, God ange tiitiuaa tani ghelei niaisakei ta ngetaira. Me vau tapaa kosa ateva oia, God aue esau velue sio. ³² Me aghi, nau la ghavukalaieghi sae tale kosa ateva oia, aue aghelei taumattu ngakapa atoa la mae etaghi.” ³³ Iesu ghe aauliaala inangari o tani auliaa vaalua aue emate.

³⁴ Me taumattu ngatoa laghe uela ta Iesu va, “Inangari nipaopao eue va Mesaea ngateva aue etoka nau ekapa atoa. Vaalua me uue va aue la avukala sae Natuna ateva Taumattu ngateva? See ia Natuna ateva Taumattu ngateva?”

³⁵ Iesu ghe liula me ghe uela va, “Nauna mallanga ateva tani toka teeiem karika aluse. Liuna avalua o me nau etokatoka teeiem am kasu teeia, poli saurrom ateva erau akouem. Poli lo ateva ekasukasu tale saurrom etam kilakila va eaa elaolao. ³⁶ Am aikaaiaa tale mallanga ateva nau etokatoka teeiem, me aue natuna am mallanga ateva.” Nau eteva Iesu ghe ruula tani ppooaa isaa o inangari, ghe kasu vulilala me ghe lao sio tani aisulia.

Taumattu ngatoa laghe tam anna tani aikaaiaa ta Iesu

³⁷ Ghe gheleila oroiannaaili niaimatoonga elome ta mata ngoroi etoa, me karika laghe aikaaiaa ta ngetana. ³⁸ Isaa o voto ghe lutula tani ghelei ekoronna inangarina Aisaea propete ia ghe uela va, “Vau eteva, karika teva ghe aikaaiaa inangariimami, me karika teva ang ghe tarala sarasarakaniaam.”

³⁹ Taumattu ngatoa karika la rooroo tani aiesoaa ta Iesu, nongina Aisaea ghe mene uela va,

⁴⁰ “Vau ngepona ateva ghe ghelei emata salusaluna ilala me urunguitaniira korokoronganaaili poli la rau taatara ta mataira me la kila tale urunguitaniira me la mae etaghi me agheleila va la mene masina.”

⁴¹ Aisaea ghe tarala sarasarakaniaane Iesu, liuna avalua o me ghe auliaala isaa o voto ta ngetana.

⁴² Me oroi ila kapuira namu ngatoa laghe aikaaiaala ta Iesu, me karika laghe aootu, poli Paresi etoa laghe uela va lo ateva eaikaaiaa ta Iesu, aue la tiu velua tale ale nivelu eitaua ngateva, ⁴³ poli laghe annaaili va taumattu earueinila, me karika va God.

Iesu ghe mae sio tani asaangi kosa ateva

⁴⁴ Iesu ghe sama anamungailiila me ghe uela va, “Lo ateva eaaikaaiaa etaghi, eaikaaiaa tee ta lo ateva ghe sungieghila. ⁴⁵ Me lo ateva etaraieghi, etaatara tee lo ateva ghe sungieghila. ⁴⁶ Aghi aghe mae sio tale kosa ateva oia arova mallanga ateva va lo ateva eaaiesoaa etaghi, karika aue etoka tale saurrom.

⁴⁷ “Arova lo ateva enongo inangarighi me etam aimuli tee, karika aue agheleia va eaisakei, poli karika aghe mae sio tani ghelei niaisakei tale taumattu tale kosa ateva oia, ta aghe mae sio tani asaangila. ⁴⁸ Lo ateva etam annaieghi, me erati inangarighi, aue isaa o inangari aue egheleia eaisakei nau airuuruu tale kosa ateva. ⁴⁹ Karika aghaauliaa righi voto tale nim nannaaghi. Tamaghi ghe sungieghila ghe auliaala sa ateva tani aulieinia me vaalua tani auliaa. ⁵⁰ Akilakila va llo ghe auliaala aue etau mae mauue

12:32: Jon 3:14. **12:33:** Jon 19:6. **12:34:** Sams 110:4; Ais 9:7; Den 7:14. **12:35:** Jon 8:12.
12:36: Ips 5:8. **12:38:** Ais 53:1. **12:40:** Ais 6:10. **12:41:** Ais 6:1. **12:42:** Jon 9:22.
12:43: Jon 5:44. **12:45:** Jon 14:9. **12:47:** Jon 3:17.

ateva tokatoka liu ia. Liuna avalua o me atani auliaa voto Tamaghi ghe auliaa tau mae sio.”

13

Iesu ghe porala kkeira kapuna disaepolo atoa

¹ Nau Pasova ngateva karika ghe mae, me Iesu ang ghe kilala va nauna ange aakalakalaa tani kasu vuli kosa ateva, me emene sae ta Tamane. Ghe aielousiangaili kapuna atoa tale kosa ateva oia. Aielousiaane etaira ghe laa ghaa sio nau ghe mate vululala.

² Nau laghe namanama ta pai ngelo alai, Satana ang ghe atoka ssola ninanna ngateva ta Jiudas, natuna ia Saemon Iskariot, tani laoa Iesu ta tau ngai ssateena atoa. ³ Iesu ghe kilakila va God ghe tau ekapala voto ta nimane, me ia ghe kasula ta God, me aue emene sae ta God. ⁴ Liuna avalua o me Iesu ghe tingina saela nongina laghe namanama, me ghe ghaa vella unna aiaasae ngeleka ateva, me ghe ainavitaala taolo ateva. ⁵ Ghe kao kaaila manu tale aikaai manu etivilau, me ghe tiuaala tani pora kkeira disaepolo atoa, me ghe uluulu tale taolo ateva ghe aainavitainia etana.

⁶ Ghe rekatala ta Saemon Pita, me Pita ghe uela etana va, “Vau eteva, uaanna tani pora kkeghi?”

⁷ Me Iesu ghe liula me ghe uela etana va, “Voto aghelei, karika aue ukila ghaine, auena uvira mene kila.”

⁸ Me Pita ghe uela etana va, “Karikaaili umene pora kkeghi!”

Me Iesu ghe uela va, “Arova atam pora kkem, karika urooroo tani toka teeieghi.”

⁹ Saemon Pita ghe uela etana va, “Vau eteva, karika umene pora nonga kkeghi ta upora tee nimaghi me urughu eteva!”

¹⁰ Me Iesu ghe uela va, “Lo ateva ang ghe suusuula karika erooroo tani mene suusu, ta enim pora nonga kkena, me aue eraarangisana. Am raarangisana am, karika va am akapa.” ¹¹ Poli Iesu ghe kilakila va see aue etaue lao ta tau ngai ssateena atoa, liuna avalua o me ghe uela va, “Karika va am akapa raarangisana am.”

¹² Nau eteva ghe ruula tani pora kkeira, me ghe mene asaela unna aiaasae ngeleka ateva, me ghe toka siola nongina aillai inana ateva, me ghe uela etaira va, “Ngam tara kilala voto ngagheleila? ¹³ Am ue etaghi va kapuimim tisa ieghi me Vauimmi ieghi. Isaa o voto am asease etaghi masinaaili, ta koronna. ¹⁴ Arova aghi, vauimmi ieghi me tisa ieghi, me ngaporala kkeimim, am tee am pora kkeira mene katoa etaimim. ¹⁵ Ngaghaapasunga tau aatu voto am ghelei, am ghelei nongina ngagheleila. ¹⁶ Aghaaulia ngakoronna etaimim va tau ngai nongonongo anna ateva karika namuu ia ta vauna ateva, me tau ngai kasuaa inangari eteva karika tee enaanamuu ta lo ateva esungisungia. ¹⁷ Arova am kila isaa o voto me am ghelei, aue emasinaaili etaimim.

¹⁸ “Karika va aghaauliaa inangari oia etaimim akapa, ta poli akilakila lo atoa aghe suiteongainiemia, me llo Uru ngai Manga ateva ghe auliaala aue ekoronna. Ghe uela va, ‘Lo ateva enamanama teeieghi aue essa teeieghi.’

¹⁹ “Aghaaulia ngamuemue aalokoi llo oia, me nau aue elutu aue am aiesoaa etaghi va aghi ia o taumattu ngateva. ²⁰ Aghaaulia ngakoronna

13:2: Luk 22:3; Jon 13:27. **13:3:** Jon 3:35; 16:28. **13:10:** Jon 15:3; 6:64, 70-71. **13:14:** Mat 20:28; Luk 22:27. **13:15:** Plp 2:5; Kol 3:13; 1 Pita 2:21. **13:16:** Mat 10:24. **13:18:** Sams 41:9. **13:19:** Jon 14:29; 16:4. **13:20:** Mat 10:40.

etaimim va lo ateva eghaaghaa lo ateva aghe sungiela, eghaaghaaieghi, me lo ateva eghaaghaaieghi, eghaaghaa lo ateva ghe sungieghila.”

Iesu ghe auliaala voto aue elutu etana
(*Mat 26:20-25; Mak 14:17-21; Luk 22:21-23*)

²¹ Nau eteva Iesu ghe ruula tani auliaa isaa o inangari, nannaane ghe maatela me ghe siuailila euu, me ghe uela va, “Aghaaulia ngakoronna etaimim va kateva etaimim aue etaueghi lao ta nimaira tau ngai ssateeghi etoa.”

²² Aloira disaepolo atoa ghe kaakapa va ghe auliaa tee see, liuna avalua o me laghe aitara atokala. ²³ Me lo ateva disaepolo Iesu ghe ailousiangailiia ghe tokatoka akalakalanginaa ili ta Iesu. ²⁴ Saemon Pita ghe matamatai elao va ghe kolomi Iesu va see aue ghe ghelei isaa o voto ghe auliaa.

²⁵ Ia o disaepolo ateva ghe valaa lao sio ta Iesu me ghe kolomiela va, “Vau eteva, see aue eghelei isaa o voto?”

²⁶ Iesu ghe liula me ghe uela va, “Lo ateva aue aghasuu verete me ataula etana.” Me ghe asuula verete me ghe taula ta Jiudas, natuna ia Saemon Iskariot. ²⁷ Jiudas ghe ghaala isaa o inana me Satana ghe valaiela. Me Iesu ghe uela etana va, “Voto uanna tani ghelei, ughelei parasi.” ²⁸ Lo atoa laghe tokatoka tale ia o ninamanama atea laghe tam kilala malloeanina inangari Iesu ghe auliaa etana. ²⁹ Katoa laghe annaa va poli Jiudas ghe posoposo uneira viliki veu, o Iesu ghe sungisungia tani laa poli righi voto eaimonomosiaa tale nivelu eitaua ngateva, o tani laa tau righi voto ta lo atoa karika peiira. ³⁰ Jiudas ghe ghaala tuku verete ateva me ghe kupi ghoala. Ang ghe voala.

Iesu ghe taula ouna tana inangari niloeloe

³¹ Vara Jiudas ghe kasula me Iesu ghe uela va, “Ia oia Natuna ateva Taumattu ngateva ararina atea ange saela epona, me God tee ararina atea ange saela epona tale Natuna ateva Taumattu ngateva. ³² Arova ararina atea God esae epona tale Natuna ateva Taumattu ngateva, God nonga aue emene asaesae ararina atea Natuna ateva Taumattu ngateva, me isaa o voto aue eghelei parasi.

³³ “Kapughu aliki etoa! Karika oroi nau aue atoka teeiem, me ghaisa ngarighi am tiuaa tani paeaghi. Aghaauliaa llo nongina aghe auliaa ta ajiu etoa, ‘Karika am rooroo tani lao nongina ngalaolao.’

³⁴ “Ngatautau aatu ouna inangari niloeloe: elome etaimim am aielousi. Nongina aghi aghe aielousieiniemla, elome etaimim am tani aielousi. ³⁵ Arova elome etaimim va am aielousi, ila akapa aue la kila va am kapughu disaepolo iem.”

Iesu ghe uela va Pita aue eliu vilina etana
(*Mat 26:31-35; Mak 14:27-31; Luk 22:31-34*)

³⁶ Saemon Pita ghe kolomila Iesu va, “Vau eteva, eaa aue ulao?”

Iesu ghe liula me ghe uela va, “Karika urooroo tani lao nongina ngalaolao tale isaa oia nau. Auena aue uaimuli.”

³⁷ Pita ghe liula me ghe uela va, “Vau eteva, vaalua me karika arooroo tani usio tale isaa oia nau? Aghi aue amate ta polim.”

³⁸ Iesu ghe kolomiela va, “Uanna va aue umate ta mausighi? Aghaaulia ngakoronna etam va aue uaulia ngakasina kotoluaata va karika ukilaki-laieghi, me auena taita ateva paolo eaangari.

14

Iesu salana ia tani lao ta Tamane

¹ “Am rau mene alousiusi. Am aiesoaa ta God, me am aiesoaa tee etaghi. ² Tanganuena Tamaghi oroiannaaili voto tani toka etana, me ngalaolao tani aimonomosiaa isaa o voto aue kaluimim. Karika aue aghele auliaa arova isaa o voto kamena. ³ Poli ngalaolao tani aimonomosiaa tanganueimim, me aue amene sio ghaaiem, me am laa toka teeieghi tale voto ateva atokatoka etana. ⁴ Ngam ghe kilala salana atikirighi tani lao tale voto ateva ngalaolao etana.”

⁵ Me Tomasi ghe uela etana va, “Vau eteva, karika ami kilakila va eaa aue ulao. Vaalua aue ami kila salana atikirighi?”

⁶ Iesu ghe uela etana va, “Aghi salana aghi, koronna ieghi me maulue ieghi. Karika teva aue eroroo tani lao ta Tamaghi ta emae mua etaghi. ⁷ Arova ngam ghe kilaieghila, ngam ghe kilala Tamaghi. Etiitiuaa ghaine ngam kilaiela, me ngam ghe taraiela.”

⁸ Pilip ghe uela etana va, “Vau eteva, ami anna va uapasunga Tamam etaimami, me aue vira mene masina etaimami.”

⁹ Iesu ghe uela etana va, “Ei Pilip! Vaalua me ngaghe toka teeiemla oroi nau, me karika ughe kilaieghi? Lo ateva ang ghe taraieghila, ang ghe tarala Tamaghi. Vaalua me uue va, ‘Uapasunga Tamam etaimami?’ ¹⁰ Karika uaiesoaa va aghi ta Tamaghi, me ia etaghi? Inangari aghaauliaa etaimim karika nim nannaaghi, ta Tamaghi etokatoka etaghi, me ia eghelei isaa o niuungu. ¹¹ Am aiesoaa nau eteva aue va aghi ta Tamaghi, me ia etaghi. Arova karika, am annaa niuungu aghe gheleila me aue eakorokorongana uneimim niaikaaiaa. ¹² Aghaaulia ngakoronna etaimim va lo ateva eaiesoaa etaghi, isaa o niuungu aghelei ie tee aue eghelei me voto aue eghelei aue elau llo oia aghelei, ta poli ngalaa saesae ta Tamaghi. ¹³ Me saa voto am kolomi tale ararighi eteae aue aghelei. Tale ia o salana atikirighi, Natuna aue etau sae ararina atee Tamane. ¹⁴ Arova righi voto am kolomi etaghi, tale ararighi eteae, aue aghelei.”

Iesu ghe uela va aue etau sio Spirit Manga ateva

¹⁵ “Arova am aielousieinieghi, aue am nongo usilaa inangarighi aue va am ghelei. ¹⁶ Aue akolomi Tamaghi, me aue etau aatu mene kateva tau ngai sausi aue etoka teeiem nau ekapa atoa, ¹⁷ Spiriti eteva aue eapasunga voto koronna. Taumattu tale kosa ateva oia karika la rooroo tani ghaaia, poli karika la kilakilaia, me karika laghe taraiela. Me am, am kilakilaia, poli etokatoka teeiem, me auena aue etoka elome etaimim. ¹⁸ Karika aue anim kasu vuliem arova aliki raue vulu etoa; aue amene mae taraiem. ¹⁹ Karika aue emasau, me taumattu tale kosa ateva oia la ruu tani taraieghi, me am aue am taraieghi. Poli aghi maulue ieghi, am tee aue am maulue. ²⁰ Me ia o nau eteva aue am kila va aghi ta Tamaghi, me am etaghi, me aghi etaimim. ²¹ Lo ateva taumattu ekila inangarighi niloeloe me enongo usilaa, eaielousieinaghi. Me Tamaghi eaielousieinia, me aghi tee aue aghaelousieinia, me aue aghapasungainaghi etana.”

²² Mene kateva Jiudas (karika va Iskariot) ghe uela ta Iesu va, “Vau eteva, vaalua me aue uapasungainio nonga etaimami, me karika va taumattu tale kosa akapa ateva?”

14:3: Jon 12:26. **14:6:** Jon 11:25; Rom 5:1-2. **14:7:** Jon 8:19. **14:9:** Jon 12:45; Kol 1:15; Hib 1:3. **14:10:** Jon 12:49. **14:11:** Jon 10:38. **14:12:** Mak 16:19-20. **14:13:** Mat 7:7; Jon 15:16. **14:15:** Jon 15:10; 1 Jon 5:3. **14:16:** Jon 14:26; 15:26; 16:7. **14:17:** Jon 16:13. **14:20:** Jon 17:21-23.

²³ Iesu ghe liula me ghe uela etana va, “Lo ateva taumattu eaielousieinaghi, aue enongo usilaa inangarighi, me Tamaghi aue eaielousieinia, me aue angalu mae etana tani toka aitaaua teeia. ²⁴ Lo ateva etam aielousieinaghi, karika aue enongo usilaa inangarighi. Isaa oia inangari am nongonongo karika inangarighi, ta inangarina Tamaghi, ia ghe sungieghila tani sio.

²⁵ “Isaa oia inangari aghaauliaa nau atokatoka teeiem. ²⁶ Me Tau ngai sausi eteva, Spirit Manga ia, aue Tamaghi esungia tani sio tale ararighi eteae, aue eapasunga ngakapa voto etaimim me aue esausiem tani mene nnaa llo voto aghe auliaala etaimim. ²⁷ Luei eteva aghalokoia etaimim. Kalughu luei eteva ngatautau aatu etaimim. Lo ateva o luei karika nongina lo ateva luei kosa ateva etautau aatu. Am rau mene alousiusi me am matautu.

²⁸ “Ngam ghe nongola ngaghe auliaala etaimim va, ‘Aue akasu, me aue amene mae taraiem.’ Arova am ailousieinaghi, aue am ghele masimasi poli aue asae ta Tamaghi, ta poli Tamaghi namuu ia etaghi. ²⁹ Auena isaa o voto elutu, me anim aulia ngakasina alokoi kieimim, poli nau isaa o voto elutu, aue am aikaaiiaa etaghi. ³⁰ Karika aue aghaippooa ngaoroi teeiem, poli vau tapaa kosa ateva ange reerekata. Me karika righi sarasarakaniaane tani ghelei righi voto ta ngetaghi, ³¹ me aue taumattu tale kosa ateva la kila va aghaielousiaa Tamaghi, poli llo Tamaghi ghe auliaa tau mae sio agheelei.

“Am tingina saela me ita kasu.”

15

Iesu koronna atea uasa uaeni

¹ Iesu ghe mene uela va, “Aghi koronna atea uasa uaeni, me Tamaghi umana paa ngutana atingiu. ² Lo atikirighi tuuna etaghi etam kuukuneeaa righi uenenna, esaisai velua, me llo tuuna ekunekune, esaisai velu lutu llo tuuna karika masina, me eraarangisana tani mene kuneaa mene righi uenena. ³ Inangari aghe ppoaaala etaimim ghe gheleiemla ngam ghe raarangisanala. ⁴ Am toka etaghi me aue atoka etaimim. Laa ngai eteva karika aue righi uenenna arova etam tuutuu tale aina ateva. Nongina am, arova am tam toka etaghi, karika aue am kuneaa righi ue ngai.

⁵ “Aghi aina aghi me am laangina iem. Lo ateva etoka etaghi me aghi atoka etana, aue ekuneeaa oroi ue ngai. Poli karika urooroo tani ghelei teva voto arova karika ieghi. ⁶ Lo ateva taumattu karika etokatoka etaghi, aue la ghaa velua nongina la ghaaghaa velu laa ngai, me nau ange mmatela, la ghaaghaa me la tautau sae tale kuraa. ⁷ Arova am toka etaghi me inangarighi etoka etaimim, nau am kolomi righi voto, aue am ghaa. ⁸ Arova am kuneaa oroi ue ngai, aue la tau sae ararina atea Tamaghi, me am aue ekapughu disaepolo iem.

⁹ “Nongina Tamaghi ghe aielousieinaghila, aghi tee aghe aielousieinamla. Am toka tale ia o niaielousi eteva kalughu ia. ¹⁰ Arova am nongo usilaa inangarighi niloeloe, aue am toka tale aielousiaaghi eteva, nongina aghi aghe nongo usilaala inangarina niloeloe Tamaghi, me aghe tokatoka tale aielousiaane ateva. ¹¹ Aghannaaili va lo ateva nimasimasi kalughu ia etoka etaimim, me epasu tale maamauluaaimim. Liuna avalua o me aghaauliaa isaa oia inangari etaimim. ¹² Inangarighi niloeloe isaa avalua toko: am aielousiaa mene kateva elome etaimim nongina aghi aghe aielousieinamla.

¹³ Arova teva taumattu eaielousiangaili kapuna atoa me ghele tau velu maamauluaane tani sausila, ia o lo ateva ase niaielousi, namungaili ia elaulau ekapa mene kasina ase niaielousi. ¹⁴ Aue kapughu iem arova am ghelei voto aloeloeam etana. ¹⁵ Ia oia karika ngakolokoloam va tau ngai nongonongo anna iem, poli tau ngai nongonongo anna ateva etam kilakila voto vauna ateva eannaa tani ghelei. Ngakolokoloam va kapughu iem poli isaa akapa voto aghe nongola ta Tamaghi ngaghe aulia ngaotula etaimim. ¹⁶ Karika va am, am ghe suitoongainieghila, ta aghi aghe suitoongainiemla, me aghe tau aatu sio niuungu tani kasu, me am kuneaa oroi llo ue ngai etokatoka liu. Liuna avalua o me nau eteva am kolomi righi voto ta Tamaghi tale ararighi eteae, aue Tamaghi etau aatu. ¹⁷ Isaa o inangari niloeloe aghaauliaa etaimim: am aielousiaa mene kateva elome etaimim.

Taumattu tale kosa ateva aue la ssa tee disaepolo atoa

¹⁸ “Arova taumattu tale kosa ateva oia la ssa teeiem, am nim annaa va laghe ssa tee akasina teeieghila. ¹⁹ Arova kosa ateva oia tanganueimim tuungia, aue la ghele masieinam va kapuira iem, me poli ngaghe suitoongainamla tale kosa ateva oia, liuna avalua o me la sessa teeiem. ²⁰ Am annaa llo aghe auliaala etaimim va, ‘Tau ngai nongonongo anna ateva karika namuu ia ta vauna ateva.’ Arova laghe ghelei saasakiaa etaghi, aue la ghelei tee etaimim. Arova laghe nongo usilaala inangarighi, aue la ghele nongo usilaa tee inangariimim. ²¹ Aue la ghelei teeiem isaa o voto poli mausi ararighi eteae, ta poli karika la kilakila lo ateva ghe sungieghila tani sio. ²² Arova aghe tam sio mae tani auliaa inangari etaira, karika aue la ghele tara kila va gheegheleiaaira sesa, me ia oia karika la rooroo tani ue va la tam kilakila va gheegheleiaaira sesa. ²³ Lo ateva esessa teeieghi, esessa tee Tamaghi. ²⁴ Arova aghe tam toka teeilala me aghe tam gheleila niuungu elome etaira, nongina karika mene teva taumattu ghe gheleila emua arau, karika aue la ghele tara kila va gheegheleiaaira sesa. Me poli laghe tarala, liuna avalua o me la sessa teeingalua me Tamaghi. ²⁵ Isaa oia voto elutulutu tani asokoi inangari laghe pitila tale uneira inangari nipaopao, eue va, ‘Karika esuisui kkai tale teva voto me la nim sessaila etaghi.’

²⁶ “Nau tau ngai sausi eteva emae, aue eauliaa uunguaaghi etaimim. Aue asungia tani sio etaimim, ia o Spiriti eteva eaapasunga voto koronna, aue ekasu ta Tamaghi. ²⁷ Me am tee, aue am aulia ngaotueghi poli am ghe toka teeieghila nau aghe tiuaala uunguaaghi.

16

¹ “Aghaauliaa isaa o voto etaimim poli am rau mene oghi vulu aikaa-iaaimim. ² Aue la tiu veluem tale aleira ale nivelu eitauaa, me aue nau emaemae lo atoa la uvi emateam, aue la ghannaa va la ghelei uunguaane God. ³ Isaa o voto aue la ghelei etaimim poli karika la kilakilaiengalua me Tamaghi. ⁴ Aghaauliaa isaa o voto etaimim me nau isaa o voto etiuua tani lutu, aue am nnaa va ngaghe auliaala kieimim.

Uunguaane Spirit Manga ateva

“Aghe tokatoka teeiem, liuna avalua o me karika aghe aauliaa isaa o voto emua arau. ⁵ Me ia oia ngamene laa saesae ta lo ateva ghe sungieghila tani sio, me karika teva etaimim ekookolomieghi va, ‘Eaa ulao?’ ⁶ Nau

15:13: Jon 10:11; 1 Jon 3:16. **15:14:** Mat 12:50. **15:17:** Jon 13:34. **15:19:** Jon 17:14. **15:20:** Jon 13:16. **15:23:** Luk 10:16. **15:25:** Sams 35:19; 69:4. **15:26:** Jon 14:26. **16:2:** Mat 24:9; Luk 6:22; Jon 9:22. **16:3:** Jon 15:21.

ngaghaauliaa me ngam nongonongo isaa o inangari ngam nim aalousiusi. ⁷ Aghaaulia ngakoronna etaimim va emaamasina va akasu, poli arova atam kasu, tau ngai sausi eteva karika aue esio etaimim, me poli ngakasukasu aue asungia tani mae etaimim. ⁸ Nau eteva emae aue eghelei taumattu tale kosa ateva oia la kila amasina ssavoto me ghulughuluena me niaisakei. ⁹ Tale ssavoto, poli la tam aiesoaa etaghi, ¹⁰ me tale ghulughuluena, poli ngalaa saesae ta Tamaghi, me karika aue am mene taraieghi. ¹¹ Me tale niaisakei, poli vau tapaa kosa ateva oia ang ghe aisakeila, me ghe tam roola.

¹² “Oroiannaaili voto aghanna tani auliaa etaimim, me poli isaa oia nau karika aue am kila amasina. ¹³ Nau Spiriti eteva eaapasunga voto koronna aue emae, aue eauliaa voto koronna etaimim. Karika aue eauliaa righi voto nim nannaane. Aue eauliaa llo ghe nongola me aue eauliaa kieimim tale voto auena emae. ¹⁴ Aue easaesae ararighi eteae, poli aue eghaa inangarighi me eauliaa etaimim. ¹⁵ Isaa akapannaaili voto kanna Tamaghi, kalughu. Liuna avalua o me aue va, ‘Aue eghaa inangarighi, me eauliaa etaimim.’

Nialousiusi me nimasimasi

¹⁶ “Karika masauna arighi me aue am lungieghi, me karika aue emasau me aue am mene taraieghi.”

¹⁷ Me katoa tani kapuna disaepolo laghe aikolomieinila va, “Vaalua me eue va, ‘Karika masauna arighi me aue am lungieghi, me karika masau me aue am mene taraieghi,’ me eue tee va, ‘Alao ta Tamaghi?’” ¹⁸ Laghe aikolomieinila va, “Vaalua malloeana nau eue va ‘karika masauna arighi?’ Karika ita kilakila amasina llo eaauliaa.”

¹⁹ Iesu ghe kilakila saa voto ateva laghe anna tani kolomia. Liuna avalua o me ghe uela etaira va, “Ngauela va, ‘Karika masauna arighi me aue am lungieghi, me karika masau me aue am mene taraieghi.’ Isaa o llo am aikolomainiem etana? ²⁰ Aghaaulia ngakoronna etaimim va aue am ngala me am alousiusieili, me taumattu tale kosa ateva oia aue la masimasi. Me am, aue am alousiusieili, me alousiusiaaimim aue am mene masimasi etana. ²¹ Nau aliki eteva ange anna tani lutu, vause ateva ealousiusi poli ekilakila va nau nimmarikana ange rekatala, me nau aliki eteva elutulutu, eaikkaluaa nimmarikana ghe ghaala, poli emasimasi va aliki eteva ange lutula tale kosa ateva. ²² Ia o voto ateva nonginaaili am. Ia oia am aalousiusi me aue amene taraiem, me aue am masimasi. Lo ateva nimasimasi, karika teva aue eghaa velua etaimim. ²³ Ia o nau eteva karika aue am kolomieghi tale teva voto. Aghaaulia ngakoronna etaimim va Tamaghi aue etau aatu voto am kolomi tale ararighi eteae. ²⁴ Nau too ang ghe lao sio karika am ghe kookolomi righi voto tale ararighi eteae. Am kolomi me aue am ghaa me aue am pasu tale nimasimasi.

Iesu ghe apalala kosa ateva

²⁵ “Isaa o voto aghaauliaa etaimim tale inangari naimatoonga, me aue nau too emaemae, karika aue aghauliaa voto etaimim tale inangari naimatoonga. Aue aghaulia ngamasalikangaili Tamaghi etaimim, me aue am kila amasinaailia. ²⁶ Ia o nau eteva aue am kokkolomi tale ararighi eteae, me karika aue va aghi aue akolomi Tamaghi tani sausiem, ²⁷ poli Tamaghi tee eaielousieinam ta am, am ghe aielousieinaghila me am aiesoaa va aghi aghe tokatoka tee God, me aghe sio mae. ²⁸ Aghe kasula ta Tamaghi, me aghe sio mae tale kosa ateva oia, me aue amene kasu vuli kosa ateva oia tani mene sae ta Tamaghi.”

²⁹ Me kapuna disaepolo atoa laghe uela va, “Ngami vira mene ghaaghaa amasina inangarim, poli karika umene poppooaa inangari niaimatoonga. ³⁰ Ia oia ngami kilakila va ukilakila akapa voto, me karika teva aue ekolomio tale righi nikokkolomi, poli ukilakila akapa nannaaimami. Liuna avalua o me ami aiesoaa va ughe kasula ta God.”

³¹ Iesu ghe liula me ghe uela etaira va, “Angam vira aikaaiiaa etaghi? ³² Nau ange aakalakalaa me ange rekatala va aue la ghameti reerekatainam, me kateva kateva etaimim aue eilou lao tanganuena. Aue am ilou vulieghi me aue ekapa kapughu, me karika va aue ekapaaili kapughu, ta poli Tamaghi aue etoka teeieghi.

³³ “Aghe aauliaa isaa oia inangari etaimim, poli aghanna va am toka etaghi, me aue luei eteva etoka etaimim. Kosa ateva oia oroieili nimmarikana am ghaaghaa, me am rau mene sio asoasoa, poli ngaghe apalala voto tale kosa ateva oia.”

17

Iesu ghe pureaala kapuna disaepolo atoa

¹ Nau Iesu ghe ruula tani aippooaa me ghe taatara saela epona liu me ghe uela va, “Tamaghi, ange ghaala nau. Utau sae ararina ateaee natum, me natum tee etau sae ararim ateaee. ² Poli ughe tau lao sio ninamu ngateva etana tani aitaraa taumattu ngakapaaili, va aue etaula maulue ateva tokatoka liu ia ta lo atoa taumattu ughe taula lao sio etana. ³ Maulue ateva tokatoka liu ia, ia avalua toko, va taumattu ekilaio, va io God koronna io, me la kila tee Iesu Karisto ughe sungiela tani sio. ⁴ Aghe asaesaala ararim ateaee me sarasarakaniaam tale kosa ateva; ngaghe ruula niuungu ughe tau mae sio etaghi va aghelei. ⁵ Isaa oia Tamaghi, tale voto ateva utokatoka, utau mae ninamu ngateae ghe tokatoka teeieghi emua arau, nau kosa ateva karika ghe lutu.

⁶ “Ngaghe aulia ngaotula ararim ateaee tale taumattu tale kosa ateva oia ughe taula mae sio etaghi. Kapum ila me ughe taula mae sio etaghi, me ngila ghe nongo usilaala inangarim. ⁷ Ia oia ngila ghe kilala va isaa akapa voto ughe tau mae sio etaghi kalum. ⁸ Ngaghe auliaa tau lao sio inangari ughe auliaa tau mae sio etaghi me ngila ghe ghaala, me ngila ghe akoronnaailila va aghi aghe kasula etam me ngila ghe aikaaiiaala va io ughe sungieghila. ⁹ Akookolomi sae mausiira. Karika akookolomio sae tale taumattu ngakapa atoa tale kosa ateva oia. Akookolomio sae mausi taumattu ughe tau mae sio, poli kapum ila. ¹⁰ Taumattu ngakapa kapughu, kapum tee, me lo kapum kapughu tee ila, la ghaapasunga masi gheeleiaaghi. ¹¹ Me ia oia karika aue amene toka tale kosa ateva ta ngamene laa saesae etam. Me ila ngila tokatoka. Tamaghi manga io, uaitarainila tale ararim ateaee sarasarakana ia, ia o ararim eteaee ughe taue mae sio etaghi, me aue ekateva nonga ila, nongina italua ekaakateva nonga italua. ¹² Nau aghe tokatoka teeila, aghe aitaranainila tale sarasarakaniaa ararim ateaee, ia o arari eteaee ughe taue mae sio. Aghe aitarainilala, karika teva ghe rauela, llo nonga ateva taumattu elaolao tale salana nitturuu ghe rauela. Isaa avalua o me inangari tale Uru ngai Manga ateva ghe koronnala.

¹³ “Ia oia ngamene mae saesae etam. Isaa oia voto aghaauliaa tale nau oia atokatoka tale kosa ateva, me aue la ghaa kalughu nimasimasi, me aue epasu tale urunguitaniira. ¹⁴ Aghe auliaa tau lao sio inangarim, me

taumattu ngatoa tale kosa ateva oia esessaila etaira, poli karika va mene taumattu tale kosa ila, nongina aghi karika va taumattu tale ia oia kosa ateva. ¹⁵ Karika va akookolomio sae va ughaa vella tale kosa ateva oia. Akookolomio tani aitarainila tale sesa taumattu ngateva. ¹⁶ Karika va taumattu tale kosa ila, nongina aghi karika va taumattu tale kosa ieghi. ¹⁷ Uamangaila tale llo voto koronna; poli inangarim koronna. ¹⁸ Nongina ughe sungieghila tani sio tale kosa ateva, aghi ngamene sungisungila tani lao akapa see tale kosa ateva. ¹⁹ Mausiiira me aghe tau ekapa aatu sio maamauluaaghi etam, me ila tee aue la tau ekoronna lao maamauluaaira etam.

²⁰ “Karika apuupure nonga etaira, ta apuupure tee ta lo atoa aue la ghaikaaiaa etaghi nau eteva la nongo inangariira. ²¹ O Tamaghi, apuupure etaira va ekateva nonga ila, nongina io utokatoka etaghi, me aghi etam. Aghaloanna va ila tee la toka etaitalua, me taumattu ngatoa tale kosa ateva oia aue la ghaikaaiaa va io ughe sungieghila. ²² Ughe tau mae sio sarasarakana etaghi, me aghi, ngaghe tau lao sio isaa o sarasarakana etaira va aue ekateva nonga ila, nongina italua ekaakateva nonga italua, ²³ aghi etaira me io etaghi, me aue ugheleila la tani kateva nonga ila, me aue taumattu tale kosa ateva oia la kila va io ughe sungieghila tani sio, me uailousieinila nongina uailousieinaghi.

²⁴ “Tamaghi, aghaloannaaili va taumattu ughe tau mae sio etaghi, la toka teeieghi tale masaliki eteae alaa toka etana, me aue la tara sarasarakana ughe tau mae sio etaghi nau ughe tam ghelei kosa ateva, poli ughe ailousieinaghi.

²⁵ “O Tamaghi, eeleiaam ghulughuluena, me taumattu tale kosa ateva la tam kilakilaio, ta aghi akilakilaio, me kapughu etoa la kilakila va io ughe sungieghila tani sio. ²⁶ Aghe auliaala me apasungaala eeleiaam etaira, me aue amene auliaa etaira. Me aue lo ateva niaielousi ugheleia etaghi aue etoka tee etaira, me aghi tee atoka etaira.”

18

Laghe kunela Iesu

(Mat 26:47-56; Mak 14:43-50; Luk 22:47-53)

¹ Nau eteva Iesu ghe ruula tani looloo sae, ia me kapuna disaepolo atoa laghe laula tale ateo arighi Kidron ta ngetana, me laghe lao sio tale paa ngutana atingiu.

² Jiudas, ia o taumattu ngateva aue etaula Iesu ta tau ngai ssateena atoa, ghe kilakila nongina Iesu ghe lao sio, poli oroi nau ia me kapuna disaepolo atoa laghe laolao tale ia o voto ateva. ³ Jiudas ghe lao sio tale paa ngutana atingiu tee soldia ngatoa me polisi etoa, namuu ta pristi etoa me Paresi etoa laghe sungilala. Laghe sausau lam me usulu me voto aiaaiuvii.

⁴ Iesu ange kila akapala voto aue elutu tale maamauluaane. Liuna avalua o me ghe tingina ghoala etaira me ghe uela etaira va, “Am paepae see?”

⁵ Laghe liula me laghe uela va, “Ami paepae Iesu aNasareti ia.”

Me Iesu ghe uela va, “Aghi oia.” Jiudas, ia o ghe tau lao sio Iesu, ghe tiitingina teeila. ⁶ Nau eteva ghe ruula tani ue va, “Aghi oia,” me laghe kaakatungaala viliira etapaa kosa.

⁷ Me Iesu ghe mene kolomilala va, “Am paepae see?”

Me laghe uela va, “Iesu aNasareti ia.”

⁸ Iesu ghe liula me ghe uela etaira va, “Ngaghauliaala etaimim va aghi oia. Arova am paepaeaghi, am tau velu lo atoa toko, me la kasu.” ⁹ Isaa o voto ghe lutula me inangari ghe aulia ngakasina alokoila ghe koronnala va, “Karika teva ughe tau mae sio etaghi ghe rauela.”

¹⁰ Saemon Pita ghe sausau baenata ateva. Ghe kapeala, me ghe patoala kapuna tau ngai nongonongo anna ateva Namu ngateva ta pristi etoa, me ghe sai patela talingane ativilau tale pai muenna atelange. Ararina ateaie ia o tau ngai nongonongo anna ateva ta Malkus.

¹¹ Me Iesu ghe uela ta Pita va, “Kaaila baenata ateva tale aikakkaaina ateva. Uannaa va karika arooro tani ropi kapa ateva Tamaghi ghe taue mae sio?”

*Laghe laoa sio Iesu ta Annas
(Mat 26:57-58; Mak 14:53-54; Luk 22:54)*

¹² Me kapuira namu ngateva soldia me kapuna soldia ngatoa me polisi etoa me kapuira namu ngatoa ajiu etoa laghe kunela Iesu, me laghe irila nimana. ¹³ Me laghe laoa ngakasinaie sio mua ta Annas. Annas alumuna ta Kaeapas, Kaeapas namu ia ta pristi etoa tale ia o ninamanama ateaie. ¹⁴ Kaeapas ia o taumattu ngateva ghe uela ta ajiu etoa va emaamasina arova kateva nonga taumattu ghele mate tani ghaa liuira akapa taumattu ngatoa.

*Aitiutiu ta Pita tani ue va etam kilakila Iesu
(Mat 26:69-70; Mak 14:66-68; Luk 22:55-57)*

¹⁵ Saemon Pita me mene kateva disaepolo lalu ghe aimuli tee Iesu. Poli namu ngateva tana pristi ekilakila ia o disaepolo ateva, liuna avalua o me ia o disaepolo ateva ghe sso teela Iesu elome tale unna valavala ateaie ia o namu ngateva tana pristi. ¹⁶ Me Pita nonga ghe toitoi eleka tale atamana ateaie. Ia o disaepolo ateva, namu ngateva tana pristi ghe kilakilaia, ghe oghi ghoala, me ghe aippoaa teela aliki vause ateva ghe aaitoiaa atamana ateaie, me ghe kolola Pita, me lalu ghe kupi ssola.

¹⁷ Me aliki vause ateva ghe aaitoiaa atamana ateaie ghe uela ta Pita va, “Io tee kateva kapuna disaepolo ia okae taumattu ngateva, va?”

Pita ghe liula me ghe uela va, “Karika va aghi tee.”

¹⁸ Poli kkaili eteva me tau ngai nongonongo anna atoa me polisi etoa laghe aisokosokolaala kura ateaie, me laghe maamaruu. Pita tee ghe tiitingina teeila tani maruu.

*Namu ngateva tana pristi ghe kolomila Iesu tale nikokkolomi
(Mat 26:59-66; Mak 14:55-64; Luk 22:66-71)*

¹⁹ Namu ngateva tana pristi ghe kolomila Iesu ta kapuna disaepolo atoa me tale voto ghe aapasunga.

²⁰ Iesu ghe liula me ghe uela va, “Aghe aapasunga voto ta mata ngoroi etoa. Aghe aapasunga tale ale nivelu eitauaa me tale ale manga, isaa o voto ajiu etoa laghe mae veluvelu eitauaa etana. Karika aghe aisulia righi voto.

²¹ Vaalua me ukokolomieghi? Ukolomi lo atoa laghe nongonongoaghi, poli ila la kilakila sa ateva aghe aaulieinia.”

²² Nau ta Iesu ghe aulia ngavaluela o, me kateva polisi ghe tiitingina akalakalaa etana ghe posalaiela me ghe uela va, “Vaalua me uliuliu ase inangari eteva o ta namu ngateva tana pristi?”

²³ Iesu ghe liula me ghe uela va, “Arova aghauliaala righi voto sesa, uaulia ngaotu, me arova aghauliaa voto koronna, vaalua me uposalaieghila?”

²⁴ Me Annas ghe sungiela va elao ta Kaeapas, ia namuu ia ta pristi etoa. Iriiri ia me laghe laoinie sio.

*Pita ghe mene uela va karika ekilakila Iesu
(Mat 26:71-75; Mak 14:69-72; Luk 22:58-62)*

²⁵ Saemon Pita ghe tingina maamaruu me laghe kolomiela va, “Io tee kateva kapuna disaepolo, va?”

Ghe liula me ghe uela va, “Karika va aghi tee.”

²⁶ Kateva kapuna tau ngai nongonongo anna namu ngateva ta pristi etoa, kapuna ia ia o taumattu ngateva Pita ghe patoa vella talingane atelange, ghe uela va, “Aghe tara teeiola tapaa ngutana nau eteva am me ia, va?” ²⁷ Me Pita ghe mene uela va, “Karika.” Me paolo ateva taita ia ghe aangarila.

*Laghe laooa sio Iesu ta Paelat
(Mat 27:1-2, 11-14; Mak 15:1-5; Luk 23:1-5)*

²⁸ Vara me aJiu etoa laghe ghaala Iesu ta Kaeapas, me laghe laoinie sio tanganuena Gavana ngateva. Elue talaua poopooa. Laghe tam aloanna tani kupi sso tanganuena, poli laghe rau gheleila va laghe tam raarangisana, poli laghe aloanna va la usi tani namanama ta Pasova ngateae. ²⁹ Paelat ghe kupi ghoa mae me ghe uela va, “Vaalua me am maeaa sio taumattu ngateva oia va eaisakei?”

³⁰ Me laghe uela va, “Arova karika ghe ghelei righi sesa voto, karika aue ami ghele maeainia etam.”

³¹ Me Paelat ghe uela etaira va, “Am ghaaiela, me am laa ghelei niaisakei etana nongina uneimim lo eaauliaa.”

Me aJiu etoa laghe liula me laghe uela va, “Karika erooroo va ami, ami uvi emate teva taumattu.” ³² Isaa o voto ghe lutula me inangarina Iesu ghe aaimatoonga ase nimate atea aue eghaaia ghe lutu ekoronnala.

³³ Paelat ghe mene kupi ssola tale ale ateva me ghe uela va la kolo mae Iesu, me ghe kolomila Iesu va, “Io kapuira kingi io aJiu etoa?”

³⁴ Me Iesu ghe kolomiela va, “Nannaam llo ona, o toa laghe auliaa tau aatu sio etam?”

³⁵ Paelat ghe liula me ghe uela va, “Vara aJiu eghi? Kapum atoa me namuu ta pristi etoa la maeainio sio etaghi. Sa ateva ughe gheleiela?”

³⁶ Iesu ghe uela va, “Ararimangalighi eteva karika va pei tale kosa ateva oia. Arova pei tale kosa ia, aue kapughu tau ngai nongonongo anna atoa la ghele aiuuvu tani ghelei runga aJiu etoa, me karika aue la ghele kuneieghi. Me ia oia, ararimangalighi eteva karika pei tale kosa ateva ia.”

³⁷ Paelat ghe uela va, “O io kingi io, va?”

Me Iesu ghe uela va, “Uaulia ngakoronna tani ue va aghi kingi eghi, poli mausina avalua o me aghe lutula, me aghe sio mae tale kosa ateva tani aulia ngaotu voto koronna. Lo atoa tale pai koronna ativilau, la nongonongo usilainaghi.”

³⁸ Paelat ghe kolomiela va, “Saa ia koronna ateva voto?”

Ghe aulia ngavaluela o me ghe ghoala eleka nongina aJiu etoa, me ghe uela va, “Karika ngatarala righi voto esuisui kkai va sesa voto ghe ghelei.

³⁹ Kateva ase voto agheeleia nau Pasova, atautau velu kateva taumattu etokatoka tale ale mata voovoo ekupikupi ghoa. Am aloanna va atau velu kapuimim kingi eteva aJiu etoa?”

⁴⁰ Laghe ovaova anamuu tani liu va, “Karika mene ia! Utau velu Barabas!” Barabas tau niaiuvii ia.

19

Paelat ghe uela va la uvi emate Iesu

(Mat 27:15-31; Mak 15:6-20; Luk 23:13-25)

¹ Me Paelat ghe uela va la ghaa Iesu me la uetaia. ² Me soldia ngatoa laghe navitaala uasa rorroana tani ghelei unna kou nguru eteva, me laghe atokaie saela ta uruna, me laghe amolumolueta tale aiaasae ateva ghuaghuanna ia. ³ Laghe laolao akalakalaa etana me laghe ue va, “Ei, kapuira kingi eteva aJiu etoa!” Me laghe pooposala pasipasi matane.

⁴ Paelat ghe mene kupi ghoala me ghe uela ta aJiu etoa va, “Am tarala, ngamene aatinginaie ghoa etaimim tani auliaa kieimim va karika ngatarala righi voto esuisui kkai va sesa voto ghe ghelei.” ⁵ Nau ta Iesu ghe kupi ghoa mae, ghe aatoka kou nguru eteva rorroana ia me ghe aasae aiaasae ateva ghuaghuanna ia. Me Paelat ghe uela etaira va, “Taumattu ngateva ie toko, am taraiela.”

⁶ Nau eteva namuu ta pristi etoa me polisi etoa laghe taraiela, laghe ovaova atingina tani ue va, “Esaе vukala tale aikotoo, esaе vukala tale aikotoo!”

Me Paelat ghe uela va, “Am ghaaiela, me am laa ghavukalaie sae tale aikotoo. Ta ngetaghi, karika ngatarala righi voto sesa ghe gheleila.”

⁷ AJiu etoa laghe liula me laghe uela va, “Tale uneimami inangari nipaopao, eauliaa va etani mate, poli eue va Natuna ia God.”

⁸ Nau Paelat ghe nongola isaa o inangari, maamatautuaane ghe mene lao tee sio, ⁹ me ghe mene kupi ssola tanganue Gavana ngateva, me ghe kolomila Iesu va, “Eaa ughe kasula?” Me Iesu karika ghe liula unna nikokkolomi eteva. ¹⁰ Me Paelat ghe uela va, “Karika uanna tani sama teeieghi, va? Karika ukilakila va aghi matuutuliena aghi tani auliaa, me aue ughele kasu, o la ghele avukalaio sae tale aikotoo?”

¹¹ Iesu ghe liula me ghe uela va, “Karika aue ghele righi sarasarakaniaa inangarim ta ngetaghi arova God epona liu ghe tam tau aatu sio. Liuna avalua o me lo ateva etautauoghi atu etam, kanna ssavoto elaulau kalum tani ssavoto, me namungaili.”

¹² Ghe tiuaala o, Paelat ang ghe paepae salana vaalua tani ghelei, me etau velu Iesu me ekasu, me la rau mene uvi ematea. O me karika ta aJiu etoa laghe ovaova atingina, me laghe ue va, “Arova utau velua va ekasu, karika kapuna io Siisa. Poli lo ateva taumattu eue va kingi ia, ia tau ngai ssateena ia Siisa.”

¹³ Nau Paelat ghe nongola isaa o voto, ghe kupiaa ghoa mae Iesu, me ghe toka siola tale aitokatoka ateva aighelei niaisakei ia, tale voto ateva eleka la kolokoloa va “Atu ia”, me tale inangari nge Aramaik la ue va “Gabbata”.

¹⁴ Ia o nau eteva laghe aimonomosiaa Pasova ngateva, me sinaka ateva ange tokatoka polaki,* me Paelat ghe uela ta aJiu etoa va, “Kapuimim kingi eteva toko!”

¹⁵ Laghe ovaova atingina me laghe ue va, “Kasueiniela! Kasueiniela me elaa vukala tale aikotoo!”

Me Paelat ghe kolomilala va, “Alaa ghavukala sae kapuimim kingi eteva tale aikotoo?”

Me namuu ta pristi etoa laghe liula me laghe uela va, “Karika mene teva kapuimami kingi, ta nim Siisa nonga.”

19:2: Luk 23:11. **19:9:** Mat 27:12. **19:11:** Jon 10:18; Apos 2:23; Rom 13:1. **19:12:** Luk

23:2; Apos 17:7. * **19:14:** sinaka ateva ange tokatoka polaki Tale inangari nge Grik, nongina aiaaghaonoma (6) aoa ngateva.

¹⁶ Liuna avalua o me Paelat ghe taue lao sio etaira va la laa ghavukalaie sae tale aikotoo.

Laghe nili evukala saela Iesu tale aikotoo
(*Mat 27:32-44; Mak 15:21-32; Luk 23:26-43*)

Me laghe ghaala Iesu me laghe kasueiniela. ¹⁷ Ghe saula unna aikotoo ateva me ghe kupi ghoala, me ghe lao sio tale voto ateva arova Riu uru taumattu ngateva, tale inangari nge Aramaik la aseasea va Golgota. ¹⁸ Tale ia o voto ateva laghe nili evukala saela Iesu tale aikotoo ateva, ia me mene ghalua taumattu, kateva ta kativilau, me kateva ta mene kativilau, me Iesu elome.

¹⁹ Paelat ghe aimonomosiaala inangari ghe pitila, me laghe nili evukala tee saela tale aikotoo. Inangari isaa avalua toko va, "Iesu aNasareti ia, kapuira kingi ia aJiu etoa." ²⁰ Oroil ila aJiu etoa laghe ritila isaa o inangari, poli voto ateva laghe avukalala Iesu etana kalakalangina ia tale masaliki taatara, me inangari laghe pitila tale inangari nge Aramaik, Latin me Grik. ²¹ Namuu ta pristi etoa aJiu ila laghe lao sio tani tara Paelat, me laghe uela etana va, "Urau mene piti va uue va 'Kapuira kingi ia aJiu etoa,' ta upiti va 'Ghe ue va, 'Aghi kingi ieghi ta aJiu etoa.' ' "

²² Paelat ghe liula me ghe uela va, "Llo ngapitila, etoka nongina ngapitila."

²³ Soldia ngatoa laghe ruula tani nili evukala sae Iesu tale aikotoo, me laghe ghaala ghinnanina, me laghe aikoitaa ghe rooaala taumattu ghaata. Me aiaasae ngelome nonga ateva ghe oghila, me laghe tarala va karika laghe saikiela tale oroi tuku kalio, ta laghe gheleielale tale tuku kateva nonga kalio, karika saasaiki ia.

²⁴ Liuna avalua o me soldia ngatoa laghe uela va, "Ita rau mene rasia, ta ita anamisi tani kila va see aue eghaaia."

Isaa o voto ghe lutula tani asokoi inangari Uru ngai Manga ateva ghe aulia ngamuemua alokoila va,

"Aue la ghaikoita uneghi aiaasae ngelome ateva etaira,
me aue la anamisi tani kila va see eghaa uneghi koloso ateva."
Soldia ngatoa laghe ghelei evaluela o.

²⁵ Kinna ghe tiitingina akalakalangina tale aikotoo ateva Iesu ghe vuuvukala etana, ia me nengane vause ateva kinna, me Meri vausenna ia Klopas, me mene kateva Meri aMakdala ia. ²⁶ Nau eteva Iesu ghe tarala kinna me disaepolo ateva ghe ailousiangailiia, lalu ghe tiitingina akalakalaa, me ghe uela ta kinna va, "Kinaghi, ierai o natum ia." ²⁷ Me ta disaepolo ateva ghe uela va, "Kinam o." Ghe tiuaala ta ia o nau eteva ia o disaepolo ateva ghe ghaaiela me ghe laoainie sio tanganuena.

Matemateaaane Iesu
(*Mat 27:45-56; Mak 15:33-41; Luk 23:44-49*)

²⁸ Nau eteva Iesu ghe kilala va isaa akapa voto ang ghe ruula, me tani ghelei voto Uru ngai Manga ateva ghe auliaala ekoronna, ghe uela va, "Aloghu etiulu ange kangngatala." ²⁹ Aikaai uaeni kaakaalina ghe tokatoka. Liuna avalua o me laghe asuula tuku spans ateva me laghe tueiela tale tuu ngai eteva isopi ia, me laghe ssueinie saela ta paane Iesu. ³⁰ Nau Iesu ghe ropila uaeni kaakaalina, me ghe uela va, "Ngaruu ekapala uunguaaghi!" Me ghe tturrula, me ghe tau vella maamauluaane.

Soldia ngateva ghe soala kativilau ta Iesu

³¹ Ia o nau eteva nau niaipanipaniaa ia, me aue ghe pai sae nau manga ia. Poli aJiu etoa laghe tam aloanna va vilikiira ghe vukala tale nau manga ateva tale aikotoo, liuna avalua o me laghe kolomila Paelat va la paru kotokotoo kkeira, me la ghaa velu sio vilikiira. ³² Soldia ngatoa laghe lao sio tale aitiutiu eteva taumattu, me laghe paru kotoola kekena, me laghe mene lao sio ta mene kateva ta ilalua o taumattu ngalua laghe avukala teeilalue saela me Iesu. ³³ Nau eteva laghe mae sio ta Iesu va laghe tarala va ang ghe matela, karika laghe paru kotoola kkena. ³⁴ Kateva soldia ghe soala kativilau ta Iesu tale vaalau eteva, me arovaeaata ta rae me manu ghe akalala. ³⁵ Lo ateva taumattu ghe tarala eaauliaa voto ghe tarala, me inangarina koronna. Ekilakila va voto eaauliaa koronna, me aue am aikaaiaa. ³⁶ Isaa o voto ghe lutula tani ghelei inangari tale Uru ngai Manga ateva laghe aulia ngalokoila ekoronna va, “Karika aue la paru kotoo teae riuna.” ³⁷ Me mene kasina inangari tale Uru ngai Manga ateva ghe uela va, “Aue la tara lo ateva taumattu laghe soaiela.”

Laghe kaiaala Iesu

(Mat 27:57-61; Mak 15:42-47; Luk 23:50-56)

³⁸ Vara me Josep, tanguena tale masaliki taatara atea eArimatia, ghe lao sio tani kolomi Paelat va ghe ghaa Iesu ang ghe matela. Josep kateva kapuna disaepolo Iesu, me ghe aaisulia poli ghe maamatauta aJiu etoa. Paelat ghe uela va eghaaia, liuna avalua o me Josep ghe lao sio tani ghaa Iesu me ghe kasueiniela. ³⁹ Me Nikodimas tee ghe mae sio. Ia, ia o taumattu ngateva ghe lao sio tani tara Iesu eleivoo. Nikodimas ghe ghaa lao sio voto masi ngusungusuaane la ghelei tale murr me aloi laghe kao aitauaala, maamataniaane erooroo kotolungaulu ghaata (34) kilogram. ⁴⁰ Lalu ghe ghaala Iesu me lalu ghe rariaala voto masi ngusungusuaane, me lalu ghe sumuela tale masi kalio, nongina aJiu etoa laghe ghelei. ⁴¹ Voto ateva laghe avukala saela Iesu etana tale aikotoo, utana atingiu ta ngetana, me liengani niaikkaia ngateae ouna ia etana, karika laghe alokoi teva taumattu ta ngetana. ⁴² Me poli nau niaipanipaniaa ia tale nau manga ateva, me liengani niaikkaia ngateae kalakalangina ia, laghe alokoila Iesu tale ia o voto ateva.

20

Iesu ghe totula tale nimate

(Mat 28:1-10; Mak 16:1-8; Luk 24:1-12)

¹ Elue taluaa poopooa tale aitiutiu eteva nau tale uiki, nau ghe tam pai emasina, Meri aMakdala ia ghe ssola tale liengani niaikkaia ngateae, me ghe tarala va ngeila ghe atakiri vella atu eteva tale atamani liengani niaikkaia ngateae. ² Liuna avalua o me Meri ghe ilou lao sio ta Saemon Pita me lo ateva disaepolo Iesu ghe ailousiangailia, me ghe uela etairarua va, “Ngeila sau vella Vau eteva tale liengani niaikkaia ngateae, me karika ngami kilala va eaa ngeila alokoila!”

³ Liuna avalua o me Pita me mene kateva disaepolo ngilalu ghe laolao tale liu eteva. ⁴ Lualua akapa lalu ghe iilou, me kateva etairarua ghe ilou emuemuela ta Pita, me ghe laa sso rekata akasina. ⁵ Ghe tturruaala tani taatara sso, me ghe tarala kalio laghe sumuela etana, me karika ghe kupi ssola. ⁶ Vara me Saemon Pita ghe aaimuli etana ghe rekatala me ghe kupi ssola tale liengani niaikkaia ngateae me ghe tara alokoila kalio ghe asoaso.

⁷ Me lo atiulu kalio laghe sumla uruna ateva etana ghougheu ia, me ghe asoaso ppaee. ⁸ Vara me ia o disaepolo ateva ghe rekata akasinala ghe kupi ssola, ghe tarala isaa o voto me ghe aikaaiaala. ⁹ Karika aloira ghe maamasaanga llo Uru ngai Manga ateva ghe auliaala va Iesu aue emene totu tale nimate.

Iesu ghe rekataala ta Meri aMakdala ia
(Mak 16:9-11)

¹⁰ Me disaepolo alua lalu ghe lao sio nongina laghe tokatoka, ¹¹ me Meri ghe tingina ngangngala eleka tale liu eteva. Ghe ngangngala, me ghe tturruaala tani taatara sso elome tale liengani niaikkaia ngateae, ¹² me ghe tarala ensolo alua tale usousoana ghinna lalu ghe tokatoka nongina Iesu ghe asola, kateva ta komo ghuruna, me kateva ta komo kkena.

¹³ Me lalu ghe kolomiela va, "Vause ateva, vaalua me ungangngala?"

Meri ghe liula me ghe uela va, "Ngeila sau vella Vaughu eteva, me karika akilakila va eaa ngeila alokoiela." ¹⁴ Ghe aauliaa llo me vara ghe kiriela, me ghe tarala Iesu ghe tiitingina, me karika ghe kilakila va Iesu etana.

¹⁵ Me Iesu ghe uela etana va, "Vause ateva, vaalua me ungangngala, me upaepae see?"

Meri ghe annaa va tau ngai toi utana ia, ghe liula me ghe uela va, "Namu ngateva, arova io ughe ghaaiela, uauliaa va eaa ughe alokoiela me alaa ghaaia."

¹⁶ Iesu ghe uela etana va, "Meri."

Ghe kiriela me ghe uela va, "Rabboni!" (Inangari nge Aramaik, malloeana va "Tisa".)

¹⁷ Iesu ghe uela va, "Urou mene posoaghi, poli karika a ghe sae ta Tamaghi. Lao sio me ulaa ghauliaa ta nengaghi etoa va, 'Ngalaa saesae ta Tamaghi me Tamaimim teeia, me kapughu Goto ia me am tee kapuimmi ia.' "

¹⁸ Meri aMakdala ia ghe laooa sio masi kiukiu ta disaepolo atoa, me ghe uela va, "Aghe tarala Vau eteva!" Me ghe auliaala inangari Iesu ghe auliaala etana.

Iesu ghe rekataala ta kapuna disaepolo atoa
(Mat 28:16-20; Mak 16:14-18; Luk 24:36-39)

¹⁹ Elo alaina ateva aitiutiu eteva nau tale uiki, nau disaepolo atoa laghe lao aitauaa sio, me laghe aikavati runga poli laghe maamatauta ajiu etoa, Iesu ghe rekataala me ghe tinginala elome etaira, me ghe uela va, "Luei etoka etaimim." ²⁰ Ghe aulia ngavaluela o me ghe apasungaala nimane me lo ativilau pai laghe soaiela. Disaepolo atoa laghe masimasi etinginala nau laghe tarala Vauira ateva.

²¹ Me Iesu ghe mene uela va, "Luei etoka etaimim. Nongina Tamaghi ghe sungieghila, aghi ngamene sungisungiem." ²² Ghe aulia ngavaluela o, me ghe inoaa tau lao sio etaira me ghe uela va, "Am ghaa Spirit Manga ateva. ²³ Arova am kkaluaa sesa gheeleiaaira mene katoa, aue isaa o voto aue ekapa, me arova am tam kkaluaa, isaa o voto karika aue ekapa."

Iesu ghe rekataala ta Tomasi

²⁴ Ia o nau eteva Iesu ghe rekataala ta disaepolo atoa, Tomasi (la kolokoloa va Palue ia), kateva ta kasangaulu ghalua (12) disaepolo, karika ia. ²⁵ Liuna avalua o me katoa tani disaepolo laghe uela etana va, "Ami tarala Vau eteva!"

Me Tomasi ghe uela va, “Arova atani tara liu nili ta nimane, me atuli liu nili ta nimane tale vuuvuu nimaghi, me aposo lo ativilau pai laghe soaiela, aue avira mene aikaaiaa.”

²⁶ Ghaitu (7) nau ghe lange sio me disaepolo atoa laghe mene tokatoka tale ale ateva, ila me Tomasi, me laghe aaikavati runga, me Iesu ghe tinginala elome etaira me ghe uela va, “Luei etoka etaimim.” ²⁷ Me ghe uela ta Tomasi va, “Posola toko, me utara nimaghi. Ssuaa mae sio nimam, me uposo lo ativilau pai laghe soaiela etaghi. Erau mene ghalua nannaam, unim aiesoaa.”

²⁸ Tomasi ghe uela etana va, “Vaughu io me kapughu Goto io!”

²⁹ Me Iesu ghe uela etana va, “Poli angu taraieghila, uaaiesoaa. Niarangise ta lo atoa karika la taatara, me la nim aiesoaa.”

³⁰ Iesu ghe gheleila oroi mene kasina niaimatoongana ta mataira disaepolo atoa, me karika aghe pitila tale ia oia vuku eteva. ³¹ Me llo oia aghe pitila va am aiesoaa etana va Iesu Mesaea ia, me Natuna ia God, me nau am aiesoaa, aue am ghaa maulue tale ararina atea.

21

Ghaitu (7) disaepolo laghe tarala Iesu

¹ Vara me Iesu ghe mene rekataala ta kapuna disaepolo atoa tale manu talia ngateae eTaiberias. Ghe rekataala etaira avalue toko va: ² Saemon Pita, Tomasi (la kolokoloa va Palue ia), me Nataniel aKena ia ta pai nge Galilii, me natuna taita alua Sebedi, me mene ghalua tana disaepolo laghe mae aitauea sio. ³ Me Pita ghe uela etaira va, “Aghoa luku.” Me laghe uela etana va, “Ami usio.” Liuna avalua o me laghe saesaela tale paanaka ateva, me laghe ghoala tani luku, me ia o voo ngateva, karika laghe lukula righi kko.

⁴ Elue talua poopooa me laghe tarala Iesu ghe tiitingina elosamarra, me karika laghe tara kilaiela.

⁵ Ghe ue ghoa etaira va, “Kapughu aliki etoa, am ghaala righi kko?”

Me laghe ue sso va, “Karika.”

⁶ Ghe uela etaira va, “Am velu uenaimim uvena atea tale pai muenna ativilau tale olimoim paanaka ateva, me aue am ghaa righi kko.” Nau laghe gheleila isaa o voto karika ngila ghe rooro tani ae uvena atea, poli kko ghe oroianaaaili ila.

⁷ Me lo ateva disaepolo Iesu ghe ailousieiniaaili ghe uela ta Pita va, “Vau eteva okae!” Nau eteva Saemon Pita ghe kilala va Iesu okae, ghe mene asaela unna aiaasae ngeleka ateva (poli ghe ghaa velu elokoiela) me ghe aoso velu siola tapaa manu. ⁸ Me mene katoa etaira tana disaepolo laghe aaimuli tale paanaka ateva, laghe aeae uvena atea pasu ia tale kko. Karika masau ila elae, ghe rooro kateva ai (100) mita nonga. ⁹ Nau eteva laghe sokolaala, me laghe tarala kura atea me kko etoa laghe asoaso etana me verete.

¹⁰ Me Iesu ghe uela etaira va, “Am ghaa mae sio righi kko avirina am lukula.”

¹¹ Saemon Pita ghe saesaela me ghe ae alokoi saela uvena atea elae, pasu ia tale kko namuu, ghe roola kateva ai ghalimangaulu kotolu (153). Arongona ta oroi kko me uvena atea karika ghe marala. ¹² Iesu ghe uela etaira va, “Am mae namanama.” Disaepolo atoa laghe anna tani kolomia va ia see, me karika teva ghe rooro tani ue va ekolomia, poli laghe kilakila va ia Vau eteva. ¹³ Iesu ghe lao sio tale kura atea me ghe suraki saela verete me

ghe tau lao sio etaira. Me ghe ghelei evaluate tee lao o tale kko. ¹⁴ Aiaakotonna ateva o nau Iesu ghe rekataala ta disaepolo atoa nau eteva ghe totula tale nimate.

Iesu ghe uela ta Pita va eaitaraa kiena sipsipi etoa

¹⁵ Nau eteva laghe ruula tani namanama me Iesu ghe uela ta Pita va, “Saemon natuna io Jon, tani koronna va uailousieinaghi? Me ailousiaam etaghi elaulau mene katoa disaepolo?”

Me Pita ghe uela va, “Ue, Vau eteva, ukilakila va aghailousieinio.”

Iesu ghe uela etana va, “Uangini kieghi lutu sipsipi etoa.”

¹⁶ Me Iesu ghe mene uela etana va, “Saemon natuna io Jon, koronnaaili va uailousieinaghi?”

Me Pita ghe liula me ghe uela va, “Ue, Vau eteva, io ukilakila va aghailousieinio.”

Me Iesu ghe uela etana va, “Uaitaraa kieghi sipsipi.”

¹⁷ Aiaakotonna ta Iesu ghe mene uela etana va, “Saemon natuna io Jon, uailousieinaghi?”

Pita ghe tam masimasila poli ghe mene kolomiela aiaakotonnaata ateva va koronna va eaielousiaa Iesu. Pita ghe liula me ghe uela va, “Vau eteva, ukilakila akapa voto, me ukilakila va aghaailousieinio.”

Iesu ghe uela etana va, “Uangini kieghi sipsipi. ¹⁸ Aghaaulia ngakoronna etam va nau eteva aliki taita io, uaaitiitiio, me ulaolao nongina aloannaam, me nau utaita namuu, aue ussuaa sae nimam, me kateva ppae aue eaitiitiio, me ekatulainio lao nongina utam aloanna tani lao.” ¹⁹ Iesu ghe aaulia ngavalua o tani apasunga ase nimate ateva Pita aue ghaaia tani tau sae God. Vara me Iesu ghe uela ta Pita va, “Uaimuli teeieghi!”

Inangarina lo ateva disaepolo Iesu ghe ailousieinia

²⁰ Pita ghe kiriela me ghe tarala lo ateva disaepolo Iesu ghe ailousieinia ghe aimuli teeilalua. (Ia, ia o ghe tani vaavalaa lao ta Iesu nau laghe namanama me ghe ue va, “Vau eteva, see aue etauro lao ta nimaira tau ngai ssateem atoa?”) ²¹ Nau Pita ghe taraie lao sio me ghe kolomila Iesu va, “Vau eteva, vaalua ta ierai o?”

²² Iesu ghe liula me ghe uela va, “Arova aghanna va ghele tokatoka me aghele mene kiriaa mae, vaalua ta ngetam? Unim aimuli teeieghi.” ²³ Poli isaa o inangari me kiukiu ghe kasu ekapa seela ta tue me nenga atoa va ia o lo ateva disaepolo karika aue emate. O me Iesu karika va ghe uela va karika aue emate, ta ghe nim ue va, “Arova aghanna va ghele tokatoka me aghele kiriaa mae, vaalua ta ngetam?”

²⁴ Ia o disaepolo ateva, ia oia eaaulia ngaotu isaa o voto me ghe piti elokoila. Ami kilakila va inangarina koronna.

²⁵ Iesu ghe gheleila mene oroieili voto. Aghannaa va arova la ghele piti kateva kateva tale vuku, aue karika righi voto tale kosa ateva oia tani alokoi isaa o vuku.

Gheegheleiaaira Apostolo Atoa Inangari emuemua

Luk ghe mene pitila righi tana kiukiu ghe tiuaala tale Masi Inangarina ghe pitiela. Etiuaa tale saesaeaane Iesu epona liu me nau God ghe tau lao sio Spirit Manga ateva tale Nau Pentikos. Aitiutiu etoa sapta la kiukiuaa masi kiukiu ghe kasu ekapa seela, eJerusalem me eJudia ta aJiu etoa, vara me eSameria me eAntiok ta lo atoa karika aJiu ila. Tale ila o sapta ngatoa, Luk ekiukiuaa Pita, Jon, Stipen me Pilip. Sapta 13-28 ekiukiuaa uunguaane atoa Pol, tale kotoluae nikasu see tani ppooaa masi kiukiu, tale patunganua eSaepras, me ta llo namuu patunganua alua ghaine ita aseaselalua va Teki me Gris. Ekiukiuaa tale nau Pol ghe saela eJerusalem, aJiu etoa laghe kuneieia, me aRom atoa laghe gheleila niaisakei etana ghaluaata, me vaalua ghe saela eRom. Luk ghe kasukasu eitauaa tee Pol kotoluaata, me ghe pitila va “ami” ta 16:10-17; 20:5–21:18 me 27:1–28:16 tani apasunga va ia ghe tokatoka tee Pol.

Tani kila amuemua

Aitiutiu tale ale manga *1:1–5:42*

Nau sesa me tau ngaiesoa ngatoa laghe oroila *6:1–9:31*

Pita me aitiutiu tau ngeleka atoa laghe aiesoaa *9:32–12:25*

Pol ghe kasukasu tee Banabas *13:1–16:5*

Pol ghe lao sio eTeki me eGris *16:6–19:20*

Pol ghe saela eJerusalem, laghe kuneieia, me ghe saela eRom *19:21–28:31*

Iesu ghe saela epona liu

¹ Tiopilus, tale lo ateva to vuku aghe piti ekasinaiela, aghe auliaala niuungu Iesu ghe tiuaala tani ghelei me tani apasunga, ² nau ghe ruula tani aippooaa tee kapuna apostolo atoa ia o ghe suitoongainilala, me tale sarasarakaniaane Spirit Manga ateva ghe auliaa tau lao sio vaalua la ungu me ghe ghaala nau eteva ghe oghi saela epona liu. ³ Emuli tale nimmarikana ghe ghaala, ghe apasungaala oroieili voto tani apasunga va ia maulue ia ta ila o apostolo atoa. Ghe kaurekatila etaira ghe roola ghaatingaulu (40) nau, me tani auliaa ararimangalina ateva God. ⁴ Kateva nau laghe namanama aitauaa me ghe uela etaira va, “Karika am mene kasu vuli mua eJerusalem. Am toi kateva voto Tamaghi ghe aulieiniela tale inangari nialokoi va aue enim tau aatu etaimim, ia o aghe aulieiniela. ⁵ Jon ghe aasuu taumattu tale manu, me karika masau me aue am ghaa niaasuu tale Spirit Manga ateva.”

⁶ Nau laghe velu eitauaala me laghe kolomiela va, “Vau eteva, tale isaa oia nau erooroo va umene asaesae arariira atea eIsraeli etoa?”

⁷ Ghe uela etaira va, “Karika uunguaaimim tani kila nau Tamaghi ghe atokala tale sarasarakaniaane. ⁸ Me am, aue am ghaa sarasarakana nau Spirit Manga ateva emae etaimim, me saa llo am ghe tarala me nongola, aue am laa ppooaa tale masaliki taatara eJerusalem, tale provinsi eteva eJudia, eSameria me tale kosa akapa ateva.”

⁹ Nau ghe ruula tani auliaa llo me God ghe ghaaie saela epona liu emua ta mataira, me urukookoo ateva ghe aisulieiniela tale taataraira.

1:1: Luk 1:3. **1:2:** Mak 16:19; Luk 24:49-51. **1:3:** Luk 24:36-49; Apos 10:41. **1:4:** Luk 24:49; Jon 14:16-17; Apos 2:33. **1:5:** Mat 3:11. **1:6:** Luk 24:21. **1:7:** Mak 13:32. **1:8:** Mat 28:19; Luk 24:48.

¹⁰ Nau laghe taatara usiusie sae elomarase nongina ghe laa saesae, arovaeaata ta taumattu ngalua lalu ghe aasae kalio usousoana lalu ghe kaurekatila me lalu ghe tingina teeilala. ¹¹ Me lalu ghe uela va, “Taumattu nge Galilii etoa, vaalua me am tingina taatara sae elomarase? Ia o Iesu God ange ghaaie saela epona liu aue emene oghi sio nongina ngam taraiela elaa saesae.”

Mataeasi ghe ghaala liuna ateva Jiudas

¹² Nau ensolo alua lalu ghe kasula, laghe oghi sio mae eJerusalem ta laghe laa sae kasu tale motouru eteva la aseasea va eOliv, maamasauaane eroroo kasukasuaaira ta sambati.* ¹³ Nau laghe rekatala, laghe saela tale ale ngepona atiulu nongina laghe tokatoka. Lo atoa laghe mae sio, Pita, Jon, Jeimis me Andru me Pilip, Tomas, Batolomiu, Matiu, Jeimis natuna ia Alpeas, me Saemon laghe aseasea va Selot ia, me Jiudas natuna ia Jeimis. ¹⁴ Ila me vause atoa, me Meri kinna ia Iesu, me tuena atoa me nengane atoa Iesu, laghe maemae aitaaua nonga tani looloo sae.

¹⁵ Tale isaa o nau Pita ghe tingina saela elome ta lo atoa laghe aaiesoaa, ila akapaaili eroroo kateva ai me ghaluengaulu (120). ¹⁶ Ghe uela va, “Tueghi me nengaghi etoa, Spirit Manga ateva ghe auliaala emua arau ta paane Deivit va Jiudas aue emuemuaa lo atoa aue la laa kune Iesu. Isaa o inangari Uru ngai Manga ateva ghe tani lutu ekoronala. ¹⁷ Poli Iesu ghe suitoongainiela tani uungu teeita, Jiudas ia kateva elome etaita.”

¹⁸ (Ia o taumattu ngateva ghe ghaala aipolipoli tale sesa gheeleiaane me ghe polila kosa ateva, ghe katuula ghe akasa ngamateala, me kovane ateva ghe tapolakala, me tina ghe ghoa mae eleka. ¹⁹ Ila akapa eJerusalem laghe nongola me laghe asela voto ateva o tale inangari tanganueira va Akeldama, malloeana va “Kosa ateva rae etana”.)

²⁰ Pita ghe uela va, “Laghe pitila tale vuku eteva ta Sams va, “Alena ateva aue enim toka me karika teva tani toka etana’ me,

“Liuna ateva tani muemuaa niuungu kateva ppae aue eghaaia.’

²¹ Liuna avalua o me ita tara teva taumattu ghe kasukasu teeita nau ekapa atoa nau Vau eteva Iesu ghe tokatoka teeita, ²² etiitiuaa nau Jon ghe aasuu me ghe laa ghaa sio nau God ghe ghaa saela Iesu epona liu. Ita ghaa teva ghe tani tarala isaa o voto me tototuaane Iesu.”

²³ Laghe asela ghalua taumattu, Josep laghe aseasea va Barsabas, me laghe asease teeia va Jastas,† me mene kateva taumattu, Mataeasi etana. ²⁴ Me laghe looloo saela, laghe uela va, “Vau ngepona ateva, io ukilakila akapa urunguitaniira taumattu ngatoa, uapasunga va see etairarua ughe suitoongainiela va ²⁵ eghaa niuungu eteva va eapostolo me eghaa niuungu eteva Jiudas ghe katuu vuluela tani lao nongina aue elao.” ²⁶ Laghe kaaila voto aluepai eaimatoonga arariirarua aluae. Nau laghe senusenuaala, ararina atae Mataeasi ghe katuu ekasinala, me ie tee ghe lao aitaaua tee sio kasangaulu kateva apostolo.

1:11: Mat 26:64; Luk 21:27. **1:12:** Luk 24:50-53. * **1:12:** kasukasuaaira ta sambati Ajiu etoa la uue va uoroo tani kasu tale sambati ta kateva kilomita nonga. **1:13:** Mat 10:2-4. **1:16:** Sams 41:9. **1:18:** Mat 27:3-8. **1:20:** Sams 69:25; 109:8. **1:22:** Mak 1:9; 16:19; Jon 15:27. † **1:23:** Josep arari nge Hibru ia, me Jastas arari nge Latin ia. Barsabas malloeana va ghe lutula ta sambati.

2

Spirit Manga ghe sio mae ta Nau Pentikos

¹ Ghe ghaala nau ta Pentikos, taumattu ngatoa laghe aaikaaiia, ila akapa laghe mae sio tani velu eitauea tale kateva voto. ² Katengaata nonga ta laghe nongola niaangari eteva arova paka kuukuu eteva, ghe sio mae epona liu me ghe pasula elome tale ale ateva. ³ Laghe tarala lo ateva ghe sio mae arova kura ataata ateae, me ghe polaie seela nonginaaili ramuramuti paa atoa, me ghe tokala epona ta kateva kateva etaira. ⁴ Laghe pasula tale Spirit Manga ateva, me laghe tiuaala tani aippooaa tale asease nisama karika samasama tanganueira, ta Spirit Manga ateva ghe tau lao sio.

⁵ Tale ia o nau eteva oroi aJiu etoa laghe aaiosoa ta God, laghe mae akapa see sio tale kosa akapa ateva tani velu eitauea eJerusalem. ⁶ Nau laghe nongola mangalia ateva, laghe mae sio tani velu eitauea, me laghe soghila tani nongo inangari tanganueira, disaepolo atoa laghe aauliaa. ⁷ Mataira ghe otila me laghe kolomila va, "Taumattu ngatoa oia la aippooaa ila akapa laghe mae sio eGalilii. ⁸ Vaalua me kateva kateva etaita ita nongonongo kila inangari tanganueita? ⁹ Ita taumattu tale Patia, Midia, Elam, me taumattu nge Mesopoteimia, Jiudia, Kapadosia, Pontus me Eisia, ¹⁰ Prigia me Pampilia, Ijip, me katoa laghe mae sio tale kasina masaliki eLibia kalakalangina tale masaliki eteae eSaerini, me katoa laghe mae sio eRom, ¹¹ ita aJiu etoa me lo atoa ghavirina laghe mene aiesoaa teetala, aKrit me aArabia, ita akapa ngita nongola kinatama voto ateva God nge gheleila nau ngila ppooaala tale inangari tanganueita." ¹² Laghe soghila me aloira ghe kapaala me laghe aikolomieinila va, "Sa malloeana llo oia?"

¹³ Katoa laghe aanamisainila tani ue va, "La ropila manu eteva sarasarakana ia."

Pita ghe ppooaala ta taumattu ngatoa

¹⁴ Pita ghe tingina aitauea teela kasangaulu kateva (11) apostolo, ghe sama anamuula me ghe uela va, "Am aJiu etoa me lo atoa am tokatoka eJerusalem, am nongo amasina inangari aghauliaa. ¹⁵ Taumattu oia karika la ropila nongina am aauliaa. Elue talaua arau oia ta 9 kilok.* ¹⁶ Isaa oia voto am taatara, propet Joel ang ghe aulia ngalokoila, ¹⁷ ghe uela va,

" 'God eue va, Airuuruu tale kosa ateva,
 aue atau sio kapughu Spirit Manga ateva tale taumattu ngatoa.
 Natuimim taita atoa me vause atoa aue la aulia ngaotu inangarighi.

Aliki taita atoa aue la tara nitaatara,
 me taita namu ngatoa aue la asoasopoi.

¹⁸ Me kapughu tau ngai uungu etoa, taita ila me vause ila,
 aue atau sio tee Spirit Manga ateva etaira,
 me aue la aulia ngaotu inangarighi.

¹⁹ Aghi aue aghapasunga aimatootoongana elomarase
 me epona tale kosa ateva,
 rae, kura ateae, me paka asu eteva.

²⁰ Sinaka ateva aue saurrom,
 ulana ateva aue eraeraeana,
 me auena kinatama nau eteva emae, ia o nau eteva, aue aghi Vau
 ngepona ateva aue enaughia.

²¹ Me lo atoa la kolo tau

2:1: Lev 23:15-21; Diut 16:9-11. **2:3:** Mat 3:11. **2:4:** Apos 4:31; 10:44-46; 19:6; Mak 16:17.

* **2:15:** 9 kilok Tale inangari nge Grik, tale aiaakotoluna ateva aoa. **2:17:** Joel 2:28-32.

ararina atea Vau ngepona ateva aue la saanga.’ ”

²² Pita ghe mene uela va, “Israeli etoa, am nongo. Iesu aNasareti ia God ghe sungie mae sio etaimim, ghe gheleila paka mirikol me aimatootoongana elome etaimim tani apasunga etaimim va ia ghe kasula ta God. Am akapa am kilakila isaa oia voto. ²³ Ia o taumattu ngateva emua arau God ghe kilaiela me ghe loela tani taue sio etaimim, am me ssa taumattu ngatoa am ghe uvi emateala tale aikotoo. ²⁴ God ang ghe totuela tale mammarikana nimate atea, poli nimate atea karika righi sarasarakaniaane tani poso aoghia. ²⁵ Deivit ghe pitila va Mesaea ghe auliaala va,

“ ‘Aghe taatara Vau ngepona ateva emua ta ngetaghi tale nau ekapa atoa, poli ia etokatoka tale pai muenna ativilau etaghi, me karika arooroo tani katuu.

²⁶ Liuna avalua o me urunguitanighi eteva emasimasi me paaghi eteva ekkinari tau sae ararina atea, me vaulanighi eteva aue etoka tale voto anannaa va aue aghaa maulue etana.

²⁷ Poli io karika urooroo tani tau velueghi va alao tanganueira matena atoa, me karika aue utau velu kapum taumattu manga va emauu.

²⁸ Ughe apasungaala va aue amene sakesake, me tokatokaam teeieghi aue eapasueghi tale nimasimasi.’

²⁹ “Tueghi me nengaghi etoa, aghi aghaaulia ngakorokoronganaaili etaimim va, tuvuita ateva ta Deivit ghe matela, laghe kaieiniela, me liuna ateva, etokatoka teeita tale isaa oia nau. ³⁰ Ia propete ia, me God ghe gheleila kinatama inangari nialokoi eteva va teva tuvuna aue ekingi nongina ia.

³¹ Me ia ghe taatara lao sio emua, me ghe auliaala tototuaane Mesaea, poli karika ghe tau veluela va ghe aso tanganueira matena atoa, me vilikina karika ghe mauula tale liu. ³² Ia o Iesu, God ghe totuela tale nimate, ami oia ami ghe taraiela, me ami aulia ngaotua. ³³ God ghe asaesaala tani toka tale pai muenna ativilau, me ghe tau sio mae Spirit Manga ateva nongina ghe auliaala tale inangari nialokoi. Me Iesu ghe tau sio mae Spirit Manga ateva etaimimi, ghaine am taataraia me am nongonongoa. ³⁴ Poli Deivit karika ghe saela epona liu, me ghe uela va,

“ ‘Vau ngepona ateva ghe uela ta kapughu Vau eteva va, “Toka siola tale pai muenna ativilau

³⁵ lomosi ta aghatoka sio lo atoa la sessa teeio euu, me uatingina saooa kkem etaira.” ’

³⁶ “Liuna avalua o me Israeli ekapa atoa am tani kila amasina va ia o taumattu ngateva am ghe avukalaie saela tale aikotoo, Iesu etana, God ghe gheleila va Vau ia me Mesaea ia.”

³⁷ Nau laghe nongola inangarina Pita ghe ppooaala, ghe pasala urunguitaniira me laghe uela ta Pita me mene katoa apostolo va, “Kapumami etoa, sa ateva ami gheleia?”

³⁸ Pita ghe liula etaira me ghe uela va, “Am nna ngaioghioghiaa, me am ghaa niaasuu tale ararina atea Iesu Karisto, me kaluimim ssavoto aue ekapa, me God aue etau aatu Spirit Manga ateva etaimim. ³⁹ Inangari nialokoi uneimim me natuimim atoa me taumattu ngeleka atoa, lo akapa atoa oia Vau ngepona ateva kapuita Goto ia aue ekolola.”

⁴⁰ Oroieili inangari Pita ghe aulia ngasarasarakanaailiila etaira tani ue va, “Am asaangiem tale vituu eteva oia sesa ia.” ⁴¹ Lo atoa laghe aikaiaala

2:25: Sams 16:8-11. **2:29:** 1 Ki 2:10. **2:30:** 2 Sam 7:12; Sams 89:3-4; 132:11. **2:31:** Sams 16:10. **2:33:** Apos 5:32; 7:55-56. **2:34:** Sams 110:1. **2:36:** Apos 5:30-31. **2:39:** Ais 57:19. **2:41:** Apos 2:47; 4:4.

inangari laghe ghaala niaasuu, ghe roola kotolu airari (3,000) taumattu taita me vause tale ia o nau eteva.

Tau ngaikaaia ngatoa laghe velu eitauaala

⁴² Nau ekapa atoa tau ngaikaaia ngatoa laghe veluvelu eitauaa tee apostolo atoa, me laghe nongonongo me laghe taatara voto apostolo atoa laghe aapasunga, me laghe namanama, me laghe looloo sae aitauaa. ⁴³ Ila akapa laghe taatara sarasarakaniaane God tale mirikol me aimatootoongana apostolo atoa laghe gheelei, liuna avalua o me laghe oneoneaa God. ⁴⁴ Me ghe kateva nonga ilala, me laghe aaitauaa peiira. ⁴⁵ Laghe tautau velu kasina kosa me peiira laghe polipoli me viliki veu laghe kookoita ta lo atoa laghe tuutukuna tale kasina voto. ⁴⁶ Nau ekapa atoa laghe veluvelu eitauaa tale ale ngeleka atiulu tale ale manga, me laghe aikasuaa see elome tale paa ngaleira tani namanama† me laghe masimasi eitauaa, ⁴⁷ laghe tautau sae ararina atea God, me taumattu ngatoa laghe oneoneainila. Me tale nau ekapa atoa Vau ngepona ateva ghe mene tautau sso ouna taumattu ghe aasaangi, tani lao aitauaa tee lo atoa akasina.

3

Pita ghe ghelei emasinala tangorengorena ateva tau nilooloo ia

¹ Kateva nau Pita me Jon lalu ghe laa saesae tale ale manga ateva tani looloo sae ta 3 kilok elo alai,* nau nilooloo sae. ² Taumattu ngateva, ghe lutu etangorengorenala, laghe sausaue sae tale atamani ale manga ateva la ghaseasea va Masi Taataraane. Laghe aatokaia nau ekapa atoa tani loo viliki veu tale taumattu ghe kupikupi sso tale ale manga ateva. ³ Nau ghe tarala Pita me Jon ta lalu ghe mae sosso tale ale manga ateva, ghe looloo viliki veu etairarua. ⁴ Pita ghe tara sossolainiela, me tee Jon, me Pita ghe uela etana va, “Utaraiengalue mae.” ⁵ Nau ghe taatarailalua ghe annaa va ghe ghaa rigghi voto etairarua.

⁶ Me Pita ghe uela etana va, “Karika rigghi viliki veu etaghi. Voto auunusi aue atau aatu etam. Tale ararina nonga atea Iesu Karisto aNasareti ia aghaauliaa etam va, tingina saela me ukasukasu.” ⁷ Pita ghe kunela nimana muenna atelange me ghe kune atinginaie saela me katengaata nonga ta kkena me kunikuni kkena ghe sarasarakanala. ⁸ Ghe aosola me ghe tingina saela me ang ghe kasukasu, ghe kupi eitauaa tee ssola taita alua tale ale manga ateva, ghe aoaso me ghe kakkaua sae ararina atea God. ⁹ Nau taumattu ngatoa laghe taraiela ta ghe kasukasula me ghe kakkaua ararina atea God, ¹⁰ laghe kilaiela va ia oia taita ateva ghe tokatoka nonga tale atamani ale manga ateva la ghaseasea va Masi Taataraane tani loo viliki veu, laghe soghiaala tani taraia va ghe kasukasula.

¹¹ Nau laghe nongola kiukiuna tangorengorena ateva va ang ghe kasukasula, ila akapaaili taumattu ngatoa laghe lao sio tani taraia elome tale ale manga ateva tale varanda ngateva laghe asease va Solomon etana. Ghe kunekune atingina ta taita alua tale ale manga ateva. ¹² Nau Pita ghe tara avaluela o, ghe uela ta taumattu ngatoa va, “Am Israeli etoa, vaalua me am mammanuena voto oia elutula, me vaalua me am taatara sossolainangalua? Am nannaa va taumattu ngateva oia emasinala tale sarasarakaniaangalua o masi tokatokaangalua? ¹³ Kapuira Goto ateva Abraham, Aisiki me Jekop,

2:42: Apos 20:7. **2:44:** Apos 4:32-35. † **2:46:** Katoa la annaa va malloeana va la ghe gheelei Losapa. **2:47:** Apos 6:7; 11:21. * **3:1:** 3 kilok elo alai Tale inangari nge Grik, tale aiaaghasiona (9) ateva aoa. **3:4:** Apos 14:9. **3:6:** Apos 4:10; 16:18. **3:13:** Eks 3:6, 15; Luk 23:13-25; Apos 2:23.

kapuira Goto ateva tuvuita ia, ia ghe asaesaela ararina atea kapuna tau ngai nongonongo anna ateva ta Iesu. Am ghe tauela ta aRom atoa va la uvi ematea, me am ghe ratiela va ia king ia emua ta Paelat, arongona ta Paelat ghe kilala va Iesu karika righi sesa ghegheleiaane. ¹⁴ Iesu raarangisana ia me ghulughuluena ia, me am, am ghe ratiela, me am ghe aloannala va tau ngai uvii emate ateva etoka. ¹⁵ Lo ateva etautau mae maue, am ghe uvi emateala, me God ghe totuela tale nimate. Angalua oia angalu ghe taraiela ta mataingalua me angalu aaulieinia etaimim. ¹⁶ Tale niaikaiaa ta ararina atea Iesu, taumattu ngateva am taatarai me am kilakilaia, ange korokonganala. Lo ateva o niaikaiaa ta Iesu ghe ghelei emasina akapaailiela tale taataraimim.

¹⁷ “Me anga kilaiemla, tueghi me nengaghi etoa, va voto am me kapuim namu ngatoa am ghe ghelei karika am ghe aalomasaanga tee. ¹⁸ Aviri am ghe gheleila, me God ang ghe kila vella emua arau sa ateva auena elutu. Kapuna propete atoa laghe aulia ngamuemue alokoila va Mesaea aue emae ghaa nimmarihana. ¹⁹ Am aikolikoliaa me am nna ngaioghioghiaa tale kaluimim ssavoto, me God aue ekkaluaa, me esei velu kaluimim ssavoto. ²⁰ Me Vau ngepona ateva aue etau aatu nau tani mene akorokorongana maamauluaimim, me aue emene suu Mesaea, eghe suimatoongainiela tani sausiem, Iesu etana. ²¹ Ia etani toka epona liu lomosina ta emene oghi sio tani mene ghelei eouna voto akapaaili. Ghe auliaala ta propet manga atoa emua arau. ²² Llo Moses ghe auliaala va, ‘Vau eteva kapuimim Goto ateva aue etau mae teva propete aue enongina ghe atinginaieghi saela, elome ta ngetaimim. Nau propete ateva emae, am rooroo tani nongo usilainia, me am ghelei voto eauliaa. ²³ Arova see atoa la tam nongo usilaa voto eauliaa aue God etturuu vella elome ta kapuna atoa.’

²⁴ “Etiitiuaa ta Samuel me elaolao ta mene katoa propete, laghe aulia ngaotu teela isaa oia nau. ²⁵ Am natuira iem propete atoa, me tale niaippooa ngaitaua ngateva God ghe gheleila ta tuvaimim atoa nau ghe uela ta Abraham va, ‘Ta tuvum ateva isaa akapaaili taumattu tale kosa ateva aue la ghaa niarangise.’ ²⁶ Nau eteva God ghe atingina saela kapuna tau ngai nongonongo anna ateva, ghe sungi ekasinaie mae sio etaimim tani arangiseiem me tani ghelei eoghiem tale gheleiaaimim sesa.”

4

Laghe atoka ssola Pita me Jon tale ale mata voovoo

¹ Pita me Jon karika lalu ghe ruu tani aippooaa tee taumattu ngatoa, me pristi etoa, me namu ngateva ghe aaitoiaa polisi etoa tale ale manga ateva, me Sadiusi etoa laghe rekatala. ² Laghe kilakila va lalu ghe auliaa ta taumattu ngatoa me aapasunga va Iesu ang ghe totula tale nimate, me ila akapa taumattu ngatoa ngila ghe matela ila tee aue la totu. Liuna avalua o me ghe sessaieiliila etairarua. ³ Me laghe kuneilaluela tani laoinilalua tale niaisakei. Poli ang ghe elo alaila, laghe atokailalua ssola tale ale mata voovoo, me laghe toi ta ghe pai sae ta mene kateva nau. ⁴ Oroianaaaili ila lo atoa laghe nongola me laghe aikaiaaala ta Iesu, me lo atoa taita laghe aikaiaaala erooroo ghalima airari (5,000).

Laghe tau lao sio Pita me Jon va lalu aisakei ta mata kansolo atoa

3:17: Luk 23:34; 1 Tim 1:13. **3:19:** Apos 2:38. **3:22:** Diut 18:15, 18-19. **3:25:** Aitiutiu 22:18. **3:26:** Apos 13:46. **4:4:** Apos 2:41.

⁵ Ghe paila ta mene kateva nau, tau ngai toitoi etoa, namu ngatoa me tau ngai aapasunga atoa tale inangari nipaopao laghe velu eitauaala eJerusalem. ⁶ Annas, namuu ia ta pristi etoa, ghe toka teeilala. Ila me Kaeapas, me Jon, Aleksanda, me mene katoa taumattu mangalina ila Annas, laghe toka teeilala. ⁷ Laghe atinginala Pita me Jon emua etaira, me laghe kolomilalueta va, “See ghe tau aatu sio sarasarakana etaimalua tani ghelei isaa oia voto? Me ta see ararina ateae amalu gheeghelei isaa o voto?”

⁸ Spirit Manga ateva ghe pasula ta Pita me ghe uela etaira va, “Am tau ngai toitoi me namuu nge Israeli etoa, ⁹ ngam aloanna tani kolomiengalua ghaine poli angalu ghe gheleila masi niuungu ta tangorengorena ateva, me am aloanna tee tani kila va vaalua taumattu ngateva ghe masinala. ¹⁰ Me isaa oia am me Israeli ekapa atoa am rooroo tani kila va tale ararina ateae Iesu Karisto aNasareti ia, am ghe avukalaie saela tale aikotoo, me God ghe totuela tale nimate, ia ghele gheleila me ia o taumattu ngateva ghele masinala, me ange tinginala emua etaimim. ¹¹ Ia Iesu, ‘Atu eteva am tau ngai atulu ale atoa am ghe uela va sesa ia me am ghe ratiela, ia ghe aitiutiula tale atu ekapa atoa tani suei ale ateva.’ ¹² Karika teva taumattu erooroo tani mene asaangita, karika poi. Nim ararina ateae nonga Iesu taumattu ngatoa tale kosa ateva oia ita rooroo tani saanga.”

¹³ Namu ngatoa laghe kilakila va Pita me Jon karika lalu ghe sikulula, nim taumattu ilalua, me laghe taatara ta karika ghe moimoilalua. Liuna avalua o me laghe soghiaala tani tara, me laghe kilala va lalu ghe toka teela Iesu. ¹⁴ Me laghe tarala ia o taumattu ngateva, vilikina ghe masinala, ghe tiitingina eitauaa teeilalua, liuna avalua o me ghe karikala righi inangariira tani liu etairarua. ¹⁵ Isaa avalua o me namu ngatoa laghe uela etairotolu va lotolu kupi vulu ghoa kansolo atoa. Nau angilotolu ghe kupi ghoala, laghe aaikolomi va, ¹⁶ “Vaalua aue ita ghelei taita alua oia? Ngilalu ghele gheleila kateva ppae ase naimatootoongana, me taumattu ngakapa atoa eJerusalem angila ghele kilaiela, ita tee karika poi ita rooroo tani ue va kamena. ¹⁷ Me inangari erau namungaili va elao akapa see ta taumattu ngatoa. Liuna avalua o me ita aulia ngasarasarakana etairarua va lalu rau mene ppooaa tale ararina ateae ia o taumattu ngateva tale mene katoa tana taumattu.”

¹⁸ Emulina laghe kololalueta, me laghe paolalueta va lalu rau mene ppooaa me apasunga tale ararina ateae Iesu. ¹⁹ Pita me Jon lalu ghe liula me lalu ghe uela va, “Vaalua, emaamasina ta matane God tani nongo usilaa inangariimim me karika va inangarina God? Am tani laa anna ngamasina. ²⁰ Karika aue angalu rooroo tani matuaa, angalu tani aulia ngakapa voto angalu ghe tarala me angalu ghe nongola.”

²¹ Kansolo atoa laghe mene tau lao sio inangari sarasarakana etairarua, me laghe sungi velulalueta, poli laghe maamatauta taumattu ngatoa. Ila akapa taumattu ngatoa laghe nnaala voto ateva oia God ghe gheleila, me laghe tautau sae ararina ateae God. Liuna avalua o me karika righi salaira kansolo atoa tani ghelei teeilalua. ²² Ia o taumattu ngateva lalu ghe gheleila naimatoonga etana me ghe masinala, anna ninamanama ang ghe laula ghaatingaulu (40).

Laghe kokkolomi sae tani ghaa sarasarakana tani ppooaa inangarina Iesu

²³ Kansolo atoa laghe tau vella Pita me Jon me lalu ghe oghi lao sio ta mene katoa tau ngaiesoaa, me lalu ghe aulia ngakapaailiila inangariira namu ngatoa ta pristi etoa me namu ngatoa laghe auliaala etairarua. ²⁴ Nau laghe

nongola, me nannaaira ghe kateva nongala me laghe kakkauaa sae tale kaluira nilooloo sae ta God va, “Vau palepale, ughe gheleila eunaakookoo me kosa ateva me manu etoa me isaa akapaaili voto etokatoka etana. ²⁵ Emua arau kapum Spirit Manga ateva ghe tau lao sio inangari eteva ta tuvuimami eteva, ia o kapum tau ngai uungu ia ta Deivit, me Deivit ghe uela va,

“Vaalua me tau ngeleka atoa esessaieiliila?

Vaalua me taumattu ngatoa la loeloe asease salana atoa, me karika God etautau vella va la ghelei?

²⁶ Kingi etoa tale kosa akapa ateva la ghaimonomosiaa tani aiuvii me namu ngatoa la veluvelu eitauaa

tani tau sio Vau ngepona ateva

me tani tau sio kapuna Mesaea ngateva.’

²⁷ Koronnaaili Herot me Pontius Paelat me katoa tau ngeleka me Israeli etoa, laghe velu eitauaala tale ia o masaliki taatara atea tani loe Iesu tani uvi ematea, ia o kapum tau ngai uungu eteva manga ia ughe suitoongainiela va ia Mesaea ia. ²⁸ Nau laghe gheleila isaa o voto laghe nim aimulisi teela nannaam me aloaloannaam. Tale sarasarakaniaam emua arau ughe suimatoongaala va isaa o voto aue elutu. ²⁹ Me ghaine, Vau eteva, urooroo tani annaa inangari isaa o laghe ghelei tani amatautuemami, me usausiemami kapum tau ngai uungu etoa, me ami rooroo tani ppoa ngasararakana inangarim me karika ami mene matautu. ³⁰ Me urooroo tani saoa nimam ta tau sessa atoa tani gheleila me la mene masina, me urooroo tani ghelei asease aimatoonga me mirikolo tale ararina atea Iesu, ia kapum tau ngai uungu eteva manga ia.”

³¹ Nau eteva laghe ruula tani looloo sae, ale ateva laghe velu eitauaala etana ghe aisiisiaala, me laghe pasula tale Spirit Manga ateva, me laghe ppoa ngaotula inangarina God. Laghe aippoo ngasararakana me karika laghe maamatautu.

Tau ngaiesoa ngatoa laghe aitauaala peira

³² Ila akapa tau ngaiesoa ngatoa laghe kateva nonga ilala tale ninanna me nialoanna. Karika teva taumattu ghe ue va peina kanno nonga. Karika, isaa akapaaili voto laghe aitauaa elome etaira. ³³ Tale kinatama sarasarakana atoa, apostolo atoa laghe aulia ngaotula tototuaane Vau eteva Iesu. Me oroieili maamasinaane God ghe tokala etaira akapa, ³⁴ me karika teva taumattu elome ta ngetaira ghe tuutukuna tale inana me voto. Kasina taumattu kosaira me aleira laghe tau lao sio va la poli. Nau eteva laghe polipoli, isaa o viliki veu laghe ghaaghaa laghe laolaoa ³⁵ ta apostolo atoa, me apostolo atoa laghe aikoita ta lo atoa laghe tuutukuna tale kasina voto.

³⁶ Kateva taumattu tale ararimangalina ateva Livae, ararina atea ta Josep, ghe lutula tale patunganua ateva eSaeprasi me ghe tokatoka eJerusalem, apostolo atoa laghe kolokolo Banabas etana (malloeana va tau ngai sausia ia tale masi ninannaa), ³⁷ ghe taula tuku kosane ateva me laghe poliela, me ghe ghaala viliki veu me ghe laoa sio ta apostolo atoa.

5

Ananaeas me Sapaera lala ghe matela

¹ Taita ateva ararina atea ta Ananaeas me vausenna ateva ta Sapaera, lalu ghe tau vella tuku kosairarua ateva laghe poliela. ² Ananaeas me vausenna ateva lalu ghe ghaa oghila kasina viliki veu. Ananaeas ghe laoa sio nonga kasina viliki veu ta apostolo atoa.

³ Vara me Pita ghe uela ta Ananaeas va, “Vaalua me utau vella Satana eapasula urunguitanim ateva me angu kamela Spirit Manga ateva, me angu ghaa oghila kasina aipolipoli tale kosa ateva? ⁴ Nau ghe asoaso kosami ia, ughe ghelei aloannaam etana, me nau ughe aitaueiniela me laghe poliela, viliki veu ghe unem. Me vaalua me ughe aloannala tani mene ghelei evalua o? Karika ukamekame nonga taumattu ngatoa, ta ukamekame tee God.”

⁵ Nau Ananaeas ghe nongola, ghe matela me ghe katuula. Kinatama nimatautu ghe ghaala taumattu ngatoa laghe nongola sa ateva ghe lutula. ⁶ Vara me aliki taita atoa laghe kupi sso mae me laghe ghiisainiela me laghe sauela, me laghe lao sio tani kaieinia.

⁷ Koti eroroo kotolu aoa ghe lange sio me vausenna ateva ghe kupi ssola. Karika ghe kilala sa ateva ang ghe lutula. ⁸ Pita ghe kolomiela va, “Auliaala etaghi, va isaa nonga oia aipolipoli tale tuku kosa ateva?”

Me ghe liula me ghe uela va, “Ue, nim isaa nonga o.”

⁹ Pita ghe uela etana va, “Vaalua amalu aloanna tani kame kapuna Spiriti eteva Vau eteva? Tarala! Lo atoa la lao sio tani kaiaa taitanim ateva, ila etapaa ngatamana, me aue la mene sau teeio.”

¹⁰ Me katengaata nonga ta vause ateva ghe matela me ghe katuula ta liue kkena Pita. Aliko taita atoa laghe sso mae me laghe saopiela ta ang ghe matela. Laghe sauela tani laa kaiaa valainia ta taitanna ateva. ¹¹ Kinatama nimatautu ghe lutula ta tau ngaiesoa ngatoa, me see ila lo atoa laghe nongola llo kiukiu.

Asease voto ouna ghe lutula

¹² Ta ngetaira apostolo atoa, oroieili niaimatootoongana me mirikolo laghe ghelei. Tau ngaiesoa ngakapa atoa laghe tokatoka aitauea tale varanda ngateva laghe asease Solomon etana. ¹³ Lo atoa karika tau ngaiesoa ila laghe maamatautu tani mae aitauea tee tau ngaiesoa ngatoa, me karika, ta taumattu ngatoa laghe oneoneainila. ¹⁴ Me oroieili taita me vause laghe aiesoaala ta Vau ngepona ateva laghe lao aitauea tee sio kapuna atoa. ¹⁵ Taumattu ngatoa laghe tarala oroieili voto apostolo atoa laghe ghelei, o laghe sausau tau sessa atoa laghe ghoa aalokoila tapaa salana tale aisalo me tale komo va nau Pita ghe kasukasu emaemae, tootoona ateva ghe tulila. ¹⁶ Oroieili taumattu ngatoa tanganueira kalakalaa eJerusalem, laghe maemaeaa tau sessa atoa me lo atoa raroai etoa laghe ghelei saasakieinila, ila akapa laghe maamasina.

Laghe atoka ssola apostolo atoa tale ale mata voovoo

¹⁷ Namu ngateva ta pristi etoa me kapuna akapa atoa, ila elome tale pati eteva ta Sadiusi, laghe nannaa saasakiaa tee apostolo atoa. ¹⁸ Liuna avalua o me laghe kunela apostolo atoa, me laghe atokaila ssola tale ale mata voovoo. ¹⁹ Nau eleivoo ensolo ateva kapuna ia Vau ngepona ateva ghe otila atamana atoa tale ale mata voovoo ateva me ghe kupieinila ghoala. Me ghe uela va, ²⁰ “Am kasula, me am laa tingina tale ale ngeleka atiulu tale ale manga ateva me am ppooaa ta taumattu ngatoa inangari tale ia oia maulue ateva.”

²¹ Elue talaua poopooa tale mene kateva nau laghe ssola tale ale ngeleka atiulu tale ale manga, nongina ensolo ateva ghe auliaala etaira, me laghe tiuaala tani apasunga ta taumattu ngatoa.

Vara me namu ngateva ta pristi etoa me kapuna atoa laghe kolo aitauaala kansolo atoa, namu ngatoa ta natuna atoa Israeli. Laghe suu lao sio inangari tale ale mata voovoo va la maeaa apostolo atoa. ²² Nau polisi etoa tale ale manga ateva laghe rekataala tale ale mata voovoo, laghe tara luulala. Laghe oghi lao sio tani auliaa va, ²³ “Ale mata voovoo ateva kaakavati emasinaaili ia, tee tau ngai toitoi etoa la tiitingina etapaa ngatamana. Nau ami otila karika ami tarala toa elome.” ²⁴ Nau laghe nongola kiukiu namu ngateva ghe aaitoiaa polisi etoa tale ale manga ateva, me namu ngatoa ta pristi etoa laghe annaa sossolaa va sa ateva aue elutu.

²⁵ Kateva taumattu ghe mae sio etaira me ghe uela va, “Am nongola! Taumattu am ghe atoka ssola tale ale mata voovoo, ila tale ale manga ateva la sso aapasunga ta taumattu ngatoa.” ²⁶ Liuna avalua o, polisi etoa me lo ateva ghe aitoieinila laghe ssola tani kuneila, karika laghe karatainilala poli laghe maamatauta taumattu ngatoa, va la rau kumla arova la uvi apostolo atoa.

²⁷ Nau laghe maeainila sio tale liu niaisakei, namu ngateva ta pristi etoa ghe tiuaala tani kolomila. ²⁸ Ghe uela va, “Ami ghe tau aatu sio inangari sarasarakana va karika am mene laa ghasunga see tale ararina ateaie ia o taumattu ngateva. Me karika, ta ngam ghele rooa ngakapa seela eJerusalem, me am aaliu teeiemami va ami, ami ghe uvi emateala.”

²⁹ Vara me Pita ghe ghaala liura apostolo atoa tani liu inangariira, me ghe uela va, “Ami nongo usilaa nonga God me karika taumattu. ³⁰ Kapuira Goto ateva tuvuita atoa ghe totula Iesu tale nimate. Ia o am ghe avukalaie saela tale aikotoo. ³¹ Ia God ghe asaesaala me ghe atokaiela tale pai muenna ativilau va ia Vauita ia me tau ngai asaangiita ia, tani taula ninna ngaioghioghiaa me nikkaluaa kaluira ssavoto Israeli etoa. ³² Ami tee ami auliaa voto oio, me tee Spirit Manga ateva, ia o God ghe nim taue lao sio ta lo atoa laghe nongo usilainiela.”

³³ Nau laghe nongola llo ghe sessailala etaira, me laghe aippoaa ngaitauaala tani uvi ematela. ³⁴ Me kateva etaira ghe tingina saela, ararina ateaie ta Gamaliel, ie tee Paresi ia, tau ngai aapasunga ia tale inangari nipaopao me taumattu ngakapa atoa laghe oneoneainia, ghe uela va, “Tau vellala me la kasu mua.” ³⁵ Me ghe uela etaira va, “Am taumattu nge Israeli etoa, am paniem arova am aaloanna tani ghelei righi voto etaira. ³⁶ Poli kasina nau ang ghe lange sio taumattu ngateva ghe tingina saela, ghe poppooaa va ia namuu ia, ararina ateaie ta Tiudas. Ghe ghaala kapuna ghaata ai (400) taumattu. Me aRom atoa laghe uvi emateala me kapuna atoa laghe ilou reerekataa seela. Uunguairaa ghe nim kapala. ³⁷ Emuli etana, Jiudas nge Galilii ghe mene kaurekatila, ta nau nimene ghelei sensis, me oroi taumattu ghe mene usiela. Vara me laghe mene uvi emateala. Me kapuna atoa laghe mene ilou reerekataa seela. ³⁸ Liuna avalua o me tale lo ateaie oia niaisakei aghaauliaa etaimim va am tau vellala me la kasu, ta arova nim uunguairaa taumattu ngatoa, aue enim peisaane. ³⁹ Va arova kanna God, karika am rooroo tani paola. Am rau nim aiuvii tee nonga God.” Me ila akapa laghe aimuli teela inangarina Gamaliel.

⁴⁰ Laghe kolola apostolo atoa laghe kupi ssola, me laghe uela va la parula me laghe uela etaira va karika la mene laa ppooaa see tale ararina atea Iesu, me laghe sungi vellala.

⁴¹ Nau laghe kasula laghe masimasila, poli God ghe tarailala va la rooro tani ghaa nimmarikana tale ararina atea Iesu. ⁴² Tale nau ekapaaili elome tale ale ngeleka atiulu tale ale manga ateva me tale ale akapaaili, apostolo atoa karika laghe ruula tani ppooaa me apasunga va Iesu Mesaea ia.

6

Ghaitu tau ngai sausi

¹ Tale isaa o nau, disaepolo atoa ngila ghe ooro me lo atoa etaira laghe samasamaa nge Grik laghe aauliuliaa aHibru etoa ta poli karika laghe aikoita ngamasina voto ta kapuira vause raue vulu etoa tale nau ekapa atoa.

² Liuna avalua o me kasangaulu ghalua (12) apostolo laghe kolo aitauaala tau ngaikaaia ngakapa atoa me laghe uela etaira va, “Karika masina arova ami ruu tani ppooaa inangarina ateva God me ami mae koita inana. ³ Isaa avalua o tuemami me nengamami etoa, am tara elome etaimim ghaitu (7) taita pasu ila tale Spirit me alomasaanga, me ami suitoongainila tani ghelei ia o niuungu eteva, ⁴ me ami uunguaa nonga tani looloo sae me tani ppooaa inangarina God.”

⁵ Isaa o inangari ghe masinala ta taumattu ngakapa atoa, me laghe asela Stipeni pasu ia tale niaikaaiaa me Spirit Manga ateva, me Pilip, Prokorus, Nikano, Timon, Pamenas, Nikolasi atala nge Antioko ia, karika aJiu ia nau ghe lutula, vara me ghe aiesoaala me ghe aJiula, me emulina ghe mene aiesoaala ta Karisto. ⁶ Laghe laoinila sio ta apostolo atoa, me laghe looloo saela me laghe saoaala nimaira etaira tani amangaila va la ghelei ia o niuungu eteva.

⁷ Inangarina ateva God ang ghe naanamuu me eJerusalem oroieili taumattu laghe aiesoaala, me oroieili pristi tee atoa laghe nongo usilaala masi inangari.

Laghe kunela Stipeni

⁸ Stipeni pasu ia tale sarasarakana me maamasinaane God. Ghe ghelei mirikolo me niaimatoonga sarasarakana elome tale taumattu ngatoa. ⁹ Me katoa taumattu karika laghe laolao aitauaa tee aloannaane Stipeni. Isaa o taumattu laghe velu eitauaala tale kateva ale nivelu eitauaa la kolokoloa va aleira ia lo atoa emua akasina karika laghe tokatoka tale aloannaaira. Isaa o taumattu atala nge Saerini ila me Aleksandria ila, me provinsi elua ta eSilisia me eEisia. Katoa ta ngetaira laghe sessaila ta Stipeni. ¹⁰ Spirit Manga ateva ghe tau lao sio alomasaanga ta Stipeni, liuna avalua o me karika laghe rooro tani apala inangari Stipeni ghe poppooaa.

¹¹ Kasina taumattu laghe polilala tani aikamea tee Stipeni va laghe nongoala ghe poppooaa saasakiaa ta Moses me God.

¹² Tale isaa o inangari, taumattu ngatoa laghe sessailala, me taumattu ngatoa me namu ngatoa me tau ngai aapasunga atoa tale inangari nipaopao laghe kunela Stipeni me laghe laoinie sio ta Kansolo atoa. ¹³ Laghe ghaala kasina taumattu va eaikamea teeia, ila o taumattu ngatoa laghe uela va, “Ia oia taumattu ngateva enim toka aauliaa saasakiaa tee voto ateva oia manga ia me kanna inangari nipaopao Moses. ¹⁴ Poli ami ghe nongola ta ghe uela

va ia o Iesu atala nge Nasareti ia ghe uela va aue etturuu ale manga ateva me eaikolikoliaa voto emua arau Moses ghe tau mae sio.”

¹⁵ Me taumattu ngatoa tale ia o nivelu eitaua ngateae laghe taatara lao sio ta Stipeni, me laghe tarala matane ghe nonginala ensolo ateva.

7

Inangarina Stipeni

¹ Namu ngateva ta pristi etoa ghe kolomila Stipeni va, “Koronna llo oia?”

²⁻³ Stipeni ghe liula me ghe uela va, “Tueghi me nengaghi me tamaghi etoa, am nongoaghi va God ateva pasu ia tale mallanga ghe rekataala ta tuvuita ateva ta Abraham nau eteva ghe tokatoka eMesopoteimia. Ghe uela etana va, ‘Ukasu vuli tanganuem me kapum atoa, me ulao tale kosa ateva aue aghapasungainia etam.’ Me auena ghe laa toka eHaran.

⁴ “Me ghe kasu vulila tanganue aKaldia ngatoa me ghe lao sio tani toka eHaran, me vara tamane ghe matela me ghe mene mae sio tani toka tale kosa ateva oia am tokatoka etana. ⁵ God karika ghe tau lao sio teva tuku kosa etana va ghe kanna. Karikaaili tuku teva. God ghe alokoila inangari nialokoi etana va ia me tuvuna atoa emuli etana aue la ghaa kosa ateva oia, arongona ta ia o nau eteva Abraham karika righi natuna. ⁶ God ghe uela etana va, ‘Aue tuvum atoa aue la ativuu tale mene kateae ppae masaliki me la nim tau ngai uungu me taumattu ngatoa tale ia o masaliki eteae aue la ghelei saasakiaa etaira aue eroo ghaata ai (400) ninamanama. ⁷ Me aue aghi aghattara matana lo ateva anua eghaaila va la nim tau ngai uungu.’ Me God ghe mene uela va, ‘Emulina aue la kasu vuli ia o anua ateva me aue la mene mae kkaueinaghi tale masaliki eteae oia.’ ⁸ God ghe gheleila inangari niaippooa ngaitauaa tee Abraham tale ni-isoiso atea me Abraham ghe tamane iela Aisiki me vara ghaitu nau ghe lange sio me Abraham ghe isola Aisiki. Vara me Aisiki ghe natunala ta Jekop me Jekop ghe natunala kasangaulu ghalua (12) ghe tuvuitala.

⁹ “Me tuena taita namu ngatoa Josep laghe nannaa saasakiaa teeia, liuna avalua o me laghe taue lao sio me ghe siola eIjip me laghe ghaala aipolipoli, me God ghe tokatoka aitauaa teeia, ¹⁰ me ghe aasaangia tale isaa akapaaili voto sesa, me ghe tau lao sio alomasaanga etana va Peroo kingi nge Ijip ateva ghe maamasiaa uunguaane me ghe gheleieila ghe namuula eIjip me tale alena akapa ateva.

¹¹ “Vara me kinatama maloo ateva ghe lutula eIjip me eKeinan me voto sesa ghe lutu teeilala, me tuvuita atoa karika laghe roola tani ghaa righi inana. ¹² Nau Jekop ghe nongola va inana eIjip, ghe suula tuvuita atoa tani sio eIjip tale aitiutiu eteva uneira nisio. ¹³ Aiaaghaluene atea nisio, Josep ghe aulia ngaotula ta tuena atoa va ia see, me liuna avalua o me Peroo ghe kilala kapuna atoa. ¹⁴ Josep ghe suula inangari va tamane ta Jekop me kapuna akapa atoa la sio. Ila akapaaili erooro ghaitungaulu ghalima (75) taumattu. ¹⁵ Vara me Jekop ghe siola eIjip, ia me tuvuita atoa laghe matela okae. ¹⁶ Nau laghe matela laghe mene saeainilala eSekem tale liu niaikkaia ngateva Abraham ghe polie lao sio ta natuna atoa Hamor tale kasina ase viliki veu.

7:2-3: Aitiutiu 11:31; 12:1. **7:5:** Aitiutiu 12:7; 15:18; 17:8. **7:6:** Aitiutiu 15:13-14; Eks 12:40.

7:7: Eks 3:12. **7:8:** Aitiutiu 17:9-14; 21:4. **7:9:** Aitiutiu 37:11, 26-28; 39:1-3, 21-23. **7:10:** Aitiutiu 41:37-44. **7:11:** Aitiutiu 41:54; 42:1-2. **7:13:** Aitiutiu 45:1-4, 16. **7:14:** Aitiutiu 45:9-11; 46:27. **7:15:** Aitiutiu 46:1-7; 49:33. **7:16:** Aitiutiu 23:2-20; 33:19; Jos 24:32.

¹⁷ “Nau ang ghe aakalakalaa va God ghe ghelei rooroaa inangari nialokoi ghe auliaala ta Abraham, me aIsraeli etoa eIjip laghe oroienaaili ila. ¹⁸ Vara me kingi eteva ghe tam kilakila Josep ghe tiuaala tani aitoiaa eIjip. ¹⁹ Ghe tiuaala tani pae salana tani ghelei saasakiaa tuvura atoa me tani ghelei voto karika masina etaira. Tee ghe uela va la sau velu natuira aliki etoa me aue la mate.

²⁰ “Tale isaa o nau Moses ghe lutula. Masi taataraane ta matane God me laghe aitarainiela elo ale erooro kotolu (3) ulana. ²¹ Me nau laghe ghaa velue ghoala eleka tanganueira, natuna vause ateva king ghe ghaaiela, me ghe aitarainiela va natuna ia. ²² Ghe ghaa akapala alomasaangania nge Ijip me inangarina me gheeleiaane sarasarakanaaili.

²³ “Nau anna ninamanama ghe ghaatingauluaela (40), ghe nnaala tani laa tara kapuna atoa, tuvuna atoa Jekop. ²⁴ Ghe tarala kateva aIsraeli, aIjipi eteva ghe ghelei saasakieinia me ghe sausila kapuna ateva, me tani liu, ghe uvi ematela aIjipi eteva. ²⁵ Ghe annaa va kapuna atoa aue laghe kila va God ang ghe tiituaa tani sausila tani asaangila tale niuungu Moses ang ghe tiituaa tani ghelei, me aloira karika laghe maamasaanga. ²⁶ Mene kateva nau ghe mene tarala kapuna alua aIsraeli ilalua lalu ghe aaiuvii me ghe tootoongaala tani ghelei rungainilalua me ghe uela etairarua va, ‘Amalua, aHibru nonga iemalua, me vaalua me amalua aaiuvieinamalua?’

²⁷ “Me lo ateva ghe tiuaala tani aiuvii ghe bbi velu lao sio Moses me ghe uela etana va, ‘See ghe uela va io unamuu me ughelei niaisakei etaimami?’ ²⁸ Ualoanna tani uvi emateaghi nongina ughele uvi ematela aIjipi eteva ghalailoo?’ ²⁹ Nau Moses ghe nongola llo, ghe iloula eIjip me ghe lao sio tani ativuu etoka eMidien me isaa okae me ghe natunala ghalua.

³⁰ “Nau ghaatingauluae (40) ninamanama ghe ruula me ensolo ateva ghe otuotula ta ngetana tale voto ateva karika righi taumattu etana kalakalaa ia tale motouru eteva eSaenae, tale ramerame kura atea ghe ataata ai erighi. ³¹ Moses ghe soghiaala nau ghe tarala me ghe lao akalakalangingina sio tale ai erighi tani tara amasinaia me ghe nongola lingi ngalona ateva Vau eteva. ³² Ghe uela va, ‘Aghi kapuira Goto ieghi tuvum atoa me kapuna Goto ieghi Abraham, Aisiki me Jekop.’ Moses ang ghe reterete poli ghe matautula, me karika ghe aloanna tani taatara lao.

³³ “Vau eteva ghe uela etana va, ‘Ghaa vella unem aikasukasu ta kkem ta voto ateva utiitingina etana, manga ia. ³⁴ Aghe tarala sesa nimmarikana kapughu etoa laghe ghaala eIjip me ngaghe nongola ngangngalaaira me ngasio mae tani ghaa vella tale karavusu. Mae sio me asungio me umene oghi sio eIjip.’

³⁵ “Nim ie nonga o lo ateva Moses aIsraeli etoa laghe ratiela me laghe auliaa teeia inangari va, ‘See ghe uela va unamuu me ughelei niaisakei?’ Ta God nonga, tale ensolo ateva eghe aotuotula etana tale ai erighi ghe ataata, ghe sungiela va ia namuu ia me tau ngai ghaa oghi ia. ³⁶ Ia ghe ghaa vellala eIjip me ghe gheleila niaimatoongana me ase mirikolo atoa eIjip me eRet Sii me ghaatingauluae (40) ninamanama tale voto ateva karika righi taumattu etana.

³⁷ “Ie nonga o Moses ghe uela ta Israeli etoa va, ‘God aue etau aatu propete ateva aue enongina ghe atinginaieghe saela, elome ta ngetaimim.’ ³⁸ Moses ghe tokatoka aitauaa teeila tale voto ateva karika righi taumattu etana, me

7:17: Eks 1:7-8. **7:19:** Eks 1:11-22. **7:20:** Eks 2:2. **7:21:** Eks 2:3-10. **7:24:** Eks 2:11-15.
7:28: Eks 2:14. **7:29:** Eks 2:21-22; 18:3-4. **7:30:** Eks 3:1-10; Apos 7:30-34. **7:35:** Eks 2:14.
7:36: Eks 7:3; 14:21; Nam 14:33. **7:37:** Diut 18:15. **7:38:** Eks 19:3.

ensolo ateva ghe sama teeiela tale motouru eteva eSaenae me ghe ghaala inangari maulue tani asaoki etaita.

³⁹ “Me tuvuita atoa laghe tam nongo usilainiela me laghe ratiela me elome tale urunguitaniira, laghe mene oghiaa lao sio eIjip. ⁴⁰ Laghe uela ta Eron va, ‘Gheleila righi kapuita goto me emuemueinita, poli ia oia taumattu ngateva ta Moses ghe kolo velutala eIjip, karika ngami ghe kilala va sa ateva ang ghe lutula etana.’ ⁴¹ Isaa o nau laghe gheleila natu tootoo vulumakao arighi me laghe gheleila aiaavususuvusuna etana, me laghe gheleila paka maakiikii eteva tani tau sae voto nimaira ghe gheleila. ⁴² God ghe oghi vululala me ghe tau vellala tani kkaua voto elomarase. Isaa o voto ghe asokoila llo propete atoa laghe pitila tale uneira vuku va,

“ ‘Am Israeli etoa karika am ghe tau mae sio righi aiaavususuvusuna etaghi nau am ghe kasula ghaatingauluae (40) ninamanama tale voto ateva karika righi taumattu etana.

⁴³ Am ghe sausau see alena ale kandisi eteva kapuimim goto ateva ta Molok me kapuimim katto goto ateva ta Repan tootoo ateva am ghe gheleiela va am kkaueinia.

Liuna avalua o me aue atau veluem me la ghaaiem sio eBabilon.’

⁴⁴ “Tuvuita atoa laghe tokatoka tee ale manga kandisi eteva ia o laghe sausau see tani apasunga va God etokatoka elome etaira nau laghe kasukasu tale voto ateva karika righi taumattu etana. Laghe gheleiela nongina vaalua God ghe auliaala ta Moses me vaalua ghe tarala tootoona ateva. ⁴⁵ Mene kateva vituu ta tuvuita atoa laghe ghaaiela, me nau Josua ghe mene aitarainilala, laghe sau teeie mae sio nau laghe mae sio tani ghaa ia oia kosa ateva tale llo anua God ghe karati vellala. Ghe tokala o lomosina ta ghe laa ghaa sio nau ta Deivit. ⁴⁶ God ghe masimasieiniela, liuna avalua o me Deivit ghe kolomila va eghelei teva ale aitokatokane kapuna Goto ateva Jekop. ⁴⁷ Me karika, ta Solomon ghe atulula alena ateva.

⁴⁸ “Me lo ateva Iaaili Epona karika etokatoka tale ale taumattu ngatoa la ghelei, nongina propete ateva ghe uela va,

⁴⁹ “ ‘Vau ngepona ateva ghe uela va, “Epona liu aitokatokaghi ia me kosa ateva, aiatingina kkeghi ia.

Sa ateva ale am mene anna tani atulu me ealeghi?

O saa mene teva voto aue aghainoana etana?

⁵⁰ Karika va nimaghi ghe gheleila isaa akapa o voto?” ’

⁵¹ “Am aakorokorongana nannaaimim me urunguitaniimim me non-gonongoaaimim nongina tau ngeleka atoa. Nau ekapa atoa karika am aaloanna tani nongo Spirit Manga ateva nongina tuvuum atoa. ⁵² Am anna teva propete tuvuum atoa karika laghe ghelei saasakiaa teeiela? Laghe uvi emate teela lo atoa laghe aaulia ngamuemua ngalokoi, maemaeane lo ateva ghulughuluena ia. Me isaa oia nau ngam ghe aitaueiniela me ngam ghe uvi emateala. ⁵³ Am oia am ghe ghaala inangari nipaopao ensolo atoa laghe taula ta Moses me karika am aimuli tee!”

Laghe kumla Stipeni tale atu

⁵⁴ Nau laghe nongola llo ghe sessai etinginailala me laghe aingeresia ngalungaluire etana. ⁵⁵ Me Stipeni, pasu ia tale Spirit Manga ateva, ghe taatara saela epona liu me ghe tarala mallangina ateva God me Iesu ghe tiitingina tale pai muenna ativilau ta God. ⁵⁶ Me ghe uela va, “Am

7:40: Eks 32:1. **7:41:** Eks 32:2-6. **7:42:** Eimos 5:25-27. **7:45:** Jos 3:14-17. **7:46:** 2 Sam 7:1-16. **7:47:** 1 Ki 6:1-38. **7:49:** Ais 66:1-2. **7:51:** Ais 63:10. **7:52:** Mat 23:31. **7:55:** Sams 110:1. **7:56:** Kol 3:1.

tarala, ngatarala epona liu ange otiela me Natuna ateva Taumattu ngateva etiitingina tale pai muenna ativilau ta God.”

⁵⁷ Tale isaa o inangarina me laghe rrongi rungaala talingaira me laghe aaore atingina me ila akapa laghe ilou lao sio etana. ⁵⁸ Laghe ae velue ghoala tale masaliki taatara atea me laghe tiuaala tani kumua tale atu. Me lo atoa laghe nongoala laghe alokoila ghinnaniira ta liue kkena aliki taita ateva, Sol ta ngetana.

⁵⁹ Nau laghe kumkumua, Stipeni ghe looloo saela me ghe uela va, “Vau eteva Iesu, ughaa maamauluaaghi.” ⁶⁰ Me ghe suuiaala ta patu kkena me ghe sama anamuula me ghe uela va, “Vau eteva, urau mene annaa kaluira ssavoto.” Nau ghe aulia ngavaluela o me ghe asekanuela.

8

¹ Me Sol ie tee okae, me ta matane Sol, voto laghe ghelei teela Stipeni ghe tarala va masina.

Sol ghe tiuaala tani tturuu tau ngaiesoa ngatoa

Tale nau eteva Stipeni ghe matela etana, laghe tiuaala o tani uvi saasakiaa tau ngaiesoa ngatoa eJerusalem. Liuna avalua o me tau ngaiesoa ngatoa laghe iloula eJerusalem me laghe lao sio tale masaliki etoa eJudia me eSameria. Me apostolo atoa laghe tokala. ² Kapuna taita atoa laghe tani aikaaiaa ta God laghe kaiaala Stipeni me laghe kaarasila tani ngalaia. ³ Me Sol ghe tiuaala tani tturuu tau ngaiesoa ngatoa. Ghe kupikupi kateva kateva ale me ghe kunekune velu ghoa taita me vause atoa me ghe laa ghaatokaila sso tale ale mata voovoo.

Pilipi ghe poppooaa eSameria

⁴ Lo atoa laghe ilou reerekataa seela laghe poppooaa inangarina ateva Iesu ta kona laghe laolao. ⁵ Pilipi ghe lao sio tale kateae masaliki taatara eSameria me ghe ppoaala Mesaea etaira. ⁶ Oroi ila taumattu ngatoa nau eteva laghe nongola inangarina Pilipi, me laghe tarala niaimatootoongana ghe gheleila me laghe nongo amasinaailiila inangari ghe auliaala. ⁷ Laghe tarala Pilipi ghe tiu vella raroai etoa tale oroi taita me vause. Raroai etoa laghe aaore anamuu nau eteva laghe kupikupi vulu ghoa taumattu ngatoa. Me oroi ila lo atoa vilikiira matena me tangorengorena laghe masinala. ⁸ Isaa avalua o me paka nimasimasi eteva ghe lutula elome tale ia o masaliki taatara atea.

Saemon tau raroai ia

⁹ Kateva taumattu ghe tokatoka elome tale masaliki taatara atea, ararina atea ta Saemon, muennaaili ia tani ghelei nialaala. ASameria ngatoa laghe soosoghiaa voto laghe taatara ta ghe gheeghelei, me ghe saasaea nannaa va ia namuu ia. ¹⁰ Tau ngaitoitoi etoa me nim taumattu ngatoa, ila akapa laghe nongonongo inangarina, me laghe ue va, “Taumattu ngateva oia sarasarakaniaa ngepona liu namungaili etana.” ¹¹ Laghe nongonongoa poli oroaata laghe soosoghiaa nialaala ghe ghelei. ¹² Me nau eteva Pilipi ghe poppooaa masi inangari tale ararimangalina ateva God me ararina atea Iesu Karisto, lo atoa laghe aikaaiaa, taita atoa me vause atoa, laghe ghaala niaasuu. ¹³ Saemon ia tee eghe aikaaiaala me ghe ghaala niaasuu. Ghe aimuli teela Pilipi me ghe taatara kinatama niaimatootoongana me mirikolo Pilipi ghe ghelei me ghe soosoghiaa.

¹⁴ Nau apostolo atoa eJerusalem laghe nongola va aSameria ngatoa laghe aikaaiaala inangarina God, laghe suula Pita me Jon tani laa taraila. ¹⁵ Nau

lalu ghe rekatala, lalu ghe looloo saela ta God va Spirit Manga ateva esio ta aSameria ngatoa, ¹⁶ poli Spiriti eteva karika ghe mae etaira. Laghe nim ghaala niaasuu tale ararina atea Vau eteva Iesu. ¹⁷ Nau eteva lalu ghe ruula tani looloo sae, lalu ghe saoaala nimairarua etaira me laghe ghaala Spirit Manga ateva.

¹⁸ Saemon ghe tarala va apostolo alua lalu ghe saoaala nimairarua etaira me laghe ghaala Spiriti eteva. Liuna avalua o me eghe ghaala viliki veu me ghe laoa sio etairarua, me ghe uela va, ¹⁹ “Amalu tau mae sarasarakana ateva ona tee etaghi, me arova asaoa tee nimaghi ta toa taumattu, la rooro tani ghaa Spirit Manga ateva.”

²⁰ Pita ghe liula ta Saemon me ghe uela va, “Aue God eturungi eitauaa teeio me unem viliki veu, poli unannaa va upoli tale viliki veu voto God enim tautau mae. ²¹ Karika righi uunguaam tale niuungu eteva oia, ta nannaam karika ghulughuluena ta matane God. ²² Unna ngaioghioghiaa me uvelu sesa ninanna me ulooloo sae ta Vau ngepona ateva va marova ealoanna, aue ekkaluaa isaa o sesa ninanna tale urunguitanim ateva. ²³ Ataata va nannaam epasupasu tale nissai, liuna avalua o ssavoto ateva ang ghele iri etokaiola.”

²⁴ Vara me Saemon ghe uela va, “Amalu looloo sae ta Vau ngepona ateva me amalu aulieinaghi sae me isaa o voto amalu auliaala erau mene lutu etaghi.”

²⁵ Nau lalu ghe ruula tani ppooa ngaotu inangarina ateva Vau ngepona ateva, lalu ghe kiriaa saela eJerusalem, lalu ghe kasu poppooa elaa saesae masi kiukiu tale oroi masaliki eSameria.

Pilipi me aItiopia ngateva

²⁶ Kateva kapuna ensolo Vau ngepona ateva ghe uela ta Pilipi va, “Ukasu me ulao tale pai saot ativilau tale salana atikirighi karika righi taumattu etana, ia o salana atikirighi ekasukasu eJerusalem me esiosio eGaza.”

²⁷ Pilipi ghe tiuaala tani kasu, ghe laolao me ghe soula taumattu nge Itiopia ngateva, namuu ia, uunguaane tani aitara isaa akapaaili unna viliki veu Kandake, kuiini nge Itiopia ia. Ia o taumattu ngateva ghe saela tani kkaua eJerusalem, ²⁸ me ghe oghiaala tani lao tanganuena, ghe tokatoka epona tale ai-ilou eteva, me ghe ritiriti vuku eteva ta propete ateva ta Aisaea. ²⁹ Me Spiriti eteva ghe uela ta Pilipi va, “Ulaa kasu karanga tale unna ai-ilou eteva.”

³⁰ Liuna avalua o me Pilipi ghe ilou lao sio tale unna ai-ilou eteva, me ghe nongola taumattu ngateva ghe ritiriti inangari tale vuku eteva ta propete ateva Aisaea. Me Pilipi ghe kolomiela va, “Vaalua, ukilakila llo ona uritiriti?”

³¹ Ghe uela ta Pilipi va, “Vaalua akila, nau eteva karika teva tani asaoki tau mae me akila? Lau sae mae tale ai-ilou eteva me usae toka teeieghi.”

³² Namu ngateva ghe ritiriti inangari tale Uru ngai Manga ateva eue va, “Laghe ghaaie lao sio tani uvia nongina sipsipi eteva,
me nonginaaili tee natu sipsipi erighi nau la ghaaloanna tani sunapi
velu uuna tale vilikina,
karika ghe otila paane ateva tani ppooa righi inangari.

³³ Laghe gheleila ararina atea ghe siola eue me ghe sesala. Karika laghe gheleie eghulughuluena unna niaisakei etea.
Isaa avalua o me karika aue la kiukiuua natuna atoa,
poli laghe ruula maamauluaane tale kosa ateva.”

³⁴ Namu ngateva ghe kolomila Pilipi va, “Uauliaa etaghi va propete ateva oia ghe aauliaa see? Eaulieinia, o mene kateva ppae taumattu?” ³⁵ Vara me Pilipi ghe otila paane ateva me ghe tiuaala tani auliaa isaa o inangari tale Uru ngai Manga ateva me ghe auliaala masi kiukiuna Iesu etana.

³⁶⁻³⁷ Lalu ghe iilou elaolao tale salana atikirighi me lalu ghe rekatala tale ateo atea, me ghe uela namu ngateva oia va, “Tarala, ateo atea o. Vaalua, karika urooro tani asuueghi?”* ³⁸ Namu ngateva ghe auliaala ta lo ateva ghe iilouaa ai-ilou eteva va etoka mua. Pilipi me namu ngateva lalu ghe kkure siola me lalu ghe siola tale ateo atea me Pilipi ghe asuuela. ³⁹ Nau eteva lalu ghe lau sae mae tale ateo atea, kapuna Spiriti eteva Vau ngepona ateva ghe ghaala Pilipi me ghe kasueiniela. Namu ngateva ghe tam mene tara poila Pilipi. Ghe pasula tale nimasimasi poli ghe aiesoala ta God, me ghe lao sio tanganuena. ⁴⁰ Pilipi ghe rekataala tale masaliki taatara atea eAsotus, me ghe kasu ekapa seela tale mene kasina masaliki tani ppoaa masi inangari lomosi ta ghe laa rekata sio eSiisaria.

9

Sol ghe aikolikoliaala

¹ Tale isaa o nau Sol ghe kakkalui tani uvi emate lo atoa laghe aaimuli tee Vau eteva. Liuna avalua o me ghe lao sio tani tara namu ngateva ta pristi etoa, ² me ghe kolomiela va epiti uru ngai me Sol esau sio ta namu ngatoa tale ale nivelu eitaua ngakapaaili eDamaskas. Me uru ngai eauliaa va arova Sol etara lo atoa, taita me vause, la uusilaa salane Iesu, aue ekuneila me esaeainila tale ale mata voovoo ateva eJerusalem. ³ Nau Sol ghe kasu vulila eJerusalem me ang ghe kalakalaa eDamaskas me arovaeaata nonga ta mallanga ateva ghe sio mae epona liu me ghe akouela. ⁴ Me Sol ghe katuu siola tapaa kosa me ghe nongola lingi ngalo ateva ghe uela va, “Sol, Sol, vaalua me ugheelei saasakieinaghi?”

⁵ Me Sol ghe kolomila va, “Namu ngateva, io see?”

Lingi ngalo ateva ghe liula me ghe uela va, “Aghi Iesu ugheelei saasakieinaghi. ⁶ Totula me usso tale masaliki taatara atea me aue uso kila sa ateva aue ugheleia.”

⁷ Taita atoa laghe kasukasu tee Sol laghe matautu etinginala me karika rigi nisama etaira. Laghe nongola lingi ngalo ateva me karika laghe taatara teva taumattu. ⁸ Sol ghe totu saela tapaa kosa me nau ghe otila matane karika ghe roola tani tara teva voto. Liuna avalua o me laghe kunela nimane me laghe katulainie ssola eDamaskas. ⁹ Kotolu nau ghe mata salusalula me karika ghe namanamala me karika ghe ropi poila.

¹⁰ Kateva disaepolo eDamaskas, ararina atea ta Ananaeas, Iesu ghe sama teeiela tale nitaatara atea, ghe uela etana va, “Ananaeas!”

Ananaeas ghe liula me ghe uela va, “Ue Vau eteva, aghi toko.”

¹¹ Me Vau eteva ghe uela etana va, “Aimanomanosiaala me ukasu lao tale salana atikirighi la kolokoloa va Ghulughuluena etana, me tanganuena Jiudas ukolomi taumattu ngateva atala nge Tases ia, ararina atea ta Sol. Ia okae esso looloo sae, ¹² me tale nitaatara atea Sol ghe tarala taita ateva ararina atea ta Ananaeas ghe kupi ssola me ghe saoaala nimane etana me matana ghe mene taatarala.”

8:36-37: Apos 10:47. * **8:36-37:** Kasina uru ngai laghe pitila laghe piti teela va, ³⁷ Pilipi ghe liula me ghe uela va, “Arova uaaikaaiiaa tale urunguitanim ateva, urooro tani ghaa niasuu.” Namu ngateva ghe liula me ghe uela va, “Aghaaikaaiiaa va Iesu Karisto Natuna ia God.” **8:40:** Apos 21:8. **9:1:** Apos 8:3.

¹³ Ananaeas ghe liula me ghe uela va, “Vau eteva, oroi taumattu ghe auliaala etaghi kiukiuna Sol me voto sesa ghe gheleila ta kapum taumattu ngatoa eJerusalem. ¹⁴ Me ghe sio mae oia eDamaskas ta ghe ghaala matuutuliena ta namu ngatoa ta pristi etoa tani kune lo atoa la kolokolo tau ararim atea.”

¹⁵ Vau eteva ghe uela ta Ananaeas va, “Lao sio poli ngaghe suitoongainiela va ia aue eghelei uunguaaghi tani aulia ngaotu ararighi etea ta taumattu ngeleka atoa me kingi etoa me taumattu nge Israeli tee atoa. ¹⁶ Aue aghapasunga etana va aue etani ghaa oroi nimmarikana ta poli ararighi etea.”

¹⁷ Vara me Ananaeas ghe lao sio me ghe ssola tale ale ateva Sol ghe tokatoka etana me ghe saoaala nimane ta Sol me ghe uela va, “Nengaghi Sol, Vau eteva esungieghila, ia o Iesu etana ghe aotuotula etam etapaa salana nau ughe mae siosio. Esungieghi mae sio etam va io urooro tani mene taatara, me aue upasu tale Spirit Manga ateva.” ¹⁸ Arovaeaata nonga ta llo arova vaka kko ghe kao vella ta matane Sol me ghe mene taatarala. Ghe totu saela me ghe ghaala niaasuu. ¹⁹ Me nau eteva ghe namanamala me ghe mene sarasarakanala.

Sol ghe poppooaa eDamaskas

Sol ghe mene tokala kasina nau tee disaepolo atoa eDamaskas. ²⁰ Arovaeaata ta ghe tiuaala tani ppooaa Iesu tale aleira ale nivelu eitauaa, ghe aulia ngaotu va Iesu Natuna ia God. ²¹ Taumattu ngakapa atoa laghe nongola me laghe soghieiniela me laghe aippooaa elome etaira va, “Ia oia taumattu ngateva ghe uviuvi lo atoa eJerusalem la kolokolo tau ararina atea Iesu. Me ghe sio mae oia tani kune tau ngaiesoa ngatoa va esaeainila ta namu ngatoa ta pristi etoa.” ²² Me nau eteva Sol ghe poppooaa inangarina ateva Iesu, ghe tuttukueili ajiu etoa laghe tokatoka eDamaskas, me laghe soghiaala me karika laghe roola tani kaili ekamena va Iesu Mesaea ia.

²³ Oroi nau ghe lange sio me ajiu etoa laghe velu eitauaala me ngila ghe loeloe Sol tani uvi ematea. ²⁴ Me karika, ta Sol ghe kilala voto laghe loela. Ellaa me eleivoo laghe lollosainia tale isaa akapa paa ngatamana elome tale masaliki taatara atea tani uvi ematea. ²⁵ Kateva eleivoo, kapuna disaepolo atoa Sol laghe ghaala kinatama keru eteva me laghe kaaila Sol me laghe rekatala uasa eluekirighi, me laghe taue siola eleka tale valata me ghe kasula.

Sol ghe saela eJerusalem

²⁶ Nau eteva Sol ghe rekatala eJerusalem ghe tootoonga tani lao aitauaa tee disaepolo atoa, me ila akapa laghe maamatautainia ta karika laghe aaiesoaa va Sol ang ghe disaepolola. ²⁷ Vara me Banabas ghe mae sio tani sausia. Ghe ghaala Sol me ghe laoinie sio ta apostolo atoa tani aulia ngamasalika etaira vaalua Sol ghe tarala Vau eteva etapaa salana me Vau eteva ghe sama teiela, me ghe mene lao tee sio tani auliaa vaalua Sol karika ghe maamatautu tani ppooaa tale ararina atea Iesu eDamaskas. ²⁸ Liuna avalua o me Sol ghe toka aitauaa teilala me ghe kasukasu ekapa see eJerusalem me karika ghe maamatautu tani ppooaa tale ararina atea Vau eteva. ²⁹ Sol me lo atoa ajiu ila la samasama nge Grik laghe aissakeanaala me ngila ghe loeloe tani uvi ematea. ³⁰ Nau katoa disaepolo laghe kilala, laghe sioaala Sol eSiisaria me laghe sungie lao sio eTases.

³¹ Liuna avalua o me ale manga akapaaili eJudia, eGalilii me eSameria laghe tokala tale luei me Spirit Manga ateva ghe akorokoronganailala tani toka me tani tau sae Vau eteva, me ghe aisausieinilala me laghe oroieili ila.

Aenias me Dokas

³² Nau Pita ghe kasu ekapa seela ghe lao tee sio eLida tani tara katoa kapuna taumattu God laghe tokatoka okae. ³³ Isaa eLida me ghe tarala taumattu ngateva ararina atea ta Aenias tangorengorena ia me ghe asola tale komo ghaoaluae (8) ninamanama. ³⁴ Pita ghe uela etana va, “Aenias, Iesu Karisto aue eghelei emasinaio. Totu saela me ughou komom.” Arovaeangaili ta Aenias ghe totu saela. ³⁵ Taumattu ngakapa atoa laghe tokatoka eLida me eSeron laghe taraiela me laghe tiuaala tani aiesoaa ta Vau ngepona ateva.

³⁶ Isaa eJopa kateva disaepolo vause ia ararina atea ta Tabita (tale aseasea nge Grik, Dokas, malloeana va, kateva ghaata kkena la aseasea va dia). Tale nau ekapaaili ghe ghelei masi niuungu me ghe saausi taumattu karika righi peiira. ³⁷ Tale isaa o nau Pita ghe tokatoka eLida, me Tabita ghe isikila me ghe matela. Laghe suusiela me laghe saeainiela tale ale ngepona atiulu. ³⁸ EJopa kalakalangina ia eLida, liuna avalua o me nau disaepolo atoa laghe nongola va Pita eLida, laghe suula taumattu ngalua tani laa kolo Pita va emae parasi.

³⁹ Isaa arau o Pita ghe usilalu. Nau lotolu ghe rekatala eJopa lotolu ghe saela epona tale ale ngepona atiulu me ghe tarala vause atoa raue vulu ila pasueili ila tale ale atiulu, me laghe tiitingina emua ta Pita me laghe ngangngala, me laghe aapasunga ghinna Dokas ghe gheleila nau mauue ia.

⁴⁰ Pita ghe sungi vella ghoala eleka me ghe suuiaala tani looloo sae. Vara me ghe taatara lao sio tale vause ateva matena ia me ghe uela va, “Tabita, totu saela.” Tabita ghe otila matane, me nau ghe tarala Pita me ghe totu etokala. ⁴¹ Pita ghe posola nimane atelange me ghe sausiela tani tingina sae. Vara me ghe kolola vause atoa raue vulu ila tee mene katoa tau ngaiesoaa me ghe tau lao sio Tabita etaira mauue ia. ⁴² Kiukiu ghe rooaala eJopa me oroieili taumattu ghe aikaiaala ta Vau ngepona ateva. ⁴³ Pita ghe mene tokala oroi nau eJopa tee taumattu ngateva ararina atea ta Saemon uunguaane tani kuluki viliki ghaata kkena tani ghelei mene kasina asease voto.*

10

Konilies ghe kolola Pita

¹ Isaa eSiisaria, taumattu ngateva, ararina atea ta Konilies, ghe tokatoka. Ia kateva namuu ghe muemuaa kateva ai (100) tau ngai uvii tale Kohot ateva laghe aseasea va Kohot nge Itali ia.* ² Ia me vausenna ateva me natuna atoa laghe aikaiaa ta God me laghe oneoneainia. Ghe tautau lao voto tale taumattu karika righi peiira me ghe looloo sae ta God nau ekapa atoa. ³ Kateva nau ta 3 kilok elo alai† ghe tarala kateva nitaatara. Ghe tarala kapuna ensolo ateva God ghe mae sio etana me ghe uela etana va, “Konilies!”

⁴ Konilies ghe taatara lao sio etana me ghe matautula me ghe uela va, “Vau eteva, vaalua?”

* **9:43:** Voto atoa nongina aikasukasu, aikaai ghinna, kou nguru, paisi, me mene kasina ase voto.

* **10:1:** Kohot nge Itali ia Tau ngai uvii tale Kohot nge Itali ia, ila atala nge Itali ila. † **10:3:** 3 kilok elo alai Ta inangari nge Grik, tale aiaaghasiona (9) ateva aoa.

Me ensolo ateva ghe uela etana va, “Unem nilooloo sae me masi uunguaam tale taumattu karika peiira, God ghe masimasiaala. ⁵ Ghaine usuu righi taumattu tani lao eJopa me la laa kolo taumattu ngateva Saemon la kolokoloa va Pita etana. ⁶ Etokatoka tee mene kateva Saemon uunguaane tani kuluki viliki ghaata kkena tani ghelei mene kasina asease voto, me alena ateva etokatoka kalakalangina ghoa elamana.”

⁷ Nau ensolo ateva ghe kasula, me Konilies ghe kolola ghalua tana kapuna tau ngai nongonongo anna me kateva kapuna tau ngai uvii ie tee ghe aaiesoaa ta Vau ngepona ateva, ⁸ me ghe aulia ngakapala voto ghe lutula me ghe sungilotolla me laghe lao sio eJopa.

Unna nitaatara atee Pita

⁹ Mene kateva elo sinaka, nau ngila ghe kalakalangina tale masaliki taatara atee eJopa, me Pita ghe saela epona tale ale ateva† tani looloo sae. ¹⁰ Ghe maamalo me ghe anna tani nama righi inana. Nau laghe aaimonomosiaa inana me ghe tarala nitaatara atee. ¹¹ Ghe tarala epona liu ghe otiela me ghe tarala voto ateva namuu ia nongina tiulu kalio reerekati aighoughouna ghaata me ghe sio mae tale kosa ateva. ¹² Elome etana asease ghaata kkena atoa me llo erarraa euu me ghila atoa la looloo elomarase. ¹³ Vara me lingi ngalo ateva ghe uela va, “Pita! Totu saela me ughuvi emate llo me unama.”

¹⁴ Pita ghe liula me ghe uela va, “Karika poi arooro, Vau ngepona ateva! Karika poi aghe nama righi voto karika raarangisana.”

¹⁵ Lingi ngalo ateva ghe mene mae sio ghaluene etana me ghe uela va, “Urau mene ue va karika raarangisana llo God ang ghe ghelei eraarangisana.”

¹⁶ Ghe lutula kotoluaata vara me arovaeaata ta kalio atiulu ghe mene saela epona liu.

¹⁷ Nau Pita ghe anna poi va saa malloeana ia o nitaatara atee me taumattu Konilies ghe suula laghe tarala alena ateva Saemon me laghe tingina ssola tapaa ngatamana. ¹⁸ Laghe kolokolola me laghe kolomila va, “Saemon Pita etokatoka oia?”

¹⁹ Pita karika ghe ruu tani nnaa nitaatara atee me Spiriti eteva ghe uela etana va, “Saemon, taumattu kotolu lotolu paepaeo. ²⁰ Tingina saela me usio tarailotolu me urau mene rati tani usilotolu ta aghi asungilotolula.”

²¹ Pita ghe siola me ghe uela ta taita kotolu va, “Aghi oia, am paepaeaghi. Vaalua me am mae sio?”

²² Taita kotolu lotolu ghe liula va, “Ami kasula tanganue Konilies, kateva namuu, tau ghulughuluena ia me eoneoneaa God. Taumattu nge Jiu ekapa atoa la oneoneainia. Ensolo manga ateva ghe auliaala etana va ekoloo me ulao tanganuena me ulaa ghauliaa saa llo voto aue uauliaa me aue enongo.”

²³ Pita ghe uela etairotolu va, “Ita ghaso.”

Pita tale alena ateva Konilies

Ghe pai saela ta mene kateva nau, me Pita me mene katoa tau ngaiesoa nge Jopa laghe usila taita kotolu me laghe kasula. ²⁴ Vara aiaaghaluene ateva nau, laghe rekataala eSiisaria. Konilies ghe kolo aitauaala mangalina atoa me kapuna atoa, me laghe toitoi Pita. ²⁵ Nau eteva Pita ghe maemae, Konilies ghe souela me ghe suuiaala ta liue kkena tani oneoneainia. ²⁶ Pita

† **10:9:** Ale atoa eIsraeli karika righi pungane nongina ale ghaine. **10:14:** Lev 11:1-47; Esik 4:14.
10:15: Mak 7:15, 19. **10:26:** Apos 14:13-15; Aotu 19:10.

ghe kune atinginaie saela me ghe uela etana va, “Tingina saela! Aghi nim taumattu ieghi nongina io.”

²⁷ Nau lalu ghe samasama, me lalu ghe kupi ssola me Pita ghe tarala oroi taumattu ngatoa ngila ghe velu eitauaala. ²⁸ Ghe uela etaira va, “Am kilakilaaili uneimami inangari nipaopao va aJiu etoa karika la rooroo tani aighui tee tau ngeleka atoa me tani laa taraila. Me God ghe apasungaala etaghi va karika amene ue va kasina taumattu karika raarangisana. ²⁹ Liuna avalua o me nau eteva am ghe suula inangari etaghi va amae, karika aghe ratila tani mae. Erooroo va am auliaa vaalua me am ghe uela va amae?”

³⁰ Konilies ghe liula me ghe uela va, “Kotolu nau ang ghe lange sio, aghe tokatoka tanganueghi me ta 3 kilok elo alai, § nongina ghaine, aghe looloo sae me taumattu ngateva ghinnanina ghe maamallanga ghe tinginala emua etaghi. ³¹ Me ghe uela etaghi va, ‘Konilies, unem nilooloo sae me masi uunguaam tale taumattu ngatoa karika peiira, God ghe masimasiaala. ³² Usungi righi taumattu elao ta Saemon Pita eJopa etokatoka tanganuena Saemon uunguaane tani kuluki viliki ghaata kkena tani ghelei mene kasina asease voto, me alena ateva etokatoka akalakalangina ghoa elamana.’ ³³ Liuna avalua o me arovaeaata ta aghe suula inangari etam me masinaaili etam ta angu mae sio. Vau ngepona ateva aue etoka aitauaa teeita nau eteva uauliaa sa ateva ghe sungiola tani mae aulieinia me ami nongoa.”

³⁴ Vara me Pita ghe tiuaala tani aippooaa, ghe uela va, “Ghaine ngatarala va koronna God karika eaaimassiaa. ³⁵ Me tale isaa akapaaili patunganua namuu, God ealoanna lo atoa la oneoneaa nonga God, me la ghelei voto masina. ³⁶ Am kilakila inangarina God ghe suula ta taumattu nge Israeli etoa, masi inangari va luei ekasu ta Iesu Karisto, ia Vau ia tale ila akapaaili taumattu ngatoa. ³⁷ Am kilakila sa ateva ghe ailutuaala eJudia. Jon ghe aippooaa tale niaasuu eteae, me emulina, Iesu ghe tiuaala tani uungu eGalilii. ³⁸ Me am kilakila vaalua God ghe tau lao sio Spirit Manga ateva me sarasarakana ta Iesu aNasareti ia, me vaalua ghe kasu ekapa seela me ghe gheeghelei masi niuungu me ghe gheeghelei emasina lo atoa taumattu sesa taumattu ngateva ghe ghelei saasakieinilala, ta poli God ghe tokatoka teeia.

³⁹ “Ami, ami ghe tara akapala voto ghe gheleila tale masalikiira aJiu etoa me eJerusalem. Laghe avukalaie saela tale ai eteae tani uvi ematea. ⁴⁰ Tale aiaakotonna ateva nau, God ghe totuela tale nimate va taumattu ngatoa la taraia. ⁴¹ Karika va ila akapa taumattu ngatoa laghe taraiela ta llo nonga atoa God ang ghe suitoongainilala. Nau ghe totula tale nimate, ami, ami ghe namanama me ami ghe ropi teeieila. ⁴² Ghe uela etaimami va ami ppooaa ta taumattu ngatoa me aulia ngaotu etaira va ia God ghe suitoongainiela va eghelei niaisakei ta lo atoa sakesake ila me lo atoa matena ila. ⁴³ Ila akapa propete atoa laghe aaulieinia va lo atoa la ghaiesoaa etana God aue ekkaluaa kaluira ssavoto tale ararina atea Iesu.”

⁴⁴ Nau eteva Pita ghe poppooaa isaa o inangari me Spirit Manga ateva ghe sio mae ta lo akapa atoa laghe nongonongo isaa o inangari. ⁴⁵ Tau ngaiesoa ngatoa isoisona ila laghe mae aitauaa tee sio Pita laghe soghila tani tara va Spirit Manga ateva ghe sio mae tee ta taumattu ngeleka atoa. ⁴⁶ Laghe nongolala ta laghe aippooaa tale asease nisama karika samasama tanganueira me tee laghe tautau sae God.

§ **10:30:** 3 kilok elo alai Ta inangari nge Grik, tale aiaaghasona (9) ateva aoa. **10:34:** Diut 10:17; Rom 2:11. **10:37:** Mat 4:12-17. **10:38:** Mat 3:16; Luk 4:17-21. **10:41:** Apos 1:8; Luk 24:42-43. **10:42:** Apos 17:31; 1 Pita 4:5. **10:43:** Ais 53:5-6; Jer 31:34; Apos 2:38. **10:44:** Apos 11:15; 15:8. **10:46:** Apos 2:4; 19:6.

Me Pita ghe uela va, ⁴⁷ “Teva erooroo tani ue va isaa oia taumattu erau mene ghaa niaasuu tale manu? Poli ngila ghaala Spirit Manga ateva nongina ita.” ⁴⁸ Me Pita ghe uela va la ghaa niaasuu tale ararina atea Iesu Karisto. Me laghe kolomila Pita va emene toka teeila mua mene righi nau.

11

Pita ghe auliaala malloeana voto ghe gheleila

¹ Vara me apostolo atoa me tau ngaiesoa ngakapa atoa eJudia laghe nongola va taumattu ngeleka atoa tee laghe aikaaiaala inangarina ateva God. ² Liuna avalua o me nau Pita ghe saela eJerusalem lo atoa isoiso ila tau ngaiesoaa ila laghe sama anamuu teeila, ³ me laghe ue va, “Io ughe lao sio tanganueira lo atoa karika isoiso ila me ughe namanama teeilala.”

⁴ Me Pita ghe tiuaala tani aulia ngamasalika saa voto ghe lutula. ⁵ “Aghe tokatoka tale masaliki taatara atea eJopa me aghe looloo sae me aghe tarala nitaatara atea. Aghe tarala voto ateva namuu ia nongina tiulu kalio reerekati aighoughouna ghaata me ghe kasula epona liu me ghe sio mae nongina aghe tokatoka. ⁶ Nau aghe taatara ssola elome tale kalio atiulu aghe tarala asease ghaata kkena atoa, lo atoa ita aaitarainila me lo atoa karika ita aaitarainila, me llo erarraa euu me ghila atoa la looloo elomarase. ⁷ Vara me aghe nongola lingi ngalo ateva ghe ue etaghi va, ‘Pita, utotu me ughuvi emate llo me unama.’

⁸ “Aghe liula me aghe uela va, ‘Karika poi, Vau ngepona ateva! Karika poi aghe nama righi voto karika raarangisana.’

⁹ “Lingi ngalo ateva ghe mae sio epona liu ghe mene aippooaala ghaluene me ghe uela va, ‘Urau mene ue va karika raarangisana llo God ang ghe ghelei eraarangisanala.’ ¹⁰ Llo oia ghe lutula kotoluaata me isaa akapa llo ghe mene saela epona liu.

¹¹ “Karika masau me taita kotolu laghe sungilotolla eSiisaria tani mae taraieghi, lotolu ghe mae sio tale ale ateva ami ghe tokatoka etana. ¹² Me Spiriti eteva ghe uela etaghi va, ‘Urau mene rati tani usilotolu ta aghi aghe sungilotolla,’ me isaa toko ghaonomo (6) kapughu laghe usieghila ami ghe kupi ssola tale alena ateva taumattu ngateva. ¹³ Ghe auliaala etaimami vaalua ghe tarala ensolo ateva ghe lao sio tanganuena me ghe uela va, ‘Suula inangari ta Saemon la kolokoloa va Pita etana, ia eJopa. ¹⁴ Ia aue emaeaa inangari egheleio me lo atoa tee tanganuem aue am saanga.’

¹⁵ “Nau eteva aghe tiuaala tani aippooaa, Spirit Manga ateva ghe sio mae etaira nongina ghe sio mae etaita nau ta Pentikos. ¹⁶ Me aghe annaala sa ateva Vau ngepona ateva ghe aulieiniela nau ghe uela va, ‘Jon ghe aasuu taumattu tale manu me am aue am ghaa niaasuu tale Spirit Manga ateva.’ ¹⁷ Liuna avalua o me poli God ghe tau lao sio kateva nonga ia voto ateva karika ita polipolia nongina ang ghe taue mae sio etaita lo atoa ita aikaaiaa ta Iesu Karisto, aghi tee karika arooroo tani ghelei runga uunguaane God.”

¹⁸ Nau eteva laghe nongo avaluela o karika laghe mene auliaala righi voto. Ta ngila ghe nim tautau sae God me laghe ue va, “God ange tau lao sio ninna ngaioghioghiaa ta taumattu ngeleka atoa va la kiri mae etana me la saanga.”

Ale manga eAntiok

¹⁹ Nau eteva lo atoa laghe ilou reerekata seela nau laghe uvi ematela Stipeni, laghe lao sio arau tale distriki eteva ePoenisia me patunganua ateva

eSaeprasi me tale masaliki taatara eAntiok tale provinsi eteva eSiria me laghe poppooaa ta aJiu nonga atoa. ²⁰ Katoa etaira atala nge Saeprasi ila me tale masaliki taatara atea eSaerini laghe lao sio eAntiok me laghe tiuaala tani ppoaa ta aGrik tee atoa. Laghe aauliaa masi inangarina Vau eteva Iesu. ²¹ Sarasarakaniaane Vau eteva ghe tokatoka teeila, mausina avalua o me oroieili taumattu ghe aikaiaala me laghe kiri mae sio ta Vau eteva.

²² Tau ngaiesoa ngatoa eJerusalem laghe nongola voto o me laghe suula Banabas tani lao eAntiok. ²³ Nau eteva ghe rekatala me ghe tarala vaalua maamasinaane God namungaili, ghe masimasieliila me ghe asarasakanailala tani toka akorokorongana ta Vau eteva tale urunguitaniira. ²⁴ Ia masi taumattu ia me pasu ia tale Spirit Manga ateva me korokorongana ia tale niaikaiaa, me oroieili lo atoa laghe mene sso mae tani aimuli tee Vau eteva.

²⁵ Vara me Banabas ghe lao sio eTases tani pae Sol. ²⁶ Nau eteva ghe taraiela ghe koloala me ghe laoainie sio eAntiok. Tale kasangaulu ghalua (12) ulana lalu ghe toka teela ale manga atoa me lalu ghe aapasunga inangarina ateva God ta oroi taumattu ngatoa. Me isaa eAntiok laghe ase akasinala disaepolo atoa va Kristen ila.

²⁷ Tale isaa o nau katoa propete laghe kasula eJerusalem me laghe sio mae eAntiok. ²⁸ Kateva etaira, ararina atea ta Agabas, ghe tinginala tale korokoronganiaane Spiriti eteva me ghe aulia ngaotula va maloo ateva sesaaili ia aue erooa ngakapa kosa ateva, me nau Klaodies Siisa ghe aaitoiaa eRom, maloo ateva ghe lutula. ²⁹ Nau laghe nongola inangarina Agabas, laghe annaala va la sausi lo atoa eJudia, me kateva kateva ta disaepolo atoa laghe aisokosokoiaala viliki veu tale aloannaaira. ³⁰ Banabas me Sol lalu ghe ghaala viliki veu me lalu ghe laoaa sio ta namu ngatoa tale ale manga eJerusalem.

12

Laghe uvi ematela Jeimis, me Pita laghe atokaie ssola tale ale mata voovoo

¹ Isaa o nau king Herot ghe tiuaala tani kune katoa tale ale manga, tani ghelei saasakieinila. ² Ghe auliaala me laghe sai pulela alona atiulu Jeimis tuena Jon tale baenata ateva. ³ Nau Herot ghe tarala va aJiu etoa laghe masimasiaala llo ghe gheleila, me ghe mene auliaala me laghe mene kunela Pita, tale nau nivelu eitaua ngateae tani nama verete karika righi isti etana. ⁴ Ghe atoka ssola Pita tale ale mata voovoo me ghe atinginala kasangaulu ghaonomo (16) soldia laghe aikoli tani aitoieinia, ghaata mua soldia ta kateae nitoitoi. Herot ghe anna va eaisakei tale tummatavanga nau Pasova eruu.

⁵ Nau Pita ghe tokatoka tale ale mata voovoo me tau ngaiesoa ngatoa tale ale manga laghe looloo asarasarakana sae ta God va esausia.

Pita ghe kupi ghoala tale ale mata voovoo

⁶ Ia o voo ngateva me ghe pai Herot ghe atinginaia emua ta mata ngoroi etoa me ghe aisakei, Pita ghe aseasekanua ta mallomeirarua soldia ngalua iriiri ia tale sene alua, me mene ghalua soldia lalu ghe aaitoiaa atamana atea. ⁷ Vara me kapuna ensolo ateva Vau ngepona ateva ghe rekatala me mallanga ateva ghe lutula tale ale mata voovoo me ensolo ateva ghe posola usuena ativilau Pita tani angunia me ghe uela etana va, "Totu parasila," me sene alua lalu ghe kao vellalueta ta nimane.

⁸ Me ensolo ateva ghe uela etana va, “Asaela ghinnananim me unem aikasukasu ta kkem.” Me Pita ghe gheleila llo ensolo ateva ghe auliaala. Vara me ensolo ateva ghe uela va, “Uasae unem aiaasae ngeleka ateva me uaimuli teeieghi.” ⁹ Liuna avalua o me Pita ghe kasu vulila ale mata voovoo atiulu me ghe aimuli teela ensolo ateva. Ghe annaa va ghe nim asoasopoi. Karika ghe kilakila va isaa o voto ghe lutulutu ekoronna. ¹⁰ Lalu ghe laula aitiutiu eteva soldia ghe toitoi atamana atea me mene aiaaghaluene ateva me lalu ghe rekatala tale atamana atea aeana ia tale ale mata voovoo tale ia o masaliki taatara atea, me ia o atamana atea ghe otiela, karika teva ghe otiela, me lalu ghe kupi ghoala. Lalu ghe kasu tee siola tale mene katikirighi salana, vara me arovaeaata nonga ta ensolo ateva ghe kasu vulila Pita.

¹¹ Vara me Pita ghe vira kilala sa ateva ghe lutula etana me ghe uela va, “Koronnaaili Vau ngepona ateva esuula kapuna ensolo ateva tani sio asaangieghi ta nimane Herot me voto ajiu etoa la ghanna tani ghelei etaghi.”

¹² Ghe tinginala ghe nannaala mua me ang ghe laolao tanganue Meri kinna ia Jon, kateae ararina ta Mak, nongina oroi taumattu ghe veluvelu eitauaa tani looloo sae. ¹³ Ghe mirimirila tale atamani ngeleka atea me vause ateva Roda etana tau ngai nongonongo anna ia ghe ghoa mae tani nongo. ¹⁴ Nau eteva ghe nongo kilala lingi ngalona ateva Pita ghe masimasi etinginala me karika ghe otila atamana atea ta ghe ilou ssola elome me ghe uela ta taumattu ngatoa va, “Pita eleka tale atamana atea eghoa tiitingina.”

¹⁵ Me laghe ue teeieila va, “Angu veeveela?” Me nau ghe sarasarakana tani auliaa me laghe nnaala va, “Koti kapuna ensolo ateva okae.”

¹⁶ Pita ghe mene mirimirila me laghe ghoala tani oti atamana atea me laghe soghiaala tani taraia. ¹⁷ Me Pita ghe paopaola ta nimane va la rau mene sama, me ghe auliaala sa ateva ghe lutula me vaalua Vau ngepona ateva ghe ghaa velue ghoa mae tale ale mata voovoo, me ghe uela etaira va, “Am auliaa ta Jeimis me mene katoa kapuita, sa ateva ghe lutula.” Me ghe mene lao ppae sio.

¹⁸ Vara ghe paila me soldia ngatoa nannaaira ghe aisavisavilaala me ngila ghe aikolomieinila va, “Sa ateva ghe lutula ta Pita?” ¹⁹ Herot ghe uela va la laa paea. Nau eteva karika laghe roola tani taraia, ghe kolomila soldia ngatoa laghe aaitoieiniela, me karika laghe roola tani liu, me ghe uela va la uvi ematela.

Matemateane Herot

Vara me Herot ghe kasula ejudia tani mene laa toka tau eSiisaria. ²⁰ Herot ghe sessaia ta taumattu nge Taer me Saedon, me laghe aloannala luei etana, poli laghe ghaaghaa inana tale llo masaliki king ghe aaitaraa. Liuna avalua o me katoa etaira laghe mae aitaaua sio me laghe siola tani taraia. Laghe lao akasina sio ta Blastus, ia ghe aaitaraa tanganuena king, va ghe sausila, me laghe vira lao sio tani tara king.

²¹ Tale nau eteva laghe suitoongainiela, Herot ghe asaela ase aiaasae ateva tani apasunga va ia kingi ia me ghe tokala tale unna aitokatoka ateva uneira ia kingi etoa me ghe gheleila kateva niaippooaa ta taumattu ngatoa. ²² Me taumattu ngatoa laghe aaore tani ue va, “Karika va lingi ngalo taumattu ia, ta lingi ngalo goto ia.” ²³ Arovaeaa nonga ta kapuna ensolo ateva Vau ngepona ateva ghe taula sessa ateva etana me ttoliti etoa laghe nama amateala, poli taumattu ngatoa laghe kaakaueinia tani arueinia me karika ghe tautau sae ararina atea God.

²⁴ Me masi inangarina ateva God ang ghe laolao akapa see me ang ghe

piipinosa anamuu.

²⁵ Banabas me Sol lalu ghe ruula uunguaairarua tani taula viliki veu eJerusalem me lalu ghe mene lao sio eAntiok me lalu ghe kolo teela Jon Mak.

13

Tau ngaiesoa ngatoa laghe suula Banabas me Sol tani laa ppooaa

¹ Tale ale manga ateva eAntiok katoa propete me tisa laghe aapasunga masi nitoka God ghe aloanna: Banabas, me Simion, mene kateae ararina ta Niger,* me Lusias aSaerini ia, me Sol, me Manain, lalu ghe namu ngaitauaala me Herot, gavana ia. ² Kateva nau laghe kakkaua Vau ngepona ateva, me laghe naenae, me Spirit Manga ateva ghe uela va, “Am amanga Banabas me Sol me lalu ghelei niuungu eteva oia, aghe suitoongainilalueta tani gheleia.” ³ Liuna avalua o me nau laghe mene naela me laghe looloo saela, me laghe saoaala nimaira etairarua, me laghe sungilalueta tani kasu.

eSaepras

⁴ Spirit Manga ateva ghe sungi taulalue ghoala eSeleusia, lalu ghe aikaaila me lalu ghe lao sio tale patunganua ateva eSaeprasi. ⁵ Nau eteva lalu ghe rekatala tale masaliki taatara atea eSalamis, lalu ghe ppooaala inangarina ateva God elome tale aleira ale nivelu eitauaa aJiu etoa. Jon Mak ghe toka teeilalueta tani sausalua.

⁶ Lotolu ghe kasu ekapa seela tale patunganua ateva me lalu ghe mae sio ePapos. EPapos lalu ghe tarala kateva aJiu, tau nighelei nialaala ia me propete kamekame ia, ararina atea ta Bar-Iesu. ⁷ Ia oia taumattu ngateva ghe tokatoka tee gavana ngateva, ararina atea ta Sejias Polus. Gavana tee alomasaanga ia. Ghe kolola Banabas me Sol ta ghe aaloanna tani nongo inangarina God. ⁸ Ia o ase taumattu ngateva ghe ghelei nialaala, tale inangari nge Grik la aseasea arariira atea ta Elimas. Elimas ghe aloanna tani ghelei saasakiaa uunguaairarua Banabas me Sol, ta karika ghe aloanna va gavana ngateva eaiesoaa ta Iesu. ⁹ Me Sol, mene kateae ararina ta Pol, pasu ia tale Spirit Manga ateva, ghe alumila Elimas me ghe uela va, ¹⁰ “Io natuna io Satana. Me tau ngai ssateeira io voto llo ghulughuluena! Me isaa akapa gheleia nikamekame me ssavoto epasupasu etam. Erooro va uruu tani ghelei saasakiaa salane Vau ngepona ghulughuluena? ¹¹ Ghaine nimane atelange Vau ngepona ateva esae etam, me umata salusalu. Karika aue utara sinaka ateva me aue utoka mala ngaluse nau.”

Pol ghe nim ruuruu poi tani auliaa me matane Elimas ghe saurorromienala me ghe mata salusalula me ang ghe paepae teva taumattu tani posoa me ekatulainia. ¹² Nau eteva gavana ngateva ghe taraiela, ghe aiesoala, me ghe soghiangailiila kanna niapasunga Vau ngepona ateva.

Banabas me Pol lalu ghe lao sio tani ppooaa eAntiok elome ePisidia distrik

¹³ Pol me kapuna atoa laghe kasu vulila ePapos, me anua ateva ghe kaailala me laghe lao sio tale masaliki taatara atea ePerga tale provins ateva ePampilia. Me Jon Mak ghe oghi vululalueta me ghe oghi lao sio eJerusalem. ¹⁴ Lalu ghe kasu vulila ePerga, me laghe kasu lao sio eAntiok elome ePisidia Distrik. Me ta nau manga ateva, laghe kupi ssola tale aleira ale nivelu eitaua ngateva aJiu etoa me laghe toka siola. ¹⁵ Vara katoa laghe ruula tani riti inangari tale inangari nipaopao me propete atoa me

12:25: Apos 11:29-30; 15:37. * **13:1:** Niger Tale inangari nge Latin, malloeana va veroverongana. **13:2:** Apos 9:15. **13:3:** Apos 6:6. **13:5:** Apos 12:12; 15:39. **13:11:** Apos 9:8. **13:13:** Apos 15:38.

namu ngatoa tale ale nivelu eitauea ngateva laghe suula inangari ta Pol me kapuna atoa va, “Kapuumami etoa, marova righi inangari niasarasarakana am aaloanna tani auliaa etaimami, masina am rooroo tani sso auliaa.”

¹⁶ Pol ghe tingina saela me ghe paolala tale nimane atelange va karika la mene toka samasama, me ghe uela va, “Am Israeli etoa me am tau ngeleka atoa am tautau sae ararina atea God, am nongoaghi! ¹⁷ Kapuira Goto ateva Israeli etoa, ghe suitoongaala tuvuita atoa va kapuna ila. Me nau eteva laghe kasu vulila kosaira me laghe siola eljip, ghe gheleilala laghe oroienaailiila. Vara me tale sarasarakaniaane, ghe mene ghaa vellala eljip. ¹⁸ Me nau eteva laghe tokala tale voto ateva karika righi taumattu etana, karika ghe liula sesa ta ngetaira erooroo ghaatingauluae (40) ninamanama. ¹⁹ Ghe tturuula ghaitu (7) ararimangali nge Keinan, me ghe tau lao sio isaa o kosa va ekosaira kapuna atoa. ²⁰ Isaa akapa voto o ghe lutula erooroo ghaata ai me ghalimangauluae (450) ninamanama.

“Vara me God ghe tau lao sio kapuira namu ngatoa tani aitarainila erooroo nau eteva propete Samuel ghe tinginala. ²¹ Vara me taumattu ngatoa angila ghe kookolomi teva kingi, me God ghe tau lao sio Sol natuna ia Kish, tale ararimangali eteva ta Benjamin. Ghe aitarainilala ta ghaatingauluae (40) ninamanama. ²² Vara ghe ghaa vella Sol, me ghe gheleila Deivit ghe kingila. Ghe auliaa tootoongaala va, ‘Ngatarala Deivit, natuna ia Jesi, ia lo ateva taumattu aghaloannaailiia tale urunguitanighi eteva. Ia aue eghelei ekapa voto aghaloanna va eghelei.’

²³ “Nongina God ang ghe auliaala tale inangari nialokoi, va ghe tau lao sio tau ngai asaangi eteva ta Israeli etoa, tuvuna ia Deivit, Iesu etana. ²⁴ Auena Iesu ghe mae, Jon ghe ppooaala ninna ngaioghioghiaa me niaasuu ta taumattu nge Israeli ekapa atoa. ²⁵ Jon ang ghe maemae ta ghe ruu uunguaane, me ghe uela va, ‘Am annaa va aghi see etaghi? Karika va aghi Mesaea am toitoia. Karika, ia eaaimuli etaghi, me aghi karika tani masina aghi tani pulaka unna ai-iri aikasukasu ta kkena.’

²⁶ “Kapughu etoa, tuvuna atoa Abraham, me am tau ngeleka atoa am kakkaua God, God ghe tau mae sio isaa oia inangari niasaangi etaita! ²⁷ Taumattu nge Jerusalem atoa me kapuira namu ngatoa karika laghe tara kilala Iesu, aloira karika ghe masaangaala inangariira propete atoa isaa o laghe ritiriti tale isaa akapa nau manga, laghe ghelei roorooaala nau laghe uela va aue emate. ²⁸ Karika laghe tarala righi masi salana tani tingina etana me la uvi ematea, me laghe kolomila Paelat va la uvi ematea. ²⁹ Nau eteva laghe ghelei ekapala voto Uru ngai Manga ateva ghe uela va la ghelei, laghe ghaa veluela tale ai etea me laghe lao sio tani alokoie sso tale lienga niaikkaia ngateae. ³⁰ God ghe mene totuela tale nimate ³¹ me oroieili nau, ghe otuotula ta lo atoa laghe kasu teiela eGalilii tani sae eJerusalem nau maulue ia. Ila lo atoa laghe taraiela, ghaine la aulia ngaotu ta kapuira taumattu ngatoa.

³² “Me angalu auliaa masi kiukiu etaimim: Sa ateva God ghe aulieiniela tale inangari nialokoi ta tuvuita atoa ³³ ang ghe ghelei eroorooaala etaita, nau ghe totula Iesu. Nongina laghe piti elokoila ta aiaaghalua ateva Sam, va
“‘Io natughu io,
Ghaine nge tamam ieghila.’

13:17: Eks 1:7; 6:6; 12:51. **13:18:** Nam 14:34; Diut 1:31-32. **13:19:** Diut 7:1; Jos 14:1. **13:20:** Aitoi 2:16; 1 Sam 3:20. **13:21:** 1 Sam 8:5, 19; 10:20-24. **13:22:** 1 Sam 13:14; 16:12; Sams 89:20. **13:23:** 2 Sam 7:12-16. **13:24:** Mat 3:1-2. **13:25:** Jon 1:20, 27. **13:28:** Mat 27:22-23. **13:29:** Mat 27:59-60. **13:31:** Apos 1:3, 8. **13:33:** Sams 2:7.

³⁴ Koronna inangari va God ghe totuela tale nimate, karika aue emene mate, nongina ghe auliaala tale isaa toko inangari, va

“ ‘Aue atau aatu etaimim niarangise ateva manga ia me koronna ia tale inangari nialokoi aghe auliaala ta Deivit.’ ”

³⁵ Nongina ghe auliaala tale mene kateva inangari va,

“ ‘Karika aue utau velu kapum taumattu ngateva manga ia va emauu.’ ”

³⁶ “Nau eteva Deivit ghe ruula tani ghelei uunguaane God tale unna ateva vituu, ghe matela; me laghe kaieiniela nongina tuvuna atoa me vilikina ghe mauula. ³⁷ Me lo ateva taumattu God ghe totuela tale nimate karika ghe mauula.

³⁸ “Liuna avalua o, kapughu etoa, aghaloanna tani aulia ngaotu me am kila va ta Iesu, God aue ekkaluaa kaluita ssavoto. ³⁹ Ta ngetana lo atoa la ghaikaaiaa aue egheleila va karika righi kaluira ssavoto. Isaa avalua o me inangari nipaopao kanna Moses karika erooroo tani asaangiem tale kaluimim ssavoto. ⁴⁰ Am paniem! Saa voto God ghe auliaala ta propete atoa erau lutu etaimim, laghe uela va,

⁴¹ “ ‘Am tarala, lo atoa taumattu am aattara nonga tani sama, aue am soghiaa sa ateva aue agheleia, me aue am mate,

Tale nau oia aue aghelei kasina voto,

karika aue am nnaa va koronna,

arongona ta marova kasina taumattu aue eauliaa poi etaimim!’ ”

⁴² Nau eteva Pol me Banabas angilalu ghe kasukasu vuli ale nivelu eitaua ngateva, taumattu ngatoa laghe mene aloannailaluva va lalu mene ppooaa isaa oia voto tale lo ateva too nau manga. ⁴³ Nau eteva lo atoa laghe mae sio tani velu eitauaa laghe kasu reerekatala, oroi ajiu etoa me mene katoa taumattu avirina laghe vira aiesoaala tee ajiu etoa, laghe usilaa Pol me Banabas. Lalu ghe tani aippooaa teeila tale inangari niaisausiaa tani poso parasi maamasinaane God.

⁴⁴ Tale mene kateva nau manga, ghaisa ngarighi me taumattu ngakapa atoa tale lo atea o masaliki taatara laghe velu eitauaala tani nongo inangarina ateva Vau ngepona ateva. ⁴⁵ Nau eteva ajiu etoa laghe tarala oroieili taumattu, me angila ghe nannaa saasakiaa me angila ghe aauliaa tee Pol me saa voto ghe aauliaa.

⁴⁶ Pol me Banabas, karika lalu ghe matautula, lalu ghe liula me lalu ghe uela etaira va, “Ami tani ppooaa inangarina ateva God akasina etaimim. Ta am, am ghe ratiela me eaapasunga va God karika ghe suitoongainiemla tani ghaa maulue ateva etokatoka liu. Liuna avalua o, koti ami lao ta tau ngeleka atoa. ⁴⁷ Vau ngepona ghe uela ta kateva kateva etaingalua va,

“ ‘Aghe gheleiola va io mallanga io ta taumattu ngeleka atoa,

me urooroo tani sausila tani ghaa niasaangi tale kosa akapa ateva.’ ”

⁴⁸ Nau eteva taumattu ngeleka atoa laghe nongola llo oia, laghe masi-masieiliila me laghe tau saela inangarina ateva Vau ngepona ateva, me lo atoa God ghe suimatoongainilala va la ghaa maulue ateva etokatoka nau ekapa atoa, laghe aiesoaala.

⁴⁹ Inangarina ateva Vau ngepona ateva ghe rooa ngakapaailiila ia o voto ateva. ⁵⁰ Vara me ajiu etoa laghe ghelei saasakiaala nannaaira lo atoa vause laghe oneoneaa God me ila namuu ila, me lo atoa taita namuu ila tale lo atea o masaliki taatara, me laghe tiuaala tani ghelei saasakiaa tee Pol me Banabas, me laghe tiu vellaluva tale ia o voto ateva. ⁵¹ Lalu ghe rariaa vella

au kosa ta kkeirarua tani apasunga va gheeleiaaira sesa. Me lalu ghe lao sio eIkonomiam. ⁵² Me disaepolo atoa eAntiok elome tale distriki eteva ePisidia laghe pasula tale nimasimasi me tale Spirit Manga.

14

eIkonomiam

¹ EIkonomiam Pol me Banabas lalu ghe mene gheleila uunguaairarua nongina lalu ghe ghelei eAntiok elome tale distriki eteva ePisidia. Lalu ghe ssola tale aleira ale nivelu eitaua ngateva ajiu etoa me lalu ghe aippooaala me tale poppooaairarua sarasarakanaaaili, oroieili taumattu ngatoa ajiu ila me aGrik ila laghe aiesoaala. ² Katoa tana ajiu karika laghe aikaaiaala laghe tau lao sio sesa ninannaa ta katoa tana taumattu ngeleka me laghe ghelei esessaila tau ngaiesoa ngatoa. ³ Lalu ghe tokala oroieili nau eIkonomiam me karika lalu ghe maamatautu tani aulia ngaotu Vau ngepona ateva, me Vau eteva ghe tau lao sio sarasarakana etairarua me lalu ghe gheleila oroieili ase niaimatootoongana me mirikolo atoa, me tale isaa o voto lalu ghe ghelei, Vau eteva ghe aapasunga ta taumattu ngatoa va voto o lalu ghe aulia ngaotu tale maamasinaane koronna akapa. ⁴ Me taumattu tale ia o masaliki taatara atea ghe ghalua atokailala; katoa laghe lao aitauaa tee sio ajiu etoa, me katoa laghe lao aitauaa tee sio apostolo alua. ⁵ Emulina ajiu etoa me mene katoa tana taumattu ngeleka laghe tingina aitauaa teela kapuira namu ngatoa, me laghe aaloanna tani uvi taita alua me tani kumlalua tale atu va lalu mate. ⁶ Pol me Banabas lalu ghe nongola me lalu ghe iloula. Lalu ghe lao sio tale distriki eteva eLikaonia, tale masaliki taatara aluae eListra me eDebi me mene kasina lutu masaliki. ⁷ Me lalu ghe mene ppoaala masi kiukiu.

eListra me eDebi

⁸ EListra kateva tana taita, tangorengorena ia, tokatoka ngeuu ia nau ghe lutula, karika ghe kasukasula. ⁹ Ghe tokala me ghe nongola nau Pol ghe aippooaala. Pol ghe taatara lao sio etana me ghe tarala va aikaaiaane erooro tani ghelei emasinaia, ¹⁰ me ghe sama anamuula etana me ghe uela va, “Tingina saela,” me taita ateva ghe aoso atingina saela me ghe kasukasula.

¹¹ Nau eteva taumattu ngatoa laghe tarala isaa o voto Pol ghe gheleila, laghe tiuaala tani sama me aore atingina tale inangari tanganueira eLikaonia, laghe ue va, “Goto atoa ngila nonginala taumattu ngatoa me ngila sio mae etaita.” ¹² Banabas laghe asela ararina atea ta Sius me Pol laghe asela ararina atea ta Hermes poli ia ghe muemuaa niaippooaa. ¹³ Alena ale manga ateva goto ateva Sius ghe tokatoka akalakalangina eleka tale masaliki taatara atea. Pristi eteva ta goto ateva ta Sius ghe maeaa sio vulumakao me pusi ngai tale namu ngateae atamana poli ia me taumattu ngatoa laghe anna tani ghelei aiaavusuvusuena etairarua.

¹⁴ Apostolo alua ta Banabas me Pol lalu ghe nongola voto o laghe aaloanna tani ghelei etairarua me lalu ghe rasila uneirarua aiaasae tani apasunga va karika lalu ghe masimasi me lalu ghe ilou ssola elome ta taumattu ngatoa me lalu ghe tiuaala tani sama anamu. ¹⁵ Lalu ghe ue va, “Vaalua me am anna tani ghelei isaa ona voto? Angalua nim taumattu iengalua nongina am. Angalu ghe mae sio tani aulia ngaotu masi kiukiu va am kiri tale voto kamena me am taatara lao tale Goto ateva tokatoka liu ia ghe gheleila

elomarase me kosa ateva, paamanu eteva me isaa akapaaili voto elome tale isaa o voto. ¹⁶ Emua arau taumattu ngeleka atoa karika laghe kilakila God, liuna avalua o me God ghe tau vellala tani kasu tale aloaloannaaira. ¹⁷ Me ghe aapasunga voto tani aimatoonga va ia etautau masi voto, me eaapasunga maamasinaane ta etautau sio vaoo ateva epona liu, me inana tale nauna, me etautau aatu inana, me eaapasu urunguitaniimim tale nimasimasi.” ¹⁸ Tale isaa o inangari, ghaisa ngarighi karika lalu ghe roo tani ghelei runga taumattu ngatoa tani ghelei aiaavusuvusuenta lao ta ngetairarua.

¹⁹ Katoa tana ajiu laghe kasula eAntiok elome ePisidia Distrik me eIkoni- niam laghe pasalila taumattu ngatoa me laghe kumla Pol tale atu me laghe ae velue ghoala tale masaliki taatara ateae poli laghe annaa va ang ghe matela. ²⁰ Nau disaepolo atoa laghe tingina talieiniela me ghe totu saela me ghe kiriaa ssola tale masaliki taatara ateae. Eghe paila tale mene kateva nau, ia me Banabas lalu ghe lao sio eDebi.

Lalu ghe oghi lao sio eAntiok eSiria

²¹ Pol me Banabas lalu ghe ppoaala masi kiukiu eDebi me oroieili taumattu laghe aiesoala. Vara me lalu ghe oghiaa siola eListra, eIkoni- niam me eAntiok elome ePisidia Distrik. ²² Lalu ghe aasarasaranala tau ngaiesoa ngatoa me lalu ghe auliaala va la poso parasi lo ateva o niaikaaiiaa. Lalu ghe ue ta taumattu ngatoa va, “Tani kupi sso tale ararimangalina ateva God, aue ita tani sou oroieili voto aanasa.” ²³ Tale kateva kateva ale manga, lalu ghe suimatoongaala elda ngatoa me lalu ghe naela me lalu ghe loolo saela tani taula lao ta nimane Vau ngepona ateva, ia laghe aatoka tuutuliira etana. ²⁴ Nau lalu ghe lao akapa see sio tale distriki eteva ePisidia me lalu ghe mae sio tale distriki eteva ePampilia. ²⁵ Isaa o lalu ghe aippooala tale masaliki taatara ateae ePerga vara me lalu ghe siola tale masaliki taatara ateae eAtalia.

²⁶ EAtalia lalu ghe aikaaila tale anua ateva me lalu ghe lao sio eAntiok tale provinsi eteva eSiria nongina laghe taulalue lao sio ta God va tale maamasinaane God lalu ghelei isaa o niuungu lalu ghe kasula tani ghelei, me lalu ghe ruula, me lalu ghe kiriaa mae sio. ²⁷ Nau lalu ghe rekataala eAntiok lalu ghe kolo aitauala taumattu ngatoa tale ale manga ateva me lalu ghe auliaala voto God ghe sausalulueta tani ghelei me vaalua ghe otila salaira taumattu ngeleka atoa tani aiesoaa. ²⁸ Lalu ghe tokala oroi nau tee lo atoa laghe aikaaiiaa tale ia o masaliki eteae.

15

Nivelu eitaua ngateae eJerusalem

¹ Katoa taumattu laghe kasula eJudia me laghe sio mae eAntiok tani mene apasunga ta tau ngaiesoa ngatoa. Laghe ue va, “Karika am rooro tani saanga marova am tam aimuli tee inangari nipaopao kanna Moses va la iso taita atoa.” ² Isaa oia inangari ghe gheleila kinatama niasamaaii tee Pol me Banabas. Elda ngatoa laghe suitoongaala Pol me Banabas tee mene katoa tana tau ngaiesoaa tani sae eJerusalem tani sae tara apostolo atoa tee elda ngatoa tale isaa o inangari. ³ Tau ngaiesoa ngatoa tale ale manga ateva laghe sungilala tani sae eJerusalem me nau laghe laa saesae, laghe sso teela ePoenisia me eSameria me laghe kiukiuuala vaalua taumattu

14:16: Apos 17:30. **14:17:** Jer 5:24. **14:19:** Apos 17:13; 2 Ko 11:25. **14:22:** Apos 15:32; 1 Tes 3:3. **14:26:** Apos 13:1-2. **14:27:** Apos 15:4, 12. **15:1:** Gal 5:2. **15:2:** Gal 2:1.

ngeleka atoa laghe aikolikoliaala. Nau laghe nongola isaa o inangari, laghe masimasieliila. ⁴ Nau laghe rekatala eJerusalem, tau ngaiesoa ngatoa, apostolo atoa me elda ngatoa laghe masimasieliila tani soula, me Pol me Banabas lalu ghe auliaala vaalua God esaasausilalua tale uunguaairarua.

⁵ Katoa tana tau ngaikaaiiaa laghe aimuli usi tee katoa tana Paresi, laghe tingina saela me laghe uela va, “Am tani iso taumattu ngeleka atoa me la tani usilaa inangari nipaopao kanna Moses.”

⁶ Apostolo atoa me elda ngatoa laghe toka siola tani aisakeiaa isaa o inangari. ⁷ Oroieili niaippooaa ghe lange sio me Pita ghe tingina saela me ghe uela va, “Kapughu etoa, am kilakila kasina nau ang ghe lao sio God ghe suitoongainaghila elome etaimim va aghaulia ngaotu lo ateva oia masi kiukiu ta taumattu ngeleka atoa me ila tee aue la roo tani nongo me la aikaaiiaa. ⁸ God ekilakila akapa urunguitaniira taumattu ngatoa, liuna avalua o me tani apasunga va eaaloanna tee taumattu ngeleka atoa, me etautau lao Spirit Manga ateva, nongina ghe taue mae sio ta ngetaita. ⁹ God etaatara taumattu ngeleka atoa me ita aJiu etoa va kateva nonga ita. Poli ang ghe kkaluaala kaluira ssavoto nau laghe aiesoaala. ¹⁰ Vaalua me am aaloanna tani tootoonga God me am tautau lao maamatana ta mene katoa tau ngaiesoaa me emua arau ita me tuvuita atoa ita ghe tam rooroo tani sau? ¹¹ Karika emene isaa avalua o! Ita aiesoaa va ita me ila aue ita saanga tale maamasinaane ateva Vau eteva Iesu.”

¹² Ila akapa taumattu ngatoa laghe matua ngatokala me laghe nongola Banabas me Pol lalu ghe auliaala llo aimatootoongana me mirikolo God ghe sausalaluela tani ghelei nau lalu ghe uungu ta taumattu ngeleka atoa. ¹³ Nau lalu ghe ruula tani aippooaa, Jeimis ghe liula me ghe uela va, “Kapughu etoa, am nongoaghi. ¹⁴ Saemon Pita ghe auliaala etaita vaalua God ghe apasunga ngakasinala ailousiaane ateva ta taumattu ngeleka atoa me ghe gheleila katoa etaira va kapuna tuungi ila. ¹⁵ Inangariira propete atoa elaolao aitaaua tee isaa oia inangari va taumattu ngeleka atoa la aiesoaa, nongina Uru ngai Manga ateva eaauliaa va,

¹⁶ “Emuli tale isaa oia voto aue aoghi

me alaa ghatulu alena ateva Deivit* ghe katuula
me voto ghe sesala, aue amene atulu
me aue aghelei nongina arau.

¹⁷ Poli aghaloanna va mene kasina taumattu aue la mene pae Vau ngepona ateva,

tee ila o taumattu ngeleka atoa aghe kololala va ekapughu ila,
ghe uela Vau eteva ia eghelei isaa oia voto.

¹⁸ Ngila ghe kilala oroi ninamanama ang ghe lange sio.”

¹⁹ Jeimis ghe uela va, “Nannaaghi va ita rau mene ghelei voto eanasaaili ta ngetaira taumattu ngeleka atoa la maemae ta God. ²⁰ Ita roo tani piti tikirighi uru ngai elao etaira me ita auliaa isaa oia voto va la rau mene nama inana la tautau lao tale kapuira tootoo goto atoa, me la rau mene ghelei uunguaa niailai salosalooa see atea, me la rau mene nama ghaata kkena la kiikii pule aloira, me la rau mene nama malatau rae ta ngetana. ²¹ Ta emua arau inangari nipaopao kanna Moses laghe aaulia ngaotu tale isaa akapaaili masaliki taatara, me laghe ritiriti tale ale nivelu eitaua ngatoa tale isaa akapaaili nau manga.”

15:4: Apos 14:27. **15:7:** Apos 10:1-43. **15:8:** Apos 10:44; 11:15. **15:10:** Mat 11:30; Gal 3:10. **15:11:** Gal 2:16; Ips 2:5-8. **15:13:** Gal 2:9. **15:16:** Eimos 9:11-12. * **15:16:** Alena ateva Deivit eaimatoonga kingi etoa tuvuna ila Deivit. **15:20:** Eks 34:15-17; Lev 17:10-16.

Uru ngai etikirighi laghe pitila ta tau ngaikaaia ngeleka atoa

²² Vara me apostolo atoa me elda ngatoa me ila akapa tale ale manga ateva laghe uela va la suitoongaa righi taumattu me la sungila sio eAntiok tee Pol me Banabas. Laghe asela Jiudas (la aseasea va Barsabas) me Saelas. Taita alua oia lalu ghe muemuaa tau ngaiesoa ngatoa. ²³ Laghe pitila uru ngai etikirighi eue va,

Ami apostolo atoa me elda ngatoa, ita aiesoa ngaitauaa,

Ami tautau aatu masimasiaaimami etaimim akapa taumattu ngeleka atoa am ghe aiesoaala isaa ona tale masaliki taatara atea eAntiok me tale provinsi elua eSiria me eSilisia.

²⁴ Ami ghe nongola va katoa ta ngetaimami laghe sio atu ta ngetaimim me laghe aauliaa inangari egheelei saasakiaa tokatokaaimim me egheelei saasakiaa nannaaimim me karika ami ghe sungilala. ²⁵ Ami masimasi eitauaala tani suu katoa ta ngetaimami tani kasu eitauaa tee masi kapuita alua ta Banabas me Pol tani sio taraiem. ²⁶ Taumattu ngalua oia angilalu ghe tau lao sio maamauluaairarua tale ararina atea kapuita Vau eteva Iesu Karisto. ²⁷ Liuna avalua o ngami sungisungi tee Jiudas me Saelas tani akorokorongana inangari ami ghe pitila. ²⁸ Ngami mae aitauaa sio nonga tale kateva nonga ninannaa me Spirit Manga ateva va emaamasina va karika ami mene saooa sae mene righi inangari maate tee isaa toko inangari nipaopao: ²⁹ Karika am mene nama malatau la gheelei sae aiaavususvena tale tootoo atoa, me am rau mene nama llo ghaata kkena la kiikii pule aloira, me malatau rae ta ngetana, me am rau mene ghelei uunguaa niailai salosalooa see atea. Aue am toka amasina marova am usilaa isaa oia inangari.

Masinaaili.

³⁰ Apostolo atoa me elda ngatoa laghe sungila isaa oia taumattu tani sio eAntiok, me laghe kolo aitauaala taumattu ngatoa laghe aiesoaa me laghe taula uru ngai etikirighi. ³¹ Nau laghe nongola uru ngai etikirighi, laghe pasula tale nimasimasi poli laghe nongola inangari niaisausiaa. ³² Jiudas me Saelas ilalua tee propete ilalua me lalu ghe kaarasila tani aippooaa teeila me tani asarasakanaila tale masi inangari. ³³⁻³⁴ Laghe tokala kasina nau me ghe ghaala nauirarua taita alua tani mene oghiaa sae nongina laghe sungilaluela. Laghe sungilaluela tee kaluira niarangise me luei.† ³⁵ Pol me Banabas lalu ghe tokala eAntiok tee mene katoa me laghe aapasunga me laghe aaulia ngaotu inangarina ateva Vau eteva.

Pol me Banabas lalu ghe aitiuaala

³⁶ Oroi nau ghe lange sio me Pol ghe uela ta Banabas va, “Italu mene oghi lao ta kapuitalua atoa tale masaliki taatara atoa nongina italu ghe ppoaala inangarina ateva Vau eteva, me ita laa taraila va vaalua aikaaiaaira.” ³⁷ Banabas ghe aloanna va Jon Mak eusilalua, ³⁸ me Pol karika ghe aaloanna poli eghe oghi vululaluela ePampilia me karika ghe usilaluela tani laa ghelei niuungu. ³⁹ Taita alua lalu ghe aisavalaa teela tuku ninanna ngateva o me lalu ghe aitiuaala. Banabas ghe kolola Jon Mak me lalu ghe aikaaia me lalu ghe lao sio eSaeprasi. ⁴⁰ Me Pol ghe kolola Saelas me tau ngaiesoa ngatoa laghe taulalue lao sio tale maamasinaane Vau ngepona ateva, me lalu ghe kasula. ⁴¹ Lalu ghe lao sio eSiria, eSilisia me lalu ghe asarasarakana taumattu ngatoa tale ale manga atoa.

15:28: Mat 23:4. † **15:33-34:** Kasina uru ngai laghe pitila laghe mene piti teela va, ³⁴ Me Saelas ghe anna tani toka, me Jiudas nonga ghe oghi sae eJerusalem. **15:37:** Apos 12:12, 25. **15:38:** Apos 13:13; Kol 4:10.

16

Timoti ghe usila Pol me Saelas

¹ Pol me Saelas lalu ghe lao sio eDebi me lalu ghe mene lao tee sio eListra. Tale masaliki eteae o, kateva disaepolo ghe tokatoka, ararina atea ta Timoti, kinna ateva aJiu ia me ghe aaiesoaa, me tamane ateva aGriki ia. ² Tau ngaiesoa ngatoa eListra me elkoniam laghe aarueinia. ³ Pol ghe anna tani koloa va lotolu ghe kasu, liuna avalua o me ghe isoiela poli ghe nnaala aJiu etoa nongina lotolu ghe laolao me laghe kilakila va tamane ateva aGrik ia. ⁴ Nau eteva laghe laolao tale isaa akapa masaliki taatara laghe aauliaa saa ninannaa apostolo atoa me elda ngatoa eJerusalem laghe mae aitauea sio etana va taumattu ngatoa la aimuli tee. ⁵ Liuna avalua o me isaa akapa ale manga ghe sarasarakana tale aikkaaiaira me nau ekapa atoa tau ngaiesoa ngatoa laghe ooroi.

Pol ghe tarala nitaatara atea eTroas

⁶ Pol me kapuna atoa laghe kasu ekapa seela tale voto alua ePrigia me Galaisia poli Spirit Manga ateva ghe paolala va la rau mene ppooaa inangari eteva tale provinsi eteva eEisia. ⁷ Nau laghe rekatala tale aioloa ngateva eMaesia laghe anna tani sso eBitinia me kapuna Spiriti eteva Iesu ghe tam annala va laghe sso. ⁸ Liuna avalua o me laghe kasu ssola eMaesia me laghe siola eTroas. ⁹ Vara eleivoo me Pol ghe tarala, tale unna nitaatara atea, taumattu nge Mesedonia ngateva ghe tiitingina me ghe kolokolo Pol, ghe ue va, “Umae eMesedonia me umae sausiemami.” ¹⁰ Nau eteva Pol ghe ruula tani tara unna nitaatara atea, arovaea nonga ta ami* ghe aimonomosiaala tani lao eMesedonia. Ami ghe kilala va God ang ghe koloamamila tani laa ppooaa masi kiukiu etaira.

Lidia ghe aikolikoliaala ePilipae

¹¹ Ami ghe tiu ghoala eTroas me ami ghe kautula tale patunganua ateva eSamotres, vara mene kateva nau, ami ghe lao sio tale masaliki taatara atea eNiapolis. ¹² Ami ghe kasula o me ami ghe mene lao sio ePilipae, aRom atoa laghe aaitarainia me ia masaliki namuu ia ta masaliki taatara atoa tale ia o distriki eteva eMesedonia. Me ami ghe tokala o kasina nau.

¹³ Vara nau manga ateva, me ami ghe kupi vulu ghoala atamana atea tale masaliki taatara atea, me ami ghe lao sio tale ateo atea. Ami ghe anna va ami ghe tara teva voto, me ami ghe looloo sae etana. Vause atoa laghe velu eitauaala tale ia o voto ateva me ami ghe toka siola, me ami ghe tiuaala tani aippooaa teeila. ¹⁴ Kateva ta ila o lo atoa laghe nongonongo inangari, kateva vause, ararina atea ta Lidia, ia tau ngai kkaua ia ta God me karika va aJiu ia, laghe polipoli ghinna ghueghuenna etana, tanganuena tale masaliki taatara atea eTaeataera. Vau ngepona ateva ghe otila urunguitanina ateva tani nongo amasina voto Pol ghe ppooaala. ¹⁵ Vara me ia me lo atoa laghe tokatoka aitauea nonga tale kateva ale, laghe ghaala niaasuu, me ghe koloamamila va ami lao tanganuena. Ghe uela va, “Arova am aaiesoaa va aghaaikaiaa ta Vau ngepona ateva, am mae toka tanganueghi.” Ghe tani kolokolo rerrekananiemami, liuna avalua o me ami ghe toka teeiela.

Pol me Saelas tale ale mata voovoo

¹⁶ Kateva nau, ami ghe laolao tale voto ateva ailooloo sae ia, me ami ghe soula aliki vause ateva, karika ghe tokatoka tale aloannaane, me

16:1: Apos 14:6; 2 Tim 1:5. **16:2:** Plp 2:19-22. **16:4:** Apos 15:23-29. **16:6:** Apos 18:23.

* **16:10:** Luk ghe usilaala eTroas, liuna avalua o me ghe pitila va “ami”.

kateva spiriti ghe tokatoka etana me ghe aaulia ngamuemue voto, me ghe vira mene lutulutu. Ghe gheeleei oroieili uneira viliki veu lo atoa laghe aaitarainia poli ghe aauliaa voto auena elutu. ¹⁷ Ia o aliki vause ateva ghe aaimuli teeiemami me Pol, me ghe ovaova ghe ue va, “Isaa oia taumattu, kapuna tau ngai nongonongo anna ila Goto ateva iaaili epona, me la ghaauliaa etaimim salana tani saanga.” ¹⁸ Ghe gheeleei evaluela o oroi nau, me Pol ang ghe maamangoo teeia, liuna avalua o me ghe kiriela me ghe uela ta spiriti eteva va, “Tale ararina ateaee Iesu Karisto, aghaauliaa etam va ukupi vulue ghoa!” Tale ia o tuku nau erighi, spiriti eteva ghe kasu vuliela.

¹⁹ Nau eteva lo atoa laghe aaitaraa ia o aliki vause ateva, karika ghe tokatoka tale aaloannaane, laghe kilala va salaira tani ghaa viliki veu ang ghe kapala, laghe kunela Pol me Saelas me laghe aelalue lao sio tale matavanga tani laa tingina ta mataira namu ngatoa. ²⁰ Laghe laoainilalue sio ta lo atoa laghe gheeleei niaisakei me laghe uela va, “Taumattu ngalua oia ajiu ilalua, me lalu ghe gheleila me niaisessaii ang ghele namuula tale masaliki eteae oia. ²¹ Lalu ghe aapasunga voto karika masina va ita aRom atoa ita aimuli tee.”

²² Taumattu ngatoa laghe usila kaluira tani gheleei tee Pol me Saelas, me tau ngai gheleei niaisakei etoa laghe auliaala me polisi etoa laghe ghaa vella ghinnaniiraru me laghe parulaluela. ²³ Laghe paru emaamaatelaluela me laghe atokailalue ssola tale ale mata voovoo ateva, me laghe auliaala ta tau ngai toitoi eteva va, “Ukaarasi tani tara rungarungainilalua.” ²⁴ Nau ghe ghaala inangari matuutuliena, ghe atokailaluela tale ale ngelome atiulu me ghe sikilaala kkeiraru tale aikakkamoti eteva me ghe kamotila kkeiraru.

²⁵ Elomatuaa voo me Pol me Saelas ngilalu ghe looloo sae me kikkinari sae ta God me karavusu etoa laghe nongonongolalua. ²⁶ Vara me kinatama rukeruke ateva ghe rukela. Nau eteva rukeruke ateva ghe rukela ale mata voovoo ateva, atamana akapa atoa ghe otillala me sene ta karavusu etoa ghe kaola. ²⁷ Tau ngai toi ale mata voovoo ateva ghe totula me ghe tarala ta atamana tale ale mata voovoo ghe otilla, me ghe ghaala iemane baenata ateva me vara ghe pasa amatea poli ghe annaa va karavusu etoa ngila ghe iloula.† ²⁸ Pol ghe kolokolo anamungainiela me ghe uela va, “Urau mene pasa amateo ta ami ekapa ami tokatoka!”

²⁹ Me tau ngai toi ale mata voovoo ateva ghe reterete poli ghe matautula, me ghe kolokolola va la maeaa teae lam, ghe ilou velu ssola, me ghe suuiaala emua ta Pol me Saelas. ³⁰ Vara me ghe ghoinilaluela eleka me ghe kolomilaluela va, “Namu ngalua, sa ateva arooroo tani gheleia me asaanga?”

³¹ Lalu ghe liula me lalu ghe uela etana va, “Uaiesoaa ta Vau ngepona Iesu, me aue usaanga, io me kapum atoa tanganuem.” ³²⁻³⁴ Tale ia o voo ngateva, tau ngai toi ale mata voovoo ateva ghe ghailalue lao sio tanganuena me ghe porala usaiiraru, me ghe anginilaluela. Me lalu ghe auliaala inangarina Vau ngepona ateva etana, me tee ta lo atoa laghe tokatoka tanganuena. Ia ghe aiesoaa, me arovaeea ta lalu ghe asuuela me lo atoa tee tanganuena. Emuli tale nau laghe suula, ghe pasula tale nimasimasi poli ghe aiesoaa ta God, ia me natuna akapa atoa me vausenna ateva.

³⁵ Vara ghe paila, me tau ngai gheleei niaisakei etoa laghe suula inangari ta kapuira polisi etoa va la laa ue va la tau velu taita alua. ³⁶ Vara me tau

16:17: Mak 1:24. **16:20:** Mak 13:9. **16:22:** 2 Ko 11:25; 1 Tes 2:2. **16:27:** Apos 12:18-19.

† **16:27:** Marova karavusu etoa laghe iiloula, namu ngatoa aue laghe uvi emate tau ngai toi ale mata voovoo ateva. **16:30:** Apos 2:37.

ngai toi ale mata voovoo ateva ghe uela ta Pol va, “Tau ngai ghelei niaisakei etoa la uela va ami tau veluemalua. Amalu rooroo tani kasu, me aue amalu kasu tale luei.”

³⁷ Pol ghe uela ta polisi etoa va, “Angalua sitisen nge Rom iengalua, me karika laghe ghelei muela niaisakei etaingalua me laghe paruengaluela ta mata ngoroi etoa. Me tee laghe atokaiengalue ssola tale ale mata voovoo. Me isaa oia ngila nim anna tani sungieinangalua va angalu kasu? Karika poi! Ila la tani mae ghaaiengalua, me la kasueinangalua.”

³⁸ Polisi etoa laghe lao sio tani auliaa inangarina Pol ta tau ngai ghelei niaisakei etoa. Me nau laghe nongola va Pol me Saelas sitisen nge Rom ilalua, ghe moilala tale llo laghe ghelei teeilaluela. ³⁹ Laghe lao sio tale ale mata voovoo tani kkaluaa etairarua me laghe kololaluela me laghe kasu eitauaa teeilalue ghoala eleka, me laghe uela etairarua va, “Masina, amalu rau mene toka oia, amalu kasu.” ⁴⁰ Nau lalu ghe kupi ghoala tale ale mata voovoo, lalu ghe lao sio tanganue Lidia, me lalu ghe saopila lo atoa laghe aiesoala ta Iesu me lalu ghe aippooaa teeilala tani asarasakanaila, me lalu ghe mene kasula.

17

eTesalonika

¹ Pol me kapuna atoa laghe kasu eloi lao sio tale masaliki taatara aluae eAmpipolis me eApolonia tani lao tale masaliki taatara atea eTesalonika. Isaa okae ale nivelu eitaua ngateva aleira ia aJiu etoa ghe tokatoka. ² Pol ghe kupi ssola tale ale nivelu eitaua ngateva me ghe tiuaala tani ppooaa nongina nau etoa ghe ghelei. Kotolu nau manga ghe toka teeilala me laghe aippooa ngaitauaa teela Uru ngai Manga ateva. ³ Ghe aulia ngamasalikangailiila etaira me ghe aapasunga tale Uru ngai Manga ateva va koronna Mesaea aue eghaa nimmarikana me emate me aue emene totu tale nimate. Me ghe uela va, “Iesu ia Mesaea ia, aghi apoppooainia etaimim.” ⁴ Katoa tana aJiu laghe aiesoala, me laghe aimuli teela Pol me Saelas. Oroï tee aGrik atoa laghe aiesoala ta God, me oroï namuu tale vause atoa laghe usila Pol me Saelas.

⁵ Katoa tana aJiu karika laghe aiesoaa, laghe annaa saasakiaala. Liuna avalua o me laghe kolo aitauaala kasina taumattu makatakanna, me tee taumattu tale matavanga, me laghe aaikkalui see tale masaliki taatara atea. Laghe aore atingina, me laghe lao sio laghe ilou ssola tale alena ateva Jeson tani ae velu ghoa Pol me Saelas etaira. ⁶ Me nau eteva karika laghe tarailaluela, laghe aela Jeson me mene katoa tau ngaiesoaa me laghe laoainila sio emua ta namu ngatoa tale masaliki taatara atea. Laghe ovaova me laghe ue va, “Isaa oia taumattu laghe ghelei saasakia ngakapala voto tale kosa akapa ateva, ila oia ngila mae sio. ⁷ Me Jeson ghe masimasiaala Pol me kapuna atoa, me ghe ghaailala laghe ssola tale alena ateva. Ila akapa la sassakeaa inangarina Siisa, la ue va kateva kingi, ararina atea ta Iesu.” ⁸ Nau eteva taumattu ngatoa me namuu tale masaliki taatara atoa laghe nongola ghe sessaieililala. ⁹ Vara me laghe uela ta Jeson me tau ngaiesoa ngatoa va, “Ange roola mua tani aisakei me am tau mae sio viliki veu, me am kasu. Arova la matua atoka auena am mene mae ghaa uneimim viliki veu.”

eBeriiia

¹⁰ Nau eteva ghe voola, tau ngaiesoa ngatoa laghe suula Pol me Saelas tani lao eBeriiia. Nau lalu ghe laa rekata sio, lalu ghe ssola tale ale nivelu

eitaua ngateva, aleira ia aJiu etoa. ¹¹ ABeriia ngatoa, masi taumattu ila, me nannaaira masalikeaili ta aTesalonika ngatoa, poli laghe aloannaaili tani nongo inangari Pol ghe poppooaa, me isaa akapa nau laghe taatara tale Uru ngai Manga ateva tani tara va voto Pol ghe poppooaa koronnaaili. ¹² Liuna avalua o me oroi taumattu nge Jiu etoa laghe aiesoaala, me oroi vause me taita nge Grik tee, namuu ila tale ia o masaliki taatara atea, laghe aiesoaala.

¹³ Nau aJiu etoa eTesalonika laghe nongola va Pol ghe poppooaa inangarina ateva God eBeriia, ila tee laghe lao sio. Laghe tiuaala tani ghelei aisavisavilaa nannaaira taumattu ngatoa va la rau mene nongo inangarina God Pol ghe poppooaa. ¹⁴ Lo atoa laghe aaiesoa ngaitauaa laghe suula Pol tani sio elamana tani sio pae teva anua. Saelas me Timoti lalu ghe tokala eBeriia. ¹⁵ Me lo atoa taumattu laghe laoa sio Pol tale masaliki taatara atea eAten, auena laghe kasu, Pol ghe suula inangari etaira va, “Am lao me Saelas me Timoti lalu mae tara parasieghi, me ngotolu uungu eitauaa.”

Pol eAten

¹⁶ Nau eteva Pol ghe toitoi Saelas me Timoti eAten, ghe alousiusieiliila tani tara va masaliki taatara atea pasu ia tale tootoo goto atoa. ¹⁷ Liuna avalua o me ghe ssola tale ale nivelu eitaua ngateva tani aippooaa tee aJiu etoa me aGrik atoa laghe kakkaua God tee aJiu etoa,* me tee nau ekapaaili ghe poppooaa ta taumattu ngatoa tale matavanga. ¹⁸ Tau ngai aapasunga ngatoa ta Epikuria me Stoik laghe tiuaala tani aissakeana teeia. Katoa etaira laghe kokkolomi va, “Vara eue va saa, ia oia taumattu ngateva etam kilakila sa ateva eaulieinia?” Katoa laghe ue va, “Eanna tani aulia ngaotu mene kasina ase goto.” Laghe aauliaa isaa o inangari poli Pol ghe aulia ngaotu masi inangarina Iesu me tototuaaira matena atoa. ¹⁹ Vara me laghe koloala me laghe ssoainiela tale voto ateva eAreopagas, kansolo atoa la veluvelu eitauaa etana, me laghe uela etana va, “Erooroo va ami kila isaa oia voto ouna uaaulia ngaotu? ²⁰ Ta io angu ghaaghaa mae ouna voto tale nongonongoaaimami, me ami anna tani kila malloeanina isaa o voto.” ²¹ (Ila akapa taumattu nge Ateni etoa, me mene katoa tana taumattu karika tanganueira okae laghe mae sio tani toka eAten, karika la ghelei righi voto, karika, ta laghe nim aloannaaili tani nongo me auliaa kiukiu ouna.)

²² Vara me Pol ghe tingina saela elome ta namu ngatoa tale ia o masaliki taatara atea tale motouru eteva eAreopagas me ghe uela va, “Taumattu nge Ateni etoa, ataatara va nannaaimim namungaili tale isaa akapa uunguaa nikkaua. ²³ Poli nau akasukasu see ataatara voto am kakkaua etana, me aghe tara teela kateva liu nighelei aiaavusuvusuena, laghe pitila inangari etana laghe uela va, ‘Ta Goto ateva karika ami kilakilaia.’ Am nongo, God am kakkaua me karika am kilakilaia, ghaine aghaulia ngaotu etaimim. ²⁴ Ia o Goto ateva, ia ghe gheleila kosa ateva me isaa akapaaili voto etana. Ia Vau ia tale kosa ateva me epona liu. Karika etokatoka tale ale manga taumattu ngatoa la ghelei. ²⁵ Karika etuutukuna poi tale teva voto, me ita taumattu ngatoa karika ita ghelei teva voto ta nimaita tani sausia, karikaaili, poli ia nonga etautau mae mauhue me ainoaita me tee isaa akapaaili mene kasina voto. ²⁶ Tale kateva nonga taumattu ghe gheleila ararimangali ekapa atoa, va la toka akapa see me la apasu kosa ateva. Me ghe suitoongaala nauira aue la toka, me ghe apasunga teela aioghioghi tale kosaira. ²⁷ God ghe gheleila isaa oia voto va taumattu ngatoa aue la paea. Me nau la paepae, koti aue

^{17:17:} Apos 18:19. * ^{17:17:} aGrik atoa laghe kakkaua God tee aJiu etoa Katoa aGrik laghe kakkaua ngaitauaa tee aJiu etoa, me karika laghe aaimuli ekapa tee inangari nipaopao kannu Moses.

^{17:24:} 1 Ki 8:27; Apos 7:48. ^{17:25:} Sams 50:12. ^{17:27:} Sams 145:18; Jer 23:23.

la taraia, me ia karika emene masau tale kateva kateva etaita. ²⁸ ‘Poli ta ngetana ita tokatoka me ita aikasuaa, me taumattu ita.’† Nongina kasina inangariimim am ghe pitila eue va, ‘Ita tee natuna ita.’‡

²⁹ “Liuna avalua o, poli ita natuna ita God, ita rau mene annaa va ia nongina tootoo gol, silva me atu, taumattu ngatoa la gheelei tale aalomasaanganiaaira. ³⁰ Tale nau ang ghe lao sio, God ghe nim taatara avalua o gheeleiaaira taumattu ngatoa, poli karika laghe kilakila amasina aloannaane God. Me ghaine eaaulia ngakorokorongana tale taumattu ngakapa atoa tani oghi vulu gheeleiaaira sesa. ³¹ Poli ang ghe suila nau eteva, aue eghelei niaisakei ghulughuluena tale kosa ateva tale uunguaane ia o taumattu ngateva ang ghe suitoongainiela. Ang ghe apasungaala isaa oia voto tale taumattu ngatoa nau ghe totula ia o taumattu ngateva tale nimate.”

³² Nau laghe nongola va matena atoa aue la mene totu, katoa etaira laghe tiuaala tani pilosia, me katoa laghe ue etana va, “Ami aaloanna va umene auliaa isaa o voto etaimami.” ³³ Vara me Pol ghe kasu vulilala. ³⁴ Karika tani oroi ila lo atoa laghe aiesoala, me laghe tiuaala tani usilaa Pol. Elome etaira Dionisius tee ghe usilaa, kateva tana namuu tale kansolo ateva ta Areopagas, tee me kateva vause ararina atea ta Damaris, me mene katoa taumattu.

18

eKorint

¹ Vara me Pol ghe kasula eAten, me ghe lao sio tale masaliki taatara atea eKorint. ² Isaa eKorint Pol ghe soula taumattu ngateva ajiu ia, ararina atea ta Akuila, ia atala nge provinsi eteva ePontus. Karika oroi nau ia me vausenna ateva ta Prisila lalu ghe kasula eItali me lalu ghe lao sio eKorint, poli Klaodies Siisa ghe uela va ajiu ekapa atoa la kasu vuli eRom. Vara me Pol ghe lao sio tani tara Akuila me vausenna ateva ta Prisila. ³ Me poli uunguaane tani ghelei tenti nongina ilalua o lailai elua, liuna avalua o me ghe toka teeilaluela me ghe uungu teeilalua. ⁴ Me tale isaa akapa nau manga, Pol ghe laa ghaippooaa tale ale nivelu eitaua ngateva, ghe tootoonga tani ghaa nannaaira aGrik me ajiu etoa va la ghaiesoaa ta Iesu.

⁵ Nau Saelas me Timoti lalu ghe kasu vulila provinsi eteva eMesedonia me lalu ghe rekatala eKorint, Pol ghe ruula tani uungu tani ghelei tenti, me ghe poppooaa nonga masi kiukiu ta taumattu ngatoa, me ghe aulia ngaotu ta ajiu etoa va Iesu Mesaea ia. ⁶ Me nau eteva ajiu etoa laghe tam aaloannaia me laghe tiuaala tani auliaa teeia, Pol ghe kaokaoaa vella kosa tale ghinnanina tani apasunga va karika ghe laolao aitauaa tee nannaaira, me ghe uela etaira va, “Marova am tam saanga, rangane ateva aue etoka etaimim. Ngaghe gheleila uunguaaghi etaimim. Nge tiitiuaa oia, ngalaolao ta taumattu ngeleka atoa.”

⁷ Vara me Pol ghe kasu vulila ale nivelu eitaua ngateva, me ghe lao sio tale kateva ale kalakalaa ia tale ale nivelu eitaua ngateva, alena ia kateva taumattu ararina atea ta Titias Jastas, ia aGrik ia me ghe kakkaua ngaitauaa tee ajiu etoa. ⁸ Krispas, namuu ia tale ale nivelu eitaua ngateva, ia me ila akapanaaili taumattu ngatoa laghe tokatoka tanganuena laghe

† **17:28:** Pol ghe auliaala nongina Epimenidis aKrit ia ghe pitila. ‡ **17:28:** Pol ghe mene auliaala nongina Aratus aSilisia ia ghe pitila. **17:29:** Ais 40:18-20; 44:10-17; Apos 19:26. **17:31:** Sams 96:13. **18:2:** Rom 16:3. **18:3:** Apos 20:34. **18:5:** Apos 17:14-15. **18:6:** Apos 13:46, 51; 20:26.

aiesoaala ta Vau eteva, me tee oroi mene katoa aKorint laghe nongola Pol ghe poppooaa, laghe aiesoaala me laghe asuulala.

⁹ Kateva eleivoo Vau eteva ghe aippooaa teela Pol tale nitaatara atea. Ghe uela ta Pol va, “Karika umene matautu! Uppooa ngasarasarakana ta taumattu ngatoa me karika umene ruu tani ppooaa. ¹⁰ Ta aghi aue atoka teeio, me karika teva aue eroo tani ghelei saasakieinio. Poli oroi ila kapughu taumattu ngatoa tale lo atea oia masaliki taatara.” ¹¹ Liuna avalua o me Pol ghe tokala eKorint eroroo kateae ninamanama me ghaonomo (6) ulana, tani apasunga inangarina ateva God etaira.

¹² Me nau Galio ghe gavanaala tale provinsi eteva eAkaia, aJiu etoa laghe tingina aitauala tani kune atoka Pol, me laghe laoinie sio tale liu niaisakei nongina Galio ghe ghelei niaisakei. ¹³ Laghe ue va, “Taumattu ngateva oia ghe aauliaa ta taumattu ngatoa va la kkaua God tale llo salana karika eaaimuli tee loo.”

¹⁴ Nau Pol ghe anna tani sama, Galio ghe uela ta aJiu etoa va, “Marova lo ateva oia taumattu ghe gheleila righi voto sesaaili, aghi aue aroo tani nongo inangariimim. ¹⁵ Me isaa o nikokkolomi tale inangari, arari me tale uneimim inangari nipaopao, am, am ghelei me am toka amasina. Karika va aghi aue aghelei niaisakei tale isaa o ase voto.” ¹⁶ Liuna avalua o me Galio ghe sungi vellala tale liu niaisakei. ¹⁷ Vara me ila akapanaaaili laghe poso atokala Sostenes, ia namuu ia tale ale nivelu eitaua ngateva me laghe uviela emua tale liu niaisakei. Galio karika ghe aisaeinilala.

Prisila, Akuila me Apolos

¹⁸ Pol ghe mene toka taula eKorint oroi nau. Vara me ghe kasu vulila tau ngaiesoa ngatoa me ghe lao sio tale masaliki taatara atea eKenkria tani aikaai tale anua ateva tani lao eSiria, me Prisila me Akuila lalu ghe usiela. Auena ghe aikaai ghe ggalila uu nguruna eKenkria mausi inangari nialokoi ghe gheleila ta God. ¹⁹ Laghe rekatala eIpises, me Prisila me Akuila lalu ghe tokala. Me Pol ghe lao sio tale ale nivelu eitaua ngateva tani aippooaa tee aJiu etoa. ²⁰ Nau laghe kolomiela va etoka teeila tale mene kasina nau, Pol karika ghe aloannala. ²¹ Nau ang ghe kasukasu, ghe gheleila inangari nialokoi eteva, ghe uela va, “Aue* amene mae etaimim arova aloannaane God.” Vara me ghe saesaela tale anua ateva tani kasu. ²² Nau ghe rekatala eSiisaria, ghe saela eJerusalem, me ghe soula taumattu ngatoa tale ale manga ateva tale nimasimasi, me ghe aippooaa teeilala. Vara me ghe siola eAntiok tale provinsi eteva eSiria.

²³ Pol ghe tokala kasina nau okae eAntiok, vara me ghe kasula tani lao akapa see tale provinsi elua eGalaisia me ePrigia, tani asarasarakana tau ngaiesoa ngakapa atoa.

²⁴ Kateva tana aJiu, ararina atea ta Apolos, ghe lutula tale masaliki taatara atea eAleksandria, me ghe mae sio tani toka eIpises. Alomasaanga ia tale Uru ngai Manga ateva, me muenna ia tee tani aippooaa. ²⁵ Auena ghe mae eIpises, laghe apasungaala salane Vau ngepona ateva etana, me nannaane sarasarakanaaaili tani mene apasunga ta mene katoa. Ghe aaulia ngamasinaaaili voto Iesu ghe gheleila, arongona ta ghe kilakila nonga niaasuu kannu Jon. ²⁶ Ghe tiuaala tani ppooa ngasarasarakana tale ale nivelu eitaua ngateva, me karika ghe maamatautu. Nau Prisila me Akuila

18:10: Jos 1:9; Ais 41:10. **18:18:** Nam 6:18; Apos 21:24. * **18:21:** Kasina uru ngai laghe pitila, laghe mene pitila va Aue atani lao eJerusalem tani toka tale nivelu eitaua ngateae.

lalu ghe nongoala, lalu ghe koloala va elao tanganueirarua me lalu tani aulia ngamasinaaili salane God etana.

²⁷ Nau Apolos ghe aloanna tani lao eAkaia, tau ngaiesoa ngatoa laghe asarasakanaiela, me laghe pitipiti lao sio ta lo atoa okae disaepolo laghe tokatoka eAkaia va la soua me la ghaaia. Nau ghe laa rekataa sio, ghe saasausi emasinaaili lo atoa taumattu tale maamasinaane God me laghe aiesoaala. ²⁸ Ghe apalala aJiu etoa, nau laghe aissakeanaala tale tummatavanga, poli ghe aapasunga tale Uru ngai Manga ateva va Iesu Mesaea ia.

19

elpises

¹ Nau Apolos ghe tokatoka eKorint, Pol ghe usilaala salana ngelae atikirighi. Emulina ghe rekatala tale masaliki taatara atea elpises me ghe saopila katoa tana disaepolo. ² Me ghe kolomilala va, “Ngam ghe ghaala Spirit Manga ateva nau eteva am ghe aikaiaala?”

Laghe liula me laghe uela va, “Karika, me karika ami ghe nongo poi va teva Spirit Manga etokatoka.”

³ Me Pol ghe kolomilala va, “Saa talo niaasuu eteva am ghe ghaaiela?”

Me laghe liula me laghe uela va, “Kanna niaasuu Jon.” ⁴ Pol ghe uela va, “Lo ateva niaasuu Jon ghe gheeleia, pei ninna ngaioghioghiaa ia. Me ghe uela ta taumattu ngatoa va la ghaiesoaa tale lo ateva taumattu aue emae emuli etana, ia o taumattu ngateva Iesu ta ngetana.” ⁵ Nau eteva laghe nongola isaa o inangari, me laghe ghaala niaasuu tale ararina atea Vau eteva Iesu. ⁶ Nau Pol ghe soaala nimane etaira, me Spirit Manga ateva ghe sio mae etaira me laghe samala tale asease nisama me laghe auliaa inangarina God. ⁷ Ila o disaepolo atoa ooroiaaira eroroo kasangaulu ghalua (12).

⁸ Pol ghe ssola tale aleira ale nivelu eitaua ngateva me ghe poppooaa inangarina Iesu me ararimangalina ateva God, me karika ghe maamatautu, me kotolu ulana ghe ppoaala isaa o inangari me ghe tootoonga tani ghaa oghi nannaaira. ⁹ Me katoa laghe tam anna tani nongo me laghe tam aikaiaa. Laghe poppooaa saasakiaa tale salane Vau ngepona ateva ta tummatavanga. Isaa avalua o me Pol me disaepolo atoa laghe ruula tani lao tale aleira ale nivelu eitaua ngateva. Pol ghe poppooaa inangari tale kateva kateva nau elome tale unna sikulu eteva Tiranus. ¹⁰ Ghe roola ghaluae ninamanama Pol ghe ghelei evaluela o, liuna avalua o me ila akapa taumattu ngatoa tale provinsi eteva eEisia, aJiu ila me aGrik ila, laghe nongola inangarina ateva Vau eteva.

Natuna atoa Skeva

¹¹ God ghe ghelei mirikolo ouna tale uunguaane Pol. ¹² Taumattu ngatoa laghe mae ghaaghaa unna aiaasae ateva Pol aiuungu ia me unna aiulua matane, me emulina laghe laa ghaatulituli ta kapuira tau sessa atoa, me laghe maamasina me lo atoa raroai etoa laghe kupilala, raroai etoa laghe kasukasu vulila.

¹³ Katoa aJiu laghe uungu ekapa see tani tiu velu raroai etoa, me laghe asease ararina atea Vau eteva Iesu tani toongi tani tiu velu raroai etoa tale taumattu ngatoa. Laghe ue va, “Tale ararina atea Iesu, ia o Pol epoppooaa inangarina ateva, ami auliaa etaimim va am kupi ghoa mae.” ¹⁴ Natuna

taita ghaitu (7) Skeva, ia namuu ia ta pristi etoa, laghe gheelei isaa o voto.
¹⁵ Kateva nau laghe gheleila ase nippooa ngateva o me raroai eteva ghe liula me ghe uela va, “Akilakila Iesu me akilakila Pol, me am tani see am?” ¹⁶ Me taumattu ngateva oia raroai eteva elome etana ghe aoso atoka saela etaira me ghe uvi saasakieinilala. Ase niuviuvi eteva ghe uvilala etana sesaaili ia, laghe ilou velu ghoala tale ale ateva karika ghinnaniira me vilikiira ghe raerae.

¹⁷ Ila akapa ajiu etoa me Grik etoa eIpises laghe nongo avaluela o me laghe matautu saasakiaala me laghe tau saela ararina atea Vau eteva Iesu.
¹⁸ Oroieili lo atoa laghe aikaiaa laghe mae sio tale matavanga me laghe aulia ngaotula sesa gheeleiaaira. ¹⁹ Me oroi ila taumattu ngatoa laghe gheelei nialaala laghe maeaa tee sio uneira vuku isaa o inangari nialaala elome etana me laghe tuula vuku ta mata taumattu ngatoa. Laghe ira akapala aipolipolina isaa o voto laghe tuula ghe roola ghalimangaulu airari (50,000) silva koen.* ²⁰ Tale ia o salana atikirighi me inangarina ateva Vau ngepona ateva ghe kasu ekapa seela me ghe pinosa akorokorongana.

²¹ Nau llo ghe lutula, me Pol ghe nnaala tani lao eJerusalem me ghe annaa va elao mua tale provinsi elua eMesedonia me eAkaia, me ghe uela va, “Nau eteva atara eJerusalem, atani lao tee eRom.” ²² Pol ghe suula kapuna tau ngai sausi elua ta Timoti me Erastus tani muemue lao eMesedonia me ia Pol ghe toka taula tale provinsi eteva eEisia.

Niaikkaluu eteae eIpises

²³ Tale isaa o nau kinatama niaikkaluu eteae ghe lutula mausi salane Vau eteva. ²⁴ Tau ngai ghelei tootoo voto tale silva, ararina atea ta Demetrius, ghe gheelei isaa o lutu tootoo ale, alena ia o goto ateva vause ia, ararina atea ta Atemis. Ia me lo atoa laghe gheelei isaa o voto, laghe ghaaghaa oroieili viliki veu. ²⁵ Demetrius ghe kolo aitauaala lo atoa la uungu eitaua tale ia o niuungu eteva me ghe uela etaira va, “Kapughu etoa, am kilakila va ita ghaaghaa masi viliki veu tale ia oia niuungu eteva. ²⁶ Me am taatara me am nongonongo vaalua taumattu ngateva oia ta Pol nge ghaala oroi taumattu eIpises me tale provinsi ekapa ateva eEisia. Eue va tootoo goto atoa taumattu ngatoa la gheelei karika va goto ila. ²⁷ Aue ita sesa, karika nonga tale niuungu eteva oia ta tee tale uunguaa nikkaua, tale alena nikkaua ngateva goto ateva vause ia ta Atemis, me karika aue la oneoneainia, me karika masau me lo atoa tee la tautae sae eEisia me tale kosa akapa ateva aue la ruu tani taue sae.”

²⁸ Nau laghe nongola llo oia, ghe sessai saasakieinilala me laghe tiuaala tani ovaova. Laghe ue va, “Atemis, kapuita ia aIpises atoa, namuu ia.” ²⁹ Karika masau me ia akapa masaliki taatara atea eIpises laghe tiuaala tani aisamaai etingina, me katengaata nonga ta laghe kunela Gaeas me Aristakus, taumattu ngalua oia aMesedonia ilalua, me lalu ghe kasukasu tee Pol, me laghe ssoainilalu tale liu ngai velu eitaua ngateva uneira ia aIpises atoa. ³⁰ Pol ghe anna tani lao ta taumattu ngatoa me disaepolo atoa laghe aarongia. ³¹ Me tee katoa namuu ta gavman kapuna ila Pol laghe suula inangari ta Pol va erau mene laa sso elome tale liu ngai velu eitaua ngateva.

³² Taumattu ngatoa laghe aaisamaai. Laghe ovaova me laghe aauliaa inangari karika isaa aitaua me oroi ila lo atoa laghe lao sio karika laghe kilakila vaalua me laghe lao sio tale ia o nivelu eitaua ngateae. ³³ Ajiu etoa laghe bbi tau ssola Aleksanda emua ta taumattu ngatoa me katoa

19:17: Apos 5:11. * **19:19:** silva koen Silva koen aipolina kateva nau. **19:21:** Apos 23:11; Rom 1:13. **19:23:** 2 Ko 1:8. **19:29:** Apos 20:4; 27:2; Kol 4:10; Plm 24.

laghe ovaova me laghe auliaa teeia inangari va eghelei righi voto. Me ghe paopaola ta nimane va la matua atingina poli ghe anna tani aulia ngamasalika inangari ta taumattu ngatoa. ³⁴ Nau eteva laghe kilala va ajiu ia laghe ovaovala ghe roola ghalua aoa. Laghe ue va, “Atemis, kapuita ia aIpises atoa, namuu ia.”

³⁵ Kapuira tau ngaipitipiti eteva kansolo atoa ghe paola taumattu ngatoa me ghe uela va, “Taumattu nge Ipises atoa, kosa akapa ateva ekilakila va masaliki taatara atea eIpises eaaitaraa ale nikkaua ngateva kinatama goto ateva Atemis me tootoona ateva ghe katuula elomarase me ghe sio mae. ³⁶ Liuna avalua o me voto oia karika teva eue va kamena. Am tani matua atingina me am rau mene ailuilui tani ghelei righi voto me aue masi ninannaa emae. ³⁷ Am maeaa sio taumattu ngalua oia me karika laghe ainao poila righi voto tale ale manga me karika laghe auliaa saasakiaa teela kapuita goto ateva vause ia. ³⁸ Arova Demetrius me kapuna atoa righi sessaiaaira ta teva taumattu, la laoa tale niaisakei, me gavanaa etokatoka aue eroroo tani ghelei eghulughuluena niaisakei. ³⁹ Arova righi voto am mene anna tani auliaa, am laoa tale nivelu eitaua ngateae nau namu ngatoa la koloam va am lao me la nongoam. ⁴⁰ Isaa avalua o me ngita tokala tale voto sesa me ita rooroaaili va ita aisakei poli marova la kolomi va mausi saa ita gheleila isaa o voto, karika aue ita ghele auliaa righi liuena.” ⁴¹ Nau ghe ruula tani auliaa isaa o voto me ghe sungi vellala.

20

Isaa eMesedonia me eGris

¹ Nau niaikkaluu ghe kapala me Pol ghe kolo aitauaala disaepolo atoa me ghe aippooaa teeilala tani asarasakanaila, me ghe kasu vulilala tani sio eMesedonia. ² Ghe kasu seela tale lo ateva o provins me ghe kaarasila tani aippooaa teela tale oroieili masi inangari tani asarasakana isaa o taumattu, me ghe rekatala eGris, ³ me ghe tokala kotolu ulana. Nau ghe anna tani lao eSiria tale anua ateva, ajiu etoa laghe loeloe tani uvi ematea. Liuna avalua o me ghe mene aikolikoliaala nannaane va emene oghi sae eMesedonia. ⁴ Ghe kasu eitauaa teela Sopata natuna ia Pirus, aBerii ia, me Aristakus me Sekundus aTesalonika ilalua, Gaeas aDebi ia, Tikikus me Tropimus tanganueiraru eEisia, me Timoti. ⁵ Isaa o taumattu laghe muemuela tani sio toiengalua eTroas. ⁶ Me angalu* ghe tiu ghoala ePilipae nau nivelu eitaua ngateae tale verete karika righi isti etana ghe ruula. Ghalima (5) nau angalu ghe iloula tale anua ateva, me angalu ghe siola tani tara isaa o taumattu ghe toitoiengalua eTroas. Ami ghe tokala ghaitu (7) nau eTroas.

Iutikas ghe totula tale nimate eTroas

⁷ Airuuruu tale nau manga ateva, ami ghe toka aitauaala tani piri verete† me Pol ghe ppoaala ta taumattu ngatoa. Ta aue ghe pai me ghe kasu, ghe ppoaala lomosi ta ghe ghaala elomatuaa voo. ⁸ Oroieili lam aitaatara tale ale ngepona atiulu ami ghe tokatoka etana. ⁹ Tale uindoa ngateae aliki taita ateva ararina atea ta Iutikas ghe asekanue atokala. Nau Pol ghe aippooaa Iutikas ghe llusu etokala, me ghe laa sae katuu arau epona tale aiaakotonna atiulu ale tale ale ngepona ateva, me ghe siola arau etapaa kosa. Laghe siola tani saua me matena ia. ¹⁰ Pol ghe kkure siola me ghe tturru siola

* **20:6:** Luk ghe kasukasu eitauaa tee Pol, me ghe pitila va “angalua”. † **20:7:** piri verete Katoa la nannaa va malloeana va ninamanama atea nongina Iesu me disaepolo atoa laghe gheleila tale ale ngepona atiulu, me katoa la nannaa va nim ninamanama atea.

me ghe saula aliki taita ateva me ghe uela va, “Am rau mene matautu, ta sakesake ia.” ¹¹ Vara ghe mene saela epona me ghe pirila verete me laghe namanamala. Laghe aippooaala lomosi ta ghe paila me ghe kasula. ¹² Taumattu ngatoa laghe ghaala aliki taita ateva oia me laghe laoainie sio tanganuena sakesake ia me laghe masimasieiliila.

Pol ghe aippooa ngaruula ta elda ngatoa eIpises

¹³ Ami ghe muemuela tale anua ateva me ami ghe ssola tale masaliki eteae eAsos tani kaai Pol ta ghe uela va aue enim kasuaa me ami mae kaaia okae. ¹⁴ Nau ta ghe souemamila eAsos ami ghe kaaiela me ami ghe lao sio tale masaliki taatara atea eMitilini. ¹⁵ Mene kateva nau ami ghe tiu ghoala me ami ghe rekatala tale patunganua ateva eKios. Lo ateva o nau ghe lange sio me ami ghe ssola tale patunganua ateva eSamos, me ghe paila ta mene kateva nau, me ami ghe rekataala tale masaliki taatara atea eMiletus. ¹⁶ Pol ghe nnaala tani lau etoka eIpises ta la rau mene appataia tale provinsi eteva eEisia. Ta ghe ailuilui tani lao parasi eJerusalem nau ta Pentikos, arova ghe rooro.

¹⁷ Isaa o eMiletus Pol ghe suula inangari ta elda ngatoa tale ale manga eIpises va la mae taraia eMiletus. ¹⁸ Nau ta laghe rekatala ghe uela etaira va, “Am kilakila vaalua aghe toka teiemla tale mata ngemua ateva nau, nau aghe tani rekatala tale lo ateva oia provinsi eEisia lomosi ta nau oia. ¹⁹ Auungu ta Vau ngepona ateva tale nisioaa ninanna, me rarum mata me maate ta poli loeloeaaira ajiu etoa tani uvi emateaghi. ²⁰ Am kilakila va karika aghe sio asoasooa poi tani ppooa voto llo erooro tani sausiem. Aghe aippooa tale matavanga me elome tale paa ngaleimim. ²¹ Aghaaulia ngaotu ta ajiu etoa me Grik atoa va la kiri mae ta God tale ninna ngaioghioghiaa me la aiesoaa ta kapuita Vau eteva ta Iesu.

²² “Me ghaine Spiriti eteva ange tau esarasarakana mae sio ninanna va asio eJerusalem me karika akilakila va saa llo aue elutu etaghi. ²³ Me akilakila nonga va, tale masaliki taatara akapa atoa, Spirit Manga ateva eaauliaa kieghi va aue ale mata voovoo me sesa voto etoitoieghi. ²⁴ Amasimasi tani mate mausi Vau ngepona ateva, arova aghele ruu uunguaa Vau eteva Iesu ghe sungieghila tani ghelei, va appooa ngaotu masi kiukiu tale maamasinaane God.

²⁵ “Aghe kasu ekapa seela etaimim tani ppooa ararimangalina ateva God me ghaine akilakila va karika teva etaimim aue emene taraieghi. ²⁶ Aghaauliaa etaimim ghaine va, marova toa etaimim karika la saanga, karika righi uunguaaghi etaimim, ²⁷ poli karika aghe maamatautu tani aulia ngaotu aloannaane akapa God etaimim. ²⁸ Am aitara ngamasinaiem me isaa o llo taumattu Spirit Manga ateva ang ghe gheleiemla va am tau ngai toitoi iem tale ale manga ateva. Ia o ale manga ateva God ghe poliela tale raena ateva. ²⁹ Akilakila va nau akasu vuliem katoa taumattu nongina sesa pau ngetapaa tuvui etoa aue la kupi sso tani tootonga tani ghelei saasakiaa taumattu. ³⁰ Me elome ta ngetaimim katoa aue la tingina sae tani auliaa voto llo kamena me oroi ila lo atoa etaimim la aikaaiaa aue la oghi tani laa aimuli teeila. ³¹ Liuna avalua o me am paniem. Me am rau mene kkaluaa va kotoluae ninamanama karika aghe aamaomao tani auliaa kie kateva kateva ta ngetaimim, ellaa me eleivoo rarum mataghi ghe kaokao ta poliimim.

³² “Ghaine ngatautauem lao ta God me inangarina tale maamasinaane erooro tani atuutulu ta ngetaimim me etau aatu voto akapa ghe aulia

ngalokoila ta lo atoa ang ghe suilala va ila manga ila. ³³ Karika aghe sassai poi lo atoa uneira viliki veu me ghinnaniira. ³⁴ Am kilakila vaalua aghe uungu tale nimaghi eluelange tani ghaa aloannaaghi me kapughu etoa. ³⁵ Tale voto akapa agheelei, aghaapasunga etaimim va ita uungu aanasa avalua o tani aisausiaa lo atoa karika sarasarakana ila, me anannaa inangarina Vau eteva Iesu ghe auliaala va, ‘Oroieili nimasimasi emaemae ta lo ateva taumattu epaaparruu, elaulau lo ateva enim anna tani toka ghaaghaa.’”

³⁶ Nau ghe ruula tani auliaa llo, me ghe suuiaala me tee lo atoa laghe ususia me ghe looloo saela. ³⁷ Ila akapa laghe tiuaala tani ngala me laghe llotiela me laghe ngusuela. ³⁸ Voto ateva ghe tani gheleilala me laghe alousiusieliila, ia o tuku inangarina ateva ghe uela va karika aue la mene taraia. Vara me laghe kasu eitauaa teiela tani sio tale anua ateva.

21

Pol ghe saela eJerusalem

¹ Ami ghe kasu vulilala me ami ghe laa ghoa aikaai tale anua ateva me ami ghe tiu ekorokoro ghoala tani lao tale patunganua ateva eKos. Ghe pai saela me ami ghe rekatala tale masaliki taatara atea eRodis me ami ghe mene lao sio tale masaliki taatara atea ePatara. ² Ami ghe tarala anua ateva ghe laolao ePoenisia me ami ghe aikaaila etana me ami ghe tiu ghoala. ³ Ami ghe kautula eSaeprasi me karika ami ghe ssola, ta ngami ghe laa siosio tale pai saot ativilau me ami ghe lao sio eSiria. Ami ghe ssola tale masaliki taatara atea eTaer me anua ateva ghe kapela ghinna. ⁴ Ami ghe tarala disaepolo atoa me ghaitu (7) nau ami ghe toka teilala. Spiriti eteva ghe auliaala ta taumattu me laghe aulia ngasarasarakana ta Pol va erau mene sae eJerusalem. ⁵ Nau eteva naumami tani toka ghe kapala, ngami ghe mene tiutiu ghoa. Disaepolo atoa, vauseniira atoa me natuira atoa laghe ghoala tani oghi eleka tale masaliki taatara atea me ami ghe suuiaala tani looloo sae elosamarra. ⁶ Laghe oghi ghoala etaimami me ami ghe aikaaila tale anua ateva me ila laghe oghi lao sio tanganueira.

⁷ Ami ghe tiu ghoala eTaer me ami ghe lao sio tale masaliki taatara atea eTolimaais. Ami ghe soula katoa laghe aaiesoa ngaitauaa teiemami, me ami ghe toka teilala kateva nonga nau. ⁸ Ghe pai saela me ami ghe kasula tani lao eSiisaria. Ami ghe tokala tanganuena Pilipi, tau ngai ppooaa masi kiukiu ia, me kateva ta ghaitu (7) tau ngai uungu laghe suitoongainilala eJerusalem. ⁹ Ghaata natuna vause karika lailai laghe poppooaa inangarina Vau ngepona ateva.

¹⁰ Ami ghe tokala mene kasina nau me kateva propete ararina atea ta Agabas ghe kasula eJudia ghe sio mae. ¹¹ Ghe mae sio etaimami me ghe ghaala ai-irina atea Pol me ghe irila nimane me kkena etana. Me ghe uela va, “Spirit Manga ateva euela va nongina nga irieghila, aue aJiu etoa eJerusalem la iri etoka lo ateva ai-irina atea oia me la taue lao ta tau ngeleka atoa.”

¹² Ami ghe nongo avaluela o me ami me taumattu nge Siisaria ngatoa ami ghe aulia ngakorokoronganala ta Pol va, “Urau mene sae eJerusalem.” ¹³ Vara me Pol ghe liula me ghe uela va, “Vaalua me am ngangngala me am gheelei nannaaghi eaalousiusi? Karika aghaimonomosiaa nonga tani karavusu ta tani mate tee eJerusalem tale ararina atea Vau eteva

Iesu.” ¹⁴ Nau eteva karika ghe roola tani nongoamami, ami ghe ruula tani aippooaa, me ami ghe uela va, “Masina, aloannaane Vau ngepona ateva aue eghelei.”

¹⁵ Kasina nau ghe lange sio me ami ghe aimonomosiaala ghinnani-imami me ami ghe saela eJerusalem. ¹⁶ Katoa disaepolo eSiisaria laghe usiemamila laghe laoainiemami sio tanganue Nason, me ami ghe tokala o. Ia atala nge Saeprasi ia, me ia kateva disaepolo ghe tiuaa ngakasinale tani aikaiaaa.

Pol ghe rekatala eJerusalem

¹⁷ Nau eteva ami ghe rekatala eJerusalem tau ngaiesoa ngatoa laghe masimasieliila tani souemami. ¹⁸ Ghe pai saela, ami me Pol ami ghe lao sio tani tara Jeimis, me elda ngakapa atoa laghe mae tee sio. ¹⁹ Pol ghe soulala tale nimasimasi me ghe aulia ngakapaailiila voto God ghe gheleila elome tale taumattu ngeleka atoa tale uunguaane.

²⁰ Nau eteva laghe nongola kiukiu, laghe tau saela ararina atea God. Vara me laghe uela etana va, “Kapumami, angu tarala ghaisa airari taumattu nge Jiu ngila ghe aiesoala me ila akapa la sarasarakana tale inangari nipaopao. ²¹ Ngila ghe nongola va io Pol ughe uela ta aJiu etoa la tokatoka tee taumattu ngeleka atoa va la liu viliira tale inangarina Moses me ughe ue teela etaira va la rau mene iso natuira taita atoa me la rau mene aimuli tee gheleiaaira tuvuita atoa. ²² Aue la kila va angu ghe mae sio. Me sa ateva ami gheleia? ²³ Ughelei sa ateva ami aulieinia etam. Taumattu ghaata laata tokatoka teiemami laata ghe gheleila inangari nialokoi ta God. ²⁴ Ughaa isaa o taumattu me am lao tale ale manga ateva me ughusilaa me am uunguaa niraarangisana, me upoli voto la ghelei pei nipoli me aue la ggali uruira tani ghelei rooroaa inangari nialokoi, me ila akapa aue la kila va kiukiu la auliaa teeio kamena ta io uaaimuli tee inangari nipaopao. ²⁵ Me ta tau ngeleka atoa la ghaaikaiaa, ngami ghe pitipitila etaira tani auliaa nannaaimami va la rau mene nama malatau la ghelei sae aiaavusuvusuenta tale tootoo atoa, me tale rae, me malatau tale asease ghaata kkena atoa la kiikii pule aloira, me la rau mene lai salosalooa see.”

²⁶ Ghe pai saela me Pol ghe ghaala isaa o taumattu me laghe lao sio tani ghelei eraaranganaila me ghe ssola tale ale manga ateva tani auliaa ta pristi etoa va saa nau eteva uunguaa tani ghelei eraaranganaila eruu me kateva kateva etaira etaula opring.

Laghe kunela Pol

²⁷ Ghaitu (7) nau ghe ruuruu me katoa aJiu tale provinsi eteva eEisia laghe tarala Pol tale ale manga ateva me laghe sulungila taumattu ngatoa me laghe poso atokala Pol. ²⁸ Laghe aaore tani ue va, “Taumattu nge Israeli etoa, am sausiemami, poli ia oia taumattu ngateva eaapasunga ngakapa see tani akupi kapuita taumattu me uneita inangari nipaopao me ia oia ale manga ateva. Me ange kupiaa tee sso mae taumattu nge Grik atoa tale ale manga ateva tani avuluti voto ateva manga ia.” ²⁹ Kasina nau ang ghe lange sio laghe tarala Tropimus aIpises ia tale masaliki taatara atea tee Pol me laghe annaa va Pol ghe kupieinie ssola tale ale manga ateva.

³⁰ Taumattu ngatoa laghe nongola isaa o inangari me ila akapa eJerusalem ghe sessailala me laghe aisokosokoila me laghe posola Pol, me laghe ae velue ghoala eleka me laghe kavatila atamana atoa tale ale manga ateva. ³¹ Nau laghe tootokaa tani uvi emate Pol, inangari ghe ghaala namu ngateva

ghe aaitoiaa tau ngai uvii nge Rom akapa atoa eJerusalem va ila akapa eJerusalem laghe aaikkalui. ³² Gherangia nonga ta ghe ghaala tau ngai uvii etoa me namu ngatoa laghe aaitoiaa kateva ai (100) tau ngai uvii me laghe ilou siola kona taumattu ngatoa laghe tokatoka. Me nau taumattu ngatoa laghe tarala tau ngai uvii etoa, laghe ruula tani uvi Pol.

³³ Namuu tale tau ngai uvii etoa ghe lao sio me ghe kunela Pol me ghe uela va la iri etokaia tale sene alua me ghe kolomilala va, “Saa taumattu ia me sa ateva ghe gheleuela?” ³⁴ Ila akapa taumattu ngatoa laghe aisamaai me namu ngateva ghe tam rooroo tani nongo, ta laghe aisavalaii poli kateva kateva etaira ghe auliaa nannaane. Me ghe uela ta kapuna atoa va, “Am ghaaiela me elao tale ale ateva tau ngai uvii etoa la tokatoka etana.” ³⁵ Nau Pol ghe rekata lao sio tale aisaesae ateva me tau ngai uvii etoa laghe tarala va taumattu ngatoa laghe annaaili tani uvi ematea, liuna avalua o me laghe sauela. ³⁶ Taumattu ngatoa laghe aaimuli me laghe aippooa ngasarasarakanaaili va emate.

Pol ghe aippooa teela taumattu ngatoa

³⁷ Tau ngai uvii etoa laghe aainasiaa tani ghaa Pol me ghe lao tale ale ateva tau ngai uvii etoa laghe tokatoka etana me Pol ghe ue lao sio ta namu ngateva va, “Erooroo va aghaippooa teeio?”

Me namu ngateva ghe uela va, “Ukilakila inangari nge Grik? ³⁸ Aghannaa va io kateva aljip kasina nau ang ghe lange sio ghe tiuaala niuiuvii eteae me ghe muemuaala ghaata airari (4,000) tau niuiuvii tale iema me laghe ssola tale voto ateva karika rigi taumattu etana.”

³⁹ Pol ghe liula me ghe uela va, “Aghi aJiu ieghi me tanganueghi eTases tale provinsi eteva eSilisia, me karika va nim taumattu ieghi tale teae ghauna masaliki taatara. Utau velueghi me aghaippooa tee taumattu ngatoa.”

⁴⁰ Nau namu ngateva ghe tau veluela tani aippooa me Pol ghe tingina saela tale aisaesae ateva me ghe paolala ta nimane va la rau mene sama. Laghe matua ngatinginala me ghe aippooa teelala tale inangari nge Hibru.

22

¹ “Tamaghi etoa, tueghi me nengaghi etoa, am nongo! Isaa oia nga ghaloanna tani aulia ngamasalika etaimim va aghi karika aghe ghelei saasakiaala teva voto.”

² Nau laghe nongola Pol ghe samasamaa nge Hibru teelala laghe matua ngatinginala.

Me Pol ghe uela va, ³ “Aghi aJiu ieghi, aghe lutula eTases, tale provinsi eteva eSilisia, me aghe namuula oia eJerusalem. Aghi kapuna tau ngai ghaa alomasaanga ieghi Gamaliel. Ia ghe apasunga ngamasinaailiila inangari nipaopao ghe ghaala ta tuvura atoa, me aghe taueghi lao sio tani ghelei uunguaane God, nongina am akapa am uunguaa ghaine. ⁴ Aghe ghelei saasakiaa ta lo atoa laghe uusilaa salane atikirighi Iesu tani atokaila tale nimate. Aghe kunekune taita me vause atoa tani atokaila sso tale ale mata voovoo. ⁵ Namu ngateva ta pristi etoa me Kansolo akapa atoa aue la auliaa etaimim va koronna llo oia aghaauliaa. Laghe pitila uru ngai ta namu ngatoa ta aJiu etoa eDamaskas va asio kune katoa kapuita okae tani sae attara matanaila eJerusalem.”

Pol ghe kiukiuuuaala vaalua ghe aikolikoliaala

⁶ Pol ghe mene uela va, “Aghe kasukasu elaa siosio eDamaskas, elo sinaka, ngaghe akalakalalaa me arovaeaa ta kinatama mallanga ateva ghe sio mae epona liu, mallangina ateva ghe ghaaieghila. ⁷ Me aghe katuula tapaa kosa, me aghe nongola lingi ngalo ateva ghe uela va, ‘Sol, Sol, vaalua me ugheelei saasakieinaghi?’

⁸ “Me aghe liula me aghe uela va, ‘Io see, vau eteva?’

“Me ghe uela etaghi va, ‘Aghi Iesu nge Nasareti ugheelei saasakieinaghi.’ ⁹ Taumattu ngatoa ami me ila laghe tarala mallanga ateva, me karika laghe nongola lingi ngalo ateva ghe aippooaa teeieghi.

¹⁰ “Aghe kolomila va, ‘Sa ateva agheleia, Vau eteva?’

“Me ghe uela etaghi va, ‘Totula me usio eDamaskas, me kateva taumattu aue eauliaa niuungu ngaghe aimonomosiaala va ughelei.’ ¹¹ Aghe mata salusalula poli mallanga ateva namungaili ia. Lo atoa ami me ila laghe katulainaghila tani sso eDamaskas.

¹² “Kateva taumattu ghe tokatoka eDamaskas, ararina atea ta Ananaeas, ghe aaimuli tee inangari nipaopao, me laghe aanamunamunganeia aJiu etoa laghe tokatoka okae eDamaskas. ¹³ Ananaeas ghe mae sio tani tingina teeieghi, me ghe uela va, ‘Kapughu Sol, taatarala!’ Me arovaeaata ta mataghi ghe otila me aghe taraiela.

¹⁴ “Me ghe uela va, ‘Kapuiria Goto ateva tuvura atoa ghe suitoongainiola va ukila aloannaane me utara Taumattu ngateva Ghulughuluena ia me unongo llo eaauliaa ta paane. ¹⁵ Io aue uaulia ngaotua ta taumattu ngakapa atoa tale llo voto ughe tarala me ughe nongola. ¹⁶ Sa ateva umene toia? Tingina saela! Ulaa ghaa niaasuu me ukolo tau ararina atea, me aue epora velu kalum ssavoto.’ ”

Vau eteva ghe suula Pol tani laa ppooaa ta mene katoa

¹⁷ Pol ghe mene uela va, “Nau aghe oghi saela eJerusalem aghe ssola tani looloo sae tale aleira atiulu aJiu etoa tale ale manga ateva, me aghe tarala kateva nitaatara. ¹⁸ Aghe tarala Vau eteva ghe uela etaghi va, ‘Gherangia ta ukasu vuli eJerusalem, poli karika aue la nongo usilainio nau uppooaa inangarighi.’

¹⁹ “Aghe liula va, ‘Vau eteva, la kilakilaailieghi va aghe laolao tale oroi ale nivelu eitauaa, aghe kunekune me aghe paruparu lo atoa laghe aaiosoa etam. ²⁰ Nau laghe uvi ematela Stipeni, kapum tau ngai aulia ngaotu ia, aghi aghe tiitingina me aghe tarala uviuviaane me aghe asokoila, me aghe aaitaraa ghinnaniira tau ngai uvina atoa.’

²¹ “Vau eteva ghe uela etaghi va, ‘Kasula, ta aue asungio ulao amasaueili ta tau ngeleka atoa.’ ”

²² Taumattu ngatoa laghe nongonongo Pol ghe samala lomosi ta ghe uela va elao ta taumattu ngeleka atoa, vara me laghe tiuaala tani aore anamungaili. Laghe ue va, “Uvi emateala! Karika masina va etoka!”

²³ Laghe aore me laghe leeleaa uneira aiaasae ngeleka me laghe veluvelu sae au eteva epona. ²⁴ Liuna avalua o me namuu ta tau ngai uvii etoa ghe auliaala va la ghaa Pol me esso elome tale ale ateva tau ngai uvii etoa la tokatoka etana, me ghe uela va la uetaia me la kolomia va vaalua me taumattu nge Jiu etoa la aore atingina. ²⁵ Nau laghe iriiria tani uetaia, Pol ghe uela ta kateva namuu eaaitoiaa kateva ai (100) tau ngai uvii ghe tiitingina akalakalangina va, “Emaamasina va am ueta teva sitisen nge Rom karika ghe aisakei?”

22:18: Apos 9:29-30.

22:19: Apos 8:3; 26:9-11.

22:20: Apos 8:1.

22:21: Apos 9:15.

22:25: Apos 16:37.

²⁶ Nau ghe nongola isaa o inangari, ghe lao sio tani auliaa ta lo ateva namuu ia etaira akapa. Namu ngateva eaaitaraa kateva ai tau ngai uvii ghe uela va, “Sa ateva ugheleia? Ta taumattu ngateva oia sitisen nge Rom ia.”

²⁷ Namu ngateva eaaitara ngakapa tau ngai uvii etoa ghe mae sio ta Pol tani kolomia va, “Io sitisen nge Rom io?”

Pol ghe liula me ghe uela va, “Ue.”

²⁸ Namu ngateva eaaitara ngakapa tau ngai uvii etoa ghe uela ta Pol va, “Aghi aghe vella oroieili viliki veu tani sitisen nge Rom.”

Me Pol ghe uela va, “Aghi sitisen nge Rom ieghi poli tamaghi sitisen nge Romi ia.”

²⁹ Nau lo atoa tau ngai uvii laghe anna tani kolomi righi nikokkolomi ta Pol laghe nongola va Pol sitisen nge Rom ia laghe matautula me arovaeaata ta laghe tapaila, me kapuira namu ngateva eaaitara ngakapa ie tee ghe matautula, ta ia ghe sungilala tani iri Pol.

³⁰ Namu ngateva eaaitara ngakapa tau ngai uvii etoa ghe aaloanna tani kila amasina va Pol ghe tani gheleila saa voto sesa. Me ghe pai saela ghe ghaa vella sene laghe iriela etana. Namu ngateva ghe suula inangari ghe lao sio ta namu ngatoa ta pristi etoa me Kansolo atoa tani velu eitauaa. Me eghaa Pol me esio atinginaia ta mataira.

23

Pol ghe aulia ngaotula inangari ta Kansolo atoa

¹ Pol ghe pasiaala matane ta Kansolo atoa me ghe uela etaira va, “Tueghi me nengaghi etoa, aghe uungu eitauaa teela God, nannaaghi masinaaili, me gheeleiaaghi masina ange mae ghaa sio ghaine.” ² Ghe aulia ngavaluela o me namu ngateva ta pristi etoa, Ananaeas etana, ghe uela ta taumattu ngatoa laghe tiitingina akalakalangina ta Pol va, “Am posalala paane ateva.”

³ Pol ghe uela etana va, “God aue euvio, poli io nongina aivativati eteva sesa ia, laghe usingiela tale usousoana.* Unannaa va uaaimuli tee inangari nipaopao? O umae sio tani toka tani ghelei niaisakei etaghi me io ugheelei saasakiaa inangari nipaopao, me uue va la posalaieghe.”

⁴ Lo atoa laghe tiitingina akalakalangina laghe uela va, “Vaalua me uppooaa saasakiaa ta namu ngateva ta pristi etoa kapuna ia God?”

⁵ Me Pol ghe uela va, “Tueghi me nengaghi etoa, karika akilakila va namuu ia ta pristi etoa. Arova aghe kilakila, karika aue aghele ppooaa teeia, poli tale Uru ngai Manga ateva laghe pitila va, ‘Karika umene ppooaa saasakiaa tee lo ateva eaaitoiaa kapum taumattu ngatoa.’”

⁶ Nau Pol ghe kilala va katoa etaira Sadiusi ila, me katoa Paresi ila, ghe sama anamuula tani ue va, “Tueghi me nengaghi etoa, aghi Paresi ieghi, natuira aghi Paresi etoa. Aghaiesoaa va lo atoa laghe matela aue la totu. Liuna avalua o me nga ghaaisakei.” ⁷ Nau Pol ghe aulia ngavaluela o me Paresi etoa me Sadiusi etoa laghe tiuaala tani aisamaaii. Me laghe tiu reerekataala. ⁸ Ta Sadiusi etoa la ghaiesoaa va lo atoa la matemate karika la rooroo tani mene totu, me karika righi ensolo me spiriti. Me Paresi etoa la ghaiesoaa isaa akapa o voto.

⁹ Laghe tiuaala tani aisamaaii enamuu, me katoa tana tau ngai aapasunga tale inangari nipaopao Paresi ila, laghe tiuaala tani aikiso. Laghe ue va, “Taumattu ngateva ona karika righi kanna sesa. Ta koti koronna lo eaauliaa

22:29: Apos 16:38. **23:2:** Jon 18:22-23. **23:3:** Mat 23:27. * **23:3:** Malloeana inangarina Pol va Ananaeas usimaghalua ia. **23:5:** Eks 22:28. **23:6:** Apos 26:5. **23:8:** Mat 22:23.

koti spiriti o teva ensolo ghe auliaala etana.”¹⁰ Me namu ngateva ta tau ngai uvii etoa ghe tarala me ghe nongola niaikkaluuu eteae, me ghe matautula. Ghe maamatautu va pai eluevilau lalu rau aisariaa pakapakasi Pol va emate. Mausina avalua o me ghe suula tau ngai uvii etoa tani ghaa velu Pol ta ajiu etoa, me laghe laa ghatokaia tanganueira tau ngai uvii etoa.

¹¹ Eleivoo me Vau ngepona ateva ghe tingina valaala ta Pol me ghe uela etana va, “Utingina asarasarakana me urau mene matautu. Nongina ughe aulia ngaotueghila eJerusalem, umene laa ghaulia ngaotueghi eRom.”

Ajiu etoa laghe aippooa ngaitauaala tani uvi emate Pol

¹² Elue talaua me ajiu etoa laghe toka aippooa ngaitauaala va la tani uvi emate Pol. Laghe gheleila inangari nialokoi va karika la mene namanama me la mene ropi ta la tani uvi emate mua Pol. ¹³ Ila akapa lo atoa laghe gheleila inangari nialokoi, elaulau ghaatingaulu (40+) taumattu. ¹⁴ Laghe lao sio ta namu ngatoa ta pristi etoa me namu ngatoa tani auliaa kieira va, “Ngami auliaala inangari nialokoi va ami rau mene namanama me ropi ta ami tani uvi emate mua Pol. ¹⁵ Liuna avalua o me am me Kansolo atoa, am suu sae inangari ta namu ngateva ta tau ngai uvii etoa va eghaaie sio me am kame va am mene anna tani ghaa amasina righi inangarina. Auena emae rekataa etaimim, aue ami uvi ematea.”

¹⁶ Me nau aloana ateva Pol ghe nongola inangari laghe aaloanna tani ghelei tee Pol, ghe saela tanganueira tau ngai uvii etoa tani auliaa kie Pol.

¹⁷ Pol ghe kolola kateva namuu ghe aaitoiaa kateva ai (100) tau ngai uvii me ghe uela va, “Ghaala aliki eteva toko me ulaoainia ta kapum namu ngateva me aue elaa ghauliaa inangari etana.” ¹⁸ Liuna avalua o me ghe ghaala aliki eteva me ghe laoainie sio ta namu ngateva ta tau ngai uvii ekapa atoa.

Me ghe uela va, “Pol, tau karavusu eteva, euela va amaeaa aliki eteva etam tani auliaa inangarina etam.”

¹⁹ Liuna avalua o me namu ngateva ta tau ngai uvii ekapa atoa ghe kuneieila, me lalu ghe laa tingina ppae sio, me ghe kolomiela va, “Sa ateva inangari ualoanna tani aulieinia etaghi?”

²⁰ Me aliki taita ateva ghe uela va, “Ajiu etoa la ghaippooa ngaitauaala va la kolomio me utau sio Pol ta Kansolo atoa nimanaa. Aue la kameo va la ghaaloanna tani pae amasina liue inangarina Pol. ²¹ Me urau mene usilaa inangariira. Katoa etaira elaulau ghaatingaulu (40+), aue la lloso atoka tani uvi ematea. Laghe alokoila inangari nialokoi va la tani uvi emate Pol me la vira namanama me la ropi. O isaa oia la sio toitoi va sa ateva aue uliua tale inangariira.”

²² Me namu ngateva ghe uela etana va, “Karika umene auliaa ta teva va angughe mae auliaa sio etaghi.” Me ghe sungi veluela.

Laghe sungiela tani sio ta Peliks

²³ Liuna avalua o me namu ngateva ta tau ngai uvii etoa ghe kolola ghalua tana namuu me ghe uela va, “Amalu ghaa ghalua ai (200) tau ngai uvii me ghaitungaulu (70) llo aue eilou tale ooso me ghalua ai (200) aisau vaalau me am aimonomosiaa tani lao eSiisaria ghaine eleivoo ta 9 kilok.†
²⁴ Am aimonomosiaa unna tani ooso Pol me am kasueinia tani sioaa ngamasinaia ta Gavana Peliks.”

²⁵ Me namu ngateva ta tau ngai uvii etoa ghe pitila uru ngai etikirighi ghe uela va,

23:11: Apos 27:24; 28:16, 23. **23:15:** Apos 25:3. † **23:23:** 9 kilok Tale inangari nge Grik, aiaakotonna ateva aoa eleivoo.

²⁶ Aghi Klaodias Lisias,
Apitipiti sio uru ngai etikirighi etam, Gavana Peliks,
Masi ngelo sinaka etam.

²⁷ Ajiu etoa laghe poso atokala ia o taumattu ngateva me la aloanna tani uvi ematea. Me aghe nongola va ia aRom ia. Liuna avalua o me aghi me tau ngai uvii etoa ami ghe lao sio tani ghaa oghia tale nimaira.

²⁸ Aghe aloanna tani kila va vaalua liuene inangari me aghe laoinie sio ta kapuira Kansolo atoa. ²⁹ Me aghe kolomilala, me aghe kilala va laghe nim ghaaiela ta poli uneira inangari nipaopao, me karika ghe gheleila righi voto va emate o esso tale ale mata voovoo. ³⁰ Me ghaine nga nongola va ila aaloanna tani uvi ematea. Liuna avalua o me nga sungi parasie sio mae etam. Me nga ghauliaala ta taumattu ngatoa la ghauliaa teeia inangari va la sio tingina ta matam me unongo inangariira.

³¹ Me tau ngai uvii etoa laghe nongo usilaala namu ngateva me laghe ghaala Pol eleivoo me laghe sioainiela eAntipatris. ³² Ghe paila ta mene kateva nau, tau ngai uvii etoa laghe iloula tale ooso me laghe laoa sio Pol eSiisaria. Me lo atoa tau ngai uvii laghe nim kaakasuaa ta kkeira laghe oghi saela tale ale ateva tau ngai uvii etoa la tokatoka etana eJerusalem. ³³ Me tau ngai uvii etoa la ghe iilou tale ooso laghe laa sio rekataa eSiisaria me laghe taula uru ngai etikirighi ta gavana ngateva me laghe tau tee lao sio Pol etana. ³⁴ Gavana ngateva ghe ritila uru ngai etikirighi, me ghe kolomila Pol va, "Aliaa io?"

Me Pol ghe uela va, "Aghi aSilisia ieghi."

³⁵ Vara me Peliks ghe uela va, "Nau lo atoa la auliaa teeio inangari la rekata, aue avira nongo inangarim." Me ghe uela va, "Am ghaa Pol me esso tale ale mata voovoo ateva tanganuena King Herot."

24

Pol ghe tinginala emua ta Peliks

¹ Ghalima (5) nau ghe lange sio me Ananaeas, namuu ia ta pristi etoa, me mene katoa namuu me loea ngateva ararina atea ta Tetalas, laghe siola eSiisaria tani ghelei niaisakei ta Pol emua ta gavana ngateva. ² Nau Pol ghe tinginala emua, me Tetalas ghe tiuaala tani auliaa teeia inangarina kamena. Eghe ue va, "Namu ngateva Peliks, ami ghe tokatoka tale luei tale oroi nau, poli io ughe aaitarainiemami tale alomasaanganiaam, me ughe ghelei emasinala oroi voto karika laghe ghelei emasinala tale lo ateva oia provins. ³ Tale isaa akapaaili voto ughe ghelei seela, ami maamasieinio me ami ue va masinaaili etam. ⁴ Karika aghaaloanna tani nim rungiaa naum, liuna avalua o aghaloanna va umasimasi me unongo tuku inangariimami erighi.

⁵ "Ami ghe tarala va ia oia taumattu ngateva egheelei saasakiaa tokatokaaimami. Etiitiuaa nisessai elome ta ajiu etoa tale kosa akapa ateva oia, me emuemua lo atoa la aimuli tee tau ngai aapasunga ngateva aNasareti ia. ⁶⁻⁷ Ghe aloanna tani ghelei saasakiaa ale manga ateva. Liuna avalua o me ami ghe poso atokaiela.* ⁸ Arova ukolomia, aue io unongo kila isaa oia voto ami auliaa teeia, koronna."

23:27: Apos 21:30-33; 22:25-27. **23:28:** Apos 22:30. **23:30:** Apos 23:16-23; 24:1-9. **24:5:**

Apos 17:6. **24:6-7:** Apos 21:28-30. * **24:6-7:** Kasina uru ngai laghe pitila, laghe ue va, me ami ghe aloanna tani ghelei niaisakei etana tale kaluimami inangari nipaopao. ⁷ Me namu ngateva ta tau ngai uvii etoa, Lisias, ghe mae sio me namungaili ta ghe kune veluela me ghe ghaa veluela ta nimaimami. ⁸ Me ghe auliaala va ami mae etam.

⁹ Ila akapa aJiu etoa laghe tingina aitaaua teela lo atoa laghe auliaa teela Pol, me laghe akoronnala va isaa akapa inangari Tetalas ghe auliaala koronna.

Pol ghe auliaala nannaane ta Peliks

¹⁰ Gavana ghe nakonakoala Pol tani aippooaa me Pol ghe uela va, “Akilakila va io ughe aitarala anua ateva oia oroieili ninamanama, liuna avalua o aghaiesoaa va urooro tani nongo tee inangarighi. ¹¹ Urooro tani kila amasina va karika ghe laa ghaa kasangaulu ghalua (12) nau me aghe saela eJerusalem tani kkaua. ¹² Ila o taumattu ngatoa karika laghe tarala righi voto ami ghe aissakeana teela tale ale manga ateva, o aghe ghelei taumattu va ghe sessaila tale ale nivelu eitaaua me tale masaliki taatara. ¹³ Me isaa oia inangari la auliaa teeieghi etana, karika la rooro tani apasunga etam va koronna. ¹⁴ Aghaaloanna tani auliaa koronna etam va akakkaua Goto ateva kapuira ia tuvuimami etoa me aghaimulusi tee salane Vau eteva Iesu, la ue va kamena ia. Me aghaiesoa ngakapa inangari nipaopao me inangari propete atoa laghe pitila. ¹⁵ Aghi tee aghaiesoaa God nongina isaa oia taumattu, va aue emene totu isaa akapa ghulughuluena me sesa taumattu tale nimate. ¹⁶ Liuna avalua o atootoonga tani ghelei sa ateva akilakila va ghulughuluena ia nau ekapa atoa ta matane God me taumattu.

¹⁷ “Aghe mene kiri mae sio tani sausi kapughu taumattu ngatoa karika righi peiira tale viliki veu, me tani ghelei aiaavususuvuena, poli ngaghe kasu vella me ang ghe oroila ninamanama me ngaghe vira mene mae sio tani rekataa. ¹⁸ Laghe tarala va raarangisana ieghi nau eteva aghe ghelei isaa oia niuungu elome tale ale manga ateva. Karika oro taumattu ghe toka teeieghila, me tee karika righi niaisamaai. ¹⁹ Me kasina aJiu tale provinsi eteva eEisia, arova la nannaa teeieghi righi voto, la ghele mae tingina emua etam me la ghele auliaa nannaaira. ²⁰ Me isaa o taumattu etokatoka oia la ghele mae aulia ngaotu righi voto sesa laghe tarala aghe gheleila nau ateva aghe tinginala emua ta Kansolo atoa. ²¹ Akilakila nonga kateva voto aghe sama anamuula nau eteva aghe tinginala ta mataira: Aghe ue va, ‘Aghaiesoaa ta God va aue emene totu taumattu matana. Me mausi isaa oia ninannaa me ghaine angila atinginaieghila tale niaisakei.’ ”

²² Vara me Peliks, ia o ang ghe kila muela salane Iesu, ghe alokoi taula niaisakei eteae, me ghe uela va, “Ita toi Lisias, me nau emae, amene ghelei niaisakei.” ²³ Ghe uela ta namu ngateva ghe aaitoiaa kateva ai tau ngai uvii va, “Am atoka sso Pol tale ale mata voovoo, me am tau velua me etingina kasu see. Me am rau mene ghelei rungarunga kapuna atoa tani mae taraia.”

²⁴ Kasina nau ang ghe lange sio, Peliks me vausenna ateva ta Drusila, aJiu ia, ghe suula inangari va Pol emae. Ghe nongola inangari niaikaiaa ta Karisto Iesu. ²⁵ Nau eteva Pol ghe tiuaala tani auliaa inangari tale voto ghulughuluena me tani aitaraa tokatokaam me niaisakei eteae aue emae, Peliks ghe matautula me ghe uela va, “Ange roola me kasula mua. Auena marova mene righi nau, aue amene koloo.” ²⁶ Ia oia nau eteva tee, Peliks ghe nannaa va Pol aue ghe tau lao righi viliki veu etana. Liuna avalua o oroieili nau ghe kolokoloa me ghe aippooaa teeia.

²⁷ Airuuruu tale ninamanama aluae lalu ghe lange sio me Pokias Pestas ghe koliaala Peliks. Peliks ghe aloanna tani aipoopolia ta aJiu etoa, liuna avalua o me karika ghe uela va Pol ekupi ghoa tale ale mata voovoo.

25

Pol ghe kolomila va Siisa enongo unna niaisakei eteae

¹ Pestas ghe rekatala tale provins ateva eJiudia tale masaliki taatara atea eSiisaria. Kotolu nau ghe lange sio me ghe saela eJerusalem. ² Me namuu ta pristi etoa, me kapuira tau ngai toitoi etoa aJiu etoa laghe lao sio tani auliaa tee Pol ta Pestas, me laghe kolomila Pestas ³ va eghelei aloannaaira tani saeaa Pol eJerusalem ta ngila ghe nnaala va la uvi ematea sae etapaa salana. ⁴ Pestas ghe liula va, “Pol tale ale mata voovoo eSiisaria, me karika masau me amene oghe sio eSiisaria. ⁵ Am tau velu righi kapuimim tau ngai toitoi me la usieghi sio eSiisaria, me la sio auliaa arova Pol ghe gheleila righi sesa voto.”

⁶ Pestas ghe mene tokala ghaoalu (8) va kasangaulu (10) nau me ghe oghe siola eSiisaria. Ghe paila tale mene kateva nau me ghe laa sso toka tale liu niaisakei eteva, me ghe auliaala va Pol emae tale niaisakei. ⁷ Nau Pol ghe rekatala, lo atoa aJiu laghe kasula eJerusalem laghe tingina taliaala Pol, me laghe tiuaala tani aikamea tani auliaa oroieili voto sesa Pol ghe gheleila, me karika laghe rooroo tani apasunga tale niaisakei va koronna.

⁸ Pol ghe liula inangariira me ghe uela va, “Karika aghe gheleila righi sesa voto tani ghelei saasakiaa uneira inangari nipaopao aJiu etoa, me tale ale manga ateva me ta Siisa.”

⁹ Pestas ghe anna va aJiu etoa la masieinia, liuna avalua o me ghe kolomila Pol va, “Umasiasi tani sae eJerusalem, me aghi aue arooroo tani sae nongo unem niaisakei eteae eJerusalem?”

¹⁰ Pol ghe liula me ghe uela va, “Atiitingina oia tale unna liu niaisakei eteva Siisa, me atani aisakei oia. Karika righi gheeleiaaghi sesa ta aJiu etoa, me io tee ukilakilaaili. ¹¹ Arova aghe tam aimuli teela inangari nipaopao, me righi gheeleiaaghi sesa me erooroo va amate, karika aratirati tani mate. Me arova inangariira kamena, karika teva erooroo tani taueghi lao etaira. Aghaaloanna va Siisa enongo uneghi niaisakei eteae!”

¹² Nau Pestas me kapuna tau ngalomasaanga atoa laghe aippooa ngaitauaala me Pestas ghe uela va, “Ualoannala Siisa va enongo unem niaisakei eteae, liuna avalua o me ulao ta Siisa.”

Pestas ghe auliaa tootoongaala Pol ta King Agripa

¹³ Kasina nau ghe lange sio King Agripa me nengane vause ateva ta Beniis lalu ghe siola eSiisaria tani tara me tani tau masimasiaairarua ta Pestas.

¹⁴ Nau lalu ghe tokala oroi nau eSiisaria, Pestas ghe auliaala unna niaisakei eteae Pol ta king. Ghe uela va, “Ia oia taumattu ngateva Peliks ghe tam aaloanna tani tau velua tale ale mata voovoo. ¹⁵ Nau aghe saela eJerusalem, namuu ta pristi etoa me namuu ta aJiu etoa laghe uela va ghe gheleila voto sesaaili, me laghe aaloanna va aghi aghauliaa va emate.

¹⁶ “Aghe auliaala etaira va gheegheleiaa nge Rom, karika ami rooroo tani nim uvi emate teva taumattu karika ghe aisakei tee tau ngai ssateena atoa, me erooroo tani liu inangariira tale uneira nikokkolomi. ¹⁷ Nau laghe usieghi sio mae, karika aghe aitoila, ta ghe pai saela tale mene kateva nau, aghe auliaala va Pol emae tale liu niaisakei. ¹⁸ Nau tau ngai ssateena atoa laghe tiuaala tani sama, karika laghe ppoaala righi gheegheleiaane sesa aghe anna va laghe rooroo tani auliaa. ¹⁹ Laghe nim sessa teeia tale uneira inangari nipaopao la ghaiesoaa etana, me taumattu ngateva ararina atea ta Iesu, ang ghe matela me Pol ghe poppooa va maulue ia. ²⁰ Karika aloghu

ghe masaangaala vaalua aue apae aitiutiu tale inangari, liuna avalua o me aghe kolomila marova ghe masimasi tani sae eJerusalem tani sae aisakei.

²¹ Vara me Pol ghe aloannala me ghe kolomila va namu nge Rom ateva enongo unna niaisakei eteae, liuna avalua o me aghe uela va Pol etoka lomosina ta aghi aue asungi taue lao ta Siisa.”

²² Vara me Agripa ghe uela ta Pestas va, “Aghaloanna tani nongo ia ona taumattu ngateva.”

Pestas ghe liula me ghe uela va, “Nimana unongoa.”

Pol ghe tinginala emua ta King Agripa

²³ Ghe pai saela Agripa me Beniis lalu ghe ssola tale ale atiulu la mae veluvelu eitauaa etana, me laghe gheleila voto tani oneoneainilalua. Lalu ghe sso teela namu ngatoa la aitoiaa namuu tale tau ngai uvii etoa, me namu ngatoa tale masaliki taatara atea, me Pestas ghe uela va, “Am ssoaa mae Pol elome.” ²⁴ Pestas ghe uela va, “King Agripa me lo atoa ngam mae aitauaa teeiemami sio, ngam tarala taumattu ngateva oia! Ila akapaaili aJiu etoa eJerusalem me isaa oia eSiisaria laghe aulia ngakorokorongana etaghi me laghe aore tani ue va karika eroroo tani mene toka tee lao ta ia eroroo tani mate. ²⁵ Aghe tarala va karika righi voto ghe gheleila va eroroo tani mate. Me poli ghe loola va namu nge Rom ateva enongo unna niaisakei eteae, liuna avalua o aghe annala va asungie lao eRom. ²⁶ Karika aloghu ghe masaangaala va tani sa ateva apitie lao ta kapuita vau eteva, liuna avalua o aghe ghaaie mae sio etaimim akapa, me tani io, King Agripa, va ita nongo kilakila inangarina me aue akila sa ateva apitia. ²⁷ Poli aghanna va karika masina tani sungi karavusu eteva me karika righi inangari koronna tani aulia ngaotu gheeleiaane sesa.”

26

¹ King Agripa ghe uela ta Pol va, “Uroroo tani auliaa inangarim.”

Pol ghe takala nimane me ghe tiuaala tani ppooaa inangarina tani sausia.

² Ghe uela va, “King Agripa! Amasimasi tani tingina emua etam ghaine tani liu inangari niaisakei aJiu etoa la gheelei etaghi. ³ Io ukilakilaaili aJiu etoa me gheeleiaaira me voto la ghaisa tee, liuna avalua o aghanna va uatae atoka me unongoaghi.

⁴ “AJiu etoa la kilakila tokatokaaghi nau aliki ieghi, me aitiutiu tale maamauluaaghi nau aghe tokatoka tanganueghi me tee eJerusalem. ⁵ Laghe kilakilaailieghi me, arova la masimasi, la rooroo tani auliaa va, tale aitiutiu, aghi kateva tana Paresi, lo atoa la tani uusilaa inangari nipaopao. ⁶ Ghaine nga tinginala tale niaisakei poli uneghi niaikaaiia tale inangari nialokoi God ghe auliaala ta tuvuita atoa. ⁷ Isaa oia inangari nialokoi, kasangaulu ghalua (12) ararimangaliita la aloanna tani tara va etani lutu ekoronna, nau la kakkaua God llaa me voo. King Agripa, mausi ia o niaikaaiia ngateva me aJiu etoa la ghaauliaa teeieghi. ⁸ Vaalua me katoa etaimim karika am rooroo tani aiesoaa va God aue etotu matena atoa?

⁹ “Aghi tee aghe anna tani ghelei oroieili voto tani rati ararina atea Iesu aNasareti ia. ¹⁰ Aghe ghelei llo oia voto eJerusalem. Aghe ghaaghaa sarasarakana ta namu ngatoa ta pristi etoa me aghe aatoka sso kapuna taumattu ngatoa God tale ale mata voovoo, me nau laghe aisakei, aghi tee aghe auliaa va la mate. ¹¹ Oroiaata nau aghe laolao tale ale nivelu eitauaa tani laa kuneila me tani atokaila sso tale ale mata voovoo, me aghe

tootoonga tani gheleila va la rati aikaaiiaira. Tale sessaiaaghi namungaili, aghe laolao tee tale masau etoa masaliki taatara tani ghelei saasakieinila.

Pol ghe auliaala vaalua ghe aikaiaala

¹² “Tale kateae nikasu aghe laa siosio eDamaskas ta namuu ta pristi etoa laghe sungieghila me laghe tau mae sio matuutuliena etaghi. ¹³ King Agripa, elo sinaka nau aghe laa siosio etapaa salana, aghe tarala mallanga ateva ghe kasula epona liu, maamallangiaane elaulau sinaka ateva, ghe mallangieghila me kapughu etoa. ¹⁴ Ami ekapa ami ghe katuula tapaa kosa me aghe nongola lingi ngalo ateva ghe samasamaa nge Hibrula, ghe uela va, ‘Sol, Sol! Vaalua me ughelei saasakieinaghi? Aue ughaa vakovako nau uaaiuvii tee aaloannaaghi.’

¹⁵ “Me aghe kolomila va, ‘Io see, vau eteva?’

“Vau eteva ghe liula me ghe uela va, ‘Aghi Iesu ughelei saasakieinaghi. ¹⁶ Totula me utingina sae. Ngarekataala etam tani suitoongainio va ughu-ungu etaghi; uppooaa voto angu tarala etaghi me voto auena aghapasunga. ¹⁷ Aue aghasaangio ta kapum atoa me taumattu ngeleka atoa nongina ngasungisungi tauo lao etaira. ¹⁸ Uoti mataira tale saurrom me la ghaa mallanga ateva, me la kasu vuli sarasarakaniaane ateva Satana me la lao ta God, me God aue ekkaluaa kaluira ssavoto me la toka teeieghi me lo atoa God ghe amangailala tale uneira niaikaiaa etaghi.’

¹⁹ “Liuna avalua o, King Agripa, karika aghe nongo vulula lo ateva o nitaatara ghe kasula epona liu me ghe mae sio etaghi. ²⁰ Aghe tiuaala eDamaskas vara me eJerusalem me eJudia ngakapa me ta taumattu ngeleka atoa aghe poppooaa va la kiri tale gheeleiaaira sesa me la mae ta God me la ghasasunga tale masi uunguaaira va ngila ghe aikolikoliaala. ²¹ Poli aghe poppooa ngavalua o me ajiu etoa laghe posoaghila tale ale ngeleka atiulu tale ale manga ateva me laghe anna tani uvi emateaghi. ²² God ghe sausieghila lomosi ta ghaine ngatinginala tani ppooaa ta ila akapa aliki me namuu. Karika aghaauliaa righi ouna inangari. Inangari oia propete atoa me Moses laghe ppooa ngalokoila arau va aue elutu: ²³ Mesaea aue eghaa nimmarikana me etotu ekasina tale nimate me ia aue eppooa ngaotu mallangina ateva ta ajiu etoa me auena ta taumattu ngeleka atoa.”

²⁴ Pol ghe aaiappooaa me Pestas ghe savalainiela, ghe uela va, “Pol! Veeveena io? Kinatama alomasaanganiaam atoa ngila ghelei eveeveenaio.”

²⁵ Pol ghe liula me ghe uela va, “Namu ngateva Pestas! Karika veeveena ieghi. Voto aghaauliaa koronna me malloeana masina. ²⁶ King Agripa ekilakilaaili isaa oia voto, me karika amaamatautu tani ppooaa ta ngetana. Akilakilaaili va ia ekilakila isaa oia voto, poli karika aaisulianna.” ²⁷ Pol ghe kolomila va, “King Agripa, uaiesoaa inangariira propete atoa? Akilakila va uaiesoaa.”

²⁸ Me King Agripa ghe uela ta Pol va, “Uannaa va ia oia tuku nau erighi ugheleieghi va ausilaa Karisto?”

²⁹ Pol ghe liula me ghe uela va, “Arova tukuna me aluse nau, alooloo sae ta God va karika io nonga ta am akapa lo atoa am nongonongoaghi ghaine, am ghele tau ngaiesoaa nongina aghi, me karika va tale sene.”

³⁰ King, me gavana, me Beniis, me lo atoa laghe tokatoka teeila, laghe tingina saela. ³¹ Me laghe kupi vulu ghoala ale atiulu me nau laghe aippooaala elome ta ngetaira laghe uela va, “Taumattu ngateva oia karika ghe gheleila righi sesa va esso tale ale mata voovoo me emate.”

³² King Agripa ghe uela ta Pestas va, “Ughe rooroo tani tau velu taumattu ngateva oia arova karika ghe aloannala va Siisa ghe tani nongo unna niaisakei eteae.”

27

Pol ghe laolao eRom tale anua ateva

¹ Nau laghe uela va ami* lao eItali, laghe taula Pol me katoa tani karavusu ta nimane kateva namuu ta tau ngai uvii etoa ghe aaitoiaa kateva ai (100) tau ngai uvii, ararina atea ta Jiulies, ia kateva ta Kohot ateva ta Siisa.

² Ami ghe aikaaila tale anua ateva anueira ia taumattu ngatoa tale masaliki taatara atea eAdramitium, ghe anna tani ilou lao tale kasina sao tale provinsi eteva eEisia. Ami ghe tiu ghoala, me Aristakus aTesalonika ia tale provinsi eteva eMesedonia ghe usiemamila.

³ Vara mene kateva nau me ami ghe rekatala eSaedon. Me poli Jiulies masinaaili ia ta Pol, ghe tau veluela tani laa tara kapuna atoa me laghe tau lao righi llo ghe aloanna. ⁴ Me ami ghe tiu ghoala eSaedon me ami ghe iilou vaavalaala tale patunganua ateva eSaeprasi poli ami ghe soula kuukuu eteva. ⁵ Ami ghe selela tale tuku mara ateva eSilisia me Pampilia me ami ghe rekatala eMaera tale provinsi eteva eLisia. ⁶ Tale ia voto ateva, tau ngai uvii eteva ghe aaitoiaa kateva ai (100) tau ngai uvii ghe tarala anua ateva ghe kasula tale masaliki taatara atea eAleksandria ghe laolao eItali me ghe kaaiemami ghoala etana. ⁷ Ghe oroila nau me karika ami ghe iilou enamuu poli ami ghe soula kuukuu eteva, me aanasaaili tani lao me ami ghe nim sele akalakalaala tale masaliki taatara atea eNidus. Me anua ateva karika ghe rooroo tani usilaa nongina ami ghe anna tani lao, poli kuukuu eteva sarasarakanaaili ia, liuna avalua o me ami ghe sele vaavalaala tale patunganua ateva eKrit kalakalaa tale ngusunguna ateva eSalmone, poli pallunge ia. ⁸ Ghe tattasiemami nau ami ghe ilou vaavalaala me ami ghe rekatala tale saoa atea la kolokoloo va Masi Sao ia, kalakalaa tale masaliki taatara atea eLasea.

⁹ Oroil nau ang ghe lange sio me ang ghe ghaala nau nittasi poli Nau Ninae ang ghe ruula, me Pol ghe aulia ngakorokorongana etaira va, ¹⁰ “Taita atoa! Ataata va, arova ita kasu karika aue ita masina me aue ita velu anua ateva me ghinna me maamauluaaita tee.” ¹¹ Namu ngateva ta tau ngai uvii etoa ghe nongo vulula inangarina Pol me ghe nongo usilaa nannaairarua kapteni me tau nganuena. ¹² Poli sao atikirighi karika masina ia tani vukala nau ttasi, oroila lo atoa laghe aloannala tani kasu vuli ia o sao atikirighi me la laa vukala ppae. Arova masina laghe aaloanna tani lao tee ePiniks poli sao atikirighi okae masina ia nau ttasi eteva. Piniks kateae sao eKrit epaapallu tale kuukuu eteva tale nau ttasi.

Ttasi eteva

¹³ Nau masi kuukuu erighi ta pai saot ghe tiuaala tani kuukuu, laghe annaala va ngila tani ghaaghaa voto la ghaaloanna, liuna avalua o me laghe ae kaaila angga ngateva me laghe tiuaala tani sele vaavalaala eKrit. ¹⁴ Karika masau me salamisana ateva laghe aseasea va “notista” ghe sio aloi mae tale patunganua ateva eKrit. ¹⁵ Ttasi eteva ghe tiuaala tani uvi anua ateva me karika ghe rooroo tani mene ilou poli ghe sousou kuukuu eteva. Liuna avalua o me ami ghe nim tiuaala tani usi kuukuu eteva. ¹⁶ Nau ami ghe sele vaavalaala tani pallu tale patunganua arighi eKauda, ghaisa ngarighi karika ami ghe roo tani ae kaai paanaka ateva, me karika ta ami ghe aee

* **27:1:** Luk ghe kasukasu tee Pol, liuna avalua o me ghe pitila va “ami”. **27:2:** Apos 19:29.

kaaiela. ¹⁷ Liuna avalua o me nau kuruu etoa laghe aee kaaiela me laghe keoaa siola kasina uasa tale vusu nganua ateva me laghe iriela tani posoa akorokorongana anua ateva. Laghe maamatautu va ami ghe rau toka sae tale muerra elamana eLibia, liuna avalua o me laghe velu siola voto ateva tani aoghi anua ateva tale kuukuu eteva, nau ami ghe usiusi kuukuu eteva. ¹⁸ Ttasi eteva ghe kaarasila tani uvi saasakiaa anua ateva, liuna avalua o me vara mene kateva nau me kuruu etoa laghe tiuaala tani sau veluvelu sio kasina ghinna elamana. ¹⁹ Vara aiaakotonna ateva nau, me laghe tiuaala tani sau veluvelu sio kasina voto peina anua ateva. ²⁰ Oroi nau ghe lange sio karika ami ghe tara poila sinaka ateva me katto atoa, me ttasi eteva ghe tam kapakapa poi, me ami ghe kilala va karika aue ami saanga.

²¹ Oroi nau ghe lange sio me taumattu ngatoa karika laghe namanama me Pol ghe tinginala elome etaira me ghe uela va, “Taita atoa! Arova am ghe nongo usilaala llo aghe auliaala va ita rau mene tiu ghoa mua nau ita eKrit, karika aue ita ghele sou isaa oia voto ange lutu teeitala, me karika aue ita ghele sau velu sio righi ghinna avalua o. ²² Me ia oia aghaauliaa etaimim va am mene masimasi poli karika teva etaita aue eraua. Anua ateva nonga aue evulla ia. ²³ Eleivoo kapuna ensolo ateva Goto ateva kapuna ieghi me auungu etana etingina valaala etaghi ²⁴ me euela va, ‘Pol, urau mene matautu, poli aue utingina emua ta Siisa me uaisakei, me God ange alousiusi teela lo atoa am aikaai eitauaa, me poli mausim me aue easaangi maamauluaaira.’ ²⁵ Liuna avalua o me, taita atoa, am rau mene annangaili poli aghaaikaiaa ta God va voto eauliaala aue ekoronna. ²⁶ Me ita tani laa toka sae tale teva patunganua.”

Anua ateva ghe toka saela me ghe tapolapolakala

²⁷ Aiaakasangaulu ghaatanina ateva (14) voo me kuukuu eteva ghe kuukuueinamami elaolao tale kinatama paamanu eteva eAdriatik. Elo-matuaa voo, me kuruu etoa laghe ateateaala va ngami ghe reerekata elae. ²⁸ Laghe velu siola uasa ateva me laghe toongila va ghaatingaulu (40) mita maamasauaane sio. Vara karika masau me laghe mene toongila me laghe tarala va kotolungaulu (30) mita maamasauaane sio. ²⁹ Poli laghe maamatautu va ami rau sso toka sae tale teva voto atu, liuna avalua o me laghe vella ghaata angga emuli me laghe tiuaala tani looloo sae va epai parasi. ³⁰ Kuruu etoa ngila ghe paepae salana tani ilou vuli anua ateva, liuna avalua o me laghe avukala siola paanaka ateva ta paamanu me laghe kamekame va vara laghe mene anna tani velu llo angga emua. ³¹ Vara me Pol ghe uela ta namu ngateva ta tau ngai uvii etoa va, “Arova kuruu etoa la tam toka tee anua ateva, karika aue ita saanga.” ³² Liuna avalua o me tau ngai uvii etoa laghe toa patela uasa atikirighi laghe naue lao sio tale paanaka ateva me uasa me paanaka ateva ghe kasuaala.

³³ Auena ghe pai eraarangisana me Pol ang ghe ue etaira akapa va la namanama. Ghe ue va, “Ang ghele roola kasangaulu ghaata (14) nau am ghe vukalala me karika poi am ghe namanama. ³⁴ Aghanna va am ghaa righi inana me am nama me aue am toka. Karika poi teva aue tikirighi uu nguruna aue ekao ta uruna.” ³⁵ Nau eteva ghe ruula tani aippooaa, ghe ghaala kasina verete me ghe kkaili emasina saela ta God emua etaira me ghe pirila me ghe tiuaala tani nama. ³⁶ Ila akapaaili nannaaira ghe mene masinala me laghe ghaala inana me laghe tiuaala tani nama. ³⁷ Ami ekapaaili tale anua ateva erooroo ghalua ai ghaitungaulu

ghaonomo iemami (276). ³⁸ Nau laghe namanamala va ghe ssoilala, me laghe tiuaala tani sau veluvelu sio beke uit tani ghelei oeakana anua ateva.

³⁹ Vara ghe paila me laghe tarala vilikoule ateva samarra ia me karika laghe kilakila va elae tale sa ateva voto, me laghe annaala va laghe sso atoka sae anua ateva tale ia o voto ateva arova la rooroo. ⁴⁰ Laghe toa patela angga ghe tokala o elamana, me laghe pulakala uasa ghe naghinaghi etoka paka ose aluulu ghe aloaloo anua ateva, me laghe avukala saela sele ngemua ateva va ghe kuueinila me laghe sso elae. ⁴¹ Karika laghe sso rekata elae me anua ateva ghe ilou sauuaala tale muerra me ghe toka saela. Emua ghe kaarasila tani sae toka karikaaili ghe aaisiisia, me kinatama kotoo atoa laghe tiuaala tani ghelei polapolaki emuli.

⁴² Me tau ngai uvii etoa ngila ghe loeloe katikirighi salana va la uvi emate karavusu etoa poli laghe rau sso saoko va laghe ilou. ⁴³ Me poli kapuira namu ngateva tau ngai uvii etoa ghe anna tani asaangi maamauluaane Pol, ghe paolala va la rau mene ghelei voto laghe aailoeaa va la ghelei. Ghe uela va lo atoa la rooroo tani asa la love velu sio elamana me la suu sso elae. ⁴⁴ Mene katoa aue la ghasa sso tale palanga me righi tapiri voto ghe taruurutila tale anua ateva me la sso elae. Tale isaa o salana ami ekapa ami ghe laa sso rekata amasina elae.

28

Pol ghe tokala tale patunganua ateva eMolta

¹ Nau eteva ami ghe ssola elae, ami ghe kilala va patunganua ateva laghe asease Molta etana. ² Taumattu ngatoa tale lo atea o masaliki laghe masimasila tani taraiemami. Laghe kuula kura atea me ami ghe tiuaala tani maruu, ta poli ghe vaavaoo me kkaili eteva. ³ Nau Pol ghe lao sio tani ghaa see kasina tana laa kura, ghe sau teela sesa katu ngateva, vara ghe alokoi sae laa kura tale kura atea, me kura atea ghe llangi vella katu ngateva, me ghe kata avukalala nimana atelange. ⁴ Nau taumattu ngatoa laghe tarala sesa katu ngateva ghe vuuvukala ta nimana Pol, laghe aauliaa elome etaira va ia tau niuvi emate taumattu ia, liuna avalua o arongona ta ang ghe saangala elamana, me kapuira god ateva ararina atea ta Niaisakei Ghulughuluena aue eliu me euvi ematea. ⁵ Pol ghe repataa velu saela sesa katu ngateva tale kura atea, me karika righi voto ghe lutula etana. ⁶ Nau taumattu ngatoa laghe toitoi poi vara nimane atelange ghe rrongo, me ghe mate me ghe katu, me laghe aikolikoliaala nannaaira va Pol goto ia.

⁷ Karika masau tale lo atea o masaliki, kasina kosa, kosane namu ngateva tale patunganua ateva, ararina atea ta Publius. Ghe koloamamila me ami ghe lao sio tanguena, me ghe aitarainamamila tale kotolu nau. ⁸ Tale ia o nau eteva, tamana ghe isiki elokoila, vilikina ghe aanasa me kovane ateva ghe iiloueiniela. Pol ghe ssola tani tarai, me ghe looloo saela me ghe saoaala nimane, me ghe masinala. ⁹ Nau isaa o voto Pol ghe gheleila, mene katoa tana tau sessa tale lo ateva o patunganua laghe mae sio, me laghe masinala. ¹⁰ Laghe gheleila oroieili voto masina etaimami, me laghe tau mae sio kasina voto karika etaimami, nau ami ghe kasukasu.

Pol ghe rekataala eRom

¹¹ Emuli tale ulana kotolu, ami ghe aikaaila tale anua ateva ghe vuuvukala okae, poli nau ttasi. Anue nge Aleksandria ia, emua tale anua ateva, tootoo

god alua palue ilalua, Kastor me Polluks.* ¹² Ami ghe laa rekataa sio tale masaliki taatara atea eSirakius, me ami ghe tokala kotolu nau. ¹³ Ami ghe tiu ghoala, ami ghe selela ami ghe rekatala tale masaliki taatara atea eRegium. Me emulina kuukuu eteva ghe mae aloi sio ta pai saot, me anua ateva ghe ilou parasila, me mene kateva nau ami ghe lao sio tale masaliki taatara atea ePuteoli. ¹⁴ Tale lo atea o masaliki taatara, ami ghe saopila katoa taumattu tau ngaiesoaa ila. Laghe koloamamila tani toka teeila tale ghaitu (7) nau, me ami ghe kasu vulilala tani lao eRom. ¹⁵ Nau tau ngaiesoaa ngatoa laghe nongoamamila, laghe kasu emasaula tani mae souemami, katoa tale maket eApius, me katoa tale masaliki etea la ghe aseasea va Kotolu Ale Aiasoaso. Nau Pol ghe tarailala, Pol ghe kaili emasinala ta God, me laghe asarasakanaiela. ¹⁶ Nau ami ghe rekatala eRom,† laghe tau vella Pol va etoka ie nonga ta kateva ale me tau ngai uvii eteva tani toia.

Pol ghe poppooaa eRom

¹⁷ Pol ghe tokala kotolu nau, me ghe kolo aitauaala namuu ta ajiu etoa, me ghe uela va, “Tueghi me nengaghi etoa, arongona ta karika aghe gheleila righi sesa voto ta taumattu ngatoa, me ta gheeleiaaira tuvuita atoa, me laghe kuneieghila eJerusalem me laghe taueghi lao sio ta nimaira aRom atoa. ¹⁸ Nau laghe kolomieghila me ngila ghe aloanna tani tau velueghi, poli karika righi voto sesa aghe gheleila va la uvi emateaghi. ¹⁹ Nau ajiu etoa karika laghe aaloannala va la tau velueghi, liuna avalua o aghe aloanna va Siisa ghe tani nongoaghi, karika aghe annaala va aghe ghelei me kapughu etoa laghe aisakei. ²⁰ Liuna avalua o aghaloannaiemla va am mae me ataraiem, me atani sama teeiem. Ta poli apoppooaa Mesaea, ita aIsraeli etoa ita aiesoaa va aue easaangita, liuna avalua o me laghe iri etokaieghila tale isaa oia sene.”

²¹ Me laghe liula va, “Karika toa ajiudia laghe piti mae sio righi uru ngai tani aulieinio, me karika teva ajiudia ghe mae auliaa righi kiukiu etaimami, me tani auliaa righi sesa kiukium. ²² Me ami aaloanna tani nongo righi nannaam, ta poli ami kilakila va taumattu tale kosa akapa ateva la auliaa saasakiaa tale ia o niaikaiaa ngateva.”

²³ Laghe asela nau eteva, me oroi taumattu laghe mae sio tale voto ateva Pol ghe tokatoka etana. Elue talua me ghe laa ghaa sio elo alai, Pol ghe aulia ngamasalikaala ararimangalina ateva God. Ghe aulia ngaotu Iesu tale inangari nipaopao ta Moses me propete atoa, poli ghe aloanna tani kiri nannaaira me laghe aikaaiaa ta Iesu. ²⁴ Katoa laghe akoronkala inangari ghe auliaala, me katoa karika laghe aikaaiaala. ²⁵ Laghe tiuaala tani aisavalaa see me laghe tiuaala tani kasu. Pol ghe uela va, “Spirit Manga ateva ghe aulia ngakoronkala ta tuvuumim atoa‡ ta propete Aisaea va,

²⁶ “Kasula me ulaa ue etaira va,

“Aue am nongo me karika aue am kila;

me aue am tara me karika aue am alomasaanga tee.”

²⁷ Urunguitaniira aue ekorokorongana,

me talingaira aue evolovolongina tani nongo,

me laghe akoula mataira va karika la taatara.

* **28:11:** Uru tootoo taumattu ngalua laghe atokala emua, me laghe kakkaua etairarua. † **28:16:** Kasina uru ngai laghe pitila, laghe mene pitila va namuu ta tau ngai uvii etoa ghe aaitoiaa kateva ai (100) tau ngai uvii ghe tau lao sio karavusu etoa ta lo ateva emuemua tau ngai uvii etoa tale ia o voto ateva, **28:18:** Apos 26:31. **28:19:** Apos 25:11. **28:20:** Apos 26:6-7. **28:22:** Apos 24:14. ‡ **28:25:** tuvuumim atoa Kasina uru ngai laghe pitila, laghe uela va tuvuita atoa. **28:26:** Ais 6:9-10; Apos 25:13; 26:2, 6; 27:24; Rom 1:5.

Ta la rau tara nonga ta mataira,
me la nongo ta talingaira,
va la kila tale urunguitaniira,
me la kiri mae va aghelei emasinaila.'

²⁸⁻²⁹ “Me aue am kila va niasaangi kanna God ang ghe lao sio ta taumattu ngeleka atoa, me aue ila la nongo!”§

³⁰ Pol ghe tokala ghaluae ninamanama tale ale ateva ghe polipolia, me ghe masimasi tani tara taumattu ngakapa atoa laghe mae taataraia. ³¹ Nau ghe poppooaa inangari ararimangalina ateva God me ghe aapasunga Vau ngepona ateva Iesu Karisto, karika ghe maamatautu, ta poli karika teva tani ghelei rungainia.

§ **28:28-29:** Kasina uru ngai laghe pitila, laghe mene pitila va, 29 Me nau eteva ghe auliaala isaa o voto, ajiu etoa laghe kasu vuliela, me emuli ta ngetana laghe aissakeanaala.

Uru ngai etikirighi Pol ghe pituela ta aRom atoa Inangari emuemua

Pol ghe tokatoka eKorint nau ghe pitula uru ngai ta aRom atoa. Karika ghe saela eRom, liuna avalua o me ghe pitipiti lao siola tale ale manga ateva karika ghe uungula etana. Ghe aulia ngamasalikala masi kiukiu ghe aippoaaa teela, me ghe liula katoa nikokkolomi lo atoa karika la aiesoaa laghe kkolomila tale masi kiukiu. Voto namuu tale ia oia uru ngai etikirighi, ia avalua toko: taumattu ngatoa karika la roorroo tani asaangila tale uunguaaira, me, arova la aiesoaa ta Iesu, God aue easela va ghulughuluena ila. Me tee, Pol ghe auliaala vaalua ghe aloanna va ajiu etoa la mae tani aiesoaa va Iesu Mesaea ia. Nongina oroi uru ngai Pol ghe pitula, ghe ruula tani aulia ngaotu vaalua ita tau ngaiesoaa tani toka, me ghe suula masimasiaane ta lo atoa ghe kilailala eRom.

Tani kila amuemua

Aitiutiu tale inangari *1:1-17*

Karika teva ghulughuluena ta matane God *1:18-3:20*

Ita akapa ita roorroo tani saanga arova ita aiesoaa ta Iesu Karisto *3:21-4:25*

Niaiesoaa ta Karisto *5:1-8:39*

Ajiu etoa me masi kiukiu *9:1-11:36*

Vaalua tani toka nau ita aiesoaa ta Karisto *12:1-15:13*

Uunguaane Pol me eaa ealoanna tani kasu *15:14-23*

Pol ghe suula masimasiaane *16:1-27*

¹ Aghi, Pol, kapuna tau ngai uungu ieghi Karisto Iesu. Ia ghe suima-toongainaghila tani apostolo me ghe suitoongainaghila tani ppooaa masi kiukiuna God. ² Emua arau, God ghe auliaala masi kiukiu tale inangarina nialokoi ta kapuna propete atoa, laghe pitula tale Uru ngai Manga ateva. ³ Masi kiukiu eaauliaa Natuna, ia ghe lutula tale taumattu, me ia tuvuna ia Deivit. ⁴ Nau God ghe totuela tale nimate, Spirit Manga ghe apasungaala etaita va ia natuna ia God me sarasarakanaaili ia, me ia Iesu Karisto Vauita ia. ⁵ Ta ngetana, ami ghe ghaala maamasinaane tani kasuaa see masi inangarina, poli ealoanna va taumattu tale kosa akapa ateva la ghaiesoaa tale ararina ateaie Iesu me la nongo usilainia. ⁶ Me am tee, am elome ta lo atoa God ghe kololala va kapuna ila Iesu Karisto.

⁷ Apitipiti atu ta ngetaimim lo akapa atoa ona eRom, God eaielousieinam, ia ghe koloamla va manga am.

Alooloo sae va maamasinaane me luei ekasukasu ta God Tamaita ia me Vau ngepona ateva Iesu Karisto aue etoka teeiem.

Pol ghe antani laa tara lo atoa eRom

⁸ Emua akasina akaakaili emasina ta God tale ararina ateaie Iesu Karisto ta ngetaimim akapaaili, ta poli taumattu ngatoa la kiukiuaa aiesoaaaimim tale kosa akapa ateva. ⁹ God ateva auungu etana tale urunguitanighi ekapa ateva tani ppooaa masi kiukiuna Natuna, eroorroo tani aulia ngaotu vaalua aghannainam ¹⁰ nau ekapa atoa tale kalughu nilooloo sae. Kateva voto alooloo sae nonga etana ia avalua toko va, arova aloaloannaane God, aue eghelei righi salana me aroo tani mae

1:1: Apos 9:15. **1:2:** Rom 16:25-26. **1:5:** Apos 26:16-18; Gal 2:7-9. **1:7:** Nam 6:25-26.
1:10: Apos 19:21; Rom 15:23.

taraiem. ¹¹ Aghaloannaaili tani taraiem me aghele sausiem tale kasina masi niuungu Spirit Manga ateva ghe tau mae sio etaghi tani asarasarakanaiem. ¹² Aghannaaili tani asarasarakana aikaiaaimim me aikaiaaimim tee aue easarasarakanaieghi. Tale isaa o salana, aue ita aisausieinita tale isaa o niarangise. ¹³ Aghanna va am kila, tueghi me nengaghi etoa, va oroaata aghe anna tani mae taraiem me asease voto atoa laghe ghelei rungarungainaghi lomose ta ghaine. Me aue arooroo tani ghaa masi uene elome etaimim nongina aghe gheleila ta mene katoa taumattu karika aJiu ila.

¹⁴ Aghi atani uungu ta lo atoa aGriki ila me lo atoa karika aGriki ila, me lo atoa alomasaangaaili ila me lo atoa alokapakapa ila. ¹⁵ Liuna avalua o me aghannaaili tani mae ppooaa masi kiukiu etaimim lo atoa tee ona eRom.

Sarasarakaniaane masi kiukiu

¹⁶ Karika apaapalataa masi kiukiu, poli sarasarakaniaana God etana tani asaangi lo akapa atoa la ghaaiesoaa etana, aJiu mua atoa me auena lo atoa karika aJiu ila.* ¹⁷ Isaa o masi kiukiu eauliaa nighulughuluena ateva emaemae ta God. Ase nighulughuluena ateva ita ghaaghaaia nau ita tiituaa tale niaikaiaa, me ita ruuruu tale niaikaiaa, nongina Uru ngai Manga ateva eaauliaa va, “Lo atoa la ghaaiesoaa, God aue easela va ghulughuluena ila, me aue la maulue.”

Taumattu ngakapa atoa sesaaili ila

¹⁸ Sessaiaane God esio epona liu tani ssa tee voto akapa atoa la sessa tee God, me tale sesa gheeleiaaira taumattu ngatoa la gheeghelei rungarunga inangarina God koronna. ¹⁹ Poli voto la rooroo tani kila God etana karika masukasukale etaira, poli God ang ghe ghelei emasalike akapala etaira. ²⁰ Karika ita rooroo tani tara God, me ghe tiuaala nau ghe gheleila kosa ateva, sarasarakaniaane tokatoka liuna me gheeleiaane pei ngepona liu, masalikeaili tani tara, poli ita kilakila nau ita taatara voto ghe gheleila. Liuna avalua o me taumattu ngatoa karika la rooroo tani ue va la tam kilakila God.

²¹ Arongona ta la kilakila God, me karika la oneoneainia va ia Goto ia, karika la kaakaili emasina etana, me alokapakapa ila me nannaaira karika masalike. ²² Arongona ta la uue va alomasaanga ila, me karika, ta alokapakapa ila. ²³ Karika la kakkaua God ateva etokatoka liu, me la kakkaua tootoo goto atoa me la ghelei tootoo taumattu karika erooroo tani toka liu, me tee ghila atoa, ghaata kkena atoa me otuena atoa me lo atoa la rarraa tapaa kosa.

²⁴ Liuna avalua o me God ang ghe tau vella isaa o taumattu tani ghelei voto karika raarangisana urunguitaniira ealoannaaili tani ghelei, me la ghelei voto pei nipalataa tale vilikiira tee. ²⁵ Laghe ratila inangarina ateva God koronna ia, me laghe aloannala inangari kamena. Laghe kakkaua me laghe tuuturru tale voto llo God ghe gheleila. Karika laghe kakkauaa God ateva ghe gheleila voto akapaaili, ia nonga ita tau sae ararina atea nau ekapa atoa, koronna!

²⁶ Liuna avalua o me God ghe tau vellala tani toka ghelei isaa o voto sesa ta nannaaira. Vause atoa laghe sau vella masi salana tani lai, me la ghelei voto ita taumattu ngatoa karika ita rooroo tani ghelei. ²⁷ Tale isaa o

1:13: Apos 19:21. **1:16:** Mak 8:38; 1 Ko 1:18-24; Apos 13:46. * **1:16:** lo atoa karika aJiu ila tale inangari nge Griki, aGriki etoa. **1:17:** Rom 3:21-22; Abak 2:4. **1:19:** Apos 14:15-17; 17:24-28. **1:20:** Job 12:7-9; Sams 19:1. **1:21:** Ips 4:17-18. **1:22:** Jer 10:14; 1 Ko 1:20. **1:23:** Diut 4:15-19; Sams 106:20. **1:27:** Lev 18:22; 20:13; 1 Ko 6:9.

ase salana taita atoa ngeila ghe ratila tani lai vause atoa, poli aloaloannaira namungaili tani lai ta mene kateva taita. Taita atoa la ghelei voto palatana ta mene katoa taita. Liuna avalua o me la ghaaghaa aipolipoli sesa tale maamauluaaira.

²⁸ Nau eteva la tam anna tani kila God, God etautau velu nannaaira sesa tani nnaa me ghelei voto karika masina etaira tani ghelei. ²⁹ Laghe pasula tale voto karika ghulughuluena, voto sesa, mata nginana ila me la ghaloannaaili tani ghelei voto sesa ta mene katoa, me tani tara ssaii, niaiuvi emate me tani aissakeana me nikamekame, me ninannaa pasu tale voto llo sesa, me la ghaauliulia. ³⁰ La ghauliaa saasakiaa tee mene katoa, la sessa tee God, me la tautaula nimmarikana ta mene katoa, me la tautau sae nannaaira me la ghaasake, me laghe nanna oroi salana tani ghelei sesa voto. La tam nongonongo usilaa tamaira me kinaira atoa. ³¹ Karika righi masi nannaaira tani ghelei masina. Karika la ailokoiaa inangari nialokoi laghe auliaala, karika la ghaapasunga gheleia nialousiusi tee mene katoa, me karika la ghaloanna tani sausi mene katoa. ³² Laghe kilakila va God kanna inangari nipaopao eue va taumattu eghelei isaa o voto erooroo tani mate, me karika isaa nonga o llo la ghelei, ta la asarasarakana mene katoa tani mene ghelei isaa o voto.

2

Ghulughuluena niaisakei kanna God

¹ Liuna avalua o me karika masina va uauliaa tee mene kasina taumattu. Aghauliaa etam va karika urooroo tani ue va karika righi gheleiaam sesa, ta nau uauliaa tee mene kasina taumattu, unim auliaa teeio tale gheleiaam, ta poli niuungu sesa la ghelei, io tee ughusiusi tani ghelei. ² Ita kilakila va kanna niaisakei God ghulughuluena. Nau taumattu eghelei sesa niuungu, etautau lao sesa ngaipolipoli. ³ Uannaa va uaauliaa tee katoa tale voto io tee ughelei, aue easaangi io tale kanna niaisakei God? ⁴ Karika utaata kila vaalua God pasu ia tale nialousiusi, me toitoiaane etam aluse, me karika emaamangoovulu? Uannaa va isaa voto God eghelei sesaaili? Me karika utaata maamasinaane vaalua etautau aatu nau me aue uroo tani oghi vulu gheleiaam sesa?

⁵ Urunguitanim ateva korokoronganaaili ia. Karika ualoanna tani nna ngaiooghioghiaa, liuna avalua o me io ughelei sesa aipolipolim enaanamuu tale nau eteva God eapasunga sessaiaane tale kanna niaisakei eteae ghulughuluena ia. ⁶ God “aue etaula aipolipoli ta taumattu ngakapa atoa tale niuungu la ghelei.” ⁷ Lo atoa la aimuli esarasarakana tee masi niuungu me masi nitoka tee God epona liu, me la paepae salana va God easaesae arariira me eoneoneainila, me tani ghaa maulue ateva tokatoka liu ia nau ekapaaili etoa, God aue etaue lao etaira. ⁸ Me, ta lo atoa la nannainila nonga, me karika la aloanna tani aimuli tee inangarina ateva God koronna ia, me la aimuli tee sesa voto, sessaiaane ateva God etaira aue namungaili. ⁹ Aue namungaili nialousiusi me nimmarikana elutu ta taumattu ekapa atoa la ghelei ssavoto, ta aJiu etoa mua, me tee lo atoa karika aJiu ila.* ¹⁰ Me God aue etau lao masi nitoka epona liu me easaesae arariira me eoneoneainila me etau lao luei ta lo atoa la ghelei masi voto, ta aJiu etoa mua, me tee lo

2:1: Mat 7:1-2; Jon 8:7. **2:4:** Ips 1:7; 2 Pita 3:15. **2:6:** Sams 62:12; Nitoka 24:12; Mat 16:27; 2 Ko 5:10. **2:8:** 2 Tes 1:8. * **2:9:** lo atoa karika aJiu ila tale inangari nge Grik, aGriki etoa.

atoa karika aJiu ila.† ¹¹ Ta God karika ealoanna nonga katoa ta ealoanna akapaita.

¹² Lo atoa taumattu la tam kilakila inangari nipaopao me la gheeleei ssavoto, aue la tturungila, arongona ta la tam kilakila inangari nipaopao. Me lo atoa taumattu la kilakila inangari nipaopao, me la gheeleei ssavoto, God aue egheleei niaisakei tee etaira, poli la kilakila inangari nipaopao me karika la aimuli tee. ¹³ Karika va lo atoa la nongonongo inangari nipaopao ghulughuluena ila ta matane God. Lo atoa la nongonongo usilaa inangari nipaopao, isaa o taumattu aue la ghaa arari ghulughuluena atae. ¹⁴ Nau taumattu ngeleka atoa, karika la kilakila inangari nipaopao kanna God, me tale nannaaira la aimuli tee voto inangari nipaopao eauliaa, tale urunguitaniira eapasunga va la kilakila voto masina me sesa. ¹⁵ Tale gheeleeiaaira eaapasunga va inangari nipaopao elome tale urunguitaniira. Nannaaira tee eaapasunga voto koronna nau nannaaira ghe aauliaa etaira va kasina voto la gheeleei sesa me kasina laghe gheeleei masina. ¹⁶ Liuna avalua o me tale masi kiukiuna Iesu apoppooaa, tale ia o nau eteva aue God, ta Iesu Karisto, aue egheleei niaisakei tale nannaaira eaisulia.

AJiu etoa me inangari nipaopao

¹⁷ Vaalua etam? Uue va aJiu io, uatoka tuutulim tale inangari nipaopao me uaasake va ukilakila God, ¹⁸ ukilakila aloannaane God me ngughe kilakila voto koronna tale inangari nipaopao isaa o voto ghulughuluena. ¹⁹ Uannaa va io uaitaraa mata salusalu etoa, me mallanga io tale lo atoa la tokatoka tale saurrom, ²⁰ tau ngai loeloe io tale lo atoa alokapakapa ila, me tau ngai aapasunga io tale lo atoa karika righi masi ninannaa etaira nongina lutu ngaliki etoa, io uannaa va tale inangari nipaopao kanna God, voto akapaaili koronna erooroo tani apasunga ta taumattu ngatoa. ²¹ Uaapasunga ta katoa, me vaalua me karika urooroo tani apasunga etam? Me upoppooaa va la rau mene ainao, me io tee uainao. ²² Me uue va lailai etoa la rau mene lai sari kateva manna ateva, me ulailai sari kateva manna ateva. Karika ualoanna tani oneoneaa mene kasina tootoo goto, uainao voto tale ale nikkaua aleira taumattu ngeleka atoa. ²³ Utautau sae nannaam va ukilakila inangari nipaopao, me nau utam aimuli tee, tale isaa o salana, karika uoneoneaa God. ²⁴ Isaa avalua o me nongina Uru ngai Manga ateva eaauliaa va, “Mausiimim me kosa ateva eauliaa saasakiaa tale ararina atae God.”

²⁵ Arova uaimuli tee inangari nipaopao, salana tani isoiso, aue ghele tue malloeana manee, va arova utam aimuli tee inangari nipaopao, aue ghele masina arova laghe tam isoiola. ²⁶ Arova lo ateva taumattu karika isoiso ia me eaimuli emasina tee sa ateva inangari nipaopao eaulieinia, ia o taumattu ngateva, God aue etaraia va nongina taumattu ngateva laghe isoieia. ²⁷ Liuna avalua o me am aJiu etoa, taumattu ngeleka atoa la aimuli tee inangari nipaopao, arongona ta karika isoiso ila, aue la ratiem, ta karika am aimuli tee inangari nipaopao, arongona ta am uunusi vuku eteva laghe pitila inangari nipaopao me laghe isoieimla.

²⁸ Taumattu ngateva karika aJiu ia nonga eleka ta vilikina, me ni-isoiso atae karika va pei ngeleka nonga ia. ²⁹ Lo ateva taumattu urunguitanina ateva ghulughuluena ia ta God, ia aJiu tuungia, me koronna atae ni-isoiso elutulutu nau urunguita ateva eaaikolikoliaa me kanna Spiriti eteva God

† **2:10:** lo atoa karika aJiu ila tale inangari nge Grik, aGriki etoa. **2:14:** Apos 10:35. **2:20:** 2 Tim 3:5. **2:21:** Mat 23:3-4. **2:24:** Ais 52:5. **2:26:** Gal 5:6. **2:29:** Diut 30:6; Kol 2:11.

egheeleia, karika va nau la isoiso vilikina. Lo ateva eghaaghaa ia o ase niaikolikolia ngateva karika taumattu earueinia, ta God earueinia.

3

God aue eusilaa inangarina ghe auliaala

¹ Liuna avalua o me saa maamasinaane tani aJiu? Me saa rigghi masi voto aue elutu tale ni-isoiso atea? ² Oroieili asease voto atoa! Aitiutiu eteva voto, God ghe taula inangarina tuu ta aJiu etoa tani aitarainia.

³ Me vaalua arova katoa karika laghe uusilaa inangarina? Am annaa va God karika aue eusilaa inangarina? ⁴ Karika poi! God eauliaa koronna, me taumattu ngakapa atoa tau nikamekame ila, nongina Uru ngai Manga ateva eauliaa va,
“Uapasunga koronna nau uaippooaa,
me aue uapala tale niaisakei.”

⁵ Vaalua? Arova kaluita ssavoto eapasunga aotu gheegheleiaane God ghulughuluena tale tummatavanga, sa ateva ita aulieinia? Nau God eattara mataneita tale kaluita ssavoto, aue ita ue va God karika masina ia, va? (Anim poppooaa nongina taumattu ngatoa la ghaippooaa.) ⁶ Karika poi! Arova God karika masina ia, vaalua aue erooro tani ghelei niaisakei ta taumattu tale kosa ateva? ⁷ Kateva aue eue va, “Arova inangarighi kamena eapasunga aotu inangarina God koronna, tani asaesae ararina atea God, vaalua me easeaseaghi va tau ssavoto aghi me eattara mataneaghi?” ⁸ Vaalua me ita tam ue va, “Ela! Ita ghelei voto sesa me aue masi voto eotu.” Tale ia o salana atikirighi kasina tana taumattu eaaliu teeieghi va aghauliaa isaa o voto, auena God aue eghelei eghulughuluena niaisakei etaira tale voto sesa la ghelei.

Karika teva ghulughuluena ia

⁹ Vaalua? Am annaa va ita aJiu etoa muennaaili ita ta mene katoa taumattu? Karika poi! Poli ngeita ghe apasungala va taumattu ngakapa atoa, aJiu etoa me lo atoa karika aJiu ila, la tokatoka elome tale sarasarakaniaa ssavoto ateva. ¹⁰ Nongina Uru ngai Manga ateva eaauliaa va:
“Karika teva ghulughuluena ia, karika poi;

¹¹ karika teva alomasaanga,
me karika teva epaepae God.

¹² Ila akapa laghe liula viliira ta God,
me ila akapa laghe nim peisaanela;
karika teva eghelei masina,
karikaaili teva.”

¹³ “Aloira nongina paa liu niaikkaia ngateva enim toka otiti ia;
me ramuramuti paaira ateva eaauliaa oroieili inangari nikamekame.”
“Poppooaa musiki paaira sesa nongina lo ateva katuu eaikata amate.”

¹⁴ “Paaira pasueili tale inangari sesa tani ghelei saasakiaa kateva taumattu.”

¹⁵ “Arovaeangaili nonga ta esessaila me la aiuvi emate;

¹⁶ nongina eaa la laolao, la ghelei saasakiaa me la tuuturungi maa-maulue katoa taumattu,

¹⁷ me karika la kilakila masi salana luei.”

¹⁸ “Karika la maamatauta sessaiaane God.”

¹⁹ Ita kilakila va isaa akapa voto inangari nipaopao eaauliaa, eaauliaa ta lo atoa God ghe taula inangari nipaopao etaira, poli God ghe aloanna va karika teva taumattu erooroo tani ue va, “Aghi ghulughuluena ieghi.” Karika poi! Ita akapa taumattu ngatoa tale kosa ateva oia, aighelei ssavoto ita ta matane God. ²⁰ Liuna avalua o me karika teva erooroo tani ue va ia ghulughuluena ia ta matane God, poli eaaimuli tee inangari nipaopao, karika poi! Inangari nipaopao eapasunga sesa gheeleiaaita.

Ghulughuluena tale niaikaaiia

²¹ Isaa oia God ang ghe apasungaala katikirighi ppae salana vaalua tani ghulughuluena ta matane. Karika va tani aimuli tee inangari nipaopao, ta emaema ta God, ghe asola tale inangari nipaopao kanna ia Moses me vuku etoa propete atoa laghe pitilala. ²² Tale isaa o masi uunguaane God, ila akapaaili taumattu ngatoa la ghaiesoaa ta Iesu Karisto, God easeasela va, “Ila ghulughuluena ila.” Ita akapaaili kateva nonga ita, me karika ita aaipola, ²³ ta poli ita akapaaili ita ghe gheleila ssavoto, liuna avalua o me ita akapaaili masaeili ita tale salana ghulughuluena kanna God. ²⁴ Me God ghe ghelei eghulughuluena akapaailiitala me karika ekookolomi righi aipolipoli, me ghe nim tau mae sio Karisto Iesu tani mae poli aoghita. ²⁵ God ghe tau mae sio Iesu tani mae mate me tani ghelei niaiaavusuvusuena, me raena ateva aue eakalaa tani ghaa velu kaluira ssavoto taumattu ngatoa la ghaiesoaa etana. Ghe gheleila isaa o voto tani apasunga ghulughuluenaane va tale nau ang ghe lao sio, God ghe nim taatara kaluira ssavoto me karika ghe attara mataneila, tale toitoiaane God, karika esesai parasi ia. ²⁶ God ghe gheleila voto oia tale isaa oia nau tani apasunga va eghelei eghulughuluena niaisakei, poli ia ghulughuluena ia, me eghelei eghulughuluena lo atoa la ghaiesoaa ta Iesu.

²⁷ Vaalua? Ita rooroo tani aasake va ita ghe gheleila righi voto me God ghe masieinitala? Karika poi! Nau ghe uela va ghulughuluena ita, karika va poli ita ghe aimulisi tee inangari nipaopao, ta poli nim uneita niaikaaiia. ²⁸ Liuna avalua o me ita ue va, taumattu ngateva eghulughuluena ta matana God tale uunguaa niaikaaiia nonga, me karika va tani aimuli emasina tee inangari nipaopao. ²⁹ Vaalua? Ia oia God ateva kapuira God nonga ia aJiu etoa, me karika kapuira God tee ia lo atoa karika aJiu ila? Koronnaaili ia kapuira God tee ia lo atoa karika aJiu ila. ³⁰ Poli kateva nonga ia God ateva, eghelei eghulughuluena lo atoa isoiso ila tale niaiesoaa me lo atoa karika isoiso ila elome tale ie nonga o niaiesoa ngateva. ³¹ Vaalua tale ia o niaiesoa ngateae? Ita sau velu inangari nipaopao? Karika poi! Ta ita akorokorongana inangari nipaopao.

4

God ghe aseala Abraham va ghulughuluena ia

¹ Sa ateva ita mene aulieinia ta tuvuita ateva ta Abraham? Sa ateva ghe taraiela tale isaa o voto? ² Arova God ghe aseala va ghulughuluena ia mausi gheeleiaane, aue erooroo tani aasake, me karika ta matane God. ³ Poli sa ateva Uru ngai Manga ateva eaulliaa? Eue va, “Abraham ghe aaiesoaa ta God. Liuna avalua o me God ghe aseala va ghulughuluena ia.”

⁴ Taumattu ngateva egheeghelei niuungu me eghaaghaa aipolipoli. Isaa o aipolina karika ita ue va la nim tautau lao, karika. La tautau lao

tani liu niuungu euunguaa. ⁵ Ta lo ateva etokatoka tale niaiesoaa me karika va tale niuungu, eaaiesoaa tale God ateva eaaulia ngaotu lo atoa sesa gheeleiaaira va ila ghulughuluena ila, poli ia o niaiesoaa ngateae God easeasea va ghulughuluena ia. ⁶ Deivit ghe aulia ngavaluela o, nau ghe aauliaa nimasimasi eteae tale taumattu ngateva God easeasea va ia ghulughuluena ia karika va tale uunguaane.

⁷ “Aue emasinaaili

ta lo atoa gheeleiaaira sesa ang ghe kkaluaala,
me kaluira ssavoto ang ghe ghaa vella.

⁸ Aue emasinaaili ta lo ateva taita

gheeleiaane sesa me Vau ngepona ateva karika aue emene annaa.”

⁹ Vaalua? Ia o nimasimasi eteae uneira nonga lo atoa isoiso ila, o uneira tee ia lo atoa karika isoiso ila? Poli ita ue va God ghe uela va Abraham ghulughuluena ia poli unna niaiesoaa. ¹⁰ Vaalua unna niaiesoaa ghe sausiela? God ghe uela va ghulughuluena ia nau laghe vira mene isoieila, o auena laghe isoia? Nau karika laghe isoia me God ghe uela va ghulughuluena ia. ¹¹ Nau karika laghe isoia, God ghe aseala va ghulughuluena ia ta poli unna niaiesoaa ta ngetana, me God ghe taula ni-isoiso atea tani aimatootoongana va ia ghulughuluena ia. Liuna avalua o me Abraham tuvuiria akapa ia taumattu ngatoa karika isoiso ila me la aiesoaa ta God, me God easeasela va ghulughuluena ila. ¹² Me ia tee tuvuiria ia lo atoa isoisona ila me la kasukasu tale salana niaiesoaa ta God nongina Abraham karika laghe isoia me ghe aiesoala ta God.

¹³ Karika tale inangari nipaopao va Abraham me tuvuna atoa laghe ghaala inangari nialokoi va kosa akapa ateva oia kaluira ia, me karika, ta tale nighulughuluena ekasukasu tale niaiesoaa. ¹⁴ Arova koronna va llo taumattu eaimuli tee inangari nipaopao, ila nonga aue la ghaa isaa akapaaili voto God ghe auliaala tale kanna inangari nialokoi va aue etau mae, uunguaa niaiesoaa aue peisaane. Me isaa o kanna inangari nialokoi God aue peisaane tee. ¹⁵ Ita kilakila va inangari nipaopao emaemaeaa aipolipoli tale ssavoto ateva, me eaa karika righi inangari nipaopao, karika ita rooro tani ue va taumattu ngatoa la tam aimuli tee inangari nipaopao.

¹⁶ Liuna avalua o me, tale niaiesoaa, tuvuna atoa Abraham la ghaaghaa voto God ghe auliaala tale inangari nialokoi va aue etaula etaira. Tale ia o salana atikirighi, maamasinaane God erooroaa va ila akapa aue la ghaa isaa o voto, karika va ghinnaniira nonga lo atoa la aimuli emasina tee inangari nipaopao, karika. Ta ila akapaaili taumattu ngatoa uneira niaiesoaa nonginaaili Abraham, ia mata ngemua ateva tuvuita. ¹⁷ Nongina Uru ngai Manga ateva eaauliaa va, “Ngaghe gheleiola va tuvuiria io oroieili taumattu ngatoa.” Ia o inangari nialokoi eteva masinaaili ia ta taataraane God, ia o Abraham ghe aiesoaa etana. Ia o God ateva etautau mauue ta matena atoa me enim aippooaa me voto karika ghe tokatoka, elutulutu.

¹⁸ Abraham ghe aiesoaa me ghe anna ngakorokorongana, arongona ta ghe tam kilakila vaalua God aue eghelei erooroaa inangari nialokoi etana, liuna avalua o me tuvuiria ia oroieili taumattu ngatoa nongina God ghe auliaa va, “Tuvum atoa aue la oroieili nongina katto atoa.” ¹⁹ Koti Abraham anna ninamanama erooro kateva ai (100), me unna niaiesoaa karika ghe maomaona nau ghe annaa va ia ang ghe taita namuula, me karika erooro tani mene alakuti teva aliki, me Sera tee kina ngere ia. ²⁰ Unna niaiesoaa

4:7: Sams 32:1-2. **4:11:** Aitiutiu 17:10-11. **4:13:** Aitiutiu 17:4-6; 22:17-18; Gal 3:29. **4:14:** Gal 3:18. **4:15:** Rom 3:20; 5:13. **4:16:** Gal 3:7. **4:17:** Aitiutiu 17:5. **4:18:** Aitiutiu 15:5. **4:19:** Aitiutiu 17:17.

karika ghe kasu vuliela, me karika ghe ghaaghalua nannaane tale kanna inangari nialokoi God; unna niaiesoaa ghe sarasarakanala me ghe tau saela God. ²¹ Ghe atoka asarasakanala nannaane va God aue erooroo tani ghelei inangarina nialokoi aue koronna. ²² Liuna avalua o me God ghe nnaala unna niaiesoaa Abraham me “ghe aseala va ghulughuluena ia.” ²³ Ia o masi inangari ateva koronna ia God ghe aulieiniela ta Abraham va ghulughuluena ia, karika laghe pitila tani sausi nonga Abraham, karika! ²⁴ Ta ita tee me eakorokorongana ita va God aue eue etaita tee va ghulughuluena ita, arova ita aiesoaa ta God ia ghe totula Iesu Vauita ia tale nimate. ²⁵ God ghe taue lao sio va emate poli kaluita ssavoto me ghe totuela tale nimate tani ghelei eghulughuluenaita ta matane God.

5

Nighulughuluena ta matane God

¹ Liuna avalua o, nau angita ghe ghulughuluenala ta matane God tale niaiesoaa, ngita ghe tokala tale luei tee God, poli uunguaane Vauita ateva Iesu Karisto. ² Tale kaluita niaiesoaa, Karisto ghe otila salana atikirighi etaita tani kupi sso tale ia o maamasinaane ateva God, ghaine ita tokatoka etana. Me ita toitoi God tani ghaaita, me aue egheleita nongina ia. Ia o voto ateva egheegheleita ita masimasi. ³ Me karika ita masimasiaa nonga isaa o voto, karika. Ita masimasi tee nau ita ghaaghaa maamatana, ta poli ita kilakila va isaa o voto masina etaita, me esaasausita tani tingina akorokorongana. ⁴ Me arova ita tingina akorokorongana me ita tam mangoo vulu voto ita aikaaiiaa etana, isaa o voto aue esausi gheeleiaaita, me gheeleiaaita aue esausa tale voto masinaaaili ita taatara lao emua etaita. ⁵ Me nau ita aiesoa ngavalua o, uneita niaiesoaa karika eaapalataita poli ita kilakila va God aue eghelei isaa o voto, poli God ghe tau mae sio Spirit Manga ateva etaita tani apasu urunguitaniita tale kanna niaielousi eteva God.

⁶ Ta nau eteva karika righi sarasarakaniaaita tani aisausieinaita, God ghe suitoongaala nau eteva ta Karisto me ghe matela tani ghaa aoghita tau ngai ghelei ssavoto atoa. ⁷ Koronnaaaili, aanasaaili tani tara teva taumattu erooroo tani mate tani sausi teva taumattu ghulughuluena. Me marova ita tara kateva taumattu eghelei masi voto, koti teva erooroo tani asarasarakanaia me emate tani sausia. ⁸ Me God ang ghe apasungaala namungaili ailousiaane etaita tale voto ateva toko: nau eteva ita ghe ghelei ssavoto, Karisto ghe matela etaita.

⁹ Raena ateva ghe akalala me ghe ghelei eghulughuluenaitala, me God ang ghe asetala va ghulughuluena ita. Liuna avalua o, ita kilakilaaili va, Iesu aue emene aisausieinaita me aue ita saanga nau eteva God eapasunga sessaiaane ta tau ngai ghelei ssavoto atoa. ¹⁰ Tale nau ang ghe lange sio, ita tau ngai ssateena ita God me ghe gheleitala ghe kapuna itala tale matemateane Natuna. Ia oia ang ghe kapuna itala God, ita kilakilaaili va maamauluaane Iesu aue esaangita. ¹¹ Me karika isaa nonga o, ta ita masimasi ta poli sa ateva God ghe gheleila mausi Vau eteva ta Iesu Karisto, ia Iesu Karisto ghe gheleitala va kapuna ita God.

Adam me Karisto

¹² Ssavoto ateva ghe mae sio tale kateva nonga taumattu, me ghe tau mae sio nimate. Liuna avalua o me nimate atea ghe ghaa akapala taumattu

ngatoa tale kosa ateva, ta poli ila akapa laghe gheleila ssavoto. ¹³ Ssavoto ateva ang ghe aso vella tale kosa ateva me avirina God ghe tau mae sio inangari nipaopao. Me eaa karika righi inangari nipaopao, karika God enannaa kaluira ssavoto taumattu ngatoa la gheelei. ¹⁴ Ghe tiuaala ta nau Adam me ghe mae sio ta nau Moses, nimate atea ghe ghaa akapaailila taumattu ngatoa, arongona ta uneira ssavoto karika nongina unna ssavoto Adam, ghe tam nongo usilaala God. Adam tootoona ia taumattu ngateva aue emae.

¹⁵ Ilalua o voto alua karika va ilalua aitaaua, kanna voto God ghe nim tau mae sio, me kanna ssavoto ateva Adam. Kateva nonga taumattu ngateva ghe gheleila ssavoto me oroieili taumattu ngatoa laghe matela. Me kanna voto God ghe nim tau mae sio ghe namungailiila, me ghe nim tau lao sio masi voto ta oroieili taumattu ngatoa tale maamasinaane kateva nonga taumattu ngateva, Iesu Karisto. ¹⁶ Me tee kanna voto God ghe nim tau mae sio me kanna ssavoto kateva nonga taumattu, karika lalu lao aitaaua. Karika poi! Ia o kanna ssavoto ateva ghe gheleila me God ghe gheleila niaisakei ta taumattu ngatoa, me ghe uela va, "Aue la ghaa sesa aipolipoli." Me kanna voto God enim tautau mae isaa avalua toko, nau eteva oroi taumattu ngatoa laghe gheleila ssavoto, God ghe aselala va ghulughuluena ila. ¹⁷ Kateva nonga taumattu ngateva ghe tam nongo usilaala God, me tale ia o kanna ssavoto ateva, nimate atea ghe aitoiaala taumattu ngakapa atoa. Me maamasinaane ateva God ghe nim taue mae sio ghe apalala sarasarakaniaane nimate atea, me ghe namungailiila. Liuna avalua o me lo akapa atoa laghe ghaala maamasinaane God, me God ghe aselala va ghulughuluena ila, aue la mauue, me la toka nongina tau ngai toitoi etoa tale uunguaane kateva nonga taumattu, Iesu Karisto.

¹⁸ Liuna avalua o me poli kateva nonga karika ghe usilaala God, me God ghe uela va taumattu ngakapa atoa aue la ghaa sesa aipolipoli. Tale ie nonga o ase salana atikirighi, kateva nonga ghe gheleila voto ghulughuluena me ghe ghelei eghulughuluenaailala, me ghe tau lao sio mauue etaira. ¹⁹ Nongina taumattu ngakapa ghe tau ssavotola mausi kateva nonga taumattu ghe tam nongo usilaala God, tale ie nonga o ase salana atikirighi nau kateva nonga taumattu ghe nongo usilaala God, oroieili taumattu aue God egheleila va ghulughuluena ila.

²⁰ God ghe taula inangari nipaopao ta Moses tani apasunga ta taumattu ngakapa atoa me la rooroo tani tara va voto la gheelei sesa. Nau ssavoto ateva eoroi maamasinaane God emene ooroi tee lao. ²¹ Nongina ssavoto ateva eaaitoiaa uunguaa nimate ateva, maamasinaane God tee erooroo tani aitoiaa tale uunguaa nighulughuluena tani tau lao mauue ateva tokatoka liu ia, aue ita ghaaia ta Iesu Karisto Vauita ia.

6

Ssavoto karika eaitoieinita

¹ Sa ateva ita mene roo tani aulieinia? Aue ita mene ghelei oroieili ssavoto poli ita aloanna va maamasinaane ateva God aue emene lao tee? ² Karika poi! Poli ngita ghe matela, me ssavoto karika mene sarasarakaniaa etaita, me vaalua ita mene ghelei llo niuungu sesa? ³ Karika am kilakila va lo akapa atoa laghe ghaala niaasuu me la kateva nonga teela Karisto Iesu, me laghe ghaala niaasuu tale matemateana? ⁴ Liuna avalua o me poli laghe kaieinita

teela Karisto tale niaasuu me tale sarasarakaniaane Tamane ghe totuela tale nimate, ita tee aue ita mene toka tale ouna nitoka.

⁵ Karisto ghe matela, me ita ghe kateva nonga teeiea tale matemateaane. Liuna avalua o me aue ita kateva nonga teeia tale tototuaane. ⁶ Ta ita kilakila va maamauluaaita pokane ang ghe matela nau Iesu ghe matela tale aikotoo, tani apala sarasarakaniaane ssavoto tale maamauluaaita, liuna avalua o me karika ita mene tau ngai uungu tale ssavoto. ⁷ Nau taumattu ngateva ematemate, ssavoto ateva karika erooroo tani mene aitarainia.

⁸ Ita ghe mate teela Iesu Karisto, liuna avalua o me ita aiesoaa tee va aue ita toka teeia. ⁹ Poli ita kilakila va Karisto ghe totula tale nimate me karika aue emene mate. Liuna avalua o me nimate ateva karika righi sarasarakaniaane tani mene aitarainia. ¹⁰ Nau eteva ghe matela, katengaata ta ghe matela tani apala sarasarakaniaane ssavoto nau ekapa atoa. Me maamauluaane ghaine etokatoka tani tau sae God.

¹¹ Tale ia o salana atikirighi, am tani toka me am tani annaa va am ghe matela tale sarasarakaniaa ssavoto ateva me am maamaulue ta God poli Karisto Iesu. ¹² Liuna avalua o me karika am mene tau veluem va ssavoto ateva emuemueinam tale vilikiimim aue emate, poli am rau usilaa aloannaane vilikiimim. ¹³ Karika am mene tau lao kasina vilikiimim ta ssavoto va evoto tani ghelei llo sesaaili. Am tauem lao ta God nongina lo atoa laghe totula tale nimate. Me am tau lao vilikiimim ta God, va evoto tani ghelei llo ghulughuluena. ¹⁴ Me ssavoto ateva karika emene muemueiniem, poli karika va am tokatoka tale inangari nipaopao, ta tale maamasinaane God.

Tau ngai uungu tale voto ghulughuluena

¹⁵ Sa ateva ita mene gheleia? Ita ghelei ssavoto poli karika ita tokatoka tale inangari nipaopao, ta ita tokatoka tale maamasinaane God? Karika poi! ¹⁶ Am kilakila va marova am tau veluem tani tau ngai uungu me nongo usilaa mene kateva aue am tau ngai uungu etana. Karika am kilakila va lo ateva unongonongo usilainia, ia kapum namuu ia? Arova ssavoto ateva emuemueiniem, aue am mate, me arova am nongo usilaa God, aue am ghulughuluena. ¹⁷ Me akaakaili emasina ta God, poli kasina nau ang ghe lao sio am tau ngai uungu iem tale ssavoto, me tale urunguitaniimim akapa ateva am ghe nongo usilaala salana niapasunga am ghe ghaala. ¹⁸ Ngam ghe ruula tani tau ngai uungu tale ssavoto ateva, me ngam ghe tau ngai uungula tale salana ghulughuluena.

¹⁹ Aghaauliaa inangarighi tale kiukiu niaimatoonga poli karika alo-masaanga iem tani kila. Nongina am ghe tautaula kasina voto tale vilikiimim tani ghelei niuungu karika raarangisana me ghe aasaesae llo karika masina, isaa oia, am taula tani ghelei niuungu tale llo voto ghulughuluena, aue eamangaiem. ²⁰ Nau am ghe tau ngai uungu tale uunguaa ssavoto ateva, salana ghulughuluena karika ghe muemueinam. ²¹ Saa righi masi voto am ghe ghaala tale ase nitoka atea nau ghaine am paapalatainia? Aipolipoli tale isaa o voto nim nimate ateva. ²² Me ia oia ngam ghe ruula tani tau ngai uungu tale ssavoto ateva, me ngam ghe tau ngai nongonongo annala ta God ateva, me voto ngam ghaaghaa aue ekatulainam lao tale nimanga, me airuuruu am ghaa maulue ateva tokatoka liu ia. ²³ Poli aipolipolina ssavoto ateva nimate ia, me voto ateva God enim tautae mae, maulue ateva tokatoka liu ia, ie ta Karisto Iesu Vauita ia.

7

Inangari niaimatoonga tale nilai

¹ Kapughu etoa, aghaiippoaa tee lo atoa la kilakila inangari nipaopao. Karika am kilakila va inangari nipaopao ateva matuutuliena ia ta lo ateva nonga taumattu karika ghe mate? ² Nongina avalua toko, vause ateva lailai ia, inangari nipaopao eghelei rungainia tee taitanna ateva nau taitanna ateva karika ghe mate, me arova taitanna ateva emate, isaa o inangari nipaopao karika mene righi uunguaane etana. ³ Me arova vause ateva ange mene lai ppaela ta mene kateva taita, me taitanna ateva karika ghe mate, aue la ue va ghe lai sarila kateva manna ateva. Me arova taitanna ateva ang ghe matela, isaa o inangari nipaopao karika mene righi uunguaane etana, me karika aue la ue va ghe lai sarila kateva manna ateva arova elai ta mene kateva ppae taita.

⁴ Am tee, kapughu etoa, am ghe kateva nongala tale vilikina ateva Karisto, me am ghe mate teela Karisto, me inangari nipaopao karika mene righi uunguaane etaimim, me ngam ghe mene toka ppaela, tale kateva ppae taumattu, ia o ghe totula tale nimate, liuna avalua o me aue ita kunea masi uene esae ta God. ⁵ Nau eteva ita ghe tokatoka tale aloaloanna vilikiita, aloaloanna vilikiita ghe muemueinita. Inangari nipaopao ateva ghe ghelei nannaaita ghe aloannaaili tani ghelei voto sesa. Liuna avalua o me voto ita ghe ghelei ghe tautau mae uene nimate atea. ⁶ Me isaa oia angita ghe mate vulula llo voto eposoposo rungainita, me inangari nipaopao karika eroo tani mene ghelei rungainita, me ita uungu tale ouna atikirighi salana kanna ia Spirit Manga ateva, me karika tale pokane atikirighi salana laghe pitiela tale inangari nipaopao.

Niaissarakaa tee ssavoto

⁷ Sa ateva ita mene aulieinia? Inangari nipaopao ateva ssavoto ia? Karika poi! Poli karika aue aghele kila ssavoto arova karika inangari nipaopao. Me karika aue aghele kila va tani saa ia nissaii eteae arova inangari nipaopao karika eauliaa va, "Urau mene ssaii." ⁸ Poli ssavoto ateva ghe tarala salana atikirighi tale inangari nipaopao, me ghe alutula asease nissaii etaghi. Me arova karika inangari nipaopao, ssavoto ateva karika righi sarasarakaniaane. ⁹ Nau karika teva inangari nipaopao aghe maamaulue, me nau inangari nipaopao ghe mae sio, ssavoto ateva ghe mauluela ¹⁰ me aghi aghe matela. Aghe nanna va ia o inangari nipaopao ateva, aue ghe roorroo tani tau mae mauluue, me karika, ta ghe nim tau mae sio nimate. ¹¹ Ssavoto ateva ghe tarala salana atikirighi tani kameaghi tale inangari nipaopao tani gheleieghi me amate. ¹² Ia avalua o me inangari nipaopao ateva manga ia, me kateva kateva tale inangari nipaopao, manga, ghulughuluena me masina.

¹³ Vaalua, emaamalloeana va voto masina etautau mae nimate etaghi? Karika poi! Ta ssavoto ateva taumattu ngatoa la tara kilaia va ssavoto ia, etautau mae nimate etaghi tale voto masina. Isaa avalua o me tale inangari nipaopao, ssavoto ateva sesaaili ia, elaulaueili lao.

¹⁴ Ita kilakila va inangari nipaopao liuena ta God; me aghi, nim taumattu ieghi tale kosa ateva oia, me aghi tau ngai uungu ieghi tale ssavoto ateva. ¹⁵ Karika aghalomasaanga tee voto aghelei, poli voto aghaloanna tani ghelei, karika agheeghelei, me voto karika aghaloanna tani ghelei agheeghelei. ¹⁶ Me arova aghelei voto karika aghaloanna tani ghelei,

aghasokoi va inangari nipaopao masina ia. ¹⁷ Nongina avalua o, karika va aghi agheeghelei, ta poli ssavoto ateva etokatoka etaghi egheeghelei. ¹⁸ Akilakila va karika righi masi voto etokatoka etaghi, gheeleiaaghi sesa, poli aghaloanna tani ghelei voto masina, me karika arooro tani ghelei. ¹⁹ Poli aghaloanna tani ghelei masi voto me karika agheelei; me karika aghaloanna tani ghelei sesa voto, me anim toka gheelei. ²⁰ Arova agheeghelei voto karika aghaloanna tani ghelei, karika va aghi agheelei, ta ssavoto ateva etokatoka etaghi, ia egheeghelei.

²¹ Liuna avalua o, aghe tarala va isaa o ninannaa emuemueinaghi: nau aghaloanna tani ghelei masina, karika arooro tani ghelei, ta voto sesa etokatoka etaghi. ²² Isaa avalua o me tale nannaaghi, aghaailousiangaili inangari nipaopao kanna God. ²³ Me amene taatara mene kateva ppae voto sarasarakana ia euungu tale kasina vilikighi, eaaiuvii tee nannaaghi, me egheegheleieghi akaakaravusu tale ssavoto euungu elome tale vilikighi. ²⁴ Alousiusi ta ngetaghi! See aue eroo tani asaangieghi tale ia oia viliki eteva etautau mae nimate? ²⁵ Akaakaili emasina ta God poli ghe asaangieghila tale uunguaane Iesu Karisto Vauita ia! O tale nannaaghi, aghi akaakaravusu tale kanna inangari nipaopao God, me tale vilikighi, aghi akaakaravusu tale sarasarakaniaane ssavoto ateva.

8

Nitoka tale sarasarakaniaane kanna Spiriti eteva God

¹ Liuna avalua o me ghaine lo atoa la tokatoka ta Iesu Karisto, God karika emene tautaula sesa aipolipoli etaira. ² Poli ta Karisto Iesu, sarasarakaniaa Spiriti eteva etautau aatu mauue ateva, me ghe ghaa veluola* tale sarasarakaniaa ssavoto ateva etautau aatu nimate. ³ Ta kanna inangari nipaopao Moses karika ghe roola tani asaangita, poli sesa gheeleiaaita ghe gheleila inangari nipaopao karika sarasarakana, me karika ita rooro tani aimuli tee. Liuna avalua o me God ghe mene tau mae sio kateva voto tani asaangita, ghe suula Natuna tuunga ateva tani toka nongina ita taumattu ngatoa tale kosa ateva oia, tani mate tale kaluita ssavoto. Liuna avalua o me God ghe attara matanela ssavoto ateva tale vilikina Karisto, me ghe ruula sarasarakaniaa ssavoto ateva. ⁴ Karisto ghe ghelei ekapala voto ghulughuluena inangari nipaopao eue va ita ghelei, me karika ita mene toka tale nim sesa gheeleiaaita, ta ita aimuli tee Spiriti eteva.

⁵ Lo atoa taumattu la nim tokatoka tale sesa gheeleiaaira aue la nnaa nonga sesa aloannaaira, me lo atoa Spirit Manga ateva emuemueinila la nnaa nonga masi niuungu Spirit Manga ateva ealoanna va la ghelei. ⁶ Marova sesa aloannaita emuemueinita tale ninannaa, aue ita mate. Me marova Spiriti eteva emuemueaa aloannaita, aue ita ghaa mauue me luei. ⁷ Poli sesa aloannaita eaaiuvii tee aloannaane God, poli karika erooro poi tani nongo usilaa kanna inangari nipaopao God. ⁸ Ia avalua o me lo atoa la aimuli tee sesa aloannaaira karika la rooro tani amasimasi God.

⁹ Am karika va am mene tokatoka tale sesa aaloannaimim, ta tale Spirit Manga ateva kanna ia God, arova ia etaimim. Me marova lo atoa taumattu Spiriti eteva kanna ia Karisto karika ia etaira, karika poi va kapuna ila Karisto. ¹⁰ Aue vilikiimim emate poli ssavoto, me marova Karisto ia elome etaimim, aue Spiriti eteva etau aatu mauue, poli Karisto ghe ghelei eghulughuluenaiei. ¹¹ Me marova Spiriti eteva kanna ia lo ateva

7:23: Gal 5:17; 1 Pita 2:11. **7:25:** 1 Ko 15:57. * **8:2:** veluo Kasina uru ngai laghe pitila, laghe ue va velueghi. **8:4:** Gal 5:16, 25. **8:9:** 1 Ko 3:16; 12:3. **8:10:** Gal 2:20.

ghe totula Iesu tale nimate etokatoka etaimim, ia o God ateva ghe totula Karisto tale nimate, aue emene tau aatu tee maulue tale isaa o vilikiimim ematemate, tale kanna Spiriti eteva ia etaimim.

¹² Liuna avalua o, kapughu etoa, kateva voto ita gheelei, ita rau mene usilaa sesa aloannaita. ¹³ Ta marova am toka tale sesa aloannaimim aue am mate, me marova, tale sarasarakaniaa Spiriti eteva, am uvi emate sesa gheeleiaa vilikiimim, me aue am maulue, ¹⁴ poli lo atoa kapuna Spiriti eteva God ekaakatulainila, ila natuna ila God. ¹⁵ Poli karika va am ghe ghaala Spiriti eteva tani gheleiem va am mene tau ngai uungu tani matautu, ta am ghe ghaala Spiriti eteva eapasunga va am natuna am God, me ta ngetana ita aseasea va, “*Abba, Tamaghi.*”† ¹⁶ Poli kapuna Spiriti eteva God emaemae aitaaua tee uneita ateva spirit tani aulia ngaotu va ita natuna ita God. ¹⁷ Me poli ita natuna ita, aue ita ghinaghina masi voto God ghe tau lao sio ta Natuna ta Karisto, me marova ita ghaa tee nimmarikana nongina Iesu, auena ita toka teeia tale ararimangalina ateva God.

Masi nitoka auena

¹⁸ Aghi akilakila va isaa oia nimmarikana ghaine ita ghaaghaa, karika poi erooroo tale masi voto auena God eapasunga etaita. ¹⁹ Poli voto akapaaili God ghe gheleila la toitoi me la aloannaaili tee tani tara nau eteva God aue eapasunga va see atoa natuna ila God. ²⁰ Poli voto akapaaili ghe gheleila ang ghe tokala tale kanna nikasikiena God, karika va tale aloannaaira, ta tale aloannaane God. God ghe atokailala tale kanna nikasikiena nau eteva ghe kilala va ²¹ voto akapaaili ghe sesala aue emene toka amasina, me aue la ghaa aitaaua tee natuna atoa God voto masinaaili me karika aue la mene mauu.

²² Ita kilakila va isaa akapaaili voto God ghe gheleila la ngangngalaa nimammarikana nonginaaili vause ateva eanna tani molena, lomosina ta nau ghaine. ²³ Me karika va ila nonga, ta ita tee lo atoa ita ghe ghaala tee Spiriti eteva, aitiutiu ia tale kanna inangari nialokoi God. Ita ngangngalaa nimmarikana elome etaita, nau ita toitoi God tani apasunga va ita ang ghe natuna itala, me aue eghaa oghi vilikiita. ²⁴ Nau ghe asaangitala, ghe tau mae sio isaa o inangari nialokoi, me ita toitoi isaa o inangari nialokoi va etani lutu ekoronna etaita. Me marova ngita ghe ghaala sa ateva ita aloannaia emaemae auena emua, karika righi malloeana tani toka toitoi voto emaemae emua. Karika teva etoitoi voto ang ghe ghaala. ²⁵ Me marova ita aiesoangaili tale saa voto llo ita ghe tam ghaa, ita kaarasi tani toitoi me aue ita ghaa.

²⁶ Ta ia nonga o salana atikirighi, Spiriti tee ateva esaasausita nau ita tam sarasarakana, poli karika ita kilakila tee saa voto tani loo sae, me ia Spiriti eteva elooloo sae mausiita tani aulia ngamasinaaili inangari ita tam rooro tani aulia ngamasina. ²⁷ Me God ekilakilaaili voto tale urunguitaniita, me ekilakila tee nannaane Spiriti eteva, poli Spiriti eteva eaaimatoonga kapuna taumattu ngatoa God tani looloo sae tani kkolomi voto tale aloannaane God.

²⁸ Me ita kilakila va isaa akapaaili voto God euunguaa tale maamasina lo atoa la ailousieinia me ghe suimatoongainilala, tani ghelei voto tale masi aaloannaane. ²⁹ Ta isaa o llo taumattu God ghe kila akasinailala me ghe suitoongainilala va aue la nongina Natuna ateva, liuna avalua o me Iesu aue tueira mue ia me aue oroi nengane. ³⁰ Ta lo atoa God ghe

8:13: Gal 6:8; Kol 3:5. **8:15:** 2 Tim 1:7; Mak 14:36; Gal 4:5-7; Aotu 21:7. † **8:15:** Tale inangari nge Aramaik, “Abba” malloeana va “Tamaghi”. **8:16:** 2 Ko 1:22. **8:20:** Aitiutiu 3:17-19. **8:23:** 2 Ko 5:2-4. **8:27:** Sams 139:1. **8:28:** Ips 1:11. **8:29:** Kol 1:18; Hib 1:6.

suimatoongainilala, ghe kololala tani mae etana, me lo atoa ghe kololala, ghe ghelei eghulughuluenaila, me lo atoa ghe ghelei eghulughuluenaila, ghe gheleilala va nongina Natuna ta Iesu.

Karika righi voto eroroo tani atoka apolapolaita tale aielousiaane ateva God

³¹ Liuna avalua o me tale isaa o voto, sa ateva ita roo tani mene aulieinia? Marova God etokatoka aitauaa teeita, see aue eroo tani tau ngai ssateeita?

³² God karika ghe arongila Natuna ateva, ta ghe taue sio mae nongina aiaavusuvusuenta ateva etaita akapaaili. Liuna avalua o me ta ngetana, God aue etau mae isaa akapaaili voto masinaaili etaita. ³³ See aue eghelei niaisakei ta lo atoa God ang ghe suimatoongainilala? Poli God ang ghe ghelei eghulughuluenailala. ³⁴ O see aue emene tau mae etaita sesa aipolipoli mausi ssavoto? Poli Karisto Iesu ghe matela me God ghe totuela, me ia ghaine etokatoka tale pai muenna ativilau ta God tani sama tee God mausiita. ³⁵ See aue eroo tani atoka apolapolaita tale aielousiaane ateva Karisto? Karika teva, nongina sesa nau, o nau ita ateateaa nimmarikana, o nau la ghelei saasakiaa ta ngetaita, o nimaloo, o nau karika rooroona ia kalioita, o voto sesaaili eanna tani amataututa tale nimmarikana, o nimate.

³⁶ Nongina Uru ngai Manga ateva eaauliaa va, “Mausim me ami sousou nimate tale isaa akapa o nau, ami laghe annaa va ami nongina sipsipi etoa tani uvi ematela.”

³⁷ Tale isaa akapaaili o voto, ita tau ngai apala ita ta ngetana lo ateva ghe aielousieinitala. ³⁸ Ta aghi aghaiesoangaili va karika nimate, o maulue, o ensolo atoa, o spiriti etoa, me tee tale isaa oia nau o auena, me asease nisarasarakana, ³⁹ me karika va tale elomarase o isaa oia euu tale kosa ateva, o isaa akapaaili voto God ghe gheleila eroo tani atoka apolapolaita tale aielousiaane ateva God, ghe mae sio ta Karisto Iesu kapuita Vau palepale ia.

9

Taumattu ngatoa God ghe suimatoongainilala

¹ Aghi apoppooaa voto koronna isaa ta Karisto, karika va akamekame, me Spirit Manga ateva eaasokoi tee tale nannaaghi. ² Urunguitanighi eteva namungaili nialousiusi me mmarikana etokatoka etana. ³ Aghaloanna va God eghaa oghi kapughu etoa, mangalighi ila, me arova God eghelei evalua o, amasimasi tani ghaa nikasikiena kanna God, tani atoka apolaieghi ta Karisto, tani ghaa liura. ⁴ Taumattu nge Israeli etoa, God ghe suimatoongainilala va natuna etoa, me ghe apasunga ngaotula sarasarakaniaane ateva etaira, me ghe tau lao sio inangari niaippooa ngaitaua ngatoa, inangari nipaopao, salana koronna tani kkaua, me inangari nialokoi etoa. ⁵ Tuvuna ila Abraham, Aisiki me Jekop, me ta ngetaira, Mesaea ngateva ghe lutu eloi mae sio etaira. Karisto Goto ia, eaaitoiaa voto akapaaili, liuna avalua o me ita tani taue sae nau ekapa atoa. Koronna!

⁶ Poli karika va God ghe tam aimuli teela inangarina. Karika va taumattu ngakapa atoa laghe lutula tale ararimangali eteva eIsrael, va kapuna ila God. ⁷ Me karika va tuvuna akapa atoa Abraham koronnaaili va natuna ila Abraham. Ta God ghe uela ta Abraham va, “Tuvum atoa aue la lutu eloi mae ta Aisiki.” ⁸ Malloeana inangari va karika va lo atoa la nim lutulutu nongina

arau va natuna ila God. Ta lo atoa God ghe auliaala inangari nialokoi va aue etaula mae, ila aue natuna ila. ⁹ Ta God ang ghe auliaala inangari nialokoi va, “Aue amene mae llo too ninamanama nongina ghaine ngamae sio, me Sera aue eghaa lo ateva o aliki taita ia.”

¹⁰ Me karika va isaa nonga o, ta Rebeka tee natuna ghalua tamairarua nonga kateva, Aisiki tamaita ia. ¹¹ Auena palua alua lalu ghe lutu o ghelei righi voto sesa o masina, God ghe auliaala inangari eteva ta Rebeka. Ia o inangari eteva eaapasunga va God esuisuimatoongaa taumattu tale aloannaane, ¹² karika va tale niuungu, ta poli kolokoloaane God. God ghe uela ta Rebeka va, “Aue natum mua ateva euungu ta natum aiaaghaluene ateva.” ¹³ Nongina Uru ngai Manga ateva eaauliaa va, “Jekop aghe ailousieiniela, me Iso aghe ratiela.”

¹⁴ Sa ateva ita mene aulieinia? Aue ita ue va God egheeghelei voto karika ghulughuluena? Karika poi! ¹⁵ Ghe uela ta Moses va, “Aue aghapasunga alousiusiaaghi tale lo ateva taumattu aghaloanna tani apasunga etana,

me aue aghalousiusi tee lo ateva aghaloanna tani alousiusi teeia.”

¹⁶ Liuna avalua o me God egheelei tale alousiusiaane, karika va tale saa llo taumattu ngatoa la ghanna o la ghanna tani ghelei. ¹⁷ Tale Uru ngai Manga ateva God ghe uela ta Peroo va, “Aghi aghe gheleiola va io namuu io, poli aghe aloannala va uapasunga sarasarakaniaaghi, me taumattu tale ia akapa kosa ateva la roo tani ppoa ngaotu ararighi eteae.” ¹⁸ Liuna avalua o me God eaapasunga alousiusiaane ta lo ateva eanna tani apasunga ailousiaane, me egheelei ekorokorongana urunguitanina lo ateva ealoanna tani akorokoronganaia.

¹⁹ Kateva etaimim aue eue etaghi va, “Vaalua me etaatara kaluita ssavoto? Karika teva aue erooro tani usilaa nannaane me etam usilaa nannaane God.” ²⁰ Me io see, taumattu io, ualoanna tani sau paane God? “Voto ateva kateva egheelei, erooro tani ue ta lo ateva ghe gheleiela va, ‘Vaalua me ughe ghelei evaluateieghi o?’ ” ²¹ Tau ngai ghelei sospena ateva egheelei sospena ateva tale kosa erooro tani ghelei ghalua sospena tale ia nonga o tuku kosa ateva, kateva tale kasina ase nivelu eitauaa, me kateva tale nim nau etoa.

²² Tale ia o salana atikirighi God ealoanna tani apasunga sessaiaane me etau velu taumattu ngatoa la tara sarasarakaniaane me karika, ta ekaakaarasi tani toi isaa o taumattu esessaia etaira. Isaa o taumattu God ghe aimonomosiaala va eturungila. ²³ God egheelei isaa o voto tani apasunga ngaotu oroieili kanna mallanga ta lo atoa ghe apasungaala alousiusiaane etaira, ghe aimonomosia ngakasinailala va ila tee aue la toka teeia tale mallanga ngepona liu. ²⁴ Me ita tee elome ta lo atoa ghe suitoongainilala, karika va ajiu nonga atoa, me lo atoa karika va ajiu ila. ²⁵ Nonginaaili God ghe auliaala ta vuku eteva ta Osea va,

“Aghi aue aghasela va ‘kapughu ila’ lo atoa karika va kapughu ila,

me aghi aue akoloa va aghailousieinia, lo ateva karika aghe ailousieiniela.”

²⁶ Me ghe mene auliaa teela va,

“Me tee tale ia o voto ateva aghe uela etaira va,

‘karika va kapughu taumattu iem,’

aghi aue amene asela va

‘natuna ila God ateva etautau mauhue.’ ”

²⁷ Aisaea ghe sama anamuula tani ppooaa ta aIsraeli etoa va,
 “Arongona ta taumattu nge Israeli etoa oroieili ila nongina rira ateva
 elosamarra,
 karika oroi ila lo atoa aue la saanga.

²⁸ Poli Vau palepale ateva aue eailuilui
 tani ghelei niaisakei me tani turungi ekapaaili taumattu tale kosa
 ateva.”

²⁹ Nongina Aisaea ang ghe auliaala emua arau va,
 “Marova Vau ngepona ateva sarasarakanaaili ia
 ghe turungi ekapala tuvuita atoa
 me ghe tam asaangila toa
 aue ita ghe nongina eSodom me eGomorra.”

AIsraeli etoa laghe tam aikaaiaa

³⁰ Sa ateva ita mene aulieinia? Arongona ta taumattu ngeleka atoa
 laghe tam paepae salana tani ghulughuluena ta God, me karika, ta laghe
 ghulughuluena ta God, poli tale uneira niaikaaiaa isaa oia voto ghe lutula.

³¹ Me ta aIsraeli etoa laghe uungu aanasaaili tani aimuli tee inangari
 nipaopao tani ghulughuluena, me karika laghe rooroo. ³² Ta poli saa? Poli
 laghe anna nighulughuluena tale niuungu laghe ghelei, me karika va tale
 niaiesoaa ta God. Laghe ttukainilala tale atu eteva etapaa salana. ³³ Nongina
 Uru ngai Manga ateva eaauliaa va,

“Tarala, aghe atokala atu eteva eSaeon va eghelei taumattu ngatoa tani
 ttukainila
 me atu eteva eghelei taumattu ngatoa la katuu.
 Me lo ateva eatoka tuutulina etana karika aue eghaa nipalata.”

10

¹ Kapughu etoa, tale urunguitanighi eteva, anannangaili me alooloo sae
 va God easaangi aIsraeli etoa. ² Poli akilakilaailiila, liuna avalua o me
 aue va sarasarakanaaili ila tani aimuli tee niuungu God ealoanna, me
 karika la kilakila amasina aloannaane God tani ghelei. ³ Karika laghe
 kilakila salane God tani ghelei eghulughuluena ta matane God, me
 laghe aloanna tani ghulughuluena tale sarasarakaniaaira, liuna avalua o
 me karika laghe usilaala salane God tani ghulughuluena. ⁴ Karisto ang
 ghe ghelei ekoronala me ghe ghelei roorooaala inangari nipaopao, liuna
 avalua o me lo akapa atoa la aikaaiaa ta Karisto, ila ghulughuluena ila ta
 matana God.

⁵ Moses ghe aulia ngamasalikala vaalua tani ghulughuluena tale uunguaa
 inangari nipaopao va, “Taumattu ngateva egheeghelei isaa akapa o voto tale
 inangari nipaopao, aue eghaa mauhue tale isaa o voto.” ⁶ Tani ghulughulu-
 ena tale uunguaa niaikaaiaa eue va, “Urau mene ue tale urunguitanim ateva
 va, ‘See erooroo tani sae epona liu?’ ” (Ia o malloeana va usiosioaa Karisto
 tale kosa ateva oia.) ⁷ “O, ‘See erooroo tani sio arau eue tale voto ateva liura
 ia matana atoa?’ ” (Ia o malloeana va ughaaghaa oghi Karisto tale nimate.)

⁸ Sa ateva eaulieinia?

“Inangari oia kalakalanginaaili etaimim,
 isaa elome tale paaimim me urunguitaniimim,”
 va, inangari niaikaaiaa isaa oia ami aulia ngaotu. ⁹ Va, arova uaulia
 ngaotu tale paam ateva va, “Iesu ia Vau ngepona ia,” me uaikaaiaa tale

urunguitanim ateva va God ghe totuela tale nimate, aue usaanga. ¹⁰ Poli tale urunguitanim uaiesoaa me ughulughuluena ta matane God, me tale paam ateva uaulia ngaotu me aue usaanga. ¹¹ Nongina Uru ngai Manga ateva eauliaa va, “Lo atoa taumattu la atoka tuutuliira etana, karika la rooro tani ghaa nipalata.” ¹² Poli karika teva voto epolapola ajiu etoa me taumattu ngeleka atoa. Kateva nonga ia kapura namu ngateva Vauita akapaaili ia. Me earangise taumattu ngakapa atoa nau la kolokolo tau ararina atea, ¹³ poli, “Lo akapa atoa taumattu la kolokolo tau ararina atea Vau ngepona ateva, aue la saanga.”

¹⁴ Me, arova la tam aikaaiia etana, vaalua aue la kolomia tani sausila? Me vaalua aue la aikaaiia ta lo ateva karika laghe nongoa? Me vaalua aue la nongo arova karika poi teva ghe auliaa etaira? ¹⁵ Me vaalua aue la ppoaaa arova la tam sungila? Nongina Uru ngai Manga ateva eaauliaa va, “Masinaaili tani tara taumattu ngatoa la mae sio tani ppoaaa masi kiukiuna God.”

¹⁶ Me karika va aIsraeli ekapa atoa laghe nongo usilaala isaa oia masi kiukiu. Poli Aisaea ghe uela va, “Vau eteva, see ang ghe aikaaiiala inangariimami?” ¹⁷ Liuna avalua o me ita kilakila va niaikaaiia emaemae nau ita nongonongo inangari, inangarina ateva Karisto.* ¹⁸ Aghanna tani kolomi va, koti karika laghe nongo isaa oia inangari? Va karika, angila ghe nongola:

“Lingi ngaloira ang ghe lao akapa see sio tale kosa ateva

me inangariira ang ghe lao akapa see sio tale airuuruu tale kosa ateva.”

¹⁹ Mene kateva uneghi nikokkolomi, koronna va aIsraeli etoa karika la kilakila malloeana isaa oia inangari? Moses ghe aitiutiula tani auliaa va, “Aue aghaa lo atoa taumattu karika tue ngarariira, ila arau euu, me tale ia o salana atikirighi aue agheleiem am aittureaa teeila, me karika tani masina alomasaanganiaaira, me tale ia o salana atikirighi aue aghelei nannaaimim esessaaili.”

²⁰ Aisaea ghe aulia ngasarasarakanaailila va,

“Taumattu ngatoa karika laghe paepaeaghi, angila ghe sakaieghila.

Ngaghe apasungainaghila ta taumattu ngatoa, karika laghe paepaeaghi.”

²¹ Me ta aIsraeli etoa ghe uela va,

“Nau ekapa atoa, aghe pulapula nimaghi tani koloaa

taumattu ngatoa karika la nongonongo usilaa me makatakatanna ila.”

11

God ghe apasungaala ailousiaane ta aIsraeli etoa

¹ Aghanna tani kolomi, koronna va God ang ghe ratila kapuna taumattu ngatoa? Karika poi! Ta aghi tee aIsraeli ieghi. Abraham tuvughi ia, aghi tee elome tale ararimangali eteva ta Benjamin. ² God karika ghe ratila kapuna taumattu ngatoa, ta ghe suimatoongainilala emua arau, me avirina ghe gheleila kosa ateva. Am kilakila sa ateva Uru ngai Manga ateva eaulieinia nau eaauliaa Elaija, nau ghe auliaa sae ta God gheeleiaaira aIsraeli etoa karika masina. ³ Ghe ue va, “Vau ngepona ateva, ngila ghe uvi emate akapala kapum propete atoa me laghe tturuula unem liu nighelei aiaavusuvusuea atoa. Me aghi nongaaili ngaghele oghi etokala me ghaine

10:11: Ais 28:16. **10:12:** Apos 15:9. **10:13:** Joel 2:32. **10:15:** Ais 52:7. **10:16:** Ais 53:1.

* **10:17:** Karisto Kasina uru ngai laghe pitila, laghe ue va, God. **10:18:** Sams 19:4. **10:19:** Diut 32:21. **10:20:** Ais 65:1. **10:21:** Ais 65:2. **11:1:** 1 Sam 12:22; Sams 94:14; Plp 3:5. **11:3:** 1 Ki 19:10, 14.

la aloannaaili tani uvi emateaghi tee.”⁴ Me saa ailiuliu God ghe taue lao sio etana? Ghe uela va, “Karika. Kapughu ghaitu airari (7,000) taita karika poi laghe suuiaa patu kkeira tani kkaua goto ateva ta Baal kamena ia.”

⁵ Tale ie nonga o salana atikirighi tale nau etiulu oia, katoa aIsraeli la nongonongo usilaa God, poli ghe suilala va kapuna ila, me ghe apasungaala maamasinaane etaira. ⁶ God esuisuitoongaa taumattu tale maamasinaane ateva, me karika tale voto laghe uunguaala. Poli arova God esuisuitoongaa taumattu tale voto la ghelei, maamasinaane ateva karika va nongina voto ateva enim tautau mae.

⁷ Liuna avalua o me sa ateva ita mene aulieinia? Taumattu nge Israeli etoa karika laghe ghaala sa ateva laghe paepaea. Katoa nonga taumattu God ghe suitoongainilala laghe saopiela; me lo akapa atoa God karika ghe suitoongainilala, ghe gheleilala va la volovolongina nau eteva ekolokolola.

⁸ Nongina Uru ngai Manga ateva eaauliaa va,

“God ang ghe tau lao sio niasekanue atea la lullusu saasakiaa etana,
ang ghe sum rungaala mataira, va karika la mene taatara,
me ghe ghelei evolovolonginailala me la tam rooro tani nongonongo,
lomosina ta ange ghaala ghaine.”

⁹ Me Deivit ghe uela va,

“Tau vella uneira tevo ateva pasu ia tale inana enongina va airrekati ia,
me tarapa ateva etaira aue eghelei nannaaira la nnaa va voto akapa masina.

Tau vella isaa o inana la namanama egheleila me la katuu
me la ghaa aipolipoli tale sesa voto laghe ghelei.

¹⁰ Tau vella mataira esaurrom me karika aue la roo tani taatara,
me tau vellala la tau ngai uungu nau ekapa atoa.”

Taumattu ngeleka atoa aue la saanga

¹¹ Isaa avalua o me, aghanna tani mene kolomi va, nau ta aJiu etoa laghe katuula, laghe katuu laalaa liula? Karika poi! Poli laghe ghelei ssavoto, me God ghe asaangila taumattu ngeleka atoa. God ghe ghelei evaluela o poli ghe aloannala va tale isaa o voto aJiu etoa la ssaiila. ¹² Poli aJiu etoa laghe gheleila ssavoto me laghe katuu vulla, niarangise ateva namungaili ia ghe mae sio tale kosa ateva me ta taumattu ngeleka atoa tee. Me nau eteva aJiu etoa God ghe suilala la oghi mae ta God, God aue eghelei voto masinaaili ta taumattu ngakapa atoa aue elau ia o niarangise ateva.

¹³ Tale voto aghaloanna tani auliaa ghaine, elaolao etaimim taumattu ngeleka atoa. Aghi auungu ta apostolo ieghi ta taumattu ngeleka atoa, me amasimasiangaili niuungu eteva agheleia. ¹⁴ Me koti arooro tani ghelei nannaaira kapughu aJiu etoa me la tara ssaiila me aue arooro tani asaangi kasina etaira. ¹⁵ Poli nau God ghe tam aloannailala, God me kosa ateva lalu ghe mae aitauaa sio me ghe lueilaluela. Me vaalua aue nongina, nau eteva God aue emene ghaaila? Aue enim nonginaaili matena ateva taumattu emene maamaulue! ¹⁶ Arova tuku mata ngemua ateva verete la taue lao ta God me ange amangaiela, ia akapaaili verete eteva manga ia. Me arova oa ngai etea manga ia, laangina tee atoa manga ila.

¹⁷ Taumattu nge Israeli etoa nongina ai oliv atea laghe pasaiela tapaa ngutana, me God ghe sai vella kasina tana laangina. Me am taumattu ngeleka atoa nongina ai oliv atea ghe nim pinosala, God ghe ghaala kasina laangina me ghe atokaila lao sio tale ai oliv atea me aue la roo tani ghaa

niarangise tale oane ia o ai oliv atea. ¹⁸ Am rau mene saeaa nannaaimim poli God ghe sai vella kasina laa ngai me ghe atokaiemla tani ghaa liuira. Am nongina va nim laangina am, karika va am, am aasarasarakana oane, ta oane easarasarakanaiem. ¹⁹ Me katoa etaimim aue la ue va, “Ue, ta laane ai eteae ghe sai vella eaapasunga va aue ami ghaa liuira ila o taumattu ngatoa.” ²⁰ Koronnaaili, me God ghe sai vella poli karika laghe aaiesoaa. Me am poli am aaiesoaa, isaa avalua o me am tokatoka tale voto ateva laghe tokatoka akasina etana. Me am rau mene saeaa nannaaimim, poli ngam ghe ghaala liuira; ta am matauta voto God erooro tani ghelei. ²¹ Am nnaa va emua arau God karika ghe tau vella isaa o laa ngai ghe aipatolaa lao tale ia o ai eteae va la toka nongina laghe tokatoka akasina. Am nongo! Tale ia o salana atikirighi God erooro tani tau velu teiem.

²² Am tani nna ngamasina va God eghelei masi voto me erooro tani ghelei tee kasina voto tani attara mataneiem. Eaattara matane lo atoa la ghelei ssavoto, me aue eghelei masina etaimim — arova am toka akorokorongana tani atoka tuutuliimim tale alousiusiaane; arova karika, am tee aue eghaa veluem. ²³ Me aIsraeli etoa, arova la aikolikoliaa me la aiesoaa, God aue mene atokaila nongina laghe sai vellala, ta poli God erooro tani mene atokaila lao. ²⁴ Am taumattu ngeleka atoa, am nongina isaa o laa ngai tale ai oliv atea karika laghe pasaiela, ta ghe nim pinosala etapaa tuvui, me God ghe sai veluemla, me ghe atokaiem lao sio tale kateae ppae ai oliv, God ghe pasaiela tapaa ngutana. Liuna avalua o me koronnaaili erooro tani ghaa isaa o llo tani laangina ai eteae me emene aipatolaala lao tale aina tuunga atea nongina laghe tokatoka akasina.

Ila akapa aIsraeli etoa aue la saanga

²⁵ Kateva voto koronna ia, aisulianna ia, karika ita ghe kilaiela emua arau. Kapughu etoa, aghaloanna va am kilaiela. Me karika am mene tau sae nannaaimim. Ia avalua toko va, kasina tana taumattu nge Israeli, urunguitaniira korokorongana, me isaa oia voto aue enim toka lomosi ta ila akapa taumattu ngeleka atoa God ghe kololala, la mae ta Karisto. ²⁶ Me ia akapa ararimangali eteva eIsraeli aue la saanga avalua toko, nongina Uru ngai Manga ateva eaauliaa va,

“Lo ateva tau ngai asaangiita ia, aue emae eSaeon,
me aue eghelei tuvuna atoa Jekop la kiri tale uunguaa nitam nongo
usilaa God,

²⁷ me aue aghelei ia oia niaippooa ngaitaua ngateva teeila,
nau aghaa velu kaluira ssavoto.”

²⁸ Ta poli laghe ratila masi kiukiu, aIsraeli etoa tau ngai ssateena ila God, me isaa o voto aue emasina etaimim taumattu ngeleka atoa. Me poli God ghe suitoongainilala, ila kapuna ila mausi tuvui atoa ta Abraham, Aisiki me Jekop. ²⁹ Poli God karika eaikolikoliaa nannaane tale taumattu ekolokolo, me eaarangiseila. ³⁰ Me ta ngetaimim taumattu ngeleka atoa, am ghe tam nongo usilaala God tale isaa too nau ang ghe lao sio, me ghaine ngam ghe ghaala alousiusiaane God, poli aIsraeli tee atoa laghe tam nongo usilaala. ³¹ Nim nongina avalua o, poli tale alousiusiaane God am ghe ghaaiela, aIsraeli etoa angila ghele liula viliira ta God, me aue ila tee la rooro tani ghaa aalousiusiaane ateva God. ³² Ta poli God ang ghe tau vella uunguaa nitam nongo usilainia va aue eakaravusu taumattu ngakapa atoa, me aue eapasunga alousiusiaane etaira akapa.

Ita kkaua God

- ³³ Koronnaaili, God masinaaili ia ta taumattu ngakapa atoa,
me tee God alomasaangaaili ia,
me ekilakila voto akapaaili!
See eroroo tani aulia ngaotu voto ange aaloanna tani gheelei?
Karika poi ita rooroo tani kila salane.
- ³⁴ Nongina Uru ngai Manga ateva eaauliaa,
“Karika teva ekilakila vaalua Vau ngepona ateva enannaa.
See eroroo tani taula alomasaanga me niloeloe etana?”
- ³⁵ “See ghe nim tau lao sio righi voto ta God,
me aue God eliu isaa o voto etana? Karika poi.”
- ³⁶ Ta poli God nonga ghe ghelei akapaailiila voto atoa,
me voto akapaaili etokatoka tale sarasarakaniaane,
me ia kanna akapaaili isaa o voto.
Ita tau sae ararina atea nau ekapa atoa! Koronnaaili.

12*Aiaavusuvusuena atoa maulue ila*

¹ Liuna avalua o, aghaaulia ngakorokorongana etaimim, kapughu etoa, mausi alousiusiaane ateva God, me am tani taula vilikiimim ta God nongina va aiaavusuvusuena ateva maulue ia, manga ia me God emasimasiangailiia. Tale ia o salana atikirighi aue am kkaua ngakoronna ta God. ² Karika am mene kasu nongina taumattu tale kosa ateva oia la kasukasu. Karika, am tau velu God eaikolikolieinam nau eghelei nannaaimim eouna, me am roo tani kila amasinaaili aloannaane God. Me aue am kila saa ase voto masina me eghelei emasimasi God, me ghulughuluenaaili.

³ Poli tale maamasinaane ateva ghe taue mae sio etaghi tani ghelei uunguaane ateva, aghaaulia ngakapa etaimim va, am rau mene nnaa va aalomasaangaimim me gheegheleiaaimim elaulau mene katoa tana taumattu. Karika, ta am nna ngamasinaaili mua saa voto am ghelei eroroo eitauaa tee niaiesoaa God ghe tau aatu sio etaimim. ⁴ Nim nonginaaili kateva kateva etaita, asease aissopiaa tale vaulaniita ateva, me isaa akapaaili o voto karika la ghelei nonga kateva niuungu, ⁵ liuna avalua o me ta Karisto ita tee oroi ita me ita tokatoka nongina va kateva nonga vaulani, me kateva kateva etaita eaipatolaa ta mene kateva. ⁶ Ita akapaaili tale maamasinaane God, ia ghe nim tau mae sio asease niuungu karika va isaa aitauaa. Arova taumattu ngateva uunguaane tani auliaa inangarina ateva God, tau veluela me eauliaa nongina vaalua eairooaa tee aiesoane. ⁷ Arova kateva taumattu uunguaane tani sausi mene kateva taumattu, tau veluela me esausi. Arova tani apasunga, tau veluela me eapasunga. ⁸ Arova tani asarasarakana taumattu, tau veluela me easarasarakana mene katoa. Arova taumattu ngateva uunguaane tani parruu, tau veluela me etaula tale nimasimasi. Arova tani muemueaa niuungu, esarasarakana tani aitaria ngamasina ia o niuungu eteva. Arova tani alousiusi tee mene katoa me esausila, tau veluela me eghelei tale nimasimasi.

Niaielousi

⁹ Am ailousia ngakoronnaaili mene katoa tana taumattu. Am liu viliimim tale voto karika masina, me am poso parasi tale voto masina. ¹⁰ Am

11:33: Ais 55:8-9. **11:34:** Ais 40:13; 1 Ko 2:16. **11:35:** Job 41:11. **11:36:** 1 Ko 8:6. **12:1:** Rom 6:11, 13; 1 Pita 2:5. **12:3:** 1 Ko 12:11; Ips 4:7; Plp 2:3. **12:4:** 1 Ko 12:12, 27. **12:6:** 1 Ko 12:4-11; 1 Pita 4:10-11. **12:10:** 1 Pita 1:22.

ailousiaa kateva kateva ta kapuna atoa God, me am ailousieinila nonginaaili va kapuimim tuungi ila. Am oneoneainila me karika va am, am ghaa nioneoneaa. ¹¹ Am rau mene mangoo, ta am sarasarakana tani tau velu Spirit Manga ateva tani katulainam, me am ghelei uunguaane ateva Vau eteva. ¹² Am masimasi nau am toitoi God va eaisausieinam, me am tani tingina akorokorongana nau maamatana eghaaiem, me am looloo sae nau ekapa atoa. ¹³ Am parruu kapuna taumattu ngatoa God arova la tuutukuna tale righi voto. Am aikoloa ativuu etoa nau la mae tanganueimim.

¹⁴ Am arangise lo atoa la ghelei saasakieinam. Am looloo sae va God eghelei emasina etaira, am rau mene looloo sae va God eghelei saasakieinila. ¹⁵ Am masimasi eitauaa tee lo atoa la masimasi, me am alousiusi eitauaa tee lo atoa la alousiusi. ¹⁶ Am annaa kateva nonga ia masi ninannaa erooaa taumattu ngakapaaili etoa. Am rau mene saeaa nannaimim. Am masimasi tani toka tee llo taumattu karika arariira. Am rau mene asaesae arariimim me am ue va am nonga alomasaanga am.

¹⁷ Am rau mene liu sesa tale sesa voto la ghelei etaimim, karika. Isaa akapaaili nau am anna tani ghelei masi niuungu ta mataira taumattu ngakapa atoa. ¹⁸ Arova erooroo, am ghelei voto akapa tani toka aitauaa tee taumattu ngakapa atoa tale luei. ¹⁹ Kapughu etoa, am rau mene liu sesa voto la gheeghelei teeiem. Am tau velu me God aue etaula sessaiaane etaira. Poli angila ghe piti elokoila inangari eue va, Vau palepale eaauliaa va, “Aghi uunguaaghi tani liu sesa voto la gheeghelei, me aue aliu.” ²⁰ Me karika ta, “Arova tau ngai ssateem ateva emaamalo, uanginia.

Arova ekaakangngata tee ateo, utau lao me eropi. Arova ughelei isaa o voto, aue ugheleia epalataa sesa uunguaane egheeghelei.*”

²¹ Urau mene tau velu sesa voto va etauo sio euu, karika, ta ughelei masi voto me aue etauo sio sesa voto euu.

13

Uunguaaita ta gavmani

¹ Am akapaaili, am oneoneaa gavmani me lo atoa la uungu etana, poli karika teva erooroo tani aitoiaa arova God etam ue va eaitoiaa. God ghe suitoongaala taumattu ngatoa la uungu ta gavmani. ² Llo taumattu etam nongo usilaa gavmani me kapuna tau ngai uungu etoa, ila la nongonongo vulu saa voto God ghe atokala. Me lo atoa la ghelei evalua o, aue la ghaa sesa aipolipoli ta poli karika la aimuli tee inangariira. ³ Poli gavmani karika ghe tokala va lo atoa la gheeghelei masi niuungu la matautainia. Karika poi, ta lo atoa la ghelei sesa voto. Arova karika ualoanna tani matauta isaa o taumattu euungu ta gavmani, ughelei masi voto me aue easaesae ararim atea. ⁴ Poli ila kapuna tau ngai uungu ila ta God, me la rooroo tani gheleio me utoka amasina, me arova ughelei voto karika masina, aue umatautainila, poli ila sarasarakaniaaira erooroo tani ghelei sesa voto ta lo ateva eghelei saasakiaa. Ila tau ngai uungu ila ta God tani ghelei saasakiaa ta lo ateva eghelei sesa voto. ⁵ Liuna avalua o, am nongo usilaa lo atoa la aitoieinam, poli ita maamatauta sesa voto aue la tau lao ta lo atoa la tam nongonongo usilaa, me tee, ta poli ita kilakila va emaamasina tani nongo

12:12: 1 Tes 5:16-18. **12:13:** Hib 13:2. **12:14:** Mat 5:44; 1 Ko 4:12. **12:16:** Nitoka 3:7.

12:17: 1 Tes 5:15. **12:19:** Diut 32:35; Mat 5:39. **12:20:** Nitoka 25:21-22; Mat 5:44. * **12:20:** Tale inangari nge Grik, aue uatoka sae parikanga ataata epona ta uruna ateva. **13:1:** Tts 3:1; Nitoka 8:15. **13:3:** 1 Pita 2:13-14.

usilainila. ⁶ Mausina avalua o me am tee am poli lao viliki veu tale takis, poli lo atoa la uungu ta gavmani, la uungu ta God nau la gheeleei roorooaa uunguaaira. ⁷ Saa llo voto pei nitau lao ta gavmani, am tau lao. Am tau lao asease takis tale taumattu ngateva ia uunguaane tani ghaa takis, me am matauta me am oneoneaa lo atoa matuutuliena ila.

Ita aielousiaa mene kateva taumattu

⁸ Am tani liu voroi dinao am gheeleei ta mene kateva taumattu. Ta kateva nonga dinao erooroo tani toka nau etoa, niaielousi. Poli lo ateva eaielousiaa mene kateva taumattu, euusilangaili inangari nipaopao. ⁹ Inangari nipaopao eue va, “Karika umene lai sari kateva manna ateva, karika umene aiuvii emate, karika umene ainao, karika umene ssaii.” Isaa akapa llo oia me mene kasina, ita nongo usila ngakapa arova ita nongo usilaa kateva nonga inangari nipaopao eue va, “Uaielousiaa mene kateva taumattu nonginaaili uailousieinio.” ¹⁰ Lo ateva eaielousiaa mene kateva taumattu, karika erooroo tani gheleei righi voto sesa etana. Liuna avalua o me, arova uaielousiaa mene katoa, unongonongo usila ngakapaaili inangari nipaopao.

¹¹ Am gheleei voto oia, poli am kilakila saa ase nau ghaine ita tokatoka etana. Ang ghele naula tani anguu taatara atoka tale uneimim niasekanua, poli nauna God tani asaangita ang ghele kalakalanginginala, me karika va nongina ita ghe tani aikaiaa ngakasinala. ¹² Ghaisangaili erighi voo ngateva ekapa, me mallanga ateva emae. Ita ruu tani gheleei niuungu kanna saurrom ateva me ita ghaa ghinna niaiuuvii tale uunguaa mallanga ateva. ¹³ Ita kasu emasina nongina taumattu ngateva ekasukasu ellaa, ita rau mene aighui tee lo atoa sesa gheeleeiaaira me ita ropi sesa manu, ita rau mene ailai salosalooa nongina ghaata kkena atoa karika masi nannaaira. Ita rau mene aikiso see me ita rau mene ssa tee kateva poli ange apalaitala. ¹⁴ Am ghinaghinnaa Vau palepale Iesu Karisto, me am rau mene nnaa tani usilaa sesa aloannaimim.

14

Am rau mene ue va katoa nonga gheegheleiaaira sesa

¹ Am ghaa isaa o taumattu karika tani sarasarakana uneira niaikaiaa, me am rau mene aissakeana teeila tale voto ita nanna tale saa ase voto ita gheleei me saa ase voto ita rau mene gheleei. ² Kateva kateva taumattu enamanama asease inana nongina vaalua aikaiaane, me taumattu ngateva, aikaiaane karika tani sarasarakana, enamanama nonga ase inana ngeutana me karika enamanama asease malatau etoa. ³ Taumattu ngateva enamanama isaa akapaaili asease inana erau mene nnaa saasakiaa me esessaia ta lo ateva taumattu karika enamanama asease inana me malatau. Me taumattu ngateva karika enamanama malatau, erau mene auliaa saasakiaa me ennaa saasakiaa tee taumattu ngateva enamanama isaa akapaaili asease inana. Poli God ghe ghaa teeieela. ⁴ Saa taumattu io me uauliaa tee tau ngai nongonongo anna ateva kapuna ia kateva ppae taumattu va ia ang ghe gheleei saasakiaala? Uunguaane vauna ateva tani auliaa va masina voto egheeleei o karika. Me aue etingina akorokorongana me vauna ateva aue eauliaa va uunguaane masina, poli Vau palepale sarasarakana ia tani gheleeia me aue eroo tani tingina akorokorongana.

⁵ Kateva taumattu eannaa va, “Kateva tana nau maamasinaane elaulau

13:6: Mat 22:21. **13:8:** Mat 22:39-40; Jms 2:8. **13:9:** Eks 20:13-15, 17; Diut 5:17-19, 21.

13:10: 1 Ko 13:4-7. **13:11:** Ips 5:14; 1 Tes 5:6-7. **13:12:** 1 Jon 2:8. **13:13:** Luk 21:34; Ips 5:18. **13:14:** Ips 5:11. **14:1:** Rom 15:7. **14:2:** Aitiutiu 9:3-4. **14:3:** Kol 2:16. **14:4:** Mat 7:1; Jms 4:11-12. **14:5:** Gal 4:10-11.

mene kasina tana nau.” Me mene kateva tana taumattu enannaa va, “Isaa akapaaili nau enim aairooaa.” Kateva kateva taumattu etani kila amasinaaili tale nannaane saa voto eroroo tani ghelei. ⁶ Lo ateva taumattu enannaa sossola kateva nau va nau nikkaua ia, ia o taumattu ngateva enannaa Vau ngepona ateva me eghelei llo o voto tani oneoneainia. Lo ateva enamanama asease inana, enamanama tani oneoneaa Vau eteva, poli ekaakaili emasina ta God tale inana. Lo ateva taumattu eratirati tani nama kasina tana asease voto, eghelei tani oneoneaa Vau ngepona ateva, me etautau lao nikaili emasina ta God. ⁷ Karika teva etaita eroo tani nnaa va maamauluaane isaa nonga etana, me karika teva etaita eroroo tani nnaa tee va ia eroroo tani mate etana. ⁸ Arova ita maulue, ita maulue tani oneoneaa Vau palepale, me arova ita mate tee, ita mate tani oneoneaa Vau palepale. Me arova ita mate o maulue, kapuna ita Vau palepale.

⁹ Poli Karisto ghe matela me ghe mene totula tale maulue, God ghe aloannala va ia kapuira Vau ia matena atoa me maulue tee atoa. ¹⁰ Vaalua me uauliaa tee kapum atoa va ila la ghelei voto karika masina, me vaalua me upiipilosi kapum atoa? Poli ita akapaaili aue ita tingina emua ta God nongina liu niaisakei eteva me eghelei niaisakei etaita. ¹¹ Poli nongina Uru ngai Manga ateva eue va,

“Vau palepale eue va, ‘Koronna nongina va aghi maulue ieghi,
taumattu ngakapaaili etoa aue la tturru etaghi,
me ila akapaaili, aue la aulia ngaotu va aghi God.’ ”

¹² Isaa avalua o me kateva kateva aue ita auliaa ta God isaa akapaaili asease niuungu ita ghe gheleila tale kosa ateva oia.

¹³ Liuna avalua o, ita ruu tani auliaa tee mene kasina tana kapuita va ila nonga la ghelei sesa voto, ta ita nna ngavalua toko va karika ita mene ghelei righi ase voto va eghelei ekatungila tale uunguaa ssavoto ateva.

¹⁴ Vau ngepona ateva Iesu ghe gheleila nannaaghi ghe soallaala me ghe masalikaala, me aghe kila amasinala va karika poi teva voto kulukulutana ta matana God. Me arova taumattu ngateva eaiesoaa va ia o voto ateva karika raarangisana ia, ia o voto ateva karika raarangisana ia nonga etana.

¹⁵ Arova ughelei saasakiaa ta kapum ateva nau etarao ta unamanama asease inana, karika ughelei uunguaa niaielousi. Urau mene tau velu inana etaatara io unamanama va eturungi ia o taumattu ngateva, ta Karisto ghe matela tani asaangia. ¹⁶ Arova am annaa va kateva voto masina ia, am aipanipaniaa, ta gheegheleiaaimim erau ghelei me katoa tana taumattu aue la ue va isaa o voto karika masina. ¹⁷ Poli ararimangalina ateva God karika pei tale inana me ateo, karika, ta tale nighulughuluena, luei, me nimasimasi. Isaa o voto Spirit Manga ateva etautau mae. ¹⁸ Taumattu ngateva euungu ta Karisto tale ia o salana atikirighi, eghelei God emasimasi me tee eghelei taumattu ngatoa la oneoneainia.

¹⁹ Isaa avalua o me ita atoka nannaaita tale saa voto etautau mae nonga luei, me eroroo tani asarasaranaita me mene katoa tana taumattu. ²⁰ Am rau mene ghelei saasakiaa voto God ghe gheleila, poli ita rooroo tani nama isaa akapaaili asease nginana atoa. Isaa akapaaili asease nginana atoa raarangisana ila, me la rooroo tani ghelei kasina tana taumattu la katuu tale ssavoto, liuna avalua o me karika masina tani nama isaa akapaaili voto. ²¹ Masina ateva voto tani gheleia, ia avalua toko va, am ruu tani nama malatau, ropi sesa manu me tani ghelei asease voto atoa la rooroo tani ghelei kapuimim atoa la katuu tale ssavoto.

14:8: Gal 2:20. **14:10:** 2 Ko 5:10. **14:11:** Ais 45:23; Plp 2:10-11. **14:14:** Apos 10:15; Tts 1:15. **14:15:** 1 Ko 8:11-13. **14:19:** Rom 12:18; 15:2. **14:20:** 1 Ko 8:13.

²² Saa voto uaikaaiaa etana tale isaa o voto, aue amalua nonga me God. Aue emasinaaile ta lo ateva taumattu enannaa va voto egheelei masina, me nannaane karika eue va egheelei sesa. ²³ Arova eannaa va saa voto enamanama, God eue va karika masina tani nama, egheelei ssavoto, poli gheegheleiaane karika elaolao eitauea tee unna niaikaaiaa. Me arova am gheelei voto me karika am aiesoaa va masina, am gheelei ssavoto.

15

Tani amasimasi katoa ppae me karika va ita

¹ Ita lo atoa korokorongana ita tale niaikaaiaa, emaamasina etaita tani sausi lo atoa aikaaiiaira maomaona, me karika ita mene ghelei nonga saa voto aue egheleita me ita masimasi. ² Ta, kateva kateva etaita ita roo tani ghelei saa ase voto masina ta isaa o taumattu ita aiesoa ngaitauaa ta Karisto tani gheleia emasimasi, me aue eghelei ekorokoronganaia. ³ Poli Karisto karika ghe gheelei voto aue ghe rooro tani ghelei emasimasia nonga. Ta, nongina Uru ngai Manga ateva eaauliaa va, “Saa voto taumattu ngatoa laghe auliaa saasakiaa teiola God, ang ghele mae sio tee etaghi.” ⁴ Poli isaa akapaaili voto laghe pitila tale Uru ngai Manga ateva emua arau, laghe pitila tani apasunga etaita, tani akorokorongana nannaaita, me egheleita tani tingina akorokorongana, me ita toitoi masi voto God aue etau mae.

⁵ Me alooloo sae va aue God, lo ateva eaakorokorongana nannaaita, me egheleita ita tam sessai parasita, aue egheleiem am toka amasinaaili tale luei, nau am aimuli tee Karisto Iesu. ⁶ Liuna avalua o am akapaaili, tale kateva nonga ninannaa aue am tau sae God, ia Tamana kapuita Vau ngepona ateva Iesu Karisto.

⁷ Liuna avalua o me am masimasi tani ghaa mene katoa nongina va tue me nenga am, nonginaaili Karisto ghe masimasila tani ghaaiem. Am ghelei evalua o me aue taumattu ngatoa la tau sae God. ⁸ Poli aghaauliaa etaimim va Karisto ghe nonginala va kapuira tau ngai nongonongo anna ia aJiu etoa tani apasunga va God aue eghelei saa voto ghe auliaala va aue eghelei, tani ghelei rooroaaa kanna inangari nialokoi God ta tuvaira atoa, ⁹ me tee tani ghelei taumattu ngeleka atoa tani tau sae God, poli alousiusiaane. Nongina Uru ngai Manga ateva eaauliaa va,

“Isaa avalua o me nau atokatoka elome ta taumattu ngeleka atoa aue atau sae,

aue atau sae ararim atea tale nikkinari.”

¹⁰ Emene ue va,

“Am taumattu ngeleka atoa, am mae aitauea tee kapuna taumattu ngatoa God tale nimasimasi.”

¹¹ Me emene ue va,

“Tau saela ararina atea Vau ngepona ateva, taumattu ngeleka akapa atoa. Am kkaueinia, am akapa taumattu tale kosa ateva.”

¹² Me Aisaea tee ghe mene uela va,

“Tuvuna ateva Jesi aue emae,

aue eaitaraa taumattu ngeleka atoa.

Me aue la atoka tuutuliira etana.”

¹³ Me alooloo sae va aue God, ia etautau mae inangari nialokoi etaita, aue egheleiem me am pasu tale nimasimasi me luei ta poli am aiesoaa

etana. Liuna avalua o me kaluimim niaiesoaa tale inangari nialokoi, aue ekorokorongana tani pinosa tale sarasarakaniaane Spirit Manga ateva.

Pol ghe uungula ta taumattu ngeleka atoa

¹⁴ Kapughu etoa, ta ngetaghi akilakilaaili va, am masinaaili iem. Am kilakila amasinaaili isaa o voto, me am rooro tani apasunga ta mene katoa tana taumattu. ¹⁵ Elome tale uru ngai etikirighi oia, aghe auliaala kasina voto sarasarakanaaili, me aue am roo tani mene nnaa. Aghe aulia ngakapaailiila isaa o voto, poli God ghe tau mae sio maamasinaane etaghi ¹⁶ va aghi atau ngai uungu ta Karisto Iesu, tani uungu ta taumattu ngeleka atoa. Auungu nongina pristi eteva, tani ppooaa masi kiukiu kanna God. Poli aghaloanna va taumattu ngeleka atoa la nongina aiaavusuvusuena ateva God emasimasieinia, poli Spirit Manga ateva ghe amangala ia o aiaavusuvusuena ateva.

¹⁷ Poli aghi auungu tee Karisto Iesu, liuna avalua o, amasimasi ta poli auungu ta God. ¹⁸ Me aghi, karika aghaasakeaa righi voto ta llo nonga Karisto ghe gheleila nau ghe asarasakanala nannaaghi tani katulaa taumattu ngeleka atoa tani nongo usilaa God. Euungu etaghi tale inangari apoppooaa me voto agheeghelei, ¹⁹ tale sarasarakaniaa niainatootoongana me mirikol atoa, me tale saa voto Spirit ghe gheleila tale salana atikirighi sarasarakanaaili ia. Liuna avalua o, me masaliki ekapaaili aghe laolao etana, ghe tiuaala tale masaliki taatara ateae eJerusalem, me ghe laa oghioghi arau tale distriki eteva ellirikum, ngaghe ruu ekapala isaa o distriki tani ppooaa masi kiukiuna Karisto. ²⁰ Kateva nonga nannaaghi eteva tani aulia ngaotu masi kiukiu tale masaliki taumattu ngatoa karika laghe nongo poi Karisto, karika aghaaloanna tani uungu tale voto kasina ppae taumattu laghe uungula etana. ²¹ Nongina Uru ngai Manga ateva eaauliaa va,

“Lo atoa karika laghe aulieinia etaira, aue la tara,
me lo atoa karika laghe nongo, aue la nongo kila.”

²² Mausina avalua o me oroieili nau karika aghe rooro tani mae taraiem.

Pol ghe aaloanna tani lao eRom

²³ Me isaa oia ta ngaghe ruula voto aghe nannangaili tani ghelei tale isaa oia voto, me oroi ninamanama aghe aaloanna tani mae taraiem. ²⁴ Aghaloanna tani lao tee eSpein, me nau eteva amae avalua ona, aue akkure atoka eRom, me ita aitara. Aghanna tani toka teiem ghaisa nonga ulana tani masimasi eitauaa, me nau isaa o voto eruu, am sausieghi tale kasukasuaaghi tani lao okae. ²⁵ Me isaa arau oia, ngakasukasu tani lao eJerusalem tani laa sausi kapuna taumattu ngatoa God okae. ²⁶ Poli ale manga atoa eMesedonia me eAkaia laghe masimasieiliila tani taula viliki veu tani sausi kapuna taumattu ngatoa God karika tue peipeiena ila la tokatoka eJerusalem. ²⁷ Ila nonga laghe nnaala tani ghelei tale nimasimasi. Ajiu etoa laghe tautau tee lao ta taumattu ngeleka atoa masi voto kanna God, me emaamasina va taumattu ngeleka atoa tee la liu tale viliki veu tani sausila. ²⁸ Nau eteva ngaruula ia o niuungu eteva tani taula viliki veu tau ngaiesoaa eMesedonia me eAkaia laghe aisokosokoiaala tani lao eJerusalem, me avira mene kasu tani lao eSpein me aue atoka mua ona tani taraiem. ²⁹ Me akilakila va nau eteva aghatu, aue Karisto ekaarasi tani arangiseita tale uneita nivelu eitauaa.

15:16: Rom 1:5; 11:13. **15:20:** 2 Ko 10:15-16. **15:21:** Ais 52:15. **15:22:** Rom 1:13. **15:25:** 1 Ko 16:1-4. **15:26:** 1 Ko 16:1; 2 Ko 8:1; 9:2, 12; Apos 24:17. **15:27:** 1 Ko 9:11. **15:29:** Rom 1:11.

³⁰ Poli tale kaluita niaikaaiaa ta Vau ngepona ateva Iesu Karisto me tee poli niaielousi eteva Spirit Manga ghe taue mae sio etaita, aghaaulia ngasarasarakana etaimim, kapughu etoa, tani uungu esarasarakana teeieghi tani looloo sae ta God mausighi. ³¹ Ita looloo sae va, lo atoa taumattu la tokatoka eJudia la tam aaiesoaa ta Iesu Karisto, karika aue la ghelei righi sesa voto etaghi, me uunguaaghi eJerusalem, aue kapuna atoa God la aloannaaili. ³² Me aue amae etaimim tee nimasiasi eteva, arova aaloannaane God, me ita masimasi, ita ainoana, ta poli amae etaimim. ³³ Alooloo sae va God, ia etautau mae luei, aue etoka aitauaa teeiem akapa. Koronna.

16

Pol ghe tau lao sio masimasiaane ta kapuna atoa

¹ Aghaloanna tani auliaa etaimim va, kapuita vause ateva ta Fiibi, tau ngai uungu ia tale ale manga ateva eKenkria, am rooroo tani atoka tuutuliimim etana. ² Akolomiem tani ghaaia tale ararina atea Vau ngepona, nongina taumattu kapuna taumattu ngatoa God la aioneoneainila, me am sausia arova ealoanna righi niaisauisi etaimim, poli ghe sausila oroieili taumattu ngatoa, me aghi tee.

³ Am asaoki masimasiaaghi ta Prisila me Akuila, lalu uungu eitauaa teeieghi ta Karisto Iesu. ⁴ Lalu ghe tam matautula tani mate mausi tani asaangi maamauluaghi. Akaakaili emasinaaili etairarua, me karika va aghi nonga, ta tee isaa akapaaili ale manga atoa, aleira ila taumattu ngeleka atoa. ⁵ Am asaoki tee masimasiaaghi ta lo atoa laghe aiesoala me la nim laa aisouii tanganueirarua tani kkauaa.

Am sou tee masi kapughu eteva ta Epenetus, aitiutiu ia tani aikkaaiaa ta Karisto tale provinsi eteva eEisia.

⁶ Am sou tee Meri, ghe uungu aanasaaili tani sausiem.

⁷ Am sou tee Andronikus me Jionia tale nimasimasi, ilalua tee aJiu ilalua, me ami ghe karavusu eitauaala. Apostolo ilalua, me taumattu ngakapa atoa la oneoneainilalua, me lalu ghe kila akasinala Iesu, me aghi avirina.

⁸ Am taula masimasiaaghi ta Ampliatus, ia aghaielousieinia mausi Vau palepale.

⁹ Am sou tee Urbanus, ita uungu eitauaa ta Karisto, me masi kapughu eteva Stakis.

¹⁰ Am sou tee Apelis, ghe ghaala nitootoonga me ghe apasunga teela ta taumattu ngatoa vaalua ghe kaakaarasi tani uungu eitauaa tee Karisto.

Am sou tee kapuna atoa Aristobulus.

¹¹ Am sou tee Herodion, ia tee aJiu ia.

Am sou tee kapuna atoa Nasisus la ghaaiesoaa ta Vau ngepona ateva.

¹² Am sou tee Tripena me Triposa, vause alua lalu ghe uungu aanasa ta Vau ngepona, me am sou tee mene masi kapughu eteva Pesis. Ia tee kateva vause ghe uungu aanasa ta Vau ngepona ateva.

¹³ Am sou tee Rupus, Vau ngepona ateva ghe suitoongainiela, me tee kinna, ghe saasauisi emasinaailieghi, nonginaaili va natuna tuungi eghi.

¹⁴ Masimasiaaghi ta Asinkritus me Flegon me Hermes, me Patrobas, me Hermas, me kapuira atoa la veluvelu eitauaa tani kkaua.

¹⁵ Am taula masimasiaaghi ta Pilologus me Julia, me ta Nereus me kapuna vause ateva, me Olimpasi, me ila akapaaili kapuna taumattu ngatoa God, la veluvelu eitauaa tani kkaua teeila.

¹⁶ Am aisouii tee mene katoa la aiesoa ngaitauaa tale niaielousi.* Me ila akapaaili ale manga atoa ta Karisto la tautau aatu masimasiaaira etaimim.

¹⁷ Amene aulia ngakororongana etaimim kapughu etoa: Am aimonomonosiaa tee lo atoa la gheelei taumattu la tokatoka apolapola, me la gheelei taumattu la kaakatuu tale niaikaaiaa, me la auliaa saasakiaa tee niapasunga koronna ngam ghe kila akasinala. Am rou mene toka me kasu ekalakalaa teeila. ¹⁸ Poli lo atoa laghe gheelei isaa o ase voto, karika la uungu ta Karisto Vauita ia, ta la nim nannaa nonga aaloannaaira. La auliaa inangari masinaaili nongonongoaane, me la kamekame taumattu ngatoa, me la gheelei saasakiaa urunguitaniira, taumattu ngatoa karika la kilakila amasina masina me sesa. ¹⁹ Taumattu ngakapa atoa angila ghe nongola vaalua masinaaili nongonongo usilaaime tale masi kiukiu. Liuna avalua o amasimasiangailiim. Aghaaulia ngavalua o poli aghaloanna va am alomasaanga tale saa voto masina, me am toka amasau tale voto karika masina.

²⁰ Me God, ia liue luei ia, ghaisa ngarighi aue easa putuputu Satana ta kkeimim. Alooloo sae va Vauita ateva ta Iesu Karisto aue etam ruu tani apasunga etaimim maamasinaane ateva.

²¹ Timoti, euungu eitauaa teeieghi, etautau aatu masimasiaane, me tee Lusias, Jeson, me Sosipata, aJiu tee ila.

²² Aghi Tetius, aghe pitila tale uru ngai etikirighi oia saa voto Pol ghe auliaala, atautau aatu masimasiaaghi mausi Vau ngepona ateva.

²³⁻²⁴ Gaeas, ia o taumattu ngateva atokatoka teeia tanguena, me esaasausi lo akapa atoa la aiesoaa tale ia oia masaliki taatara atea, etautau aatu masimasiaane.

Erastus, ia eaaitaraa viliki veu tale ia oia masaliki taatara atea, me kapuita ateva ta Kuatus, lalu tautau aatu masimasiaairua etaimim.†

²⁵ Ita taula nikkaua ta God, poli ia eroroo tani gheleiem me am tingina akororongana tale masi kiukiu apoppooaa, isaa o masi kiukiu eaaulia ngaotu Iesu Karisto, me tee ia oia voto ateva koronna ia ghe aaisuliaala oroieili nau, ²⁶ me ghaine ang ghele otuela, nongina inangari propete atoa laghe pitila, me nongina God ateva tokatoka liu ia ghe aulia ngakoronnala va, taumattu ngeleka akapa atoa tale voto akapa laghe nongola isaa o inangari, me aue la rooroo tani aiesoaa me nongo usilaa. ²⁷ God ia nongaaili Goto ia me alomasaanga ia tale voto akapaaili. Ita taue sae nau ekapa atoa poli uunguaane Iesu Karisto! Koronna.

16:16: 1 Ko 16:20; 1 Pita 5:14. * **16:16:** Tale inangari nge Grik, tale niaingusu eteva manga ia. **16:17:** Mat 7:15; Tts 3:10. **16:18:** Plp 3:19; 2 Pita 2:3. **16:19:** Rom 1:8; 1 Ko 14:20. **16:20:** Aitiutiu 3:15. **16:21:** Apos 16:1-2; 19:22; 20:4. **16:23-24:** Apos 19:22; 1 Ko 1:14. † **16:23-24:** Kasina uru ngai laghe pitila, la ghe piti teela, 24 Alooloo sae va maamasinaane ateva kapuita Vau ngepona ateva Iesu Karisto aue etoka aitaaua teeiem akapa. Koronna. **16:25:** Ips 1:9; 3:5, 9; Kol 1:26; Rom 1:5.

Aitiutiu etikirighi uru ngai Pol ghe pitiela ta aKorint atoa Inangari emuemua

Korint namuu masaliki taatara ia tale provinsi eteva eAkaia, tale namuu patunganua ateva ghaine ita aseasea va eGris. Oroi anua laghe mae sosso tale saoa atikirighi eKorint, me oroi tau ngelamana atoa laghe tokatoka okae. Oroi voto sesa, nongina tani ropi sesa manu me niailai salosalooa, ghe lutulutu eKorint. Pol ghe aitiutiula tani ppooaa masi kiukiu eKorint (Apostolo 18). Nau Pol ghe kasula eKorint tani ppooaa tale mene katoa masaliki taatara, oroi voto ghe lutula tale ale manga eKorint, me Pol ghe pitila ia o uru ngai etikirighi tani liu kaluira nikkolomi.

Tani kila amuemua

Aitiutiu tale inangari *1:1-9*

Niaissa me niaipolapola tale tau ngaiesoaa *1:10-4:21*

Gheeleiaa ssavoto me nikkolomi tale nilai *5:1-7:40*

Tani toka nongina tau ngaiesoaa ngatoa *8:1-11:1*

Vaalua vaulanina ateva Karisto ta ale manga etani kkauaa *11:2-14:40*

Karisto ghe totula tale nimate, me tau ngaiesoaa ngatoa aue la totu tee *15:1-58*

Pol ghe suula masimasiaane *16:1-24*

¹ Aghi Pol, God ghe koloaghila tale aloannaane va ekapuna apostolo ieghi Iesu Karisto, tee me Sostenes, eaaiesoaa ngaitauaa teeita.

² Angalu pitipiti mae tale alena ale manga ateva God eKorint, ta lo atoa God ghe amangaiemla ta Karisto Iesu, me ang ghe koloamla va am manga am, tee me lo akapa atoa la tokatoka akapa see tale mene kasina masaliki la looloo sae tale ararina ateaee Vau eteva Iesu Karisto, kapuira Vau ia, me ita tee.

³ Alooooloo sae va maamasinaane me luei ekasukasu ta God Tamaita ia me Vau ngepona ateva Iesu Karisto aue etoka teeiem.

Pol ghe kaili emasina saela ta God

⁴ Anim toka kaakaili emasina sae ta God nau ekapa atoa mausiimim, poli ta Karisto Iesu God ghe tau aatu sio maamasinaane ateva. ⁵ Poli ta Karisto, ngam ghe pasula tale voto akapaaili, nongina tale aippooaimim, me tale alomasaanganiaaimim. ⁶ Tale isaa o salana, God ang ghe apasungaala va nau ami ghe aaulia ngaotu Karisto, ami ghe aaulia ngakoronnaia. ⁷ Liuna avalua o, karika am tuutukuna tale voto God etautau mae tani ghelei uunguaane, nau earieriem tani toi kapuira Vau ngepona ateva Iesu Karisto nau ekauerekati. ⁸ Aue eaitara ngakorokoronganaiem lomosina ta airuuruu eteva nau, me karika aue la ue va sesa am tale nau eteva kapuira Vau eteva Iesu Karisto emene mae. ⁹ God aue eghelei isaa o voto etaimim poli eghelei voto eue va aue eghelei, me ghe suitoongainamla tani aighui eitauaa tee Natuna, ia kapuira Vau ngepona ia, Iesu Karisto etana.

Niaipolapolaii tale ale manga ateva

¹⁰ Kapughu etoa, tale ararina ateaee kapuira Vau eteva Iesu Karisto, akookolomiem va am kateva nonga, me aue karika righi niaipolapolaii elutu elome etaimim, me aue am toka aitauaa tale kateva nonga ninannaa

me aloannaaimim. ¹¹ Kapughu etoa, katoa laghe tokatoka tanganue vause ateva Kloui, laghe auliaala kieghe va niaissakeana elutulutu elome etaimim. ¹² Malloeane inangari aghaauliaa isaa avalua toko, va katoa etaimim la ue va “Aghi kapuna disaepolo ieghi Pol,” me katoa la ue va, “Aghi kapuna disaepolo ieghi Apolos,” me katoa la ue va, “Aghi kapuna disaepolo ieghi Pita,*” me katoa la ue va, “Aghi kapuna disaepolo ieghi Karisto.” ¹³ Am annaa va Karisto aipolane ia? Va Pol ghe matela etaimim tale aikotoo? Me am ghe ghaala niaasuu tale ararina atea Pol? ¹⁴ Akaakaili emasina, poli karika aghe asuula toa etaimim ta Krispas nonga me Gaeas, ¹⁵ liuna avalua o me karika teva urooro tani ue va ughe ghaala niaasuu tale ararighi etea. ¹⁶ (Aghe asuu teela Stepanas me kapuna atoa tanganuena, me karika aghannaa va aghe asuula mene righi taumattu.) ¹⁷ Poli Karisto karika ghe sungieghila tani asuu, ta ghe sungieghila tani ppooaa masi kiukiu, me nau appooaa inangarina ateva, arau mene aulieinia tani apasunga va alomasaanga ieghi, ta unna aikotoo ateva Karisto erau nim peisaane.

Karisto alomasaanganiaane ia me sarasarakaniaane ia God

¹⁸ Poli kiukiuna aikotoo ateva alokapakapa ia ta lo atoa ngila raarua, me ta lo atoa etaita God easangita, aikotoo ateva sarasarakaniaane ia God.

¹⁹ Ta Uru ngai Manga ateva eue va,

“Aue aghaa velu aalomasaangania lo atoa taumattu la annaa va alomasaanga ila,

me aue aghapasunga va alokapakapa nannaaira lo atoa taumattu la annaa va la kilakila oroi voto.”

²⁰ Tau ngalomasaanga ateva karika erooro tani kila God tale alomasaanganiaane. Tau ngai aapasunga ateva tale inangari nipaopao karika erooro tani kila God tale sa ateva ekilakilaia. Tau nisama ateva karika erooro tani kila God tale samasamaane. God ghe apasungaala va aalomasaangania taumattu tale kosa ateva oia alokapakapanna. ²¹ God alomasaanga ia, me ghe annaala va alomasaanganiaaira taumattu tale kosa ateva oia karika erooro tani sausila tani kila God. Liuna avalua o me God ghe annala tani asaangi lo atoa la aiesoaa tale inangari ami aulia ngaotu, me taumattu tale kosa ateva la annaa va isaa o inangari alokapakapanna. ²² Poli aJiu etoa karika la aiesoaa poli la kookolomi aimatootoongana ngepona liu, me lo atoa aGriki ila karika la aiesoaa poli la paepae alomasaanga ateva. ²³ Me karika, ta ami, ami poppooaa matemateane ateva Karisto, aJiu etoa karika poi la aloanna tani nongoa, me ta lo atoa karika va aJiu ila, alokapakapa ia etaira. ²⁴ Me ta lo atoa God ghe kololala, lo atoa aJiu ila me lo atoa karika va aJiu ila, Karisto sarasarakaniaane ia me alomasaanganiaane ia God. ²⁵ Ta poli inangarina ateva aikotoo ateva, aGrik atoa la annaa va alokapakapa ia, eaapasunga va alomasaanganiaane God elaulau alomasaangania taumattu. Me aikotoo ateva, aJiu etoa la annaa va saghuighuina ia, eaapasunga va sarasarakaniaane God elaulau sarasarakaniaa taumattu.

²⁶ Kapughu etoa, am mene nnaa lao vaalue iem nau God ghe koloamla. Katoa nonga etaimim alomasaanga iem tale taatara taumattu ngatoa tale kosa ateva oia. Me katoa nonga etaimim sarasarakana am, me katoa nonga etaimim am ghe lutula tale llo pamili tue ngararina manee. ²⁷ Poli God

1:12: 1 Ko 3:4; Apos 18:24-28. * **1:12:** Pita Pol ghe pitila va *Kepas*. Tale inangari nge Aramaik, *Kepas* malloeana va atu. Tale inangari nge Grik, Pita tee malloeana va atu. **1:14:** Apos 18:8; Rom 16:23. **1:16:** 1 Ko 16:15. **1:18:** Rom 1:16. **1:19:** Ais 29:14. **1:20:** Ais 19:12; 33:18; 44:25; Job 12:17. **1:21:** Mat 11:25. **1:23:** Rom 9:32; 1 Ko 2:14. **1:24:** Kol 2:3. **1:25:** 2 Ko 13:4. **1:26:** Mat 11:25; Jms 2:5.

ghe suitoongaala voto alokapakapanna tale kosa ateva oia tani apalata lo atoa la annaa va alomasaanga ila, me ghe suitoongaala lo atoa karika sarasarakana ila tani apalata lo atoa la annaa va sarasarakana ila. ²⁸ God ghe suitoongaala voto tale kosa ateva pisikeaili, me voto taumattu tale kosa ateva la ratirati, me voto taumattu tale kosa ateva karika la taatara kkai, God euungu etana tani ghaa velu isaa o voto kosa ateva eannaa va masina me eanamunamungane. ²⁹ Liuna avalua o me karika teva erooro tani aasake ta matane God. ³⁰ Poli mausi God am ghe kateva nonga iemla ta Iesu Karisto. Ghe maeaa sio alomasaanga etaita, me ita ghe ghulughuluenala me ita ghe mangala, me ghe ghaa oghitala tale gheeleiaa ssavoto atoa. ³¹ Liuna avalua o, nongina Uru ngai Manga ateva eaauliaa va, “Arova teva eanna tani aasakeaa righi voto, eaasakeaa voto Vau ngepona ateva ang ghe gheleila.”

2

¹ Kapughu etoa, nau aghe mae sio tani aulia ngaotu inangarina ateva God etaimim, karika aghe poppooaa righi asease kinatama inangari tani apasunga va alomasaanga ieghi. ² Poli aghe nnaala tani kkaluaa voto akapa nau aghe tokatoka teiem, ta aghe annaa nonga Iesu Karisto, ghe matela tale aikotoo. ³ Nau aghe mae sio etaimim, karika aghe sarasarakana, me aghe reterete tale nimatautu. ⁴ Inangarighi me uneghi nippooaa karika aghe poppooaa tale aalomasaangania taumattu tani ghaaiem, ta aghe apasunga ngaotu sarasarakaniaane Spiriti eteva. ⁵ Isaa avalua o me uneimim niaikaaiaa erau mene toka tale alomasaangania taumattu, ta etoka tale sarasarakaniaane ateva God.

Alomasaanga ateva emaemae tale Spiriti eteva

⁶ Ami aauliaa inangari alomasaanga ta lo atoa nonga ngila ghe korokoronganala tale uneira niaikaaiaa, karika va aalomasaangania taumattu tale kosa ateva oia, o tale tau ngai toitoi tale kosa ateva oia, poli ghaisa ngarighi aue uunguairaira enim kapa. ⁷ Me karika! Ta ami auliaa alomasaanganiaane God aisuliane emua arau, me ghaine ngami aotou. God ghe nnaala emua arau va aue eghelei, me aue ita ghaa voto masinaaili etana. ⁸ Karika toa tau ngai toitoi tale kosa ateva oia aloira ghe masaangainiela, poli marova laghe kilakilaia, karika aue laghe uvi emate Vau eteva sarasarakana ia tale aikotoo. ⁹ Nongina Uru ngai Manga ateva eaauliaa va,

“Sa ateva karika righi mata ghe taraia,

me karika righi talinga ghe nongoa,

me karika ghe lutu tale nannaaira taumattu,

isaa o voto, God ghe aimanomanosiaala ta lo atoa la aielousieinia.”

¹⁰ Ta God ang ghe apasungaala isaa o voto etaimami tale kapuna Spiriti eteva.

Ta Spiriti eteva etaatara me ekilakila voto akapaaili, tee ninannaa me voto aisuliannaaili kanna God. ¹¹ Poli karika teva taumattu ekilakila nannaane kateva taumattu, ta kapuna nonga ateva spiriti etokatoka elome etana, ekilakila. Me tale ia o salana atikirighi me karika teva erooro tani kila nannaane God, ta kapuna nonga ateva Spiriti God ekilakila. ¹² Ia o lo ateva Spirit Manga ami ghe ghaaiela, kanna ia God. Karika ami ghe kilala God tale nannaaira taumattu tale kosa ateva oia. Liuna avalua o me aloimami ghe masaangaala masi voto God ghe nim tau mae sio. ¹³ Nau ami auliaa isaa o inangari, karika ami auliaa tale aalomasaangania taumattu, ta Spirit Manga ateva etautau mae inangari ami poppooaa. Ami auliaa inangari oia

tale llo taumattu Spirit Manga ateva etokatoka etaira. ¹⁴ Me lo atoa taumattu Spiriti eteva karika ia etaira, karika la rooroo tani ghaa ia oia inangari eteva emaemae ta Spiriti eteva. Inangari eteva oia alokapakapa ia etaira. Karika la rooroo tani kilaia, ta poli Spiriti eteva karika ia elome etaira tani ghelei emasalika nannaaira. ¹⁵ Llo taumattu Spirit Manga ateva etokatoka tale maamauluaaira, aue la kila tani aitalutaluaa voto akapaaili sesa me masina elutulutu tale maamauluaaira. Mene kasina taumattu, karika la rooroo tani kila nannaaira lo atoa Spiriti eteva etokatoka etaira. ¹⁶ Ta Uru ngai Manga ateva eue va,

“Karika teva erooroo tani kila nannaane Vau ngepona ateva,
me karika teva erooroo tani loea.”

Me ta ngetaita, ngita ghe kilala nannaane Karisto.

3

Pol me Apolos kapuna tau ngai uungu ilalua God

¹ Koronnaaili, kapughu etoa, karika aghe roo tani sama teeiem nongina aghe samasama tee lo atoa Spirit Manga ateva etokatoka elome etaira, ta aghe sama teeiemla nongina aghe samasama tee taumattu ngatoa la uusilaa aaloannaaira, poli aikaaiimim ta Karisto nongina raaraina ateva. ² Aghe anginainamla tale rarumi ssu, me karika va tale inana korokorongana, ta karika am ghe aimonomosiaa tani ghaa. Me isaa tee oia nau, karika am ghe roo poi tani ghaa, ³ ta poli am tokatoka nongina taumattu ngatoa la uusilaa aaloannaaira. Am nannaa saasakiaa tee mene katoa etaimim, me am aissakeana elome etaimim. Isaa o voto eaapasunga va am taumattu tapaa kosa am, me am nongina taumattu ngatoa karika la kilakila God. ⁴ Nau kateva etaimim eue va, “Aghi kapuna disaepolo ieghi Pol,” me mene kateva eue va, “Aghi kapuna disaepolo ieghi Apolos,” eaapasunga va am nim taumattu tale kosa ateva am.

⁵ See ia Apolos, me see ia Pol? Angalua nim kapuna tau ngai uungu iengalua God. Angalu ghe ghelei niuungu God ghe tau mae sio etaingalua, me am ghe aiesoaala. Kateva etaingalua eghelei niuungu God ghe tau mae sio etaingalua tani ghelei. ⁶ Aghi aghe pasala katu ue ngai eteva, me Apolos ghe aitarainiela, me God ghe apinosala ia o katu ue ngai eteva. ⁷ Liuna avalua o me lo ateva epasapasa me lo ateva eaaitara katu ue ngai eteva, karika righi arariirarua, ta God nonga ararina atea, ta ia eaapinosa ue ngai eteva. ⁸ Lo ateva epasapasa me lo ateva eaaitara katu ue ngai eteva, kateva nonga nannaairarua, me aue God etau lao aipolipoli etairarua erooaa niuungu lalu ghelei. ⁹ Angalua angalu uungu eitauaa ta God, me am nongina umana utana atingiu God, me tee am nongina ale ateva God eatuutulu.

¹⁰ Tale maamasinaane God, ghe tau mae sio etaghi va aghelei uunguaane lo ateva muennaaili ia tani atuutulu. Aghe kaiaala suena tani tiuaa ale ateva, me auena mene kateva eatulu saooa tani rungia. Me kateva kateva etani aitoka vaalua eatulu saooa tale isaa o suena. ¹¹ Ta poli God ang ghe atoka amuemuela Iesu Karisto va ie nonga suena ia, me karika mene teva erooroo tani tingina va esuena. ¹² Arova teva ealoanna tani atulu saooa sae tale suena, esaoaa sae golo me silva me masi atu, me katoa aue la saooa sae voto erooroo tani marokase, nongina ai, valaena me uru makere.

¹³ Me maamasinaa uunguaa kateva kateva aue la tara tale nau eteva Karisto ekaurekati. Tale ie nonga o nau eteva niaisakei nongina kura atea aue etoongi me eapasunga uunguaaira va masina o sesa. ¹⁴ Me marova saa voto laghe atulu etoka saela tale isaa o suena etam ata, ia o tau ngai atulu eteva aue eghaa aipolipoli. ¹⁵ Me marova see uunguaane eata akapa, karika aue eghaa aipolipoli, me ia karika aue eraua, ta aue etoka nongina taumattu ngateva ghe saangala tale kura atea.

¹⁶ Karika am kilakila va am alena ale manga am God, me kapuna Spiriti eteva etokatoka elome etaimim? ¹⁷ Liuna avalua o me arova lo ateva taumattu etuuturungi alena ale manga ateva God, God aue eturungia, poli alena ateva manga ia, me am alena ale manga am God.

¹⁸ Marova teva elome etaimim uannaa va io alomasaanga io tale nannaa taumattu tale kosa ateva oia, urau mene kameo, poli karika alomasaanga io tale voto kanna God. Tani toka va God etaraio va alomasaanga io, aue emasina va taumattu tale kosa ateva la tara va io alokapakapa io. ¹⁹ Ta alomasaangania taumattu tale kosa ateva oia nim alokapakapanna ta taataraane God, nongina Uru ngai Manga ateva eue va, “Katoa taumattu la nannaa va alomasaanga ila, me God eaareainila tale alomasaanganiaaira tani taula sio euu.” ²⁰ Uru ngai Manga ateva emene ue va, “Vau ngepona ateva ekilakila va nannaaira taumattu ngatoa la nannaa va alomasaanga ila, ila nim lao ila.” ²¹ Liuna avalua o me karika toa la mene saeaa nannaaira tale saa taumattu la ghaimuli tee, poli God ghe tau aatu sio voto akapaaili tani sausiem: ²² ta arova Pol, Apolos me Pita,* o kosa ateva oia, o mauue ateva me mate ateva, me voto etokatoka ghaine me voto auena emae, isaa akapaaili o voto uneimim. ²³ Ta am, kapuna am Karisto, me Karisto kapuna ia God.

4

Kapuna apostolo atoa Karisto

¹ Liuna avalua o me am tani nnaa va, ami kapuna tau ngai uungu iemami Karisto. God ghe atokaiemamila tani aulia ngaotu voto aisuliane kanna God. ² Kateva voto tau ngai uungu eteva etani gheeleia, va etani ghelei emasina uunguaane vauna ateva. ³ Karika anannaa marova am poppooaa teeieghi tale uunguaaghi, me saa llo taumattu epoppooaa teeieghi, ta aghi tee karika aghauliaa teeieghi. ⁴ Karika anannaa va righi voto sesa aghe ghelei, me karika eaapasunga va karika aghe gheleila righi sesa voto, ta Vau ngepona ateva eghelei niaisakei etaghi. ⁵ Liuna avalua o me am rau mene ppoaa tee katoa, ta nau eteva aue emae Vau ngepona ateva aue emae me ia aue eghelei niaisakei. Ia aue eaotu voto taumattu ngatoa laghe aaisulia tale urunguitaniira me karika la ghauliaa ta mene toa. Ia o nau eteva kateva kateva aue eghaa niaruaa kanna God.

⁶ Kapughu etoa, aghe pitila llo oia tani aulieiniengalua me Apolos me tani apasunga voto etaimim. Tani annainiengalua, aue am roo tani kila amasina va am tani aimuli tee llo inangari laghe pitila tale Uru ngai Manga ateva, me am rau mene ghelei mene righi asease voto. Tale ia o salana atikirighi, am rau mene aturru kateva tau ngai aapasunga. ⁷ See ghe atokaiemla va am namuu iem ta mene katoa? Voto akapa am ghe ghaala, God ghe tau aatu. Me marova am ghaaghaa voto ta God, vaalua me am aasaesae nannaaimim nongina va am, am ghelei isaa o voto?

3:13: 1 Ko 4:5. **3:16:** 1 Ko 6:19; 2 Ko 6:16. **3:19:** Job 5:13. **3:20:** Sams 94:11. * **3:22:** Pita Tale inangari nge Grik, Kepas. **4:2:** Luk 12:42. **4:5:** 1 Ko 3:8. **4:6:** Rom 12:3. **4:7:** Rom 12:6.

⁸ Am gheeleei nongina va ngam ghe ghaala voto akapaaili, me ngam ghe ghaala niuungu ekapa Spiriti eteva enim tautau mae, me am annaa va am sarasarakana am ta Spiriti eteva nongina va ngam ghe kingila, me ami karika! Aghanna va am ghele toka nongina kingi etoa, me ami tee ami ghele nongina am. ⁹ Poli ta ngetaghi aghannaa va God ghe atokaiemamila apostolo atoa tani airuuruu. Ami nongina taumattu ngatoa ngila aisakeila me ngila uela va aue la mate tale tummatavanga, ta mataira ensolo atoa, me taumattu ngatoa, me tale kosa akapaaili eteva. ¹⁰ Ami, ami tokatoka va alokapakapa iemami poli ami uungu ta Karisto, me am, am annaa va alomasaangaaili iem ta Karisto. Ami tokatoka va karika sarasarakana amami, me am, am annaa va sarasarakana am, me am la oneoneainam, me am annaa va taumattu ngatoa la rau mene oneoneainamami. ¹¹ Tale isaa too nau me isaa oia nau ami maamaloo, me ami kaakangngata, me ami aasae ghinna marane, me la tuutumariemami, me ami kasukasu see me karika righi aleimami tani toka. ¹² Ami uungu aanasa tale nimaimami. Nau la auliaa saasakiaa teiemami, ami aarangiseila. Nau la gheeleei voto sesa etaimami ami aapala isaa o voto. ¹³ Nau la poppooa saasakiaa teiemami, ami liuliu inangariira tale masi inangari. Me karika taumattu ngatoa la oneoneainiemami, me la taataraiemami nongina va kinanguluti eteva la laa kaokao velua.

¹⁴ Karika apitipiti llo oia tani apalataiem, ta aghanna tani apasunga llo voto am tani kila, nongina va masi natughu tuungi iem. ¹⁵ Arongona ta marova oroieili kapuimim tau ngai toitoi tani aitarainam tale uunguaane Karisto, me kateva nonga ia tamaimim ateva, poli ta Karisto aghi tamaimmi ieghi, poli aghe mae sio tani auliaa masi kiukiu etaimim. ¹⁶ Liuna avalua o aghaauliaa etaimim va, am usilaa gheeleeiaaghi. ¹⁷ Me ngasungisungi tau aatu Timoti, ia natughu ia ta Karisto, me aghaailousieinia me aghaatoka tuutulighi etana tani gheleei uunguaa Vau ngepona ateva, me ia aue egheleei nannaaimim tani mene annaa gheeleeiaaghi tani usilaa Karisto Iesu. Ia aue eapasunga ngakapa voto aghaapasunga ngakapa see tale ale manga akapaaili etoa. ¹⁸ Katoa etaimim la nannaa va karika aue amae taraiem, me la aasake. ¹⁹ Me ghaisa ngarighi amae taraiem, marova Vau ngepona ateva eaaloanna. Me aue akila sa ateva lo atoa la tautau sae nannaaira la gheeleeia. Me aue akila va la gheeleei tale sarasarakaniaane God, o la nim samasama. ²⁰ Poli God eaapasunga va eaaitoiaa taumattu tale voto la gheeleei, me karika va voto la auliaa. ²¹ Sa ateva am aloanna va agheleeia? Arova am tam ruu tani gheleei evalua o, aue amae paruem tale inangari, o arova am nna ngaioghioghiaa, aue aghapasunga va aghaielousieinam tale inangari saghuighuina.

5

Voto sesaaili tale ale manga ateva

¹ Karika aghe roola tani aiesoaa kiukiu aghe nongola tale uunguaa niailai salosalooa see ateaee elome etaimim, voto sesaaili taumattu ngatoa karika la aiesoaa tee karika la gheeleei. Laghe auliaala etaghi va taumattu ngateva ona tale aleimim ale manga ateva ghe aso teela kinna talae ateva, vausenna ia tamana. ² Me arongona va kateva etaimim egheleei isaa o voto, me am tautau sae nannaaimim! Vaalua me karika am ngangngala tani alousiusi me am palata? Me vaalua me karika am ghe ghaa vella ia o taumattu

ngateva tale uneimim nivelu eitauaa? ³⁻⁴ Arongona ta karika atokatoka aitauaa teeiem, me tale ninannaa atokatoka aitauaa teeiem. Me ta lo ateva taumattu ghe gheleila ia o ssavoto ateva ngaghe gheleila niaisakei etana tale ararina atea Vau palepale Iesu. Am kolo teva nivelu eitauaa tale ale manga, me aue atoka aitauaa teeiem ona tale ninannaa, me aue sarasarakaniaane namu ngateva Iesu etoka aitauaa teeiem nau am velu eitauaa. ⁵ Me am ghaa velu ia o taumattu ngateva tale ale manga, nonginaaili va am mene tautae lao ta Satana. Aue eghaa nimmarikana me aue enna ngaioghioghiaa, me aue eroo tani saanga nau Vau eteva esio.

⁶ Karika masina va am aasake. Karika am kilakila kateva inangari eue va, “Ghaunaaili tuku isti erighi eghelei erranga ia akapa palaoa ngateva”? Marova ia o taumattu ngateva etokatoka elome etaimim, aue egheleiem am usi gheeleiaana. ⁷ Am ghaa velu ia o ssavoto ateva elome etaimim nongina ajiu etoa la ghaaghaa velu isti auena ta nau Pasova, me aue am raarangisana, poli God ghe kkaluaala kaluimim ssavoto. Ta poli Karisto ghe matela etaita nongina ia o sipsipi eteva laghe uviuvi ematea ta Pasova. ⁸ Liuna avalua o me ita nnaa ia o ninamanama atea ta Pasova, karika ita namanama verete pokane laghe ghelei isti etana, malloeana va karika ita aimuli usi tee gheeleiaa ngemua arau, ta ita namanama verete karika righi isti etana, malloeana va ita aimuli tee llo God ghe auliaala etaita. Ita rau mene kamekame, ta ita auliaa llo koronna.

⁹ Tale nau ang ghe lao sio, aghe pitipitila etaimim va am rau mene aighui tee taumattu ngatoa la ghelei uunguaa niailai salosalooa see atea.

¹⁰ Karika aghe auliaa taumattu ngeleka atoa, la anna niailai salosalooa see atea, me la aloanna nonga tani toka ghaaghaa oroi voto, me tau niainao ila, me la kakkauaa voto tale kosa ateva oia. Arova am aloanna tani kasu vuli isaa o ase sesa taumattu, am tani kasu vuli kosa ateva oia. ¹¹ Malloeana voto aghe auliaa isaa avalua toko va, am rau mene aighui tee toa taumattu la ue va kapuna ila Iesu me la anna tani ailai salosalooa see, me tau nissaii ila, me la kakkauaa voto tale kosa ateva, me la poppooa sesa inangari tee mene kateva, me la ropiropi sesa manu eteva, me la aainao. Am rau mene nim namanama poi tee ila o ase taumattu ngatoa.

¹² Karika uunguaaita tani ghelei niaisakei tale taumattu ngeleka atoa, ta uunguaaimim tani ghelei niaisakei ta lo atoa elome tale ale manga la ghelei ssavoto tale isaa o salana. ¹³ Nongina Uru ngai Manga ateva eue va, “Am ghaa velu sesa ateva taumattu elome etaimim.” God eghelei niaisakei tale taumattu ngeleka atoa.

6

Uunguaa tani ghelei niaisakei

¹ Nau eteva kateva etaimim ange ghelei teela mene kateva taumattu ekakkaua, vaalua me elaolaoa inangarina tale taumattu karika ekilakila God va ila la ghelei niaisakei etairarua, me karika elaolaoa ta kapuna taumattu ngatoa God va la nongo? ² Karika am kilakila va kapuna atoa God aue la ghelei niaisakei tale taumattu tale kosa ateva oia? Poli aue am ghelei evalua o, vaalua me karika am roo tani ghelei niaisakei tale voto pisike elutulutu elome etaimim? ³ Karika am kilakila va aue ita ghelei niaisakei ta ensolo atoa? Isaa avalua o me ita roo tani ghelei pisike niaisakei tale kosa ateva oia. ⁴ Liuna avalua o, me marova righi uneimim niaissa, vaalua

me am tuutuli taumattu ngeleka atoa va la nongo uneimim niaisakei nau ale manga karika eoneoneainila? ⁵ Aghaaulia ngavalua o tani apalataiem. Va karika teva taumattu etaimim elome tale ale manga alomasaanga ia va erooroo tani ghelei luei tale isaa o niaissa? ⁶ Vaalua me kateva tau ngaiesoaa umene laolaoaa mene kateva tau ngaiesoaa tale niaisakei va taumattu ngateva karika eaiesoaa elaa ruu uneimalua niaisakei eteae?

⁷ Nau kateva etaimim elaolaoaa kateva tale niaisakei, eaapasunga va karika am aimuli tee salane God. Arova tau ngaiesoaa ngateva ekamekameo me eainao peim, urau mene laoinia tale niaisakei. ⁸ Me karika, ta am tee, am ghelei voto sesa me am kamekame me am aino peiira katoa, me isaa o voto sesa am ghelei elome etaimim.

⁹ Karika am kilakila va lo ateva eghelei sesa voto karika aue eghaa niarangise tale ararimangalina ateva God? Am rau mene aikameainam: Lo atoa la ghelei uunguaa niailai salosalooa see atea, me la kakkauaa voto tale kosa ateva oia, me lo atoa la lailai sari maneira katoa, me lo atoa taita la asoaso tee mene katoa taita, ¹⁰ me lo atoa tau niainao ila, me lo atoa tau nissai ila, me lo atoa la ropiropi sesa manu eteva me la poppooaa sesa inangari tee mene katoa, me lo atoa la ghaiuvii tani ghaa ghinna, karika teva etaira aue eghaa ararimangalina ateva God. ¹¹ Tale nau ang ghe lao sio, katoa etaimim am avalua o, me isaa oia ngam ghe raarangisanala tale uunguaa ssavoto ateva, me God ghe amangaiemla, me Spiriti eteva kanna ia kapuita God ateva ghe ghelei eghulughuluenaiemla tale ararina atea Vau ngepona ateva Iesu Karisto.

Tani ailai salosalooa see

¹² Katoa etaimim am ue va, “Ami rooroo tani ghelei aloannaaimami tale asease voto atoa.” Koronna, me karika va tani koronna akapa. Karika va voto akapaaili va masina etaimim. “Ami rooroo tani ghelei aloannaaimami tale asease voto atoa,” me karika aghaloanna tani tau velu teva voto va emuemueinaghi. ¹³ Me am ue va, “Inana pei tale kova ateva me kova ateva aighaa inana ia.” Ia o inangari eteva koronna ia, me am tani nnaa va God aue eturungi ekapailalua. Ta vilikiita ateva karika God ghe gheleiela va ita uungueinia tale uunguaa niailai salosalooa see, ta peina ia Vau ngepona ateva me ia eaitaraa ia o vilikiita ateva. ¹⁴ Ta tale sarasarakaniaane ateva God aue etotuta tale nimate nongina ghe totula Vau eteva tale nimate. ¹⁵ Karika am kilakila va vilikiimim peina Karisto? Erooroo va taumattu ngateva eghaa vilikina ateva peina ia Karisto me eatoka aitauaa tee vilikina vause ngetapaa salana ateva? Karika poi! ¹⁶ Karika am kilakila va marova lo ateva elao aitauaa tee ia o ase vause ngetapaa salana ateva, ngeilalu kateva nongala tale vilikiirarua? Ta Uru ngai Manga ateva eue va, “Ilalua aue lalu kateva nonga tale vilikiirarua.” ¹⁷ Me lo ateva taumattu eaipatolaa tee Vau ngepona ateva, ekaakateva nonga ilalua tale spirit.

¹⁸ Am ilou vuli uunguaa niailai salosalooa see atea. Mene kasina ssavoto taumattu ngateva eghelei isaa eleka tale vilikina, me tale uunguaa niailai salosalooa see atea ughelei saasakiaa vilikim tuunga ateva. ¹⁹ Karika am kilakila va vilikiimim ateva alena ale manga ia Spirit Manga ateva, am ghe ghaaiela ta God? Me karika am kilakila va karika va io uaaitarainio, ta io peina io God? ²⁰ Ghe poliemia tale aipolipoli eteva, liuna avalua o me am oneoneaa God tale vilikiimim.

6:9: Gal 5:19-21; Ips 5:5; Aotu 22:15. **6:11:** Tts 3:3-7. **6:12:** 1 Ko 10:23. **6:13:** 1 Tes 4:3-5.
6:14: Rom 8:11; 1 Ko 15:20; 2 Ko 4:14. **6:15:** Ips 5:30. **6:16:** Mat 19:5. **6:17:** Jon 17:21-23;
Rom 8:9-11. **6:20:** 1 Ko 7:23; 1 Pita 1:18-19.

7

Nikokkolomi tale nilai

¹ Ghaine aghaloanna tani auliaa voto am ghe piti mae sio etaghi. Kateva ta isaa o inangari, am ghe pitila va, “Taita ateva erau mene lai, me arova elai, erau mene aso tee vausea ateva.” ² Poli oroieili uunguaa niailai salosalooa see, liuna avalua o me tani ghelei runga, emasina arova kateva taita eghaa vausea ateva, me emasina arova kateva vause eghaa taitanna ateva. ³ Taita ateva erau mene raungaa vilikina ta vausea ateva me vause ateva erau mene raungaa vilikina ta taitanna ateva. Ilalua akapa lalu roo tani ghelei erooaa aloannaairarua. ⁴ Vause ateva karika va ia nonga eaaitaraa vilikina, ta taitanna tee ateva. Tale ia o salana atikirighi, taita ateva tee karika ia nonga eaaitaraa vilikina, ta vausea tee ateva. ⁵ Kateva urau mene raungaa vilikim ta kateva. Marova amalu mae tale kateva ninannaa va amalu ainoana amua tani aso aitauaa, me amalu ghelei mua uunguaa nilooloo sae, me nau nilooloo sae erau mene aluse. Arovaeaata ta amalu mene mae aitauaa, ta Satana erau ghelei nitotoonga etaimalua, poli karika amalu rooroo tani ghelei runga aloanna niaso aitaua ngateae. ⁶ Isaa oia inangari aghaauliaa karika va inangari sarasarakana tani aimuli tee, ta anim auliaa me aloannaaimim. ⁷ Aloannaaghi va marova am akapaaili am ghele rau mene lai nongina aghi, me karika, ta kateva kateva taumattu eghaaghaa voto God ghe nim tautau lao sio; katoa la lai, me mene katoa karika.

⁸ Ta ngetaimim lo atoa tam lai iem, me ta lo atoa vause raue vulu em, emaamasina va am ghele nim toka nongina aghi. ⁹ Me arova karika urooroo tani aitaraa aaloannaam tani aso aitauaa, uroo tani lai me urau mene toka annaa aaloannaam tani aso aitauaa.

¹⁰ Me ta lo atoa lailai iem, aghaaulia ngasarasarakana etaimim inangari, karika va inangarighi ta inangarina Vau ngepona ateva: Vause ateva erau mene kasu vuli taitanna ateva. ¹¹ Ta marova ekasu vulia me karika eoghi lao ta taitanna ateva, erau mene lai. Me taita ateva erau mene rati vausea ateva.

¹² Me ta mene lo atoa am lailai ta lo atoa karika tau ngaiesoaa ila, aghanna tani mene ppooaa nim inangarighi, karika va inangarina Vau ngepona ateva. Marova taita ateva, vausea ateva karika eaiesoaa, me ealoanna tani toka tee taita ateva, taita ateva erau mene ratia. ¹³ Me marova vause ateva ekakkauaa me taitanna ateva karika, marova taita ateva ealoanna tani toka tee vause ateva, vause ateva erau mene tiu velua. ¹⁴ Poli taita ateva karika eaikaaiaa, God ghe arangiseiela poli vausea ateva eaikaaiaa. Me vause ateva karika eaikaaiaa, God ghe arangiseiela poli taitanna ateva eaikaaiaa. Marova isaa o voto karika koronna, aue natuirarua atoa karika aue la raarangisana. Me karika, ta isaa oia nau, manga ila.

¹⁵ Marova lo ateva karika eaiesoaa eanna tani kasu, tau veluela. Tau ngaiesoa ngateva, uroo tani mene lai, karika teva egheelei rungainio. Poli God ghe kolotala tani toka tale luei. ¹⁶ Am vause atoa, vaalua am rooroo tani kila va taitanim atoa la rooroo tani aikolikoliaa me la saanga, me am tee taita atoa, vaalua am rooroo tani kila va vausenim atoa la rooroo tani aikolikoliaa me la saanga?

¹⁷ Emaamasina arova kateva kateva etaimim eroo tani toka nongina vaalua Vau eteva ang ghe atokaiela, me nongina God ghe tani kolo akasinaiela. Ia oia inangari nipaopao ateva aghaulieinia tale ale manga akapaaili etoa. ¹⁸ Marova lo ateva ngila ghe isoieela, erau mene tootoonga

tani aikolikolieinia va arova karika laghe isoieia. Me marova lo ateva karika laghe isoia, karika emene tau velua va la isoia. ¹⁹ Ni-isoiso ateaee nim peisaane ia, me nitam isoiso ateaee tee nim peisaane ia. Ta tani aimuli tee kanna inangari sarasarakana God namuu ia. ²⁰ Am rau mene tootoonga tani aikolikoliaa sa ateva am ghe tokatoka etana nau God ghe koloamla. ²¹ Marova lo ateva tau ngai uungu io karika utokatoka tale aloannaam nau God ghe koloola, urau mene nannangaili. Ta marova tikirighi salana eoti tani mene toka tale aloannaam, uaimuli tee. ²² Poli lo ateva euungu me karika etokatoka tale aloannaane, me Vau palepale ghe koloala, God ang ghe gheleieia nongina va taumattu ngateva etokatoka tale aloannaane. Me mene isaa aitauea nongina lo ateva taumattu ghe tokatoka tale aloannaane nau God ghe koloala, ia nim tau ngai uungu ia etokatoka ta aloannaane Karisto. ²³ God ghe poliemia tale aipolipoli eteva. Liuna avalua o me am rau mene aimuli tee katoa la auliaa sa ateva am tani gheleia tani amasimasi God. ²⁴ Kapughu etoa, kateva kateva etaimim etani toka nongina God ghe kolo akasinaiela, poli God etokatoka teeiem me aue esausiem.

²⁵ Me tale lo atoa taumattu tam lai iem, karika aghe ghaala righi inangari sarasarakana ta Vau ngepona tani auliaa etaimim. Tale alousiusiaane, Vau eteva ghe tau mae sio alomasaanga etaghi me am rooroo tani atoka tuutuliimim etaghi, me aue aghauliaa sa ateva anannainia. ²⁶ Poli tale isaa oia nau, ange aanasaaili me aghanna va masina etaimim tani nim toka va karika lailai iem. ²⁷ Marova lailai iem, am rau mene airatii, me arova karika lailai iem, am rau mene tootoonga tani ghaa righi vauseniimim. ²⁸ Me arova taita ateva ulai, karika ugheelei ssavoto, me marova vause ateva ulai, karika ugheelei ssavoto. Me ta lo atoa lailai ila aue la sau voto aanasa tale maamaulueaaira. Karika aghanna va isaa o voto aanasa elutu etaimim.

²⁹ Kapughu etoa, malloeana inangarighi isaa avalua toko, va nau ange tutukunaaili, me tale nau too emaema, lo atoa vauseniira atoa nannaaira ta vauseniira atoa erau mene lau uunguaane God. ³⁰ Nimasimasi, nialousiusi me peira erau mene ghelei erungainila tani ghelei uunguaane God. ³¹ Tau ngaiieso ngatoa am ghinaghina voto tale kosa ateva oia, am rau mene atoka nannaaimim tale isaa o voto. Poli kosa ateva oia am taataria ghaine aue ekapa.

³² Aghaloanna va am rau mene nnangaili vaalua tani toka. Lo ateva taita tam lai ia enannangaili uunguaane Vau ngepona ateva, nongina vaalua erooroo tani ghelei emasimasia. ³³ Me lo ateva lailai ia enannangaili voto tale kosa ateva oia nongina vaalua erooroo tani ghelei emasimasi vausenna ateva, ³⁴ me nannaane eghaaghalua. Me lo ateva vause tam lai ia enannangaili uunguaane Vau ngepona ateva. Aloannaane tani taula maamaulueaane ta Vau ngepona ateva tale vilikina me tale spirit. Me tale vause ateva lailai ia, enannangaili voto tale kosa ateva nongina vaalua aue eghelei emasimasi taitanna ateva. ³⁵ Aghaauliaa isaa oia voto tani sausiem me karika va tani ghelei rungainam. Ta aghaloanna tani sausiem va am toka tale masi salana, me erau mene ghalua nannaaimim nau am uungu ta Vau ngepona ateva.

³⁶ Arova unannaa va karika angu gheelei emasina ta vause ateva la ue va ulai etana, me angu nannangaili tani lai, amalu lai, karika sesa voto amalu nannaa tani ghelei. ³⁷ Me marova angu nnaala va karika amalu mene lai, karika umene usilaa katoa nannaaira, ughusilaa saa ninannaa angu nnaala,

masina. ³⁸ Isaa avalua o me lo ateva elai ta vause ateva, egheelei masina voto, me lo ateva etam lai ta vause ateva, egheelei voto masinaaaili.*

³⁹ Vause ateva etani toka tee taitanna ateva lomosina ta taitanna ateva emate, me evira roo tani mene lai ta mene teva taita eanna. Me ia o taita ateva eghaaia etani tau ngaiesoaa ta Vau ngepona ateva. ⁴⁰ Tale nannaaghi, arova vause ateva enim toka, me etam lai, aue emasimasi, me aghannaa va kapuna Spiriti eteva God elaolao aitaaua tee nannaaghi.

8

Malatau laghe gheelei sae aiaavusuvusuena tale tootoo atoa

¹ Me tale malatau la gheelei sae aiaavusuvusuena tale tootoo atoa: Ita kilakila va, nongina am ghe pitila va, “Ita akapaaili ita kilakila oroi voto,” me ia o nikila voto ateaerooro tani gheleita va ita tau sae nannaaita. Me niailousi eteva egheleita tani mene sausi kateva. ² Lo ateva taumattu eannaa va ekilakila akapa voto, karika ekilakila nongina God ealoanna va ekila. ³ Ta lo ateva taumattu eailousiaa God, God etaatara kilaia.

⁴ Tani nama malatau la gheelei sae aiaavusuvusuena tale tootoo atoa,* “Ita kilakila va tootoo atoa karika va koronna ila tale kosa ateva oia,” ta ita kilakila va, “Kateva nonga ia God ateva.” ⁵ Me arongona ta oroi voto epona liu me tale kosa ateva la kolokolola va goto ila me vau ila, ⁶ me etaita kateva nonga ia God ateva Tamaita ia, ia ghe gheleila voto akapaaili, me ita maamaulue tani oneoneainia. Me kateva nonga ia Vau ngepona ateva Iesu Karisto, ta ngetana God ghe gheleila kosa ateva, me ia etautau mae mauue etaita.

⁷ Me karika va tau ngaiesoa ngakapa atoa la kilakila isaa o voto koronna, ta katoa laghe namuu teela niaiesoaa va tootoo atoa mauue ila. Liuna avalua o me nau la namanama malatau taumattu ngatoa laghe ghele saela aiaavusuvusuena etana tale tootoo atoa, karika aloira ghe maamasaangala, la aateatea va voto la gheelei karika masina. ⁸ Karika va inana aue elaoa ngakalakalangina ta God, me God karika aue etaraio va masina io arova unamanama, me karika aue etaraio va sesa io arova utam namanama.

⁹ Am paniem, am kila va voto am aloanna tani ghele tale alomasaangaaimim erau ghele lo atoa saghuighuina ila tale niaiesoaa va la katuu. ¹⁰ Poli marova lo ateva ukilakila isaa oia voto me unamanama elome tale teva ale nikkaua alena ateva tootoo goto, me teva karika korokorongana ia tale niaiesoaa etaraio, isaa o voto ugheelei aue easarasarakanaia tani nama malatau la gheelei sae aiaavusuvusuena tale tootoo atoa. ¹¹ Liuna avalua o me ia o kapum ateva karika korokorongana ia tale ninannaa, Karisto ghe matela etana, angu turungila unna niaikaiaa tale voto ugheelei tale alomasaanganiaam. ¹² Io angu gheleila sesa voto ta Karisto nau angu gheleila voto sesa ta kapum ateva, tale ia o salana atikirighi, me ugheelei saasakiaa nannaane. ¹³ Liuna avalua o me marova malatau anamanama

* **7:38:** Katoa tau ngalomasaanga la annaa va malloeana isaa avalua toko va: **36** Arova unannaa va karika angu gheelei emasina ta natum aliki vause ateva nau ange roo poila tani lai, me uvira anna va elai, utau velua me elai, karika sesa voto ugheelei. **37** Me marova angu nnaala va natum aliki vause ateva erau mene lai, karika umene usilaa katoa nannaaira, ughusilaa saa ninannaa angu nnaala, isaa o voto angu nnaala, masina. **38** Isaa avalua o me lo ateva etau velu natuna aliki vause ateva va elai, egheelei masina voto, me lo ateva etam tautau velu natuna aliki vause ateva va elai, egheelei voto masinaaaili. **7:39:** Rom 7:2-3. **8:1:** Apos 15:29. **8:2:** Gal 6:3. **8:4:** Gal 4:8; Diut 4:39; 6:4. * **8:4:** Katoa aGrik laghe gheelei sae mua ghaata kkena aiaavusuvusuena tale tootoo atoa tale aleira ale nikkaua, me laghe vira laolaoa malatau tale maketi va la poli. **8:6:** Ips 4:5, 6. **8:9:** Rom 14:13-15; Gal 5:13. **8:11:** Rom 14:15, 20. **8:13:** Rom 14:21.

eghelei kapughu eteva ekaakatuu, karika poi aue amene nama malatau, poli arau mene gheleia va ekatuu.

9

Pol nongina mene katoa apostolo

¹ Arooroo tani ghelei voto God eaauliaa va masina tani ghelei. Am nannaa va aghi karika apostolo ieghi? Me karika am kilakila va aghi tee aghe tarala Iesu Vauita ia? Poli uunguaaghi am, ang ghe kapuna iemla Vau ngepona ateva. ² Arongona ta marova katoa la annaa va aghi karika apostolo ieghi, me poli am ghe aiesoala tale uunguaaghi, eaapasunga va aghi apostolo ieghi elome ta Vau ngepona ateva.

³ Nau taumattu ngatoa la aauliaa teeieghi va karika apostolo ieghi, aliuliu evalua etaira toko va: ⁴ Emaamasina va angalua me Banabas angalu ghaa inana me ateo etaimim. ⁵ Mene katoa apostolo, me kapuna atoa Vau ngepona ateva, me Pita,* la kasukasu tee vauseniira atoa, me am angiinginila, me am annaa va angalua karika am mene anginiengalua? ⁶ Ta am annaa va angalua nonga me Banabas ngalu tani uungu tani aisausiaa tokatokaingalua?

⁷ Sa ateva soldia euungu me ia emene paepae voto eghelei tani sausi tokatokaane? Sa ateva taumattu epasapasa eutana me etam namanama inanina? Me sa ateva taumattu eaitoia kiena sipsipi me etam ropiropi rarumi ssuira? ⁸ Karika aghaauliaa voto oia tale aalomasaangania taumattu, ta inangari nipaopao tee eaauliaa. ⁹ Poli Moses ghe pitila tale inangari nipaopao va, "Nau vulumakao ateva euungu tani ghaa velu viliki raisi, am rau mene ghelei runga paane ateva va karika emene nama isaa o raisi." Koti am annaa va God ghe nannaa vulumakao atoa me ghe auliaala isaa o voto, no? ¹⁰ Am annaa va ghe auliaa etaita nau ghe aulia ngavalua o? Ue! Poli ghe pitila va aloita emasaanga. Lo ateva esaisai utana ateva me lo ateva epasapasaia, lalu uungu poli lalu aiesoaa va auena lalu ghaa inana tale niuungu o lalu ghelei. ¹¹ Poli ami ghe pasala masi ue ngai elome etaimim kanna Spirit Manga, ami annaa tani mene ghaa ghinna etaimim tani sausiemami. ¹² Marova emasina va katoa la ghaaghaa voto etaimim, aue emasinaaili marova ami tee ami ghaa voto etaimim.

Me karika ami ghe ghaaghaa llo voto erooroo va am tau mae tani sausiemami, me ami ghe maamatua maate ghe maemae tale maa-maulueaaimami poli ami ghe rau ghelei runga masi kiukiuna Karisto. ¹³ Am kilakilaaili va lo atoa la uungu tale ale manga, la ghaaghaa aneira inana tale ale manga. Me lo atoa la ghelei sae aiaavusuvusuena la namanama kasina malatau la ghelei aiaavusuvusuena etana. ¹⁴ Tale ia o salana atikirighi Vau ngepona ateva ghe aulia ngasarasarakana va lo atoa la poppooaa masi kiukiu, la ghaa aipolipoli tani sausi tokatokaaira ta lo atoa la nongonongo isaa o masi kiukiu.

¹⁵ Me karika aghe kolomi poila rigghi voto erooroo va am tau mae tani sausieghi, me karika apitipiti isaa oia inangari poli aghanna va am tau mae rigghi voto etaghi. Karika aue aghanna arova amate tee nimaloo me tani velu gheleiaaghi va apoppooaa masi kiukiu me karika teva etautau mae aipolipoli. ¹⁶ Nau eteva apoppooaa masi kiukiu, karika arooroo tani asaesae nannaaghi, poli niuungu eteva tani ppooaa, God ghe taue mae sio etaghi

9:1: Apos 22:17-18; 26:16; 1 Ko 15:8-9. **9:2:** 2 Ko 3:2-3. **9:4:** Luk 10:8. * **9:5:** Pita Tale inangari nge Grik, Kepas. **9:9:** Diut 25:4; 1 Tim 5:18. **9:10:** 2 Tim 2:6. **9:11:** Rom 15:27. **9:12:** Apos 20:34; 2 Ko 11:9. **9:13:** Diut 18:1-3. **9:14:** Mat 10:10; Gal 6:6. **9:16:** Jer 20:9.

tani gheleia. Aue esesaaili etaghi marova atam gheleia! ¹⁷ Marova anim ppooaa tale aloannaaghi, aue aghaa aipolipoli, me marova karika va tale aloannaaghi, aghi nim gheelei niuungu eteva God ghe taue mae sio etaghi, ¹⁸ me saa aipolipoli aue aghaa? Uneghi aipolipoli eteva, ia avalua toko va: amasimasi tani ppooaa masi kiukiu me karika amene nnaa tani ghaa viliki veu, me karika amene kolomi voto eroroo va aghaa tale uunguaaghi eteva tani ppooaa masi kiukiu.

¹⁹ Arongo ta anim tokatoka tale aloannaaghi, me karika teva eaitoieinaghi, ngaghe nim nonginala tau ngai nongonongo anna ateva tani ghaa oroieili taumattu va la mae ta Karisto. ²⁰ Nau auungu tee ajiu etoa, atokatoka nongina ila, tani ghaaila. Arongona ta aghi atam uusilaa inangari nipaopao kanna Moses, atokatoka nongina lo ateva euusilaa inangari nipaopao, tani ghaaila. ²¹ Tale ia o salana atikirighi, nau auungu tee taumattu ngeleka atoa, karika la posoposo inangari nipaopao kanna Moses, atokatoka nongina taumattu ngateva karika eposoposo inangari nipaopao. Agheelei evalua o tani ghaa oroieili taumattu ngeleka atoa. Karika malloeane va atam nongonongo usilaa salane God, karika, ta anongonongo usilaa salane Karisto. ²² Nau atokatoka tee lo atoa karika korokorongana uneira niaikaaiiaa, asease voto la nannaa va karika masina ta tau ngaiesoa ngatoa, karika agheelei isaa o voto, poli arau turungi uneira niaikaaiiaa. Atokatoka nongina tokatokaaira taumattu ngatoa tani pae ase salana kona vaalua aroo tani asaangi righi taumattu. ²³ Agheelei isaa o voto mausi masi kiukiu, me ila me aghi aue ami ghaa niarangise kanna God etautaula ta lo atoa la aikaaiiaa tale masi kiukiu.

²⁴ Am kilakila va lo atoa la aaikarati, kateva nonga ia lo ateva aue eghaa aipolipoli. Am ilou esarasarakana tani ghaa aipolipoli. ²⁵ Lo atoa la aikarati tale niaikarati eteae, la aaimonomosiaa tale niaikarati eteae tani ghelei vilikiira esarasarakana tani ilou. La gheelei isaa o llo tani ghaa aipolipoli karika aue toka liu, me ita, ita uungu tani ghaa lo ateva aipolipoli tokatoka liu ia. ²⁶ Liuna avalua o me karika va anim iilou rorrou, me karika va aghaaitumari nongina taumattu ngateva ekekkeli tau ngai ssateena ateva me enim tuutumari kuukuu. ²⁷ Karika! Ta agheelei vilikighi tani ghelei va eaimuli tee aloannaaghi, ta God erau ue va atam rooroo tani ghaa aipolipoli, arongona ta aghe poppooaa masi kiukiu ta katoa.

10

Nipaopao tani rau mene kkauaa tootoo goto

¹ Me tee, kapughu etoa, karika aghanna va am kkaluaa va tuvuita akapa atoa laghe aimuli tee kookoo ngateva me laghe kasu longotila eRet Sii. ² Tale kookoo ngateva me tale paa manu eteva, ila akapaaili laghe ghaala niaasuu me laghe kapuna disaepolola Moses. ³ Ila akapa laghe namanama kateva nonga ia inana God ghe taue lao sio, ⁴ me laghe ropiropi kateva nonga ia manu eteva God ghe taue lao sio. Me laghe ropiropi tale atu eteva God ghe taue lao sio, ghe kasukasu teeila. Ia o atu eteva Karisto etana. ⁵ Me oroieili lo atoa God karika ghe masimasieinilala, liuna avalua o me laghe matela tale voto ateva karika righi taumattu etokatoka etana, me vilikiira ghe rooa ngakapa seela ia o voto ateva.

9:20: Apos 21:20-26. **9:22:** 2 Ko 11:29. **9:25:** Plp 3:14; 2 Tim 4:7-8; 2:4-5. **9:27:** Rom 8:13; 13:14. **10:1:** Eks 13:21-22; 14:22-29. **10:3:** Eks 16:35. **10:4:** Eks 17:6; Nam 20:11. **10:5:** Nam 14:29-30.

⁶ Isaa o voto ghe lutula va eaimatootoongana tani ghelei rungainita tani rau mene tau velu urunguitaniita va elao tale ssavoto nongina ila laghe ghelei. ⁷ Am rau mene toka kakkauaa tootoo atoa nongina katoa etaira. Uru ngai Manga ateva eue va, “Taumattu ngatoa laghe tokatoka sio tani namanama me tani ropi, me laghe tiitingina sae tani loku me laghe ghelei ssavoto.” ⁸ Ita rau mene ghelei niailai salosalooa see atea nongina katoa etaira, me tale kateva nau, ghaluengaulu kotolu airari (23,000) etaira laghe matela. ⁹ Ita rau mene tootoonga Karisto nongina katoa etaira laghe ghelei, me katu ngatoa laghe katakata amatela. ¹⁰ Me am rau mene auliulia nongina katoa etaira laghe ghelei, me ensolo ateva tau ngai tturuu ia ghe uvi ematelala.

¹¹ Isaa o voto ghe lutula etaira va uneita aimatootoongana, me laghe piti elokoi siola tani auliaa kieita lo atoa ita tokatoka tale airuuruu tale kosa ateva. ¹² Liuna avalua o me marova am annaa va am tiitingina akorokorongana, am aikinikinitaa tokatokaaimim ta am rau katu. ¹³ Karika righi nitotoonga am ghaaghaa va isaa ppae, ta nim isaa aitaaua tale mene kasina nitotoonga elutulutu ta taumattu ngakapa atoa. Me God eghelei voto eue va aue eghelei, karika eroroo tani tau veluem va am ghaa namungaili nitotoonga karika am rooroo tani apala. Ta nau am sou nitotoonga, aue eapasunga salana esausiem tani tingina akorokorongana.

Ninamanama tale tootoo me unna ateva ninamanama Vau ngepona ateva

¹⁴ Liuna avalua o, masi kapughu etoa, am kasu vuli uunguaa nikkauaa tale tootoo goto atoa. ¹⁵ Asamasama tee taumattu alomasaanga va am tani nna ngamasina va llo aghaauliaa koronna o kamena. ¹⁶ Nau ita ropiropi tale kapa ateva nau niLosapa, ita kaakaili emasina etana, ita aighui tale raena ateva Karisto. Me nau ita namanama verete isaa o ita aipiria, ita aighui tale vilikina Karisto. ¹⁷ Poli ita oroieili ita me kateva nonga ia verete ateva, kateva nonga ia viliki ita, poli ita akapaaili ita namanama tale ie nonga o verete ateva.

¹⁸ Am annaa taumattu tale Israeli etoa: Lo atoa laghe namanama aiaavusuvusuena laghe kaakateva nonga tale ia o nikkaua ngateae. ¹⁹ Malloeane inangarighi isaa avalua toko va aiaavusuvusuena taumattu ngatoa la ghelei lao tale tootoo atoa nim malatau ila, me tootoo goto atoa nim tootoo ila. ²⁰ Ta uneira aiaavusuvusuena lo atoa la tam aiesoaa, la ghelei lao ta raroai etoa, me karika va ta God, me karika aghalona va am aighui tee raroai etoa. ²¹ Karika am rooroo tani ropi tale unna kapa ateva Vau ngepona ateva me unna tee ateva Satana. Karika am rooroo tani namanama tale tevoo alua, unna ateva Vau ngepona ateva me unna ateva Satana. ²² Vaalua? Ita tootoonga tani ghelei Vau ngepona ateva va esessaia? Ita nannaa va ita sarasarakana ita etana?

²³ Katoa etaimim am ue va, “Ami rooroo tani ghelei aloannaaimami,” me aghaauliaa etaimim va karika va isaa akapaaili voto aue eroroo tani sausiem. Am ue va, “Ami rooroo tani ghelei aloannaaimami,” me karika va isaa akapaaili voto eghelei ekorokonganaita. ²⁴ Karika teva emene nnainia nonga, ta ennaa maamasinaaira mene katoa.

²⁵ Am nim nama malatau am polipoli tale maketi, me am rau mene kolomi righi nikokkolomi eghelei nannaaimim eghaaghalua va malatau o

10:6: 1 Ko 10:11; Nam 11:4, 34. **10:7:** Eks 32:6. **10:8:** Nam 25:1-9. **10:9:** Nam 21:5-6. **10:10:** Nam 16:41-49. **10:16:** Mat 26:26-28. **10:17:** Rom 12:5. **10:18:** Lev 7:6. **10:19:** 1 Ko 8:4. **10:20:** Diut 32:17; Aotu 9:20. **10:21:** 2 Ko 6:15-16. **10:22:** Diut 32:21. **10:23:** 1 Ko 6:12. **10:24:** Rom 15:1-2.

eaa ekasula. ²⁶ Poli, “Kosa ateva kanna ia Vau palepale me voto akapaaili etokatoka etana.”

²⁷ Marova toa taumattu la tam aiesoaa la koloam tani laa namanama, me am anna tani usilaa, am nama sa ateva ngila atokaiela emua etaimim. Am rau mene nnaa va am kolomi righi nikokkolomi eghelei nannaaimim eghaaghalua va malatau o eaa ekasula. ²⁸ Me marova teva eue etaimim va, “Isaa oia malatau laghe gheleila aiaavusuvusuena etana tale tootoo,” am rau mene nama isaa o malatau, mausi ia o taumattu ngateva eaauliaa, me poli enannaa va karika masina tani nama. ²⁹ Karika aue va am nnaa va karika masina tani nama, ta ia o taumattu ngateva enannaa va karika masina tani nama. Poli vaalua me vara aghelei aloaloannaaghi, me am ghelei rungainaghi me am muemueaa aloaloannaaghi? ³⁰ Marova ausi tani namanama tale ia o ninamanama atea, me akaili emasina sae ta God, vaalua me mene kateva taumattu eaauliaa teeieghi inangari sesa tale isaa o voto ngakaili emasinala ta God va anama?

³¹ Liuna avalua o me nau am namanama, o am ropi, o sa ateva am gheleia, am ghelei tani tau sae ararina atea God. ³² Am rau mene ghelei taumattu va la katu: ajiu etoa, aGrik atoa o taumattu ngatoa tale alena ale manga ateva God. ³³ Nongina aghi atootoonga tani ghelei voto emasina tale mataira taumattu ngakapaaili tale isaa akapa salana, poli karika anannainieghi nonga, ta aghanna tani sausi oroi taumattu va la roo tani saanga.

11

¹ Am usilaa gheeleiaaghi nongina auusilaa gheeleiaa Karisto.

Salana nikkauaa ta taita atoa me vause atoa

² Amasimasieinam ta am annainaghi tale voto akapa, me am posoposo parasi voto aghe apasungaala etaimim.

³ Me aghanna va am tara kila va Karisto uruira ia taita akapaaili etoa, me taita ateva uruna ia vause ateva, me God uruna ia Karisto. ⁴ Isaa akapaaili taita elooloo sae me eaauliaa inangarina God, me la akou uruira, karika la oneoneaa uruira. ⁵ Me vause atoa la looloo sae me la auliaa inangarina God, me karika la aakou uruira, karika la oneoneaa uruira; nonginaaili va la ghaggali uruira. ⁶ Marova vause ateva etam akou uruna ateva, emaamasina arova ghele ggali uruna ateva, me poli epaapalata tani sunapi etukuna o tani ggali velu uu nguruna, eakou uruna ateva. ⁷ Me taita ateva erau mene akou uruna ateva, poli ia eaapasunga taataraane me maamasinaane God. Me vause ateva eaapasunga maamasina taitanna ateva. ⁸ Poli karika va God ghe gheleila taita ateva tale vause ateva, ta God ghe gheleila vause ateva tale taita ateva, ⁹ me karika God ghe gheleila taita ateva mausi vause ateva, ta God ghe gheleila vause ateva mausi taita ateva.

¹⁰ Liuna avalua o me mausi ensolo atoa* me vause ateva eaakou uruna ateva tani apasunga va ia matuutuliena ia.

¹¹ Ta Vau ngepona ateva, vause ateva karika ie nonga etokatoka, me taita tee ateva karika ie nonga etokatoka. ¹² Poli nongina vause ateva, God ghe gheleila ta taita ateva, taita ateva ghe lutula ta vause ateva, me voto akapa ghe mae sio ta God. ¹³ Am annaa va masina ta vause ateva elooloo sae ta God, me karika eaakou uruna ateva? ¹⁴ Tale gheeleiaaita, ita kilakila va marova taita ateva aluse uu nguruna aue epalata, ¹⁵ me vause ateva uu

10:26: Sams 24:1. **10:28:** 1 Ko 8:7. **10:30:** 1 Tim 4:4. **10:31:** Kol 3:17. **10:32:** Rom 14:13. **10:33:** 1 Ko 9:20-22. **11:1:** 1 Ko 4:16. **11:3:** Aitiutiu 3:16; Ips 5:23. **11:7:** Aitiutiu 1:26-27. **11:8:** Aitiutiu 2:18-23. * **11:10:** Tale nannaaira ajiu etoa, nau nikkauaa, ensolo atoa tee la tokatoka.

nguruna aluse, aimolumoluna ia tani ghelei emasimasia, poli uu nguruna aluse God ghe tau lao sio etana tani akou uruna ateva. ¹⁶ Marova teva eanna tani aissakeana teeieghi tale isaa oia inangari, eroo tani kila va ami, ami tam aimuli tee mene kasina asease salana tani kkauaa, tee me mene kasina alena ale manga God.

Unna ninamanama atea Vau ngepona ateva

¹⁷ Tale isaa o inangari karika aghanna tani asaesae gheeleiaaimim, poli nau am veluvelu eitauaa, am gheelei oroieili voto sesa me karika am gheelei voto masina. ¹⁸ Aitiutiu eteva voto, aghe nongola va nau am maemae aitauaa tani kkauaa, karika am kaakateva nonga, me aghaiesoaa va isaa oia inangari anongonongo mala koronna. ¹⁹ Koti ghele masina arova am ghelei aipolaii, me aue ita tara va see etani uusilaa gheeleiaane God. ²⁰ Nau am maemae aitauaa tani namanama tale Losapa ateva, karika va ia o ninamanama atea am gheeleia va unna ia Vau ngepona ateva, ²¹ poli nau am namanama, karika am roo tani toi mene katoa, ta kateva kateva etaimim emuemue tani ghaa anna inana. Liuna avalua o me katoa la maamaloo me lo atoa la tuvutuvu tani namanama me ropi, nannaaira eaaisavisavila. ²² Vaalua? Karika righe aleimim va am toka etana me am namanama me am ropi? Vaalua me karika am oneoneaa kapuna taumattu God, me am mae aapalata lo atoa karika righe peiira? Sa ateva aue aghaulieinia etaimim? Am annaa va agharueinam tale isaa oia voto? Karika poi!

²³ Poli saa llo voto aghe ghaala ta Vau ngepona ateva ngaghe apasungaala ta ngetaimim. Isaa avalua toko va: Vau eteva Iesu, tale ia o voo ngateva laghe tauela ta tau ngai ssateena atoa, ghe ghaala verete, ²⁴ me ghe kaili emasina saela ta God, me ghe pirila, me ghe uela va, "Isaa oia verete malataughu ngatautau aatu mausiimim. Am ghelei isaa o voto tani nnainaghi." ²⁵ Tale ie nonga o salana atikirighi, vara laghe ruula tani namanama me ghe ghaala kapa ateva, me ghe uela va, "Ia oia kapa ateva eaaimatoonga raeghi eteva, egheelei lo ateva inangari niaippooa ngaitauaa ouna ia. Nau ekapa atoa nau am ropia, am ghelei isaa o voto tani nnainaghi." ²⁶ Tale nau ekapaaili, nau am nama ia oia verete ateva me am ropi ia oia kapa ateva, am aaulia ngaotu matemateane Vau eteva lomosina ta esio.

²⁷ Liuna avalua o me see unama verete me uropi tale unna kapa ateva Vau ngepona ateva tale salana atikirighi etam oneoneaa Karisto, ugheelei voto sesa tale vilikina me raena ateva Vau ngepona ateva. ²⁸ Taumattu ngateva etani tara mua maamauluaane, me auena enama verete me eropi tale kapa ateva. ²⁹ Poli lo ateva enamanama me eropi tale kapa ateva, me karika eoneoneaa vilikina Vau ngepona ateva, enim tutturungi maamauluaane. ³⁰ Isaa avalua o me oroi lo atoa elome etaimim karika la sarasarakana me la iisiki, me katoa ngila ghe asekanuela. ³¹ Marova ita tara akasina mua maamauluaaita, God karika aue eturungita. ³² Nau Vau ngepona ateva egheelei niaisakei etaita, eparuparuta nongina aliki etoa. Liuna avalua o me karika aue ita ghaa sesa aipolipoli eitauaa tee taumattu tale kosa ateva oia.

³³ Liuna avalua o, kapughu etoa, me nau am mae aitauaa tani namanama, am toi mene katoa. ³⁴ Me see emaamaloo enamanama tanganuena, erau alutu righe niaisakei etaimim nau am veluvelu eitauaa poli karika eoneoneaa vilikina ateva Karisto. Me tale mene kasina voto, aue aghaulia ngamasina etaimim nau amae.

12

Asease niuungu Spiriti eteva enim tautau mae

¹ Kapughu etoa, tale kanna asease niuungu Spiriti eteva enim tautau mae, karika aghalona va aloimim etam masaanga. ² Am kilakila va nau am ghe tokatoka va taumattu ngeleka am, am ghe tau vella maamauluaaimim tani usilaa oroi salana tani kkauaa tootoo atoa karika la samasama. ³ Isaa avalua o me aghaauliaa etaimim va karika teva eaaippooaa tale aisausiaa kapuna Spiriti eteva God erooro tani ue va, “Nikasikiena esae ta Iesu,” me karika teva eroo tani ue va, “Tesu Vau ngepona ia,” arova Spirit Manga ateva karika emuemueinia.

⁴ Oro i asease niuungu Spirit Manga ateva etautau mae etaita, me kateva nonga ia Spiriti eteva. ⁵ Me oroi asease niaisausi, me kateva nonga ia Vau ngepona ateva. ⁶ Me oroi asease salana tani ghelei niuungu, me kateva nonga ia God ateva etautau sarasarakana tani ghelei isaa o niuungu.

⁷ God eaapasunga kapuna Spiriti eteva ta kateva kateva tani sausi tau ngaiesoa ngakapa atoa tale ale manga ateva. ⁸ Ta kateva taumattu, Spiriti eteva etautau roorooaala tani aulia ngamasalika alomasaangania God. Ta mene kateva, ia nonga o Spiriti eteva emene tautau inangari pasu tale alomasaanga. ⁹ Ia o Spiriti eteva etautau niaiesoaa ta kateva, me ta mene kateva, etautau sarasarakana tani ghaa velu isiki. ¹⁰ Ta mene kateva, etautau sarasarakana tani ghelei mirikolo atoa, ta mene kateva uunguaa tani auliaa inangarina God, ta mene kateva etautau alomasaanga tani kila va voto kanna kapuna Spiriti eteva God o karika, me ta mene kateva etautau alomasaanga tani aippooaa tale mene kasina ase niaippooaa kanna Spiriti eteva, me ta mene kateva etautau lao alomasaanga tani aulia ngamasalika malloeane isaa o ase niaippooaa kanna Spiriti eteva. ¹¹ Kateva nonga ia Spiriti eteva, ia eghelei ekapaaili isaa o niuungu, me tale aloannaane etautaula ta kateva kateva taumattu.

Kateva nonga ia vaulanina ateva Karisto me oroi voto etana

¹² Vaulaniita ateva kateva nonga ia, me oroi voto etana. Arongona ta oroi voto etana, me isaa akapaaili o voto, eghelei va kateva nonga ia vaulaniita ateva. Vaulanina ateva Karisto ia avalue ia o: oroi taumattu la tokatoka etana. ¹³ Poli ita akapaaili ita ghe ghaala niaasuu ta kateva nonga ia Spiriti eteva, me ghe gheleitale va kateva nonga ita. Arongona ta katoa ajiu ila me katoa karika ajiu ila, me tau ngai uungu etoa karika la tokatoka tale aloannaaira, me lo atoa la tokatoka tale aaloannaaira, ita akapaaili God ghe tau mae sio kateva nonga ia Spiriti eteva etaita.

¹⁴ Vaulaniita ateva karika God ghe gheleiela va kateva nonga ia, ta oroi voto eaaipatolaa lao etana. ¹⁵ Marova kekem eue va, “Karika va aghi tee tale ia o vaulani eteva, poli karika va nima ieghi,” nau eaaulia ngavalua o, karika eghelei rungania va karika va ie tee tale ia o vaulani eteva. ¹⁶ Me marova talinga atelange eue va, “Karika va aghi tee tale ia o vaulani eteva, poli karika va mata ieghi,” nau eaaulia ngavalua o, karika eghelei rungania va karika va ie tee tale ia o vaulani eteva. ¹⁷ Marova ia akapa vaulaniita ateva mata ia, karika aue eroo tani nongonongo, me marova ia akapa vaulaniita ateva talinga ia, karika aue eroo tani ngusungusu. ¹⁸ Me karika, ta koronnaaili va God ghe atoka aitauaala isaa akapaaili voto tale vaulaniita ateva tale salana ghe annaala va masina. ¹⁹ Me marova vaulaniita ateva

nim nima ia nonga, karika aue ghele teva vaulaniita. ²⁰ Me isaa o voto oroi eaipatolaa etana, me ekaakateva nonga ia vaulaniita ateva.

²¹ Mata ateva karika eroroo tani ue ta nima atelange va, “Karika righi uunguaaghi etam,” me uruita ateva karika eroo tani ue ta kekeita atelange va, “Karika righi uunguaaghi etam.” ²² Kasina voto tale vaulaniita ateva saghuighuina. Me karika ita rooroo tani maulue arova isaa o voto karika. ²³ Me llo voto tale vaulaniita ateva ita annaa va karika masina taataraane, ita aaitara ngamasinaaaili, me lo ateva voto tale vaulaniita ateva ita paapalatainia, ita kaarasi tani aisuliainia, ²⁴ me mene kasina voto tale vaulaniita ateva, karika ita mene nnangaili tani aisulia. Ta God ghe atoka aitauaala vaulaniita ateva, me ghe taula namuu nioneoneaa ta llo voto karika eroo tani ghaa nioneoneaa. ²⁵ Isaa avalua o me ita rau mene ghelei righi niaipola tale vaulaniita ateva, ta isaa akapaaili asease voto tale vaulaniita ateva la aaitaraa mene kateva. ²⁶ Marova kateva voto tale vaulaniita ateva emammarikana, isaa akapaaili voto tale vaulaniita ateva aue emmarikana aitauaa teeia. Me marova kateva voto tale vaulaniita ateva eghaa nioneoneaa, isaa akapaaili voto tale vaulaniita ateva aue emasimasi.

²⁷ Am akapaaili vaulanina am Karisto, kateva kateva etaimim eaipatolaa tale vaulanina ateva Karisto. ²⁸ Elome tale ale manga, God ghe atokala taumattu ngatoa tani ghelei niuungu. Ghe atoka akasinala apostolo atoa, aiaaghalua atoa propete atoa, me aiaakotonna atoa tau ngai aapasunga ngatoa, vara me lo atoa la ghelei mirikol, me lo atoa la sarasarakana tani ghaa velu isiki, me tani sausi mene katoa, o tani muemueainila, me tani aippooaa tale mene kasina ase niaippooaa kanna Spiriti eteva. ²⁹ Am annaa va ila akapaaili apostolo ila me propete ila me tau ngai aapasunga ila? Me am annaa tee va ila akapaaili la roo tani ghelei mirikol? ³⁰ Vaalua, ila akapaaili la rooroo tani ghaa velu isiki? Me ila akapaaili la roo tani aippooaa tale mene kasina ase niaippooaa kanna Spiriti eteva? Me ila akapaaili la roo tani aulia ngamasalika malloeane isaa o ase niaippooaa kanna Spiriti eteva? ³¹ Aghaloannaaili va am tani alona lo ateva niuungu Spirit Manga etautau emae tani aisausiaa tau ngaiesoa ngakapa atoa. Me aghaapasunga etaimim masi salana elaulau mene kasina salana.

13

Niaielousi eteva

¹ Marova Spirit eteva etautau mae sarasarakana me aghaippooaa tale samasamaaira taumattu ngatoa me ensolo atoa, me karika aghaielousi, aghi nongina veloo ateva o karoiroi etoa la nim aangari. ² Marova muenna ieghi tani auliaa inangarina God, me aroo tani kila isaa akapaaili voto me voto aisuliaane kanna God, me marova kalughu niaiesoaa eroroo tani ghaa velu motouru etoa, me karika aghaielousi, aghi nim lao ieghi. ³ Marova atau ekapa lao peighi ta lo atoa karika tue peipeina ila, me vilikighi eghaa maate me aghele tau sae nannaaghi,* me karika aghaielousi, karika aue aghaa righi voto.

⁴ Taumattu ngateva eaaielousi etam sessai parasia, me taumattu ngateva eaaielousi eghelei masi voto, me karika etaatara ssaii, me karika eaaissakeana, me karika etautau sae nannaane. ⁵ Karika eaamakatakata, me karika enannainia nonga, karika eaaiuvii, me ekakkaluaa voto ang ghe lao sio. ⁶ Taumattu ngateva eaaielousi karika emasimasia ssavoto, ta

12:27: Rom 12:5. **12:28:** Ips 4:11-12. **12:31:** 1 Ko 14:1. **13:2:** Mat 17:20. * **13:3:** vilikighi eghaa maate me aghele tau sae nannaaghi Kasina uru ngai laghe pitila, laghe uela va arova atau velu vilikighi eata tani ghelei aiaavusuvusuena. **13:6:** Rom 12:9.

emaamasiaa voto ghulughuluena. ⁷ Taumattu ngateva eaaielousi karika esio asoasooa, me karika eruuruu tani aiesoaa, ta eaatoka tuutulina ta God, me etokatoka akorokorongana tale sesa nau.

⁸ Niaielousi eteva karika ekaakatuu. Uunguaa tani auliaa inangarina God aue ekapa, me uunguaa tani aippooaa tale mene kasina ase niaippooaa kanna Spiriti eteva aue ekapa, me uunguaa alomasaanga ateva tee aue ekapa. ⁹ Malloeane isaa avalua toko va aalomasaanganiaaita karika ekilakila akapa voto, me muumuennaaita tani auliaa inangarina God tukuna. ¹⁰ Me nau ghulughuluena emae, voto tukuna aue ekapa. ¹¹ Nau aliki ieghi, aghe aippooaa nongina aliki eteva, me nannaaghi nongina aliki eteva, me aalomasaanganiaaghi nongina aliki eteva. Nau aghe namuula, aghe tau lange siola gheeleiaaira aliki etoa emuli etaghi. ¹² Ghaine karika ita kilakila amasina voto kanna God, nongina karika ita taatara amasina voto tale ghalasi eteva karika masalike taataraane, me auena ita kila amasina, nongina va ita taatara matane God. Ghaine akilakila kasina nonga voto kanna God, me auena akila akapaaili, nongina God ghe kilaieghila.

¹³ Me ghaine kotolu voto etokatoka: Niaiesoaa, nitaatara lao emua, me niaielousi. Me lo ateva namuu ia etairotolu, niaielousi eteva.

14

Tani auliaa inangarina God me asease niaippooaa ngatoa kanna Spiriti eteva

¹ Am usilaa salana tani aielousi, me am aloannaaili niuungu kanna Spirit Manga enim tautau mae. Me mata ngemua ateva tale isaa o niuungu, niauliaa inangarina God. ² Ta lo ateva epoppooaa tale mene kasina ase niaippooaa kanna Spiriti eteva, poli karika teva taumattu alona emaamasaanga llo eauliaa, karika esamasama tee taumattu, ta ie nonga me God, ta Spirit Manga ateva eaasaoki etana tani auliaa voto aisuliaane. ³ Ta lo ateva epoppooaa inangarina God eaasararakana taumattu, me eaippooa ngaisausia tani auliaa inangari nimasimasi etaira. ⁴ Me lo atoa la aippooaa tale mene kasina ppae ase niaippooaa kanna Spirit eteva, la saasausila nonga, me ta lo atoa la poppooaa inangarina God, la saasausi ekapa taumattu ngatoa tale ale manga. ⁵ Aghalonaaili va arova am akapaaili am ghele aippooaa tale kasina ppae ase niaippooaa kanna Spiriti eteva. Me atani annaaili va am ppooaa inangarina God. Marova karika teva tani aulia ngamasalika sa ateva la aulieinia, lo atoa la nim poppooaa tale mene kasina ase niaippooaa kanna Spiriti eteva karika la saasausi ale manga ateva. Liuna avalua o me lo atoa la poppooaa inangarina God, ila epona ta lo atoa la poppooaa tale mene kasina ase niaippooaa kanna Spiriti eteva.

⁶ Kapughu etoa, marova amae taraiem me appooaa tale mene kasina ase niaippooaa kanna Spiriti eteva, me karika aghaaulia ngamasalika saa malloeana, vaalua aue asausiem? Ta atani auliaa etaimim sa ateva God ghe apasungainiela etaghi, me atau aatu righi alomasaanga me appooaa inangarina God tani loeam. ⁷ Nim nongina voto ateva karika righi maulue etana me eghelei niaangari, nongina flut ateva me aikaukau eteva, marova uneirarua niaangari karika masalike, karika aue ukila va saa kkinari eteae la kaukau. ⁸ Me marova taue ateva karika masalike aangariaane, see aue aimonomosiaa tale niaiuvi eeteae? ⁹ Am tee am avalua o. Marova am aippooaa tale mene kasina ase niaippooaa taumattu ngatoa karika la kilakila, vaalua taumattu aloira aue masaanga sa ateva am aulieinia? Ta

inangari aue nim peisaane. ¹⁰ Oroieili ase nisama tale kosa ateva oia karika isaa aitauaa. Isaa o ase nisama, isaa akapaaili tue malloeana. ¹¹ Marova teva taumattu ghele sama teeieghi me karika akila malloeane inangari eaauliaa, aghi ativuu ioghi tale ia o taumattu ngateva eaippooaa, me ie tee ativuu ia etaghi. ¹² Liuna avalua o, poli am aloannaaili niuungu Spirit Manga ateva enim tautau mae, am tani kolomi tani ghaa llo niuungu erooro tani asarasarakana ale manga ateva.

¹³ Liuna avalua o me lo ateva eaippooaa tale mene kasina ase niaippooaa kanna Spiriti eteva etani looloo sae tani ghaa alomasaanga tani aulia ngamasalika isaa o inangari. ¹⁴ Marova alooloo sae tale kateva ase niaippooaa kanna ia Spiriti eteva, kapughu spiriti eteva elooloo sae, me nannaaghi karika ekilakila sa ateva aghaaulieinia. ¹⁵ Sa ateva aue agheleia? Aue alooloo sae tale kapughu spiriti eteva, me aue alooloo sae tee ta nannaaghi, me aue akkinari tee kapughu spiriti eteva, me aue akkinari tee ta nannaaghi. ¹⁶ Marova utau sae God tale kapum spiriti eteva, lo atoa aloira karika emaamasaanga, karika la roo tani ue va, "Koronna," tale unem nilooloo sae tani kaili emasina, poli karika la kilakila sa ateva uaaulieinia. ¹⁷ Aue uroo tani kaili emasina sae ta God tale masi salana, me ta mene kateva taumattu karika ange ghaala niaissausi.

¹⁸ Akaakaili emasina ta God ta alaulau ekapaailiem tani aippooaa tale asease niaippooaa kanna Spiriti eteva. ¹⁹ Me tale ale manga, aghaaloanna tani auliaa ghalima tuku mata nginangari aloghu emaamasaanga tani apasunga ta katoa, me vulla tani auliaa oroieili airari mata nginangari etoa tale mene kasina ppae ase niaippooaa kanna Spiriti eteva.

²⁰ Kapughu etoa, nannaaimim erau mene nongina aliki etoa. Tale uunguaa ssavoto, am tani nongina raaraina arighi aliki karika eanna ssavoto. Me isaa o voto aghe auliaala etaimim, va nannaaimim etani nongina namu ngatoa taumattu. ²¹ Laghe pitila tale Uru ngai Manga ateva va, "Tale lo atoa la poppooaa tale asease nisama, me ta ativuu etoa, aue appooaa ta kapughu etoa, me karika poi aue la nongoaghi," ghe uela Vau ngepona ateva.

²² Ase niaippooaa kanna Spiriti eteva, aimatootoongana ia ta lo atoa karika la aiesoaa, me karika ta lo atoa la aimuli tee Vau ngepona ateva. Me tani auliaa inangarina God, aimatootoongana ia ta lo atoa la aiesoaa, me karika ta lo atoa karika la aiesoaa.* ²³ Liuna avalua o me marova taumattu ngakapaaili etoa la velu eitauaa tale ale manga me la aippooaa tale ase niaippooaa kanna Spiriti eteva, me marova toa tau ngaiesoaa karika laghe ghaala niasuu o taumattu karika la aiesoaa la kupi sso, aue la nongo me aloira karika aue masaanga, aue la ue va ngam veeveela. ²⁴ Me marova teva tau ngaiesoaa karika ghe ghaala niasuu o teva taumattu karika eaiesoaa ekupi sso, me enongo va am akapaaili am poppooaa inangarina God, aue etara kila va ia tau ssavoto ia, me voto am aauliaa egheelei niaisakei tale maamauluaane, ²⁵ me aue etara kila voto aisuliaane elome tale urunguitanina. Liuna avalua o me aue etturru sio euu me ekkauaa God, me aue eue va, "Koronnaaili God etokatoka aitauaa teeiem!"

14:20: Ips 4:14. **14:21:** Ais 28:11-12. * **14:22:** Pol ghe annaa nau ta Aisaea, samasamaaira Asiria ngatoa, aIsraeli etoa karika laghe kilakila, me ghe aimatoonga niaisakei kanna God. Liuna avalua o me ghe aauliaa va ase niaippooaa kanna Spiriti eteva eaimatoonga niaisakei ta lo atoa karika la aiesoaa. Tani nongo inangarina God eaimatoonga va tau ngaiesoaa ngatoa karika la tokatoka tale niaisakei kanna God. **14:23:** Apos 2:13. **14:24:** Jon 16:8.

Salana tale masi nikkauaa

²⁶ Sa ateva ita mene aulieinia, kapughu etoa? Nau am mae aitaaua, kateva kateva etaimim eaimonomosiaa voto aue esausi ekapaailiem, kateva emaeaa unna kkinari eteae, me kateva eaimonomosiaa tani apasunga, me kateva eaulia ngaotu inangari aisuliaane kanna God, me kateva eaippooaa tale mene kasina ppae ase niaippooaa kanna Spiriti eteva, me ia, o mene kateva ekiri malloeana isaa o ase niaippooaa. Isaa akapaaili o voto am tani ghelei tani akorokorongana ale manga ateva. ²⁷ Marova toa la anna tani aippooaa tale mene kasina ase niaippooaa kanna Spiriti eteva, enim ghalua o kotolu nonga. Me kateva mua eaippooaa me auena mene kateva, vara me mene kateva ekiri malloeana tani ghelei emasalika isaa o ase niaippooaa. ²⁸ Marova karika teva tani kiri malloeana isaa o ase niaippooaa, lo ateva eaippooaa tale ase niaippooaa kanna Spiriti eteva enim matua atoka me eaippooaa nonga ta ngetana me ta God.

²⁹ Ghalua o kotolu propete la auliaa inangarina God, me katoa la tani nongo amasina tani nnaa va inangari emaemae ta God o karika. ³⁰ Me marova inangari eteva kanna ia God ngemae sio ta teva propete etokatoka, aitiutiu eteva propete eaippooaa eruu tani sama. ³¹ Poli am akapaaili am roo tani auliaa inangarina God, kateva mua, vara me mene kateva. Tale ia o salana atikirighi, am akapaaili aue am ghaa alomasaanga me sarasarakana tale aikaaiaimim. ³² Poli propete atoa la roo tani ruu tani aippooaa me la tau velu mene katoa tani propete la sama. ³³ Poli God karika va ia aisavisavilana ia ta Goto ia tale luei.

Nongina katoa ale manga, ³⁴ vause atoa la rau mene toka samasama tale ale manga. Karika am mene tau vella va la toka aisamaai, ta la matua atoka, nongina inangari nipaopao eauliaa. ³⁵ Marova la anna tani kila voto, la rooro tani kolomi taitaniira atoa tanganueira, poli karika masina ta vause ateva tani toka samasama tale ale manga.

³⁶ Vaalua, inangarina ateva God ghe tiuaala etaimim? Me ang ghe tokala nonga etaimim? ³⁷ Marova teva eannaa va ia propete ia, me Spiriti eteva etokatoka etana, aue ekila va sa ateva apitipiti emae etaimim, Vau palepale ghe sungieghila tani gheleia. ³⁸ Marova teva etam aloanna isaa o voto, tau veluela me enim toka.

³⁹ Isaa avalua o, kapughu etoa, me am tani alonaaili tani auliaa inangarina God, me am rau mene ghelei runga kateva tani aippooaa tale mene kasina ase niaippooaa kanna Spiriti eteva. ⁴⁰ Ta voto akapaaili am tani ghelei emasina me tale salana ghulughuluena.

15

Tottotuaane Karisto

¹ Kapughu etoa, aghanna tani mene auliaa etaimim masi kiukiu aghe ppooaala etaimim. Ngam ghe aiesoala me ngam ghe atokala tuutuliimim etana. ² Poli ngam ghe aiesoala isaa o masi kiukiu, ngam ghe saangala, marova am poso parasi inangari aghe ppooaala etaimim. Arova karika, aue aikaaiaimim aue enim peisaane.

³ Sa ateva aghe ghaaiela, aghe tau aatu sio etaimim va mata ngemue ia, va Karisto ghe matela tale kaluita ssavoto, nongina Uru ngai Manga ateva eaauliaa; ⁴ va laghe kaieiniela me ghe mene totula tale aiaakotonna ateva nau, nongina Uru ngai Manga ateva eaauliaa. ⁵ Ghe aotuotula ta Pita,* vara

14:26: 1 Ko 12:8-10. **14:29:** 1 Tes 5:21. **14:34:** 1 Ko 11:3; 1 Tim 2:12. **14:37:** 1 Jon 4:6.

15:3: Ais 53:5-12. **15:4:** Mat 12:40; Apos 2:24-32. **15:5:** Luk 24:34; Mat 28:16-17. * **15:5:**

Pita Tale inangari nge Grik, Kepas.

me apostolo kasangaulu ghalua (12) laghe taraiela. ⁶ Emulina ghe aotuotula ta lo atoa oroiaaira elaulau ghalima ai (500), oroi lo atoa etaira ila tokatoka maulue ila, me katoa ngila ghe asekanuela. ⁷ Ghe aotuotula ta Jeimis, vara me ta ila akapa apostolo atoa. ⁸ Airuuruu etaira akapa ghe aotuotula etaghi, nongina va lo ateva ghe tam ghaa nauna tani lutu.

⁹ Aghi airuuruueili ieghi ta apostolo atoa, karika masina tani koloaghi va apostolo ieghi, poli aghe gheelei saasakiaa alena ale manga ateva God. ¹⁰ Me tale maamasinaane ateva God, ngaghe aghi evalua oia. Maamasinaane ateva etaghi karika ghe nim peisaanela, poli auungu aanasaaili ta ila akapa disaepolo atoa, me karika va aghi, ta maamasinaane ateva God etokatoka aitaaua teeieghi. ¹¹ Liuna avalua o me, marova aghi o mene katoa apostolo laghe ppooaala etaimim, ami ekapaaili ami ghe poppooa isaa o masi kiukiu, me am ghe aikaiaala etana.

Aue ita totu tale nimate

¹² Me marova ami poppooa va Karisto ghe totula tale nimate, vaalua me katoa etaimim la ue va taumattu matena karika aue la totu? ¹³ Marova taumattu ngatoa matena ila la tam totu, Karisto ghe tam totula. ¹⁴ Marova Karisto ghe tam totula, unemami nippooa nim peisaane, tee me uneimim niaikaaiaa. ¹⁵ Marova koronna va matena atoa la tam totu, God karika ghe totula Karisto. Me ami apostolo atoa ngami aikamea tee God, poli ami ue va God ghe totula Karisto tale nimate. ¹⁶ Poli marova matena atoa la tam totu, Karisto karika ghe totula. ¹⁷ Me marova Karisto ghe tam totula, uneimim niaikaaiaa nim peisaane, me tee kaluimim ssavoto karika ghe kapa. ¹⁸ Me lo atoa la ghe aikaiaa ta Karisto me laghe matela, ang ghe rau laalaa liulala. ¹⁹ Marova ita aatoka tuutuliita ta Karisto tale ie nonga oia maulue ateva, aalousiusiaaita namungaili ta mene katoa taumattu.

²⁰ Me koronna va Karisto ghe totula tale nimate, mata ngemue ia tale lo atoa laghe matela. ²¹ Poli kateva taumattu ghe gheleila me nimate ateva ghe mae sio, nitotu eteae tale nimate tee ghe mae sio tale kateva taumattu. ²² Poli mausi Adam ita akapaaili aue ita mate, me mausi Karisto aue ita maulue. ²³ Tale nauira taumattu ngatoa tani totu, ila akapaaili aue la totu me la maulue. Karisto ghe aitiutiula, me nau emene mae, lo atoa kapuna ila aue la mene totu. ²⁴ Vara me eturungi ekapaaili tau ngai toitoi etoa me lo atoa matuutuliena ila me sarasarakana atoa, me airuuruu aue emae, me aue etau lao ararimangalina ateva ta Tamane ta God. ²⁵ Poli God ghe nnaala va Karisto aue eaitoiaa voto akapa nongina kingi eteva, lomosina ta nau God etau sio ila akapaaili tau ngai ssateena atoa euu. ²⁶ Me airuuruu eteva tau ngai ssateita aue eturungia, nimate ateva. ²⁷ Poli Uru ngai Manga ateva eue va, God “ghe tau lao sio sarasarakana tale Natuna ateva Taumattu ngateva tani aitaraa voto akapaaili.” Nau eue va “isaa akapaaili voto,” karika va God tee epona liu, ia o ghe taula voto akapaaili ta Karisto tani aitoiaa. ²⁸ Nau isaa akapaaili o voto ange tokala tale sarasarakaniaane Natuna God, ia aue emene toka euu tale sarasarakaniaane Tamane, poli ia ghe taula isaa akapaaili voto etana tani aitoiaa. Me God aue eaitara ngakapaaili isaa akapa voto.

²⁹ Marova karika teva nitotu tale nimate, taumattu ngatoa laghe ghaala niasuu poli la taatara lao emua ta nau eteva matena atoa aue la totu, sa ateva aue la gheleia? Vaalua me la ghe ghaala niasuu marova matena atoa karika aue la totu? ³⁰ Me ta ngetaimami, vaalua me ami aatokaiemami tale

15:7: Apos 1:3-4. **15:8:** Apos 9:3-6. **15:9:** Ips 3:8; 1 Tim 1:15. **15:10:** 2 Ko 11:23. **15:21:** Rom 5:12. **15:23:** 1 Tes 4:16; Aotu 20:5. **15:25:** Mat 22:44. **15:26:** Aotu 20:14. **15:27:** Sams 8:6. **15:30:** Rom 8:36.

nivakovako nau ekapaaili? ³¹ Kapughu etoa, asousou nimate nau ekapaaili! Am rooroo tani kila va isaa o inangari koronna, nongina koronna va atautau sae nannaaghi tale sa ateva Vauita ateva Iesu Karisto ghe gheleiela etaimim. ³² Marova aghe aiuvii teela sesa taumattu ngatoa ila nongina ueli ghaata kkena atoa eIpires me karika aghe taatara lao tale nitotu tale nimate, sa ateva aue aghaaia? Marova taumattu etam totu, “Ita roo tani namanama me ita ropi, poli nimanaa aue ita mate.”

³³ Am rau mene aikameainam: “Am rau mene aipatolaa tee sesa taumattu ngatoa, poli aue la ghelei saasakiaa masi gheleiaaimim.” ³⁴ Am mene mae tale masi ninannaa, me am ruu tani ghelei ssavoto. Aghaaulia ngavalua o poli katoa etaimim karika am kilakila God. Aghaaulia ngavalua o tani apalataiem.

Nau ita totu vilikiita aue isaa ppae

³⁵ Me katoa aue la kolomi va, “Vaalua aue taumattu ngatoa matena ila la totu? Me vilikiira aue vaalua?” ³⁶ Am rau mene alokapakapa. Sa ateva am pasapasaia karika erooroo tani mauue, ta etani mate me auena epinosa. ³⁷ Me nau upasapasaia, karika upasapasa namu ngateae ai, ta upasapasa katu ue ngai nongina katu kone me mene kasina voto. ³⁸ Me God etautaula vilikina ange annala va etauela etana, me kateva kateva tana katu ue ngai epiipinosa tale katuna ateva. ³⁹ Isaa akapaaili viliki karika va isaa aitauaa. Taumattu ngatoa uneira kateva ase viliki, me kko atoa uneira kateva, me ghaata kkena atoa uneira kateva, me ghila atoa uneira ateva ppae. ⁴⁰ Viliki ngelomarase kasina, me kasina, viliki tale kosa ateva oia. Viliki ngelomarase ateva, masi aimolumoluna isaa ppae tale masi aimolumoluna viliki tale kosa ateva. ⁴¹ Sinaka ateva unna kateva ase aimolumolu, me ulana ateva unna kateva, me katto atoa uneira ppae tani aimolumolu, me elome tale kateva kateva katto, aimolumoluiria isaa ppae tale mene kasina katto.

⁴² Aue nim nongina avalua o nongina matena atoa nau la totu. Viliki eteva laghe kaieiniela tale kosa nongina la pasapasa katu ue ngai eteva, aue emauu, me nau etotu tale nimate, karika aue emene mate. ⁴³ Ia o vilikiita ateva karika masina ia, me karika sarasarakana ia, aue emasina me esarasarakana nau etotu. ⁴⁴ Ia o vilikiita ateva laghe kaieiniela, viliki tale kosa ateva oia, me nau ita totu aue ita totu eitauaa tee viliki ngepona liu eteva. Vilikiita ateva masina ia ita tokatoka teeia ghaine tale kosa ateva oia aue ekapa, me lo ateva vilikiita aue ita totu teeia, aue emasina tani toka epona liu.

⁴⁵ Laghe pitila tale Uru ngai Manga va, “Aitiutiu eteva taumattu ta Adam God ghe gheleiela me ghe mauuela,” me Karisto, la kolokoloa va airuuruu eteva Adam, ia spiriti ia etautau mauue. ⁴⁶ Lo ateva ghe mae akasina sio, viliki tale kosa ateva ia, vara me mina viliki ngepona liu eteva, Karisto etana, mauue ia. ⁴⁷ Ta aitiutiu eteva taumattu ghe mae sio tale au tale kosa ateva oia, me aiaaghalua ateva taumattu, Karisto etana, taumattu ngepona liu ia. ⁴⁸ Taumattu tale kosa ateva oia, vilikiita ateva nongina taumattu ngateva God ghe gheleiela tale au tale kosa ateva oia, me taumattu ngepona liu etoa, vilikiira nongina taumattu ngepona liu eteva. ⁴⁹ Nongina ghaine ita nongina taumattu tale kosa ateva, liuna avalua o me auena aue ita nongina taumattu ngepona liu eteva.

⁵⁰ Kapughu etoa, aghaauliaa etaimim va malatauata ateva me raeita ateva karika lalu rooroo tani kupi sso epona liu. Karika ita rooroo tani toka epona liu tee vilikiita ateva erooroo tani mate, poli karika righi nimate epona liu. ⁵¹ Am nongo, aghaauliaa etaimim voto aisuliaane: Karika va ita akapa aue ita asekanua, ta ita akapaaili aue ita aikolikoliaa nau Karisto emae. ⁵² Aue elutu arovaeangaili nonga, nonginaaili va mata ateva eapeepere, nau airuuruu eteva taue eaangari. Poli taue ateva aue eaangari me matena atoa aue la totu, karika aue la mene mate, me aue ita aikolikoliaa. ⁵³ Poli vilikiita ateva matena ia me mauuna ia, aue aikolikoliaa me ita ghaa lo ateva viliki karika aue eroo tani mate me emauu. ⁵⁴ Nau isaa o voto elutu, me inangari laghe pitila tale Uru ngai Manga ateva aue ekورونا va, “God ghe apalala me ghe turungila nimate ateva.”

⁵⁵ “Nimate ateva, eaa aloi sarasarakaniaam, me eaa aloi mammarikana utautau lao ta taumattu ngatoa?”

⁵⁶ Mammarikanaane nimate ateva ssavoto ia, me sarasarakaniaa ssavoto ateva inangari nipaopao. ⁵⁷ Liuna avalua o me ita kaili emasinaaili ta God ta ghe tau mae sio etaita niapala tale uunguaa nimate me ssavoto, ta kapuita namu ngateva ta Iesu Karisto.

⁵⁸ Liuna avalua o, kapughu etoa, am tingina akorokorongana. Am rau mene tau velu righi voto va eakatungiem. Am tau lao maamauluaaimim tale uunguaane Vau ngepona ateva, poli am kilakila va isaa o niuungu am ghelei ta Vau ngepona ateva karika nim peisaane.

16

Tani ghaa viliki veu uneira kapuna atoa God eJerusalem

¹ Me tale viliki veu am ghaaghaa aitauaa uneira kapuna taumattu ngatoa God eJerusalem, am aimuli tee sa ateva aghe aulieinie lao sio tale ale manga atoa tale provinsi eteva eGalaisia va la gheleia. ² Tale aitiutiu eteva nau, tale uiki ekapaaili, kateva kateva etaimim ealokoi ppae righi viliki veu tale sa ateva eghaaghaaia, me ealokoi eitauaa. Me nau amae, karika aue am mene toka paepae viliki veu. ³ Me nau arekata, am suitoongaa righi taumattu la sau kaluimim viliki veu me la saea eJerusalem. Me aue asungi taula lao tee me uru ngai etikirighi tani apasunga va am, am ghe sungilala. ⁴ Marova emaamasina va aghi tee alao eJerusalem, aue la kasu eitauaa teeieghi.

Nannaane Pol tani kasu

⁵ Aue alao mua tale provinsi eteva eMesedonia, me auena amae taraiem, poli aghanna tani lao mua eMesedonia. ⁶ Nau akasu eMesedonia me amae taraiem, koti aue atoka teeiem mua lomosi ta eghaa nau kuukuu eteva* ekapa, ta aue eaa aghanna tani lao aue am roo tani sausieghi tale viliki veu me ghinna. ⁷ Arova amae taraiem me auena alao eMesedonia, aue nau tani toka teeiem etukunaaili, me karika aghanna tani toka teeiem tale tukuna nau. Aghanna tani mae toka teeiem tale oroi nau, marova Vau ngepona ateva ealoanna. ⁸ Me aue atoka oia eIpises lomosina ta nau Pentikos eruu, ⁹ poli salana tani uunguaa masi niuungu ang ghe otila etaghi, arongona ta oroeili taumattu ngatoa la tootoonga tani ghelei rungainieghi.

15:51: Mat 24:31; 1 Tes 4:15-17. **15:53:** 2 Ko 5:4. **15:54:** Ais 25:8. **15:55:** Osea 13:14.

15:56: Rom 7:13. **16:1:** Rom 15:25-26; 2 Ko 8:1-9. **16:5:** Apos 19:21. **16:6:** Rom 15:24.

* **16:6:** nau kuukuu eteva Nau kuukuu eteva eghaaghaa kotolu ulana, taumattu ngatoa karika laghe aikasuaa tale paamanu eteva, poli ttasi kuukuu eteva ghe naanamuu. **16:9:** Apos 19:8-10; 2 Ko 2:12.

¹⁰ Me marova Timoti emae, am aitarainia me erau mene matauta righi voto nau etokatoka teeiem, poli eghelei uunguaane Vau ngepona ateva, nongina aghi. ¹¹ Liuna avalua o me karika toa la mene ratia. Am sausia va ekasu tale luei me emene mae taraieghi. Atoitoia va emae tee mene katoa tau ngaiesoaa.

¹² Me kapuita ta Apolos, aghe aippooaa teeia tani asarasarakanaia va emae taraiem me mene katoa kapuita la mae aitaaua teeia. Me ghe tam aloannala tani mae tale isaa oia nau. Aue emae tale nau eannaa va masi nau tani mae.

¹³ Am paniem me am tingina akorokorongana tale niaiesoaa. Am rau mene matautu me am korokorongana. ¹⁴ Am ghelei voto akapaaili tale niaielousi.

¹⁵ Am kilakila va Stepanas me kapuna atoa tanganuena, ila akasina laghe aitiutiula tani aiesoaa tale provinsi eteva eAkaia me laghe taula maamauluaaira tani sausi kapuna taumattu ngatoa God. Aghaaulia ngakorokorongana etaimim, kapughu etoa, ¹⁶ tani nongo usilaa isaa o ase taumattu nongina ila me am ghelei evalua o ta mene katoa la uungu aanasa teeila. ¹⁷ Aghe masimasila nau Stepanas me Potunatus me Akaiakus laghe kasula ona eKorint me laghe rekatala oia eIpises, poli karika iem me ila laghe ghaala liuimim tani sausieghi. ¹⁸ Poli laghe akorokonganala maamauluaaghi nongina laghe gheleila etaimim. Ia o ase taumattu ngateva am rooroo tani oneoneainia.

¹⁹ Ale manga atoa elome tale provinsi eteva eEisia, laghe suula masimasiaaira etaimim. Akuila me vausenna ta Prisila tee me taumattu ngatoa tale ale manga atoa la veluvelu eitaaua tanganueirarua, laghe suula masimasiaaira tale ararina atea Vau ngepona ateva. ²⁰ Ila akapaaili kapuita atoa oia, laghe suula masimasiaaira etaimim. Am sou kateva kateva etaimim tale niaielousi.†

²¹ Airuuruu tale uru ngai etikirighi oia, aghi Pol, tale nimaghi tuunga atelange aghe pitila isaa oia masimasiaaghi.

²² Marova teva etam ailousiaa Vau ngepona ateva, nikasikiena aue etoka etana. Mae sio o, Vau ngepona ateva!‡

²³ Alooosae va maamasinaane Vau ngepona ateva ta Iesu aue etoka aitaaua teeiem.

²⁴ Asuusuu aatu aielousiaaghi ta lo atoa etaimim am elome ta Iesu Karisto. Koronna.

16:10: 1 Ko 4:17. **16:11:** 1 Tim 4:12. **16:12:** 1 Ko 3:6. **16:15:** 1 Ko 1:16. **16:19:** Apos 18:2, 18, 26. † **16:20:** Tale inangari nge Grik, tale niaingusu eteva manga ia. **16:22:** Gal 1:8-9; Aotu 22:20. ‡ **16:22:** Pol ghe pitila tale inangari nge Aramaik, *Marana tha*, malloeana va “Mae sio o, Vau ngepona ateva.”

Aiaaghaluene atikirighi uru ngai Pol ghe pituela ta aKorint atoa Inangari emuemua

Pol ghe pitula 1 Korint, me avirina ghe kasu tani laa tara ale manga ateva eKorint. Karika masau, katoa tau ngai aapasunga laghe mae sio eKorint, me laghe uela va ila apostolo tuungi ila, me Pol karika. Tau ngaiesoa ngatoa eKorint laghe aipolaii etokala tale isaa o voto. Pol ghe piti emuemuela mene katikirighi uru ngai, me avirina ghe suula Taetas tani lao eKorint tani tara va ale manga ateva ang ghe aikolikoliaala o karika. Emulina, ghe pitula uru ngai etikirighi ia oia, ta 2 Korint, vara me ghe lao sio eKorint, me ghe saela eJerusalem. Ia o airuuruu eteva nau ta Pol tani asa eKorint.

Ta 2 Korint, Pol ghe aulia ngakorokorongana va ia matuutuliena ia poli ia apostolo tuungi ia. Ghe pitula inangari niloeloe tale viliki veu laghe ghaaghaa aitaaua tani sausi tau ngaiesoa ngatoa la tuutukuna tale voto eJerusalem, me ghe auliaala vaalua ghe aielousiaa tau ngaiesoa ngatoa eKorint.

Tani kila amuemua

Aitiutiu tale inangari *1:1-11*

Pol me nannaane tani lao eKorint *1:12-2:13*

Uunguaane Pol va apostolo tuungi ia *2:14-7:16*

Viliki veu laghe ghaaghaa tani sausi aJerusalem atoa *8:1-9:15*

Pol me apostolo atoa la ue va ilaaili ila apostolo ila *10:1-13:10*

Airuuruu tale inangari *13:11-13*

¹ Aghi, Pol, kapuna apostolo ieghi Iesu Karisto, me tale aloannaane God, me kapuita ta Timoti,

Angalu pitipiti mae ona tale alena ale manga ateva God eKorint me tale ila akapa taumattu ngatoa la aikaaiaa ta God la tokatoka akapa see tale provinsi eteva eAkaia.

² Alooloo sae va maamasinaane me luei ekasukasu ta God Tamaita ia me Vau ngepona ateva Iesu Karisto aue etoka teeiem.

Pol ghe kaili emasinala ta God

³ Ita tau sae God, kapuna Goto ia me Tamane ia Vauita ateva ta Iesu Karisto. God ia Tamaita ia, pasueili ia tale nialousiusi me etautau mae sarasarakana tale sesa nau etoa. ⁴ Ia etautau mae sarasarakana etaimami tale nau ekapa atoa nau ami tokatoka tale maate, liuna avalua o me ami roorroo tani mene sausi katoa la tokatoka tale sesa nau tee. Ami aisausieinila tale isaa o sarasarakana God ghe tau mae sio etaimami. ⁵ Poli mausi nimmarikana Karisto ghe ghaala, ami tee ami ghaaghaa, me tale ia o salana atikirighi, Karisto etautau atu sarasarakana etaimami. ⁶ Poli nau etoa ami aateatea maate tale maamauluaaimami, isaa o voto aue etau aatu sarasarakana etaimim lomosina ta eghaa nau easaangiem. Me nau ami ghaa sarasarakana, isaa o sarasarakana aue esausi teeiem me aue etau aatu nitingina akorokorongana tale voto maate nongina ami, ami ghe ateateaala. ⁷ Ami kilakila va am ghaaghaa nimmarikana nongina ami me aue am ghaa tee niaisausi nongina ami, liuna avalua o me nannaaimami etaimim sarasarakanaaili.

⁸ Me tani kila amasina isaa o voto, tueghi me nengaghi etoa, ami aaloanna va am kila maate me mmarikana ami ghe ghaala tale provinsi eteva eEisia. Namungaili me maateaili voto laghe saoaala tale maamauluaaimami me karika ami ghe roola tani sau, me ami ghe annangaili teela va aue ami ghe mate. ⁹ Me tee, ami ghe ateateaala va laghe uela va aue ami mate. Poli va llo ghe lutula, ami ghe tara kilala va ami rou mene atoka tuutuliimami etaimami, ta ami atoka sae nonga ta God, ia etottotu taumattu matena. ¹⁰ Ta elome tale salana nimate, ia nonga ghe asaangiemamila me aue emene asaangiemami nau ekapa atoa. Isaa avalua o me ami aatoka tuutuliimami etana va ia aue emene asaangiemami, ¹¹ nongina am saausiemami tale kaluimim nilooloo sae. Oroi ila lo atoa aue la kaili emasina poli niarangise aue ami ghaa tale ailiuliu tale kaluira nilooloo sae.

¹² Tale nannaaimami ami kilakila va voto akapa ami ghe gheeleei tale kosa ateva oia, ami ghe gheeleei voto koronnaaili me masalikeaili ghe maemae ta God. Isaa o voto ami ghe gheleila etaimim tee, me ami saasaeaa nannaaimami. Ami ghe gheeleei isaa o voto tale maamasinaane God me karika va tale aalomasaangianaane kosa ateva. ¹³ Poli karika ami pitipiti voto aisulianna am tam rooroo tani riti me kila malloeana. Me aghaaiesoaa va aue am kila amasina ¹⁴ saa llo voto karika am ghe kila amasinala, me tale nau eteva Vau ngepona ateva Iesu aue emae etana, aue am saeaa nannaaimim nongina ami, mausiimim me ami saasaeaa nannaaimami.

Pol ghe aikolikoliaala nannaane tani lao eKorint

¹⁵ Poli aghe kilakilaaili isaa o voto, liuna avalua o me aghe nnaala tani mae taraiem mua me aue am roo tani ghaa niarangise ghaluaata. ¹⁶ Aghe nnaala tani mae taraiem me auena alao tale provinsi eteva eMesedonia me nau akiriaa, aue am sausieghi me alao tale provinsi eteva eJudia, me karika aghe mae sio. ¹⁷ Liuna avalua o me, nau aghe nanna llo oia me karika aghe gheleila, am annaa va karika aghe nanna ngamasinala? Karika! Nau agheeleei nannaaghi, karika agheeleei nongina taumattu tale kosa ateva, va eue ta paane va, “Ue, ue,” me nannaane va, “Karika, karika,” ta agheeleei tale aloannaane God.

¹⁸ Me nongina God egheeleei voto eue va aue egheleei, inangari ami poppooaa etaimim, karika ami ue va “Koti”. ¹⁹ Ta Iesu Karisto Natuna ia God, aghi, Saelas me Timoti angotolu ghe ppooainiela me karika va ami aakotikotia, me ta ngetana isaa akapaaili voto eaauliaa eue va “Ue” nonga. ²⁰ Ta ngetana isaa akapa inangari nialokoi egheeleei “Ue” nonga, me ta ngetana ita ue va, “Aloannaam aue elutu,” tani tau sae God mausi voto ita gheeleei. ²¹ Am tani nnaa va God nonga ghe gheleitatala tani tingina akorokorongana ta Karisto. Me ia God ghe suitoongainitala ²² me ghe aimatoongainitala va kapuna ita God, me ghe atokala kapuna Spiriti eteva tale urunguitaniita tani apasunga va auena emene gheleei roorooaa voto ange tiuaala.

²³ God erooroo tani ue va inangarighi aghaauliaa koronna: karika aghe oghi lao sio eKorint ta poli karika aghe aloannala va aghauliaa inangari sarasarakanaaili va ghe maate tale maamauluaaimim. ²⁴ Karika ami aaloanna va ami, ami sulungiem tale uneimim niaikaaiia. Ta sarasarakana iem tale niaiesoaa me nim tau ngai uungu iemami tani uungu eitauaa teeiem tale masimasiaaimim.

1:8: Apos 19:23; 1 Ko 15:32. **1:10:** 2 Tim 4:18. **1:14:** 2 Ko 5:12; Plp 2:16. **1:16:** 1 Ko 16:5-6.
1:19: Apos 18:5. **1:20:** Aotu 3:14. **1:22:** Ips 1:13-14; 2 Ko 5:5. **1:24:** 1 Pita 5:3.

2

¹ Poli aghe nnaala va arau mene oghi mae ta ita rau alousiusi. ² Ta marova aghi agheleiem va am alousiusi, see aue egheleieghi amasimasi? Ta am nonga o taumattu ngatoa aghe ghelei alousiusiema, am ghelei emasimasieghi. ³ Liuna avalua o me aghe pitila uru ngai etikirighi etaimim. Karika aghanna va amae etaimim va am gheleieghi va aghalousiusi, ta am nonga am ghelei emasimasieghi. Aghe atokala tuutulighi etaimim akapaaili va nau eteva amasimasi, am tee am masimasi. ⁴ Arongona ta aghe pitipitila etaimim tee kinatama nialousiusi me ninannaa maate, me oroi rarum mata, karika aghe pitipitila tani gheleiem va am alousiusi, ta aghe anna va am kila vaalua aghailousia ngakapaailiem.

Am apasunga niaielousi ta lo ateva ghe ghelei saasakiaala

⁵ Arova teva ghe gheleieghila va aghe alousiusila, karika va ghe ghelei nongala etaghi ta ghe ghelei ekapala etaimim. (Karika aghanna va aghauliaa oroi inangari sarasarakanaaili etana.) ⁶ Ang ghe roola maate oroi iem lo atoa am ghe taula ta ia o taumattu ngateva. ⁷ Isaa oia nau, am kkaluaa voto ghe gheleila me am ppooa ngaisausia tale masi nitoka tani tingina akorokorongana poli erau alousiusiaili me erau oghi vulu masi niaikaaila. ⁸ Liuna avalua o me aghaakorokoronganaiem va am mene apasunga etana va am ailousiangailia. ⁹ Koronna, aghe pitila uru ngai etikirighi poli aghe anna tani kila va am aimuli tee inangarighi ekapa, o karika. ¹⁰ Me nau am kkaluaa voto kateva eghelei, aghi tee akkaluaa voto eghelei etaimim. Me nau aghe kkaluaa, marova righi voto tani kkaluaa, aghelei lao ta matane Karisto mausiimim. ¹¹ Aghelei llo poli aghanna va am akekkeliem ta Satana, poli ita kilakila voto eanna tani ghelei etaimami.

Pol ghe anna tani tara Taetas

¹² Nau aghe rekatala tale masaliki taatara atea eTroas tani ppooa masi kiukiuna Karisto, arongona ta aghe tarala va Vau ngepona ateva ghe otila salana tani uungu tee kapuna atoa okae, ¹³ me aghe alousiusiaili poli karika aghe tarala kapughu ta Taetas. Liuna avalua o me aghe akorovailala me aghe lao sio eMesedonia.

Tau ngai uungu etoa tale ouna ateva inangari niaippooa ngaitauaa

¹⁴ Me akaakaili emasina ta God, poli nau ekapa atoa God emueiniemami nongina va kapuna karavusu iemami tani apasunga va Karisto ghe apalala tau ngai ssateena atoa. God euungu etaimami tani ghelei masi kiukiuna Iesu Karisto elao akapa see nongina voto ateva masi ngusungusuaane. ¹⁵ Poli ami nongina voto ateva masi ngusungusuaane Karisto eghelei esae ta God me elaolao akapa see ta lo atoa etaita ita ghe saangala me lo atoa ngila raarua. ¹⁶ Ta lo atoa la raarua, lo ateva o nei, nongina nei nimate ateva aue eamatela. Me ta lo atoa laghe saangala, lo ateva o nei nongina maulue ateva aue etau lao maulue ateva. Me karika teva taumattu eroroo tani ghelei isaa o niuungu. ¹⁷ Poli ami karika nongina mene katoa la poppooa inangarina ateva God tani ghaa viliki veu. Ta Karisto ami poppooa ngakoronna inangarina ateva God nongina va lo atoa taumattu God ghe sungilala, me tale ninannaa raarangisana, me ami kilakila va God etaataraimami.

3

¹ Am annaa va ami mene tiitiuaa tani asaesae arariimami? Karika. Katoa la annaa va la ghaa mae uru ngai etaimim tani apasunga va Karisto ghe sungilala, o la annaa va am piti uru ngai ta mene katoa. Me ami karika. ² Am uneimami uru ngai iem laghe pitiemla tale urunguitaniimami va taumattu ngakapa atoa la riti me la tara kila. ³ Me am nongina uru ngai etikirighi Karisto ghe pitiela me ghe pitiela tale niuungu ami gheeleei. Karika ghe pitila tale ingki ta tale Spiriti eteva kanna ia God ateva tokatoka liu ia, me karika ghe pitiela tale atu nongina inangari nipaopao ta tale urunguitani taumattu.

⁴ Ami auliaa llo poli, ta matane God, ami kilakila va tale niuungu ami ghe gheleila etaimim, Karisto ghe gheleila. ⁵ Karika ami rooroo tani ue va muenna iemami tani ghelei isaa oia niuungu, ta nimuenna ekasukasu ta God. ⁶ Poli God nonga ghe gheleiemamila ami ghe muennala tani tau ngai uungu tale ouna ateva inangari niaippooa ngaitauaa, karika pitipiti ia tale inangari nipaopao ta tale Spiriti, poli inangari nipaopao eamate taumattu, me Spiriti eteva etautau mae maulue.

Mallangina ouna ateva inangari niaippooa ngaitauaa

⁷ Nau eteva God ghe tau lao sio inangari nipaopao laghe pitila tale atu, ghe asaesaela ararina atea me mallangina etana. Arongona ta mallanga ateva ta matane Moses karika ghe toka liula, me taumattu nge Israeli etoa karika laghe rooroo tani pasiaa mataira ta matane Moses. Inangari nipaopao etautau mae nimate ghe mae aitauaa tee sio namungaili sarasarakana me mallanga. ⁸ Me koronnaaili va maamallanganiaane niuungu kanna Spiriti eteva erooroo tani lau isaa o voto. ⁹ Poli arova ia o salana atikirighi tale uunguaa niaisakei namuu ia, niuungu tani asaangi elaulau ekapa isaa o voto. ¹⁰ Ita rooroo tani ue va maamallangiaa isaa oia niuungu ghaine, elaulau maamallangiaa isaa o niuungu ang ghe lao sio. ¹¹ Inangari nipaopao ghe mae sio emua arau tee mallanga ateva karika ghe toka liula. Me ouna ateva inangari niaippooa ngaitauaa ghe mae tee sio mallanga namungaili, poli karika aue ekapa.

¹² Liuna avalua o me poli ami aatoka tuutuliimami tale isaa o inangari me karika ami maamatautu tani ppooaa. ¹³ Karika va ami nongina Moses ghe akou rungaala matane poli taumattu nge Israeli etoa laghe rau tara ia o mallanga ateva karika ghe toka liula. ¹⁴ Nannaaira karika masalike. Emaemae tee tale isaa oia nau, nau eteva la ritiriti pokane ateva inangari niaippooa ngaitauaa, arova tuku kalio ateva eaakou runga mataira me karika la alomasaanga. Ia o tuku kalio ateva, ta Karisto nonga ekapakapa. ¹⁵ Nongina isaa tee oia, nau la ritiriti kanna inangari nipaopao Moses, o me tuku kalio ateva eaakou runga urunguitaniira. ¹⁶ Me marova lo ateva elao ta Vau ngepona ateva, Vau ngepona ateva aue eghaa velu tuku kalio ateva eaakou runga matane. ¹⁷ Isaa avalua toko va, Vau ngepona ateva Spiriti ia, me eaa Spiriti eteva kanna ia Vau ngepona ateva etokatoka, karika righi voto erooroo tani ghelei rungainia. ¹⁸ Ita akapa, karika righi kalio eaakou runga mataita, ita aapasunga maamallanganiaane Vau ngepona ateva nongina ghalasi eteva me ita aaikolikoliaa tale taataraane egheeleita ita laa saesae tale llo mallanga namuu ekasukasu ta Vau ngepona ateva, ia Spiriti ia.

3:1: 2 Ko 5:12; Apos 18:27. **3:2:** 1 Ko 9:2. **3:3:** Eks 24:12; Jer 31:33; Esik 36:26-27. **3:6:** Jer 31:31; 1 Ko 11:25; Jon 6:63. **3:7:** Eks 34:29. **3:9:** Diut 27:26; Rom 1:17. **3:13:** Eks 34:33. **3:16:** Eks 34:34. **3:17:** Jon 8:36; Rom 8:2.

4

*Masi ghinna elome tale sospena atoa
laghe gheleilala tale kosa*

¹ Tale alousiusiaane ateva, God ghe tau mae sio lo ateva oia niuungu etaimami. Liuna avalua o me karika aue ami sio asoasoa tee ia oia lo ateva niuungu. ² Karika poi ami ghelei eisulia voto etautau mae nipalata me karika ami ghelei voto kamena. Me karika poi ami aikolikoliaa inangarina ateva God. Ami auliaa llo voto koronna ta matane God, me taumattu ngakapa atoa la rooro tani aimasokoiaa me la atoka tuutuliira etaimami. ³ Me marova masi kiukiu ami poppooaa eaaisulia, eaaisulia ta lo atoa ngila raarua, ⁴ karika la ghaaiesoaa, ta vau tapaa kosa ateva eghelei runga nannaaira, me karika la rooro tani tara mallangina masi kiukiu eaauliaa naanamungaane Karisto, ia tootoona ia God. ⁵ Poli karika ami poppooaa gheleiaaimami ta ami poppooaa Iesu Karisto va ia Vau palepale ia, me ami nim kapuimim tau ngai uungu iemami mausi Iesu. ⁶ Ta God ghe uela va, "Mallanga ateva ellaa tale saurrom ateva," me ia ghe gheleila mallanga ateva ghe llaala tale urunguitaniimami tani tau mae mallangina alomasaanga tale naanamungaane God ta matane Karisto.*

⁷ Ami nongina sospena atoa laghe gheleilala tale kosa la kaakaai isaa o masi ghinna, tani apasunga va ia o sarasarakana ateva elaulau isaa akapaaili voto, kanna ia God me karika va kaluimami ia. ⁸ Arongona ta ami ghaaghaa voto maate tale pai ekapa aluevilau, karika etuuturungi maamauluaaimami. Arongona ta kasina nau nannaaimami ekaakatuu, karika ami sio asoasoa. ⁹ Arongona ta la ghelei voto sesa etaimami, karika ami nannaa va God ekasukasu vuliemami. Me arongona ta la tautauemami sio euu, karika la tuuturungiemami. ¹⁰ Nau etoa ami sousou nimate nongina va ami sausau matemateane Iesu. Isaa avalua o me vilikiimami aue eapasunga maamauluaane Iesu. ¹¹ Poli ami maulue iemami, nau etoa taumattu ngatoa la aloanna tani uvi emateamami poli ami aaimuli usi tee Iesu, liuna avalua o me vilikiimami, arongona ta karika tokatoka liunna, aue eapasunga maamauluaane Iesu. ¹² Isaa o voto eaaimatoonga va nimate ateva euungu elome etaimami, me eaalutu maulue ateva elome etaimim.

¹³ Laghe pitila tale Uru ngai Manga va, "Aghe aiesoaa, liuna avalua o me aghe ppoaaala." Tale ie nonga o spiriti niaikaiaa ngateva, ami aaiesoaa, liuna avalua o me ami poppooa ngaotu, ¹⁴ poli ami kilakila va lo ateva ghe totula Vau ngepona ateva Iesu tale nimate, aue etotu teeiemami tale nimate tee Iesu, me aue ami me am aue ita laa toka tee God. ¹⁵ Isaa akapaaili o voto ami ghelei aisausiimim poli ami aloanna va maamasinaane God ekasukasu ekapa see tale taumattu aue eghelei me oroieili lo atoa aue la kaili emasina sae tani tau sae God.

Tani toka tale niaikaiaa

¹⁶ Mausina avalua o me karika ami sio asoasoa, arongona ta vilikiimami ange sessa, me kapumami spiriti eteva ta God elutulutu eouna ta kateva kateva nau. ¹⁷ Poli maate ami ghaaghaa nau ghaine, nim saeokana me karika aue etoka liu, ta la nim ghelei tau mae voto oroieili me masinaaili aue etoka nau ekapa atoa, me nioneoneane etokatoka epona liu elaulau voto maate tale kosa ateva. ¹⁸ Liuna avalua o me karika ami paapasaa

4:2: 2 Ko 2:17; 1 Tes 2:5. **4:4:** Ips 2:2; Kol 1:15; Hib 1:3. **4:6:** Aitiutiu 1:3; Ais 9:2; 2 Ko 3:18.

* **4:6:** Kasina uru ngai laghe pitila, laghe uela va Iesu Karisto. **4:7:** 2 Ko 5:1. **4:8:** 2 Ko 1:8; 7:5. **4:10:** 1 Ko 15:31. **4:11:** Rom 8:36. **4:13:** Sams 116:10. **4:14:** 1 Ko 6:14. **4:16:** Ips 3:16. **4:17:** Rom 8:17-18. **4:18:** Kol 1:16.

mataimami tale voto ami taatara, ta ami paapasiala mataimami tale voto karika ami taatara. Poli voto ita taatara, enim tokatoka tau, me voto karika ita taatara, etokatoka liu.

5

¹ Isaa oia ita kilakila va arova ale kandisi eteva eaaimatoonga vilikiita tale kosa ateva oia ita tokatoka etana etarurruti, mene kateva aleita God ghe gheleiela, lo ateva ale tokatoka liu ia epona liu, taumattu ngatoa karika laghe gheleiela. ² Isaa oia ita alousiusi me ita nannaa poi vaalua arova ita ghele asae ale ngepona liu eteva. ³ Poli nau eteva ita aitiitii, karika aue la tara vilikiita. ⁴ Nau ita tokatoka tale lo ateva ale kandisi tale kosa ateva oia, ita ghaaghaa maate me ita alousiusi poli karika ita anna va ita velu ale kandisi eteva, ta ita anna va ita aitiitii tale ale ngepona liu, me aue vilikiita pei nimate aue eaikolikoliaa me aue emaulue. ⁵ God ghe aimanomanosieinitala mausi isaa oia voto me ghe atokala unna Spiriti eteva tale urunguitaniita tani apasunga va aue ita ghaa lo ateva ale tokatoka liu ia.

⁶ Liuna avalua o me ita aatoka asarasarakana nannaaita, arongona ta ita kilakila va nau ita tokatoka tale lo ateva oia vilikiita, karika ita tokatoka tee Vau ngepona ateva. ⁷ Malloeana avalua o me ita tokatoka tale voto ita aikaaiala etana, me karika va tale voto ita taatara. ⁸ Ita aatoka asarasarakana nannaaita me ita masimasi tani ghaa velu ia oia vilikiita ateva, me tani laa toka aitauaa tee Vau ngepona ateva. ⁹ Liuna avalua o me kinatama nannaaita ateva tani amasimasia nau etoa, nau ita tokatoka tale kosa ateva oia o auena tee Vau ngepona ateva. ¹⁰ Poli ita akapaaili aue ita tingina emua ta Karisto nongina liu niaisakei eteva me eghelei niaisakei etaita. Ita akapa aue ita ghaa aipolipoli erooa niuungu ita ghelei nau oio, masina o sesa, ita uunguaa tale kosa ateva oia.

Uunguaa tani gheleita tani kateva nonga

¹¹ Liuna avalua o me poli ami kilakila vaalua malloeana tani oneonea Vau ngepona ateva, me ami tootoonga tani pasali taumattu ngatoa tani aiesoaa God ghe sungiemamila. God ekilakilaailiemami me tale urunguita etaimim, aghaiesoaa va am tee am kilakilailemami. ¹² Karika va ami nim aasaesae arariimami etaimim, karika! Ta ami tautau aatu inangari niaisausi, me aue am rooroo tani liu inangariira taumattu ngatoa la tautau sae nannaaira tale voto la taatara etaira, me karika va tale urunguitaniira. ¹³ Arova ami ghelei voto tale taataraimim alokapakapanna, ta taataraane Vau ngepona ateva masina; arova nannaaimami masina tale taataraimim, ami ghelei evalua o mausiimim. ¹⁴ Poli aielousiaane ateva Karisto ia emuemueinamami, poli ami kilakila va kateva nonga ghe matela mausi tani sausi ekapaailiita, liuna avalua o me ita akapa ita ghe matela. ¹⁵ Me ghe matela mausi tani sausi ekapaailiita, liuna avalua o me lo atoa maulue ita ghaine, karika ita tokatoka tani amasimasita, ta ita toka tale lo ateva ghe matela etaita me ghe mene totula tale maulue mausiita.

¹⁶ Isaa oia me nau too, ita tani anna ngamasina me karika ita mene ghelei niaisakei tale taumattu nongina taumattu tale kosa ateva oia. Arongona ta emua arau ita ghe anna ngavalua o ta Karisto, me isaa oia karika. ¹⁷ Isaa avalua o me arova lo ateva etokatoka ta Karisto, ia emene oouna. Me voto pokane ang ghe kapala, me ouna ang ghe mene lutula etana! ¹⁸ Isaa

akapa voto oia kanna God. Ia ghe atokala luei ta ngetaita me God tale uunguaane Karisto me ghe tau mae sio niuungu etaimami tani mene atoka luei ta taumattu ngatoa me God. ¹⁹ Inangariimami va God ghe atokala luei ta taumattu ngatoa tale kosa ateva oia me ta God tale uunguaane Karisto. God karika emene annaa kaluira ssavoto atoa. Me ghe tau mae sio etaimami isaa oia niuungu tani ppooaa inangari luei.

²⁰ Isaa avalua o me Karisto ghe sungiemamila tani aippooaa poli mausina, poli nau ami aippooaa etaimim, nonginaaili va God ekolokoloam. Ami mene aippooa ngasarakanaaili etaimim tale ararina atea Karisto: Am tani toka tale luei tee God. ²¹ Karisto karika righi kanna ssavoto me God ghe gheleuela va ie tee etoka elome tale uunguaa ssavoto ateva. Ghe ghelei evaluela o poli ghe aloanna va tale uunguaane Karisto, aue ita ghulughuluena ta God.

6

¹ Poli ami uungu tee God,* liuna avalua o me ami aloannaailiem tee va maamasinaane ateva am ghe ghaaiela, erau nim peisaane. ² Nongola saa llo God eauliaa,

“Naughu tani apasunga maamasinaaghi etam aghe nongoola,
me nau ghe ghaala naughu tani asaangio aghe sausiola.”

Am nongo! Ia oia tuku nau erighi, nauimim tani ghaa maamasinaane ateva God. Ghaine nau eteva tani ghaa niasaangi.

Pol ghe soula maate

³ Karika ami aaloanna va teva etara sesa niuungu tale uunguaaimami. Liuna avalua o, me ami tee ami tootoonga va karika ami mene ghelei runga sala taumattu. ⁴ Tale voto akapa ami tootoonga tani apasunga va ami kapuna tau ngai uungu iemami God. Nau ekapa atoa ami ghe tiitingina akorokorongana nau ami ghe sousou maamatana, mmarikana me sesa nau; ⁵ me nau laghe paruparuemami, me laghe aatokaiemami sso tale ale mata voovoo me laghe aiaoreaa me aikkalui; me nau niuungu maate ami ghe ghaaghaa, me karika ami ghe rooroo tani asekanue eleivoo me karika ami ghe namanama. ⁶ Ami apasunga va ami kapuna tau ngai uungu iemami God tale gheleiaa niraarangisana, me tale alomasaanga, me tani tam sessai parasi, me tani ghelei masi voto, tee Spirit Manga ateva me koronna ateva niaielousi, ⁷ tale poppooaamami koronna, me tale sarasarakaniaane God. Ghulughuluena iemami nongina ghinna niaiuvi tani aiuvii me tani ghelei rungainamami. ⁸ Katoa taumattu la oneoneainamami me katoa karika la oneoneainamami, me katoa la auliaa teiemami voto sesa, me katoa la auliaa masi voto. Arongona ta ami aulia ngakoronna, katoa la ue va tau nikamekame iemami. ⁹ Katoa, karika la kilakilaiemami, me God ekilakilaailiemami. Ami nongina taumattu ngateva ange aloanna tani mate me karika, ta ami maamaulue. Laghe uviuviemami me karika ami ghe matela. ¹⁰ Arongo ta ami ghaaghaa nialousiusi me ami masimasi nau etoa. Karika tue peipeina iemami me ami saasausi oroi taumattu tani ghaa oroi voto tale niaikaaiaa. Taumattu ngatoa la ghannaa va karika peimami, me karika, ta rooroona iemami tale niarangise kanna God.

¹¹ Masi kapumami etoa tale masaliki taatara atea eKorint, ami ghe ppooaala voto koronna etaimim tani apasunga va aielousiaaimami etaimim namungaili. ¹² Karika ami ghe kavatila urunguitaniimami etaimim, ta am, am ghe kavatila urunguitaniimami etaimimi. ¹³ Apoppooaa etaimim

5:19: Rom 3:23-25. **5:21:** Hib 4:15. * **6:1:** ami uungu tee God o, ami uungu teiem. **6:2:** Ais 49:8. **6:5:** 2 Ko 11:23-27. **6:6:** 1 Tim 4:12. **6:9:** 2 Ko 4:10. **6:13:** 1 Ko 4:14.

nongina va natughu iem: Am ghelei nongina ami ghelei etaimim me am tee am oti urunguitaniimim etaimami.

Urau mene toka tee lo atoa karika la aikaaiiaa

¹⁴ Am rau mene toka tee lo atoa karika la aaimuli tee Karisto, poli vaalua, ghulughuluena me sesa lalu rooroo tani lao aitauaa? Me am annaa va mallanga me saurrom lalu kasukasu eitauaa? ¹⁵ Vaalua, am annaa va Karisto me raroai eteva† lalu rooroo tani mae aitauaa tale ninannaa? Me lo ateva karika eaikaaiaa me lo ateva eaikaaiaa, lalu roo tani mae aitauaa nonga tale kateva nonga ninannaa? ¹⁶ Vaalua, alena ale manga ateva God me tootoo goto atoa la rooroo tani mae aitauaa tale righi ninannaa? Karika poi! Aghaauliaa llo, poli ita alena ale manga ita God ateva tokatoka liu ia, nongina God ghe uela va, “Aue atoka aitauaa teeila, me akasu teeila, me aghi aue kapuira Goto ieghi, me ila aue la kapughu taumattu ila.”

¹⁷ Liuna avalua o me, “Vau ngepona ateva eue va: Am kasu vulila, me am toka apolapola, Am rau mene poso voto karika raarangisana me aue aghaiem.”

¹⁸ “Vau ngepona ateva sarasarakanaaili ia eue va: Aue aghi tamaimim etaghi me am aue enatughu iem.”

7

¹ Masi kapughu etoa, isaa akapa masi inangari nialokoi ghe mae sio ta God. Liuna avalua o me ita ghelei eraarangisanaita me ita ghaa velu voto elome tale vilikiita me maamauluaaita kulukulutana, me tokatokaaita etani manga akapa tani oneoneaa God.

Masimasiaa Pol

² Am annaailiemami tale urunguitaniimim, poli karika ami ghe ghelei saasakiaala ta teva, me karika ami ghe ghelei saasakiaala aikaiaaimim, me karika ami ghe kamela teva tani ghaa peina. ³ Karika aghaauliaa llo tani aulia ngaotu va am ghe gheleila righi voto sesa etaghi. Nongina ngaghe aulia ngakasinala va, am tokatoka elome tale urunguitaniimami, liuna avalua o me arova am mate, ami tee aue ami mate, me arova am sakesake, aue ami tee ami sakesake. ⁴ Karika aghe aisuliaala righi voto etaimim, me atautau sae nannaaghi mausiim. Aisausiaaimim etaghi egheleieghi amasimasi me eaasararakanaieghi me amasimasi nau ami tokatoka tale sesa nau.

⁵ Nau ami ghe lao sio eMesedonia, karika ami ghe ainoana amasinala poli ami ghe toka soaala tale oroieili voto sesa, katoa laghe aissakeana teeiemami, me matautu eteva elome tale rangoimami namungaili ia. ⁶ Me poli God nonga etautau lao sarasarakana ta lo atoa la tokatoka tale nau sesa, ghe tau mae sio sarasarakana etaimami, tee tale reerekataane Taetas. ⁷ Karika va ami ghe masimasiaaala nonga reerekataane, ta kiukiu tee nongina vaalua am ghe asarasakanaiela. Ghe auliaa teela etaimami va am annaaili tani taraieghi, me vaalua aalousiusiaaimim etaghi, me nannaaimim ta ngetaghi namungaili. Liuna avalua o me masimasiaaghi ghe namungailiila.

⁸ Arova uneghi uru ngai etikirighi aghe pitiela ghe gheleiemla va am ghe aalousiusila, karika aghalousiusi tee llo, arongona ta aghe alousiusi nau aghe pitiela. Uneghi uru ngai etikirighi ghe gheleiemla, am ghe

6:14: Ips 5:11. † **6:15:** Tale inangari nge Grik, Belial. **6:16:** 1 Ko 3:16; Lev 26:12. **6:17:** Ais 52:11; Aotu 18:4. **6:18:** 2 Sam 7:14; Jer 31:9. **7:5:** 2 Ko 2:13. **7:8:** 2 Ko 2:4.

alousiusila tale nau karika aluse. ⁹ Me isaa oia amasimasi, karika va poli aghe ghelei alousiusiemla, ta poli alousiusiaaimim ghe gheleiemla, am ghe nna ngaioghioghiaala. Ia o ase nialousiusi eteva kanna ia God, liuna avalua o me karika ami ghe gheleila righi voto sesa etaimim. ¹⁰ Ta llo nialousiusi kanna God, etautau mae ninna ngaioghioghiaa me easaokita lao tale nisaanga. Liuna avalua o me karika am rooroo tani alousiusi, ta lo ateva nialousiusi lo atoa la tam aiesoaa la ghaateateainia, karika etautau mae ninna ngaioghioghiaa, ta etautau mae nimate. ¹¹ Poli am tara vaalua nialousiusi God ghe tau aatu etaimim me ghe gheleila etaimim: am ghe annangailiemamila, me am ghe aloannala tani apasunga va am karika va sesa am, me am ghe ateateaala va aghe nim aliu teeiemla. Me am ghe matautula me am ghe annangailiila, me am aimonomosiaa tani taula sesa aipolipoli ta lo atoa la ghelei sesa. Tale isaa akapa o voto, am ghe apasungaala va am karika righi gheleiaaimim sesa. ¹² Isaa avalua o, me karika aghe pitila uru ngai etikirighi mausi lo ateva ghe gheleila voto sesa, me mausi lo ateva ghe ghaala maate ta lo ateva ghe ghelei teeiela, ta aghe pitila uru ngai etikirighi etaimim tani apasunga ta matane God vaalua maamasinaaimim etaimimi. ¹³ Tale isaa o voto me easarasarakana maamauluaaimimi.

Epona tale isaa o niasarasarakana, tale maamauluaaimimi ami ghe masimasieliila tani tara vaalua Taetas ghe masimasila. Poli am ghe gheleila me ghe akorokorongana maamauluaane. ¹⁴ Aghe arueinamla ta Taetas me karika poi am ghe gheleila nannaaghi va ghe siola euu. Nongina voto akapa ami ghe auliaala etaimim koronna, tale isaa o salana niaruaa, ami ghe gheleila ta Taetas ghe koronnala. ¹⁵ Liuna avalua o me ailousiaane etaimim sarasarakanaaili nau eaannaa va am ghe aimonomosiaala tani nongo usilaa, me am ghe ghaaiela tale nioneoneaa. ¹⁶ Amasimasi ta arooroo tani atoka akapa tuutulighi etaimim.

8

Laghe sausila tau nikkaua ngatoo

¹ Kapughu etoa, ami anna va am kila maamasinaane ateva God, ghe tauae lao sio tale ale manga atoa tale provinsi eteva eMesedonia. ² Nau laghe tokatoka tale nau sesaaili, laghe masimasieli, me karikaaili righi peiira, me laghe aloannaaili tani aiparruu. ³ Poli aghi aghe tarala me aghaauliaa va laghe taula voto laghe roola tani taula me laghe saoa ngaoroi teela mene kasina voto tani taula. Karika teva ghe sungilala va la ghelei. ⁴ Laghe aakorokorongana tani kolomiamimi va ami tau vella tani sausi tee tau ngai kkaua ngatoo eJerusalem. ⁵ Ami ghe soghiaala voto laghe tau mae sio. Laghe taula lao sio mua ta Vau ngepona ateva, vara me etaimimi, nongina aloannaane God. ⁶ Liuna avalua o me ami ghe aulia ngasarasarakana ta Taetas va emene oghi mae etaimim me emae ruu masi niuungu poli ia ghe tiuaala. ⁷ Ngam ghe tue peipeinala tale isaa o voto nongina uneimim niaikaaiiaa namuu, me tale poppooaimim, me tale nialomasaanga, me aloalonnaaimim namungaili tani sausiemimi me tale ailousiaaimim etaimimi.* Tale ia o salana atikirighi am tani sarasarakana tale masi uunguaaimim tani sausi.

7:10: Mat 27:3-5; Hib 12:16-17. **8:1:** Rom 15:26; 2 Ko 9:1-2. **8:7:** 1 Ko 16:1-2. * **8:7:** ailousiaaimim etaimimi Katoa uru ngai laghe pitila, laghe ue va, ailousiaaimimi etaimim.

⁸ Karika va asungisungi errekanaaiem tani taula, ta aghauliaa nongina aMesedonia ngatoa la paaparruu, poli anim anna tani pae aotu va ailousiaaimim ta mene katoa tau ngaiesoaa koronna o karika. ⁹ Poli ngam ghe kilala maamasinaane Vauita ateva Iesu Karisto va ia tue peipeina ia me mausiimim ghe gheleiela me ghe karikala peina, poli ghe aloannala va am aue am tue peipeina poli ia ghe karikala peina.

¹⁰ Tale nannaaghi aghanna va am ghelei evalua toko tale isaa o voto, poli aghaaiesoaa va isaa o llo masi voto tani ghelei. Poli tale lo ateaee too ninamanama ang ghe lao sio, am, am ghe aitiutiula tani tau lao, me tee am ghe aitiutiula tani aloanna tani tau lao viliki veu. ¹¹ Aghanna va am tani ruu niuungu am ghe tiuaa ngakasinala. Am ghe aaloannaaili tani tiuaa, me am tani aloanna tee tani ruu. Liuna avalua o me am taula llo voto isaa etaimim. ¹² Marova am annaaili tani tau lao, God aue eghaa kaluimim nitau lao tale voto etaimim, me karika va tale voto karika etaimim.

¹³ Karika ami anna va am ghelei tokatoka katoa emasina me am tokatokaaimim emaate. Ami anna va voto emasina akapa etaimim. ¹⁴ Tale ia oia nau etiulu, nau oroi voto etaimim, isaa o voto am mene sausi katoa, me auena, voto emene oroi etaira aue la mene sausiem nau ngam tukunala tale voto, me voto aue emasina akapa etaimim. ¹⁵ Aue nongina Uru ngai Manga ateva eaauliaa va, “Lo ateva ghe ghaala oroi karika righi ghe tokala, me lo ateva ghe ghaala malaki ghe ghaa roorooaala.”

Taetas ghe oghi lao sio eKorint

¹⁶ Ami kaakaili emasinaaili ta God poli ghe atokala niaielousi tale urungui-tanina ateva Taetas nongina aghi aghannangaili tani sausiem. ¹⁷ Poli Taetas ghe nongo usilaala, voto ami ghe annaaili va ghe ghelei, ghe annaailiila va emene mae etaimim me ie tee nannaane tani mae sausiem namungaili. ¹⁸ Ngami suusuu tee kateva tau ngaiesoaa ange maemae aitaaua tee Taetas, ale manga akapa atoa la aarueinia poli masi uunguaane tale masi kiukiu. ¹⁹ Me karika va isaa nonga o, ta ale manga atoa laghe suitoongainiela va ekasu teiemami nau ami ghe sausau viliki veu tani kkaua ararina ateaee Vau ngepona ateva, me tani apasunga vaalua ami annaaili tani sausi. ²⁰ Karika ami anna va teva ealiu teiemami tale righi voto sesa nau ami aaitaraa isaa o viliki veu oroi. ²¹ Ami aainanganangaaili tani ghelei voto ghulughuluena, karika va ta matane Vau ngepona nonga ateva, ta tale matane taumattu tee.

²² Liuna avalua o me ngami mene suusuu tee kateva tani mae aitaaua tee taita alua, oroi nau ngami ghe toongainiela, me ngami ghe tarala va eannaaili tani aisausiaa, me eaatoka tuutulina etaimim me eannaaili tani sausiemami tani ghelei niuungu. ²³ Me ta Taetas, ia kapughu ia angalu uungu eitaaua elome etaimim tani sausiem, me mene ghalua kapuita tau ngaiesoaa, lalu aaimatoonga ale manga atoa, me nioneoneaa elao ta Karisto. ²⁴ Liuna avalua o me am apasunga ailousiaaimim tale isaa o taumattu, me ila akapa ale manga atoa aue la tara, me la kila va llo ami ghe aarueinam etana, koronna.

9

¹ Karika righi uunguaaghi tani pitipiti eatu etaimim me auliaa voto tani sausi tau ngai kkaua ngatoa eJerusalem. ² Poli akilakila aloaloannaaimim tani sausi, me aghe aarueinam ta aMesedonia ngatoa. Aghe uela etaira va tale ie too ninamanama ateaee ang ghe lao sio, am ona tale provinsi

eteva eAkaia am ghe aimonomosiaaala tani tau lao. Me aloannaaimim tani taula ghe gheleilala me oroi ila tee lo atoa laghe annala tani sausi tee. ³ Ngasungisungi tau mae kapuita atoa etaimim me llo aghe aarueinam etaira erau nim peisaane, me am tee am aimanomanosiaa nongina aghe auliaala etaira. ⁴ Karika aue masi taataraane arova toa aMesedonia la usieghi me la atu tara va karika am ghe aimanomanosiaaala. Isaa o voto aue egheleita, ita palata. Karika aue va ami nonga ta ita akapa. Anim auliaa runga llo ta isaa o voto erou lutu. ⁵ Liuna avalua o me aghe nnaala va masina arova asungi esarasarakana kapuita atoa mua la muemue eatu me la ghatu aimanomanosia ngakapa isaa o viliki veu am nim anna tani tau lao, me am, am ghe auliaala inangari nialokoi va aue am tau lao. Tale isaa o salana me aue eapasunga va am tautau lao poli am annaaili tani tau lao, me karika va ami suusulungiem.

Lo ateva emasimasi tani nim taula

⁶ Am nnaa: Lo ateva eapasapa llo karika oroi emukemuke llo karika oroi, me lo ateva eapasapa oroi emukemuke oroi. ⁷ Kateva kateva taumattu etaula nongina vaalua urunguitana ateva eanna tani taula. Karika umene taula arova karika ualoanna tani tau, me karika umene taula poli la suusulungio tani taula, poli God eaaielousiaa lo ateva taumattu emasimasi tani nim tau lao. ⁸ Me God eroroo tani tau aatu niarangise aue elau aloannaaimim, me nau etoa aue am ghaa oroieili voto karika isaa etaimim, me aue am rooroo tani ghelei oroieili masi niuungu etana. ⁹ Gheegheleiaaimim aue enongina Uru ngai Manga ateva eaauliaa va, “God etautaula ta lo atoa karika peiira

kanna nighulughuluena aue etoka liu.”

¹⁰ God etautau lao katu ue ngai ta tau ngai pasa ngutana atoa, me etautau lao inana ta taumattu ngakapa atoa. Tale isaa o salana, aue eghelei aoroi peiimim me aue am mene tau lao ta lo atoa la ghanna niaisausi. ¹¹ Me God aue egheleiem aue am tue peipeina tale isaa akapa ase salana, me aue am roo tani nim taula. Oroi taumattu aue la kaili emasina sae ta God nau ami taula viliki veu am ghe tau mae sio etaimami.

¹² Isaa avalua o me niuungu am gheelei karika va aue esausi nonga tau ngai kkaua ngatoa eJerusalem, ta oroi ila mene katoa aue la masimasieili tani kaili emasina sae tee ta God. ¹³ Tale llo niuungu ngam ghe gheleila, eaapasunga ngakoronna va am gheelei voto am ghe uela va am ghelei. Me aue eghelei oroieili taumattu etau sae God tale masi uunguaaimim eaapasunga va am nongonongo usilaa masi kiukiuna Karisto, am ue va am aikaaiiaa etana. Me eaapasunga tee masi aloannaaimim tani sausila me tani sausi mene katoa. ¹⁴ Me tale uneira nikokkolomi sae ta God mausiimim, aue urunguitaniira elao aitaaua teeiem mausi kinatama maamasinaane ateva God ghe tau aatu etaimim. ¹⁵ Ita kaili emasina ta God poli voto ghe nim tau mae sio, karika ita rooroo tani kila amasina!

10

Pol ghe vativatia tale uunguaane ta Karisto

¹ Aghi Pol, tale ararina atea Karisto, ia saghuighuena ia, me karika essasai parasia, akookolomiem tani nongoaghi. Kasina tani taumattu la ue va atautaeughi sio nau atokatoka teeiem, me nau karika atokatoka teeiem, atautau aatu inangari sarasarakanaaili etaimim. ² Akookolomi

esarasarakanaailiim va nau amae taraiem, va ngam ghe aikolikoliaala, karika aue amene sorriena tani aulia ngasarasarakanaaili inangari etaimim nongina aghannaa tani auliaa tee isaa o taumattu la nannaa va ami tokatoka tale uunguaa kosa ateva oia. ³ Arongona ta ami tokatoka tale kosa ateva oia, me karika ami aaiuvii nongina taumattu ngatoa tale kosa ateva oia la aiuvii. ⁴ Poli ghinna niaiuvii ami aaiuvii etana, karika va nongina pei tale kosa ateva oio, karika. Ta ami aaiuvii tale ghinna, sarasarakaniaane emaemae ta God, me eroroo tani rruti ekatuu uneira valavala atea sarasarakana ia tau ngai ssateemami etoa, ⁵ me isaa akapaaili ninannaa me voto la nannaa tani saeaa nonga epona me egheeghelei saasakiaa alomasaanga kanna God. Me ami gheelei nannaaira tau ngai ssateena atoa Karisto tani oghi vulu isaa o salana me la nongo usilaa nonga Karisto. ⁶ Me nau ngam nongo usilangaili Karisto, aue ami aimanomanosiaa tani atoka ghoa eleka tale ale manga llo taumattu etam aaloanna tani nongo usilaa.

⁷ Am tara amasina voto am rooroo tani tara.* Arova teva etaimim enannangaili va ia kapuna ia Karisto, eroo tani mene nnaa va ami tee kapuna amami Karisto, nongina ia. ⁸ Arova aghe saasaeaa nannaaghi tale isaa o matuutuliena Vau ngepona ateva ghe tau mae sio etaimami tani atingina akorokoronganiem me karika tani gheleiem va am katu, karika aue apalata. ⁹ Poli karika aghaaloanna va aghamatautuem tale uru ngai apitipiti atu etaimim. ¹⁰ Poli katoa la ue va, “Am rau mene annangaili Pol, poli uru ngai epitipiti pasu tale inangari matuutuliena me sarasarakanaaili, me tani tara tuungia nau eaippooaa, karika muenna ia tani aippooaa, me inangari eaauliaa karika righi malloeana.” ¹¹ Isaa o taumattu eaauliaa isaa o ase inangari, la tani anna ngamasina me la kila va, nau ami mae toka teiem, aue ami toka nongina sa ateva am ghe taraiela tale uru ngai etikirighi aghe piti ekasinaie mae sio etaimim.

¹² Ami gheelei tani apasunga va saa taumattu iemami, me karika ami aasarasarakanaiemami tani apasunga va ami eitauaa me lo atoa la saasaeaa nannaaira. La ghaitoongieinila elome ta ngetaira tale ninannaa. Isaa o ase ninannaa eaapasunga va alokapakapa ila. ¹³ Me karika aue ami aasakeaa llo niuungu karika isaa etaimami tani lau aioghioghi etaimami nongina ami uungu. Kinatama nannaaimami va ami toka tale aioghioghi nongina God ghe aloannala va ami ghelei, me am tee elome tale isaa o niuungu. ¹⁴ Poli karika masina va karika ami ghe mae sio tani taraiem, me ami asaesae nannaaimami. Ta ami, ami ghe aitiutiula tani maeaa masi kiukiuna Karisto etaimim. ¹⁵ Karika ami aasaesae nannaaimami tani lau aioghioghi etaimami, tale niuungu katoa taumattu laghe gheleila. Ta nannaaimami va nau aiesoaaimim epinosa akorokorongana me elao ta mene kasina taumattu laghe tam kila masi kiukiuna Iesu, elome nongina ami, ami uungu, ¹⁶ me aue ami roo tani mene ppooaa masi kiukiu tale mene kasina patunganua namuu masau tanganueimim. Me karika ami rooroo tani aasakeaa niuungu katoa laghe gheleila elome nongina ila la uungu. ¹⁷ Me nongina Uru ngai Manga ateva eue va, “Arova teva ealoanna tani aasake, eaasakeaa saa llo voto Vau ngepona ateva ghe gheleila etana.” ¹⁸ Poli ita kilakila va lo ateva taumattu esaasaeaa nannaane, ia o taumattu ngateva karika God eue va masina ia. Ta arova Vau ngepona ateva etau sae ararina atea ia o taumattu ngateva, ie nonga o ase taumattu ngateva masina ia ta matane Vau ngepona ateva.

10:4: Ips 6:13-17. * **10:7:** Katoa la ue va malloeana va Voto ateva am taataria nonga eleka. **10:8:** 2 Ko 13:10. **10:13:** Rom 12:3. **10:17:** Jer 9:24; 1 Ko 1:31. **10:18:** 1 Ko 4:4.

11

Pol me kamena atoa apostolo

¹ Aghanna va aue am rooroo tani nongo niaippooaa aue aghelei, arongona ta aghi nongina alokapakapa ateva, me am tani nongoaghi. ² Poli anannan-gailiim tee ninannaa manga. Aghe auliaala inangari nialokoi tani tauem lao ta kateva nonga taitaniimim, ta Karisto, me aghi aue arooroo tani tauem lao etana nongina vause ateva raarangisana ia, karika ghe kila taita. ³ Me amaamatautu, poli nongina Ivi katu ngateva muennaaili ia tani kamekame ghe kameala, nannaaimim erou tiu ppae me karika am aielousiaa Karisto tale urunguitaniimim akapa. ⁴ Poli nau eteva kateva emae etaimim me eppooaa Iesu, me karika va lo ateva Iesu ami ghe ppooainiela etaimim, o arova am ghaa kateva ppae spiriti tale lo ateva am ghe ghaa akasinaiela, o kasina ppae masi kiukiu tale ilo akasina am ghe ghaala, emaamaluminaaili etaimim me arovaea ta am ghaaghaa. ⁵ Poli karika atani nannaa va aghieili euu tale ila o apostolo atoa la ue va ilaaili epona. ⁶ Arongo ta karika aghe lao sio tani ghaa alomasaanga tale uunguaa niaippooaa, me karika koronna va atam kilakila amasina isaa o masi kiukiu. Tale isaa akapa salana ami ghe ghelei emasalikangailiila isaa o voto etaimim.

⁷ Am annaa va aghe gheleila ssavoto nau aghe sioainaghila euu tani gheleiem va am, am sae epona nau aghe poppooaa masi kiukiuna God me karika aghe ghaaghaa aipolipoli? ⁸ Aghe aainao viliki veu katoa ale manga laghe nim tautau mae tani sausieghi, tani uungu etaimim. ⁹ Me nau aghe tokatoka teeiem, me aghe anna voto, karika aghe tautaula maate ta teva taumattu, poli kapughu etoa laghe kasula eMesedonia, laghe tau mae sio voto aghe anna. Aghe aitarainaghi tani ghelei va erau mene maate etaimim tale asease salana, me aue atoka gheelei evalua o. ¹⁰ Me nongina voto koronna ta Karisto etokatoka etaghi, aghaaulia ngakoronna va karika teva tale provinsi eteva ona eAkaia aue eghelei rungainaghi tale aasakeaaghi va karika aghaaghaa viliki veu tale uunguaa tani ppooaa masi kiukiu. ¹¹ Poli saa? Poli karika aghaailousieinam? God ekilakilaaili va agheelei evalua o poli aghaailousieinam.

¹² Me karika aue aruu tani ghelei voto agheelei, poli aghaloanna va lo atoa la paepae salana va la ghairooaa teeiemami tale llo la ghaasakeaa etana, karika aue la roo tani aasake. ¹³ Ta isaa o taumattu apostolo kamekame ila. La ghaikameaa tale uunguaaira, la gheelei vara mene kapuna apostolo koronna ila Karisto. ¹⁴ Karika ita rooroo tani soghiaa poli Satana egheelei tee vara mene ensolo tale mallanga ia. ¹⁵ Liuna avalua o me karika ita rooroo tani soghiaa arova kapuna tau ngai uungu etoa la gheeleila arova tau ngai uungu tale ghulughuluena ila. Me airuuruu etaira, aue la ghaa aipoliira tale voto la gheelei.

Pol ghe aasakeaa nimmarikana ghe ghaala

¹⁶ Amene aulia ngaghaluene va karika teva emene taraieghi va alokapakapa aghi. Me arova am taatara avalueieghi o, am ghaaieghi va alokapakapa aghi me aue amala aasake. ¹⁷ Tale isaa o voto, aghaasake tani aulieinaghi. Karika aghaaiippooaa nongina teva kapuna Vau ngepona ateva, ta nga samasama arova alokapakapa ateva. ¹⁸ Oroil ila lo atoa la ghaasake nongina aasakeaa sala kosa ateva, liuna avalua o me aghi tee aghaasake. ¹⁹ Me aue aghaasake poli alomasaangaaili iem me am ghe masimasieiliila

tani lao aitaaua tee nannaaira alokapakapa atoa, ²⁰ me am ghe masimasila tani tau veluem ta lo ateva taumattu ghe annala tani gheleiem am ghe nim tau ngai uungula me karika am tokatoka tale aloannaaimim, me enim ghaaghaa peiimim me karika emene nannaainam, me ekamekameam tani muemueinam, me eaasaesae ararina atea, me nonginaaili lo ateva eanna tani posala pasipasi mataimim. ²¹ Tale paapalataaghi nga ghaaulia ngaotu va, saghuighuinaaili emami tani ghelei isaa o voto.

Arova teva taumattu eaasararakana tani asaesae nannaane, aghi tee arooroo. (Nga ghaaippooaa nongina alokapakapa ateva). ²² Vara ila nonga va aHibru ila? Ta aghi tee. Me vara ila nonga va aIsraeli ila? Ta aghi tee. Me vara ila nonga va tuvuna ila Abraham? Ta aghi tee. ²³ Vara ila nonga va kapuna tau ngai uungu ila Karisto? (Nga ghaaippooaa arova veeveena ieghi.) Alaulaula tale niuungu. Aghe uungu esararakanaaili, me oroaata aghe ssola tale ale mata voovoo, me laghe paruparueghi oroaata me karika arooroo tani nnaa va ghaisaata, me oroaata aghe oghioghi lao tale nimate. ²⁴ Ghalimaata aghe ghaala niparuparu ta ajiu etoa, kateae niparuparu ghe saesae ta kotolungaulu ghasio (39).* ²⁵ Kotoluaata laghe parueghila tale ai, me katengaata laghe osaieghila tale atu. Me kotoluaata anuaaghe aikaaila etana, ghe tarurrutila elamana. Kateva voo me llaa ngateva aghe vukalala elo malionge. ²⁶ Oroieili nau aghe kasukasu ekapa see, aghe sousou sesa nau tani kasu longoti tale ateo atoa, me ta tau ngai sari ghinna atoa tapaa salana, me ta lo atoa tanganueimami eitaaua, me ta taumattu ngeleka atoa, me tale masaliki taatara, me tale voto karika rigi taumattu etana, me elamana, me aghe tokala tale sesa nau tee lo atoa laghe kamekame vara mene kapughu ila. ²⁷ Aghe uungu aanasa tee nimmarikana, me oroaata karika aghe asesekana eleivoo. Aghe maamaloo me aghe kaakangngata tee manu, me karika rigi aneghi, me karika oroi kalioghu nau aghe kakkaili. ²⁸ Tani mene saoa sae tale isaa o voto, nau ekapa atoa anannangaili isaa akapaaili ale manga. ²⁹ Nau kateva tale ale manga atoa esaasaghuighuina, aghi tee asaasaghuighuina. Nau kateva ange gheleila kateva ange katuula tale ssavoto, am annaa va karika esessaieghi?

³⁰ Poli arova atani aasake, aue aghaasakeaa llo voto eaapasunga saasaghuighuiaaghi. ³¹ God, ia kapuna Goto ia me Tamane ia Vau ngepona ateva Iesu, me ie nonga ita taue sae nau ekapa atoa, ekilakila va karika akamekame. ³² Tale masaliki taatara atea eDamaskas namu ngateva ghe uungu ta King Aretas ghe atinginala soldia ngatoa tani toi runga masaliki taatara atea tani ghelei va ghe kuneieghi. ³³ Me laghe taueghi siola euu tale kinatama aikaai eteva arova keru eteva tale uindoa tale keaavalavala ateva me aghe saangala.

12

Unna nitaatara atea Pol

¹ Atani toka aasake. Arongona ta karika aue aghaa rigi voto masina, me isaa oio apoppooaa tee nitaatara me llo Vau ngepona ateva ghe aotula etaghi. ² Akilakila kateva taumattu eaimuli tee Karisto, kasangaulu ghaatiea (14) ninamanama ang ghe lao sio God ghe ghaaie saela epona liu* (karika

11:21: Plp 3:5. **11:23:** Apos 16:23. **11:24:** Diut 25:3. * **11:24:** Ta Diutronomi 25:1-3 God ghe uela va niparuparu erau mene lau ghaatingaulu (40), me ajiu etoa laghe uela va karika emene lau kotolungaulu ghasio (39), poli la rau tam ioie amasina va la lau aoghioghi eteva ta ghaatingaulu.

11:25: Apos 16:22; 14:19. **11:26:** Apos 9:23; 14:5. **11:32:** Apos 9:23-25. * **12:2:** epona liu Tale inangari nge Grik, aiaakotolu eteva epona liu.

akilakila va ghe saela nongina va taumattu ngateva o tale ninannaa — God nonga ekilakila). ³⁻⁴ Amene auliaa, akilakila va taumattu ngateva oio God ghe ghaaie saela tale masi umana utana atingiu God (karika akilakila va ghe saela nongina va taumattu ngateva o tale ninannaa — God nonga ekilakila), me isaa okae ghe nongola voto karika ghe rooroo tani kila mata nginangari tani aulia ngamasina, voto taumattu erou mene auliaa. ⁵ Aghaasakeaa ia o ase taumattu ngateva — karika amene aasakeainaghi nonga, ta voto nonga eaapasunga va karika sarasarakana ieghi. ⁶ Poli marova aghaloanna tani aasake, karika va alokapakapa aghi, ta aue aghaulia ngakoronna, ta karika aghaloanna va teva etingina tale llo oia me etaueghi sae tale nannaane, ta marova eghelei evalua o, etingina tale voto llo ghe tarala aghe gheleila me ghe nongola ta aghe ppooaala.

⁷ Me tani ghelei rungainaghi va arou mene saeaa nganamuu nannaaghi tale masi voto atoa aghe tarailala, aghe ghaala mmarikana tale vilikighi nonginaaili va kateva voto ghe rorrooaghi, eaaimatoonga uunguaane Satana tani tingina rungainaghi me tani ghelei va asioaa nannaaghi. ⁸ Kotoluaata aghe kolomi esarasarakana saela Vau eteva tani ghaa velu ia o voto ateva. ⁹ Me karika ta ghe uela etaghi va, “Alousiusiaaghi eteva erooroo etam, poli sarasarakaniaaghi etani sarasarakanaaili tale taumattu karika rigghi sarasarakaniaaira.” Liuna avalua o me amasimasiaili tani aasake tani ue va aghi karika sarasarakana ieghi me aue sarasarakaniaane Karisto aue etoka ta ngetaghi. ¹⁰ Liuna avalua o me amasimasi tani tam sarasarakana, tale sesa inangari la poppooaa teeieghi, me tale nau asousou mmarikana, tale nau etoa la ghelei saasakiaa etaghi, me tale asease nau karika masina tale maamauluaaghi, mausi Karisto. Poli nau eteva atam sarasarakana, isaa o nau asarasarakana.

Pol ghe nannangaili aKorint atoa

¹¹ Isaa oia inangari aghelei marova alokapakapa ateva, poli mausiimim me aghelei isaa oia voto. Ghe roola va am, am ghe auliaa masi uunguaaghi, me karika, am ghe gheleila me aghi ngaghaaulia ngaotu. Arongona ta aghi nim lao ieghi, me aghi alaulau ila o apostolo atoa la ue va ilaaili epona. ¹² Aghe gheleila oroieili aimatootoongana me mirikolo, eaapasunga va aghi apostolo ieghi, nau aghe tam sio asoasooa tani uungu teeiem nau voto karika masina ghe lutulutu teeieghi. ¹³ Karika va aghe gheleiemla va amaili euu tale mene katoa ale manga. Voto nonga ateva karika aghe gheleieila etaimim, karika aghe looloo rigghi viliki veu va emaate etaimim. Aghaloanna va am kkaluaa!

¹⁴ Am nongo, aiaakotonna oio ngamene aaimonomosiaa tani mene mae taraiem, me nongina arau, karika aghaloanna tani loo rigghi voto etaimim. Ta anim aloannaiem, karika va peiimim. Ta karika va aliki etoa la aitaraa tamaira me kinaira, ta tamaira me kinaira la aitaraa natuira atoa. ¹⁵ Aue amasimasi tani tau peighi, me aue amasimasi tee arova God etaueghi atu etaimim, tani sausiem. Vaalua, ailousiaaimim etaghi ange ghaaghauna nau eteva ailousiaaghi etaimim namuu? ¹⁶ Am rooroo tani asokoi va karika aghe saoaala maamatana etaimim. Me katoa aue la ue va alomasaanga aghi me aghe kameamla. ¹⁷ Vaalua? Saa nannaaghi nau aghe sungi mae sio taumattu tani ppooaa etaimim? Tani kameam me tani ghaa viliki veu? Karika poi! ¹⁸ Aghe kookolomi esarasarakanaaili Taetas tani mae, me aghe sungila mene kateva kapuita tau ngai kkaua va eusia. Am

annaa va Taetas tee ghe kameamla? Am rooroo tani kila va gheleiaaimami me nannaaimami, kateva nonga ia.

¹⁹ Koti am nannaa va isaa o nau ami ghe nim tootoonga tani vatiemami etaimim. Karika poi! Ami poppooaa nongina kapuna atoa Karisto ta matane God, me voto akapa ami ghe gheleila, masi kapughu etoa, ami ghe gheleila tani akorokoronganaiem. ²⁰ Poli amaamatautu va nau amae rekataa ona, arau tara va karika am tokatoka nongina aghanna va am ghe toka, me koti am tee aue am tara va aghi tee karika atokatoka nongina am anna va atoka. Amaamatautu va aue atara va am aakiso, am nannaa saasakiaa, am aaisessaii, am tokatoka apolapola, am auliaa inangari tani ghelei kateva nannaane esio euu, am auliulia see, am saesaeaa nannaaimim me am tam aimulisi tee masi salana. ²¹ Amaamatautu va ia o nau eteva aue amae, kapughu God ateva aue eghelei nannaaghi esio euu mausi voto am ghelei, me aue aghalousiusi tee lo atoa taumattu angila ghe katuula tale ssavoto me karika laghe nna ngaioghioghiaala tale voto karika raarangisana, me niailai salosalooa see, me tani nim anna tani ghelei sesa voto.

13

Airuuruu tale inangari tani auliaa kieira

¹ Kotonna oia ngamaemae tani taraiem. Aue nongina Uru ngai Manga ateva eue va, “Nau niaisakei, erooroo va ghalua o kotolu la ghasokoi voto laghe tarala.” ² Ngaghe auliaala kieimim nau aghe toka teiemla tale aiaaghaluene atea uneghi niatu etaimim, me ghaine, nau karika ieghi, nga ghaauliaa ta lo atoa laghe ghelei ekasinala ssavoto, me ta ngetaim akapa, nau amene mae rekataa karika aue agharrasaiem, ³ poli am anna tani kila va koronna va inangari apoppooaa ekasukasu ta Karisto, o karika. Karisto, ia karika saghuighuina ia tani uungu teiem, ta ia sarasarakanaaili ia elome etaimim. ⁴ Me koronna va laghe avukalaie saela tale aikotoo tale nisaghuighuina, me karika ta emaamaulue tale sarasarakaniaane God. Isaa avalua o me arongona ta ami saghuighuina iemami etana, me tale sarasarakaniaane God aue ami toka teeia tani uungu etaimim.

⁵ Am taraiem mua tani tara va am tale niaikaaiiaa o karika; am tootoongainam mua. Karika am kilakila va Iesu Karisto ia etaimim? Me arova karika ia etaimim, karika am ghe tani aikaiaa ngakoronna. ⁶ Me aghaaiesoaa va, aue am pae me kila va ami apostolo tuungi iemami. ⁷ Isaa oia ami kokkolomi sae ta God va karika am mene ghelei voto sesa. Karika va poli taumattu ngatoa la tara va ami apostolo tuungi iemami, ta poli am aue am ghelei voto ghulughuluena, arongona ta katoa la nannaa va karika va apostolo tuungi iemami. ⁸ Poli karika ami rooroo tani ghelei righi voto tani ghelei runga llo voto koronna, ta ami ghelei nonga llo voto masina elaolao aitauaa tee koronna. ⁹ Aghaauliaa isaa o voto poli ami masimasi nau ami saasaghuighuina me am sarasarakana am, me kaluimami nikokkolomi etaimim va am rooroo tani mene tingina asarasarakana. ¹⁰ Liuna avalua o me apitipiti isaa oia voto nau karika aghi ona, me nau amae, karika aue amene sorriena tani aulia ngasarasarakanaaili nau aghelei llo matuutulienua. Isaa o niuungu matuutulienua Vau ngepona ateva ghe tau mae sio etaghi tani asarasarakanaiem, karika va tani ghelei ekatungiem.

Airuuruu tale inangarina Pol

¹¹ Airuuruu, kapughu etoa, am masimasi, me am tootoonga tani toka tale masi nitoka, me am ppooa ngaisausia tani asarasarakana kateva kateva etaimim, me ekateva nonga iem tale ninannaa, me am toka tale luei, me Goto ateva etautau niaielousi me luei aue etoka teeiem.

¹² Am sou kateva kateva etaimim tale niaielousi.* ¹³ Ila akapa kapuna taumattu ngatoa God la sungi atu sio masimasiaaira etaimim.

¹⁴ Alooloo sae va aue maamasinaane Vau ngepona ateva Iesu Karisto me aielousiaane ateva God me niaighui eitaaua ta Spirit Manga aue etoka aitaaua tee akapaiem.

* **13:12:** tale niaielousi Tale inangari nge Grik, eue va, tale niaingusu eteva manga ia.

Uru ngai etikirighi Pol ghe pituela ta aGalaisia ngatoa Inangari emuemua

Uru ngai etikirighi Pol ghe pituela ta aGalaisia ngatoa, tau ngalomasaanga atoa la nannaa va aitiutiu ia tale uru ngai Pol ghe pitula. Galaisia kateva provins tale patunganua ateva namuu ia ghaine ita aseasea va Teki, me Pol ghe kasu seela tani atoka ale manga tale aitiutiu eteae unna nikasu. Pol ghe lao sio okae eGalaisia tani tara isaa o ale manga tale aiaaghaluene me aiaakotonna ateaie nikasu.

Aitiutiu etoa taumattu laghe aiesoala ta Iesu, ajiu ila, me kinatama niaissa ghe lutula va tau ngeleka atoa la tani ajiu, me auena la rooroo tani saanga. Pol ghe pitula ia oia uru ngai etikirighi tani aulia ngaotu nannaane tale isaa o voto. Ghe apasungaala va ta niaikaiaa ta Iesu nonga ita saanga, me karika va ita aaimuli usi tee inangari nipaopao kanna Moses. Me tee, ghe apasungaala va, nau ita aiesoaa ta Iesu, malloeana karika va ita rooroo tani ghelei voto akapa ita aloanna, ta ita ghelei voto masina, ita sausi kateva kateva etaita tale niaielousi, tee niaisausi kanna Spirit Manga.

Tani kila amuemua

Aitiutiu tale inangari *1:1-5*

Pol ghe apasungaala va ia apostolo ia *1:6-2:21*

God easaangita mausi kaluita niaiesoaa, me karika poli ita aaimuli usi tee inangari nipaopao *3:1-4:31*

Karisto egheeleita ita rooroo tani ghelei masina me tee niaisausi kanna ia Spirit Manga *5:1-6:10*

Airuuruu tale inangari *6:11-18*

¹ Aghi Pol, apostolo ieghi karika toa taumattu laghe sungieghila, me karika tee nim teva taumattu ghe suimatoongainaghila, ta Iesu Karisto me God Tamaita ia, ia ghe totula Iesu tale nimate. ² Aghi me kapughu tau ngai kkaua ngakapa atoa la tokatoka teeieghi ami pitipiti aatu etaimim tale ale manga atoa tale provinsi eteva eGalaisia.

³ Alooloo sae va maamasinaane me luei ekasukasu ta God Tamaita ia me Vau ngepona ateva Iesu Karisto aue etoka teeiem. ⁴ Ghe tau mae sio maamauluaane tale kaluita ssavoto tani ghaa oghita tale nau etiulu oia sesaaili ia, nongina aloaloannaane Tamaita ateva ta God. ⁵ Ta ngetana nikkauaa aue etoka nau ekapa atoa, koronnaaili.

Karika mene teva masi kiukiu

⁶ Aghe soghieinamla va arovaea ta am ghe kasu vulila God ghe koloamla tale maamasinaane Karisto me ngam aaimuli tee kasina ppae masi kiukiu, ⁷ llo karikaaili va masi kiukiu. Taataraane va katoa taumattu la ghe gheleila nannaaimim ang ghe aisavisavilaala me la tootoonga tani aikolikoliaa masi kiukiuna Karisto. ⁸ Me arova ami o teva ensolo ngepona liu ghele ppooaa masi kiukiu me karika elaolao aitauea tee llo ami ghe ppooaala etaimim, nikasikiena kanna God aue etoka etana. ⁹ Nongina ngami auliaala me ngamene auliaa va, arova teva epoppooaa masi kiukiu me karika elaolao aitauea tee llo ngam ghe ghaala, nikasikiena kanna God aue etoka etana.

¹⁰ Ia oia see aue eue va masi taumattu ieghi, taumattu ngatoa o God? Arova anim anna tani amasimasi taumattu ngatoa, karika arooro tani kapuna tau ngai nongonongo anna Karisto.

Kiukiu vaalua God ghe kolola Pol

¹¹ Aghanna, kapughu etoa, va am kila va masi kiukiu apoppooaa karika va nim kiukiu taumattu ngatoa laghe gheleila, ¹² me karika aghe ghaala ta nim teva taumattu, me karika toa laghe apasungaala etaghi, ta Iesu Karisto ghe apasungaala isaa o voto etaghi. ¹³ Ngam ghe nongola gheeleiaaghi tale nau too ang ghe lao sio tani usilaa gheeleiaaira aJiu etoa. Aghe uviuvi saasakiaa alena ale manga ateva God me aghe anna tani turungia. ¹⁴ Ngaghe muumuennaaili me kilakilaaili vaalua tani aimuli tee kakkauaaimami aJiu etoa. Gheeleiaaghi ghe laulau lo atoa aneimami ninamanama isaa aitauea me aghe sarasarakanaaili tani aimuli tee gheeleiaaira tuvuimami etoa. ¹⁵ Me nau Goto ateva, ghe suitoongainaghila nau aghe lutula me ghe koloaghila poli maamasinaane, ghe masimasila ¹⁶ tani apasunga Natuna etaghi me aue appoainia ta lo atoa karika aJiu ila. Isaa o voto karika aghe kolomila teva taumattu, ¹⁷ me karika aghe sae teela eJerusalem tani kolomi lo atoa tee taumattu laghe apostolo akasinala etaghi. Karika, ta gharovaeaa nonga ta aghe ssola eArabia vara me aghe mene lao sio eDamaskas.

¹⁸ Vara kotoluae ninamanama ghe ruula me aghe saela eJerusalem tani kila amasina Pita* me aghe toka teeiela kasangaulu ghalima (15) nau. ¹⁹ Karika aghe mene tarala teva apostolo nim Jeimis nonga, tue me nenga ilalua me Vau eteva. ²⁰ Aghaaulia ngakoronna etaimim tale taataraane God va voto apitipiti aatu etaimim karika va kamena. ²¹ Emulina aghe lao sio tale provinsi elua eSiria me eSilisia. ²² Oroieili ale manga eJudia laghe aaimuli tee Karisto karika laghe tara poila mataghi. ²³ Laghe nim nongonongo kiukiu va, “Taumattu ngateva ghe tuuturungita, nau ghaine ange poppooaa niaikaaria ngateva emua arau ghe anna tani turungia.” ²⁴ Me laghe tau saela God poli mausighi.

2

Mene katoa apostolo laghe masimasiaala Pol

¹ Kasangaulu ghaatiea (14) ninamanama ghe ruula me angalua me Banabas angalu ghe mene saela eJerusalem, me aghe kolo teela Taetas tani kasu teeingalua. ² Aghe saela poli aghe aaimuli tee voto aghe tarala. Aghe sou eisuliaala lo atoa marova namuu ila, me aghe auliaala etaira masi kiukiu aghe poppooaa ta taumattu ngeleka atoa. Aghe gheelei llo va voto aghe gheleila me voto ghaine agheelei oia ghe rau nim peisaane. ³ Arongo ta Taetas aGriki ia ghe usieghila, me karika poi laghe asarasakanala tani ue va la isoia. ⁴ Voto ateva o ghe lutula poli katoa taumattu tau nikamekame ila laghe sosso ainao tani tara rungainamami tale masi nitoka ngami ghe ghaala ta Karisto Iesu. Me laghe anna tani gheleiemami va ami, ami nongina tau ngai uungu eteva euungu me karika etokatoka tale aloaloannaane. ⁵ Karika poi ami ghe annaala tani nongo usilainila, poli ami anna va koronna voto tale masi kiukiu etani toka etaimim.

⁶ Me lo atoa namuu ila me matarane ila, karika laghe auliaa saoaala righi inangariira tale voto aghe auliaala. (Saa taumattu ila, karika aghannainila;

1:10: 1 Tes 2:4. **1:11:** Mat 16:17. **1:13:** Apos 8:3. **1:14:** Apos 22:3. **1:15:** Ais 49:1; Gal 2:7. **1:18:** Apos 9:26-27. * **1:18:** Pita Pol ghe pitila va *Kepas*. Tale inangari nge Aramaik, *Kepas* malloeana va atu. Tale inangari nge Grik, Pita tee malloeana va atu. **1:21:** Apos 9:30. **2:1:** Apos 15:2. **2:4:** Gal 1:7; 5:1, 13.

God karika egheelei niaisakei tale voto eleka tale taumattu.) ⁷ Tale isaa o voto, laghe tara kilala va aghi God ghe tau mae sio ia oia niuungu eteva tani ppooaa tale taumattu ngeleka atoa nongina Pita ta aJiu etoa. ⁸ Nongina God euungu ta Pita tale uunguaane va apostolo ia ta aJiu etoa, God tee euungu etaghi tale uunguaaghi va apostolo ieghi ta taumattu ngeleka atoa. ⁹ Jeimis, Pita* me Jon, nau laghe tara kilala maamasinaane God ghe tau mae sio etaghi, la taatara sae etaira va namuu ila, laghe ssuaala nimaira muenna tani sightha etaingalua me Banabas. Laghe mae sio nonga tale kateva nonga ninannaa va ami lao ta taumattu ngeleka atoa me ila ta aJiu etoa. ¹⁰ Kateva nonga voto laghe kolomiamamila etana, va ami rau mene ruu tani sausi lo atoa karika tue peipeina ila. Lo ateva o voto aghe annaaili tani gheleia, poli emua arau aghe gheeleia.

Pol ghe tam masimasiaala Pita

¹¹ Nau Pita ghe sio mae eAntiok aghe sama anamuu teeiela ta mataira taumattu ngatoa poli llo ghe gheelei karika masina. ¹² Auena Jeimis ghe suu katoa taumattu tani sio, Pita ghe namanama akasina tee taumattu ngeleka atoa me nau laghe rekatala, ghe kasu vulilala me ghe ruula tani usi taumattu ngeleka atoa poli ghe maamatauta lo atoa taumattu ila elome ta lo atoa isoiso ila. ¹³ AJiu ekapa atoa laghe usila nannaane kamena, liuna avalua o me Banabas tee ghe usila voto kamena laghe gheelei.

¹⁴ Nau eteva aghe tarala va karika laghe kasukasu eghulughuluena nongina koronna voto tale masi kiukiu, aghe uela ta Pita emua ta mataira akapa va, “Io aJiu io me utokatoka nongina taumattu ngeleka ateva, karika va nongina aJiu eteva. Vaalua me uasarasarakana va taumattu ngeleka atoa la aJiu?”

¹⁵ “Italua italu ghe lutula va aJiu italua karika nongina lo atoa la ue va taumattu ngeleka atoa tau ssavoto ila. ¹⁶ Ita kilakila va taumattu karika eghulughuluena nau eaaimuli tee inangari nipaopao ta tale niaikaaiaa nonga ateva ta Iesu Karisto. Liuna avalua o me ita tee ita atoka aikaiaaaita ta Karisto ateva Iesu, tani ghulughuluena tale niaiesoaa ta Karisto, karika va tani aimuli tee inangari nipaopao. Poli tani aimuli tee inangari nipaopao, karika teva eroroo tani ghulughuluena.

¹⁷ “Nau ita paepae salana tani ghulughuluena ta God tale niaikaaiaa ta Karisto, aue ita pae aotu va sesa gheegheleiaaita. Vaalua, ia o Karisto egheegheleita va ita ghelei ssavoto? Karika poi! ¹⁸ Arova amene atulu voto aghe rrutila, voto o eaapasunga va karika aghaaimuli tee inangari nipaopao. ¹⁹ Me mausi inangari nipaopao me aghe matela tale inangari nipaopao me aue amaulue ta God. ²⁰ Aghi aghe mate teela Karisto tale aikotoo, karika va aghi va atokatoka nau ghaine ta Karisto etokatoka etaghi. Maulue ateva ghaine atokatoka etana, atokatoka tale niaikaaiaa tale Natuna ateva God, ghe ailousieinaghila me ghe tau mae sio maamauluaane etaghi. ²¹ Karika aghanna tani velu maamasinaane God me arova ita rooroo tani ghaa nighulughuluena mausi inangari nipaopao, karika righi malloeane matemateane Karisto.”

3

Niaikaaiaa o tani aimuli tee inangari nipaopao

2:7: Apos 22:21. * **2:9:** Pita Tale inangari nge Grik, Kepas. Me tee tale vesi 11 me 14. **2:10:** Apos 11:29-30. **2:12:** Apos 11:3. **2:16:** Apos 15:10-11; Rom 3:20-28; Gal 3:11. **2:20:** Gal 1:4.

¹ Alokapakapa am aGalaisia ngatoa! See ghe ghelei esavisavilaala nannaaimim? Tale nongonongoaaimim nonginaaili va am ghe tara amasi-naailiila matemateaane Iesu Karisto tale aikotoo. ² Aghanna tani kolomiem tale kateva nonga voto: Vaalua am ghe ghaala Spiriti eteva, nau am ghe aimuli teela inangari nipaopao, o poli am ghe aiesoala tale voto am ghe nongola? ³ Ngam alokapakapaaili va? Am ghe tiuaala tani kasu tale Spiriti eteva me ngam anna tani ruu tale aloaloannaa taumattu ngatoa tale kosa ateva, va? ⁴ Voto maateaili am ghe ghaala tale maamauluaaimim, ang ghe nim peisaanela? Karika aghanna va ghe nim peisaane. ⁵ Am anna va God ghe tau aatu sio Spiriti eteva me ghe gheleila mirikol elome etaimim nau am ghe aimuli teela inangari nipaopao o poli am ghe aiesoala voto am ghe nongola?

⁶ Am annaa Abraham: “Ghe atokala tuutulina ta God, liuna avalua o me ghe aseala va ia ghulughuluena ia.” ⁷ Am tani kila amasina va lo atoa la ghaiesoaa, natuna ila Abraham. ⁸ Uru ngai Manga ateva ghe tara amuemua alokoila va God aue eghelei eghulughuluena taumattu ngeleka atoa tale uneira niaikaiaa. Me ghe aulia ngakasinale masi kiukiu ta Abraham va, “Aue ararimangali ekapaaili etoa aue la ghaa niarangise ta ngetam.” ⁹ Liuna avalua o me lo atoa la ghaaiesoaa, la ghaaghaa niarangise ateva tee Abraham, ia tau niaikaiaa ia.

¹⁰ Lo atoa la ghannaa va la ghaimuli tee inangari nipaopao tani ghulughuluena ta matane God, la tokatoka tale nikasikiena, poli laghe pitila va, “Nikasikiena ta lo akapa atoa karika la ghelei voto akapa pitipiti tale vuku nipaopao ateva.” ¹¹ Masalikeaili tani tara va karika teva erooroo tani ghulughuluena ta taataraane God mausi inangari nipaopao, poli, “Lo atoa la ghaaiesoaa, God aue easela va ghulughuluena ila, me aue la mauue.” ¹² Tani aimuli tee inangari nipaopao karika elaolao aitaaua tee uunguaa niaikaiaa. Tale mene kasina salana, “Lo ateva taumattu eghelei isaa o voto, aue etoka tale llo eghelei.” ¹³ Karisto ghe ghaa oghitala tale nikasikiena tale inangari nipaopao nau ia ghe ghaala liuita tale nikasikiena, poli laghe pitila tale Uru ngai Manga va, “Nikasikiena ta lo ateva esae vukala tale ai eteae.” ¹⁴ Ghe ghaa oghitala liuna avalua o me tale uunguaane Karisto ateva Iesu, niarangise ateva ta Abraham aue elao tee ta taumattu ngeleka atoa. Mausina avalua o me tale niaikaiaa aue ita ghaa Spirit Manga ateva God ghe aulieiniela tale inangari nialokoi.

Inangari nipaopao me inangari nialokoi

¹⁵ Kapughu etoa, aghaimatoonga kateva inangari niaimatoonga tale maamauluaaita. Karika teva erooroo tani ue va vulla o emene saooa sae righi nannaane tale inangari niaippooa ngaitauaa taumattu ngatoa laghe nim gheleila. Mausina avalua o me, ¹⁶ inangari nialokoi God ghe auliaala ta Abraham me tuvuna, Uru ngai Manga ateva etam ue va “ta tuvuna atoa” (malloeana va oroi taumattu) ta eue va, “ta tuvuna ateva.” Malloeana va kateva nonga taumattu, Karisto ta ngetana. ¹⁷ Malloeana voto aghanna tani auliaa isaa avalua toko, va God ghe gheleila inangari niaippooa ngaitauaa tee Abraham, me isaa o inangari nipaopao, vara ghaata ai me kotolungauluae (430) ninamanama ghe lange sio me God ghe mene tau lao sio, karika eghaaghaa velu isaa o inangari niaippooa ngaitauaa, me inangari nialokoi. ¹⁸ Poli arova ita ghaaghaa niarangise

3:6: Aitiutiu 15:6. **3:8:** Aitiutiu 12:3; Rom 4:3, 16. **3:10:** Diut 27:26. **3:11:** Abak 2:4; Gal 2:16. **3:12:** Lev 18:5; Rom 8:3. **3:13:** Rom 8:3; Diut 21:23. **3:16:** Aitiutiu 12:7. **3:17:** Eks 12:40. **3:18:** Rom 4:14.

kanna God, poli ita aimuli tee inangari nipaopao, tale isaa o salana karika ita ghaaghaa isaa o voto mausi inangari nialokoi. Poli nim maamasinaane God me ghe tau lao sio ta Abraham tale inangari nialokoi.

¹⁹ O saa uunguaane inangari nipaopao? God ghe nim alokoi saoaala mausi ssavoto, me laghe toitoi tuvuna ateva elutu inangari nialokoi ghe auliaala va aue emae. Inangari nipaopao ghe tiuaala nau ensolo atoa laghe tau lao sio ta taumattu ngateva etiitingina elome etaita me God. ²⁰ Taumattu ngateva elome karika eaimatoonga nonga kativilau pai, me God nim ie nonga kateva nonga ia.

²¹ Vaalua? Inangari nipaopao karika elaolao aitaaua tee inangari nialokoi kanna God? Karika me karika! Poli arova isaa o inangari nipaopao ita ghe ghaala erooro tani tau mae maule, tani ghulughuluena tee aue ghele mae tale inangari nipaopao. ²² Me poli Uru ngai Manga ateva eue va kosa akapa ateva etokatoka tale voto sesa nonginaaili ale mata voovoo ateva, liuna avalua o me voto God ghe auliaala tale inangari nialokoi, God etautau lao ta lo atoa la ghaaiesoaa ta Iesu Karisto.

²³ Auena niaikaaiiaa ghe mae, ami ghe tokatoka tale ale mata voovoo tale uunguaa inangari nipaopao ghe kavati rungainamamila lomosina ta niaikaaiiaa ghe kauerekatila. ²⁴ Mausina avalua o me inangari nipaopao God ghe atokala tani aitarainamami lomosina ta Karisto emae tani ghelei eghulughuluenaitemami poli niaikaaiiaa. ²⁵ Niaikaaiiaa ang ghe mae sio isaa oia nau karika inangari nipaopao emene aitarainamami.

Natuna atoa God

²⁶ Am akapaaili natuna iem God poli aikaaiiaaimim ta Karisto Iesu. ²⁷ Poli am akapaaili am ghe ghaala niasuu ta Karisto, ngam ghe asae atokaiela etaimim nongina ita aasae ghinna. ²⁸ Am akapaaili ang ghe kateva nonga iemla ta Iesu Karisto: karika teva ajiu o aGrik, me karika toa tau ngai uungu me lo atoa la tokatoka tale aloannaaira, me karika toa vause me taita. ²⁹ Poli am ta Karisto, am natuna am Abraham, me voto inangari nialokoi eaauliaa kaluimim.

4

¹ Llo aghaauliaa isaa avalua toko va, aliki eteva aue eghaa peina tamane me nau aliki taita ia, enim tokatoka nongina tau ngai uungu etoa kapuna ila tamane, arongona ta voto akapa peina. ² Nau aliki ia etokatoka ta nimaira lo atoa la ghaaitarainia me lo atoa la loeloea lomosina ta elaa ghaa nau tamane esuisuitoongaa. ³ Ita tee ita avalua o nau aliki ita, raroai etoa la aitaraa kosa ateva oia la gheegheleita va ita nim tau ngai uungu ita. ⁴ Me vara nau God ghe suila ghe rekatala, me ghe suula Natuna ateva, ghe lutula tale vause ateva, me ghe usilaala inangari nipaopao, ⁵ tani ghaa oghi lo atoa inangari nipaopao ghe aitoieinilala me aue natuna ita God. ⁶ Poli natuna am God, ia esuusuu kapuna Spiriti eteva Natuna, tani mae tale urunguitaniita me Spiriti eteva ekolokolo tani ue va, “*Abba, Tamaghi.*” ⁷ Liuna avalua o me io karika va nim tau ngai uungu io ta natuna io. Me poli natuna io, ghe gheleiola va aue ughaa niarangise God ghe auliaala tale inangari nialokoi.

Pol ghe nannangaili aGalaisia ngatoa

⁸ Emua arau nau am ghe tam kila God, tau ngai uungu iem tale goto atoa karika koronna ila. ⁹ Me ia oia ngam ghe kilala God, o aroo tani ue va God

3:19: Rom 5:20; Apos 7:38. **3:21:** Rom 8:2-4. **3:23:** Gal 4:3. **3:24:** Rom 10:4. **3:26:** Jon 1:12. **3:27:** Rom 6:3. **3:28:** Rom 10:12. **3:29:** Rom 4:13. **4:3:** Kol 2:20. **4:4:** Jon 1:14; Rom 1:3. **4:6:** Rom 8:15-17.

ang ghe kilaiemla. Vaalua me ngam mene oghioghi tani lao ta raroai etoa karika sarasarakana ila me karika masina ila, me am aloanna tani mene nim tau ngai uungu? ¹⁰ Am aimuli tee asease nau etoa me ulana atoa me mene kasina ase nivelu eitauaa me ninamanama. ¹¹ Amaamatautu tani nnaa va niuungu aghe gheleila etaimim, erau nim peisaane nonga.

¹² Akolokolo tauem, kapughu etoa, va am ghelei nongina aghi, poli aghi aghe nonginala am. Karika am ghe gheleila righi voto sesa ta ngetaghi. ¹³ Am kilakila va poli mausi isiki eteva me aghe ppooa ngakasinale masi kiukiu etaimim. ¹⁴ Arongo ta isikinna aghi, me aneghi isiki ghe ghelei nitootoonga me maate etaimim me karika am ghe maamango me uessainaghi. Am ghe ghaaieghila nongina va kapuna ensolo ieghi God, me nonginaaili va aghi va Karisto Iesu ta ngetaghi. ¹⁵ Aghaaiesoaa va arova nongina va am ghe rooroo tani valiki velu mataimim me am ghe tau mae aue am ghe rooroo tani ghelei. Isaa o nimasimasi eaa ang ghe lao sio? ¹⁶ Vaalua me isaa oia poli ngaghaauliaa voto koronna etaimim me ngam sessa teeieghi?

¹⁷ Ila o taumattu ngatoa la ghannaaili tani ghaaiem va am lao aitauaa teeila me karika righi masi voto aue elutu. Llo la nim anna va am masau etaimami me aue am aloannaailiila. ¹⁸ Masina tani nnangaili tani ghelei masi voto ta mene katoa. Am elei evalua o nau ekapa atoa, karika va nau atokatoka teeiem nonga. ¹⁹ Masi natughu etoa, poli am me amene mammarikana nonginaaili vause ateva ange moomolena aliki eteva lomosina ta am nongina Karisto. ²⁰ Aghannaaili va arova ghaine nonga aghele toka teeiem me aghele aikolikoliaa samasamaaghi poli aghannangailiem.

Eiga me Seraa

²¹ Am auliaa etaghi, lo atoa am anna tani usilaa inangari nipaopao, va vaalua me karika am kilakila voto inangari nipaopao eauliaa. ²² Laghe piti elokoila va Abraham natuna taita alua. Kateva natuna ia vause ateva tau ngai uungu ia, me kateva ta vausenna tunga ateva. ²³ Lo ateva taita ghe lutula tale vause ateva tau ngai uungu ia, karika etokatoka tale aloannaane, ghe lutula poli nannaaira taumattu nonga, me vausenna tunga ateva, natuna taita ateva ghe lutula poli inangari nialokoi.

²⁴ Isaa o voto eaapasunga etaita va vause alua lalu aimatoonga ghalua nimae aitauaa. Tale inangari niaippooa ngaitauaa kateva tale motouru eteva eSaenae, me ghe alutula aliki aue la nim tau ngai uungu, Eiga etana. ²⁵ Eiga eaaimatoonga motouru eteva eSaenae isaa eArabia me eaaimatoonga tee eJerusalem nau ghaine, poli ia me natuna atoa nim tau ngai uungu ila. ²⁶ Me lo ateva eJerusalem ia epona liu me etokatoka tale aloannaane, ia kinaita ia. ²⁷ Poli Uru ngai Manga ateva eue va, “Umasimasi, vause ateva kina ngere io,

me utam kakkaai aliki;
uaore tale nimasimasi,
io lo ateva ughe tam aateatea mammarikanaane nimolena ngateae;
poli ase vause ateva o kina ngere ia aue oroi natuna
elau lo ateva vause taitanna ateva.”

²⁸ Am, kapughu etoa, am nongina Aisiki, aliki tale inangari nialokoi iem. ²⁹ Tale isaa o nau, lo ateva aliki taita ghe lutula poli nannaaira taumattu ngatoa ghe ghelei voto sesa tale lo ateva aliki ghe lutula tale sarasarakaniaane Spiriti eteva. Nim nongina ghaine. ³⁰ Me sa ateva Uru

4:10: Rom 14:5; Kol 2:16. **4:22:** Aitiutiu 16:15; 21:2. **4:23:** Rom 9:7-9. **4:26:** Hib 12:22; Aotu 21:2, 10. **4:27:** Ais 54:1. **4:28:** Aitiutiu 15:4-5; Rom 9:7. **4:29:** Aitiutiu 21:9-10; Jon 8:35.

ngai Manga ateva eaaulieinia? Eue va, “Suu vella lo ateva vause tau ngai uungu ia karika etokatoka tale aloannaane me natuna ateva. Poli natuna ateva karika poi aue eghaa peina aliki eteva natuna ia lo ateva vausenna tuungi ia.” ³¹ Liuna avalua o me, kapughu etoa, ita karika va natuna ita vause ateva tau ngai uungu ia karika etokatoka tale aloannaane, ta natuna ita lo ateva vausenna tuungia.

5

Tani toka tale aloannaane Karisto

¹ Poli ita rau mene tau ngai uungu, poli Karisto ghe gheleitara va ita toka tale aloannaane. Am tingina akorokorongana me am rau mene tau veluem va am mene nim tau ngai uungu.

² Am nongo inangarighi! Aghi Pol aghaauliaa etaimim va arova am tau veluem me la isoim, karika aue righi uunguaane Karisto etaimim. ³ Amene aaulia ngamasalika ta lo atoa am anna tani tau veluem va la isoim, va am tani aimuli tee isaa akapaaili inangari nipaopao. ⁴ Am lo atoa am anna tani aimuli tee inangari nipaopao me am ghulughuluena, tale isaa o salana eaapasunga va Karisto karika ia etaimim me ngam ghe kasu vulila maamasinaane. ⁵ Me tale Spiriti eteva, tale niaikaiaa ita toitoi rerrekana nighulughuluena ita atoka tuutuliita etana. ⁶ Ta Karisto Iesu ni-isoiso atee me nitam isoiso atee karika righi uunguaairarua, ta niaikaiaa nonga ateva eaapasungainia tale uunguaa niaielousi.

⁷ Am ghe iilou emasina tale niaikarati etee, me see ghe ilou rungainamla me ghe gheleiemla va am rau mene nongo usilaa llo koronna? ⁸ Ia o ase ninanna ngateva etam kasukasu ta lo ateva ekolokoloam. ⁹ Pisike ia tuku isti erighi eroroo tani ghelei verete akapa ateva erranga. ¹⁰ Aghaatoka tuutulighi ta Vau ngepona ateva va karika aue am mene tiu ppae. See ia lo ateva eghelei esavisavilaa nannaaimim aue eghaa aipolipoli sesa. ¹¹ Kapughu etoa, arova ngamene poppooaa uunguaa ni-isoiso, vaalua me la mene ghelei teeieghi voto karika masina? Tale ia o salana atikirighi, inangari aikotoo ateva karika aue emene sesa nongonongoaane. ¹² Me ila o lo atoa la ghelei saasakiaa nannaaimim, aghanna va karika va laghele mene isoila nonga ta la ghele kaati teeila.

Maulue ateva tale Spirit

¹³ Am, kapughu etoa, God ghe koloamla va am toka tale aloannaaimim. Am rau mene nnaa va poli am tokatoka tale aaloannaaimim va am ghelei voto tale nannaaira taumattu tale kosa ateva oia. Am aisausiaa kateva kateva tale niaielousi. ¹⁴ Isaa akapaaili inangari nipaopao eghelei rooroaa nonga tale kateva ninanna eue va, “Uaielousiaa taumattu ngateva kalakalangina ia etam, nongina uaielousieinio.” ¹⁵ Am paniem! Arova am toka aikiso me am aaiuuvieinam, aue am aiturungia ngakapaiem.

¹⁶ Liuna avalua o me aue va, am toka tale uunguaa Spiriti me karika aue am usilaa nannaaimim tani ghelei sesa niuungu. ¹⁷ Poli nannaaita ateva, eanna voto Spiriti eteva etam aaloanna, me Spiriti eteva, eanna voto nannaaita ateva etam aaloanna. Karika lalu rooro tani mae aitaava, liuna avalua o me karika am rooro tani ghelei voto am anna tani ghelei. ¹⁸ Arova Spiriti eteva ekaakatulainiem, karika am uusilaa inangari nipaopao.

¹⁹ Uunguaa sesa ninannaa masalike avalua toko va: niailai salosalooa see, me voto karika raarangisana, me tani nim anna tani ghelei sesa voto, ²⁰ me tani kkauaa tootoo goto, me uunguaa nialaala, me tani sessai, me nitam niaighui, ninannaa saasakiaa, me tau nitoka sessai, me tani nnainio nonga, me niaitiuii poli ase ninannaa, ²¹ me nissaii, me tani toka nannaa saasakiaa tee kateva, me tani ropi sesa manu, me nivelu eitauaa tani ropi me ghelei ssavoto, me mene kasina asease voto sesa. Aghaauliaa kieimim nongina aghe aulia ngakasinala etaimim, va lo atoa la tokatoka avalua o, karika aue la kupi sso tale ararimangalina ateva God.

²² Me uene Spiriti eteva tale niaielousi, nimasimasi, me luei, me karika nisessai parasi, me nighelei masi voto ta mene kateva, me niparruu, me tani kaarasi tani ghelei emasina niuungu, ²³ me uunguaa tani siuaa ninannaa, me tani ghelei nannaam enna ngamasina. Karika righi inangari nipaopao eghelei runga isaa o ase voto. ²⁴ Lo atoa kapuna ila Iesu Karisto, ngeila ghe uvi ematela ninannaa sesa me gheeleiaaira me aloaloannaaira tale aikotoo. ²⁵ Poli ita tokatoka tale Spiriti, ita kasu tee Spiriti eteva. ²⁶ Ita rau mene saeaa nannaaita me tani ghelei esessai kateva me tani nannaa saasakiaa tee mene kateva.

6

Tani sausi mene kateva

¹ Kapughu etoa, arova lo ateva ange kupi ssola tale ssavoto, lo atoa am aimuli tee Spiriti eteva am sama amasinaaili teeia tani ghaa oghia me emene oghi mae. Me utani taatara ta io tee urau sso tale nitotoonga va ukatuu.

² Am sausi tani sau voto maateaili tale mene kateva maamauluaane me tale isaa o voto, am rooroo tani ghelei ekapa voto tale inangari nimae aitauaa kanna Karisto. ³ Poli arova teva eannaa va ia iaaili, nau eteva ia nim lao ia, ia enim kamekamea. ⁴ Kateva kateva etoongi voto eghelei me emasimasieinia. Erau mene tootoonga tani toongi gheeleiaane ta mene kateva taumattu. ⁵ Poli kateva kateva esau voto maate tale gheegheleiaane.

⁶ Lo ateva eghaaghaa masi voto tale inangarina ateva God, eparruu lo ateva eapasunga voto etana tale righi masi peina.

⁷ Am rau mene aikameainam poli karika am rooroo tani kame tee God. Taumattu emukemuke voto epasapasa. ⁸ Lo ateva epasapasa voto sesa tale maamauluaane tani amasimasi nannaane sesa, tale isaa o voto sesa aue emuke voto sesaaili. Lo ateva epasapasa voto masina tani amasimasi Spiriti eteva, aue emuke maulue ateva tokatoka liu ia tale Spiriti eteva. ⁹ Karika ita mene sio asoasooa tani ghelei voto masina, poli aue kateva masi nau aue ita muke masi voto, arova ita tam mangoo. ¹⁰ Liuna avalua o me nau ita roo tani ghelei voto masina tale taumattu ngakapa atoa, ita ghelei tee lao ta lo atoa ila elome ta llo taumattu eaiesooa.

Airuuruu tale inangarina Pol

¹¹ Am tara mata nginangari aghe piti enamuula!

¹² Lo atoa la nim annaa va taumattu ngatoa la tara eeleeiaaira la tani aakorokoronganaiem va la isoieim. La ghelei voto o poli karika la aloanna va taumattu ngatoa la ghelei saasakiaa etaira mausi aikotoo ateva ta Karisto.

¹³ Lo tee atoa isoiso ila, karika la aimuli tee inangari nipaopao, me la nim anna va la isoieim me la ghaasake tani ghelei arariira mausi voto la ghelei tale vilikiimim. ¹⁴ Me ta ngetaghi, karika poi arooroo tani aasakeainaghi,

aghaasakeaa nonga aikotoo ateva ta Vau eteva Iesu Karisto. Poli ta ngetana me kosa ateva ang ghe matela tale maamauluaaghi me aghi tale kosa ateva.

¹⁵ Karika righi uunguaa ni-isoiso atea me nitam iso atea. Tani lutu aouna nonga koronna ia. ¹⁶ Lo akapa atoa la aimuli tee llo aghe auliaala aue la ghaa luei me masi nialousiusi, tee me lo atoa Israeli kapuna ila God.

¹⁷ Karika teva emene tau mae maate etaghi, poli asausau tauramoramomo eaapasunga va aghi tau ngai uungu ieghi ta Iesu. ¹⁸ Alooloo sae va maamasinaane ateva Vau eteva Iesu Karisto aue etoka tee lo ateva spiriti etaimim, kapughu etoa. Koronnaaili.

Uru ngai etikirighi Pol ghe pituela ta alpises atoa Inangari emuemua

Ipises kinatama masaliki taatara ia tale provinsi eteva eEisia, tale patungane namu ngateva ghaine ita aseasea va Teki. Pol ghe tokala eIpises kotoluae ninamanama (Apostolo 19) tale unna aiaakotonna atea nikasu, me masi kiukiu ghe kasu ekapa seela tale provinsi eteva eEisia. Katoa tau ngaiesoaa eIpises ajiu ila, me oroi ila lo atoa karika ajiu ila. Tale ia o uru ngai etikirighi, Pol ghe apasungaala va ajiu etoa me tau ngeleka atoa kateva nonga ila, poli ita akapaaili vaulanina ita Karisto. Karika mene righi niaipolapolaaii ta ajiu etoa me tau ngeleka atoa, poli matemateane Karisto ghe apalala ia o niaipolapolaaii eteae. Tau ngaiesoa ngakapa atoa la tani toka tee katoa tale masi nitoka, tale femili, ale manga, me niuungu. Pol ghe pitula inangari ita akapa ita kilakila, tale ghinna niaiuvi kanna God.

Tani kila amuemua

Aitiutiu tale inangari 1:1-2

God ghe ghelei ekatevaitala ta Karisto 1:3-3:21

Vaalua tani toka nongina ouna ateva taumattu 4:1-6:20

Airuuruu tale inangari 6:21-24

¹ Aghi, Pol, kapuna apostolo ieghi Iesu Karisto, tale aloannaane God.

Apitipiti etaimim kapuna taumattu ngatoa God, am tokatoka eIpises,* am aiesoaa ta Iesu Karisto.

² Alooloo sae va maamasinaane me luei ekasukasu ta God Tamaita ia me Vau ngepona ateva Iesu Karisto aue etoka teiem.

Niarangise manga, isaa ta Karisto

³ Ita tau sae God, kapuna Goto ia kapuita Vau eteva Iesu Karisto, me tee Tamane ia, ghe arangiseitala tale masi voto akapa tani sausi kapuita spirit. Isaa o masi voto ghe mae sio epona liu ta Karisto. ⁴ God ghe suimatoongainitala ta Karisto me auena aitiutiu tale kosa ateva va ita manga me ita raarangisana ta matane elome tale niaielousi. ⁵ Emua arau ghe suimatoongainitala va aue eghaaita me enatuna ita mausi Iesu Karisto, poli ghe masimasieiniela me ghe aloannala tani ghelei evalua o. ⁶ Liuna avalua o me ita tau sae God tale kinatama maamasinaane, ghe nim tau mae sio etaita tale Natuna eaielousieinia. ⁷ God ghe poli aaoghitala tale matemateane Iesu, me ghe kkaluaala kaluita ssavoto, poli God pasu ia tale maamasinaane etaita, ⁸ me ghe tau mae sio oroieili maamasinaa me ghe gheleitela va ita alomasaanga, me ita rooroo tani kila voto koronna kanna God. ⁹ God ghe apasungaala etaita voto aisulianna eanna tani ghelei, poli ghe masimasieiniela, me ghe aloannala tani ghelei isaa o voto ta Karisto. ¹⁰ Ghe aloannala va nau eteva ghe suimatoongainiela, aue eatoka aitaaua isaa akapaaili voto epona liu me tale kosa ateva oia, va Iesu aue emuemueaa.

¹¹ Ta ngetana God ghe suimatoongainiemamila va ami kapuna taumattu iemami, poli ang ghe nnaa vella emua arau tani ghelei isaa o voto, me

1:1: Apos 18:19-21; 19:1. * **1:1:** Kasina uru ngai laghe pitula, karika laghe pitula va am tokatoka eIpises. **1:3:** Ips 2:6. **1:4:** Jon 15:16. **1:5:** Jon 1:12. **1:7:** Ips 2:7; Kol 1:14. **1:9:** Rom 16:25. **1:10:** Kol 1:16, 20. **1:11:** Rom 8:28-29.

God egheelei isaa akapa voto nongina aloannaane. ¹² Ghe suimatoon-gainiemamila poli ghe aloannala va ami lo atoa ami ghe aitiutiula tani aiesoaa ta Karisto, ami tau sae inasanina God. ¹³ Me am tee ange kapuna iemla God, nau ngam ghe aiesoala kiukiu koronna, ia o masi kiukiu eteae eaauliaa vaalua God ghe asaangiemla. Nau am ghe aikaaijala ta Karisto, God ghe aimatoongainiemla va kapuna am: ghe tau aatu sio Spirit Manga ateva tale inangari nialokoi. ¹⁴ Spirit Manga ateva ia aitiutiu eteva aipolipoli, tani apasunga va aue ita ghaa sa ateva God ghe aulia ngalokoiela tale inangari nialokoi, va aue etauela ta kapuna taumattu ngatoa. Isaa avalua o me God aue eghaa oghi lo atoa kapuna ila, me aue ita tau sae inasanina God.

Nikaili emasina tale nilooloo sae

¹⁵ Mausina avalua o me nau aghe nongola uneimim niaikaaija ta Vau eteva Iesu me ailousiaaimim ta kapuna taumattu ngakapa atoa God, ¹⁶ karika aghe kakalueinam tale nilooloo sae, tani kaili emasina ta God mausiimim. ¹⁷ Me alooloo sae ta kapuna God ateva Vauita ateva ta Iesu Karisto, ia Tamaita ia etokatoka tale mallanga ateva. Akookolomi va etau aatu Spiriti eteva tani gheleiem me am alomasaanga me Spiriti eteva aue eapasunga ngaotu God etaimim me aue am roo tani kila amasinaia. ¹⁸ Me akookolomi tee va eoti nannaaimim me aue am atoka amuemue nannaaimim tale voto ghe koloamla etana me vaalua ooro ia kanna niarangise ghe auliaala tale inangari nialokoi va aue etaula ta kapuna taumattu manga. ¹⁹ Me akookolomi va am kila vaalua kinatama sarasarakaniaane ateva euungu elome etaita lo atoa ita aikaaija. Ia o sarasarakana ateva euungu elome etaita korokoronganaaili ia, ²⁰ ghe uungula etana nau ghe totula Karisto tale nimate, me ghe atokaiela tale pai muenna atelange epona liu. ²¹ Karisto ia namuu ia ta ensolo akapa atoa me spiriti ekapa atoa, me ia emuemuea ngakapa tau ngaitoitoe etoa nau ghaine me auena. ²² God ghe tau ekapa lao sio ninamu ngateae ta Karisto me ghe suitoongainiela va emuemuea ngakapa voto tale ale manga. ²³ Ale manga ateva vaulanina ia Karisto, me ia ghe apasula ale manga ateva tale sarasarakaniaane, me ghe tau lao sio maulue ateva tale isaa akapaaili voto tale isaa akapaaili salana.

2

Ita ghe mene mauluela ta Karisto

¹ Emua arau am ghe tokatoka tale nimate tale kaluimim nitam nongo usilaa me ssavoto. ² Tale isaa o nau am ghe aaimuli tee uunguaa kosa ateva oia karika masina. Am ghe aaimuli tee uunguaane lo ateva emuemueaa uunguaaira sesa spiriti etoa epona elomarase. Isaa o sesa spiriti ghaine ekaakatulaa isaa o taumattu karika enongonongo usilaa God. ³ Nau ang ghe lao sio ita ghe tokatoka nongina ila. Ita ghe aaloanna tani amasimasi sesa aaloanna vilikiita me nannaaita. Me ita ghe roola tani ghaa sessaiaane God. ⁴ Me karika, ta God ghe aielousiangailiita, me pasueili ia tale aalousiusiaane. Liuna avalua o ⁵ me nau ita ghe tokatoka tale nimate tale kaluita nitam nongo usilaa, ghe ghelei emaulueitala ta Karisto. Tale maamasinaane God am ghe saangala. ⁶ Ghe totutala tani maulue tee Karisto, me ghe atoka aitaueinitala me Karisto Iesu epona liu. ⁷ Ghe apasungaala etaita aalousiusiaane tale isaa o salana ta Karisto Iesu, me tale isaa to nau

1:14: 2 Ko 1:22. **1:17:** Kol 1:9. **1:19:** Kol 1:11. **1:20:** Sams 110:1; 2 Ko 13:4; Kol 2:12.
1:21: Kol 1:16; 2:10. **1:22:** Sams 8:6. **1:23:** Ips 4:10, 15; Rom 12:5; Kol 1:18. **2:1:** Kol 1:21;
 2:13. **2:2:** Kol 3:7; Tts 3:3. **2:3:** Kol 3:6. **2:4:** Rom 6:11-13. **2:6:** Kol 2:12.

emaemae, taumattu ngatoa aue la tara maamasinaane namungaili, elaulau ekapa voto atoa. ⁸ Poli tale maamasinaane, am ghe saangala tale niaikaaiiaa, me karika va tale sarasarakaniaaimim, ta God ghe nim tau mae sio. ⁹ Karika va am ghe uunguaala va am roo tani aasake. ¹⁰ Poli ita, God ghe gheleitala. Ghe tau mae sio maulue etaita ta Iesu Karisto tani ghelei masi niuungu God ghe aimonomosiaa ngalokoila etaita tani ghelei.

Kateva nonga ita ta Karisto

¹¹ Liuna avalua o, am annaa parasi va nau ang ghe lao sio, nau am ghe lutula, karika va ajiu iem, ta am tau ngeleka am, me lo atoa la aseasela va “isoiso ila” laghe kolokoloam va “karika isoiso iem”. (Isaa o voto la ghelei ta vilikiira, nim taumattu ngatoa la ghelei me karika va God.) ¹² Isaa akasina am ghe maamasau ta Karisto. Am karika taumattu nge Israeli em, ta ativuu iem tale kanna inangari niaippooa ngaitauaa tale inangari nialokoi, ta am ghe tokatoka tale kosa ateva oia me karika am ghe kilakila God, me karika rigi masi voto am ghe toitoi. ¹³ Me ghaine ta Karisto Iesu am lo atoa am ghe maamasaeili ta God, ngam ghe mae akalakalaa sio poli raena ateva Karisto.

¹⁴ Poli ia luei ia etaita, ghe gheleila ajiu etoa me taumattu ngeleka atoa laghe kateva nongala. Niaissa ghe tokatoka arova aivatativi eteva, me Karisto ghe ghaa veluela, ¹⁵ tale matemateaane, ghe atoka lange sio mua kaluira inangari nipaopao ajiu etoa, poli nannaane tani ghelei eouna taumattu ngalua, ajiu etoa me taumattu ngeleka atoa, tani kateva nonga, me tale ia o salana atikirighi aue eghelei luei. ¹⁶ Ghe matela tale aikotoo tani atoka aitaaua pai eluevilau va lalu kateva nonga me ekapuna ilalua God, me tale aikotoo ghe ghelei ematela uunguaa niaisessaii ghe tokala emua arau. ¹⁷ Ghe mae sio tani aulia ngaotu luei etaimim lo atoa masaeili em ta God, me luei ta lo atoa kalakalangina ila. ¹⁸ Poli tale matemateaane ita akapa ita rooro tani mae ta Tamaita ateva God tale kateva nonga Spiriti.

¹⁹ Liuna avalua o me lo atoa karika ajiu iem, ghaine karika ativuu iem, ta ita tokatoka tale kateva nonga ararimangali, ararimangalina ia God. Am elome tale natuna atoa God. ²⁰ Am nongina ale ateva, God ghe atulueta epona ta apostolo atoa me propete atoa nongina suena atoa, me Iesu Karisto ia aitiutiueteva suena la aipatolaa lao etana. ²¹ Ta Iesu ia akapa ale ateva eaaipatolaa me esaesae aitaaua me manga ia ta Vau ngepona ateva. ²² Me ta ngetana am tee am aipatolaa tee ajiu etoa, me am tokatoka aitaaua tee Iesu, me God aue etoka aitaaua teiem tale kanna Spirit Manga ateva.

3

Pol ghe uungu ta taumattu ngeleka atoa

¹ Liuna avalua o aghi, Pol, tau karavusu ieghi mausi Iesu Karisto, me poli mausiimim taumattu ngeleka atoa, aloolo sae ta God.

² Aghaaiesoaa va ngam ghe nongola va tale maamasinaane God ghe tau mae sio etaghi uunguaa nippooaa mausiimim. ³ Nongina ngapiti ekasinala tale ia oio uru ngai etikirighi, karika apiti aaoroila vaalua voto aisulianna God ghe apasungaala etaghi. ⁴ Nau am riti isaa o voto aghe pitila, aue am kila vaalua kilakilaaghi tale voto aisuliaane eauliaa Karisto. ⁵ God karika ghe apasungaala ta llo akasina atoa vituu emua arau, me ghaine tale kapuna

2:9: 1 Ko 1:29-31; 2 Tim 1:9. **2:10:** Tts 2:14. **2:12:** Kol 1:21; Rom 9:4. **2:13:** Kol 1:20.
2:14: 1 Ko 12:13. **2:15:** Kol 2:14. **2:16:** Kol 1:20, 22. **2:17:** Ais 57:19. **2:19:** Ips 3:6.
2:20: 1 Ko 3:11. **2:21:** 1 Ko 3:16. **2:22:** 1 Pita 2:5. **3:1:** Plp 1:7, 13. **3:2:** Kol 1:25.
3:3: Ips 1:9-10; Kol 1:26.

Spirit Manga ateva ange aapasunga ta kapuna apostolo atoa manga ila me tee propete atoa. ⁶ Voto ateva aisulianna ia, ia avalua toko: va poli taumattu ngeleka atoa la aikaaiaa tale masi kiukiu eteae, la rooroo tani ghaa aitauaa masi voto kanna God tee Israeli etoa, me tee ekateva nonga ita tale vaulaniita me ita akapa aue ita ghaa llo voto ghe auliaala tale inangari nialokoi ta Iesu Karisto.

⁷ Tale maamasinaane, God ghe tau mae sio ia oia niuungu eteva tani ppooaa masi kiukiu eteae. Ghe ghelei evalua o tale uunguaane sarasarakanaaaili. ⁸ Arongona ta aghieili euu ta kapuna taumattu ngakapa atoa God, ia oia maamasinaane ateva God ghe nim taue mae sio etaghi: tani aulia ngaotu ta taumattu ngeleka atoa isaa o masi voto ta Karisto karika ita rooroo tani kila akapa. ⁹ God, ia o ghe ghelei ekapaailiila voto, ghe suimatoongainaghila tani aulia ngamasalikangaili ta ila akapa taumattu ngatoa ia oia voto ateva aisuliaane ia. God karika ghe apasungaala voto aisuliaane lomosina ta ghaine. ¹⁰ God ghe nnaala va tale isaa oia nau ensolo akapa atoa me spiriti etoa elomarase aue la tara kinatama aalomasaanganiaane God tale kapuna taumattu ngatoa. ¹¹ God ghe nnaala va aue eghelei evalua o ta Karisto Iesu kapuita Vau ia me avirina ghe vira gheleila kosa ateva. ¹² Ita rooroo tani lao ta God me ita rau mene matautu tani lao etana, poli ita aaiesoaa ta Karisto me ita tokatoka aitauaa teeia. ¹³ Liuna avalua o, akookolomiem va am rau mene sio asoasooa tale voto maate aghaaghaa mausiimim, poli isaa o nonga voto me aue am roo tani aasake.

¹⁴ Mausina avalua o me asuusuuiaa sio ta Tamaita ateva, ¹⁵ ia ghe gheleila pamili ekapa atoa epona liu me tale kosa ateva. Liuna avalua o me la ghaaghaa maulue ta God. ¹⁶ Aalooloo sae va tale aarangiseaane namungaili, ia aue eakorokorongana urunguitaniimim tale sarasarakaniaane kapuna Spiriti eteva. ¹⁷ Me aalooloo sae va aue Karisto erooroo tani toka tale urunguitaniimim tale niaikaaiaa. Me aue am tingina akorokorongana tale niaielousi nongina ai eteae oane eaakorokoronganaia, ¹⁸ me am me kapuna taumattu ngakapa atoa God aue am ghaa sarasarakana tani kila nongina vaalua naanamungaane, aaluseaane, maamasauaane sae me siosio liuaane, aielousiaane ateva Karisto. ¹⁹ Me aalooloo sae va aue am kila ia o aielousiaane ateva Karisto elaulau isaa akapa alomasaanga, me gheleiaaimim aue elao aitauaa tee gheleiaane God.

²⁰ Ita tau sae God tale sarasarakaniaane, erooroo tani ghelei oroieili asease voto elaulau voto ita rooroo tani kolomi me nnaa. Ia o sarasarakana ateva euungu elome etaita. ²¹ Liuna avalua o me ita tau sae God elome tale ale manga me tee Karisto Iesu tale ila akapaaili vituu etoa tale nau ekapaaili etoa. Koronna.

4

Ita uungu eitauaa tee Karisto

¹ Me aghi Pol, tau karavusu ieghi mausi Iesu Karisto, aghaaulia ngakorokorongana etaimim va am toka amasina tani apasunga va God ghe koloamla. ² Am kaarasi tani sioaa nannaimim, aippooaimim esaghuighuiena, me erau mene sessai parasiem, me arova kateva eghelei saasakiaa etaimim, am kkaluaa gheleiaane me am nim aielousieinia. ³ Am tootoonga tani poso parasi uunguaa nitoka aitauaa kanna Spirit Manga

ateva egheelei tale luei. ⁴ Ita kateva nonga ita nongina vaulaniita ateve, me kateva nonga ia Spiriti eteva. Tale ie nonga o salana atikirighi God ghe koloamla tale kateva nonga ia nitaatara lao emua. ⁵ Kateva nonga ia Vau eteva, me kateva nonga ia niaikaaia ngateva, me kateva nonga ia niasuu eteva. ⁶ Kateva nonga ia God ateve Tamaita akapa ia, me ia emuemuaa taumattu ngakapa atoa, me euungu etaita akapa, me etokatoka elome etaita akapa.

⁷ Me Karisto ghe tau mae sio ta kateva kateva etaita maamasinaane me tale aloaloannaane etautau mae voto ealona tani tau mae. ⁸ Liuna avalua o me Uru ngai Manga ateve eue va,

“Nau eteva ghe laa saesae

ghe muamuaala tau karavusu etoa

me ghe tau lao sio masi voto atoa ta taumattu ngatoa.”

⁹ Vaalua malloeana va ghe saela epona liu? Malloeana va ghe sio mae akasina mua tale kosa ateve. ¹⁰ Ia ghe sio mae epona liu, ia ghe laa sae kasu elomarase, me erooro tani toka tale voto akapaaili. ¹¹ Ia ghe taula sarasarakana va katoa la roo tani apostolo, me katoa la propete, me katoa la tau ngai ppooaa, me katoa la pasta me la tau ngai aapasunga. ¹² Ghe gheleila llo tani aipanipaniaa kapuna taumattu God, tani uunguaa uunguaane, liuna avalua o me vaulanina ateve Karisto* ekorokorongana me etoka amasina, ¹³ lomosi ta ita akapa ita mae aitauea tale kateva nonga niaikaaiaa, me tale alomasaanganiaane Natuna ateve God, me ita matuenna me ita nongina Karisto.

¹⁴ Me karika ita mene nongina natu ngaliki etoa, va ila o lo atoa muenna ila tani aikameaa la toka kamekameta see nongina kotoo ateve me kuukuu eteva evebbeita see, me la gheelei asease inangari etoa tani apasunga me tani kame mene katoa taumattu. ¹⁵ Liuna avalua o me ami aaulia ngakoronna tale niaielousi, va tale isaa akapa voto ita gheelei, ita gheelei etana, ta ia Karisto uruita ia. ¹⁶ Eposoposo aitauea vaulanina ateve Karisto me epiipinosa amasina, arova kateva kateva etaita egheelei uunguaane. God eaaloanna isaa akapaaili voto tale vaulanina ateve Karisto va la aipatola ngaitauaa tale niaielousi.

Am toka nongina taumattu tale mallanga atoa

¹⁷ Liuna avalua o me aghaloannaaili va tale ararina atea Vau palepale am rau mene kasu nongina taumattu ngatoa karika la aiesoaa, me nannaaira nim lao. ¹⁸ Nannaaira saurorromiena, la maamasaeili ta maamauluaane God, poli urunguitaniira korokoronganaaili, liuna avalua o me karika la kilakila God. ¹⁹ Karika la paapalata, liuna avalua o la nim anna tani ghelei sesa voto, me la ghannaaili tani toka gheelei asease voto karika raarangisana.

²⁰ Am karika va am ghe kilala Karisto tale isaa o ase salana. ²¹ Koronnaaili, am ghe nongola etana, me laghe aaulieinia etaimim va voto koronna isaa ta Iesu. ²² Laghe apasungaala ta ngetaimim va am ghaa velu poka gheleiaaimim ang ghe lao sio, me am ghaa velu pokane ateve taumattu ang ghe sesala tale aloannaane kamena. ²³ Me am tau velu God eghelei eouna gheleiaaimim me nannaaimim. ²⁴ Me am mene atoka ouna ateve taumattu God ghe gheleila va enongina God. Me gheleiaaimim aue eghulughuluena me emanga poli am tokatoka tale llo koronna.

4:6: 1 Ko 12:6. **4:7:** Rom 12:3, 6. **4:8:** Sams 68:18. **4:9:** Jon 3:13. **4:11:** 1 Ko 12:28.

* **4:12:** vaulanina ateve Karisto Utara Ipises 1:23. **4:13:** Kol 1:28. **4:15:** Kol 1:18; 2:19. **4:17:** 1 Pita 1:14; Rom 1:21. **4:22:** Rom 8:13; Kol 3:9. **4:23:** Rom 12:2. **4:24:** Aitiutiu 1:26; Kol 3:10.

²⁵ Liuna avalua o me kateva kateva etaimim eghaa velu nikamekame, me eaippooa ngakoronna tee lo atoa ita aiesoa ngaitauaa ta Karisto, poli ita akapaaili kateva nonga ita. ²⁶ “Nau ange sessaiola, urau mene tau velu sessaiaam va egheleio me ukupi sso tale ssavoto,” me erau mene toka sessaio ta kateva nau lomose ta sinaka ateva esuu, ²⁷ ta Satana erau tingina akorokorongana tani akatungio. ²⁸ Lo ateva eaainao nonga eruu tani ainao, me etiuua tani uungu tani ghelei masi voto esausi lo atoa la ghaloanna niaisausi.

²⁹ Am rau mene auliaa righi voto tani ghelei saasakiaa kateva taumattu, ta am auliaa nonga masi voto aue esausi lo atoa la anna niausui, me am akorokorongana. ³⁰ Karika am mene ghelei alousiusi kapuna Spirit Manga ateva God, poli ia eaaimatoonga va am kapuna am God me aue eghaa oghiem. ³¹ Am ghaa velu sesa niateatea, me nisessaia etiituaa elome me eghooa eleka, me niaiuvi, me niauliaa saasakiaa, me tee isaa akapaaili sesa gheeleiaaimim. ³² Am ghelei masi voto ta mene katoa, me am apasunga niaielousi, me am kkaluaa sesa gheeleiaaira katoa, nongina God ghe kkaluaala kaluimim sesa voto ta Karisto.

5

¹ Liuna avalua o, me am usilaa gheeleiaane God, poli am natuna am God, me eaaielousiangailiim. ² Me am tokatoka tale maulue ateva pasu ia tale niaielousi, nongina Karisto ghe aielousieinitala me ghe tau mae sio maamauluaane ta ngetaita nongina lo ateva o aiaavususuvusena egheelei emasimasi God.

³ Me elome ta ngetaimim karika am mene toka tale uunguaa niailai salosalooa see, va taumattu ngatoa la toka aulieinam, o righi ase niuungu karika raarangisana, o nikuruetu, poli isaa oia voto karika masina ta kapuna taumattu God manga. ⁴ Karika mene righi niamakatakata, o niaippooaa alokapakapanna, o ase inangari niaikusi. Karika, ta am kaili emasina tale voto masina. ⁵ Me tale isaa oia voto am rooroo tani kila amasina va: lo ateva eailai salosalooa, me lo ateva etam raarangisana, me lo ateva esassaii voto (nim aikkauaa tootoo goto ia), isaa o taumattu karika aue la ghaa righi masi voto tale ararimangalina ateva Karisto me God. ⁶ Karika am mene tau veluem va la kameam tale inangari karika koronna, poli sessaiaane God ange maemae ta lo atoa karika la nongonongo usilaa. ⁷ Liuna avalua o me karika am mene aighui teeila tale sesa gheeleiaaira.

⁸ Poli isaa akasina am ghe tokatoka tale saurrom, me ghaine am, mallanga iem ta Vau ngepona. Am toka nongina aliki tale mallanga iem. ⁹ (Poli mallanga ateva eaalutu voto masinaaili, ghulughuluena me koronna.) ¹⁰ Me am tani ghaa alomasaanga va sa ateva egheelei emasimasi Vau ngepona ateva. ¹¹ Karika am mene kupi sso tale uunguaa saurrom ateva karika righi uenenna, ta am mae aulia ngaotu ia o ase niuungu tale tummatavanga. ¹² Poli pei palata tani auliaa voto la ghelei eisulia tale tummatavanga. ¹³ Ta voto akapa tale saurrom, mallanga ateva aue eghelei eotu, ¹⁴ poli mallanga ateva eghelei isaa akapaaili voto eotuotu. Liuna avalua o me laghe uela ta lo atoa taumattu karika la ghaaiesoaa va,
“Am anguu taatarala, tau niasekanue atoa,
am totula tale nimate,

4:25: Kol 3:8-9; Sek 8:16. **4:26:** Sams 4:4; Jms 1:19-20. **4:29:** Kol 4:6. **4:30:** Ais 63:10; 1 Tes 5:19; Ips 1:13-14. **4:31:** Kol 3:8. **4:32:** Mat 6:14; 18:22-35; Kol 3:12-13. **5:1:** Mat 5:48. **5:2:** Hib 10:10; Eks 29:18. **5:5:** 1 Ko 6:9-10; Kol 3:5. **5:6:** Kol 2:4, 8; Rom 1:18. **5:8:** Ips 2:13; Kol 1:13; 1 Pita 2:9; Jon 12:36. **5:13:** Jon 3:20-21. **5:14:** Ais 26:19; Rom 13:11.

me Karisto aue emallanga ta ngetaimim.”

¹⁵ Am tani aitaraa vaalua am tokatoka — karika va nongina lo atoa karika alomasaanga ila, ta nongina alomasaanga atoa. ¹⁶ Nau urooroo tani ghelei voto masina, ughelei voto masina urooroo tani ghelei, poli nau oia sesa nau. ¹⁷ Liuna avalua o, me karika am mene alokapakapa, ta aloimim emasaanga aloalonnaane Vau ngepona ateva. ¹⁸ Karika am mene ropi oroieili uaeni va eghelei esavisavilaa nannaaimim, me aue ekatulainiem lao tale voto sesaaili. Karika, ta am pasu tale Spirit Manga ateva. ¹⁹ Am aippooaa tee kateva kateva tale nikkinari, me masi kkinari tani kkinari tau sae, am kkinari me am ghelei miusik tale urunguitaniimim esae ta Vau ngepona ateva. ²⁰ Nau ekapa am kaili emasina sae ta God Tamaita ia tale isaa akapaaili voto, tale ararina ateaie Iesu Karisto Vauita ia.

²¹ Am tau veluem tani ghelei voto katoa la ghaaloanna me karika va aloannaaimim, tani oneoneaa Karisto.

Vause atoa me taita atoa lailai ila

²² Vause atoa lailai iem, am tau veluem tani ghelei voto taitaniimim atoa la ghaloanna me karika va aloannaaimim, nongina am ghelei ta Vau ngepona ateva. ²³ Poli taita ateva uruna ia vausenna ateva nongina Karisto uruna ia ale manga ateva, me ale manga ateva vaulanina ia. Ta Karisto ghe asaangitala. ²⁴ Nongina ale manga ateva eaatoka nannaane ta Karisto, vause atoa lailai iem tee am aatoka nannaaimim ta taitaniimim atoa tale isaa akapaaili voto.

²⁵ Taita atoa lailai iem, am aielousiaa vauseniim atoa, nongina Karisto eaaielousiaa ale manga ateva, me mausina me ghe tau lao sio maamauluaane ²⁶ tani gheleie manga ia me raarangisana ia, eghe poraiela tale inangari eteva me tale manu eteva. ²⁷ Ghe ghelei evaluela o tani ghaa lo ateva o ale manga masinaaili taataraane, me karika righi tungitungiena, o kolukoluena, o righi voto eghelele saasakiaa taataraane, ta manga ia me karika righi voto sesa etana. ²⁸ Tale ia o ase salana atikirighi, taita atoa am tani aielousiaa vauseniim atoa, nonginaaili va am aaielousiaa vilikiimim. See eaaielousiaa vausenna ateva, eaaielousieinia. ²⁹ Karika teva esessaia tale vilikina ateva, ta eangiinginia me eaaitaraa vilikina, nongina Karisto eghelele tale ale manga ateva. ³⁰ Ta ita, vilikina ita Karisto. ³¹ “Liuna avalua o me taita ateva ekasukasu vuli tamane me kinna me ekaakateva nonga ilalua me vausenna ateva, me ilalua aue lalu kateva nonga tale vilikiiraru.” ³² Isaa oia llo karika ita rooroo tani kila akapa malloeana, me aghi aghaauliaa Karisto me ale manga ateva. ³³ Liuna avalua o, kateva kateva ta ngetaimim etani aielousiaa vausenna ateva, nongina etani aielousieinia, me vausenna ateva etani oneoneaa taitanna ateva.

6

Aliki etoa me tamaira me kinaira atoa

¹ Aliki etoa, am nongo usilaa tamaim me kinaim atoa, poli am kapuna iem Vau ngepona ateva, me isaa o voto ghulughuluena. ² “Uoneoneaa tamam me kinam,” — ia oia inangari nipaopao ateva, aitiutiu ia tale llo inangari nipaopao elaolao aitaaua tee inangari nialokoi — ³ “me isaa akapaaili voto aue emasina etam, me tee tokatokaam aue aluse tale kosa ateva oia.”

5:15: Kol 4:5. **5:18:** Luk 21:34. **5:19:** Kol 3:16. **5:20:** Kol 3:17. **5:21:** 1 Pita 5:5.
5:22: Kol 3:18; 1 Pita 3:1. **5:23:** 1 Ko 11:3; Ips 1:22. **5:25:** Kol 3:19; 1 Pita 3:7. **5:26:** Tts 3:5.
5:27: 2 Ko 11:2; Kol 1:22. **5:31:** Aitiutiu 2:24; Mat 19:5. **5:32:** Aotu 19:7. **6:1:** Kol 3:20. **6:2:** Diut 5:16.

⁴ Lo atoa taita natuena am, am rau mene ghelei natuim atoa va esessaila, ta am apinosaila tale masi salana, me tale alomasaanga me tale niapasunga Vau ngepona ateva eaaloanna.

Tau ngai uungu etoa karika la tokatoka tale aloannaaira, me vauira atoa

⁵ Tau ngai uungu etoa karika am tokatoka tale aloannaimim, am nongo usilaa lo atoa la aitoieiniem tale kosa ateva oia, me am oneoneainila tale urunguitaniimim akapa ateva nongina va am nongonongo usilaa Karisto. ⁶ Me karika am mene nnaa va nau la taataraiem nonga, karika. Poli am tau ngai uungu iem ta Karisto me karika am tokatoka tale aloannaaimim. Liuna avalua o, tale urunguitaniimim akapaaili, am uungu aanasa tani ghelei saa voto God ealoanna va am ghelei. ⁷ Am annaaili tani uungu tee nimasimasi, nongina va am uungu ta Vau ngepona ateva me karika va taumattu ngatoa. ⁸ Arova tau ngai uungu io utokatoka tale aloannaam o karika, ukilakilaaili va Vau ngepona aue etau aatu aipolipolim tale masi niuungu ugheelei.

⁹ Me vau etoa, karika emene aloimim nonga ta katoa tana kapuimim tau ngai uungu karika la tokatoka tale aloannaaira, me am rau mene amatautula, poli am kilakila va lo ateva Vauira ia me Vauimi ia tee, ia epona liu. Ia karika eghelei tani anna katoa me katoa karika.

Ghinna niaiuvii kanna God

¹⁰ Airuuruu tale inangarighi, isaa avalua toko va, am toka akorokorongana ta Vau eteva me tale kinatama sarasarakaniaane. ¹¹ Am asae akapaaili ghinna niaiuvii kanna God, me aue am roo tani tingina akorokorongana tale sesa uunguaane namu ngateva ta raroai etoa. ¹² Karika va ita aaiuvii tee taumattu, ta ita aaiuvii tee asease spiriti etoa epona me euu, me asease sarasarakana ita tam taatara, me asease voto atoa sarasarakanaaili ila pei saurrom, ghaine la aitoiaa kosa ateva oia. ¹³ Liuna avalua o me am asae akapaaili ghinna niaiuvii kanna God me tale nau sesa, aue am roo tani tingina akorokorongana. Me nau ta ngam aipanipania ngakapaailiila am roo tani tingina. ¹⁴ Liuna avalua o me am tingina akorokorongana me am iriem tale ai-iri eteae tale voto koronna nonga etaliaa usueimim, me am asae tee tuku kapa ateva eaakou runga kassauimim, eaimatoonga niuungu ghulughuluena. ¹⁵ Me tale kkeimim, am asae aikasukasu tani aimonomosieinam tani ppooaa masi kiukiu luei etana. ¹⁶ Me tee am ghaa aighelei runga vaalau eteva eaimatoonga niaikaaiiaa, poli ta ngetana aue am roo tani apala isaa akapa unna vaalau sesa taumattu ngateva ataataana esoasooa mae etaimim. ¹⁷ Am ghaa kou nguru eteva egheelei runga uruim ateva, eaimatoonga niasaangi, me am ghaa baenata ateva unna ia Spiriti, ia o inangarina ia God. ¹⁸ Am rau mene ainoana tani looloo sae mausi mene kasina taumattu. Nau ekapaaili am looloo sae tale asease nilooloo sae akapa, nongina Spirit Manga ekatulainiem. Am atae nau ekapaaili me am looloo sae mausi kapuna taumattu ngatoa God.

¹⁹ Me am kookolomi tee ta God mausighi tani tau mae inangari etaghi nau aue appooaa, me arau mene matautu tani ppooa ngaotu voto aisulianna tale masi kiukiu. ²⁰ Aghi aghaaghaa liuna ateva God tani ppooaa, me aghi tale ale mata voovoo, liuna avalua o am kokkolomi sae va arau mene matautu tani ppooaa, nongina God eaaloanna.

6:4: Kol 3:21; Sams 78:4; Nitoka 22:6. **6:5:** Kol 3:22-23; Tts 2:9-10; 1 Pita 2:18. **6:8:** 2 Ko 5:10; Kol 3:24-25. **6:9:** Kol 4:1; Rom 2:11. **6:11:** Rom 13:12; 2 Ko 10:4. **6:12:** 1 Pita 5:8-9. **6:14:** Ais 11:5; 59:17; 1 Tes 5:8. **6:15:** Rom 10:15. **6:17:** Hib 4:12. **6:18:** Luk 18:1; Kol 4:2; 1 Tes 5:17. **6:19:** Kol 4:3-4; 2 Tes 3:1. **6:20:** 2 Ko 5:20; Plm 9.

Airuuruu tale inangarina Pol

²¹ Tikikus aue eaulia ngakapa voto ghe ailutuaala etaghi me voto agheelei. Ia nengaghi tuungia ta Karisto, me aghailousieinia. Ia kapuna tau ngai uungu ia Vau ngepona ateva, me egheelei emasinaaili uunguaane. ²² Aghe sungiela tani mae taraiem poli aghanna va am kila etana va sa ateva elutulutu etaimami, me aue eakorokorongana urunguitaniimim.

²³ Alooloo sae va God Tamaita ia me Vauita ateva ta Iesu Karisto, aue etau lao luei, niaielousi, me niaiesoaa tale tau ngaiesoa ngakapa atoa. ²⁴ Me alooloo sae tee va maamasinaane ateva God aue etoka tale lo atoa la aaielousiaa Vauita ateva Iesu Karisto, tale lo ateva o niaielousi karika ekapakapa.

Uru ngai etikirighi Pol ghe pituela ta aPilipae atoa Inangari emuemua

Pilipae masaliki taatara namuu ia tale provinsi eteva eMesedonia, tale pai not tale namuu patunganua ateva ghaine ita aseasea va Gris. Pol ghe lao sio ePilipae tale aiaaghaluene ateva nikasu, me ghe atokala ale manga ateva etana (Apostolo 16). Masi niaikapukapuaa ghe tokatoka elome Pol me tau ngaiesoa ngatoa ePilipae. Laghe tau lao sio niaisausi etana oroaata nau ghe kasu ekapa seela tani ppooaa masi kiukiu.

Nau Pol ghe pitila ia oia uru ngai etikirighi, arongona ta ghe tokatoka tale ale mata voovoo, ghe masimasi, poli ghe tarala va masi kiukiu kanna ia God ghe mene laolao ta mene katoa taumattu. Pol ghe aloannala va tau ngaiesoa ngatoa la aimuli tee isaa o voto laghe tarala ta Iesu, me la rati lo atoa laghe ue va tau ngeleka atoa la tani aJiu mua, me auena la rooroo tani saanga. Ghe auliaala va aPilipae atoa la rooroo tani masimasi, me la rau mene nnangaili tale voto.

Tani kila amuemua

Aitiutiu tale inangari me nikaili emasina *1:1-11*

Masi kiukiu elaulau maamauluaane Pol *1:12-26*

Am toka me am kasu nonga tale masi kiukiu kanna Karisto *1:27-2:18*

Taita alua laghe uungu eitauaa tee Pol, Timoti me Epaproditus *2:19-30*

Lo atoa la apasunga voto kamena *3:1-21*

Inangari niloeloe *4:1-9*

Pol ghe kaili emasinala tale niaisausi kaluira aPilipae atoa *4:10-20*

Airuuruu tale inangari *4:21-23*

¹ Angalua Pol me Timoti, kapuna tau ngai uungu iengalua Iesu Karisto, Angalu pitipiti atu etaimim akapa lo atoa taumattu manga am ta Iesu Karisto ePilipae tee elda me rikina atoa.

² Angalu looloo sae va maamasinaane me luei ekasukasu ta God Tamaita ia me Vau ngepona ateva Iesu Karisto aue etoka teeiem.

Nikaili emasinaaili me nilooloo sae

³ Akaakaili emasina ta kapughu Goto ateva nau ekapa atoa nau aghan-nainam. ⁴ Tale isaa akapa uneghi nilooloo sae mausiimim akapa, alooloo sae tee nimasimasi ⁵ poli niaighui me niuungu am gheelei tale masi kiukiu ghe tiuaala tale aitiutiu eteva nau me ange mae ghaa sio nau oia. ⁶ Aghaatoka tuutulighi va, lo ateva ghe tiuaala masi niuungu etaimim aue eghelei isaa o niuungu lomosina ta elaa ruu ta nauna ateva Iesu Karisto.

⁷ Karika sesa etaghi tani ateatea ia o salana atikirighi mausiim akapa, poli aghaielousieinam tale urunguitanighi eteva. Arova la iriiri etokaieghi tale sene o agheelei kotokotoo me aghaauliaa va koronna masi kiukiu, am akapaaili me aghi, ita ghaaghaa niparruu tale maamasinaane God. ⁸ God erooroo tani aulia ngaotu vaalua aghannaaili ekapaiem tee ailousiaane ateva Iesu Karisto.

⁹ Me uneghi nilooloo sae mausiimim isaa avalua toko, va aielousiaaimim aue epinosa me eoroi tale nialomasaanga, me tale ninannaa masalike tale niaielousi etaimim, ¹⁰ va am tara kila saa llo voto masina me raarangisana me karika mene righi voto sesa etaimim lomosina ta nauna ateva Karisto,

¹¹ me aue am pasu tale uene voto ghulughuluena ekasukasu ta Iesu Karisto, tale niasaesae me nikkauaa ta God.

Unna sene Pol ghe akasukasula masi kiukiu

¹² Isaa oia aghanna, kapughu etoa, va am kila va saa llo ghe lutula etaghi ghe aisausiaala tani akasukasu masi kiukiu. ¹³ Tale isaa o voto me soldia ngakapa atoa la aitoiaa tanganue Siisa me mene katoa taumattu la kilakila va atokatoka tee sene mausi Karisto. ¹⁴ Me poli isaa o sene etaghi, me oroi ila lo atoa kapuita laghe asarasarakanailala ta Vau ngepona ateva laghe tam matautula tani ppooaa inangari.

¹⁵ Koronna va katoa la poppooaa Karisto tale nisessaia tani tau sio ararighi eteae me uunguaa niaittaraaii. Mene katoa la ghelei tale masi ninannaa. ¹⁶ Kateva uta taumattu laghe ghelei tale niaielousi poli la kilakila va atokatoka oia mausi tani aippooaa kotokotoo tee masi kiukiu. ¹⁷ Mene kateva uta taumattu la poppooa Karisto ta la nnainila nonga, karika va tale masi ninannaa. La nim anna tani ghelei teieghi voto sesa nau atokatoka tale sene.* ¹⁸ Me isaa o voto vaalua malloeane? Tani voto ateva masinaaili ia, ia avalua toko: va tale saa ase salana arova kamena o koronna me la poppooaa Karisto. Tale isaa o voto me amasimasi.

Ue, anim toka masimasi ¹⁹ poli akilakila va tale kaluimim nilooloo sae, me tale nisausi kanna kapuna Spiriti eteva Iesu Karisto, saa llo voto ghe lutula etaghi, aue egheleieghi me asaanga. ²⁰ Tale nannaaghi aghaloannaaili va tale saa ase salana, erau mene ghelei epalataieghi, me anim sarasarakana tani apasunga Karisto tale vilikighi, arova amaulue o amate. ²¹ Ta ngetaghi, tani toka aue atoka ta Karisto, me tani mate aue aghaa masi voto. ²² Arova maamauluaaghi emene toka tee lao, malloeana va aue uunguaaghi etue uene manee, me ta ngetaghi tani ue va ea alao karika akilakila. ²³ Aghainanga teeilalua ilalua o salana aluekiri. Aghanna tani kasu, me alaa toka tee Karisto, poli emaamasinaaili evalua o. ²⁴ Me mausiimim me emaamasina va atoka. ²⁵ Liuna avalua o me aghaiesoa ngasarasarakanaaili va aue amene toka aitaua ngakapa teiem me aikaaiimim me masimasiaaimim aue enamuu. ²⁶ Liuna avalua o me nau amene toka teiem, masimasiaaimim ta Iesu Karisto aue epasu esassanga mausighi.

²⁷ Marova sa ateva elutu, am toka me am kasu nonga tale masi kiukiu kanna Karisto. Arova amae taraiem o anim nongoam, aue akila va am tiitingina akorokorongana tale kateva nonga spiriti, me ekaakateva iem tale ninannaa me niuungu va mene katoa la aikaiaa tale masi kiukiu. ²⁸ Me karika aue am matauta lo atoa la sessa teiem tale voto la ghelei. Eaimatootoongana etaira va aue la turungila me am, aue am saanga. Isaa o voto God aue eghelei. ²⁹ Poli God ghe nim tau aatu sio etaimim mausi Karisto, karika va tani aiesoaa nonga etana, ta tani sau maate aitauaa teeia. ³⁰ Am tee ngam laolao tale isaa o ase maamatana me am ghe taraieghila ta aghe ghaala, me isaa oia am nongonongo va aghaaghaa.

2

Tani usilaa vaalua Karisto esio siuaa nannaane

¹ Arova righi niasarasarakana poli am tokatoka tee Karisto, me arova righi inangari nisausi tale ailousiaane ateva, me arova righi niaighui

1:13: Apos 28:30. * **1:17:** Katoa uru ngai laghe pitila, laghe piti emuemuela ves 17, me emulina ves 16. **1:19:** 2 Ko 1:11. **1:21:** Gal 2:20. **1:23:** 2 Ko 5:8. **1:27:** Ips 4:1; 1 Tes 2:12. **1:29:** Apos 16:19-40.

tale Spiriti eteva, me arova righi niamaramara me nialousiusi, ² am ghelei eroorooaa masimasiaaghi nau ekateva nonga nannaaimim, me eisaa aitauaa niaielousi, me ekateva nonga iem tale spiriti me tani uungu eitauaa.

³ Am rau mene ghelei righi voto tale nikuruetu me tani saeaa nannaaimim. Me karika, ta tale nisiuaa ninannaa am tara katoa va masinaaili ila etaimim.

⁴ Kateva kateva etaimim erau mene atoka nonga nannaam tale llo nonga voto ia eaalona ta etara tee saa llo mene katoa la ghaloanna.

⁵ Nannaaimim enonginaaili tee nannaane Iesu Karisto.

⁶ Koronnaaili Karisto ia Goto ia me karika ghe nnaala va easarasarakanaia tani toka nongina God me tani poso parasi va Goto ia.

⁷ Ghe ghaa vella mallangina ateva me ghe ghaala uunguaaira tau ngai uungu etoa, me ghe gheleiela va arova nim taumattu ia nongina ita.

⁸ Me laghe tarala taataraane va taumattu ia ghe sio siuaa nannaane me ghe nongo usilaala tani lao tale nimate me tani mate tee tale aikotoo.

⁹ Liuna avalua o me God ghe taue liue saela epona me ghe taula arari eteae elaulau isaa akapa arari,

¹⁰ va tale ararina atea Iesu ila akapa la suuiaa sio patu kkeira etana, epona liu me kosa ateva me lo atoa euu tale kosa ateva,

¹¹ me ila akapa aue la ghaulia ngaotu va Iesu Karisto Vau ngepona ia tale nitau sae ta God Tamaita ia.

Ita mallanga nongina katto atoa

¹²⁻¹³ Mausina avalua o, masi kapughu etoa, me nongina am ghe nonongongo usilaa, karika va nau atokatoka teiem nonga, ta nau karika aghi, am ghelei isaa o voto nau ekapa atoa, poli God euungu etaimim tani asarasarakanaiem tale aloannaaimim me uunguaaimim. Am uungu tee nio-neaoneaa tani apasunga va God ghe asaangiemia, tale masi aloaloannaane.

¹⁴ Me nau am ghelei voto am rau mene ghelei tale niauliulia me niaitamammarsii, ¹⁵ va karika aue righi kaluimim ssavoto me aue am raarangisana, me enatuna am God, karika gheleiaaimim sesa tale uunguaa karika ghulughuluena me sesa voto tale lo ateva oia vituu. Me am mallanga nongina katto atoa tale kosa ateva, ¹⁶ nau am posoposo atingina sae inangari maulue ateva. Me tale nauna ateva Karisto, aue aghaasake va karika aghe iloula tale niaikarati eteae o aghe uungula tale nim lao. ¹⁷ Me arongona ta la ghele kaoaghi sae tale liu nighelei aiaavusuvusuena nongina manu opring, me am ghele ghelei llo tale uneimim niaikaaiiaa, amasiasi me amasiasi eitauangaili teiem. ¹⁸ Liuna avalua o me am tee am masiasi, me am masiasi eitauaa teieghi.

Timoti me Epaproditus

¹⁹ Aghaiesoaa ta Vau ngepona ateva Iesu va ghaisa ngarighi asungi aatu Timoti etaimim me aghi tee aue amasiasi nau emae auliaa kiukiuiimim etaghi. ²⁰ Karika amene annaa teva nongina ia, eannangailiem tani aitarainam. ²¹ Mene katoa la annainila nonga me karika va llo voto isaa ta Iesu Karisto. ²² Me am kilakila va Timoti ang ghe gheleila voto

2:3: Gal 5:26. **2:4:** 1 Ko 10:24. **2:6:** Jon 1:1-2; 17:5. **2:7:** 2 Ko 8:9; Jon 1:14. **2:8:** Hib 5:8; 12:2. **2:9:** Apos 2:33; Ips 1:20-21; Hib 1:3-4. **2:10:** Rom 14:11. **2:11:** Rom 10:9. **2:15:** Den 12:3; Plp 1:10; 1 Tes 2:19. **2:18:** Plp 3:1; 4:4. **2:21:** 2 Tim 4:10.

eaapasunga va erooroo, poli nongina kateva me tamane, ang ghe uungu eitaaua teeieghila tale masi kiukiu. ²³ Liuna avalua o me aghaiesoaa va aue asungia tani mae taraiem ghaisa ngarighieili me atara mua va sa ateva aue la gheleia mua etaghi. ²⁴ Me aghaatoka tuutulighi ta Vau ngepona ateva va gharighi tau amae taraiem.

²⁵ Me aghanna va emaamasina tani sungi aatu kapughu ta Epaproditus euungu eitaaua teeieghi me tee tau ngaiuvii ia, me kapuimim tau ngai kasuaa inangari teeia me am ghe sungiela tani mae sausieghi. ²⁶ Ta poli eannangailiem me ghe alousiusieiliila poli ghe kilala va am ghe nongola va ghe isikila. ²⁷ Koronna va ghe isikila me ghaisa ngarighi ghe mate, me God ghe alousiusi teeieghila, me karika va ie nonga ta aghi tee, tani akekkelieghi tale mene kasina nialousiusi. ²⁸ Liuna avalua o me asungi parasia atu etaimim me nau am taraia aue am masimasi me karika aue atani alousiusi. ²⁹ Am ghaaia va nongina kapuna ia Vau ngepona ateva tee kinatama nimasimasi, me am oneoneaa ase taumattu nongina ia. ³⁰ Poli ghaisa ngarighi ghe mate tee uunguaane Karisto, me karika ghe annaa maamauluaane tani ghelei eroorooaa nisausi am karika am ghe rooroo tani ghelei etaghi poli masaeuili iem.

3

Am rau mene atoka tuutuliimim tale uunguaa vilikiimim

¹ Liuna avalua o, kapughu etoa, me am masimasi ta Vau ngepona ateva. Karika eghelei righi sesa etaghi tani mene piti aatu etaimim llo ngaghe auliaa muela etaimim, ta isaa o voto erooroo tani sausiem.

² Am paniem tale ila o paua atoa isaa o taumattu la ghelei voto karika masina, tau ngai ghelei saasakiaa viliki etoa. ³ Poli ita isoiso ita. Ita lo atoa ita kakkauaa tale Spiriti eteva kanna ia God, ita asaesae Iesu Karisto me karika ita atoka tuutuliita tale uunguaa vilikiita. ⁴ Arongona ta aghi arooroo va aghatoka tuutulighi tale isaa o voto.

Arova teva eannaa va eatoka tuutulina tale uunguaa vilikina, aghi alaulaula. ⁵ Tale aiaaghaoaluna ateva nau, laghe isoieghila. Aghi atala nge Israeli ieghi, tale ararimangali eteva ta Benjamin, aHibru ieghi me asamasama nge Hibru.* Me tale uunguaa inangari nipaopao, aghi Paresi ieghi. ⁶ Aghe annaaili isaa o voto, liuna avalua o me aghe uviuvi kapuna taumattu God, me karika teva erooroo tani auliaa teeieghi, poli aghe nongonongo usila ngakapa inangari nipaopao.

⁷ Me tale isaa akapa o salana tani ghelei va aghe ghaa oroi voto, nau ghaine ataataraila va peisaane ila mausi Karisto. ⁸ Liuna avalua o me ataataraila isaa akapa voto peisaane nau aghe toongi teela kinatama voto atoa tani kila Iesu Karisto Vaughu ia. Mausina me aghe velu ekapala voto o, ataataraila va nim lao me aue aghaa nonga Iesu. ⁹ Me aue atoka ta ngetana, me karika aue aghulughuluena tale uunguaa inangari nipaopao, ta aghulughuluena tale niaikaiaa kanna Karisto, me isaa o nighulughuluena ghe kasula ta God tale niaikaiaa. ¹⁰ Aghanna tani kila Karisto, me sarasarakaniaane tale unna nitotu tale nimate, me tani lao nongina vaalua ghe mmarikanala me tani nongina ia tale matemateane. ¹¹ Me tale isaa o ase salana, aue arooroo tani totu tale nimate.

Ni-iilou esarasarakana tani laa rekata

2:25: Plp 4:18. **3:3:** Rom 2:29. **3:4:** Apos 22:3; 2 Ko 11:18. **3:5:** Luk 1:59; 2 Ko 11:22; Apos 23:6. * **3:5:** o aHibru ieghi me tuvughu ekapa atoa aHibru ila. **3:6:** Apos 8:3. **3:7:** Mat 13:44-46. **3:9:** Rom 3:21-22. **3:10:** Rom 6:3-5; 8:17.

¹² Karika va ngaghe ghaala isaa o voto va ngaghe ghulughuluena. Iesu Karisto eposoposoaghi, me akasukasu kkai tani laa ghaa isaa o voto.

¹³ Kapughu etoa, karika ataataraioghi va ngaghe ghaala isaa o voto. Me kateva nonga voto agheeleia, akakkaluaa llo emuli etaghi me aghameemeti tani laa ghattau aipolipoli emua etaghi. ¹⁴ Ailou parasi nonga tani laa rekata tale airuuruu me tani ghaa aipolipoli nongina God ghe koloaghila tani sae epona liu ta Iesu Karisto.

¹⁵ Ita akapa lo atoa ngita ghe matuennala ita nna ngamasina isaa o voto. Me arova karika am maemae aitaaua tale kasina ninannaa, isaa tee o llo God aue eghelei emasalika etaimim. ¹⁶ Me arova vaalua, ita toka nonga tale llo voto ngita ghe kilala.

¹⁷ Kapughu etoa, am mae aitaaua me am usilaa gheeleiaaghi, me am tani tara amasina lo atoa la kasukasu nongina vaalua ami, ami ghe kasukasu.

¹⁸ Poli nongina aghe auliaa nonga etaimim oroaata, me ngamene auliaa tee nialousiusi, va oroi lo atoa la tokatoka tani ssatee aikotoo ateva ta Karisto.

¹⁹ Airuuruu tale kasukasuaaira nitturuu eteae. Kovaira ateva kapuira goto ia me llo tani palata, la aasakeaa. Me nannaaira etokatoka nonga tale voto tale kosa ateva. ²⁰ Me ita tanganueita epona liu, me earieri ita tani toi teva tau ngai asaangi ekasu okae, Vau ngepona ateva Iesu Karisto etana. ²¹ Aue eaikolikoliaa ia oia vilikiita ateva sesa ia ghele nongina vilikina masinaaili, tale sarasarakaniaane erooro tani ghaa aitaaua ngakapa voto me eghelei tale aloaloannaane.

4

¹ Liuna avalua o, kapughu etoa, me aghailousieinam me aghannangailiem, am arova aipolipolighi iem tale uunguaaghi me tale masimasiaaghi, liuna avalua o me am tingina akorokorongana ta Vau ngepona ateva, masi kapughu etoa.

Inangari niloeloe me niakororongana

² Alooloo luei ta Iuodia me Sintike tani mae aitaaua tale ninannaa ta Vau ngepona ateva. ³ Me tee akookolomio, lo ateva ughe uungu teeieghi, tani sausi ilalua o vause alua laghe uungu aanasa teeieghi mausi masi kiukiu, tee me Klemen me ila akapa lo atoa la uungu teeieghi, me arariira isaa tale vuku maulue ateva.

⁴ Nau ekapa atoa am masimasi ta Vau ngepona ateva, me amene ue va am masimasi. ⁵ Am tau velu va taumattu ngakapa atoa la tara va karika am saasavalaa inangari, poli Vau ngepona ateva ange aakalakalaa. ⁶ Am rau mene annangaili asease voto atoa. Tale voto akapa, am kokkolomi sae ta God tani auliaa sae aloaloannaaimim tee nikaili emasina. ⁷ Me luei eteva kannaa ia God elaulau ekapaaili ninannaa, aue eaitaraa urunguitaniimim me nannaaimim ta Iesu Karisto.

⁸ Liuna avalua o, kapughu etoa, me saa voto koronna, me llo voto pei nioneoneaa, me llo ghulughuluena, me saa llo raarangisana, me saa llo eaalutu nimasimasi, me saa llo voto taataraane masikkanaaili, me arova rigghi voto masinaaili o am aruaa etana, am annaa isaa o voto. ⁹ Saa llo voto ngam ghe kilala o ngam ghe ghaala, o am ghe nongola o tarala etaghi, am tootoonga tani ghelei me God, etautau luei, aue etoka aitaaua teeiem.

Nikaili emasina tale uneira nitaula

3:12: 1 Tim 6:12, 19. **3:14:** 1 Ko 9:24. **3:15:** 1 Ko 2:6. **3:17:** 1 Ko 4:16. **3:19:** Rom 16:18. **3:20:** Ips 2:6, 19. **3:21:** 1 Ko 15:28, 42-53. **4:1:** 1 Tes 2:19-20. **4:3:** Luk 10:20. **4:5:** Hib 10:25; Jms 5:8-9. **4:6:** Mat 6:25-34; Kol 4:2. **4:7:** Ais 26:3; Jon 14:27; Kol 3:15. **4:9:** Rom 16:20.

¹⁰ Namungaili masimasiaaghi ta Vau ngepona ateva poli ngam ghe mene nnainaghila. Akilakila va am ghe nannainaghi erau me poli karika righi salana va am ghe apasunga. ¹¹ Karika aghauliaa llo poli aghanna righi niaisausi, poli ngaghe kilala tani toka tale nimasimasi tale asease nitoka. ¹² Ngaghe kilala vaalua tani toka arova karika righi voto etaghi o arova oroi voto etaghi. Ngaghe kilala vaalua tani toka tale isaa o ase nau, arova pasu kovaghi o maloona aghi o oroi peighi o karika oroi. ¹³ Arooroo tani ghelei voto akapa ta lo ateva eaasarasarakanaieghi.

¹⁴ Me masinaaili etaimim ta am ghe sausieghila tani sau maate tale maamauluaaghi. ¹⁵ Am aPilipae atoa am kilakila va nau masi kiukiu ghe tiuaala etaimim, me ngaghe anna tani kasu eMesedonia, am nonga am ghe tau mae sio, me ita ghe ailuuaala voto. Karika mene teva ale manga ghe gheleila isaa o voto. ¹⁶ Me nau aghe tokatoka eTesalonika am ghe aasaoki mae voto tani sausieghi, karika va katengaata nonga. ¹⁷ Karika va poli aghe annaa va am ghe tau mae voto, ta aghe annaa va am ghe ghaa aipolipoli ta poli masi gheeleiaaimim. ¹⁸ Ngaghe ghaala voto aghannaa me oroieili. Aghe pasueilila poli am ghe tau lao sio ta Epaproditus va emaeaa voto am ghe asaoki mae sio, nonginaaili nitau lao tale aiaavusuvusuena masi ngusungusuaane, me God eghaaghaa me emasimasia. ¹⁹ Me aue kapughu Goto ateva aue etau aatu isaa akapaaili aloaloannaaimim tale oroiaa ngepona liu ta Iesu Karisto.

²⁰ Ta God Tamaita ia aue ita taue sae tale nau oia, me nau ekapa atoa. Koronna.

Airuuruu tale inangarina Pol

²¹ Am auliaa masimasiaaghi ta isaa akapa taumattu manga ta Iesu Karisto. Kapughu tee atoa la tokatoka teeieghi laghe suula masimasiaaira etaimim. ²² Ila akapa taumattu ngatoa manga ila, la suu teela masimasiaaira ta lo atoa la uungu ta Siisa.

²³ Alooloo sae va maamasinaane Vau ngepona ateva Iesu Karisto aue etoka tee lo ateva spiriti etaimim. Koronna.

Uru ngai etikirighi Pol ghe pitiela ta aKolosa 1:1 Inangari emuemua

Ia oia uru ngai etikirighi Pol ghe pitiela nau ghe tokatoka tale ale mata voovoo, nongina Ipises, Pilipae me Pilimon. Pol karika ghe lao sio eKolosa 1:1, ta Epapras aKolosa 1:1 ia ghe nongola masi kiukiu eIpises, ghe aiesoaala, me ghe oghi saela eKolosa 1:1 tani ppoaaa okae, me ale manga ateva eKolosa 1:1 ghe lutula.

Tau ngalomasaanga ngatoka la nannaa va katoa laghe mae sio eKolosa 1:1 me laghe apasungaala voto kamena okae, me Pol ghe aloannala tani auliaa kieira aKolosa 1:1 atoa tale voto kamena laghe aapasunga. Ghe aulia ngakorokorongana va Iesu mata ngemua tale masi kiukiu, me marova teva voto elaulau Iesu, kamena ia. Ita rau mene aimuli usi tee voto taumattu ngatoka la ghaauliaa va masina, me ita rau mene kkauaa ensolo atoa, ta ita aimuli usi tee Iesu, me gheeleiaaita etani masina. Pol ghe auliaa teela vaalua tani toka amasina tale ale manga ateva me tanganueita.

Tani kila amuemua

Aitiutiu tale inangari 1:1-2

Iesu mata ngemua ia tale masi kiukiu 1:3-2:5

Aimuli usi tee Iesu, me karika niaapasunga kamena 2:6-23

Am tokatoka nongina kapuna atoa God 3:1-4:6

Airuuru tale inangari 4:7-18

Pol ghe amasimasila tau ngaiesoa ngatoka eKolosa 1:1

¹ Aghi Pol, kapuna apostolo ieghi Karisto Iesu me tale aloannaane God, me Timoti kapuita ia.

² Angalu pitipiti atu etaimim akapa lo atoa taumattu manga am me am aiesoa ta Karisto eKolosa 1:1. Alooloo sae va maamasinaane me luei ekasukasu ta God aue etoka etaimim.

Nikaili emasina me nilooloo sae

³ Angalu kaakaili emasina ta God Tamana ia Vau eteva Iesu Karisto tale kalumami nilooloo sae, ⁴ poli angalu ghe nongola uneimim niaikaiaa ta Karisto Iesu me aielousiaaimim ta kapuna taumattu ngakapa atoa God manga ila. ⁵ Am aikaiaa poli God eaaitaraa aipolipoli eteva epona liu am kilakila va aue etau aatu. Ngam ghe nongo vella arau tale inangari koronna, tale masi kiukiu, ⁶ ghe mae sio etaimim. Me tale kosa akapa ateva inangarina ateva God ekuukuneeaa uene me epiipinosa nongina ghe gheleila etaimim nau am ghe kilala inangari koronna tale maamasinaane God. ⁷ Am ghe nongoala ta masi kapumami eteva ta Epapras, kapuna tau ngai uungu eteva ia Karisto, me eghelei emasinaaili uunguaane, eghaaghaa liumami. ⁸ Me ange auliaa tau mae sio etaimimi kaluimim niaielousi kanna Spirit Manga.

⁹ Liuna avalua o me nau eteva ami ghe nongola karika ami ghe ainoanala tani looloo sae tani kolomi God tani tau aatu alomasaanga tale Spirit Manga ateva me aue am kila aloannaane God. ¹⁰ Me aue am kasu tale masi salana eoneoneaa Vau ngepona ateva, me aue am amasimasila nau am ghelei masi niuungu me aue am tani kila amasinaaili God. ¹¹ God aue

easarasarakanaiem tale kinatama sarasarakaniaane tani gheleiem va am rau mene sio asoasoa tale nau sesa arova emae, ta aue am nim matua ngatoka, me am masimasi ¹² tani kaili emasina sae ta Tamaita ateva, ia ghe gheleiemla va am tee am rooroo tani ghaa saa llo ghe suitoongaala va ekaluimim epona liu tee kapuna taumattu ngatoa God manga tale mallanga ateva.

¹³ God ghe ghaa oghitala tale sarasarakaniaa saurrom ateva, me ghe atokaita lao sio tale ararimangalina ateva Natuna ateva eaaielousieinia.

¹⁴ Ie nonga aighaa oghiita ia, me ekakkaluaa kaluita ssavoto.

Iesu Karisto ia nonga tale voto akapa

¹⁵ Karisto tootoona ia God ateva, karika ita rooroo tani taraia, ghe tokala arau me ia mue ia tale voto akapa God ghe gheleila. ¹⁶ Poli ta ngetana voto akapa God ghe gheleila, voto epona liu me tale kosa ateva, voto ita taatara me voto karika ita rooroo tani tara, me ila akapaaili ensolo atoa, kuturu etoa, raroai etoa me asease tau ngai toitoi etoa. God ghe gheleila isaa akapaaili voto ta Karisto, me kanna Karisto. ¹⁷ Ghe tokala emua arau, me ta ngetana isaa akapaaili voto etokatoka amasina. ¹⁸ Me ia emuemua ale manga ateva nongina uruita ateva emuemueaa vaulaniita ateva. Ia ghe toka akasinala me aitiutiu ia tani totu tale nimate. Ia avalua o me ie nonga eaitara ngakapanaaili voto atoa. ¹⁹ Poli God emasimasi va isaa akapaaili voto kanna God etoka ta Karisto. ²⁰ Ta ngetana God ghe mene atoka aitauala isaa akapa voto teeia, voto tale kosa ateva me epona liu, me ghe gheleila luei tale raena ateva Natuna ateva tale aikotoo ateva.

²¹ Me am, isaa too nau am ghe masaeiliila me tale nannaaimim am ghe sessa tee God, me ghegheleiaaimim sesa, ²² me isaa oia ia ghe atoka aitaueiniemla teeia tale matemateane tale aikotoo ateva, tani maeainiem nongina etokatoka, manga, me raarangisana, me karika righi sesa ghegheleiaaimim, ²³ arova am aloanna tani mene lao tee tale kaluimim niaikaaiiaa, karika am mene tau velu uneimim niaikaaiiaa tale masi kiukiu am ghe nongola, laghe ppoaala tale isaa akapaaili taumattu tale kosa ateva, me aghi tee, Pol, tau ngai uungu ieghi tani ppoaa ia o masi kiukiu.

Uunguaane Pol tale ale manga

²⁴ Ghaine amasimasi tani ghaa maamatana tani aisausieinam, me aghelei erooa maate Karisto ghe suitoongainaghila va aghaa tale vilikighi, tani sausi ale manga ateva. ²⁵ God ghe tau mae sio niuungu etaghi tani uungu mausi ale manga ateva, ghe sungieghila tani ppoa ngakapa masi kiukiu etaimim. ²⁶ Ia o inangari eteva ang ghe aisuliaa vella arau, me tale isaa oia nau ang ghele kaurekatila tale taumattu manga. ²⁷ God ghe suitoongainilala tani apasunga voto aisulianna etaira, va tau ngeleka atoa aue la ghaa kinatama niarangise ateva, me Karisto aue etoka teeiem tau ngeleka atoa, me am atoka tuutuliimim tale voto emae epona liu. ²⁸ Ami aaulia ngaotu Karisto, ami aauliaa kieira taumattu ngakapa atoa me ami aapasunga ta taumattu ngakapa atoa tale alomasaanganiaane Karisto, tani ghelei taumattu ngakapa atoa va la matuenna ta Karisto nau la tingina emua ta God. ²⁹ Liuna avalua o me auungu ekorokorongana tale isaa akapaaili sarasarakaniaane etautau mae etaghi.

1:12: Ips 1:11, 18. **1:13:** Luk 22:53; Ips 2:2. **1:14:** Ips 1:7. **1:15:** 2 Ko 4:4; Jon 1:18. **1:17:** Jon 1:1; 8:58. **1:18:** Ips 1:22-23; Apos 26:23; Aotu 1:5. **1:19:** Kol 2:9. **1:20:** Ips 1:10. **1:21:** Rom 5:10; Ips 2:12. **1:22:** Ips 5:27; Rom 5:10. **1:25:** Ips 3:2, 7-8. **1:26:** Rom 16:25-26; Ips 3:5, 9. **1:29:** Ips 3:7, 20; Plp 4:13.

2

¹ Aghaloanna tani auliaa kieimim vaalua aghe saula maamatana mausi-imim me tau ngai kkaua ngatoa eLaodesia, me tee lo atoa la aikaaiaa karika poi laghe taraieghi. ² Aghanna tani aisausieinila me tani gheleila va la toka aitauaa tani korokorongana tale niaielousi. Aue la kaarasi tani ghaa niarangise me alomasaanga, me aue la kila voto aisulianna kanna God, isaa ta Karisto. ³ Karisto nonga erooroo tani ghelei taumattu ngatoa la alomasaanga me tani apasunga llo voto God eaipanipaniaa ta taumattu ngatoa. ⁴ Aghaauliaa etaimim llo oia voto, ta toa taumattu la rau kameam nonga tale kamena niapasunga am nongonongo arova masinaaaili. ⁵ Arongona ta masaueili ieghi etaimim, me urunguitanighi eteva etokatoka teeiem, me amasimasi tani tara va tokatokaaimim masina me uneimim niaikaaiaa ta Karisto korokoronganaaaili.

Ouna ateva mauhue ta Karisto me karika tale inangari niloeloe

⁶ Me isaa oia, nongina ngam ghe ghaala Karisto Iesu va ang ghe Vauimmi iela, am kasu teeia nau etoa. ⁷ Am atoka maamauluaaimim epona etana nongina ai eteae oane eposoposo asarasarakana ia, me am tingina akorokorongana tale niaikaaiaa am ghe ghaala, me aue am kaili emasina etana nau etoa.

⁸ Am aipanipaniaa! Toa taumattu la rau kameam nonga tale nim nannaaira pei tale kosa ateva oia korokoronganaaaili me kamena, emaemae ta raroai etoa me karika emaemae ta Karisto. ⁹ Poli isaa akapaaili voto kanna God etoka ta Karisto, ¹⁰ me ngam ghe pasula nau am tokatoka ta Karisto, ia emuemue ngakapa tau ngai toitoi etoa me namu ngatoa tee. ¹¹ Nau eteva am ghe mae sio ta Karisto am ghe ghaala ni-isoiso, karika tale ni-isoiso tuunga ateva, ta am ghe ghaala ni-isoiso ateva kanna ia Karisto, ghe iso vella vilikina tale matemateane, ¹² poli am ghe mate teela Karisto nau eteva laghe asuuemla tale manu me am ghe totu teeiela tale ouna ateva mauhue, poli am aatoka tuutuliimim tale kaluimim niaikaaiaa elome tale sarasarakaniaana God, ghe totula Karisto tale nimate. ¹³ Am nongina va matena am poli kaluimim ssavoto me poli sesa gheeleiaaimim karika ghe kapa, vara me God ghe ghelei esakesakeamla ta Karisto, ta ghe kkaluaala isaa akapaaili kaluimim ssavoto. ¹⁴ Ghe sei vella kaluita ssavoto tale uru ngai laghe pitila me kaluita dinao nau ghe matela tale aikotoo. ¹⁵ Tale isaa o salana, ghe apalala sarasarakaniaa sesa spiriti etoa me tau ngai toitoi etoa me ghe apalatala ta mataira taumattu ngatoa nau eteva ghe apalailala tale aikotoo.

¹⁶ Ia avalua o me am rau mene tau veluem va la auliaa teeiem tale inana am namanama me manu am ropiropi me karika am laolao tale kasina tana uneira nivelu eitauaa tale nau manga tale kateva kateva ninamanama me kateva kateva ulana me tale nau sambati. ¹⁷ Isaa o inangari niloeloe me kastam nim tootoo voto auena emae, me ia o Karisto, ia koronna ia, ang ghe mae sio. ¹⁸ Am rau mene tau velu taumattu ngatoa va la ghelei kaluimim nikkauaa tani ue va am siuaa nannaaimim me am kkauaa ensolo atoa me la annaa va muennaaili ila poli laghe tarala nitaatara, sesa nannaaira egheleila me la tautau sae nannaaira. ¹⁹ Karika la tokatoka tee Karisto, ia nongina uruita eposoposo aitauaa vaulaniita me riuita me ita piipinosa nau eteva God eapinosaita.

2:3: 1 Ko 1:24, 30. **2:4:** Rom 16:18. **2:5:** 1 Ko 5:3. **2:7:** Ips 3:17. **2:9:** Jon 1:14, 16.
2:10: Ips 1:21-22. **2:11:** Rom 2:29. **2:12:** Rom 6:4. **2:13:** Ips 2:1, 4-5. **2:14:** Ips 2:14-16;
1 Pita 2:24. **2:16:** Rom 14:1-13. **2:17:** Hib 8:5. **2:19:** Ips 2:21; 4:16.

²⁰ Am ghe mate teela Karisto, me ghe akekeliemla tale raroai etoa, me vaalua am mene usiuseri inangari niloeloe tale kosa ateva oia: ²¹ Am rau mene poso, am rau mene namunamuaa, am rau mene tuli! ²² Isaa o ase inangari niloeloe pei tale kosa ateva oia aue ekapa, nim kaluira taumattu ngatoa la apasunga. ²³ Isaa o inangari niloeloe enim gheeleila va la kkauaa me la ghelei voto tale vilikiira va enim usilaa nannaaira. Isaa o inangari niloeloe arova tani alomasaanga, karika, me karika etautau mae righi niaisausi tani apala sesa gheeleiaa kateva kateva taumattu.

3

Am toka tale ouna ateva maulue

¹ Nau am ghe totula tale ouna ateva maulue, am ghe totu eitaaua teela Karisto, me am tani pae voto ngepona liu, nongina Karisto etokatoka tale pai muenna atelange ta God ² me am atoka nannaaimim tale voto ngepona liu me karika va voto tale kosa ateva. ³ Tale lo ateva oia maulue angam ghe matela etana, me maamauluaaimim tuunga ateva eaaisuliaa ta Karisto elome ta God. ⁴ Karisto etautau aatu maulue ateva. Me nau eteva ekaurekati tale kosa akapa ateva, aue eapasunga sarasarakaniaane me mallangina, am tee aue am lao aitaaua teeia me aue la tara akapaiem me maamauluaaimim aue etoka tee Iesu, karika aue am aisuliaa me aue am toka tale mallangina ateva.

⁵ Liuna avalua o me am ghelei emate sesa ninannaa me sesa voto tale kosa ateva oia: uunguaa niailai salosalooa see, karika am mene kune taita me vause, me am rau mene ghelei llo voto sesa taumattu ngatoa la paapalata, me aloaloannaaimim korokoronganaaili tani kune vause me taita tani ghelei ssavoto, me nikuruetu, nim nongina va am kakkauaa tootoo. ⁶ Poli isaa o ase voto, sessaiaane God aue emae sio.* ⁷ Me am, am ghe kasukasu tale llo akasina maulue sesa am ghe tokatoka etana. ⁸ Me isaa oia, am ghaa velu etaimim isaa o asease voto nongina nisessai, me niauliaa saasakiaa ta kateva, me nitam aloanna kateva, me niaasake, me inangari nilakolako ta paaimim. ⁹ Karika am mene aikameaa, nau eteva am ghe ghaa vella uunguaaimim pei ngarau am ghe gheeghelei ¹⁰ me am ghe mene tiuaa ngaounala nau God ghe mene ghelei eounaiemla tale tootoona ateva lo ateva ghe gheleitata, tani ghelei va am tani kila aalomasaanganiaane. ¹¹ Tale ouna ateva maulue karika toa aJiu me karika toa aGrik, me karika toa isoiso me lo atoa karika isoiso ila, me lo atoa karika va aJiu ila me aGrik ila, me lo atoa karika alomasaanga ila, me lo atoa karika la rooroo tani ghelei voto tale nim nannaaira, me lo atoa la rooroo tani ghelei nongina la aloanna tani ghelei, ta Karisto ie nonga akapa etaira.

¹² Nongina God ange suitongainamla va am manga am, me eaailousiangailiem, am amolumoluem tale isaa o niuungu: am alousiuseri tee lo atoa la tokatoka tale maamatana, me niaisausi etani mae tale urunguitaniimim, me am sioaa nannaaimim ta katoa, me am nnaa mene kateva, me karika emene sessai parasiem ta mene kateva. ¹³ Arova ange gheleila voto ateva karika masina ia me karika ange mae sio ta nannaam, unim sioaa nannaam me lao aitaaua teeia, me arova kateva eghelei saasakiaa, am kkalueinia, nongina Vau eteva ghe kkaluaala kaluimim maamatana. ¹⁴ Me tale llo

2:20: Gal 4:3, 9; 1 Tim 4:3. **2:22:** Mat 15:9. **3:1:** Mak 12:36; 16:19; Ips 1:20. **3:2:** Mat 6:33.

3:5: Rom 6:6, 11; Ips 4:19; 5:3-6. * **3:6:** aue emae sio Kasina uru ngai laghe pitila, laghe pitila aue emae sio ta lo atoa la sassakieinia. **3:8:** Ips 4:25-29; 5:4. **3:9:** Ips 4:22, 25. **3:10:** Ips 4:24. **3:11:** Gal 3:28. **3:12:** 1 Pita 2:9. **3:13:** Ips 4:2, 32. **3:14:** Rom 13:8-10.

voto matuutuliena, am ailousia ngakoronna me aue am toka amasina tee mene kateva. ¹⁵ Am tau velu kanna luei eteva Karisto emuemue tale urunguitaniimim, nongina ghe koloamla tani kateva nonga, me am kaili emasina. ¹⁶ Am tau velu inangarina ateva Karisto etoka elome etaimim me eapasunga ta kateva kateva alomasaanga tani kkinari tau sae emaemae ta Spiriti eteva, me kkinari tee nimasimasi tani tau sae God tale urunguitaniimim. ¹⁷ Me saa llo am ghelei tale inangari me niuungu, am ghelei llo voto tale ararina atea Vau eteva Iesu, tani kaili emasina ta God Tamaita ia.

*Inangari niloeloe tale
kateva kateva tau ngaiesoaa*

¹⁸ Vause atoa lailai iem, am atoka nannaaimim ta taitaniim atoa ta isaa o voto ghulughuluena ta Vau eteva. ¹⁹ Taita atoa lailai iem, am aielousiaa vauseniim atoa karika am mene sorriena teeila. ²⁰ Aliko etoa am nongo usilaa tamaimim me kinaimim atoa tale isaa akapa voto, poli isaa o voto eaamasimasi Vau eteva. ²¹ Tamatama atoa am rau mene savalaa natuimim atoa va esessaila, ta erau ghelei nannaaira va esioaili euu. ²² Lo atoa am uungu me karika am tokatoka tale aloalonnaaimim, am nongo usilaa vauim atoa tale kosa ateva oia tale voto akapa. Karika am mene uungu nonga ta nau eteva la taataraiem va am ghelei emasimasila, ta am uungu tale masi ninannaa emaemae tale urunguitaniimim, me tani oneoneaa God. ²³ Saa niuungu am ghelei, am ghelei tale masi ninannaa emaemae tale urunguitaniimim ateva, nongina va am uungu ta Vau ngepona ateva, me karika va ta taumattu ngatoo. ²⁴ Am uungu emasina poli am kilakila va ta Vau eteva aue am ghaa voto masina ghe aulia ngalokoila, nongina aipolipoli. Am uungu ta Vau eteva Karisto. ²⁵ Tau ngai ghelei ssavoto atoa aue la ghaa aipolipoli tale llo voto sesa laghe gheleila. Karika aue righi niaimassiaa.

4

¹ Vau etoa am aitoiaa tau ngai uungu etoa karika la tokatoka tale aloannaaira, me am ghelei emasina me ghulughuluena lao ta kapuimim tau ngai uungu etoa, ta am kilakila va am tee kapuimim Vau eteva ia epona liu.

Niailoe tale nikokkolomi sae

² Am rau mene amaomao tani kokkolomi sae, me nau am kokkolomi sae, nannaaimim eoti, me am kaili emasina sae ta God. ³ Me am kokkolomi sae mausiimami tee va God aue etau mae salana tani laa ppooaa masi kiukiu, me aue ami aulia ngaotu voto aisulianna isaa ta Karisto, poli aghe poppooaa masi kiukiu eteva, laghe atokaieghi ssola tale ale mata voovoo. ⁴ Atani mene ppooa ngaotu masi kiukiu ta taumattu ngatoo. Ia avalua o me am kokkolomi sae ta God me aue esausieghi tani kila tani ppooa ngamasinaaili.

⁵ Nau am tokatoka tee taumattu karika la aikaaiaa ta Iesu, am tani aitoka tee llo voto am ghelei me am rau mene tau velu kasina voto va enim peisaane. ⁶ Nau etoa am sama amasina etaira, nongina uela ateva eaamasikkana anem inana, ia avalua o me aue am kila tani asokoi kaluira nikokkolomi.

Airuuruu tale inangari niloeloe me nimasimasi

3:15: Plp 4:7; 1 Ko 12:27; Ips 4:4. **3:16:** Ips 5:19. **3:17:** 1 Ko 10:31; Ips 5:20. **3:18:** Ips 5:22. **3:19:** Ips 5:25. **3:20:** Ips 6:1. **3:21:** Ips 6:4. **3:22:** Ips 6:5-8. **3:25:** Rom 2:11. **4:1:** Ips 6:9. **4:2:** Ips 6:18; Plp 4:6. **4:3:** Rom 15:30; Ips 6:19. **4:5:** Ips 5:15-16. **4:6:** Ips 4:29; 1 Pita 3:15.

⁷ Tikikus aue eaulia ngakapa voto ghe ailutuaala etaghi. Ia nengaghi tuungia aghailousieinia. Ia kapuna tau ngai uungu ia Vau ngepona ateva nongina aghi, me egheelei emasinaaili uunguaane. ⁸ Aghe sungiela tani mae taraiem tale masi voto am kila etana va sa ateva elutulutu etaimami, me ia aue eakorokorongana urunguitaniimim. ⁹ Aue emae aitaavaa tee Onesimas, am kilakilaia ghe kasula ona tale masalikiimim atea, egheelei emasinaaili uunguaane me ami aielousiangailia. Ilalua aue lalu auliaa etaimim isaa akapaaili voto elutulutu oia.

¹⁰ Aristakus esuula masimasiaane etaimim. Etokatoka teeieghi tale ale mata voovoo. Me Mak, aloana ta Banabas ia tee esuula masimasiaane etaimim. Am nnaa inangari aghe auliaala tale uunguaane Mak; arova emae etaimim, am aikoloainia. ¹¹ Me Iesu, la kolokoloa va Jastas, ie tee esuula masimasiaane tee etaimim. Ilotolu o taita kotolu ilotolu nonga aJiu ilotolu. Ilotolu lotolu kakkauaa, me lotolu uungu teeieghi tale ararimangalina ateva God. Lotolu kaakaarasi tani aisausieinaghi. ¹² Epapras tee ghe kasula ona tanganueimim ie tee etautau aatu masimasiaane etaimim. Ia kapuna tau ngai uungu ia Karisto Iesu. Karika enim aaitoka ta ekokkolomi sae nau ekapa atoa poli am, va am tingina akorokorongana me am matuenna me aue am kilaaili saa voto God ealona va am ghelei. ¹³ Aghaloanna tani aulia ngakorokorongana etaimim va ia euungu ekorokoronganaaili tani sausiem, me lo atoa tee eLaodesia me Ierapolis. ¹⁴ Luk dokta ia ami ailousiangailia etautau aatu masimasiaane etaimim me tee Diimas.

¹⁵ Me am auliaa tee masimasiaaghi ta tuemami me nengamami etoa eLaodesia, me ta vause ateva la kolokoloa va Nimpa me tee ta lo atoa la kakkauaa tale alena ateva. ¹⁶ Nau eteva lo atoa am tokatoka eKolosa am ruu tani nongo uru ngai etikirighi oia am mene laoaia me la ritia tale ale manga ateva eLaodesia. Me am tani riti ia oia uru ngai etikirighi aghe pitila ta aLaodesia ngatoa. ¹⁷ Me am auliaa ta Akippus va, “Utani ghelei ekapa llo voto Vau eteva ghe tau aatu sio va ughelei.”

¹⁸ Aghi Pol, aghe pitila isaa oia masimasiaaghi. Am annaa tokatokaaghi tale ale mata voovoo. Alooloo sae va maamasinaane God aue etoka teeiem.

Aitiutiu etikirighi uru ngai Pol ghe pitiela ta aTesalonika ngatoa Inangari emuemua

Pol ghe atokala ale manga ateva eTesalonika tale unna aiaaghaluene ateva nikasu (Apostolo 17:1-9), me ajiu etoa laghe aloannala tani turungi uunguaane Pol. Pol ghe tokatoka eAten nau ghe pitila ia oia uru ngai etikirighi, me ghe aloannala tani apasunga va ia apostolo tuungi ia, me tee tani auliaa vaalua ghe suula Timoti tani akorokoronganaila tale uneira niaiesoaa. Ghe pitila voto tani akorokoronganaila va la toka tale uunguaa nimanga, me tee tani liu nikkolomi va sa ateva elutu ta tau ngaiesoa ngatoa nau la mate, me tee vaalua Iesu aue emene mae.

Tani kila amuemua

Aitiutiu tale inangari 1:1-10

Pol me aTesalonika atoa 2:1-3:13

Nitoka manga 4:1-12

Vaalua Iesu aue emene mae 4:13-5:11

Inangari niloeloe 5:12-28

¹ Aghi Pol, Saelas me Timoti,

Ami pitipiti atu etaimim taumattu ngatoa tale ale manga ateva ona eTesalonika ta God Tamaita ia, me Vau ngepona ateva Iesu Karisto.

Ami looloo sae va maamasinaane God me luei aue etoka etaimim.

Nikaili emasina tale uneira niaikaiaa aTesalonika ngatoa

² Nau ekapa atoa, ami kaakaili emasina ta God ta poli mausiimim, me ami aaseainam tale kaluimami nilooloo sae. ³ Nau ekapa atoa ami looloo sae ta matane God Tamaita ia, ami nannaa uunguaaimim elutulutu tale aikaiaaimim, me niuungu am gheelei tale niaielousi, me karika am maamangoo nau am toitoi voto ita aatoka tuutuliita etana ta kapuita Vau ngepona ateva Iesu Karisto.

⁴ Poli ami kilakila va God ghe suitoongainamla va natuna am, masi kapuimami etoa, God eaaielousieinam, ⁵ ta poli, nau eteva ami ghe pop-pooaa etaimim, kaluimami masi kiukiu karika ghe mae sio etaimim tale mata nginangari nonga, ta tee sarasarakana me Spirit Manga ateva, me nannaaimami sarasarakanaaili tale masi kiukiu, nongina am ghe tarala vaalua ami ghe toka teeiemla mausiimim. ⁶ Am ghe uusilaa gheeleiaaimami me Vau ngepona ateva. Arongona ta am ghe ghaala oroieili asease voto sesa laghe gheelei teeiem, Spirit Manga ateva ghe tau aatu nimasimasi nau eteva am ghe ghaala inangari eteva. ⁷ Liuna avalua o me tau ngaiesoa ngakapa atoa eMesedonia me Akaia la taatara atu etaimim va uneira niaimatoongana iem. ⁸ Kurruna ateva inangarina ateva Vau ngepona ghe kasula etaimim. Karika laghe nongoala nonga eMesedonia me Akaia. Aikaiaaimim ta God ngila ghe kila akapa seela. Liuna avalua o me karika ami rooroo tani mene auliaa righi voto. ⁹ Poli ila la kiukiuuaa vaalua am ghe ghaaiemamila, me la ghauliaa vaalua am ghe liula viliimim tale tootoo goto, me am ghe lao sio ta God tani uungu ta God ateva sakesake ia me koronna ia, ¹⁰ me tani toi Natuna ekasu epona liu, ia God ghe totuela tale nimate, me ia Iesu eaasaangita tale sessaiaane God auena emae.

2

Uunguaane Pol eTesalonika

¹ Am kilakila, kapuimami etoa, va maemaeaimami etaimim karika ghe nim peisaanela. ² Me auena ami ghe mae etaimim ami ghe ghaa akasinala maate tale maamauluaaimami, me laghe ghelei epalataiemamila ePilipae, nongina ngam ghe kilala. Me poli va aisausiaane God, ami ghe ghaala sarasarakana tani auliaa etaimim masi kiukiu kanna God, arongona ta tau ngai ssateiemami etoa la ghelei teiemami voto sarasarakanaaili. ³ Poli inangari nissausi ami auliaa, karika ekasukasu tale voto kamena me kulukulutana, me karika va ami anna tani kameam. ⁴ Me karika, ta ami aippooaa nongina taumattu God ang ghe atokala tuutulina ta ngetaira, me ghe tarala va ami rooroo, me ghe tau mae sio niuungu tani auliaa masi kiukiu. Karika ami anna tani amasimasi taumattu, ta ami anna tani amasimasi God poli ia etootoonga urunguitaniimami. ⁵ Am kilakila va karika ami ghe ghelei inangari tani nim ghaaiem, me karika ami ghe tara ssaiila righi peimim me ami ghe aaisulia va am rau kila. God etaatara me erooroo tani aulia ngaotu isaa oia voto. ⁶ Karika ami ghe paepae niaruaa ta ngetaimim o ta mene katoa.

Poli kapuna apostolo iemami Karisto, ami ghe roola va ami ghe tau aatu maate etaimim tale uunguaa viliki veu. ⁷ Me karika, ta ami ghe kaarasila tani toka teiem nonginaaili va ami kinaim iemami. ⁸ Ami ailousiangailiim, liuna avalua o me ami masimasieli, karika va tani auliaa nonga masi kiukiuna God, ta ami tautau aatu tee maamauluaaimami, poli ami maamasiangailiim. ⁹ Koronnaaili, kapuimami etoa, am roo tani nnaa niuungu me aanasa ami ghe ghaaghaa. Ami ghe uungu eleivoo me ellaa tani ghaa aneimami inana ta poli ami ghe anna va ami rau mene taula maate ta teva taumattu nau ami ghe poppooaa masi kiukiuna God etaimim.

¹⁰ Am, am rooroo tani aulia ngaotu, me God tee, vaalua ami ghe mangala me ghulughuluenala, me karika am ghe aliu teiemami tale righi voto, nau ami ghe tokatoka teiem lo atoa am ghe aaiesoaa. ¹¹ Nongina am kilakila va ami ghe ghelei kateva kateva etaimim nongina va ami tamaimi iemami. ¹² Ami ghe aasarasarakanaiem me poppooaa inangari nissausi, me ami ghe aulia ngasarasarakana etaimim va, tani kasu tale masi salane God, ia ghe koloamla tani toka tale ararimangalina ateva me tale mallangina ateva.

¹³ Me nau ekapa atoa ami kaakaili emasina ta God poli nau am ghe ghaala inangarina ateva God, am ghe nongoala etaimami, karika am ghe ghaaiela va arova inangariira taumattu ngatoa, ta am ghe ghaaiela va inangarina ia God, me koronnaaili va inangarina ia God. Nau ghaine euungu ta lo atoa etaimim am aaiesoaa. ¹⁴ Poli am, kapuimami etoa, ngam uusilaa nongina vaalua taumattu ngatoa tale alena ale manga God eJiudia ila ta Karisto Iesu: ngam ghe ghaala mmarikana ta kapuimim atoa tanganueimim eitauaa, nim nongina isaa o ale manga eJiudia laghe ghaala mmarikana ta aJiu etoa, ¹⁵ laghe uvi ematela Vau ngepona ateva ta Iesu me propete atoa, me laghe ameti veluemamila, me laghe ssatee akapa teela taumattu. Laghe gheleila God ghe tam masimasila. ¹⁶ Ami aloanna tani aippooaa tee lo atoa karika va aJiu ila va la saanga, me laghe tootoonga tani ghelei rungainamami. Tale isaa o salana, laghe apasulala tale ssavoto me ghe laula aioghioghi, me tale airuuruu sessaiaane God ghe tokala etaira.

Pol ghe annaaili tani laa tara aTesalonika ngatoa

¹⁷ Me, kapuimami etoa, ami ghe masaula etaimim tale nau karika aluse (karika va tale ninannaa, ta tale vilikiimami ekapa), liuna avalua o me ami ghe paepaeaili salana poli kinatama nannaaimami tani mae taraiem. ¹⁸ Ami annaaili tani mae taraiem, me koronnaaili aghi Pol aghe tootoongaala oroiaata, me Satana eghelei rungainamami. ¹⁹ Poli isaa o voto ami nannangaili va ami ghaa auena, me isaa o uneita nimasimasi me kou nguru aue ami ghaa nau ami tingina ta matane Vau ngepona ateva Iesu nau emae. Karika am kilakila va mausiimim ami masimasi? ²⁰ Mausiimim me aue ami ghaa nioneoneaa me nimasimasi.

3

¹ Poli karika ami ghe roola tani ghaa velu ia o ninanna ngateva tale nannaaimami, ami ghe nnaala va masina va aghi nonga atoka eAten. ² Ami ghe suu aatu sio Timoti, ia kapuimami ia, me kapuna tau ngai uungu ia God tani kasuaa masi kiukiuna Karisto, tani akorokoronganaiem, me tani auliaa inangari nissausi tale aikaiaaimim ³ va karika teva etaimim emene katuu tale isaa o nitotoonga. Am kilakila amasina va ita aue ita lao tale isaa o ase nitotoonga. ⁴ Nau ami ghe tokatoka teeiem, ami ghe auliaa etaimim nau ekapa atoa va aue ita ghaa mmarikana, me am kilakilaaili va isaa o voto ange lutulutu ekoronna. ⁵ Mausina avalua o me poli anannangaili isaa o voto, me ngasususuu atu Timoti tani mae kila va vaalua aikaiaaimim. Amaamatautu va tale righi ase salana, saikame ateva erau tootoonganiem, me uunguaaimami etaimim erau nim peisaane.

Masi kiukiu Timoti ghe oghiaa mae sio

⁶ Me ghaine, Timoti ang ghele mae rekataa sio etaimami, ghe kasula etaimim me ghe rekataala masi kiukiu tale aikaiaaimim me niaielousi. Ghe auliaala vaalua am nannainamami tee nimasimasi me am annaaili tani taraiemami, nongina ami tee ami annaaili tani taraiem. ⁷ Liuna avalua o, kapuimami etoa, me tale isaa akapa uneimami maate me niuviuvi, ami ghe ghaala airuui ngalo nau ami ghe nongola aikaiaaimim. ⁸ Ia oia ami rooro tani toka, poli am tiitingina akorokorongana ta Vau ngepona ateva. ⁹ Ami kaakaili emasina ta God poli am, me mausiimim ami ghaaghaa kinatama nimasimasi eteva ta God. ¹⁰ Eleivoo me ellaa ami looloo sae asarasarakanaaili va ami ghele mene taraiem, me tani mene auliaa tau aatu llo karika tale aikaiaaimim.

¹¹ Ami looloo sae va aue kapuita God ateva, Tamaita ia, me Vau ngepona ateva Iesu aue eghelei emasalika salana me ami mene mae taraiem. ¹² Aue Vau ngepona ateva eghelei ailousiaaimim enamuu, me epasu esassanga, me ekaõ vellao ta kateva kateva etaimim me ta mene katoa taumattu ngeleka nongina ami, ami ghe gheleila etaimim. ¹³ Ia aue easarasarakana urunguitaniimim, me karika aue righi kaluimim ssavoto me aue am manga ta matane kapuita God ateva Tamaita ia, nau kapuita Vau ngepona ateva Iesu emae tee ila akapa kapuna atoa manga ila.

4

Ita toka tani amasimasi God

¹ Liuna avalua o, kapuimami etoa, me ami ghe loeamla vaalua tani toka tani amasimasi God, me tokatokaaimim nau ghaine am usilaa. Me isaa oia ami kookolomiem me ami aulia ngasarasarakana etaimim ta Vau ngepona

ateva Iesu tani gheleiem va am toka tale ia o ase nitoka ateva nau ekapa atoa. ² Poli am kilakila saa inangari niloeloe ami ghe tau aatu sio etaimim, me isaa o inangari, matuutuliena ghe mae sio ta Vau ngepona ateva Iesu.

³ Aloaloannaane God etaimim va am manga, me am akekkeliem tale uunguaa niailai salosalooa see. ⁴ Kateva kateva etaimim etani kila vaalua tani ainanganangaa vilikina tale salana manga me nioneoneaa, ⁵ karika va sesa ninannaa emene muemueiniem va am ghelei voto sesa, nongina taumattu ngeleka atoa karika la kilakila God. ⁶ Me tale isaa o voto karika teva emene ghelei saasakiaa ta teva kapuna, o ekamea me eghaa peina. Vau ngepona ateva aue eliu aipolipoli sesa tale ia o ase taumattu ngateva, poli isaa o ase ssavoto, nongina ngami ghe auliaa muela, me ngami mene auliaa kieimim. ⁷ Poli God karika va ghe kolotala tani tam raarangisana ta ita toka va manga maamauluaaita. ⁸ Liuna avalua o me lo ateva erati isaa o inangari niloeloe, karika va eratirati taumattu, ta eratirati God, ia etautau aatu kapuna Spirit Manga ateva.

⁹ Me tani ailousiaa mene katoa tau ngaiesoaa, karika righi uunguaaimami tani mene pitipiti me auliaa etaimim, poli God ang ghe apasungaala etaimim vaalua tani aielousiaa mene kateva. ¹⁰ Me koronnaaili, am, am aielousiaa kapuita akapa atoa eMesedonia, me, kapuimami etoa, ami mene aulia ngasarasarakana tani gheleiem va am toka tale ia o ase nitoka ateva nau ekapa atoa.

¹¹ Am gheleia va ekateva voto namuu ia tale maamauluaaimim tani toka tale luei, me am annaa nonga uunguaaimim, me am uungu aanasa nongina ami ghe auliaala etaimim. ¹² Me aue tokatokaaimim tale nau ekapa aue lo atoa eleka la oneoneainam, me am rau mene nim toka, me am anna va katoa la ghelei tau aatu voto am aaloanna.

Maemaeane Vau ngepona ateva

¹³ Kapuimami etoa, ami anna va am kila sa ateva aue elutu ta lo atoa la nim aseasekanua tale nimate, me aue am tam alousiusi nongina taumattu ngakapa atoa poli karika la kilakila va mene teva maulue auena. ¹⁴ Ita aiesoaa va Iesu ghe matela me ghe mene totula, me ita aiesoaa tee va God aue emaeaa Iesu tee lo atoa laghe asekanuela tale aikaiaaira ta Iesu. ¹⁵ Nongina inangarina Vau ngepona ateva, ami auliaa etaimim va lo atoa ita tokatoka, karika ita ghe mate me Vau ngepona ateva aue emae, karika aue ita kasu ekasina ta lo atoa la aseasekanua. ¹⁶ Ta ia Vau ngepona ateva Iesu aue ekasu epona liu me aue ekolokolo atingina, me tee lingi ngalona ateva kapuira namu ngateva ensolo atoa, me nikolokolo ateva tale unna taue ateva God, me lo atoa laghe aikaiaaala ta Iesu me laghe matela aue la totu ekasina. ¹⁷ Vara me lo atoa ita tokatoka, karika ita ghe mate, aue ita sae aitaauaa teeila tale urukookoo tani sou Vau ngepona ateva elomarase, me aue ita toka tee Vau ngepona ateva nau ekapa atoa. ¹⁸ Liuna avalua o me am aippooaa tale inangari niaisausi tale kateva kateva etaimim tale isaa oia inangari tale maemaeane Vau ngepona ateva.

5

¹ Me, kapuimami etoa, tale nau eteva isaa o voto aue elutu, karika righi uunguaaimami tani mene pitipiti. ² Poli am kilakilaaili va nauna ateva Vau ngepona ateva aue emae nongina tau niainao ateva eleivoo. ³ Nau eteva

4:3: 1 Tes 5:23; 1 Pita 1:16. **4:4:** 1 Ko 6:13. **4:7:** 1 Pita 1:15-16; Hib 12:14. **4:8:** Luk 10:16; 2 Ko 1:22. **4:9:** Jon 13:34. **4:11:** Ips 4:28. **4:14:** Rom 14:9; 1 Ko 15:3-4, 12. **4:15:** 1 Ko 15:51-52. **5:2:** Mat 24:42-43; 2 Pita 3:10; Aotu 3:3. **5:3:** Mat 24:39; Luk 21:34-35.

taumattu ngatoa la ue va, “Ami tokatoka tale luei me aue ami saanga,” me aue la nim soghi, ta nitturu sesa aue elutu etaira, nongina vause ateva emoomolenaa eghaaghaa nimmarikana, me karika poi aue la saanga.

⁴ Me am, kapuimami etoa, karika va am tokatoka tale saurrom, va ia o nau eteva aue eghelei esoghisoghiem nongina tau niainao ateva. ⁵ Am akapaaili natuirarua am mallanga ateva me llaa ngateva, karika va ita tale voo ngateva me saurrom ateva. ⁶ Liuna avalua o me karika ita mene ghelei nongina katoa la aseasekanua. Ita, ita anguu taatara, me nannaaita emasalike. ⁷ Lo atoa la aseasekanua, la aseasekanua eleivoo. Me lo atoa la ropiropi sesa manu, la ropiropi me la veevee eleivoo. ⁸ Me poli ita tau ngellaa ita, nannaaita emasalike. Nongina ita aasae sioto ateva, ita atoka niaikaaiia me niaielousi, nongina kapa aisou vaalau eteva eaakou kassauita ateva, me nitaatara lao emua tale nisaanga enongina kou nguru eteva, gheeleia tale kapa. ⁹ Ta karika God ghe suitoongainitala va ita ghaa sessaiaane, ta nisaanga ta kapuita Vau ngepona ateva Iesu Karisto, ¹⁰ ghe matela etaita, liuna avalua o me arova maulue ita o matena ita, aue ita toka aitauaa teeia. ¹¹ Liuna avalua o me am asarasarakana kateva kateva etaimim, me am aisueieinam, nongina am gheelei.

Airuuruu tale inangari niloeloe

¹² Me ami loeloeam, kapuimami etoa, tani oneoneaa lo atoa la uungu aanasa elome etaimim, me la ghaaitoieinam ta Vau ngepona ateva, me la ghaauliaa kieimim tale voto. ¹³ Am oneoneainila me am aielousieinila poli uunguairaa. Am toka tee kateva kateva tale luei. ¹⁴ Ami asarasarakanaiem, kapuimami etoa, tani auliaa kieira lo atoa ngila tokatoka me karika la uungu emasina, me am ppooaa inangari nissausi ta lo atoa ngila laa siosio euu tale ninannaa, me am sausi lo atoa ngila saasaghuighuina, me erau mene sessai parasiem tale taumattu ngakapa atoa. ¹⁵ Am tara va karika teva emene liu sesa tale sesa. Nau ekapa atoa am tootoonga tani masina tee mene kateva etaimim, me ta ila akapaaili taumattu ngatoa.

¹⁶ Nau ekapa atoa am masimasi, ¹⁷ am looloo sae nau ekapa atoa, ¹⁸ am kaili emasina tale isaa akapa ase voto, ta aloaloannaane God etaimim isaa avalua o ta Karisto Iesu.

¹⁹ Am rau mene ghelei epala Spiriti eteva. ²⁰ Am rau mene rati inangarina ateva God propete atoa la ghaaulieinia etaimim. ²¹ Am tootoonga isaa akapa inangari o, me am poso parasi llo masina. ²² Am akekkeliem tale isaa akapaaili asease voto sesa.

²³ Aue ia God, God ia tale luei, eamanga akapa maamauluaaimim. Me aue spiriti eteva etaimim, me maamauluaaimim, me vilikiimim, lotolu ekapa lotolu ghulughuluena, nau Vau ngepona ateva Iesu Karisto emae. ²⁴ Lo ateva ekolokoloam, am rooroo tani atoka tuutuliimim etana, me ia aue eghelei isaa o voto.

²⁵ Kapuimami etoa, am looloo sae mausiimami. ²⁶ Am sou kapuita akapa atoa tale niaielousi eteva manga ia.* ²⁷ Aghaulia ngasarasarakana etaimim ta matane Vau ngepona ateva tani riti ia oia uru ngai etikirighi ta kapuita akapa atoa.

²⁸ Ami looloo sae va aue maamasinaane Vau ngepona ateva Iesu Karisto etoka teeiem.

5:5: Rom 13:12. **5:8:** Ais 59:17; Ips 6:14, 17. **5:10:** Rom 14:8-9; 1 Tes 4:14. **5:14:** 2 Tes 3:6, 11. **5:15:** Rom 12:17; 1 Pita 3:9. **5:16:** Plp 4:4. **5:18:** Ips 5:20. **5:19:** Ips 4:30. **5:21:** 1 Jon 4:1. **5:23:** 2 Tes 3:3. **5:25:** Kol 4:3; 2 Tes 3:1. * **5:26:** tale niaielousi eteva manga ia Tale inangari nge Grik, tale niaingusu manga ia.

Aiaaghaluene atikirighi uru ngai Pol ghe pitiela ta aTesalonika ngatoa Inangari emuemua

Pol ghe pitila aiaaghaluene atikirighi uru ngai ghe lao sio tale ale manga ateva eTesalonika tani ghelei emasalika kasina voto tale nau eteva Iesu aue emene mae. Katoa karika laghe kila amasina isaa o voto koronna ia, poli katoa tau ngai aapasunga laghe auliaala va Iesu ang ghe mene mae sio. Mene katoa laghe nnaala va karika la mene uungu, poli ghaisa ngarighi Iesu aue emene mae.

Tani kila amuemua

Aitiutiu tale inangari 1:1-2

Tani toka akorokorongana tale nau sesa 1:3-12

Tau ngai ghelei saasakiaa inangari nipaopao ateva me maemaeane Iesu 2:1-17

Vaalua tani toka nau am totoi maemaeane Iesu 3:1-15

Airuuruu tale inangari 3:16-18

¹ Aghi Pol, Saelas me Timoti,

Ami pitipiti aatu ta taumattu ngatoa tale ale manga ateva ona eTesalonika tale ararina atea God Tamaita ia me Vau ngepona ateva Iesu Karisto.

² Ami looloo sae va maamasinaane me luei ekasukasu ta God Tamaita ia me Vau ngepona ateva Iesu Karisto aue etoka teeiem.

Iesu aue esio me etaula aipolipoli ta kapuna atoa

³ Unguaaimami tani kaili emasina ta God nau ekapa atoa mausi-imim, kapuimami etoa, me emaamasina tani ghelei isaa o llo voto, poli aikkaaiaimim epiipinosa anamuu nau ekapa atoa, me niaielousi eteva ta kateva kateva etaimim eghelei elao ta mene kateva ange ooroi. ⁴ Liuna avalua o me elome tale alena ale manga akapa God, ami aasakeaa vaalua karika am maamangoo tani ghelei voto masina, me aikkaaiaimim tale isaa akapa nitootoonga me nimmarikana am ghaaghaa me am tiitingina akorokorongana.

⁵ Isaa o voto eaapasunga va unna niaisakei God ghulughuluena tale isaa o voto, me God aue iraiem va masina am tale ararimangalina ateva, am mammarikana mausi ia o ararimagalina ateva. ⁶ Nongina nighulughuluena ta matane God va eliu voto sesa ta lo atoa la ghelei voto sesa etaimim, ⁷ me aue etau aatu niainoana etaimim lo atoa am ghaaghaa voto sesa, me etaimami tee. Isaa o voto aue elutu nau Vau ngepona ateva Iesu ekauerekati epona liu, tale kura atea eramerame, tee kapuna ensolo atoa sarasarakanaaili ila. ⁸ Aue eliu voto sesa ta lo atoa karika la kilakila God me karika la nongonongo usilaa masi kiukiuna kapuita Vau ngepona ateva Iesu. ⁹ Aue la ghaa aipolipoli tale voto sesa etaira, tale nitturu etea tokatoka liu ia, me Vau ngepona ateva aue tiu vella tale taataraane me tale kinatama mallangina ateva ¹⁰ tale ia o nau eteva aue emae, ita kapuna taumattu ngatoa manga ita, ita asaesae ararina atea, me lo atoa la aiesoaa etana la gharueinia. Am tee aue am toka tee lo atoa la aiesoaa ta Iesu, poli am aiesoaa inangariimami etaimim.

¹¹ Poli isaa o voto etokatoka tale nannaaimami, me nau ekapa atoa ami looloo sae mausiimim, va aue God esausiem tani ghelei voto ghe koloamla tani ghelei, me tale sarasarakaniaane aue am ghelei ekapa isaa o masi voto am aloanna tani ghelei, me isaa akapa gheeleiaaimim am ghelei mausi tale aikaiaaimim. ¹² Ami looloo sae va isaa o voto elutu me aue ararina atea kapuita Vau ngepona ateva Iesu am aamuemueia etaimim, me am etana, tale maamasinaane kapuita God ateva me Vau ngepona ateva Iesu Karisto.

2

Tau ngai ghelei saasakiaa inangari nipaopao ateva

¹ Me tale maemaeane kapuita Vau ngepona ateva Iesu Karisto, me nivelu eitauaa ita ghelei etana, ami kookolomiem, kapuimami etoa, ² tani rau mene nnangaili me emoiem tale taumattu la ue va nauna ateva Vau ngepona ateva ang ghe mae sio. La ghele ue va laghe nongoala tale inangari niaulia ngamuemua, o inangari laghe nongola, o inangari tale uru ngai taataraane va ghe kasula etaimami. ³ Am rau mene tau velu teva taumattu va ekameam tale teva ase salana, poli ia o nau eteva karika aue emae lomose ta nioghi vulu masi voto emae mua, me tau ngai ghelei saasakiaa inangari nipaopao ateva* aue eotua, lo ateva elaolao tale salana nitturuu. ⁴ Aue eghelei runga salane God, me aue esaesaea tale voto akapaaili manga, me aue etoka tale alena ale manga ateva God, me aue eue va ia Goto ia.

⁵ Koti am ghe kkaluaala va nau aghe tokatoka teiem aghe auliaa isaa o voto etaimim. ⁶ Me ia oia am rooroo tani kila va sa ateva eghelei rungania, me aue vira otua tale nau eteva ang ghe suiela. ⁷ Ta ia o tau ngai ghelei saasakiaa inangari nipaopao ateva ange tiuaala tani apasunga uunguaa sarasarakaniaane ghe aaisuliaa, me lo ateva eghelei rungania aue etoka ghelei rungania, lomose ta God aue eghaa velua. ⁸ Vara me aue eotu tau ngai ghelei saasakiaa inangari nipaopao ateva, Vau ngepona ateva Iesu aue uvi ematea tale aulao paane ateva, me eturungia tale mallangi maemaeane ateva. ⁹ Maemaeaa ia o tau ngai ghelei saasakiaa inangari nipaopao ateva aue elao aitauaa tee sarasarakaniaane Satana, me aue epasunga tale asease sarasarakana, niaimatoonga me mirikolo kamena, ¹⁰ me isaa akapa ase voto sesa tani kame lo atoa aue eraula. Aue eraula, poli laghe ratila tani aielousiaa koronna kiukiu kanna God me aue la ghele saanga. ¹¹ Liuna avalua o me God aue eghelei savisavilaa nannaaira, me aue la aikaiaa tale llo kamena. ¹² Liuna avalua o me God aue eghelei niaisakei etaira, poli karika laghe aiesoaa tale llo koronna, ta laghe masimasiaa llo sesa.

Inangari niaisausiaa tani tingina akorokorongana

¹³ Uunguaaimami tani kaili emasina ta God nau ekapa atoa poli mausiimim, kapuimami etoa, Vau ngepona ateva eaailousieinam. Ami kaakaili emasina ta God ta poli aitiutiu God ghe suitoongainamla va am saanga tale uunguaane Spiriti eteva, tani manga poli am ghe aiesoaa tale koronna kiukiu kanna God. ¹⁴ Ghe koloamla tani saanga tale masi kiukiu ami ghe poppooaa, liuna avalua o me am tee aue am ghaa mallangina ateva kapuita Vau ngepona ateva Iesu Karisto. ¹⁵ Liuna avalua o, kapuimami etoa, me am tingina akorokorongana, me am poso parasi voto ami ghe apasungaala

1:11: Kol 1:9; 1 Tes 1:2-3. **2:3:** 1 Tim 4:1; 1 Jon 2:18; 4:3. * **2:3:** tau ngai ghelei saasakiaa inangari nipaopao ateva Katoa uru ngai laghe pitila, la ghe pitila va tau ssavoto ateva. **2:4:** Den 11:36; Esik 28:2. **2:8:** Ais 11:4; Aotu 19:15. **2:9:** Aotu 13:11-13. **2:13:** 2 Tes 1:3; Ips 1:4.

etaimim, tale inangari am ghe nongola ta paaimami me tale uru ngai ami ghe pitila.

¹⁶ Aue ia kapuita Vau ngepona ateva Iesu Karisto, me God Tamaita ia, ghe aielousieinitala, me tale maamasinaane ghe tau mae sio inangari niasarasarakana tokatoka liu me masi voto emua etaita, ¹⁷ easarasarakana urunguitaniimim, me eaisausieinam tani ghelei isaa akapa masi niuungi me inangari.

3

Pol ghe kolomila tau ngaiesoa ngatoa tani looloo sae mausiira

¹ Liuna avalua o, kapuimami etoa, me am looloo sae mausiimami, me aue inangarina Vau ngepona ateva ekasu parasi ekapa see, me la oneoneainia nongina am, am ghe oneoneainia. ² Me am looloo sae va God eghaa oghiemami tale sesa taumattu ngatoa la ghelei voto karika masina, ta poli karika va taumattu ngakapa atoa la ghaaikaaiia ta God. ³ Me Vau ngepona ateva eghelei voto ghe uela va eghelei, me aue easarasarakanaiem, me eghelei rungainam ta sesa taumattu ngateva. ⁴ Ami aatoka tuutuliimami ta Vau ngepona ateva va am toka ghelei voto ami ghe aulia ngasarasarakana la etaimim, me aue am toka ghelei isaa o voto. ⁵ Aue Vau ngepona ateva ekatula ngaghulughuluena urunguitaniimim tani lao tale ailousiaane ateva God me nitingina asarasarakana ta Karisto.

Niaulia ngaotu tale uunguaa tani nim toka

⁶ Tale ararina atea Vau ngepona Iesu Karisto, ami aulia ngasarasarakana etaimim, kapuimami etoa, va am kasu emasalika ta lo atoa kapuita la nim tokatoka me karika la uusilaa inangari am ghe ghaala etaimami. ⁷ Poli am kilakila vaalua tani usilaa gheeleiaaimami, karika ami ghe nim tokatoka nau ami ghe tokatoka teeiem. ⁸ Karika ami ghe nim namanama inana ta teva taumattu, ta ami ghe polipoli, me ami ghe uungu aanasa eleivoo me ellaa tani ghelei va ami rau mene taula maate ta teva etaimim. ⁹ Ami ghe ghelei llo, karika va poli karika masina etaimami tani ghelei, ta ami ghe anna va ami ghe apasunga voto am aimuli tee. ¹⁰ Nau ami ghe tokatoka teeiem, ami ghe aulia ngasarasarakana la etaimim va, “Lo ateva taumattu etam aloanna tani uungu, erau mene namanama.”

¹¹ Ami nongonongo va katoa elome etaimim la nim tokatoka, karika la uungu me la nim toka auliaa uunguaaira katoa. ¹² Isaa o ase taumattu ami aulia ngasarasarakana, me aaloannaaimami tani auliaa etaira tale ararina atea Vau ngepona ateva Iesu Karisto, va la toka rarieinila me la nama inana la uunguaa. ¹³ Me ta ngetaimim, kapuimami etoa, am rau mene mangoovulu tani ghelei voto masina.

¹⁴ Arova teva etam nongo usilaa inangari niloeloe ami auliaa tale uru ngai etikirighi oia, am tani tara tootoongainia me am rau mene ghuia, tani attara mataneia me epalata. ¹⁵ Me am rau mene taraia va tau ngai ssateemi ia, ta poli kapuita ia, am auliaa kiena.

Pol ghe arangiseilala

¹⁶ Isaa oia, aue Vau ngepona ateva luei ia, ia aue tau aatu luei nau ekapa atoa me tale isaa akapa salana. Vau ngepona ateva aue etoka aitaua ngakapa teeiem.

¹⁷ Aghi Pol apitipiti isaa oia inangari niarangise tale nimaghi etelange, me ia oia niaimatootoongana ateva etokatoka tale isaa akapa uneghi uru ngai apitipiti, tani apasunga va aghi aghe pitila.

¹⁸ Alooloo sae va aue maamasinaane kapuita Vau ngepona ateva Iesu Karisto etoka teeiem akapaaili.

Aitiutiu etikirighi uru ngai Pol ghe pitiela ta Timoti Inangari emuemua

Pol ghe soula Timoti tale unna aiaaghaluene ateva nikasu, me ghe koloala tani mae aitauaa me euungu eitauaa teeia (Apostolo 16:1-3). Timoti ghe usila Pol, me lalu ghe uungu eitauaala oroi ninamanama. Tale nau eteva Pol ghe pitila ia oia uru ngai etikirighi, Timoti ghe tokatoka eIpises, me ghe muemueaa ale manga ateva okae.

Pol ghe aloannala tani akorokorongana Timoti me tee tani tau lao kasina niloeloe tale voto atoa laghe lutula tale ale manga eIpises. Ghe pitila voto tale nilooloo sae, vaalua tani aimatoonga elda ngatoa me rikina atoa, nisausi ta vause raue vulu etoa, vaalua tani nnaa ta lo atoa karika la tokatoka tale aloannaaira, me vaalua tani nnaa tale viliki veu.

Tani kila amuemua

Aitiutiu tale inangari 1:1-2

Pol me Timoti 1:3-20

Vaalua tani kkaua ngakoronna tale ale manga 2:1-4:16

Vaalua taumattu ngatoa la tani toka 5:1-6:2

Inangari niloeloe ta Timoti 6:3-20

¹ Aghi Pol, kapuna apostolo ieghi Karisto Iesu ta niaulia ngasararakana ta God tau ngai asaangiita ia me Karisto Iesu ita aatoka tuutuliita etana.

² Ta Timoti natughu koronna io, ta poli unem niaikaaiaa.

Alooloo sae va God Tamaita ia me Karisto Iesu kapuita Vau ngepona ia lalu tau aatu maamasinaane God me alousiusiaane me luei.

Upanio tale lo atoa la aapasunga kamena inangari

³ Nongina aghe auliaala etam nau aghe anna tani lao eMesedonia, va utoka eIpises me uaulia ngasararakana ta kasina taumattu va la rau mene apasunga kamena inangari, karika va inangarina God. ⁴ La rau mene tau vella va la lao tale uunguaa kiukiu marripaana me tani kila lao tuvuiria atoa emua arau. Isaa o voto eaalakuti uunguaa niaikiso me karika egheelei uunguaane God tale niaikaaiaa. ⁵ Malloeana isaa o niaulia ngasararakana va niaielousi ekasukasu tale lo ateva urunguita raarangisana ia, me ninannaa masalike me niaikaaiaa koronna. ⁶ Katoa taumattu ngila ghe kasu vulila isaa o voto me ngila ghe kirila tani laa usilaa inangari karika righi malloeane. ⁷ La ghanna tani tau ngai aapasunga tale inangari nipaopao, me karikaaili la kilakila sa ateva la ghaulieinia.

⁸ Ita kilakila va inangari nipaopao masina arova teva taumattu eapasunga ngamasina voto etana. ⁹ Ita kilakila tee va, karika God ghe tau mae sio inangari nipaopao mausi ghulughuluena atoa taumattu. Ghe tau mae sio mausi lo atoa la gheelei saasakiaa inangari nipaopao me lo atoa la ghaamakatakata, me lo atoa karika la oneoneaa God me tau ssavoto ila, me karika manga ila, me karika la kakkauaa, me uneira lo atoa la uviuvi emate tamaira me kinaira atoa, me lo atoa la ghaiuuvi emate, ¹⁰ me lo atoa la ailai salosalooa, me lo atoa taita la asoaso tee mene katoa taita, me lo atoa la ainao taumattu, me tau nikamekame atoa me lo atoa la kamekame tale niaisakei, me mene saa righi llo etam laolao aitauaa tee inangari koronna.

¹¹ Isaa o voto eaasokoi tale masi kiukiuna God ghe tau mae sio etaghi. Ia o masi kiukiu ghe mae sio ta masi God ateva taumattu ngatoa la tautae sae.

Maamasinaane Vau ngepona ateva ta Pol

¹² Akaakaili emasina ta Karisto ateva Iesu, kapuita Vau ngepona ia, ghe tau mae sio sarasarakana me ghe taraieghila va arooro tani ghelei emasina uunguaane, me ghe suitoongainaghila va aghelei. ¹³ Arongona ta emua arau aghi aghe poppooaa saasakiaa tee God, me aghe uviuvi tau ngaiesoa ngatoa, me ssa taumattu ngaghi, Karisto ghe apasungaala alousiusiaane etaghi poli aghe ghelei voto karika aghe kilakila va sesa, me karika aghe aiesoaa. ¹⁴ Maamasinaane kapuita Vau ngepona ateva ghe arangise amasinaailieghila, oroieili tee niaikaaiiaa me niaielousi isaa ta Karisto Iesu.

¹⁵ Kateva inangari koronnaaili ia, erooro va ita ghaaia, eue va, Karisto Iesu ghe mae sio tale kosa ateva oia tani asaangi tau ssavoto atoa, me ta ila o sesa taumattu ngatoa aghi tani sesaaili ieghi etaira akapa. ¹⁶ Poli aghi sesaaili ieghi, liuna avalua o me God ghe apasungaala alousiusiaane etaghi, me ta ngetaghi ssa taumattu ngaghi, Karisto Iesu ghe apasungaala vaalua toitoiaane aluse karika airuuruu etana, tani aimatoonga ta lo atoa aue la ghaiesoaa etana, me la ghaa maulue ateva tokatoka liu ia. ¹⁷ Tale kingi eteva tokatoka liu ia, karika ematemate me karika ita taatariaia, ie nongaaili Goto ia, ita oneoneainia me ita taue sae nau ekapa atoa. Koronna.

¹⁸ Timoti, natughu, aloeloeo tale isaa oia inangari elaolao aitauaa tee niaulia ngamuemue laghe gheleila etam. Me nau uaimuli tee aue uaiuvii emasina tale unna niaiuvii eteae Vau ngepona ateva. ¹⁹ Uposo parasi tale niaikaaiiaa me tale masalike ninannaa. Katoa laghe ratila isaa o voto me aikaaiiaaira ang ghe sesala. ²⁰ Tale ia o ase taumattu ngateva, Aemenaeas me Aleksanda elome etaira. Ngaghe taulalue lao sio ta Satana tani apasunga etairarua va lalu rau mene ppooaa saasakiaa ta Vau ngepona ateva.

2

Uunguaa nikkauaa

¹ Aghaaulia ngasarasarakana va aitiutiu tale isaa akapa voto, isaa akapa nilooloo sae me nikaili emasina ita ghelei ta taumattu ngakapa, ² ta kingi etoa me ta lo atoa la uungu tale niuungu matuutuliena, va aue ita toka tale luei me karika nimatautu, tale salane God me tale nimanga. ³ Isaa o voto masina me eaamasimasi God tau ngai asaangiita ia. ⁴ Eaanna va taumattu ngakapa esaanga me la ghaa alomasaanga tale voto koronna. ⁵ Poli kateva nonga ia God ateva, me kateva nonga ia tau ngai sausia ngateva elome ta God me taumattu. Ia o taumattu ngateva Karisto ia, Iesu etana. ⁶ Ghe tau lao sio maamauluaane tani poli aaoghi isaa akapa taumattu. Isaa o inangari koronna ghe tau mae sio tale nauna tuunga ateva. ⁷ Tale mausi llo me God ghe suitoongainaghila va tau ngai ppooaa ieghi me aghapostolo me tau ngai aapasunga ieghi tale koronna niaikaaiiaa ta lo atoa karika aJiu ila. Aghaaulia ngakoronna, karika akamekame.

⁸ Liuna avalua o me aghanna va taita akapa atoa tale isaa akapa voto la ssuaa sae nimaira manga tale nikokkolomi me karika emene sessaila o la ghaikiso.

⁹ Tale isaa o salana, aghanna va vause atoa la molu tale ase nimolu emasina tale tummatavanga me taatara taumattu. Karika va tani rungiaa

1:12: Apos 9:15; Gal 1:15-16; 1 Ko 15:9-10. **1:13:** Apos 8:3; 9:1-5. **1:15:** Luk 19:10. **1:20:** 2 Tim 4:14-15; 1 Ko 5:5. **2:6:** Rom 3:29-30; Gal 1:4. **2:7:** Apos 9:15; Gal 2:7-8; 2 Tim 1:11. **2:9:** 1 Pita 3:3-5.

viliki veu tani poli asease voto tani ghelei emasina taatara uu nguruira o tani asae gol o pels o ghinna aipolina isaa arau epona. ¹⁰ Me tani molu tale niuungu masina, isaa o voto masinaaili ta lo atoa vause la ue va la kakkauaa God.

¹¹ Vause ateva ekila voto tale uunguaa nimatua ngatoka me tani nongo inangari me tani oneoneaa lo ateva eaapasunga. ¹² Karika aghanna va vause atoa la ghasasunga, o la ghelei niuungu sarasarakana tani lau taita atoa. Ila la nim matua atoka. ¹³ Poli God ghe ghelei ekasinala Adam me avirina Ivi. ¹⁴ Me karika va Satana ghe kamela Adam ta ghe kamela vause ateva me ghe tau ssavotola. ¹⁵ Me vause atoa aue la saanga poli la kaakaai aliki, arova la tam mangoo vulu niaikaaiaa, niaielousi me nimanga tee tale taatara taumattu.

3

¹ Kateva inangari koronnaaili ia, lo ateva ange annaala tale urunguitanina ateva va e-elda, ange nnaala niuungu eteva nioneoneaa etana. ² Ia o elda ngateva karika mene sesa gheeleiaane, me ekateva nonga vausenna ateva, me aue eapasunga va eaitaraa tokatokaane, taumattu ngatoa la oneoneainia, me eaaitaraa taumattu nau la laolao tanganuena, me tau ngai aapasunga ia, ³ karika tau niropi ia, me karika tau nisessai ia, ta ennaa mene kateva, me karika eaaikiso me karika eaielousiaa viliki veu. ⁴ Etani aaitara ngamasina vausenna ateva me natuna atoa, me etara va natuna atoa la nongonongo usilainia me la ghelei masi nioneoneaa etana. ⁵ Arova teva taumattu karika ekilakila vaalua tani aitaraa vausenna ateva me natuna atoa, vaalua aue eaitaraa alena ale manga ateva God? ⁶ Karika va evira mene aikolikoliaa, ta erau tau sae nannaane, va ekatuu va eghaa niaisakei nongina raroai eteva. ⁷ Tau ngeleka atoa la tani oneoneainia me erau mene katuu lao tale voto karika masina me tale unna airrekati eteae raroai eteva.

⁸ Rikina atoa ila tee taumattu ngatoa la oneoneainila, me karika tau nikamekame ila, me karika la ropiropi sesa manu, me la rau mene kuruetu tale viliki veu. ⁹ La poso parasi voto eaaisulia tale niaikaaiaa, tee tale ninannaa masalike. ¹⁰ La toongila mua me arova karika righi voto sesa la tara etaira, erooro va la rikina. ¹¹ Tale isaa o salana, vauseniira* tee atoa, taumattu ngatoa la oneoneainila. Karika va tau nighelei saasakiaa taumattu ila tale inangariira, ta la aitaraa tokatokaaira me tale isaa akapa voto ita rooro tani atoka tuutuliita etaira. ¹² Rikina ateva evausenna nonga kateva me etani aaitara ngamasina natuna atoa me lo atoa la tokatoka tanganuena. ¹³ Lo atoa la uungu emasina, la ghaaghaa nioneoneaa me la sarasarakanaaili tani auliaa aikaiaaira ta Karisto ateva Iesu.

¹⁴ Arongona ta aghaaiesoaa va ghaisa ngarighi amae taraiem, apitipiti isaa oia inangari niloeloe ¹⁵ me arova atam mae parasi, aue ukila vaalua taumattu ekasu me euungu tale tau ngaiesoa ngatoa, kapuna ila Goto ateva etokatoka liu. Ale manga ateva suena ia me voto koronna etokatoka saooa etana. ¹⁶ Koronnaaili, voto aisuliaane emua arau tale salane God namungaili:

Ghe rekataala taumattu ia

me Spiriti eteva ghe apasunga ngamasalikala va ia Natuna ia God.

Ensolo atoa laghe taraiela

me apostolo atoa laghe ppoainiela tale anue namu ngatoa.

Taumattu tale kosa ateva laghe aikaiaaala etana,

2:10: 1 Tim 5:10. **2:12:** 1 Ko 14:34. **2:13:** Aitiutiu 2:7, 21-22; 1 Ko 11:8-9. **2:14:** 2 Ko 11:3; Gal 3:1-6. **3:1:** Apos 20:28. **3:2:** Tts 1:6-9. **3:7:** 2 Ko 8:21. **3:11:** Tts 2:3. * **3:11:** vauseniira o rikinesi etoa. **3:16:** Jon 1:14; Kol 1:23; Mak 16:19.

me God ghe ghaaie saela epona liu.

4

Inangari niloeloe Pol ghe auliaala ta Timoti

¹ Spiriti eteva ghe aulia ngamasalikangailila va tale isaa oia nau me nau too emaemae, katoa aue la kasu vuli niaikaaiaa me la usi raroai etoa tau nikamekame ila me voto raroai etoa la ghaapasunga. ² Isaa o ase niapasunga emaemae ta usimaghalaria atoa tau nikamekame ila. Nannaaira karika eroo tani kila voto masina me sesa. ³ La gheelei runga taumattu ngatoa va la rau mene lai, la ue va la rau mene nama kasina ase ngingana, God ghe gheleila me pei ninama tee nikaili emasina ta lo atoa la ghaiesoaa me la kilakila llo koronna. ⁴ Isaa akapa voto God ghe gheleila, masina, me karika ita mene rati righi ase ngingana arova ita ghaa tee nikaili emasina. ⁵ Poli God eaamangaia tale inangarina ateva me tale uneita nilooloo sae.

⁶ Nau uauliaa isaa o voto ta kapuita atoa, io aue umasi tau ngai uungu ta Karisto Iesu, nau uangingio tale voto kanna God tale inangari niaikaaiaa me tale niapasunga koronna uaimuli tee. ⁷ Urau mene aimuli tee kiukiu marripaana me kiukiu kaluira vause namu ngatoa, karika la oneoneaa God. Ta ugheleio nonga tani ghaa gheeleiaane God. ⁸ Poli niaimatoonga tale nianamisi masina, ta egheelei emasina vilikiita, me gheeleiaane God esausio tale isaa akapa voto me egheelei inangari nialokoi tale maulue ateva ghaine me auena.

⁹ Kateva inangari koronnaaili ia, erooroo va ita ghaaia. ¹⁰ Mausi isaa o voto me ita uungu tale niaanasa me niasaraka me ngita ghe atokala tuutuliita ta Goto ateva etokatoka liu. Ia tau ngai asaangi ia ta taumattu ngakapa atoa, me tani lo atoa la ghaiesoaa.

¹¹ Uapasunga isaa o voto me uaulia ngasarasarakana etaira va la nongo usilaa. ¹² Utingina asarasarakana tale voto koronna. Urau mene ghelei va taumattu ngatoa la tara aloio sio euu poli aliki taita io. Utau niaimatoonga ta tau ngaiesoa ngatoa tale inangari, tale gheeleiaam, tale niaielousi, tale niaikaaiaa me tale niraarangisana. ¹³ Uatoka maamauluaam tani riti Uru ngai Manga ateva tale tummatavanga, tani ppooaa me tani apasunga, me auena amae. ¹⁴ Urau mene rati voto God ghe nim tau aatu sio, ughe ghaala tale inangari kanna God nau elda ngatoa laghe saoaala nimaira etam.

¹⁵ Utani uungu esarasarakana tale isaa o voto. Utauo lao akapa tale isaa o voto me ila akapa aue la tara uunguaam ugheelei. ¹⁶ Utani aitokaa tee maamauluaam me tale voto uapasunga. Arova utam oghi vulu isaa o voto, aue easaangio me lo atoa tee la nongonongoio.

5

Uunguaane Timoti tale tau ngaiesoa ngatoa

¹ Urau mene sama anamuu tee taita namu ngateva me esesaio etana, ta uloea tani asarasarakanaia nongina va tamam ia. Ughelei aliki taita atoa va tue me nenga iem, ² vause namu ngatoa va kinam ila, me aliki vause atoa va kapum vause ila. Ughelei isaa o llo voto tale niraarangisana.

³ Utani aitarara ngamasina lo atoa vause raue vulu ila karika poi righi aisausiira. ⁴ Me arova vause raue vulu eteva righi natuna o tuvuna, ila la kila akasina tani apasunga aikaaiaaira tale uunguaa nikkauaa tani aitarara lo atoa kalakalangina ila etaira, tani liu aitarara kinaira me tamaira me

tuvuira atoa etaira, poli isaa o voto God emasimasia. ⁵ Lo ateva vause raue vulu ia etuutukuna tale voto ealoannaaili me karika toa tani aitarainia, eeatoka tuutulina ta God me elooloo sae voo me llaa tani kolomi niaisausi ta God. ⁶ Me lo ateva vause raue vulu etokatoka tani amasimasia, ang ghe matela arongona ta sakesake ia. ⁷ Utaula ta taumattu ngatoa isaa oia inangari niloeloe me karika teva taumattu aue eroo tani auliaa saasakiaa teeila. ⁸ Arova teva taumattu karika eaitaraa mangalina atoa me tee tamane me kinna me tuena me nengane atoa me natuna atoa, ang ghe ratila niaikaiaa me sesaane elaulau lo atoa karika la ghaiesoaa.

⁹ La piti sio arariira lo atoa vause raue vulu ila aneira ninamanama ang ghe laula ghaonomongauluae (60), me laghe tokatoka amasina tee taitaniira atoa, ¹⁰ me laghe kilakila akapaila tale masi gheeleiaaira, nongina aaitaraaira tale aliki, me masinaaili ila tani aitaraa taumattu ghe laolao tanganueira, me laghe porapora kkeira kapuna taumattu ngatoa God, me laghe saasausi lo atoa laghe tokatoka tale sesa nau, me laghe tautau lao maamauluaaira tani ghelei isaa akapa asease masi niuungu.

¹¹ Lo atoa raue vulu aliki vause ila, urau mene piti sio arariira va raue vulu ila, poli aaloannaaira tani lai namungaili me elaulau inangari nialokoi laghe gheleila ta Karisto. ¹² Isaa avalua o me aue la aisakei poli karika la ghelei llo laghe auliaala tale inangari nialokoi va la ghelei. ¹³ Me tee la nim toka ghelei kateva ase voto tani nim toka me la paapaangale me karika nonga va la nim tokatoka ta la ghaikusia me la nim toka auliaa uunguaaira katoa. La ghaauliaa voto karika masina va la ghauliaa. ¹⁴ Liuna avalua o me atautaula masi ninannaa ta aliki vause atoa raue vulu ila va la mene lai, me la ssu aliki, me la ghaitaraa tanganueira, me karika aue la taula righi nauna tau ngai ssateeita atoa tani auliaa saasakiaa teeila. ¹⁵ Katoa ngila ghe kirila tani aimuli tee Satana.

¹⁶ Arova teva vause tau ngaiesoaa ia, me toa raue vulu la tokatoka teeia, eaitarainila me esausila tani ghelei me ale manga ateva erau mene maate. Me ale manga ateva aue esausi nonga lo atoa vause raue vulu ila la tuutukuna tani ghaa aaloannaaira.

¹⁷ Lo atoa elda la ghelei emasina uunguaa ale manga ateva, la taula namuu nioneoneaa, tani lo atoa uunguaaira tani ppooaa me apasunga. ¹⁸ Poli Uru ngai Manga ateva eue va, “Nau vulumakao ateva euungu tani ghaa velu viliki raisi, am rau mene ghelei runga paane ateva va karika emene nama isaa o raisi,” me, “Emaamasina va tau ngai uungu eteva eghaa aipolipoli tale uunguaane eghelei.” ¹⁹ Urau mene nongo teva taumattu eauliaa tee teva elda. Arova evira ghalua o kotolu taumattu la vira auliaa teeia ta ie nonga o voto ateva. ²⁰ Lo atoa la ghelei sesa voto, usama anamuu teeila tale tummatavanga, me mene katoa elda aue la matautu tani ghelei sesa voto.

²¹ Ngatautau aatu isaa o voto tani aitaraa isaa oia inangari niloeloe, ta matana God me Karisto Iesu me ensolo atoa suisuitoongainila. Urau mene aimassiaa.

²² Urau mene ailuilui tani saooa nimam me urau mene usi katoa tani ghelei ssavoto. Uaitarainio tani raarangisana.

²³ Urau mene ropi nonga manu ta ukaai tee uaeni enim pisikeaili tani sausi kovam ateva poli unim toka iisiki.

²⁴ Katoa taumattu eotuotu kaluira ssavoto tale ia arau o nau eteva, me auena eghaa nau niaisakei. Me mene katoa kaluira ssavoto karika eotuotu, ta auena etani otu tale nau niaisakei. ²⁵ Tale isaa o nonga ase salana masi

niuungu eotuotu, arongona ta llo karika eotuotu, isaa o voto karika aue eaisuliaa.

6

¹ Lo atoa la uungu me karika la tokatoka tale aloannaaira, la nnaa va vauira atoa la rooroo va la ghaa nioneoneaa namuu, me karika aue la ppoaaa saasakiaa tee ararina ateae God me voto ita aapasunga. ² Lo atoa vauira atoa la ghaiesoaa, la rau mene ghelei va oneoneaaira etaira episike poli la kakkaua ngaitauaa. La tani uungu emasinaaaili etaira, poli lo atoa la ghaaghaa voto etaira nau la uungu, tau ngaiesoaa ila me masinaaaili ila etaira.

Uapasunga isaa o voto etaira me uaulia ngasarasarakana va la ghelei.

Niaielousiaa viliki veu

³ Arova teva eapasunga kamena niaiesoaa, me karika elao aitauaa tee masi inangari niloeloe kanna kapuita Vau eteva Iesu Karisto, me tale niapasunga eoneoneaa God, ⁴ ia etautae sae nonga me karika ekilakila righi voto. Eanna nonga tani toka aikiso me aissakeana tee inangari, eaalutu nisessaia ta katoa peiira me ia karika, me niaikiso elome ta ghalua taumattu, niauliaa saasakiaa ta kateva, me sesa voto la nim nannaa tee mene kateva, ⁵ karika niruu tale niaitamammarasii elome tale taumattu nannaaira karika masina. Karika la roo tani alomasaanga tee voto koronna, me la ghanna va salane God la ghaaghaa viliki veu etana.

⁶ Emaamasina etaita tani ghelei llo voto eamasimasi God me ita masimasiaa saa llo etautau mae. ⁷ Poli karika ita ghe mae aitauaa tee sio righi voto tale kosa ateva oia me karika aue ita kasu eitauaa tee righi voto tale kosa ateva oia. ⁸ Arova righi inana me aiaasae etaita, ita masimasiaa isaa o voto. ⁹ Lo atoa taumattu la ghanna tani tue peipeiena la kaakatuu lao tale nitootoonga me airrekati eteae, me tale ase voto alokapakapanna me sesa nialoanna, me ekaakatulainila lao tale voto sesa me aue la ghaa nitturuu. ¹⁰ Poli uunguaa niaielousiaa viliki veu liuena ia tale isaa akapa ase voto sesa. Kasina taumattu eannaaili tani ghaa viliki veu me ngila ghe kasu vulila niaikaaiaa, me ngila ghe ghaala nimmarikana tale asease nialousiusi.

Airuuruu tale inangarina niloeloe Pol

¹¹ Me io, kapuna taumattu ngateva God, uilou vulu isaa o voto, me uaimuli parasi tani ghaa voto ghulughuluena, aloannaane God, niaikaaiaa, niaielousi, nitoka akorokorongana ta God, me uunguaa tani siuaa ninannaa. ¹² Uaiuuvii tale masi niaiuuvii tale niaikaaiaa, me uposo parasi maulue ateva tokatoka liu ia nongina God ghe koloola nau ughe gheleila masi niaulia ngaotu ta mata ngoroi etoa. ¹³ Tale taataraane God, ia etautaula maulue tale isaa akapa voto, me ta Karisto Iesu, ghe auliaala inangari koronna nau Pontius Paelat ghe kolomila nikokkolomi, aghaulia ngasarasarakana etam va ¹⁴ utani aitaraa niaulia ngasarasarakana akapa me karika teva aue etara righi sesa gheeleiaam me karika aue la aliu teeio righi voto, lomosina ta kapuita Vau eteva Iesu Karisto esio, ¹⁵ me God aue emaeaa tale nauna ia ghe suitoongaala. God ateva taumattu ngatoa la tautae sae me ie nonga tau ngaitoitoi ia, kingi ia ta kingi ekapa atoa me vau ia ta vau ekapa atoa, ¹⁶ ia nonga karika aue emate, me etokatoka tale mallanga karika ita rooroo tani lao etana, ia karika teva ghe taraia o erooroo tani taraia. Ta ngetana

6:1: Ips 6:5. **6:2:** Plm 16. **6:3:** Gal 1:6-9. **6:5:** 2 Tim 3:8; 4:4; Tts 1:14. **6:6:** 1 Tim 4:8; Plp 4:11-12; Hib 13:5. **6:7:** Job 1:21. **6:10:** Ips 5:5. **6:11:** 2 Tim 2:22. **6:12:** 1 Ko 9:25-26; 2 Tim 4:7. **6:13:** Jon 18:36-37. **6:15:** Aotu 17:14.

taumattu ngatoa la tau lao nioneoneaa me sarasarakana nau ekapa atoa. Koronna.

¹⁷ Uaulia ngasarasarakana ta lo atoa tue peipeiena ila tale kosa ateva oia tale isaa oia nau tani rau mene aasake me la rau mene atoka tuutuliira tale peiira, poli isaa o voto eroo tani kapa parasi. Me la atoka tuutuliira ta God poli ia etautau mae oroieili voto etaita me isaa akapa voto tani amasimasita.

¹⁸ Uaulia ngasarasarakana etaira tani ghelei oroieili masi niuungu, me la aitauaa peiira me la masimasi tani aiparruuii. ¹⁹ Tale ia o salana atikirighi, aue la atoka oroieili masi voto atoa tani sueila nau ngemuli epona liu, me aue la ghaa maulue ateva koronnaaili ia.

²⁰ Timoti! Uaitara ngamasina saa llo voto laghe tau aatu sio etam va uaitaraa. Uliu vilim tale nisama kamena me karika eauliaa God, me uakekkelio tale lo atoa la apasunga inangari kamena la ue va alomasaanga.

²¹ Katoa taumattu laghe usilaala ia o salana atikirighi, me laghe tiu ppaela tale uunguaa niaikaaiaa.

Alooloo sae va maamasinaane ateva God aue etoka teeio.

Aiaaghaluene atikirighi uru ngai Pol ghe pitiela ta Timoti Inangari emuemua

Pol ghe pitila ia oia uru ngai etikirighi tale airuuruu nau tale maaulueaane, me eaauliaa niaikapukapuaa elome ta Pol me Timoti. Pol ghe auliaala kiena va niapasunga kamena enaanamuu, me taumattu ngatoa aue la aikaaiia tale ia o nikamekame. Ghe auliaala ta Timoti va etani tingina akorokorongana tale voto koronna, me aue eghaa masi aipolipoli ta God.

Tani kila amuemua

Aitiutiu tale inangari 1:1-2

Niaulia ngakorokorongana tale maaulueaane Pol 1:3-18

Inangari niloeloe ta Timoti 2:1-26

Airuuruu etoa nau 3:1-9

Mene katoa niloeloe 3:10-4:8

Airuuruu inangarina Pol 4:9-18

Nimasiasi me airuuruu 4:19-22

¹ Aghi Pol, kapuna apostolo ieghi Karisto Iesu me tale aloannaane God, ghe sungieghila tani ppooaa inangari nialokoi maulue tokatoka liu, isaa ta Karisto Iesu.

² Ta Timoti, masi natughu eteva:

Alooloo sae va God Tamaita ia me Karisto Iesu kapuita Vau ngepona ia lalau tau aatu maamasinaane God me alousiusiaane me luei.

Niasarasarakana tani tingina akorokorongana

³ Akaakaili emasinaaili ta Goto ateva ia o akaakaueinia, tale nannaaghi masalikeaili, nongina tuvughu etoa laghe gheelei. Nau ekapaaili, tale llaa me voo, akaakaili emasina ta God me anannainio tale kalughu nilooloo sae. ⁴ Aghaloannaaili tani mene taraio, poli aghannaararum matam nau italu ghe aitiuaala, me aue amasiasi marova italu mene aitaru. ⁵ Akilakila va kalum niaikaaiia koronna ghe tokatoka ta kinam ta Iunis me tuvum ta Lois, me aghaiesoaa va ia o niaikaaiia ngateva ia tee etam. ⁶ Liuna avalua o me aghanna tani mene arava etam va, nongina ita palepale va kura atee erame, ughelei evalua o uunguaam tale sarasarakana God ghe nim tau aatu sio nau aghe saoaala nimaghi etam. ⁷ Poli God karika eaaloannaita va ita matautu, ta ghe tau mae sio spiriti eteva va ita pasu tale sarasarakana, niaielousi, me masi ninannaa.

⁸ Liuna avalua o, urau mene palata tani aulia ngaotu masi kiukiuna kapuita Vau eteva, me urau mene palatainaghi ta karavusu ieghi poli aghe poppooaa Karisto. Me uaimonomonosiaa tani ghaa maamatana nongina aghi mausi masi kiukiu, tale sarasarakaniaane God. ⁹ God ghe asaangitala me ghe kolotala va ita toka tale maulue ateva manga ia tani amasiasi God. Karika ghe kolotala poli righi masi gheegheleiaaita. Karika, ta poli tale aloannaane me maamasinaane ateva, ia oia maamasinaane ateva ghe tau mae sio etaita ia ta Iesu Karisto, me auena ghe ghelei kosa ateva. ¹⁰ Me isaa oia ang ghe apasunga ngaotula nau eteva Karisto Iesu ghe mae sio, tau ngai asaangiita ia, ghe apalala nimate, me tale masi kiukiu, ghe apasunga ngaotula etaita maulue ateva tokatoka liu ia. ¹¹ God ghe suitoongainaghila

va atau ngai ppoaa me aghapostolo, me atau ngai aapasunga tale ia oia masi inangarina ateva. ¹² Me liuna avalua o, aghaaghaa maamatana ghaine me karika apaapalata, poli akilakila see aghe aatoka tuutulighi etana, me akilakilaaili va ia eroroo tani aitaraa voto aghe taula etana* lomosi ta nau eteva eoghi mae.

¹³ Uposo parasi niapasunga tale salana koronna ughe nongola etaghi, tale niaikaaiiaa me niaielousi isaa ta Karisto Iesu. ¹⁴ Tale saausiaane Spirit Manga ateva etokatoka elome etaita, utani aitara ngamasinaaili masi kiukiu God ghe tau sio mae etam.

¹⁵ Ukilakila va isaa akapaaili taumattu tale provinsi eteva eEisia angila ghe ratieghila tani aisausieinaghi, tee me kapughu elua ta Pigelus me Emogenis.

¹⁶ Aooloo sae va aue Vau ngepona ateva eapasunga alousiusiaane ta lo atoa la tokatoka tee Onesiporus, poli nau ekapa atoa ghe mae taataraieghi tani asarasarakanaieghi, me karika ghe paapalatainieghe nau iriirina ieghi tale sene. ¹⁷ Karika, ta nau ghe mae sio eRom, ghe pae akapaieghi seela lomosi ta ghe taraieghila. ¹⁸ Aooloo sae va aue Vau ngepona ateva eapasunga nialousiusi etana tale ia o nau niaisakei eteva. Me ukilakilaaili vaalua ghe saausieghi eIpsis tale asease salana atoa.

2

Masi tau ngai uvii eteva kapuna ia Karisto Iesu

¹ Masi natughu eteva Timoti, ukorokorongana tale maamasinaane ateva Karisto Iesu etautaua etam. ² Me voto ughe nongola aghe apasungaala tale tummatavanga, isaa o voto utau lao ta lo atoa taumattu urooro tani atoka tuutulim etaira, me aue la roo tani mene apasunga tale mene katoa taumattu. ³ Ughusi tani ghaa maamatana, nonginaaili masi tau ngai uvii eteva kapuna ia Karisto Iesu. ⁴ Karika teva taumattu tau ngai uvii ia eroroo tani ghelei mene kasina ase niuungu me etam ghelei emasina uunguaane, karika. Eghelei emasina uunguaane tani amasiasi kapuna namu ngateva. ⁵ Nonginaaili arova teva ealoanna tani aikarati tale niaikarati eteae, arova karika eusila ngakapaaili asease salana tani usilaa tale ia o niaikarati eteae, arongona ta eilou vuli ekapaila, karika aue eghaa aipolipoli. ⁶ Tau ngai pasa utana ateva karika mangoona ia, ia etani mata ngemua tani ghaa inana emaamatue akasina eutana. ⁷ Uannaa parasi sa ateva aghaaulieinia, poli Vau ngepona ateva aue etau aatu alomasaanga tani kila isaa akapaaili voto.

⁸ Utani annaa Iesu Karisto, ia tuvuna ia Deivit, God ghe totuela tale nimate. Tani iaaili o masi kiukiu apoppooa ngaotu. ⁹ Me poli apoppooa masi kiukiu eteva oia, sesa nitoka eghaaghaaieghi, me laghe irieghila tale sene nonginaaili ssa taumattu ngateva. Me karika teva taumattu eroroo tani akaravusu inangarina ateva God. ¹⁰ Liuna avalua o me arooro tani ghaa isaa akapa o maamatana tani sausi lo atoa God ghe suiteongainilala, arova eroroo va la saanga, me aue etau mae nioneoneaa tokatoka liu isaa ta Karisto Iesu.

¹¹ Kateva inangari koronnaaili ia,
Arova ita mate teeia,
aue ita maulue teeia.

* **1:12:** voto aghe taula etana o isaa oia niuunguaa ghe tau mae sio etaghi tani ghelei. **1:14:** 1 Tim 6:20. **2:3:** 2 Tim 1:8. **2:5:** 2 Tim 4:8. **2:6:** 1 Ko 9:7. **2:8:** 1 Ko 15:4; Rom 1:3. **2:9:** Ips 3:1, 13; Plp 1:12-14. **2:11:** 2 Ko 4:11.

¹² Arova ita tam oghi vulu maamatana,
aue ita toka teeia me aue ita aitara ngakapa voto.

Arova ita ue va ita tam kilakilaia,
ie tee aue eue va etam kilakilaia.

¹³ Arova ita tam ghelei voto ita ue va ita ghelei,
ia aue eghelei voto eue va aue eghelei,
poli karika erooroo tani aikolikoliaa saa voto ghe uela va aue eghelei.

Kapuna tau ngai uungu eteva Vau eteva

¹⁴ Nau etoa, uauliaa va la rau mene kkaluaa isaa oia voto. Uaulia ngakorokorongana etaira, poli God* etaatara sa ateva la gheeieia, va la rau mene aissakeana tee malloeana inangari, poli isaa o ase niaissakeana karika erooroo tani sausi teva taumattu. Ta enim gheeieia saasakiaa lo atoa taumattu la nongonongo. ¹⁵ Ughelei emasina akapa voto, nongina taumattu ngateva karika epaapalataa masi uunguaane, tani apasunga ta God va ia erooroo tani masieinio, me eapasunga inangari koronna tale salana ghulughuluena. ¹⁶ Uamasalikainio tale nisama kamena me karika eaulia ngamasalikaa God, poli isaa o inangari aue ekatulaa taumattu ngatoa me aue la masaeili ta God. ¹⁷ Inangariira la ghauliaa me la ghaapasunga, karika masina, nonginaaili sesa usai eteva ange uusai enamuu. Elome etaira Aemenaeas me Piletus ilalua avaluaaili o, ¹⁸ lalu ghe kasu vulila voto koronna. Lalu ghe uela va, “Angita ghe totula tale nimate nau ita ghe ghaala niasuu, me auena karika mene teae nitotu.” Lalu gheeieia saasakiaa uneira niaikaiaa kasina tana tau ngaiesoaa. ¹⁹ Inangarina ateva God koronna ia, etiitingina nonginaaili suena atiulu karika erooroo tani aisiisia me la gheeieia ale ateva epona etana. Me laghe piti elokoila kasina mata nginangari tale ia o suena atiulu laghe uela va, “Vau palepale ekilakila llo taumattu kapuna,” me, “Lo atoa la ue va kapuna ila God, la tani kiri vulu isaa akapaaili voto karika masina.”

²⁰ Elome tale alena ateva tau peipeiena ateva, kasina tana aikaai inana laghe gheleila tale gol me silva me kasina laghe gheleila tale kosa me tale tuku ngai, kasina la namanamaa tale nau namu ngatoa la veluvelu eitauaa, me kasina la namanamaa tale nau ekapa atoa. ²¹ Lo atoa la gheeieia eraarangisanaila, aue la nongina aikaai inana ateva la namanamaa nau namu ngatoa la veluvelu eitauaa. Aue la manga, me la tau ngai uungu ta Vau eteva, me aue la aimonomosiaa tani ghelei isaa akapa ase masi niuungu.

²² Me uakekkelio tale sesa niuungu aliki taita me vause atoa la aloanna tani ghelei, me ukasu tee voto ghulughuluena me niaikaiaa, niaielousi, luei, tee lo atoa la ghaatoka tuutuliira ta Vau ngepona ateva, me tee urunguitaniira raarangisana. ²³ Uamasalikaa tee ase niaissakeana kaluira alokapakapa atoa taumattu, poli ukilakila va isaa o voto, aue ealakuti niaikiso. ²⁴ Kapuna tau ngai uungu eteva Vau ngepona ateva, karika emene aikiso ta samasamaane esaghuighuina tee isaa akapaaili taumattu. Etani roo tani apasunga, me erau mene sessai parasia. ²⁵ Esioaa nannaane nau eloeloe taumattu ngatoa la ghaapasunga llo voto etam lao aitauaa tee Uru ngai Manga ateva, me koti God aue ekatulainila tani nna ngaioghioghi me la kila voto koronna, ²⁶ me aue nannaaira emasalike me la kasu vuli unna airrekati eteva Satana, poli ia ghe gheleilala laghe karavusula tani ghelei ssavoto, ealoanna va la ghelei.

2:12: Mat 10:33. **2:13:** Rom 3:3-4; Tts 1:2. **2:14:** 1 Tim 6:4; Tts 3:9. * **2:14:** God Katoa uru ngai laghe pitila, laghe uela va Vau ngepona ateva. **2:15:** 1 Tim 4:6. **2:16:** 1 Tim 4:7. **2:17:** 1 Tim 1:20. **2:19:** Nam 16:5; Jon 10:14; 1 Ko 8:3; Ais 52:11. **2:22:** 1 Tim 6:11. **2:23:** 1 Tim 4:7.

3

Gheegheleiaaira sesa taumattu ngatoa tale airuuruu

¹ Ukila llo oia va: Airuuruu tale nau, taumattu ngatoa aue la ghaa mmarikana. ² Taumattu ngatoa aue la ghailousieinila nonga, me aue la ghailousiaa viliki veu me la ghaasakeainila me aue la saeaa nannaaira, me aue la ghauliaa saasakiaa ta mene katoa, la tam nongo usilaa tamaira me kinaira, karika aue la kaili emasina, me karika aue la oneoneaa God, ³ karika aue la ghailousiaa mene katoa, karika aue la ghanna tani aikkaluaa tee mene katoa, aue la ghelei saasakiaa taumattu tale inangariira, karika aue la rooroo tani apala sesa aloannaaira, karika aue la nna ngaitootoonga tee mene katoa, aue la ratirati voto ghulughuluena, ⁴ aue la tau kapuira atoa ta tau ngaissaniira atoa, aue la ailuilui tani ghelei voto sesa, aue la saeaa nannaaira, aue la ghailousiaa gheeleiaa kosa ateva me karika aue la ghailousiaa God. ⁵ La aapasunga vara la mene aaimuli usi tee God, me karika ta la ratirati sarasarakaniaane God tani gheleila la ghulughuluena. Uakekkelio tale isaa o taumattu.

⁶ Katoa etaira la aikamea tani sso aleira katoa, me la kamekame lo atoa vause karika marekate nannaaira me maate ila tale ninannaa tale sesa gheegheleiaaira, me la kaakatulainila lao tale voto sesaaili. ⁷ Ila o vause atoa la aaloanna tani kila ouna voto, me karika la rooroo tani kila amasina voto koronna. ⁸ Emua arau Jannes me Jambres karika lalu ghe tiitingina aitaaua tee nannaane Moses,* me tale ia o salana atikirighi, ila o taumattu ngatoa karika la tiitingina aitaaua tee inangari koronna. Sesaaili nannaaira me peisaane ila tale niaikaiaa. ⁹ Nauira karika aue aluse poli taumattu ngakapa atoa aue la tara kila alokapakapaaira, nongina taita alua o.

Inangari niloeloe ta Timoti

¹⁰ Me io, ukilakilaaili voto aghe apasungaala, tokatokaaghi, voto aghanna tani ghelei, aikaiaaaghi, nongina karika esesai parasieghi, ailousiaaghi, karika aghe sio asoasoa tale uunguaaghi, ¹¹ maamatana me nimmarikana, voto laghe ghelei teeieghi tale masaliki taatara eAntiok, eKoniam me eListra. Ukilakila va aghe ghaala oroi nimmarikana oia, me Vau ngepona ateva ghe asaangieghila tale isaa o nimmarikana aghe ghaaghaa. ¹² Koronna, lo akapa atoa la aikaiaa ta Karisto Iesu me la aloanna tani toka nongina God, aue la ghaa nimmarikana, ¹³ me sesa taumattu ngatoa me tau nikamekame atoa karika aue la ruu poi tani ghelei ssavoto me kaluira ssavoto aue oroieili. Aue la kame taumattu ngatoa, me Satana aue ekamela tee. ¹⁴ Me io, unnaa parasi voto koronna ami ghe apasungaala etam, me ukilakila va koronna, poli uatoka tuutulim ta lo atoa laghe apasungaala etam, ¹⁵ me ta nau aliki io, ughe kilala Uru ngai Manga ateva. Uru ngai Manga ateva eghelei alomasaangaita tani kila va God ghe asaangitala nau ita ghe aiesoala ta Karisto Iesu. ¹⁶ Ia akapa Uru ngai Manga ateva ghe mae sio ta paane ateva God, eaaisausieinila tani apasunga, tani pao voto karika masina, tani loeta tale voto karika masina, me tani apasunga salana tani ghelei voto ghulughuluena. ¹⁷ Tale ia o salana atikirighi, kapuna tau ngai uungu eteva God aue eaimonomosiaa me erooroo tani ghelei asease masi niuungu etoa.

3:1: 1 Tim 4:1. **3:5:** Mat 7:15, 21; Tts 1:16. **3:8:** Eks 7:11. * **3:8:** Ajiu etoa la ghe uue va taita alua oia tau nialaala ilalua, kapuna ilalua Peroo ta nau Moses. Utara Eksodis 7:11-22. **3:11:** Apos 13:14-52; 14:5, 8-20. **3:12:** Mat 16:24; Jon 15:20; Apos 14:22. **3:16:** Rom 15:4.

4

¹ Ta matane God, me Karisto Iesu, aue eghelei niaisakei ta taumattu ngakapa atoa, maulue ila me matena atoa, me poli emaemae tani aitaraa kosa akapa ateva, aghaulia ngakorokorongana etam: ² Tani ppooaa masi kiukiu; unim aimonomosiaa nau ekapaaili tani ppooainia tale nau la aloanna tani nongo, me nau la tam aloanna tani nongo, urau mene sio asoasooa tani loe taumattu tani gheleila va la oghi vulu kaluira ssavoto, me uapasunga tani asarasakanaila. ³ Poli nau too emaemae, taumattu ngatoa karika aue la aloanna tani nongo koronna niapasunga. Ta aue la usilaa aloannaaira, me aue la kolo oroieili tau ngai aapasunga ngatoa tani auliaa etaira sa ateva talingaira ealoannaaili tani nongoa. ⁴ Aue la tam aloanna tani nongo inangari koronna, me aue la anna tani nongo asease kiukiu uunguaa kosa ateva. ⁵ Me io, uaitarainio tale isaa akapaaili o asease voto. Usau llo voto maate me mmarikana, me ughelei uunguaa tau ngai ppooa ngateva tale masi kiukiu eteva, me ughelei ekapa ia o niuungu eteva God ghe tau aatu sio tani gheleila.

⁶ Me nau amate, raeghi eteva aue nongina uaeni opringi eteva la kaokaoa sae tale liu nighelei aiaavususuena. Naughu oia tani kasu vuli ia oia maulue ateva. ⁷ Ngaghe kaarasila tani aiuvii tale masi niaiuvi eteae, ngaghe rekatala tale airuuruu tale niaikarati eteae. Me ngaghe poso asarasakanala niaikaiaa. ⁸ Me ghaine aipolipoli eteva, kou nguru ia, etoitoeighi, uneira ia lo atoa ghulughuluena ila. Vau palepale ateva ia ghulughuluena ia tani ghelei niaisakei, ia aue atokaie sae ta urughu tale ia o nau eteva emae. Me karika va aghi nonga, ta lo atoa tee la toitoia me la ailousieinia tani taraia va emae.

Airuuruu inangarina Pol

⁹ Utootoonga tani mae tara parasieghi, ¹⁰ poli Diimas ghe ailousiangailiila gheleiaa kosa ateva, me ghe kasu vulieghila, me ia eTesalonika. Me Kreskens ghe lao sio tale provinsi eteva eGalaisia, me Taetas ia tale provinsi eteva eDalmatia. ¹¹ Angalua nonga oia me Luk. Ukolo Mak me amalu mae, poli ia eroo tani sausieghi tani uungu. ¹² Aghe sungi tau lao sio Tikikus eIpsis. ¹³ Nau umaemae ughaa mae tee uneghi aiaasae ngeleka ateva aghe velu elokoiela eTroas, tanganue Kapus. Ughaa tee mae uneghi vuku, llo vuku aghaloannaaili laghe gheleila tale viliki ghaata kkena.*

¹⁴ Aleksanda, ia o eghelei voto tale brasi me aeana, ghe ghelei teeieghila oroieili voto karika masina. Me Vau ngepona ateva aue etaula aipolipoli tale sa ateva eghe gheleila. ¹⁵ Io tee uaimonomosiaa tee ia o taumattu ngateva poli etam aloanna poi inangariimami.

¹⁶ Karika teva ghe tiitingina tani sausieghi, tale aitiutiu eteva nau aghe tinginala tale niaisakei. Taumattu ngakapa atoa laghe kasu vulieghila. Alooloo sae va God ekkaluaa isaa o voto. ¹⁷ Me Vau eteva ghe tokatoka aitaaua teeieghi me ghe tautau mae sarasarakana etaghi. Liuna avalua o me aghe ppooa ngakapaailiila masi kiukiu ta taumattu karika ajiu ila tani nongoa. Me Vau eteva ghe asaangieghila nau laghe annaala va amate.† ¹⁸ Me Vau ngepona ateva aue easaangieghi tale voto akapaaili sesa la aloanna tani ghelei etaghi. Me aue eghaa amasinaailieghi lao tale

4:3: 1 Tim 4:1. **4:6:** Plp 2:17. **4:7:** 1 Tim 6:12. **4:8:** 1 Ko 9:24-25. **4:10:** 2 Ko 8:23; Apos 15:37-39; Kol 4:14. **4:13:** Apos 20:6. * **4:13:** laghe gheleila tale viliki ghaata kkena Llo vuku laghe gheleila tale viliki ghaata kkena, aipolina namungaili, poli karika erooroo tani sesa parasi. **4:14:** Ais 59:18; Rom 2:6. † **4:17:** Tale inangari nge Grik, aghe saangala tale paa laeoni eteva.

ararimangalina ateva epona liu. Ta ngetana ita tau sae ararina atea nau ekapa atoa. Koronna.

¹⁹ Utau lao masimasiaaghi ta Prisila me Akuila me ta kapuna atoa Onesiporus. ²⁰ Erastus etokatoka eKorint, me aghe kasu vulila Tropimus eMiletus poli isikinna ia. ²¹ Utotoonga tani mae, me auena nau ttasi. Iubulus, Pudens, Linus me Klaudia la tau aatu sio masimasiaaira tee me ila akapa tau ngaikaaia ngatoa oia.

²² Alooloo sae va Vau ngepona ateva aue etoka aitauaa teeio. Me masimasiaane God aue etoka aitauaa teeiem akapaaili.

Uru ngai etikirighi Pol ghe pitiela ta Taetas Inangari emuemua

Taetas kateva namuu tale ale manga atoa tale patunganua ateva eKrit. Nongina Pol ghe pitipitila ta Timoti, ghe mene piti teela inangari niloeloe ta Taetas tale voto tale ale manga, nongina elda ngatoa me rikina atoa. Me tee, ghe auliaala va Taetas eposo parasi inangari koronna, me ghe aakorokorongana Taetas tale niaiesoaa ghulughuluena tale ale manga, niuungu, me taumattu tale kosa ateva oia.

Tani kila amuemua

Aitiutiu tale inangari *1:1-4*

Namu ngatoa tale ale manga *1:5-9*

Lo atoa la apasunga voto kamena eKrit *1:10-16*

Nitoka manga *2:1-10*

Liue nitoka tani manga *2:11-15*

Vaalua tani toka tee mene katoa taumattu *3:1-11*

Nimasimasi me airuuruu *3:12-15*

¹ Aghi, Pol, kapuna tau ngai uungu ieghi God, me kapuna apostolo ieghi Iesu Karisto:

Ghe sungieghila tani laa ghasarasarakana uneira niaikaaiia kapuna taumattu ngatoa God ghe suitoongainilala, tani apasunga salana koronna, eaapasunga vaalua tani toka tale aaloannaane God. ² Ia oia inangari eteva koronna ia, egheeleita ita aatoka tuutuliita tale maulue ateva tokatoka liu ia. God ghe aulia ngalokoiela etaira tale inangari nialokoi emua arau, me auena kosa ateva ghe lutula. Ia karika eroroo tani kamekame. ³ God, ia tau ngai asaangiita ia, ghe apasunga ngaotula ia oia inangari eteva koronna ia tale nauna tuunga ateva ghe suitoongainiela, me ghe taue mae sio etaghi me ghe aulia ngasarasarkanala etaghi tani ppooainia.

⁴ Apitipiti atu etam Taetas, io natughu tuungi io elome tale niaikaaiia italu uunusi. Aooloo sae va maamasinaane me luei kannu God Tamaita ia, me Karisto Iesu, tau ngai asaangiita ia, aue etoka etam.

Uunguaa Taetas eKrit

⁵ Aghe kasu vuliola eKrit va ughelei kasina voto karika ita ghe ruula, me usui elda ngatoa tale ale manga, tale kateva kateva masaliki taatara, nongina aghe auliaa tau aatu sio. ⁶ Elda ngatoa gheeleiaaira etani masinaailli, karika mene righi sesa gheeleiaaira, me vauseniira ekateva nonga, me natuira atoa la nongo usilainila, la rau mene amakatakata me la tau nissakeaa ila. ⁷ Ta lo ateva eaitaraa uunguaane God tale ale manga karika mene righi sesa gheeleiaane. Erau mene ue va ia nonga namuu ia, me etau nisessa ia. Erau mene tau niropi sesa manu, me ealona tani aiuvii, erau mene kuruetu tale viliki veu. ⁸ Me ia o taumattu ngateva eaikoloa taumattu me eaitarainila nau la lao tanganuena. Me eailousiaa saa voto masina, me enanna ngamasina, me eghulughuluena, me eraarangisana, me eaitaraa nannaane me gheeleiaane. ⁹ Eposo parasi inangari koronna, nongina ami ghe apasungaala me eroroo tani aisausiaa mene katoa tale koronna niapasunga, me eroroo tani kiso lo atoa la sessa tee inangari koronna.

¹⁰ Poli aue eoroieili taumattu ngatoa aue la tau nissakeaa me tau nim sama ila me tau nikamekame ila, tani ila o lo atoa la aasarasarakana uunguaa ni-isoiso. ¹¹ Uauliaa etaira va karika la mene apasunga, poli ngila ghe gheleila katoa taumattu me tee natuira atoa tale kateva kateva ale, ngila ghe oghi vulula inangari koronna, laghe nim ghelei isaa o niapasunga tani ghaa uneira viliki veu. ¹² Kateva taumattu eKrit la ghe kolokoloa va propete ia ghe uela va, “Taumattu nge Krit atoa, tau nikamekame ila. Ila nongina sesa ghaata kkena atoa, mangoona ila, me tau ninamanama ila.” ¹³ Isaa o inangari koronna. Liuna avalua o me uppooaa inangari sarasarakana etaira, me aue la roo tani sarasarakana tale uneira niaikaaiia. ¹⁴ Me la rau mene tau lao nannaaira tale kaluira kiukiu marripaana ajiu etoa, me inangari lo atoa la liuliu viliira tale inangari koronna la poppooa ngasarasarakana. ¹⁵ Lo atoa urunguitaniira raarangisana, voto akapa etaira raarangisana, me ta lo atoa urunguitaniira karika raarangisana me karika la aikaaiia, karika righi voto etaira raarangisana, tale isaa akapa ninannaa karika la kilakila eaa sesa me eaa masina. ¹⁶ La ue va la kilakila God, me gheleiaaira eaapasunga va karika la kilakilaia, ila mauuna ila, karika la roo tani nongo usilaa, me karika muenna ila tani ghelei niuungu masina.

2

Inangari tani apasunga tale asease taumattu

¹ Me io uapasunga voto koronna elaolao aitauaa tee koronna niapasunga. ² Uauliaa ta taita namu ngatoa va la aitaraa tokatokaaira, me uunguaaira, me aippooaaira, me la nanna ngamasina. La tani ghulughuluena tale uneira niaikaaiia, me niaielousi, me la tingina akorokorongana eghaa nau eruu.

³ Me tale ia nonga o salana atikirighi, uapasunga ta vause namu ngatoa, tani apasunga va la oneoneaa God. La rau mene kasu see tani ghelei saasakiaa ta mene katoa tale inangariira, me la rau mene toka aloanna tani toka ropiropi sesa manu, ta la apasunga ta katoa saa voto masina. ⁴ Liuna avalua o me ila o vause namu ngatoa la apasunga ta llo vause aviri laghe laila, tani ailousia taitaniira atoa me natuira atoa, ⁵ me la nanna ngamasina, me la raarangisana, me tani masi vause tani aitaraa paa ngale, me tani aisausiaa, me tani oneoneaa taitaniira atoa, me aue karika teva eppooaa saasakiaa tale inangarina ateva God.

⁶ Me tale ia nonga o salana atikirighi, uapasunga tee tale llo taita aviri laghe laila, tani nanna ngamasina ⁷ tale voto akapa. Me io uapasunga nonga masi voto. Urau mene usimaghalua nau uaapasunga, me uapasunga tale masi ninannaa me nioneoneaa, ⁸ me utani apasunga nonga koronna tana inangari, me karika teva aue eauliulieinio. Arova ughelei evalua o, tau ngai ssateem atoa karika aue la ghauliaa teeio righi voto, me aue la palata.

⁹ Uapasunga ta tau ngai uungu etoa karika la tokatoka tale aloannaaira va la nongo usilaa kapuira namu ngatoa tale isaa akapa voto. Me la tau lao nannaaira me sarasarakaniaaira tani ghelei voto erooro tani ghelei emasimasi kapuira namu ngatoa, me la rau mene ssakeainila. ¹⁰ La tani apasunga va la rooro tani atoka tuutuliira etaira tale isaa akapaaili voto la ghelei me karika la ainao peiira, me aue la oneoneaa inangarina God tau ngai asaangita ia.

1:10: 1 Tim 4:7. **1:11:** 1 Pita 5:2; 2 Tim 3:5-6. **1:13:** 2 Tim 4:2. **1:14:** 1 Tim 4:7. **1:16:** 1 Jon 1:6; 2:4. **2:3:** 1 Tim 3:11. **2:5:** Ips 5:22. **2:7:** 1 Tim 4:12. **2:8:** 1 Pita 2:15. **2:9:** 1 Tim 6:1.

*God eaalona akapa
taumattu ngatoa
tani saanga*

¹¹ Poli maamasinaane God ang ghe kauerekatila, eaasaangi taumattu ngakapa atoa. ¹² Eaapasunga etaita tani ue va “karika” tale voto karika ita oneoneaa God etana me sesa voto kosa ateva ealoanna, me ita nanna ngamasina, ita ghulughuluena, me ita oneoneaa God tale tokatokaaita tale nau etiulu oia, ¹³ nau ita toitoi esarasarakanaaili masi nau eteva nau kapuita Goto ateva me tau ngai asaangiita ateva Iesu Karisto emae tale sarasarakaniaane me mallangina ateva. ¹⁴ Ghe taue mae sio etaita tani ghaa oghita tale isaa akapa sesa voto me tani ghelei eraarangisana taumattu va etani kapunaaili ila me la ghannaaili tani ghelei masi niuungu.

¹⁵ Me isaa toko voto utani apasunga. Uaipooaa teeila tani asarasakanaila me ukisoila tale inangari matuutuliena. Urau mene tau velu teva va etara aloio sio euu.

3

Tani ghelei voto masina

¹ Umene auliaa ta tau ngaiesoa ngatoa va la oneoneaa lo atoa la muemueinila me matuutuliena ila me la tani nongo usilainila me la ghaimonomosiaa tani ghelei masi niuungu, ² me tani rau mene ppooaa saasakiaa tee kateva, me tani rau mene aikiso, me tani nnaa mene kateva, me tani siuaa nannaaira tale isaa akapa taumattu.

³ Poli ita tee tale nau too ang ghe lao sio, alokapakapa ita me karika ita ghe nongonongo usilaa me laghe kametala me ita ghe nim uungu tale ase niateatea sarasarakanaaili me ase nimasimasi. Ita ghe tokatoka tale ninannaa tani ghelei saasakiaa kateva me tani sessaita ta lo atoa peiira me uunguaaira me ita karika. Laghe sessa teeita me ita, ita ghe sessa tee mene katoa. ⁴ Me nau masi aisausiaane me aielousiaane God tau ngai asaangiita ia ghe kauerekatila, ⁵ ghe asaangitala. Karika va tale voto ghulughuluena ita ghe ghelei ta poli aalousiusiaane, ghe asaangitala tale nisuusuu tale nilutu aouna me nighelei aouna kanna Spirit Manga ateva. ⁶ Poli Iesu Karisto ghe matela etaita tani asaangita, God ghe tau sio mae Spirit Manga ateva etaita, me karika ghe ghaa oghiela. ⁷ Me nau God ghe ghelei eghulughuluenaitala poli maamasinaane, ita, ita rooroo va ita ghaa voto ita taatara lao etana tale maulue ateva tokatoka liu ia. ⁸ Ita aatoka tuutuliita tale isaa oia inangari. Me aghanna va utani aulia ngakorokorongana isaa oia voto me lo atoa la ghaaiesoaa ta God, la ainanganangaa tani taula lao tani ghelei masi niuungu. Isaa o voto masinaaili me esausi taumattu ngakapa atoa.

⁹ Me uakekkelio tale nisama alokapakapanna me kiukiuira me tuvura atoa me niaisoa me niaikiso tale inangari tale uunguaa inangari nipaopao. Poli isaa o voto karika aue esausi taumattu, me nim kamena. ¹⁰ Uauliaa kiena lo ateva taumattu eaatoka apolapola taumattu. Uauliaa katengaata etana, vara me umene auliaa ghaluene etana. Nau uruu, urau mene ghelei mene righi llo etana. ¹¹ Aue ukilaaili va ia o ase taumattu ngateva sesa ia me tau ssavoto ia me gheeleiaane eaapasunga aotu va sesa taumattu ia.

Airuuruu tale inangari

¹² Nau eteva asuu aatu Atemas o Tikikus etam, utootoonga ngakapa ase

2:12: 1 Jon 2:16. **2:14:** Gal 1:4; Eks 19:5; Diut 7:6; Esik 37:23; 1 Pita 2:9. **2:15:** 1 Tim 4:12.
3:1: Rom 13:1-7; 1 Pita 2:13-14. **3:3:** 1 Ko 6:9-11; Ips 2:1-2; 5:8. **3:5:** 2 Tim 1:9; Ips 5:26; Hib 10:22. **3:6:** Apos 2:17-18. **3:9:** 2 Tim 2:14, 16. **3:10:** Mat 18:15-17. **3:12:** Ips 6:21-22; Kol 4:7-8.

salana tani mae taraieghi eNikopolis, poli aghanna tani toka oia eNikopolis nau nikkaili me kuukuu eteva. ¹³ Ughelei saa llo voto urooroo tani ghelei tani sausi Senas loeaa ia me Apolos tale kasukasuaairarua me karika lalu mene tukuna tale voto lalu aanna. ¹⁴ Me tee, kapuita taumattu ngatoa la tani ghaa alomasaanga tani taula lao tani ghelei masi niuungu, me aue la rooroo tani tau lao voto ta lo atoa la aloanna niaisausi, me la rau nim mene toka me karika la ghelei righi voto.

¹⁵ Ila akapa lo atoa la tokatoka teeieghi la suu atu sio masimasiaaira etam. Am amasimasi lo atoa la ghailousieinamami tale niaikaaiaa.

Alooloo sae va maamasinaane etoka akapa etaimim.

Uru ngai etikirighi Pol ghe pituela ta Pilimon Inangari emuemua

Pol ghe pitula ia oia uru ngai etikirighi nau ghe tokatoka tale ale mata voovoo. Pilimon taita ateva ghe tokatoka eKolosae, me ghe aiesoala masi kiukiu nau ghe nongola ta Pol, me tale isaa o nau, ia kateva namuu tale ale manga ateva okae. Kateva tau ngai uungu karika ghe tokatoka tale aloannaane, ta tale aloannaane Pilimon, ararina atea ta Onesimas, ghe ilou vulila vauna ateva. Ghe soula Pol, me ghe aiesoala ta Iesu. Pol ghe pitipitila ta Pilimon tani ue va esungiaa oghi Onesimas tani mene oghi lao etana, me ghe kolomila Pilimon tani kkaluaa Onesimas me tani mene aikoloainia, arongona ta karika va gheeleiaaira avalua o taumattu ngatoa tale isaa o nau. Emulina tale isaa o voto, katoa la aiesoaa va Onesimas ghe katevala ta namu ngatoa tale ale manga ateva eIpises.

Tani kila amuemua

Aitiutiu tale inangari me nikaili emasina 1-7

Pol ghe kolomila Pilimon tani ghaa oghi Onesimas 8-20

Nimasimasi me airuuruu 21-25

¹ Aghi Pol, tau karavusu ieghi mausi Iesu Karisto, me Timoti kapuita ia.

Apitipiti aatu etam Pilimon, masi kapuimami eteva, me tau ngai uungu eitauaa teeiemami io. ² Me angalu suusuu masimasiaangalua ta kapuingalua vause ateva Apfia me ta Akippus tau ngai uvii eitauaa teeiengalua tale masi kiukiu eteva, me ta tau ngaiesoa ngatoa la mae veluvelu eitauaa tanganuem.

³ Alooloo sae va maamasinaane me luei ekasukasu ta God Tamaita ia me Vau ngepona ateva Iesu Karisto aue etoka teeiem.

Nikaili emasina me nilooloo sae

⁴ Nau etoa aghannainio tale kalughu nilooloo sae, akaakaili emasina ta kapughu Goto ateva, ⁵ poli anongonongo aikaaiaam ta Vau ngepona Iesu me ailousiaam ta lo atoa manga ila. ⁶ Alooloo sae va ughele livalivasanaaili tani auliaa ta mene katoa aikaaiaam me aue ughele kila amasinaaili isaa akapa masi voto ita ghaaghaa ta Karisto. ⁷ Aielousiaam ghe tau mae sio kinatama nimasimasi me eaasararakanaieghe poli io, masi kapughu eteva, ughelei urunguitaniira lo atoa manga ila tani mene ateatea ngamasina.

Pol ghe looloo luei mausi Onesimas

⁸ Liuna avalua o me arongona ta, ta Karisto karika amaamatautu tani ppooa ngasararakana sa ateva erooro tani gheleia, ⁹ me karika, ta akolokolo tauo tale uunguaa niaielousi eteva. Aghi Pol, tau ngaimatoonga ieghi me karavusu ieghi ta Iesu Karisto, ¹⁰ akolokolo tauo mausi natughu ta Onesimas, ghe natughuiela nau atokatoka tale ale mata voovoo. ¹¹ Nau too ang ghe lao sio, karika righi uunguaane ta ngetam me isaa oia nau ang ghe uunguaanela manee etam me etaghi namungaili.*

¹² Ngamene sungisungie aatu etam tee me urunguitanighi eteva. ¹³ Aghe annala va ghe toka teeieghi tani ghaa lium ateva tani sausieghi nau atokatoka tale ale mata voovoo mausi masi kiukiu. ¹⁴ Me karika aghanna tani

1:2: Kol 4:17; 2 Tim 2:3. **1:7:** 2 Ko 7:4. **1:10:** Kol 4:9; 1 Ko 4:15. * **1:11:** Tale inangari nge Grik, Onesimas malloeana va "ghelei masi niuungu ooroi".

auliaa voto va ughelei ta saa llo voto ughelei, ughelei tale aloaloannaam, me karika va la sulungio tani ghelei. ¹⁵ Koti aghanna ngavalua toko va Onesimas ghe kasu vuliola tale nau karika aluse, va nau ekiriaa mae etam, aue etoka laalaa liu teeio. ¹⁶ Karika va nongina tau ngai uungu ia karika etokatoka tale aloannaane, ta elaulau tau ngai uungu eteva karika etokatoka tale aloannaane, ia masi kapumaili ia. Masinaaili ia etaghi me maamasinaane etam aue enamungaili va kapum tau ngai uungu ia, me kapumi ia mausi Vau ngepona ateva.

¹⁷ Liuna avalua o me poli utaataraioghi va kapum ieghi, ughaaia nongina va ughaaghaaieghi. ¹⁸ Arova ghe gheleila righi voto sesa o ghe tam liula voto ghe ghaala, uatoka sae maate ateva etaghi. ¹⁹ Aghi Pol apitipiti isaa oia inangari ta nimaghi va aue aliu isaa o voto. Me karika aghanna tani auliaa va io tee karika ughe liu voto aghe gheleila tale maamauluaam. ²⁰ Aghannaaili, kapughu, va arova aghele ghaa righi nimasiasi etam ta Vau ngepona tani mene ateatea ngamasina tale urunguitanighi eteva ta Karisto. ²¹ Poli aghaiesoangaili tale nongonongo usilaam, liuna avalua o me apitipiti etam. Akilakila va aue ughelei oroi voto epona tale llo voto aghe kolomiola va ughelei.

²² Me mene kateva voto: uaimonomosiaa tiulu rum nau aghatu aue atoka etana, poli aghaiesoaa va aue amae taraiem mausi niliu tale kaluimim nilooloo sae.

²³ Epapras angalu kaakaravusu eitauaa ta Iesu Karisto, esuula masimasi-aane etam. ²⁴ Me Mak tee me Aristakus, Diimas me Luk ila o lo atoa la uungu teeieghi, la suula masimasiaaira.

²⁵ Alooloo sae va maamasinaane Vau ngepona ateva Iesu Karisto aue etoka tee kapuimim spiriti eteva.

Uru ngai etikirighi ghe lao sio ta aHibru etoa Inangari emuemua

Karika ita kilakila va see ghe pitila ia oia uru ngai etikirighi, me karika ita kilakila va see ila lo atoa laghe ghaaiela, me tee karika ita kilakila va poli saa me ghe pitila. Oroi inangari etana eauliaa aleira ale manga aJiu etoa me niaiaavusuvusuena atoa, liuna avalua o me oroi ila lo atoa la aikaaiaa va lo atoa laghe ghaaiela aJiu ila.

Lo ateva ghe pitila ghe auliaala vaalua Iesu me ouna ateva niaulia ngaitauaa elaulau pokane ateva niaulia ngaitauaa, Moses, me ensolo atoa. Ghe auliaa kieira va la rau mene oghi vulu aaiesoaira tale maamasinaane God. Tale airuuruu etoa sapta, ghe aaulia ngakorokorongana etaira va la tingina asarasarakana arongona ta mene katoa la tau lao nimmarikana, me ghe auliaala lo atoa uneira niaiesoaa namungaili, me tani aimuli tee Iesu me tani poso parasi tale niaiesoaa.

Tani kila amuemua

Aitiutiu tale inangari: Airuuruu eteva inangarina God, Natuna ia 1:1-4

Natuna God elaulau ensolo atoa 1:5-2:18

Niaulia ngatootoonga tale uunguaa nitam aiesoaa 3:1-4:13

Natuna God namuu ia tale pristi ekapa atoa 4:14-7:28

Niaiaavusuvusuena kanna ia Iesu 8:1-10:18

Am mae akalakalangina ta God 10:19-25

Am tingina akorokorongana tale nimmarikana 10:26-12:29

Nilooloo sae, nimasimasi me airuuruu 13:1-25

Natuna ateva God, emuemuaa ensolo atoa

¹ Emua arau, God ghe aippooaa tee kateva kateva tale propete atoa tale oroi ase salana,* me ghe gheleilala va la ghauliaa inangarina ta tuvuita atoa. ² Me isaa oia tale airuuruu tale nau, God ghe aippooaa teetala ta Natuna. Ta ngetana God ghe gheleila kosa ateva, me ia God ghe suiela va aue eghaa voto akapaaili. ³ Eaapasunga naanamungaane ateva God, me ia nim nonginaaili Tamane. Me tale inangarina ateva sarasarakanaaili ia, esuusuei voto akapaaili tale kosa ateva tani toka. Nau ghe ruula uunguaa tani ghelei salana atikirighi tani ghelei eraaranganaila tale kaluira ssavoto, ghe toka siola epona liu, tale pai muenna ativilau ta lo ateva sarakanaaili ia me iaaili epona, eaaimatoonga va matuutuliena ia. ⁴ Me ia God ghe anamunamunganeieila ta ensolo atoa, nim nongina ararina atea God ghe tauae lao sio etana namungaili ia ta ensolo atoa.

⁵ Poli God karika ghe ue ta teva ta kapuna ensolo atoa va,
“Io natughi io,
ghaine nge tamami ieghila.”

Me tee, karika God ghe uela ta teva ensolo va,
“Aue tamana etaghi,
me ia aue natughu ia.”

⁶ Ta nau God ghe maeaa sio natuna mua ateva tale kosa ateva, ghe uela va,
“Ila akapa kapuna ensolo atoa God la tani kkaueinia.”

* **1:1:** Katoa tau ngalomasaanga la annaa va malloeana isaa avalua toko va God ghe aippooaa tale propete atoa tale oroi ase salana tale oroi nau. **1:2:** Jon 1:3. **1:3:** Jon 14:9; Kol 1:20; Hib 8:1. **1:4:** Plp 2:9. **1:5:** Sams 2:7; Apos 13:33; 2 Sam 7:14; 1 Kro 17:13. **1:6:** Diut 32:43; Rom 8:29.

- ⁷ Me tani auliaa ensolo atoa, God ghe uela va,
 “Egheelei kapuna ensolo atoa va ila kuukuu ila
 me kapuna tau ngai nongonongo anna atoa la kura ramerame.”
- ⁸ Me tani auliaa Natuna ateva, ghe uela va,
 “God, aitokatokam ateva aue etoka liu.
 Uaaitoiaa kapum taumattu ngatoa tale nighulughuluena.
- ⁹ Uaailousiaa saa voto ghulughuluena, me usessa tee voto sesa,
 liuna avalua o me God, kapum Goto ateva ghe suitoongainiola,
 me ghe ghelei emasimasieiliola, me masimasiaam elaulau mene katoa
 kapum.”
- ¹⁰ Ghe mene uela va,
 “Vau palepale, io ughe gheleila kosa ateva tale aitiutiu,
 me ughe gheleila epona liu ta nimam.
- ¹¹ Aue la kapa, me io aue utoka.
 Aue la poka nongina koloso aiaasae.
- ¹² Aue ughoula nongina koloso aiaasae pokane,
 la aaikolikoliaa tani ghaa velu pokane aiaasae me tani asae ouna,
 me io karika aue uaikolikoliaa,
 me maamauluaam, karika airuuruu etana.”
- ¹³ Me God karika ghe ue ta teva ta ensolo atoa va,
 “Toka siola tale pai muenna ativilau,
 lomosina ta aghatoka sio lo atoa la sessa teeio euu
 me uatingina saooa kkem etaira.”
- ¹⁴ Me ensolo atoa saa ila? Ila spiriti ila la uungu ta God me esungisungila
 tani sausi lo atoa aue la ghaa niasaangi.

2

Salana atikirighi tani saanga

¹ Isaa avalua o me ita tani ailokoia ngamasina sa ateva ngita ghe nongoala,
 me karika aue ita mene tiu ppae tale inangari koronna. ² Poli marova
 inangari ensolo atoa laghe auliaala eaapasunga va koronna, me see etam
 nongo usilaa me etam aimuli tee aue eghaa sesa aipolipoli, ³ vaalua aue
 ita ttiuaa sesa aipolipoli, marova ita rati ia o paka niasaangi eteva? Ia oia
 niasaangi eteva, Vau eteva ghe aitiutiula tani aulia ngaotua, me lo atoa
 laghe nongola Vau eteva, laghe auliaala etaita va koronna ia. ⁴ God tee ghe
 apasunga ngaotula tale niaimatootoongana, asease mirikol, me voto Spirit
 Manga kannaa ghe nim koitaala, tale aaloannaane.

Iesu ghe taumattula tani sausita

⁵ God karika ghe suila ensolo atoa va la toi ouna ateva kosa tani mae, ia
 oia ami aaulieinia. ⁶ Me tale kateva voto, kateva ghe pitila tani ue va,
 “Saa taumattu ila me unannangailiila?

Vaalua me uaitaraa nim taumattu ngatoa?

⁷ Ughe gheleilala, tale tukuna nau, ila euu* ta ensolo atoa
 me ughe anamunamungainilala tale nioneoneaa.

⁸ Me ughe atoka akapala voto va la aitaraa.”

God ghe tau ekapa lao sio voto, karika ghe ghaa oghila righi, me tale isaa
 oia nau karika ita taatara va voto akapa etokatoka tale aaitaraaira. ⁹ Ta

1:7: Sams 104:4. **1:8:** Sams 45:6-7. **1:10:** Sams 102:25-27. **1:13:** Sams 110:1. **1:14:**
 Sams 34:7; 91:11. **2:2:** Gal 3:19. **2:3:** Hib 10:29; 12:25. **2:4:** Mak 16:20; 1 Ko 12:4, 11. **2:6:**
 Sams 8:4-6. * **2:7:** Ughe gheleilala, tale tukuna nau, ila euu o Ughe gheleilala mala euu. **2:9:**
 Plp 2:8-9.

ita tara lo ateva ghe gheleila ghe siola euu ta ensolo atoa, Iesu etana. Me nau ghaine, God ghe anamungainiela tale nioneoneaa, poli ghe ghaala nimmarikana tale nimate mausiita, liuna avalua o me tale maamasinaane ateva God ghe lao sio tale nimate mausi taumattu ngakapa atoa.

¹⁰ God ghe gheleila voto akapaaili, me isaa akapa o voto ghe gheleila tani asaesae ararina atea, poli emaamasina va emaeaa oroi natuna epona liu tani toka teeia, liuna avalua o me ghe gheleila Iesu va eruu uunguaane tale nimmarikana, tani muemuaa taumattu ngatoa tani saanga. ¹¹ Iesu me taumattu ngatoa eghelei emangaila, kateva nonga tamaira, liuna avalua o me Iesu karika epaapalata tani kolola va nengane ila. ¹² Eue va, “Aue aghaulia ngaotu uunguaane ta kapughu etoa.

Me emua ta mataira, aue akkinari tani tau sae ararim atea.”

¹³ Me emene ue va,

“Aue aghatoka tuutulighi ta God.”

Me emene ue va,

“Aghi toko, tee me natughu etoa, God ghe taula mae sio etaghi.”

¹⁴ Poli aliki etoa nim taumattu ila tale malatau me rae, Iesu ghe ia avaluela o. Liuna avalua o me tale matemateaane ia aue eroo tani turungi raroai eteva, ia euunusi sarasarakaniaa nimate. ¹⁵ Me aue easaangi lo atoa la maamatauta nimate atea tale maamauluaaira, nonginaaili va lo atoa la tokatoka tale karavusu. ¹⁶ Poli koronnaaili Iesu karika ghe sausila ensolo atoa ta tuvuna atoa Abraham. ¹⁷ Malloeane avalua o me Iesu, God ghe gheleila nongina kapuna atoa tale isaa akapa salana, me aue eroo tani nongina pristi eteva namuu ia, me aue ealousiusi tee taumattu me aue eruu niuungu God ghe tau lao sio etana, tani ghelei salana va God aue eroo tani kkaluaa kaluira ssavoto taumattu ngatoa. ¹⁸ Poli ghe ghaala nitootoonga, me nimmarikana ghe mae sio etana, isaa avalua o me ia eroo tani sausi lo atoa nitootoonga emaema etaira.

3

Iesu namuu ia ta Moses

¹ Liuna avalua o me, kapughu etoa am manga am, me am tee elome tale nikolokolo ngepona liu etea, aghaloanna va am atoka nannaaimim ta Iesu, Apostolo ia me namuu ia ta pristi etoa, ia o ita aaulia ngaotua. ² Ghe ghelei emasinaaili uunguaane lo ateva ghe suiematoongainiela, nongina Moses ghe ghelei emasina uunguaane elome ta kapuna taumattu ngatoa God. ³ Nioneoneaa ta Iesu isaa epona ta Moses nongina lo ateva eatuutulu ale ateva eghaaghaa nioneoneaa isaa epona tale ale ateva eatuutulua. ⁴ Ta ale akapa tau ngai atuluna manee, me God ghe gheleila isaa akapa voto. ⁵ Moses ghe ghelei emasinaaili uunguaane nau ghe tau ngai uungula ta kapuna taumattu ngatoa God, ghe aaulia ngaotu sa ateva God aue eaulieinia tale nau too emaema. ⁶ Me Karisto Natuna ia God, me ghe aaitara ngamasina alena ateva God. Me ita alena ita God, arova ita sarasarakana tani tingina akorokorongana, me ita poso parasi tale uneita niaruaa tale voto ita taatara lao emua me karika ita ghe ghaa.

Niaulia ngatootoonga tale uunguaa nitam aaiesoaa

⁷ Liuna avalua o me, nongina Spirit Manga ateva eue va, “Ghaine, arova am nongo lingi ngalona ateva,

- ⁸ am rou mene akorokorongana urunguitaniimim nongina am ghe sassakeaa
 nau nitootoonga tale voto ateva karika righi taumattu etana,
⁹ tale ia o voto ateva tuvuim atoa laghe tootoongainaghila tale nitootoonga,
 me ghaatingauluae (40) ninamanama laghe tarala sa ateva aghe ghelelela.
- ¹⁰ Liuna avalua o me ghe sessaieghila tale ia o vituu eteva,
 me aghe uela va, 'Urunguitaniira etiutiu ppae nonga,
 me karika la kilakila salaghi.'
- ¹¹ Liuna avalua o me tale sessaiaaghi aghe aulia ngaotula tale inangari nialokoi va
 karika poi aue la kupi sso tale uneghi niainoana."
- ¹² Am tani taatara amasina, kapughu etoa, va karika teva etaimim emene tau velu urunguitanina ateva va esesa me karika eaiesoaa me eliuliu vilina ta God ateva tokatoka liu ia. ¹³ Ta am asarasarakana kateva kateva etaimim nau ekapa atoa, tale nau etiulu oia ita aseasea va "Ghaine," poli aghaaloanna va kamekameaa ssavoto ateva karika emene akorokorongana urunguitaniimim. ¹⁴ Poli angita ghe aikapukapuaa teela Karisto arova ita poso parasi tale kaluita niaikaaiiaa, tale voto ita ghe ghaa akasinala, lomosina ta elaa ghaa airuuruu tale voto akapa. ¹⁵ Nongina eauliaa va, "Ghaine, arova am nongo lingi ngalona ateva,
 am rou mene akorokorongana urunguitaniimim nongina am ghe sassakeaa."
- ¹⁶ See ila lo atoa laghe nongola me laghe sassakeaa? Am roo tani kila va ila o lo atoa Moses ghe katulaa vellala eIjip. ¹⁷ Me ghe sessaieela ta see atoa ta ghaatingauluae (40) ninamanama? Am roo tani kila va ta lo atoa laghe ghelelela ssavoto me laghe matela me vilikiira ghe asola tale voto ateva karika righi taumattu etana. ¹⁸ Me ta see atoa God ghe ghelelela inangari nialokoi va karika la mene kupi sso tale unna niainoana? Lo atoa karika laghe nongo usilaala. ¹⁹ Liuna avalua o me ita taatara va karika laghe roola tani kupi sso poli karika laghe aaiesoaa.

4

Niainoana nongina nau manga ateva ta kapuna taumattu ngatoa God

- ¹ Liuna avalua o me God ghe auliaala inangari nialokoi tale nau niainoana ateva, me ia o inangari nialokoi eteva karika ghe ruu, ita tani anna ngamasina va teva etaita erau tam kupi sso. ² Poli ngita ghe ghaala masi kiukiu laghe ppooaala etaita nongina aIsraeli etoa tee laghe ghaala ta Moses. Me inangari laghe nongola, karika ghe alutula righi masi voto etaira. Poli lo atoa laghe nongola karika laghe aikaaia ngaitauaa teela lo atoa la ghe nongo usilaala. ³ Isaa oia lo atoa ita aaiesoaa ita kupikupi sso tale ia o niainoana atea, nongina God ghe uela va,
 "Liuna avalua o me tale sessaiaaghi aghe aulia ngaotula tale inangari nialokoi va
 karika poi aue la kupi sso tale uneghi niainoana,"
 arongo ta uunguaane ghe ruula nau ghe ghelelela kosa ateva. ⁴ Elome tale Uru ngai Manga ateva ghe auliaala nau ghaituna ateva, tale inangari isaa avalua toko va, "Tale nau ghaituna ateva God ghe ainoanala tale uunguaane akapa." ⁵ Me nongina ghe aulia ngakasinala mua va,

“Karika poi aue la kupi sso tale uneghi niainoana.”

⁶ Liuna avalua o me ekookoronna va katoa aue la kupi sso tale ia o niainoana atea, me ta lo atoa laghe aulia ngakasinala masi kiukiu etaira, karika laghe kupi ssola poli laghe tam nongonongo usilaa. ⁷ Liuna avalua o me God ghe mene suimatoongaala kateva nau, “ghaine,” nau ghe aulieiniela ta Deiviti tale oroieili ninamanama atoa ngila ghe lao sio, nongina ghe auliaala emua arau va,

“Ghaine, arova am nongonongo lingi ngalona ateva,
am rou mene akorokorongana urunguitaniimim.”

⁸ Poli arova Josua ghe tau lao sio niainoana etaira, God karika aue ghe auliaa mene kateva nau. ⁹ Liuna avalua o me niainoana nongina nau manga ateva etoitoi kapuna taumattu ngatoa God. ¹⁰ Poli arova lo ateva ekupi sso tale niainoana kanna God, eaainoana tee tale uunguaane nongina God ghe ainoanala tale uunguaane. ¹¹ Liuna avalua o me ita ghelei isaa akapa ase salana tani kupi sso tale ia o niainoana atea, me karika teva aue eaimuli tee ia o ase nitam nongo usila ngateva.

¹² Poli inangarina ateva God maulue ia, sarasarakana uunguaane me maamatarrokeane elaulau baenata ateva matarroke pai ekapa aluevilau. Erooroo tani uvi liuna tani sso nongina nannaa me voto nongina nialousiusi lalo aaitiuaa, me aighoughou me llo etokatoka elome tale riu. Egheelei niaisakei tale ninannaa me gheeleiaa urunguitaniita ateva. ¹³ Karika teva llo God ghe gheleila erooroo tani aisulia ta matane. Isaa akapaaili voto karika aakou runga, ta matane etaatara akapa me ekilakila voto akapaaili, me ta ngetana aue ita tani auliaa sa ateva ita ghe gheleleia.

Iesu namuu ia ta pristi ekapa atoa

¹⁴ Liuna avalua o me poli pristi eteva namuu ia, elaulau pristi ekapa atoa, ghe saela epona liu tani aimatoongainita, Iesu etana, Natuna ia God, ita poso parasi tale kaluita niaikaaiaa ita aulia ngaotu. ¹⁵ Poli karika va kapuita pristi eteva namuu ia etam rooroo tani alousiusi tee kaluita saghuighuina, ta ia ghe ghaala nitotoonga tale isaa akapa salana nongina ita, me karika righi kanna ssavoto. ¹⁶ Isaa avalua o me ita rou mene matautu tani lao nongina God etokatoka, ia eaapasunga maamasinaane ta kapuna taumattu ngatoa, me aue ealousiusi teeita, me ita ghaa maamasinaane tani sausita tale nau ita aaloanna niaisausi.

5

¹ Poli ila akapa namuu ta pristi etoa, nau God ange anna tani ghaa kateva elome ta taumattu ngatoa, esuisuitoongainia tani aimatoonga taumattu ngatoa tale niuungu kanna God, tani taula voto ta God me tani ghelei aiaavusuvusuena tani ghaa velu ssavoto. ² Ia karika aue esesai parasia tee lo atoa karika la kilakila amasina kasina tani voto me la tiutiu ppae, poli ie tee nim taumattu ia me saghuighuina ia. ³ Poli ie tee saghuighuina ia, liuna avalua o me etani ghelei sae aiaavusuvusuena tale kanna tani ssavoto me kaluira ssavoto tee taumattu ngatoa. ⁴ Karika teva erooroo tani nim ghaa nioneoneaa tale nim aaloannaane. God etani koloa nongina ghe kolola Eron.

⁵ Karisto tee karika va nim ia ghe asaesaela ararina atea va namuu ia ta pristi etoa, ta God ghe uela etana va,
“Io natughu io,

4:7: Sams 95:7-8. **4:8:** Diut 31:7; Jos 22:4. **4:10:** Hib 4:4. **4:12:** Ips 6:17; Aotu 1:16; 19:13-15. **4:14:** Hib 3:1; 10:23. **4:16:** Hib 10:19. **5:3:** Lev 9:7; 16:6. **5:4:** Eks 28:1. **5:5:** Sams 2:7.

ghaine nge tamam ieghila.”

⁶ Me ghe auliaala tale mene kasina inangari nipitipiti manga va,
“Io pristi io nau ekapa atoa
nongina Melkisedek.”

⁷ Tale nauna Iesu me maamauluaane tale kosa ateva oia, ghe gheleila nilooloo sae me nikkolomi sae tale nisausi tale ningala anamuu tee rarum mata ta lo ateva ghe roola tani asaangia tale nimate, me God ghe nongoala poli unna nioneoneaa ta lo ateva namuu ia etana. ⁸ Arongona ta Iesu natuna ia God, ghe ghaaghaa alomasaanga tale uunguaa ninongo usilaa, tale nimmarikana ghe ghaala. ⁹ Me nau God ghe ghelei emasina akapaailiela, ghe liue salanala tale niasaangi eteae tokatoka liu ia ta lo akapa atoa la nongonongo usilainia. ¹⁰ Me God ghe suitoongainiela va enamuu ta pristi etoa, nongina Melkisedek.

Niauliaa kieita tale uunguaa nioghi vulu masi salana

¹¹ Oroieili voto ami anna tani auliaa tale isaa oia voto, me aanasa tani aulia ngamasalika poli karika ailuuluina am tani ghaa alomasaanga. ¹² Ang ghe alusela nau ngam ghe tau ngaiesoaala, me isaa oia nau am ghele tau ngai aapasunga, me karika, ta etani maamasina va teva emene apasunga tau aatu voto eaitiutiu tale uunguaa koronna tale inangarina ateva God tani mene laa tiuaa. Karika am ghe roo tani nama inana korokorongana, ta am nongina aliki etoa la sussu. ¹³ Lo ateva esussu aliki ia, karika ekilakila llo masina me llo sesa. ¹⁴ Me inana korokorongana aneira matuenna atoa taumattu, ngila ghe tukatukaala tani ghelei masi voto. La rooroo tani tara kila llo masina me llo sesa.

6

¹ Liuna avalua o me ita kasu vuli llo voto ngita ghe kila akasinala ta Karisto, me ita toka tau sae tale voto aue egheleita ita matuenna, me karika ita mene atingina ghaluene suena tale uunguaa ninna ngaioghioghiaa tale voto ekaakatulainita lao tale nimate, me tale niaikaaiiaa ta God, ² niloeloe tale niaasuu, me tani saooa nima, me nitotu tale nimate, me niaisakei eteae tokatoka liu ia. ³ Me aue ita ghelei isaa o voto, marova aloaloannaane God.

⁴ Lo atoa ngila ghe kilala aloannaane God, ngila ghe tootoongaala masi voto epona liu, me ila tee laghe aitauaala Spirit Manga ateva, ⁵ me laghe namunamuaala masi inangarina ateva God me sarasarakaniaane tale nau too emaemae, ⁶ marova la katuu vulu, karika mene tikirighi salana tani mene oghi mae tale uunguaa ninna oghioghiaa. Tale isaa o llo la ghelei, la mene aavukala sae Natuna ateva God tale aikotoo, tani mene apalataia ghaluene tale tummatavanga. ⁷ Poli llo kosa vaoo ateva ekaakatuu etana oroi nau, eaapinosa amasina inana umana lo ateva ghe pasala. Ia o ase kosa ateva eghaaghaa niarangise ta God. ⁸ Me llo kosa eapinosa uasa karasa me llo uasa rorroana aue epeisaane, karika masau me aue eghaa nikasikiena, me aue airuuruu ia o ase kosa ateva aue eataia.

⁹ Masi kapuimami etoa, arongona ta ami aaippooa ngavalua o, ami aaikaaiangaili va masi voto aue elutu etaimim, voto elaolao aitauaa tee nisaanga. ¹⁰ God karika va sesa taumattu ia, karika erooroo tani kkaluaa uunguaaimim me aailousiaaimim am ghe apasungaala etana, nau am ghe sausila kapuna taumattu ngatoa tale nau too me isaa tee oia. ¹¹ Ami aaloanna va kateva kateva etaimim eapasunga ia o ase niuungu eteva, me

karika am mene mangoo vulua lomosi ta airuuruu, me saa voto am toitoi tani ghaa, aue am vira mene ghaa. ¹² Karika ami anna va am mangoona ta am ghelei nongina lo atoa uneira niaikaaiaa karika ekaakatuu tani toitoi, tani ghaa voto aue ekalaira God ghe auliaala tale inangari nialokoi.

Kinatama inangari nialokoi kanna God

¹³ Nau God ghe gheleila kanna inangari nialokoi ta Abraham, ta poli karika teva mene namuu ia etana tani auliaa inangari koronna, eghe nim auliaala tale ararina atea. ¹⁴ Ghe uela va, “Aghaaulia ngakoronna va aue agharangiseio me atau aatu oroieili tuvum atoa.” ¹⁵ Me nau eteva Abraham ghe tam mangoola tani toitoi, Abraham ghe ghaala voto God ghe auliaala ta ngetana tale inangari nialokoi.

¹⁶ Taumattu ngatoa la ghaauliaa inangari niaulia ngakoronna sae* ta lo ateva taumattu ararina atea namuu ia etaira, me isaa o inangari niaulia ngakoronna sae eghelei ekoronna sa ateva la ghaaulieinia, me eruuruu ekapa niaissakeana. ¹⁷ God ghe gheleila inangari nialokoi ta Abraham, me ghe aaloanna va lo atoa aue la ghaa isaa o voto la kila amasina va karika aue eaikolikoliaa nannaane, liuna avalua o me ghe auliaala inangari niaulia ngakoronna sae. ¹⁸ God ghe gheleila ilalua o voto alua, inangari nialokoi me inangari niaulia ngakoronna sae ta God, me ilalua o voto alua karika lalu aaikolikoliaa, me God karika erooro tani kamekame. Ita lo atoa ita ghe iloula tani laa poso tale nitaatara lao emua, aue ita ghaa namuu niaisausi. ¹⁹ Nitaatara lao emua isaa etaita nongina angga ngateva tale maamauluaaita, korokorongana ia me karika aue eaisiisia. Ghe kupi ssola elome tale rum mangaaili etiulu, emuli tale kalio atiulu. ²⁰ Tale ia o voto ateva Iesu ghe muemueinitala tani sso etana, ghe kupi ssola mausiita. Ia kapuita pristi ia namuu ia tokatoka liu ia, nongina Melkisedek.

7

Melkisedek pristi ia

¹ Ia oia Melkisedek, kingi ia eSalem me pristi ia ta God iaaili epona, ghe soula Abraham nau ghe kiriaala tale niaiuvii etea nau ghe apalala kingi etoa, me Melkisedek ghe arangiseiela. ² Me Abraham ghe tau lao sio ta Melkisedek aiaasokolo tale isaa akapa voto. Aitiutiu, ararina atea, malloeana va “kingi ia tale nighulughuluena”, me tee, “kingi ia eSalem,” malloeana va “kingi ia tale luei.” ³ Karika righi kiukiuna va ia see ia, karika teva tamane me karika teva kinna, me karika toa tuvuna, me karika righi aitiutiu tale nauna, o airuuruu tale maamauluaane, nongina Natuna ateva God, ia pristi laalaa liu ia.

⁴ Am nim nnaa va ararina atea namuu ia, poli Abraham, tuvuiria ia aJiu etoa, ghe taula aiaasokolo tale voto ghe sarila ta tau ngai ssateena atoa. ⁵ Tale inangari nipaopao, kateva inangari niaulia ngakororongana eue va mangalina atoa Livae ila pristi ila la ghaa aiaasokolo ta kapuira atoa alIsraeli ila, arongona ta ila tee kapuira me mangalina ila Abraham. ⁶ Me ia oia taumattu ngateva, arongona ta karika mangalina ta Livae, me ghe nim ghaala aiaasokolo ta Abraham, me ghe arangisela lo ateva ghe ghaala inangari nialokoi. ⁷ Me karika teva erooro tani ue va kamena va, lo ateva taumattu ararina atea epona, eaarangise lo ateva taumattu ararina atea euu. ⁸ Ila akapa pristi etoa laghe ghaala aiaasokolo, angila

6:13: Aitiutiu 22:16-17. * **6:16:** auliaa inangari niaulia ngakoronna sae Taumattu ngatoa la ghaulia ngakoronna sae tale ararina atea God. **6:18:** Nam 23:19. **6:19:** Lev 16:2-3. **7:1:** Aitiutiu 14:17-20. **7:5:** Nam 18:21.

ghe matela, me Melkisedek, ghe ghaala aiaasokolo ta Abraham, Uru ngai Manga ateva karika eue va ghe matela. ⁹ Kateva aue eroo tani ue va Livae, ghe ghaaghaa aiaasokolo, ghe taula aiaasokolo nau Abraham ghe tau lao sio ta Melkisedek, ¹⁰ poli nau Melkisedek ghe soula Abraham, Livae elome ta vilikina Abraham, poli tuvuna ia.

Iesu nongina Melkisedek

¹¹ Arongona ta inangari nipaopao kanna Moses eue va pristi etoa la tani mae tale ararimangalina ateva Livae, uunguaaira pristi etoa karika erooroo tani ghelei eghulughuluena teva. Liuna avalua o me mene kateva pristi etani mae nongina Melkisedek, me karika va nongina Eron. ¹² Poli arova righi niaikolikoliaa ta pristi etoa me uunguaaira, inangari nipaopao tee aue etani aikolikoliaa. ¹³ Ia oia lo ateva eaaulieinia ararimangalina ppae ateva, me karika teva tale ia oia ararimangali eteva ghe uungu tale liu nighelei aiaavusuvusuena. ¹⁴ Poli masalikeaili va Vauita ateva ghe lutula tale ararimangali eteva ta Jiuda, me tale ia o ararimangali eteva Moses karika ghe auliaala righi voto va pristi ila. ¹⁵ Me sa ateva ami ghe aulieiniela masalikeaili ia va arova mene kateva pristi nongina Melkisedek ekauerekati, ¹⁶ ia lo ateva ghe pristila karika esuisui kkai tale inangari nipaopao nongina tuvuna atoa. Ta esuisui kkai tale sarasarakaniaa lo ateva maulue karika aue ekapa. ¹⁷ Poli laghe aulia ngaotula va,
“Io pristi io nau ekapa atoa
nongina Melkisedek.”

¹⁸ Llo voto tani aimuli tee emua arau ang ghe vullala poli maomaona me sesa ¹⁹ (poli inangari nipaopao karika erooroo tani ghelei eghulughuluena teva voto), me masi voto ghe kauerekatila, ita taatara lao emua etana, eaaulia ngaotu isaa o voto egheeleita va ita rooroo tani lao akalakalaa ta God.

²⁰ Me karika va karika righi inangari niaulia ngakoronna sae ta God. Katoa laghe pristila me karika righi inangari niaulia ngakoronna sae laghe gheleila, ²¹ me ia ghe pristila tee inangari niaulia ngakoronna sae nau eteva God ghe uela etana va,
“Vau ngepona ang ghe aulia ngakoronnala
me karika aue eaikolikoliaa nannaane:
‘Io pristi io nau ekapa atoa.’”

²² Mausi ia o inangari niaulia ngakoronna sae ta God, me Iesu ghe tau mae sio masina ateva inangari niaippooa ngaitauaa.

²³ Ghe ooroieili pristi etoa, poli karika laghe rooroo tani ghelei uunguaaira pristi etoa nau ekapa atoa poli uunguaa nimate ateva. ²⁴ Me poli Iesu etokatoka nau ekapa atoa, ia lo ateva pristi karika aue eruu. ²⁵ Liuna avalua o me nau ekapa atoa ia erooroo tani asaangi lo atoa la mae ta God tale ararina atea, poli ia etokatoka nau ekapa atoa tani kolomi niaisausi ta God mausiira.

²⁶ Poli emaamasina va aue ita ghaa ia oia ase namu ngateva tani pristi, ta ia etautau rooroaa aloaloannaaita. Ia manga ia, karika la ghaaliu teeia tale righi voto sesa, raarangisana ia, karika etokatoka aitauaa tee ssavoto, me God ghe atokaie saela eponaaili. ²⁷ Karika nongina mene katoa namu ta pristi etoa, karika erooroo va ghe toka ghelei aiaavusuvusuena nau ekapa atoa, etiuaa mua tale kanna ssavoto, vara me tale kaluira ssavoto taumattu ngatoo. Me ia, ghe gheleila aiaavusuvusuena tale kaluira ssavoto taumattu

ngatoa katengaata nonga, nau ghe taue lao sio arova voto la ghelei sae aiaavusuvusuenta etana. ²⁸ Poli inangari nipaopao esuisuitoongaa namu ngatoa ta pristi etoa nim taumattu ila, arongona ta maomaona ila, me inangari niaulia ngakoronna sae ta God, ghe mae sio emuli tale inangari nipaopao, ghe suitongaala Natuna ateva, God ghe ghelei eghulughuluena laalaa liuela.

8

Namu ngateva pristi tale ouna inangari niaippooa ngaitauaa

¹ Liuenta voto ami auliaa isaa avalua toko, va ia o pristi eteva namuu ia etokatoka, me ghe toka siola tale pai muenna ativilau ta God epona liu. ² Me euungu tale voto ateva manga ia, lo ateva ale kandisi manga ia koronna ia Vau ngepona ghe atinginaie saela, karika va taumattu.

³ Ila akapa namuu tale pristi etoa la suisuitoongainila tani taula voto ta God me tani ghelei aiaavusuvusuenta. Liuna avalua o me ghe masinala va lo ateva tee oia ie tee ghe tau sae teva voto tani tau lao ta God. ⁴ Arova ia tale kosa ateva oia, karika aue ghe pristi, poli taumattu ang ghe tokala laghe tautau sae voto ta God, nongina inangari nipaopao ghe auliaala. ⁵ Laghe uungu tale voto ateva manga ia taataraane me tootoona llo voto epona liu. Liuna avalua o me God ghe auliaala kiena Moses nau ang ghe anna tani ghelei ale manga ateva kandisi ia, ghe uela etana va, "Utani tara amasina va ughelei isaa akapa voto nongina taataraa lo ateva ughe taraiela tale motouru." ⁶ Ta poli niuungu Iesu ghe ghaala elaulau uneira pristi etoa, me inangari niaippooa ngaitaua ngateva Iesu ghe gheleiela elaulau pokane ateva, poli etokatoka tale masi inangari nialokoi.

⁷ Poli arova karika righi sesa tale aitiutiu eteva inangari niaippooa ngaitauaa, karika righi uunguaane aiaaghaluene ateva tani koliaa aitiutiu eteva. ⁸ Poli God ghe tarala kaluira sesa voto taumattu ngatoa me ghe uela va,

"Vau ngepona ghe auliaala va: Nau too emaemae
aue aghelei ouna ateva inangari niaippooa ngaitauaa
tee taumattu nge Israeli etoa me ajiuda ngatoa.

⁹ Karika aue enongina lo ateva inangari niaippooa ngaitauaa
aghe gheleiela ta tuvuiru atoa

nau aghe kunela nimaira

me aghe katulaa vellala tani kasu vuli eIjip,

poli karika laghe aaimuli emasina tee kalughu inangari niaippooa
ngaitauaa,

aghe liula vilighi etaira,

Vau ngepona ghe aulia ngaotula.

¹⁰ Vau ngepona ghe mene aulia ngaotula va, vara isaa o nau elange, inangari
niaippooa ngaitaua ngateva aue agheleiela ta taumattu nge Israeli etoa,
ia avalua toko va:

Aue aghatoka kalughu inangari nipaopao tale nannaaira

me aue apitia tale urunguitaniira

me aghi aue kapuira Goto ieghi,

me ila aue la kapughu taumattu.

¹¹ Karika teva taumattu aue emene apasunga ta lo ateva etokatoka
akalakalangina teeia

o ta teva tuena o nengane tani ue va, 'Ukila Vau ngepona ateva.'

Poli ıla akapa aue la kilaieghi,

lo atoa matuutuliena ıla me lo atoa karika matuutuliena ıla.

¹² Ta aue akkaluaa sesa gheeleiaaira,

me karika aue atoka nannaa kaluira ssavoto.”

¹³ Nau ghe aauliaa ia oia inangari niaippooa ngaitaua ngateva va ouna ia, ghe gheleila aitiutiu eteva ghe vullaiela poli ang ghe pokala me aue ekapa.

9

Nikkauaa tale ale kandisi eteva

¹ Tale aitiutiu eteva inangari niaippooa ngaitauaa, God ghe alokoila kasina salana tani usilaa tale uunguaa nikkauaa, me tee ale nikkaua ngateva ghe tokatoka tale kosa ateva oia. ² Ale kandisi eteva oia laghe ghelelela, ghaluulu rum elome ta ngetana. Tale aitiutiu etiulu rum, aitiitinginane ateva lam ateaee tee me tevoo ateva aiatoka verete laghe amangala, ia o rum atiulu, la kolokoloa va rum atiulu manga ia. ³ Emuli tale aiaaghalua atiulu kalio, rum atiulu laghe aseasea va rum atiulu mangaaili ia. ⁴ Elome ta ngetana olta ngateva gheelei ia tale gol, me vokisi eteva eaaimatoonga inangari niaippooa ngaitauaa gheelei ia tee tale gol. Elome ta ngetana aikaai mena ngateva gheelei ia tale gol, me aikkatuluna atiulu Eron ghe kuneaala pusi ngai, me tee inangari nipaopao laghe pitila tale atu elua. ⁵ Epona tale vokisi eteva keruvim alua, lalu aaimatoonga va God etokatoka tale ia o voto ateva, kaekaeiraru ghe aakou aikou vokisi eteva, voto ateva God ekakkaluaa ssavoto etana. Me ghaine karika righi nau tani aulia ngamasina akapa isaa oia voto.

⁶ Nau isaa akapaaili voto laghe atoka avaluela o, nau ekapa atoa pristi etoa laghe sosso tale aitiutiu etiulu rum tani ghelele uunguaaira. ⁷ Me namu ngateva ta pristi etoa ia nonga ghe sosso tale aiaaghaluene atiulu rum, katengaata nonga tale kateae ninamanama, me karika va nim ia, ta ghe sossoaa tee rae, tani ghelele aiaavusuvusuena ta ngetana me tee tale ssavoto kaluira taumattu ngatoa laghe ghelele me karika laghe kilakila va sesa. ⁸ Tale isaa oia voto, Spirit Manga ateva eaapasunga va ia o salana atikirighi tani sso tale rum atiulu mangaaili ia, karika ghe otia va taumattu ekupi sso poli aitiutiu etiulu rum, ia etokatoka. ⁹ Isaa akapaaili o voto eaaimatoonga ia oia nau etiulu, me eaaimatoonga va voto ita tautau lao me aiaavusuvusuena ita ghelele sae, karika erooro tani ghelele emasalika nannaaira tau ngai kkaua ngatoa la tautau lao isaa o voto. ¹⁰ Isaa oia voto la nim ghelele tale inana me manu, me asease niuungu tani pora sesa gheeleiaaira taumattu ngatoa. Isaa oia voto nim salana ıla tani ghelele eleka tale vilikiira, aue la toka lomosina ta nau eteva God aue eatoka ouna voto tani usilaa.

Raena ateva Karisto

¹¹ Nau Karisto ghe mae sio nongina teva namuu ta pristi etoa, tale masi voto ang ghe atoka akasinala oia* tale ouna ateva inangari niaippooa ngaitauaa, eghe lao sio tale masinaaili me koronna ateva ale kandisi, karika va taumattu ngatoa laghe ghelelela, me ita roo tani ue va, karika va laghe ghelelela tale kosa ateva. ¹² Karika ghe kupi ssola tale mangaaili etiulu rum tee rae meeme me natu vulumakao, ta ghe kupi ssola katengaata mausiita akapaaili tale raena ateva, tani ghaa niasaangi eteva tokatoka liu ia.

9:1: Eks 25:23–26:30. **9:3:** Eks 26:31–33. **9:4:** Eks 16:33; 25:10–16; 30:1–6; Nam 17:8–11; Diut 10:3–5. **9:5:** Eks 25:18–22. **9:6:** Nam 18:2–6. **9:7:** Lev 16:2–34. **9:9:** Hib 10:1–2.

* **9:11:** masi voto ang ghe atoka akasinala oia Kasina uru ngai laghe pitila, laghe uela va, masi voto aue emae.

¹³ Inangari nipaopao ghe uela va la kaokao sae rae meemee me vulumakao me aunna aliki vause ateva vulumakao laghe tungitungia ta lo atoa karika raarangisana ila tani ghelei eraarangisanaila me tani amangaila, arongona ta laghe ghelei eraarangisana nonga vilikiira. ¹⁴ Arova ia avalua o, raena ateva Karisto korokoronganaaili ia tani ghelei eraarangisanaita. Tale sarasarakaniaane Spiriti eteva tokatoka liu ia, Karisto ghe taue mae sio nongina lo ateva aiaavusuvusuena sae ta God karika righi voto sesa etana. Ghe ghelei eraarangisanala nannaaita tale ase niuungu elaolaoainita tale nimate, me tani uungu ta God ateva tokatoka liu ia.

¹⁵ Liuna avalua o me Karisto ghe alokoila lo ateva o ouna inangari niaippooa ngaitauaa. Ghe ghelei evaluela o poli ghe aaloanna va lo atoa ghe suitoongainilala la rooro tani ghaa masi voto ghe aulia ngalokoila tale inangari nialokoi eteva tokatoka liu ia — ia ghe matela tani poli aoghi me tani gheleila me la saanga tale ssavoto laghe gheleila tale pokane ateva inangari niaippooa ngaitauaa. ¹⁶ Nim nongina tale inangari niaippooa ngaitaua ngateva, kateva etani mate. ¹⁷ Poli ia o inangari niaippooa ngaitaua ngateva esarasarakana nau lo ateva ghe aulia ngalokoiela ange matela. Karika righi sarasarakaniaane inangarina nau taumattu ngateva maulue ia. ¹⁸ Liuna avalua o me aitiutiu eteva inangari niaippooa ngaitauaa laghe ghelei tee rae. ¹⁹ Nau Moses ghe aulia ngaotula isaa akapaaili inangari nipaopao ta ila akapa taumattu ngatoa, ghe ghaala raeira natu vulumakao atoa me meemee atoa, me tee manu, me uu sipsipi raeraeanaaili me laangi isopi me ghe aakaokao sae tale vuku eteva me ila akapa taumattu ngatoa, ²⁰ me ghe ue va, “Ia oia raena ateva inangari niaippooa ngaitaua ngateva, ia God ghe tani aulieiniela va am aitarainia.” ²¹ Tale ia nonga o salana atikirighi ghe aakaokao sae rae tale ale kandisi eteva me tale isaa akapaaili voto laghe uunguaa tale asease uunguaa nikkaua. ²² Koronnaaili, tale inangari nipaopao gharighi tau isaa akapaaili voto laghe ue va la ghelei eraarangisana tale rae ateva, me marova karika rae ghe akaakala, karika righi nikkaluaa.

²³ Isaa oia voto nim tootoo tale voto koronna epona liu, emaamasina va isaa akapaaili o voto tale kosa ateva la tani ghelei eraarangisana tale aiaavusuvusuena, me voto ngepona liu, ghe ghelei eraarangisanala tale masi aiaavusuvusuena elaulau voto tale kosa ateva. ²⁴ Poli Karisto karika ghe kupi ssola tale lo ateva o ale nikkaua taumattu ngatoa laghe gheleiela, nim tootoona ia lo ateva koronna ia; eghe kupi ssola epona liu, tani tingina emua ta matane God mausiita. ²⁵ Karika ghe kupi ssola epona liu tani mene taue mae ta ngetaita oroaata, nongina salana atikirighi namuu ta pristi etoa ghe kupikupi sso tale rum atiulu mangaaili ia tale isaa akapaaili ninamanama tee rae, karika va raena. ²⁶ Arova isaa avalua o, ghe tiuaala tale aitiutiu tale kosa ateva, aue oroaata Karisto aue ghele nim toka matemate. Me isaa oia ghe mae sio katengaata nonga mausiita tale airuuruu tale nau, tani ghaa velu ssavoto nau ia ghe gheleila niaiaavusuvusuena tale vilikina. ²⁷ Nim nongina taumattu ngatoa aue la mate katengaata, me emulina aue la tingina tale niaisakei, ²⁸ Karisto ghe gheleila aiaavusuvusuena ta ngetaita katengaata, tani ghaa velu kaluita ssavoto; me ia aue emae aghaluene, karika va tani mene ghaa velu kaluita ssavoto, ta emae tani tau mae niasaanga ta lo atoa la toitoia.

9:13: Lev 16:15-16; Hib 10:4; Nam 19:9, 17-19. **9:14:** 1 Pita 1:18-19. **9:19:** Eks 24:6-8. **9:21:** Lev 8:15, 19. **9:22:** Lev 17:11. **9:23:** Hib 8:5; 10:1. **9:26:** Hib 10:10.

10

Karisto ghe aiaavusuvusuenala katengaata ta ngetaita akapa

¹ Inangari nipaopao nim tootoo tale voto masina aue emae, karika va tani koronna isaa o voto. Liuna avalua o, me aiaavusuvusuenala la nim toka ghelei tale ninamanama atoa, karika erooroo tani ghelei eghulughuluena lo atoa la laolao akalakalaa tani kkauaa. ² Aiaavusuvusuenala karika erooroo tani ghelei eraarangisanaila, liuna avalua o me karika laghe ruuruu tani toka ghelei sae aiaavusuvusuenala. Arova tau ngai kkaua ngatoa laghe raarangisanala, karika aue la ghe ateatea maamatana tale kaluira ssavoto. ³ Me isaa o aiaavusuvusuenala la ghelei katengaata tale kateae ninamanama emene gheleita ita mene nannaa kaluira ssavoto. ⁴ Poli raeira vulumakao atoa me meeme atoa karika erooroo tani ghaa velu ssavoto.

⁵ Liuna avalua o me nau Karisto ghe sio mae tale kosa ateva, ghe uela va, “Aiaavusuvusuenala me opring karika ughe aanna, ta viliki eteva ughe aimonomosieiniela etaghi.

⁶ Tee, aiaavusuvusuenala eataata akapa me aiaavusuvusuenala tale ssavoto karika ughe masimasiaala.

⁷ Vara me aghe uela va, ‘Aghi toko — laghe pitila me laghe aulieinaghila tale Uru ngai Manga ateva — aghe sio mae tani ghelei aloaloannaam, God.’ ”

⁸ Aitiutiu ghe uela va, “Aiaavusuvusuenala me opring, me aiaavusuvusuenala eataata akapa me aiaavusuvusuenala tale ssavoto, karika ughe aloannala, me karika ughe masimasiaala” (arongona ta inangari nipaopao eue va la ghelei). ⁹ Vara me ghe uela va, “Aghi toko, aghe sio mae tani ghelei aloaloannaam.” Ghe ghaa vella aitiutiu eteva tani atoka aiaaghaluena ateva. ¹⁰ Me tale ia o aloaloannaane ateva, ang ghe ghelei emangaitala tale aiaavusuvusuenala tale vilikina Iesu Karisto katengaata ta ngetaita akapa.

¹¹ Nau ekapa atoa pristi etoa la tiitingina tani ghelei uunguaaira tale ale nikkaua ngateva; nim isaa aitaaua nonga aiaavusuvusuenala atoa la nim toka gheleia, karika erooroo tani ghaa velu ssavoto. ¹² Me nau eteva Karisto ghe gheleila ia o aiaavusuvusuenala ateva mausi ssavoto ateva, katengaata nonga, ghe toka siola tale pai muenna ativilau ta God. ¹³ Tale isaa o nau etoitai tau ngai ssateena atoa va God eatokaila sio eue me eatingina sae kkena etaira. ¹⁴ Poli tale kateva nonga aiaavusuvusuenala me Karisto ghe ghelei eghulughuluena lo atoa God eaamangaila.

¹⁵ Spirit Manga ateva tee ghe asokoila etaita isaa oia voto. Aitiutiu ghe uela va,

¹⁶ “Inangari niaippooa ngaitaua ngateva aue agheleia ta ngetaira, va vara isaa o nau elange,

Vau ngepona ghe aulia ngaotula va aue ia avalua toko. Aue aghatoka kalughu inangarighi nipaopao tale urunguitaniira, me aue apitia tale nannaaira.”

¹⁷ Vara me ghe mene uela va,

“Kaluira ssavoto me gheleiaaira karika elaolao aitaaua tee inangari nipaopao, karika poi va aue amene annaa.”

¹⁸ Me nau isaa oia voto ang ghe kkaluaala, karika mene righi uunguaa nighelei sae aiaavusuvusuenala.

Nikolokolo atea tani tingina asarasarakana

¹⁹ Liuna avalua o, kapughu etoa, karika ita roo tani mene matautu tani kupi sso tale rum atiulu mangaaili ia mausi raena ateva Iesu. ²⁰ Ghe otila ouna atikirighi salana etautau mae maulue ateva, tani kupi sso tale kalio atiulu, ia o vilikina ia. ²¹ Me poli ia kapuita pristi eteva iaaili epona tale alena ateva God, ²² ita lao akalakalaa ta God tee koronna urunguita pasu tale niaikaaiiaa. Poli tale raena ateva Iesu ghe pora ararangisanaitala tale sesa ninannaa, me ghe porala vilikiita tale manu raarangisanaaili. ²³ Ita poso parasi tale nitaatara lao emua ita ghe aulia ngaotula me ita rau mene amaramara, ta lo ateva ghe auliaala isaa o voto, aue eghelei eroorooaa. ²⁴ Me ita tee, ita mene annaa righi ase salana vaalua tani aisausiaa mene katoa tale niaielousi me tale masi niuungu. ²⁵ Karika ita mene mangoos tani mae kkaua ngaitauaa, nongina katoa la gheelei. Me nau ekapa atoa am asarasarakana mene kateva kateva, poli am taatara va nauna ateva Karisto tani sio ange aakalakalaa.

²⁶ Marova ita nim toka gheelei ssavoto, me arongona ta ngita ghe ghaala alomasaanga tale voto koronna, karika mene teva aiaavususuvusua tani mene kkaluaa kaluita ssavoto. ²⁷ Me karika, aue ita matautu nau ita toitoi nau niaisakei kanna God, me kura atea ataataili ia aue emae tani ata tau ngai ssateena atoa God. ²⁸ See ghe ratila inangari nipaopao kanna Moses, me marova ghalua o kotolu taumattu laghe aasokoi voto sesa ghe gheelei, karika righi nialousiusi etana, laghe tani uviuvi ematea. ²⁹ Me vaalua ta lo ateva taumattu easaasa tau sio Natuna ateva God? Eghelei raena ateva Natuna ateva God ghe amangaiela va karika manga ia, me tee eaauliaa saasakiaa ta Spirit eteva eaapasunga maamasinaane God. ³⁰ Poli ita kilakila lo ateva ghe uela va, “Aghi aue aliu me aghelei saasakieinila.” Me ghe uela tee va, “Vau ngepona ateva aue eghelei niaisakei tale kapuna taumattu ngatoa.” ³¹ Matautunaaili tani lau tale nimana God ateva tokatoka liu ia.

³² Am nnaa isaa too nau ang ghe lao sio, nau eteva am ghe ghaala mallanga ateva, am ghe ghaala oroieili voto sesa, me isaa o voto karika ghe gheleiemla va am ghe katuula. ³³ Kasina nau laghe aauliaa saasakiaa teiem me laghe gheelei voto etaimim karika poi masina ta mata ngoroi etoa, me kasina nau am ghe aaimonomosiaa tani lao aitaaua tee tau ngaiesoa ngatoa laghe gheelei saasakieinila. ³⁴ Am ghe aalousiusi tee tau karavusu etoa me am ghe saasausila, me nau peimim laghe sarasarakana tani nim ghaa tale aloannaaira, karika am ghe aalousiusi tee peimim, ta am ghe masimasi, poli am ghe kilakila va voto masinaaili etokatoka, me aue etoka nau etoa, isaa epona liu. ³⁵ Liuna avalua o me am rou mene velu kaluimim nimatuutuliena ta God, poli aue am ghaa aipolipoli eteva namungaili ia. ³⁶ Am tani tingina akoronna tani ghelei aloaloannaane God, me aue am ghaa saa llo ghe auliaala tale inangari nialokoi. ³⁷ Poli, “Karika masauna arighi

me lo ateva taumattu ange maemae aue emae me karika aue aippetana,
³⁸ me tale niaikaaiiaa kapughu tau ghulughuluena ateva aue etoka maa-
 maulue
 me arova eoghi vulu isaa o voto,
 karika aue amasimasiaina.”

³⁹ Poli ita karika nongina lo atoa la oghioghi me nitturuu eghaaghaaila, ta nongina lo atoa la ghaiesoaa me la saasaanga.

10:19: Hib 4:16. **10:20:** Mat 27:51. **10:22:** Lev 8:30; Esik 36:25; Ips 5:26. **10:25:** Hib 3:13. **10:26:** Hib 6:4-8. **10:27:** Ais 26:11. **10:28:** Diut 17:6; 19:15. **10:29:** Eks 24:8; 1 Ko 11:27-29; Mat 12:30-32. **10:30:** Diut 32:35-36; Sams 135:14. **10:34:** Mat 6:20; 5:11-12. **10:37:** Abak 2:3-4.

11

Tale niaikaaiaa

¹ Niaikaaia ngateva ia avalua toko va ita aiesoaa va aue ita ghaa llo emua etaita, me eaapasunga va ita rooroo tani kila va aue ita ghaa voto ita tam taatara. ² Tale isaa o ase voto, me lo atoa emua arau laghe ghaala niaruaa ta God.

³ Tale niaikaaiaa ita kilakila va tale niaulia ngasarasarakana tale inangarina God, me kosa ateva ghe lutula. Liuna avalua o me voto ita taatara ghaine, karika God ghe gheleilala tale voto ita rooroo tani tara.

⁴ Tale niaikaaiaa, Eibol ghe ghelei saela lo ateva aiaavusuvusuena masina ia ta God me ta lo ateva Kein ghe gheleila, me tale unna niaikaaiaa, God ghe arueiniela va ghulughuluena ia nau ghe ppooaala masimasiaane tale unna aiaavusuvusuena. Arongona ta ghe matela, esamasama ta ngetaita tale unna niaikaaiaa.

⁵ Tale niaikaaiaa me God ghe ghaa saela Inok epona liu me karika ghe ateateaala nimate. Karika laghe roola tani mene taraia, poli God ghe ghaaiela. Auena God ghe ghaaia, laghe aaulieinia va God ghe masimasiaeina. ⁶ Me karika ita rooroo tani amasimasi God arova karika righi niaikaaiaa. Poli lo ateva elao etana etani aiesoaa va God etokatoka, me etautaula aipolipoli ta lo atoa la tani paepaea.

⁷ Tale unna niaikaaiaa Noa, nau God ghe auliaala kiena tale llo karika ghe tara, tale nioneoneaa tale inangarina God ghe atulula aka ateva tani asaangi vausenna ateva me natuna atoa. Tale niaikaaiaa ghe aulia ngaotula ta taumattu ngatoa tale kosa ateva oia va sesa ila me ghe ghaala nighulughuluena tale uunguaa niaikaaiaa.

⁸ Tale niaikaaiaa, Abraham ghe nongo usilaala nau God ghe koloala tani lao tale voto ateva auena aue ghe ghaaia va ghe kanna ia, arongona ta ghe tam kilakila va eaa ghe laolao. ⁹ Tale niaikaaiaa, ghe tanganuenala tale masaliki eteae God ghe aulia ngalokoila, nongina ativuu eteva tale anua karika anuena. Ghe tokatoka tale ale kandisi, nongina Aisiki me Jekop ila tee elome tale ia o inangari nialokoi eteva. ¹⁰ Poli ghe taatara lao emua tale lo ateaee masaliki taatara tokatoka liu ia, me lo ateva ie nonga ghe nnainiela me ghe atuluela, God ta ngetana. ¹¹ Tale niaikaaiaa, arongona ta Abraham ang ghe taita namuula, me Sera kina ngere ia, karika ghe roola tani alakuti aliki, me ghe tamaneila aliki eteva ghe lutula. Poli ghe tarala va lo ateva ghe auliaala inangari nialokoi, aue eghelei llo ghe auliaala. ¹² Liuna avalua o me ta kateva nonga ia taita, nongina va matena ia, ghe alutula kolenganina atoa, ooroiaaira nongina katto atoa elomarase me rira atoa elosamarra, karika ita rooroo tani ira.

¹³ Ila akapa o taumattu ngatoa laghe tokatoka tale niaikaaiaa nau laghe matela. Karika laghe ghaala voto God ghe auliaala tale inangari nialokoi. Laghe tara amasau lao sio, me laghe masimasila, me laghe aulia ngaotula va ila ativuu ila me karika tanganueira tale ia oia kosa ateva. ¹⁴ Lo atoa taumattu la ghaauliaa isaa o ase voto la ghaapasunga va la paepae masaliki aue tanganueira. ¹⁵ Arova laghe aannaa masaliki laghe kasu vulila, aue laghe nnaa righi salana tani kiriaa lao. ¹⁶ Me karika ta laghe nannangaili masina ateaee masaliki pei ngepona liu ia. Liuna avalua o me

11:1: 2 Ko 5:7. **11:3:** Aitiutiu 1:1; Sams 33:6; Jon 1:3. **11:4:** Aitiutiu 4:3-10. **11:5:** Aitiutiu 5:21-24. **11:7:** Aitiutiu 6:13-7:1. **11:8:** Aitiutiu 12:1-5. **11:9:** Aitiutiu 35:12. **11:11:** Aitiutiu 18:11-14; 21:2; Rom 4:19. **11:12:** Aitiutiu 15:5; 22:17. **11:13:** Aitiutiu 23:4; 1 Kro 29:15; Sams 39:12; 1 Pita 2:11.

God karika epaapalata nau la kolokoloa va kapuira Goto ia, poli ia ang ghe aimonomosiaala masaliki taatara atea va masalikiira ia.

¹⁷ Tale niaikaaiaa Abraham, nau God ghe tootoongainiela, ghe gheleila aiaavusuvusuena ta Aisiki. Lo ateva ghe ghaala inangari nialokoi ghe ainasiaala tani ghelei aiaavusuvusuena ta kateva nonga ia natuna taita ateva, ¹⁸ arongona ta God ghe uela etana va, “Ta Aisiki tuvum atoa aue la lutu.” ¹⁹ Abraham ghe nnaala va God eroroo tani totu matena atoa, me ita rooroo tani ue va nonginaaili va ghe ghaa oghila Aisiki tale nimate.

²⁰ Tale niaikaaiaa, Aisiki ghe arangisela Jekop me Iso tale voto auena ghe lutu tale maamauluaairarua.

²¹ Tale niaikaaiaa, Jekop ghe arangisela natuna alua Josep, nau ghe saoiniela epona tale unna aikkatulu etiulu me ghe kakkauaa God emulina ghe matela.

²² Tale niaikaaiaa Josep, nau eteva ang ghe aainasiaa tani mate, ghe auliaala nau aIsraeli etoa aue la kasu vuli eljip, me ghe aulia ngalokoila inangari tani usilaa va sa ateva aue la gheleia tale riuna.

²³ Tale niaikaaiaa tamane me kinna Moses lalu ghe aisulieiniela kotolu ulana nau eteva ghe lutula. Poli lalu ghe tarala va aliki eteva oia masinaaili taataraane, karika lalu ghe matautula tani tam nongo usilaa inangarina kingi eteva.

²⁴ Tale niaikaaiaa Moses, nau eteva ghe namuula, ghe ratila va la koloa va natuna ia natuna vause ateva Peroo. ²⁵ Ghe aloannala tani ghaa nimmarikana tee kapuna taumattu ngatoa God, me ghe rau mene amasimasia tani ghelei ssavoto tale nau karika aluse. ²⁶ Eghe nnaala va marova eghaa nimmarikana, me etam ghaa nioneoneaa, tale ararina atea Karisto, aue elau ekapa asease ghinna atoa eljip, poli ghe aatoka matane tale aipolipoli eteva auena. ²⁷ Tale niaikaaiaa Moses ghe kasu vulila eljip, poli karika ghe matautaala sessaiaane kingi eteva, nongina va arova ghe tarala lo ateva karika ita rooroo tani taraia, me ghe ratila tani mene oghiaa lao. ²⁸ Tale niaikaaiaa ghe gheleila uunguaa Pasova ngateva, me ghe auliaala laghe atoka saela rae tapaa ngatamaniira, me ensolo tale nimate ateva ghe tam uvi ematela natuira mua atoa taita aIsraeli etoa.

²⁹ Tale niaikaaiaa aIsraeli etoa laghe kasu longotila paa manu eteva la ghaseasea va eRet Sii etana, nongina va elae. Nau aljipi etoa vara laghe toonga tani kasu tee, manu eteva ghe arropilala.

³⁰ Tale niaikaaiaa aivatvati etoa eJeriko laghe katuula nau aIsraeli etoa laghe kasu taliaala eroroo ghaitu nau.

³¹ Tale niaikaaiaa Reiab aipae taita ia karika ghe matela tee lo atoa laghe tam nongonongo usilaa God, poli ghe aitaraala kapuira tau lloso atoa aIsraeli etoa.

³² Vaalua, sa ateva amene aulieinia? Karika oroi naughu tani mene auliaa Gidion, Barak, Samson, Jepta, Deivit, Samuel me propete atoa. ³³ Tale niaikaaiaa laghe uviuvi patunganue namu ngatoa me laghe ghaaghaaila, laghe gheelei niaisakei tale uunguaa nighulughuluena, me laghe ghaaghaa saa voto God ghe auliaa ta ngetaira tale inangari nialokoi. Laghe gheelei runga paaira laeoni etoa, ³⁴ laghe aapala kura atoa ataataailiila, laghe saasaanga tale baenata. Arongona ta saghuighuina ila, me laghe mene sarasarakana, me laghe tiitingina asarasarakana tale niaiuvi, me laghe

11:17: Aitiutiu 21:12; 22:1-14. **11:19:** Rom 4:17. **11:20:** Aitiutiu 27:27-29, 39-40. **11:21:** Aitiutiu 47:31-48:20. **11:22:** Aitiutiu 50:24-25; Eks 13:19. **11:23:** Eks 1:22; 2:2. **11:28:** Eks 12:21-30. **11:29:** Eks 14:21-31. **11:30:** Jos 6:12-21. **11:31:** Jos 2:1-21; 6:21-25; Jms 2:25. **11:32:** Aitoi 6:11-8:32; 4:6-5:31; 13:2-16:31; 11:1-12:7. **11:33:** Den 6:1-2. **11:34:** Den 3:23-27.

uviuvi tau ngai ssateeira atoa ativuu ila. ³⁵ Tale niaikaaiaa, vause atoa kapuira atoa matena ila laghe mene totu saela tale nimate. Katoa laghe tam aaloanna va la nim karavusu, laghe matemate tale nimate mmarikanaaaili, poli laghe aloannaaili va la mene totu tale lo ateva nitotu masinaaili ia. ³⁶ Mene katoa laghe aauliaa teeila asease inangari etoa me laghe uuetaila. Katoa laghe aatoka sene ta ngetaira me laghe laolaoainila tale ale mata voovoo. ³⁷ Laghe osaosa amatela tale atu, laghe soosoo eghaluevilauila, laghe uviuvi ematela tale baenata. Laghe kasukasu see, laghe aasae viliki sipsipi me meemee, karika righi peiira, taumattu ngatoa karika laghe gheelei righi masi voto ta ngetaira, laghe gheelei saasakieinila. ³⁸ Kosa ateva karika ghe maamasina ta ngetaira. Laghe aso kasukasu see nongina va lo atoa karika va righi liuira, laghe tokatoka tale voto karika righi taumattu ta ngetana me tale motouru etoa, me tale lienga atoa me liu etoa tale kosa.

³⁹ Ila oia lo atoa laghe ghaala niaruaa ta God poli tale uneira niaikaaiaa, arongona ta karika teva ta ngetaira ghe ghaala voto laghe aulia ngamuemue alokoila tale inangari nialokoi. ⁴⁰ God ang ghe loela kasina voto masinaaili ta ngetaita, me karika va lo atoa akasina nonga, ta ita akapa aitauaa aue ita ghaa.

12

Iesu, aitiutiu ia me aighelei eghulughuluena niaikaaiaa ia

¹ Ita taatara oroieili taumattu ngatoa maamauluaaira eaapasunga vaalua malloeana niaikaaiaa. Liuna avalua o ita ilou tale ia o niaikarati eteae emua ta ngetaita me ita rau mene mangoo vulua. Ita ghaa velu righi asease voto maamatana, me ssavoto tee erau kavili rungainita. ² Nau etoa ita tani taatara lao ta Iesu, poli ia aitiutiu ia me aighelei eghulughuluena niaikaaiaa ia. Karika ghe nnaala nipalata tale ia o ase nimate ateva tale aikotoo, ta ghe nnaala nimasimasi eteva aue eghaaia me etoka etana nau ekapa atoa. Me ghaine etokatoka tale pai muenna ativilau tale aitokatokane ateva God.

God eparuparu natuna atoa

³ Am nim nnaa voto sesaaili tau ssavoto atoa laghe gheleila etana, me ghe tingina akorokorongana etana. Karika laghe maamasieinia me laghe gheeleia va eghaa voto maate. Liuna avalua o me am rau mene mangoo me am sio asoasooa. ⁴ Tale uneimim niaissarakaa tee ssavoto ateva, karika toa laghe uvi emateam. ⁵ Me koti ngam ghe kkaluaala isaa o inangari niaisausiaa eaauliaa etaimim va am natuna am.

“Natughu, urau mene nnaa va niparuparu eteae kanna ia Vau ngepona peisaane ia,

me urau mene sio asoasooa nau eloeloeo.

⁶ Poli Vau ngepona ateva eparuparu lo atoa eaaielousiangailiila me eattara matane lo ateva taumattu eghaaghaaia nongina va natuna ia.”

⁷ Liuna avalua o me am tingina asarasarakana tale niparuparu aanasa, poli God egheeleiem nongina va natuna am. Poli sa ateva aliki tamane etam paruparua? ⁸ God eparuparu ekapa natuna atoa. Arova etam parula, karika va tani natuna ila, ta nim aliki tale kosa ateva oia. ⁹ Nim nongina tamaita tuunga atoa la paruparuta, me ita oneoneainila. Vaalua me karika ita roo tani tau velu Tamaira ateva kapuita spiriti etoa eparuta me etau mae maulue ateva me aue ita toka? ¹⁰ Tamaita atoa tale kosa

11:35: 1 Ki 17:17-24; 2 Ki 4:25-37. **11:36:** 1 Ki 22:26-27; Jer 20:2; 37:15; 38:6. **11:37:** 2 Kro 24:21. **12:1:** 1 Ko 9:24-25. **12:5:** Nitoka 3:11-12; Job 5:17; Aotu 3:19. **12:7:** Diut 8:5.

ateva oia la paruparuta tale nau karika aluse, tale aaloannaaira; me God eparuparuta tani sausita tale masi nitoka nau etoa egheeleita va ita manga nongina ia manga ia. ¹¹ Karika ita masimasi nau la tautau mae niparuparu mmarikanaaili tani ghaa oghita tale sesa salana. Me marova ita kila tani nongo usilaa nau la paruparuta, aue ita ghelei voto ghulughuluena me aue ita toka tale luei.

¹² Poli ngam ghe maomaonala tale niaikarati eteae, liuna avalua o me am gheleiem me am mene sarasarakana. ¹³ Am toka tale ghulughuluena atikirighi salana me aue am roo tani saanga, me voto atoa la ghelei emaomaonaiem, karika la rooroo tani gheleiem va erauem.

¹⁴ Am tootoonga tani toka tee taumattu ngakapa atoa tale luei, me am toka tale maulue manga. Arova teva maamaulueaane karika manga, karika aue etara Vau ngepona ateva. ¹⁵ Am aipanipaniaa nonga ta am rau katuu vulu nonga maamasinaane ateva God. Karika teva etaimim emene nongina natu ngai erighi kaaleaili ia epiipinosa sae me eghelei oroieili voto sesa, me oroi taumattu la tam raarangisana ta matane God. ¹⁶ Karika teva taumattu emene aimuli tee uunguaa niailai salosalooa me karika eoneoneaa voto atoa manga ila, nongina Iso, ghe nim aikolikoliaala saa voto ia ghe rooroo tani ghaa poli ia mue ia, tale nim tuku nginana arighi. ¹⁷ Am nim nnaa va nau Iso ang ghe gheleila isaa o voto, me emulina ang ghe mene aaloanna niarangise me God ghe ratila. Iso karika ghe roola tani aikolikoliaa isaa o voto poli karika ghe nna ngaioghioghia ngakoronnala arongona ta ghe ngangngala poi.

Ita ghe mae sio ta Jerusalem ngepona liu eteva

¹⁸ Karika am ghe mae tale motouru eteva eSaenae ita rooroo tani posoa, karika teae kura eramerame, o righi saurrom me urukookoo, o teva ttasi vaoo, ¹⁹ o lingi taue ateva me lingi ngalo ateva esamasama, me lo atoa laghe nongoala, laghe tam aloannala tani mene nongo righi inangari. ²⁰ Poli karika angila ghe rooroo tani nongo me tingina akorokorongana tale saa llo God ghe auliaala va, tee marova teva ghaata kkena enim tuli motouru eteva, la tani uvi ematea. ²¹ Saa voto laghe tarala ghe ghelei ematautulala me Moses ghe uela va, “Ngaghi reterete tee nimatautu.” ²² Me, ngam ghe mae sio tale motouru eteva la aseasea va Saeon, ia o masaliki taatara atea masalikina ia God ateva tokatoka liu ia, ia o Jerusalem ngepona liu eteva, me ta kapuna ensolo atoa oroianaaaili ila laghe mae sio tani masimasi eitauea. ²³ Ngam ghe mae sio tale kinatama nivelu eitauea ngateae ta lo atoa nongina va natuna mata ngemue ila God, me ila la masimasieli poli ila arariira isaa epona liu, me ngam ghe mae sio ta God, ia tau ngai ghelei niaisakei ia ta ila akapaaili taumattu ngatoa, me ta ghulughuluena tee atoa laghe matela me God ghe amangailala. ²⁴ Me Iesu etiitingina elome etaita me God tale ouna ateva inangari niaippooa ngaitauaa, poli raena ateva elaulau raena ateva Eibol me eaaulia ngaotu oroieili masi voto.

²⁵ Am nna ngamasina, me am rau mene rati tani nongo usilaa God nau eaaippooaa. Katoa laghe nongo vuluela nau ghe aauliaa voto etaira tale kosa ateva oia, me karika laghe rooroo tani ilou eisulia. Liuna avalua o me karika poi aue ita rooroo tani ilou eisulia marova ita tam nongo usilaa inangarina God epona liu. ²⁶ Lingi ngalona ateva God ghe gheleila

12:11: Jms 3:17-18. **12:12:** Ais 35:3. **12:13:** Nitoka 4:26. **12:16:** Aitiutiu 25:29-34. **12:17:** Aitiutiu 27:30-40. **12:18:** Eks 19:16-20; Diut 4:11-12. **12:19:** Eks 20:18-21; Diut 5:22-27. **12:20:** Eks 19:12-13. **12:21:** Diut 9:19. **12:24:** Hib 8:6; Aitiutiu 4:10. **12:25:** Hib 2:1-3; 10:26-29. **12:26:** Ag 2:6.

kosa ateva ghe rukeiela, me tale isaa oia nau ang ghe aulia ngalokoila tale inangari nialokoi va, “Aue amene ruke kosa ateva ghaluene me epona liu tee.”²⁷ Isaa o mata nginangari va “ghaluene” eaaulia ngamasalikangaili va aue eghaa velu voto eroroo tani ruke, malloeana va llo voto ghe gheleila, poli ghe aloannala va llo voto karika la rooroo tani ruke, isaa nonga o voto aue etoka.

²⁸ Liuna avalua o me ita kaili emasina ta God, poli ita ghaaghaa ararimangali eteva karika eroroo tani rukeia, aue ita kkauaa God tale ase salana eroroo tani apasunga nioneoneaa me nimatautu ta God. ²⁹ Poli kapuita God ateva koronnaaili va ia nongina “kura atea etuuturungi ekapaaili voto atoa.”

13

Niuungu tani amasiasi God

¹ Am rau mene ruu tani aielousi nongina va tue me nenga am. ² Am rau mene kkaluaa tani aikoloa ativuu etoa, poli katoa laghe ghelei evalua o me karika laghe kilakila va laghe aikoloaala ensolo atoa. ³ Am nnaa lo atoa tale ale mata voovoo, arova nongina va am tee am tokatoka tale ale mata voovoo teeila, me tee lo atoa karika la ghelei masina etaira, nongina va am tee am ghaaghaa nimmarikana.

⁴ Am akapaaili am oneoneaa nilai eteae, me lailai elua komo tellaai ekomoiraru nonga ia. Ta poli God aue eghelei niaisakei ta lo ateva taumattu lailai ia me emene laa ghailai see, me lo atoa la lailai sari maneira atoa mene katoa. ⁵ Am alekalekaiem tale uunguaa niaielousiaa viliki veu, me am masimasiaa saa voto ngam ghe ghaala isaa etaimim. Poli God ghe uela va,

“Karika aue akasu vulio;
me karika aue akkaluaa poio.”

⁶ Mausina avalua o me ita atoka tuutuliita ta God me ita ue ta taumattu ngatoa va,

“Vau ngepona ateva tau ngai sausighi ia,
karika aue amatauta
saa righi voto teva taumattu eanna tani ghelei etaghi.”

⁷ Am rau mene kkaluaa lo atoa laghe muemueinam, ila laghe aulia ngaotu inangarina ateva God etaimim. Am nnaa tee vaalua tokatokaaira me matemateaaaira, me am tootoonga tani ghaa ia o ase niaikaia gateva nongina ila. ⁸ Iesu Karisto karika ghe aikolikoliaa poi nau too ang ghe lao sio, nau ghaine, me nau too emaemae.

⁹ Am rau mene tau velu asease niapasunga ngatoa kamena ila va la katulaa veluem tale masi salana atikirighi. Emaamasina tale urunguita ateva tani ghaa sarasarakana tale maamasinaane God, me karika va tani usilaa inangari tale uunguaa inana la ghelei aiaavusuvusuena etana, ta poli lo atoa la usilaa isaa o inangari karika esaasausila.

¹⁰ Ouna ase liu nighelei aiaavusuvusuena etokatoka etaita, me pristi etoa la uungu tale ale kandisi eteva manga ia karika la rooroo tani ghaa inana tale ia o voto ateva. ¹¹ Nau namu gateva ta pristi etoa eghaaghaa raeira ghaata kkena atoa me esossoa elome tale rum atiulu mangaaili ia tani ghelei aiaavusuvusuena tani ghaa velu kaluira ssavoto taumattu ngatoa, me ghaata kkena akapa ateva laghe ghooainia eleka, me laghe ghoo

tungitungia. ¹² Mausina avalua o me Iesu tee ghe matela eleka tale masaliki taatara atea, tani ghelei eraarangisana kaluira ssavoto taumattu ngatoa tale raena ateva. ¹³ Liuna avalua o me ita tee ita ghoa tee Iesu eleka me ita ghaa nipalata nongina laghe ghelei teeiela. ¹⁴ Poli tale kosa ateva oia karika teae masaliki taatara eroroo tani toka nau ekapa atoa, ita toitoi ia o ouna atea masaliki taatara va emae.

¹⁵ Liuna avalua o tale uunguaane Iesu ita toka kaakaueinia nau ekapa atoa tani ghelei arova uneita aiaavusuvusuena nitau sae ta God. Me nilooloo sae me nitau sae ita auliaa ta paaita nongina va kaluita aiaavusuvusuena ta God nau ita auliaa ararina atea. ¹⁶ Am rau mene kkaluaa tani ghelei masi voto me tani parruu mene kateva kateva, poli God emasimasiaa ia o ase aiaavusuvusuena.

¹⁷ Am nongo usilaa lo atoa la muemueinam me am ghelei saa voto la auliaa. Poli ila la aaitarainiem, me aue la ghauliaa ta God vaalua aaitaraaira etaimim. Am nongo usilainila, me aue nimasiasi elutu tale uunguaaira. Arova karika, aue la ghelei uunguaaira tale nialousiusi me karika aue la roo tani sausiem.

¹⁸ Am rau mene ruu tani looloo sae poli mausiimami, poli ami kilakila va nannaaimami masalikeaili va karika ami ghe ghelei righi sesa voto, poli nau ekapa atoa ami aloanna tani ghelei voto masina. ¹⁹ Tale urunguitanighi ekapaaili eteva akookolomiem tani looloo sae va God aue esungi parasieghi atu etaimim.

Airuuruu eteva nilooloo sae

²⁰⁻²¹ Alooloo sae va God, ia etautau luei, aue etau aatu isaa akapaaili masi voto atoa me am rooroo tani ghelei voto eaaloanna. God ghe totula Vauita ateva Iesu Karisto tale nimate, ia kinatama aitoitoi ia ta sipsipi etoa, poli tale raena ateva tale matemateaane. Raena ateva ghe tiuaala niaippooa ngaitaua ngateva aue etoka nau ekapa atoa. Alooloo sae va aue God eghelei etaita saa voto emaamasina etana, tale uunguaa Iesu Karisto, me ta ngetana nitau sae nau ekapa atoa. Koronna.

Airuuna inangari tale uru ngai etikirighi

²² Akookolomiem, masi kapughu etoa, tani nna ngamasina isaa o inangari niaisausiaa aghe pitila tale uru ngai etikirighi oia karika aluse ia.

²³ Aghaaloannaiem tani kila va kapuita ateva ta Timoti ang ghe kupi ghoa mae tale ale mata voovoo. Arova emae parasi, aue aghaia me angalu mae taraiem.

²⁴ Am taula masimasiaaimami ta lo atoa la muemueinam me tee ta kapuna taumattu ngatoa God. Kapuita atoa eItali la suu aatu sio masimasi-aira etaimim.

²⁵ Alooloo sae va aue maamasinaane God etoka etaimim akapa.

Uru ngai etikirighi Jeimis ghe pitiela Inangari emuemua

Oroi ila tau ngalomasaanga atoa la nannaa va Jeimis kateva tana nengane Iesu. Ia namuu ia elome ta tau ngaiesoa ngatoa eJerusalem (Apostolo 15; Galaisia 2:9). Uru ngai etikirighi oia ghe pitiela eaauliaa oroi voto tale tokatokaaita nau ita aimuli tee Karisto.

Tani kila amuemua

Aitiutiu tale inangari, me niapasunga tale nitootoonga 1:1-27

Lo atoa karika righi peiira, me niparruu 2:1-26

Nisama raarangisana 3:1-4:12

Nitootoonga tale viliki veu 4:13-5:6

Nitingina akorokorongana, nilooloo sae, me airuuruu tale uru ngai etikirighi 5:7-20

¹ Aghi Jeimis, kapuna tau ngai nongonongo anna ieghi God me Vau ngepona ateva Iesu Karisto.

Apitipiti atu etaimim kasangaulu ghalua (12) ararimangali nge Israeli am tokatoka reerekataa see tale mene kasina patunganua.

Masi nau eteva etaimim.

Nitootoonga eaasarasarakanaita

² Kapughu etoa, nimasimasi eteva namungaili ia epasu etaimim nau am ghaa ase nitootoonga, ³ poli am kilakila va nau ita apala nitootoonga tale aikaaiaaita egheelei nitingina akorokorongana ateva. ⁴ Tani tam ruu tani tingina akorokorongana etani ruu uunguaane etaimim me aue am matuenna me am ghulughuluena me karika aue am tukuna tale righi ase voto. ⁵ Arova teva etaimim etuutukuna tale masi alomasaanga kanna God, ekolomi God. God emasimasieili tani tau lao me karika etautau mae tale nisessaia me tani ului gheeleiaaita sesa, me aue etau lao masi alomasaanga etana. ⁶ Me nau eteva ukolomi, uaiesoaa me karika emene ghalua nannaam, poli lo ateva eghaaghalua nannaane nonginaaili kotoo ateva elamana kuukuu eteva ekuukuueinie see. ⁷ Ia o ase taumattu ngateva karika emene nnaa va aue eghaa righi voto ta Vau ngepona ateva, ⁸ poli nannaane ase taumattu ngateva o eghaaghalua me karika eaatoka tuu nannaane tale voto egheelei.

⁹ Lo atoa kapuna iem God me karika peiimim, am masimasi poli tale taataraane God, ararim ateaie iaaili epona. ¹⁰ Me lo atoa tue peipeiena iem, am masimasi poli am tokatoka euu, poli aue am kapa nongina ueli palaoa ngateva emammate. ¹¹ Nau sinaka ateva esaesae, mallangina ateva elallangia me palaoa ngateva ekaakatuu me masi taataraane esessa. Tue peipeiena ateva aue ekapa avalua o nau eteva egheelei uunguaane.

¹² Aue emasinaaili ta taumattu ngateva etiitingina akorokorongana tale nitootoonga, poli nau nitootoonga eruu, aue eghaa kou nguru maulue ateva tokatoka liu ia, God ghe auliaala inangari nialokoi ta lo atoa la aielousieinia.

¹³ Arova nitootoonga eghaaie, karika teva emene ue va, “God etootoon-gainieghi.” Ta voto sesa karika etootoonga God, me ia karika egheelei nitootoonga ta teva. ¹⁴ Ta ninannaa sesa etaita egheelei nitootoonga me eghaaghaaita lao tale voto sesa arova ivia ateva. ¹⁵ Nau eteva sesa ninannaa ange tokala, ealutu sesa voto, me nau sesa voto epiipinosa anamuu, eluulutuaa nimate atea.

¹⁶ Kapughu etoa, isaa o voto erau kameam. ¹⁷ Isaa akapaaili masi voto me voto ghulughuluena ekasukasu epona liu. Ekasukasu me esiosio etaita ta Tamaita ngepona liu eteva ghe gheleila mallanga atoa me karika eaikolikoliaa nongina tootoo ateva. ¹⁸ Tale aloalonnaane ghe alututala tale inangari koronna me aue ita rooroo tani taumattu niaitiutiu tale isaa akapaaili voto ghe gheleila.

Tani nongo me ghelei

¹⁹ Masi kapughu etoa, am nnaa parasi inangari toko va, am akapaaili am kila tani oti parasi talingaimim tani nongonongo me am rau mene ailuilui tani sama me tani sessai. ²⁰ Ta sessaiaa taumattu karika aue ghelei righi voto va eghulughuluena ta matane God. ²¹ Liuna avalua o me am ruu tani ghelei sesa me tani annaa saasakiaa ta mene kateva, me am siuaa nannaaimim me am ghaa inangari laghe auliaala etaimim erooroo tani asaangiem.

²² Am rau nim mene nongo inangari me karika am ghelei voto eaauliaa. Arova am ghelei evalua o, am nim kamekameam. ²³ Lo ateva enongonongo inangari me etam gheelei, nonginaaili taumattu ngateva etaatara taataraane tale ghalasi eteva, ²⁴ me nau eruuruu tani taatara, me ekasukasu, arovaea ta eaikkaluaa taataraane. ²⁵ Me lo ateva etam ghaaghaa velu matane tale isaa o inangari nipaopao ghulughuluena egheeleia karika ekaakaravusu tale ssavoto me nimate, me karika eoghioghi vulu isaa o voto, me karika eaaikkaluaa voto ghe nongola me ghe tarala, ta egheelei, niarangise aue etoka tale voto egheelei.

²⁶ Arova teva eue va tau nikkauaa ia me karika eaitara ngamasina ramuramuti paana ateva, enim kamekamea me unna nikkauaa egheelei nim peisaane. ²⁷ Llo nikkauaa God Tamaita ia ealoanna me eghaaghaa va raarangisana me masina isaa avalua toko: tani sausi aliki raue vulu etoa me vause raue vulu etoa nau nialousiusi eghaaghaaila, me am rau mene tau velu gheeleiaa kosa ateva va eghelei saasakieinam.

2

Karika masina tani aimassiaa

¹ Masi kapughu etoa, poli ita aiesoaa ta Vau ngepona ateva Iesu Karisto iaaili epona, liuna avalua o me am rau mene aimassiaa. ² Arova teva taumattu emae nongina am veluvelu eitauaa me eaasae ringi gheelei tale gol me eaasae tee masi ghinna, me teva llo tee karika righi peina me ghinnanina sesa ghele kupi tee sso, ³ me arova utara kkai nonga lo ateva emolumolu emasina me ughele ue etana va, “Masi aitokatokam ateva toko,” me ughele ue ta lo ateva karika peina va, “Utingina lao too,” o “Utoka sio tapaa kosa,” ⁴ karika ukilakila va angu aaimuli tee tani ghelei niaisakei tani pola taumattu tale ale manga ateva tale ninannaa karika masina?

⁵ Am nongo, masi kapughu etoa, God ghe suietoongaala lo atoa karika peiira tale kosa ateva oia va la tue peipeiena tale niaikaaiiaa me la ghaa

niarangise tale ararimangalina ateva God, ghe auliaala inangari nialokoi ta lo atoa la aielousieinia. ⁶ Me karika, ta am taatara lo atoa karika peiira va peisaane ila. Karika am kilakila va tue peipeiena atoa la tautauem sio euu tani ghelei voto maate etaimim? Me karika am kilakila va la ghaaghaaiem tani laoinam tale liu niaisakei? ⁷ Karika am kilakila va ila la tani aattara tani auliaa saasakiaa teeiem lo atoa masi ararina atea Iesu etaimim?

⁸ Arova am tani aitaraa kanna inangari nipaopao Iesu kingi ia tale Uru ngai Manga ateva eue va, “Uaielousiaa lo ateva etokatoka akalakalangina etam nongina uaaielousieinio,” am ghelei masi voto. ⁹ Me arova am aimassiaa, am ghelei voto sesa, me inangari nipaopao eghelei niaisakei etaimim va karika am aaimuli tee voto masina. ¹⁰ Poli arova lo ateva eaimuli tee isaa akapaaili inangari nipaopao me kateva nonga ia ange tam aimuli teeiela, ange ghelei saasakia ngakapaailiila inangari nipaopao. ¹¹ Poli God ghe uela va, “Karika umene lai sari kateva vausenna ateva,” ghe ue teela va, “Karika umene aiuvi emate.” Me arova utam lai sari kateva vausenna ateva me uaaiuvi emate nonga, angu ghelei saasakiaala inangari nipaopao.

¹² Am ppoaaa me am ghelei nongina lo atoa aue la aisakei tale inangari nipaopao poli isaa o llo, aue egheleiem me karika aue am karavusu. ¹³ Poli llo niaisakei karika righi nialousiusi etana, aue eghaa lo ateva taumattu karika eaalousiusi, me nialousiusi aue eapala niaisakei.

Niaikaaiaa me niuungu

¹⁴ Kapughu etoa, arova teva taumattu eue va eaikaaiaa, me karika righi masi niuungu eghelei, karika aue esausia. Am annaa va ase niaikaaia ngateva o aue easaangia? ¹⁵ Arova teva tuem me nengam etuutukuna tale ghinna eaaloanna me inana tani nama ta kateva kateva nau, ¹⁶ me teva etaimim ghele ue etana va, “Kasula tale luei me laa ghasae ghinna me uanasa, me unamanama me essoio,” me karika eghelei righi voto tani sausia, am annaa va saa righi masi voto aue elutu? ¹⁷ Tale isaa o ase salana me arova niaikaaiaa karika elaolao tee niuungu, isaa o niaikaaiaa nim matena.

¹⁸ Me kateva aue eue va, “Unem niaikaaiaa?” Me aghi aue aue va, “Auungu. Uapasunga unem niaikaaiaa karika niuungu etana me aue aghapasunga aikaaiaaghi tale voto auungu etana.” ¹⁹ Uaaiesoaa va kateva nonga ia God ateva? Masi ninannaa ia! Me raroai tee atoa la ghaaiesoaa me la reterete.

²⁰ Alokapakapa ateva, uanna va aghapasunga va niaikaaiaa karika elaolao tee niuungu, nim peisaane? ²¹ Vaalua tuvuita ateva ta Abraham ghe ghulughuluena ta matane God? Poli voto ghe gheleila nau ghe alokoi saela natuna ta Aisiki tale liu nighelei aiaavusuvusuena ateva tani tauela ta God. ²² Utara va, unna niaikaaiaa me voto ghe ghelei ghe kasukasu eitauaa. Me unna niaikaaiaa ghe masinala tale voto ghe gheleila. ²³ Me inangari tale Uru ngai Manga ateva ghe koronnala nau ghe uela va, “Abraham ghe atokala tuutulina ta God, liuna avalua o me God ghe aseala va ia ghulughuluena ia,” me laghe kolokoloa va kapuna ia God. ²⁴ Am tara va taumattu ngateva eghulughuluena poli voto eghelei, karika va eaikaaiaa nonga.

²⁵ Nim nongina Reiab aipae taita ia me God ghe aseala va ghulughuluena ia tale voto ghe gheleila nau ghe aitarala tau lloua akilakila atoa me ghe apasungaala katikirighi ppae salana me laghe usilainiela. ²⁶ Nongina

2:8: Mat 19:19; Gal 5:14. **2:9:** Diut 1:17. **2:10:** Lev 19:37; Nam 20:7-12, 24; Mat 5:19. **2:11:** Eks 20:13-14; Rom 13:9. **2:12:** Gal 6:2; Jms 1:25; 1 Pita 2:16. **2:13:** Mat 5:7; 18:32-35. **2:15:** 1 Jon 3:17. **2:18:** Gal 5:6. **2:21:** Aitiutiu 22:9-12. **2:22:** Hib 11:17-18. **2:23:** Aitiutiu 15:6; 2 Kro 20:7; Ais 41:8. **2:25:** Jos 2:1-21; Hib 11:31.

taumattu ngateva karika eaainoana, matena ia, liuna avalua o me arova niaikaaiiaa nonga me karika righi niuungu, isaa tee o voto matena.

3

Tani aitara ngamasina ramuramuti paa ateva

¹ Kapughu etoa, erau mene oroi iem lo atoa am anna va am tau ngai aapasunga, poli am kilakila va lo atoa ita aapasunga, aaisakeiaaita aue la tani kutumi emasina. ² Ita akapa ita gheelei asease voto sesa. Me arova teva taumattu etam gheelei voto sesa tale poppooaane, ia ghulughuluena ia me egheelei runga ngamasina akapa vilikina.

³ Nau eteva ita aasae tau lao biti eteva tale paa ooso ateva tani alooia kona eaa ita anna va elao, ita gheeleia va ia akapa ekirie see nongina ita aloanna. ⁴ Ita mene tara kateva aimatoongana tale anua ateva. Arongona ta namuu ia me kinatama kuukuu eteva ekuukuueinia, kapteni eteva enim aloalooa tale aialoalo atiulu ghaunaaili ia. ⁵ Nonginaaili ramuramuti paa ateva ghauna ia tale vilikiita me eaasake va erooro tani ghelei kinatama voto. Gharighi kuraa erooro tani ata teva kinatama tuvui. ⁶ Ramuramuti paa ateva tee kuraa ia, tanganueira ia sesa voto atoa. Etokatoka elome tale mene kasina voto tale vilikiita tani ghelei saasakiaa taumattu ngateva me eaatoka maamauluaane akapa tale kuraa atea me eGehenna eaarokoti kuraa atea etana.

⁷ Taumattu ngatoa la rooro tani ghelei isaa akapa ase ghaata kkena me ghila me llo erarraa me voto elamana la rooro tani gheleila la matukkale me la ghaitarainila ⁸ me karika teva taumattu erooro tani ghelei ematukkale ramuramuti paa ateva poli sesa ia, me karika erooro tani matua atoka, me ia pasu ia tale voto kaale erooro tani kaali emate taumattu.

⁹ Tale ramuramuti paa ateva ita tautau sae Vau ngepona ateva Tamaita ia, me ie nonga o ramuramuti paa ateva ita kaakasikiena taumattu etana, ila tee lo atoa tootoona ila God. ¹⁰ Tale ie nonga o paa ateva nitau sae me nikasikiena ekupikupi ghoa. Kapughu etoa, karika emene isaa avalua o. ¹¹ Am anna va manu maraange me manu uelane lalu rooro tani akala nonga tale kateae mata ngateo? ¹² Kapughu etoa, am anna va fig atea ai ia erooro tani kunea oliv, o uasa uaeni erooro tani kunea righi ue fig? Mata ngateo atea uelanna ia karika erooro tani ghelei righi manu va emaraange.

Alomasaanga ekasukasu epona liu

¹³ See alomasaanga nannaane etaimim? Eapasunga tale masi niuungu egheelei tale nisiuaa ninannaa. ¹⁴ Me arova nissa tee kateva poli ia ange apalaiola me nikuruetuna etokatoka tale urunguitaniimim, am rau mene aasakeaa isaa o voto ta am rau mene ghelei nikamekame tale voto koronna. ¹⁵ Isaa o ase ninannaa karika ekasukasu epona liu, ta pei tale kosa ateva me karika emaemae ta Spiriti eteva, ta kanna Satana. ¹⁶ Nau usessa tee kateva poli ia ange apalaiola me ukuukuruetuna, aue utara va voto eaaikasakasaliaa me asease voto sesa aue elutu.

¹⁷ Me alomasaanga ekasukasu epona liu, mata ngemua ateva voto etana, raarangisana, me ealoanna luei eteva, me enannaa mene kateva, me tani nongo mene katoa, me pasu ia tale nialousiusi me masi uenenna, me karika niaimassiaa etana me karika ekamekame. ¹⁸ Tau ngai ghelei luei etoa la pasapasa luei, me la mukemuke voto ghulughuluena.

4

Am tau ekapaiem lao ta God

¹ Sa ateva egheeghelei niaitunna me niaikiso elome etaimim? Karika am kilakila va ekasukasu tale aloannaaimim eaaiuvii tee masi ninannaa tale urunguitaniimim? ² Am aaloanna voto me karika am ghaaghaa, liuna avalua o me am aaiuvii emate. Am sassai me karika am rooroo tani ghaa voto am aloanna tani ghaa. Am aikiso me am aiuvii. Karika am ghaaghaa poli karika am kookolomi God. ³ Me nau am kokkolomi, karika am ghaaghaa, poli am kokkolomi tale sesa ninannaa, poli nau aue am ghaa aue am uunguaa tale aloaloannaaimim.

⁴ Am tau ngai lai sari etoa! Karika am kilakila va tani aikapukapuaa tee kosa ateva nitau ngai ssateena ia God? See io ualoanna va kapuna io kosa ateva, io aue utau ngai ssateena io God. ⁵ Am annaa va voto Uru ngai Manga ateva ghe auliaa va karika righi malloeanina? Eue va, “God eannangaili arova ita aimulusi teeia, me enannaa saasakiaa tee spiriti eteva ghe atokaiela ta ngetaita arova eusilaa uunguaa kosa ateva.” ⁶ Me God etautau mae oroieili maamasinaane etaita. Liuna avalua o me Uru ngai Manga ateva eue va,

“God karika poi ealoanna lo atoa la tautau sae nannaaira

me etautau lao maamasinaane ta lo atoa la siosioaa nannaaira.”

⁷ Liuna avalua o me am tau ekapaiem lao ta God. Am rati namu ngateva ta raroai etoa me aue eroo tani ilou vuliem. ⁸ Am lao akalakalaa ta God me aue emae akalakalaa ta ngetaimim. Am tau ngai ghelei ssavoto atoa, am ghelei eraarangisana maamauluaaimim, me lo atoa eghaaghalua nannaaimim, am ghelei eraarangisana urunguitaniimim. ⁹ Am alousiusi me am ngala. Me am lo atoa am kangkanga nau ghaine, am ruu tani kanga me am ngala me am ruu tani masimasi, me am alousiusi. ¹⁰ Am siuaa nannaaimim ta matane Vau ngepona ateva, me aue easaesae arariimim.

¹¹ Kapughu etoa, am rau mene auliaa saasakiaa tee mene kateva. Lo ateva eauliaa saasakiaa tee teva tuena o nengane nonginaaili va egheelei niaisakei etana, me arova eghelei evalua o eaauliaa saasakiaa tee tale inangari nipaopao me egheelei niaisakei etana. Me arova ughelei niaisakei tee tale uunguaa inangari nipaopao, me karika uaimuli tee, nonginaaili va io tau ngai ghelei niaisakei io. ¹² Kateva nonga etautau mae inangari nipaopao me egheelei niaisakei. Ie nonga erooroo tani asaangi me tturuu. Me io see etam me vara ughelei niaisakei ta lo atoa la tokatoka akalakalangina etam?

Tani aasakeaa nimanaa

¹³ Am nongo, lo atoa am ue va, “Ghaine o nimanaa ita lao tale teva masaliki taatara me ita laa toka kateae ninamanama, me ita ghelei niu-ungu tani ghaa viliki veu.” ¹⁴ Me karika am kilakila sa ateva aue elutu nimanaa. Vaalua tale maamauluaaimim? Nim nonginaaili asu emaemae karika masau me ekapakapa. ¹⁵ Me masina arova am nim ue va, “Arova aloaloannaane Vau ngepona ateva aue ita toka me ita ghelei llo voto.” ¹⁶ Am tautau sae nannaaimim me am aasake. Isaa akapa o ase niaasake sesaaili. ¹⁷ Liuna avalua o, lo ateva ekilakila voto masina tani ghelei me etam ghelei, egheelei voto sesa.

4:1: Rom 7:23. **4:4:** Rom 8:7; 1 Jon 2:15. **4:6:** Nitoka 3:34; 1 Pita 5:5. **4:7:** Ips 6:12. **4:8:** Sek 1:3; Mal 3:7; Ais 1:16. **4:10:** Job 5:11; 1 Pita 5:6. **4:12:** Rom 2:1; 14:4. **4:13:** Luk 12:18-20. **4:14:** Nitoka 27:1; Sams 39:5, 11. **4:17:** Luk 12:47.

5

Tue peipeiena atoa aue la ghaa aipoliira sesa

¹ Tue peipeiena atoa am nongo! Am alousiusi me am ngala, poli voto sesaaili ange maemae etaimim. ² Peimim oroi ange maamarokase me ane ateva enamanama ghinnaniimim. ³ Uneimim gol me silva ange rorroso, me rorrosoaaira aue aulia ngaotuem tale nau niaisakei, me aue enama vilikiimim arova kuraa atea. Am ghe atoka aitauaala peimim tale llo nau airuuruu. ⁴ Am tara! Aipoliira taumattu ngatoa am ghe tam polilala nau laghe uungula etaimim ange kolokolo anamuu sae ta Vau ngepona ateva, me kolokoloaaira lo atoa la mukemuke Vau ngepona ateva sarasarakanaaili ia ang ghe nongola. ⁵ Am ghe tokatoka tale kosa ateva tale masi nitoka, me am ghe kuukuruetuna tee masi tokatokaaimim, me am ghe mmoro teela ninamanama nonginaaili ghaata kkena ange ghaala nau eteva la uvi ematela. ⁶ Lo atoa taumattu ghulughuluena ila, am ghe aaliu teeila va laghe ghelei sesa, me am ghe uvi ematela llo taumattu karika ghe gheleila isaa o voto. Me karika toa laghe liula voto am ghe ghelei teeilala.

Ita rau mene mangoo nau ita ghaaghaa mmarikana

⁷ Liuna avalua o, kapughu etoa, me am rau mene mangoo tani toitoi lomosina ta Vau ngepona aue emae. Am tara vaalua tau ngai ghelei utana ateva etoitoi va kosa ateva esausi tani ghelei me umana voto ekuneaa masi voto me vaalua etam maamangoo tani toi vaoo ateva. ⁸ Am tee am rau mene mangoo me am tingina akorokorongana, poli maemaeane Vau ngepona ateva ange aakalakalaa. ⁹ Kapughu etoa, am rau mene ainguunguaa tee mene kateva ta am rau aisakei, poli tau ngai ghelei niaisakei eteva etiitingina ta paa ngatamana.

¹⁰ Kapughu etoa, am anna ngamasina uunguaane nitam mangoo tale nimmarikana, me am annaa propete atoa laghe aippooa tale ararina atea Vau ngepona. ¹¹ Am kilakila va ita taatara va niarangise tale lo atoa la tiitingina akorokorongana tani toitoi. Ngam ghe nongola vaalua Job ghe tam oghi vulula tani aiesoaa ta God, me ghe tarala sa ateva Vau ngepona ateva ghe taue lao sio tale airuuruu. Vau ngepona ateva pasu ia tale nialousiusi me eaaloanna tani aisausiaa.

¹² Me tale voto akapaaili, kapughu etoa, am rau mene ue va, “Arova akamekame, lo ateva epona liu eattara mataneaghi,” o, “Arova akamekame, lo ateva eaaitaraa kosa ateva eattara mataneaghi,” o mene righi ase voto. Llo erooroo va, am ue va “ue” etana, am ue va “ue” etana. Me llo karika, am ue va “karika” etana, God erau ghelei niaisakei etam.

Nilooloo sae tale niaikaaiiaa

¹³ Lo ateva etaimim etokatoka tale nau sesa, erooroo tani looloo sae. Me lo ateva emasimasi euei righi kkinari tani kkauaa God. ¹⁴ Lo ateva etaimim eiisiki, ekolo elda ngatoa tale ale manga, me la looloo sae etana me la kao oeli tale ararina atea Vau ngepona ateva. ¹⁵ Me nilooloo sae tale niaikaaiiaa aue eghelei emasina tau ngisiki eteva, me aue Vau ngepona ateva etotua, me arova ghe gheleila righi sesa voto, God aue ekkaluaa. ¹⁶ Liuna avalua o me am aulia ngaotu sesa gheleiaaimim ta mene katoa me am looloo sae ta God mausi mene katoa, me aue am masina. Unna nilooloo sae ghulughuluena ateva taumattu sarasarakanaaili me erooroo tani ghelei voto.

5:2: Mat 6:19. **5:4:** Diut 24:14-15. **5:5:** Luk 16:25. **5:7:** Jer 5:24; Diut 11:14. **5:8:** Rom 13:11-12; 1 Pita 4:7. **5:11:** Eks 34:6; Job 1:21-22; 2:10; Sams 103:8. **5:12:** Mat 5:34-37. **5:14:** Mak 6:13. **5:15:** Mat 17:18-20.

¹⁷ Elaija nim taumattu ia nongina ita me ghe nim looloo saela va erau mene vaoo, liuna avalua o me ghe tam vaoola ghe roola kotoluae ninamanama me ghaonomo ulana. ¹⁸ Ghe mene looloo saela me epona liu ghe tau sio mae vaoo ateva me kosa ateva ghe apinosala voto laghe pasapasa.

¹⁹ Kapughu etoa, arova teva etaimim eoghi vulu voto koronna me lo ateva emene ghaa oghie mae, ²⁰ etani kila va, see ia lo ateva emene ghaa oghi lo ateva sesa gheeleiaane, me eoghi vulu salana sesa, eaasaangia tale nimate me eaakou oroianaaili sesa voto.

Aitiutiu etikirighi uru ngai Pita ghe pitila Inangari emuemua

Apostolo ateva Pita ghe pitila ia oia uru ngai etikirighi ta tau ngaiesoa ngatoa laghe tokatoka tale pai not me pai nge sinaka esuu tale patunganua namu ngateva ghaine ita aseasea va Teki. Laghe ghaaghaa nimmarikana mausi inangarina ateva God. Pita ghe auliaala etaira va la rau mene soghiaa nau eteva la ghaaghaa nimmarikana, poli Iesu tee ghe ghaala nimmarikana, me lo atoa la aimuli teeia aue la tani ghaa nimmarikana tee. Pita ghe auliaala va la tani masimasi me toi Iesu nau la ghaa nimmarikana, me la rooro tani ppooaa masi kiukiu ta mene katoa. Me tee, ghe auliaala oroi inangari niloeloe tale maamauluaaira lo atoa la aiesoaa.

Tani kila amuemua

Aitiutiu tale inangari 1:1-2

Kapuna atoa God: la saanga, manga, me la uungu nongina pristi etoa 1:3-2:10

Tokatokaaira kapuna atoa God tale kosa ateva oia 2:11-4:11

Ale manga ateva me elda ngatoa 4:12-5:11

Nimasimasi me airuuruu 5:12-14

¹ Aghi Pita, kapuna apostolo ieghi Iesu Karisto, apitipiti uru ngai etikirighi oia etaimim kapuna taumattu ngatoa God, ghe suimatoongainamla, me ngam tokatoka see nongina va ativuu etoa tale provinsi etoa ePontus, eGalaisia, eKapadosia, eEisia me eBitinia. ² God Tamaita ia emua arau ghe kilaiemla me ghe suimatoongainamla, me kapuna Spiriti eteva ghe gheleiemla am ghe mangala. Liuna avalua o me am ghe nongo usilainiela me raena ateva Iesu Karisto ghe ghelei eraarangisanaiemla.

Aloolo sae va God aue etau aatu maamasinaane me luei eoroi etaimim nau ekapaaili.

Kinatama niasaangi eteva

³ Ita kaili emasina ta God Tamana ia kapuita Vau ngepona ateva Iesu Karisto. God ghe totula Iesu Karisto tale nimate. Tale ia o nitotu eteva, me mausi kinatama alousiusiaane ateva, ghe tau mae sio nilutu ppae me ita rooro tani taatara lao emua ⁴ tale masi voto pasu tale niarangise God ghe aimonomosiaala etaita. Isaa o voto isaa epona liu, karika erooro tani mauu, karika erooro tani poka, me karika erooro tani kapa. ⁵ Poli tale kaluimim niaiesoaa, God eaaitarainam tale sarasarakaniaane lomosina ta am ghaa ia o niasaangi eteva, eaaimonomosiaa tani apasungainia tale airuuruu tale nau. ⁶ Tale isaa oia voto masimasiaaimim enamungaili, arongona ta karika tani aluse nau am ghe soula nimmarikana tale asease nitootoonga. ⁷ Golo ateva la tootoongia tale kura tani tara va golo nonga ia. Tale isaa o salana nitootoonga etootoonga uneimim niaikaaiiaa, maamasinaane elaulau maamasinaane golo, ta poli golo ateva aue ekapa. Liuna avalua o me poli am aiesoaa ta God, aue God etau aatu nitau sae, ninamuu me nioneoneaa nau Iesu Karisto aue ekauerekati. ⁸ Arongona ta karika am ghe taraiela, am aaielousieinia, me arongona ta karika am

1:2: Rom 8:29; 2 Tes 2:13. **1:4:** Kol 1:12. **1:5:** Jon 10:28; 17:11. **1:6:** 1 Pita 5:10; Jms 1:2.
1:7: Nitoka 17:3; Sek 13:9; Mal 3:3; Jms 1:3. **1:8:** Jon 20:29; 2 Ko 5:7.

taataraiia nau oia, am aiesoaa ta ngetana me pasu iem tale lo ateva o kinatama nimasimasi mata nginangari karika erooroo tani aulieinia. ⁹ Poli God aue easaangiem, liuna avalua o me am ghe aiesoaala ta Karisto.

¹⁰⁻¹¹ Propete atoa laghe aulia ngamuemuela maamasinaane God tani asaangiem. Spiriti eteva ta Karisto elome etaira ghe poppooa ngaotu ase nimmarihana Mesaea aue eghaa, me kinatama voto evira mene lutu, me propete atoa laghe paepae aanasaaili tani kila va eaauliaa see me lovisa. ¹² God ghe apasungaala ta propete atoa va isaa o voto laghe ppooaala karika mausiira ta mausiimim. Me God ghe tau sio mae Spirit Manga ateva epona liu, me tale sarasarakaniaane Spirit Manga ateva, tau ngai ppooa ngatoo tale masi kiukiu ngila ghe auliaala etaimim isaa oia voto God ghe gheleila. Ensolo tee atoa la aloannaaili tani ghaa alomasaanga tale masi voto God ghe gheleila etaita.

Am manga

¹³ Isaa avalua o me am aipanipaniaa nannaaimim me am aikinikinitaa tee poppooaaimim me tokatokaaimim. Am aiesoa ngasarakanaaili tale isaa o voto God ealoanna tani tau aatu nau eteva Iesu Karisto emae. ¹⁴ Am tani nongo usilaa God. Emua arau nau ta am ghe tam kila amasina salane God, am ghe uusilaa sesa ninannaa. Karika am mene aimuli tee isaa o sesa voto. ¹⁵ God ghe koloamla, ia manga ia. Liuna avalua o me am manga. Am ghulughuluena tale gheleiaaimim me tokatokaaimim. ¹⁶ Ta Uru ngai Manga ateva eauliaa va, “Am manga, poli aghi manga aghi.”

¹⁷ Ta poli am koloa va Tamaimmi ia me egheelei niaisakei ghulughuluena ta kateva kateva taumattu tale uunguairaa, am oneoneaa tee God tale tokatokaaimim, nau am toka tale tokatokaaimim va am nongina lo atoa ativuua ila tale kosa ateva oia. ¹⁸ Am ghe kasukasu tale salana karika righi malloeana ghe tiuaala ta tuvuumim atoa, me God ghe asaangiemla tale isaa o salana. Me am kilakila va karika ghe poliemia tale isaa tee o voto esesa nongina silva o golo, ¹⁹ ta ghe poliemia tale raena ateva Karisto, aipolina namungaili, nongina sipsipi erighi karika vereverena ia me karika righi kulukulutana etana. ²⁰ God ghe suimatoongainiela mua, me auena aitiutiu tale kosa ateva, me tale airuuruu oia nau God ghe apasunga ngaotuela mausiimim. ²¹ Ta ngetana am ghe aiesoala ta God, ia ghe totuela tale nimate me ghe asaesaala ararina atea, liuna avalua o kaluimim niaikaiaia me tuutuliimim am ghe atokala ta God.

²² Nau am ghe nongo usilaala voto koronna, am ghe ghelei er-aarangisanaiemla tale kaluimim ssavoto ta matana God, me am apasunga koronna niaielousi ta mene katoa kapuimim nonginaaili va tue me nenga am. Liuna avalua o me am aielousi ekoronna tale urunguitaniimim nau ekapaaili etoa. ²³ Poli tale inangarina ateva God mauue ia me tokatoka liu ia, am ghe lutu ppaela, karika va nongina katu ue ngai eteva emammate, ta nongina lo ateva katu ue ngai karika emammate. ²⁴ Nongina Uru ngai Manga ateva eue va,

“Taumattu ngakapa atoa nim nonginaaili rarrasa ateva,
masi taatarairaa nongina pusi ngai eteva;
rarrasa ateva emaamalle me pusi ngai eteva ekaakatuu,

1:10-11: Mat 13:16-17; Sams 22:1-31; Ais 53:1-12; Luk 24:26-27. **1:14:** Rom 12:2; Ips 2:3; 4:17-18.

1:16: Lev 11:44-45; Mat 5:48. **1:17:** Rom 2:11; Aotu 2:23. **1:19:** Apos 20:28; Hib 9:12-14.

1:20: 2 Tim 1:9-10; Ips 1:4. **1:21:** Jon 14:6; Rom 5:1-2. **1:22:** Jon 13:34; Rom 12:10. **1:24:**

Ais 40:6-8.

²⁵ me inangarina ateva Vau ngepona ateva etokatoka nau ekapaaili etoa.”
Isaa o inangari, masi kiukiu laghe auliaala etaimim.

2

¹ Liuna avalua o me am sau velu ekapaaili sesa ninannaa tani ghelei saasakiaa tee mene kateva, me karika am mene kamekame me tani usimaghalua me tani annaa saasakiaa tale taumattu oroi peiira me tani auliliaa. ² Nonginaaili lutu ngaliki etoa la vira lutulutu, la aloannaaili tani ssu, am tee am aloannaaili tani ssu rarumi ssu eteva raarangisanaaili ia kanna ia God, nau am ssu etana, aue am pinosa me aue aikaiaaimim ematuenna lomosi ta nau God easaangiem. ³ Isaa oia ngam ghe namunamuaala va Vau eteva masina ia.

Atu eteva mauhue ia me taumattu God ghe suitoongaala

⁴ Am mae ta Vau eteva, ia atu eteva etautau aatu mauhue — taumattu ngatoa laghe ratiela me God ghe suimatoongainiela poli ia masinaaili gheegheleiaane ta matane God — ⁵ am tee nonginaaili va atu etoa mauhue ila, God eatuutuluem va am nongina ale manga ateva, me am nongina pristi etoa manga ila, la ghelei aiaavusuvusuena tani amasimasi God, tale ararina ateaie Iesu Karisto. ⁶ Ta poli Uru ngai Manga ateva eue va,
“Aghe atokala atu eteva eSaeon,

ia aghe suimatoongainiela me masinaaili ia, me aitiutiu ia tale atu ekapa atoa tani suei ale ateva,

me lo ateva taumattu eatoka tuutulina etana karika aue etoka tale nipalata.”

⁷ Ta lo atoa am aiesoaa, ia oia atu eteva masinaaili ia, me ta lo atoa karika la aiesoaa, Uru ngai Manga ateva eue va,

“Ia o atu eteva tau ngai atulu ale atoa laghe ratiela
ie nonga o atu eteva esuusuei ale ateva.”

⁸ Me emene ue va,

“Ia o atu eteva eghelei taumattu etuttukainila,
me eghelei ekatungila.”

La kaakatuu poli la tam nongonongo usilaa inangari, poli God ghe tau vellala va la lao avalua o tale aloannaaira.

⁹ Me am, karika va am avalua o, am taumattu ngatoa God, ghe suimatoongainamla va pristi iem tani uungu ta kingi eteva, God etana. Anue manga am, me taumattu ngatoa kapuna am God va aue am aulia ngaotu nitau sae ta lo ateva ghe kolo veluemla tale saurrom tani mae tale masi mallangina ateva. ¹⁰ Isaa to nau karika va kapuna taumattu iem God, me isaa oia nau ang ghe kapuna iemla. Isaa to nau karika am ghe ghaala alousiusiaane God, me isaa oia nau ngam ghe ghaala alousiusiaane.

Tau ngai uungu etoa ta God

¹¹ Masi kapughu etoa, poli am ativuu iem tale kosa ateva oia, aghaaulia ngasarasarakana va am alekalekaiem tale uunguaa ninnaa ssavoto, isaa o voto eaaiuvii tee nannaaimim. ¹² Nau am toka tee taumattu ngeleka atoa, am toka tale masi nitoka, me nau la ghaauliaa teeiem va am ghelei voto sesa, aue la tara masi uunguaaimim me la tau sae God, nau eteva emae taraiem.

2:1: Ips 4:22; Jms 1:21. **2:3:** Sams 34:8. **2:5:** Ips 2:21-22; Aotu 1:6. **2:6:** Ais 28:16; Ips 2:20. **2:7:** Sams 118:22. **2:8:** Ais 8:14. **2:9:** Diut 7:6; 14:2; Ais 9:2; Tts 2:14; Apos 26:18; Ips 5:8. **2:10:** Osea 2:23. **2:11:** Gal 5:17, 24. **2:12:** Mat 5:16.

¹³ Mausi Vau ngepona ateva, am nongo usilaa lo akapa atoa taumattu matuutuliena ila, nongina kingi eteva poli matuutulienaane isaaili epona, ¹⁴ me ta gavana ngatoa, poli king ghe suitoongainilala tani laa ghelei saasakiaa lo atoa la ghelei sesa voto, me tani oneoneaa lo atoa la ghelei voto masina. ¹⁵ Poli aaloannaane God va, poli am ghelei voto masina, am roo tani ghelei runga sesa inangariira alokapakapa atoa. ¹⁶ Am toka nongina va lo atoa taumattu la tokatoka tale aaloannaaira me la ghelei masi voto. Me karika am mene ghelei ia o ase nitoka ateva tani akou runga voto sesa, ta am toka ta aloannaane God. ¹⁷ Am apasunga masi nioneoneaa ta taumattu ngakapa atoa. Am aielousiaa lo atoa am aaiesoa ngaitauaa me ila, am matauta God me am oneoneaa kingi eteva.

Niaimatoonga tale nimmarikana Iesu ghe ghaala

¹⁸ Tau ngai uungu etoa karika am tokatoka tale aloaloannaaimim, am tauem lao ta vauimim atoa tale isaa akapa ase nioneoneaa, karika va lo atoa nonga masina ila me gheeleiaaira saghuighuina, ta lo atoa tee karika masina ila. ¹⁹ Nau katoa la ghelei voto karika masina etam arongona ta ughelei masi voto ukilakila va God eaaloanna, God aue emasieinio. ²⁰ God karika aue earangiseiem arova am ghaaghaa nimmarikana mausi am ghelei voto sesa. Ta aue earangiseiem arova am ghaaghaa nimmarikana mausi am ghelei voto masina. ²¹ Tale isaa oia voto God ghe koloamla poli Karisto ghe ghaala voto mmarikanaaaili mausiimim, ghe alokoila niaimatoonga ngateva, va am tani aimuli usi tee liu kasukasuaane.

²² “Karika ghe ghelei poila righi ssavoto,

me karika righi inangari nikamekame ghe kupi ghoa mae ta paane.”

²³ Nau eteva laghe auliaa teeia asease inangari etoa, karika poi ghe liuliu; nau ghe ghaaghaa nimmarikana, karika poi ghe aapasunga va eliu. Ghe tau lao sio isaa o voto ta God, poli God eghelei niaisakei ghulughuluena.

²⁴ Nim ia nonga ghe saula gheeleiaaita sesa tale vilikina tale ai eteae; mausina avalua o ita rooroo tani kasu vuli sesa voto me ita lao tale niuungu ghulughuluena; poli tale usai ghe ghaala, am ghe masinala. ²⁵ Poli am ghe nonginala sipsipi etoa karika la kilakila va eaa la laolao, me isaa oia angam ghe oghi mae sio ta kapuimim Tau ngai toitoi eteva ia eaaitarainiem.

3

Lailai etoa

¹ Tale ia o salana atikirighi, am vause atoa lailai iem, am tani nongo usilaa taitaniim atoa. Me arova katoa tale ila o taita atoa karika la aikaaiaa tale inangarina God, karika va tale inangariimim, ta tale masi ghegheleiaaimim aue egheleila me la aikaaiaa, ² poli aue la tara vaalua masi uunguaaimim raarangisana me nioneoneaa tale tokatokaaimim. ³ Am rau mene nnangaili tani amolumolu vilikiimim va emasinaaaili taatarane, nongina am ghelei tale uu nguruimim, me nongina asease vurra atoa am aamolumolu vilikiimim, me tale masi ghinna atoa am aasaela, ⁴ ta am anna tani amolumoluem, ghele masina arova am ghele amolumolu elome etaimim tale uunguaa niaimasiaa me nisioaa nannaa, poli isaa o ase niuungu masinaaaili ta matane God me karika aue ekapa. ⁵ Tale isaa o salana, emua arau vause atoa manga ila laghe ghelei emasinaaaili taataraira. Laghe aatoka tuutuliira ta God, me laghe aaimuli usi tee saa voto taitaniira atoa

2:13: Tts 3:1. **2:15:** 1 Pita 3:16. **2:17:** Rom 12:10. **2:18:** Ips 6:5. **2:20:** 1 Pita 3:14, 17.
2:21: Mat 16:24; Jon 13:15. **2:22:** Ais 53:9. **2:23:** Ais 53:7; 1 Pita 3:9. **2:24:** Rom 6:11; Ais 53:5-6. **2:25:** Esik 34:5-6; Mat 9:36; Jon 10:14; Hib 13:20-21. **3:1:** Ips 5:22. **3:3:** 1 Tim 2:9.

laghe aauliaa. ⁶ Nim nongina Sera ghe nongo usilaala taitanna ateva ta Abraham, me ghe kolokoloa va vauna ia. Am tee aue natuna vause iem arova am ghelei voto masina, me karika aue am matauta saa voto pei nimatauta.

⁷ Tale ia o salana atikirighi, am taita atoa lailai iem, am tani oneonea vauseniim atoa. Am ghelei emasina ta ngetaira nau am tokatoka aitauaa, poli sarasarakaniaaimim elaulau sarasarakaniaaira, me poli amalua aitauaa, amalu ghaaghaa maulue ta God, arova ughelei emasina etana, karika teva voto aue eghelei runga kalum nilooloo sae.

Nimmarikana mausi masi niuungu

⁸ Tani ruu, am akapaaili gheegheleiaaimim me ateateaaimim ekateva nonga ia. Am aielousi nongina va tue me nenga atoa, me am annaa mene katoa me am sioaa nannaaimim tee kateva kateva etaimim. ⁹ Am rau mene liu sesa tale sesa voto o inangari nilakolako tale inangari nilakolako; ta am liu tale niarangise, poli God ghe koloamla tani ghelei isaa o voto, me aue am ghaa niarangise. ¹⁰ Poli Uru ngai Manga ateva eue va,

“Marova lo ateva taumattu ealoanna va maamauluaane emasina me etoka liu, etani aitaraa ramuramuti paana ateva tale sesa voto me tee musiki paane tale inangari kamena.

¹¹ Me etani oghi vulu sesa voto me eghelei masina; euungu aanasa tani atoka luei me esarasarakana tani toka tale luei.

¹² Poli matane Vau eteva eaatoka ta ghulughuluena atoa taumattu me talingane enongonongola nau la looloo sae, me eliuliu vilina ta lo atoa la ghelei sesa voto.”

¹³ See aue ealoanna tani avakovakoam marova am annaaili tani ghelei masi voto? ¹⁴ Me marova am ghaaghaa nimmarikana tale voto masina, aue am ghaa niarangise. Nongina Uru ngai Manga ateva eue va, “Am rau mene matauta saa llo la maamatauta; am rau mene matautu.” ¹⁵ Ta elome tale urunguitaniimim am atoka Karisto va ia Vau palepale ia. Arova teva taumattu ekookolomio tani tau lao saa malloeane unem niaikaiaa uatoka tuutulim etana, uaimonomosiaa tani liu etana nau ekapa atoa. ¹⁶ Ta am ghelei tale nisama saghuighuena me nioneonea. Nau ekapa atoa, am ghelei voto am kilakila va masina, poli am aloanna va lo atoa la poppooaa saasakiaa tale masi uunguaaimim ta Karisto aue la palata mausi inangariira la poppooaa teeiem. ¹⁷ Emaamasina, marova aloannaane God, va ita ghaa nimmarikana tale voto ita ghelei masina me karika va ita ghaa nimmarikana tale voto ita ghelei sesa. ¹⁸ Poli Karisto ghe matela tale isaa akapaaili ssavoto katengaata nonga, Iesu ghulughuluena ia ghe matela ta lo atoa karika ghulughuluena ila, tani taula lao ta God. Ghe matela, me Spiriti eteva ghe mene taula maulue etana. ¹⁹ Ta Spirit eteva ghe lao tee sio tale ale mata voovoo me ghe ppooaala tale spiriti etoa ²⁰ laghe tam nongo usilaala emua arau nau God ghe kaarasila tani toitoi me karika ghe turungilala lomosina ta Noa ghe atulula aka ateva, me manu ghagga ateva ghe ghailala. Tale aka ateva karika oroi taumattu ghe saangala tale manu ghagga ateva, nim ghaoalu (8) nonga. ²¹ Me ia oia manu eteva eaaimatoonga niaasuu eteva, ghaine am tee am ghaaghaa niasaangi etana — karika va tale nighaa velu kulukulutana tale vilikiita, ta niaasuu eaimatoonga inangari nialokoi ita ghelei ta God ekasukasu tale urunguitaniita. Ghe asaangitala

tale nitotu eteae ta Iesu Karisto, ²² ang ghe saela epona liu me etokatoka tale pai muenna ativilau ta God, ia ghe gheleila Karisto va eaitoiaa ensolo atoa me spiriti etoa elomarase.

4

Tani toka ta God

¹ Liuna avalua o, poli Karisto ghe ghaala nimmarikana tale vilikina, am tee am tani poso parasi ia o ase ninanna ngateva nongina ia ghe gheleila, poli lo ateva ang ghe ghaala nimmarikana tale vilikina, karika emene tokatoka tale uunguaa ssavoto ateva. ² Nau ekapa atoa, am tau ekapa lao tokatokaaimim tale aloaloannaane God me karika va tale sesa aloaloannaaimim. ³ Isaa to nau ang ghe lao sio ang ghe ssoiemla tani uunguaa asease voto atoa taumattu ngeleka atoa la aaloannaaili tani ghelei. Maamauluaaimim am ghe nim anna tani ghelei sesa voto, me tani nnaa nonga uunguaa niailai salosalooa, me tani ropi sesa manu, me tani ghelei kinatama ninamanama atoa la ghaalutu ssavoto, me kinatama nivelu eitauaa tani ropi sesa manu, me tani kkaua goto atoa kamena ila me karika poi masina ila. ⁴ Me ghaine taumattu ngeleka atoa angila ghe soghiaala tani tara nau karika am mene laolao aitauaa teeila tale isaa o ase voto karika masina, liuna avalua o me la auliaa teiem. ⁵ Me am tani nnaa parasi va aue la tingina emua ta matane God, me ia aue eghelei niaisakei ta taumattu ngakapaaili etoa, maulue atoa me matena tee atoa. ⁶ Liuna avalua o me lo atoa ngila ghe matela ila tee ngila ghe nongola masi kiukiuna, arongona ta vilikiira ang ghe matela, nongina taumattu ngakapa atoa la tani mate, me kapuira spiriti etokatoka tee God.

⁷ Airuuruu tale voto akapa ange kalakalangina. Liuna avalua o me nannaaimim emasalike, am aaitarainam tani ghelei ghulughuluena voto me aue am roo tani looloo sae amasina. ⁸ Tale isaa akapaaili voto am kaarasi tani aielousiaa kateva kateva etaimim, poli niaielousi eteva eaakou oroieili ssavoto. ⁹ Am aikoloaa taumattu tani mae tanganueimim, me am rau mene uessaa. ¹⁰ God ghe tau aatu sio ta kateva kateva etaimim voto kanna Spiriti eteva, tani uungu ta mene katoa taumattu tani aisausia tale asease salana, tani apasunga ngaotu maamasinaane God ta mene katoa. ¹¹ Arova teva taumattu uunguaam tani ppooaa, uppooaa nongina va lo ateva eaauliaa inangarina ateva God. Me arova see ughuungu ta katoa, ughuungu tale sarasarakana God etautau aatu, poli ita aloanna va tale isaa akapaaili voto, taumattu ngatoa aue la tau sae God mausi Iesu Karisto. Ita rooroo tani oneoneaa Iesu poli sarasarakaniaane etokatoka liu, koronna.

Nimmarikana tale tau niaiesoa ngatoa

¹² Masi kapughu etoa, karika am mene soghiaa isaa o nitotoonga mmarikanaaili am mamarikana tee, nonginaaili va isaa o voto ouna. ¹³ Karika, ta am masimasi ta am tee am usiisi tani ghaa nimmarikana ta Karisto, liuna avalua o me aue am pasu tale nimasimasi nau eteva emae tale sarasarakaniaane. ¹⁴ Arova la avakovakoam mausi ararina ateaee Karisto, niarangise etaimim, poli kapuna Spiriti eteva God sarasarakana ia etokatoka ta ngetaimim. ¹⁵ Arova ummarikana, karika ughaaghaa mmarikana poli uaaiuvi emate, o tau niainao io, o mene righi ase talo nissangaliki, o nongina ase niaikkisiaa. ¹⁶ Isaa avalua o me marova ughaa

4:1: Rom 6:2, 7. **4:3:** Ips 2:2-3. **4:5:** Apos 10:42. **4:7:** Rom 13:11-12. **4:8:** 1 Pita 1:22.
4:9: Hib 13:2. **4:10:** Rom 12:6-8. **4:13:** Apos 5:41; Jms 1:2; 1 Pita 1:6-7. **4:14:** 1 Pita 2:20.

nimmarikana poli uaaiesoaa, urau mene palata, ta utau sae God poli la kilakila va io kapuna io Karisto. ¹⁷ Poli nau niaisakei ang ghe tiuaala, aue etiuua ta natuna atoa God; me marova etiuua etaita, aue esesaaili ta lo atoa la tam nongonongo usilaa masi kiukiuna God. ¹⁸ Me, nongina Uru ngai Manga ateva eue va,

“Marova aanasa ta tau ghulughuluena atoa tani saanga, aue vaalua ta lo atoa la tam oneoneaa poi God, me tee ta tau ngai ghelei ssavoto atoa, ila tee, vaalua aue la saanga?”

¹⁹ Lo atoa la ghaaghaa nimmarikana poli la aaimuli tee aaloannaane God, la tani tau vella lao ta lo ateva ghe gheleilala, poli eghelei voto ghe uela va aue eghelei, me la toka ghelei nonga masina.

5

Tani aitaraa kiena sipsipi etoa God

¹ Me isaa oia, inangari niaisausi eatuetu etaimim namu ngatoa am muemueaa ale manga atoa, aghi tee namu ngaghi. Aghe tarala ta mataghi vaalua Karisto ghe ghaala mmarikana, me am me aghi aue ita ghaaitauaa sarasarakana me nioneoneaa tee Karisto nau ekauerekati. ² Am aitara ngamasina sipsipi etoa God ghe tau aatu sio etaimim tani aitaraa. Am aitarainila poli aloalonnaaimim tani aitarainila me tale nimasimasi, nongina aloannaane God, me karika va la suusulungiem. Me karika va mausi viliki veu, ta poli am aloannaaili tani sausi. ³ Am rau mene ghelei nongina va lo atoa arariira, ta am tau ngaimatootoonga etaira. ⁴ Me nau namuu tale tau ngaitoi sipsipi etoa ekauerekati, aue am ghaa kou nguru eteva mallangina karika aue ekapa.

⁵ Aliko taita atoa, tale ia nonga o salana atikirighi, am nongo usilaa kapuimim taita namu ngatoa. Me am akapanaaili am ghaa uunguaa nisioaa ninannaa tee mene kateva kateva, poli Uru ngai Manga ateva eue va,

“God karika poi ealoanna lo atoa la tautau sae nannaaira, me eaapasunga maamasinaane ta lo atoa la siosioaa nannaaira.”

⁶ Liuna avalua o me am sioaa nannaaimim ta God sarasarakanaaili ia tani sausiem, me God aue easaesaeam tale ia o nau eteva ealoannaia.

⁷ Isaa akapaaili uneimim nimoia me maate am taula ta ngetana poli ia eaaitarainam.

⁸ Am nanna ngamasina me am taatara amasina poli Satana aissateeimim ia ekasukasu ekapa see arova laeoni eteva engoongo atingina me epaepae teva tani nama. ⁹ Am tiu velua me am tingina akorokorongana tale uneimim niaikaiaa, poli am kilakila va lo akapa atoa tale kosa ateva la ghaiesoaa ta Iesu la ghaaghaa ie nonga o ase nimmarikana ateva.

¹⁰ Tale kinatama maamasinaane God, ghe koloamla va am ghaa aitauaa nioneonea ngateva tokatoka liu ia ta Karisto. Me nau am ghaa nimmarikana tale nau karika aluse, aue emene ghelei rooroaa me aue eghelei emasinaaili uunguaane etaimim tani atingina akorokoronganaiem, me easarasakanaiem. ¹¹ Alooloo sae va ta ngetana sarasarakana tale isaa akapaaili nau. Koronna.

Airuuruu tale inangarina Pita

4:18: Nitoka 11:31. **5:2:** Jon 21:15-17; Apos 20:28. **5:3:** 2 Ko 1:24; Plp 3:17; Tts 2:7. **5:5:** Nitoka 3:34; Ips 5:21; Jms 4:6. **5:6:** Mat 23:12; Luk 14:11; Jms 4:10. **5:7:** Mat 6:25-30. **5:8:** 1 Tes 5:6. **5:9:** Ips 6:11-13; Jms 4:7.

¹² Tale saasausiaane Saelas,* akolokoloa va kapuita ia, me arooro tani atoka tuutulighi etana, aghi aghe piti atu sio etaimim ia oia uru ngai etikirighi karika aluse ia, tani asarasarakanaiem me tani aulia ngaotu va ia oia maamasinaane ateva God koronna ia. Am tani tingina akorokorongana etana.

¹³ Tau ngaiesoa ngatoa tale ale manga atoa eBabilon,† God ghe suima-toongainilala teeiem, laghe suula masimasiaaira etaimim, me tee natughu eteva ta Mak ghe suula masimasiaane etaimim. ¹⁴ Am sou kateva kateva tale niaielousi.‡

Alooloo sae va luei aue etoka ta ngetaimim akapa, lo atoa am ta Karisto.

5:12: Apos 15:22, 37-40; 12:2, 25; 13:13. * **5:12:** Tale inangari nge Grik, Silvanus. **5:13:** 2 Tim 4:11; Apos 12:2. † **5:13:** eBabilon Malloeana va Rom, ta Rom ghe aitoiaa kosa ateva tale isaa o nau. ‡ **5:14:** tale niaielousi Tale inangari nge Grik, tale niaingusu eteva tale niaielousi.

Aiaaghaluene atikirighi uru ngai Pita ghe pitiela Inangari emuemua

Aiaaghaluene atikirighi uru ngai Pita ghe pitiela eaauliaa tee gheeleiaaita tau ngaiesoa ngatoa tale kosa ateva oia. Ghe aulia ngakorokorongana ta tau ngai aapasunga ngatoa kamena ila, va aue God eturungila. Ghe auliaala tee maemaeane Iesu.

Tani kila amuemua

Aitiutiu tale inangari 1:1-2

Tokatokaaira kapuna atoa God 1:3-21

Niaulia ngatootoonga tale tau ngai aapasunga ngatoa kamena ila 2:1-22

Maemaeane Iesu 3:1-16

¹ Aghi Saemon* Pita, tau ngai uungu me apostolo ieghi ta Iesu Karisto, Apitipiti atu etaimim lo atoa aikaaiamim nonginaaili aikaiaaimami. Am ghe ghaala ia o niaikaia ngateva tale ghulughulueniaane Iesu Karisto, kapuita Goto ia me tau ngai asaangiita ia.

² Aloo sae va God aue etau aatu maamasinaane me luei epasu etaimim poli ngam ghe kila amasinaailiila God me Iesu kapuita Vau eteva.

Tani pinosa tale aalomasaanganiaane God

³ God ghe kolotala tale kinatama sarasarakaniaane ateva me maamasinaane, me ita kilakilaia. Tale sarasarakaniaane ghe tau mae sio isaa akapaaili voto ita tuutukuna etana tani asarasarakana maamauluaaita me ita rooro tani usilaa salane God. ⁴ Tale ia o salana atikirighi ghe tau mae sio kinatama inangari nialokoi etoa tani nim tau mae masi voto etaita. Isaa oia inangari nialokoi erooro tani gheleiem me am toka tale gheeleiaane God me am apala sesa voto emaemae tale nannaa taumattu tale kosa ateva oia me eghelei saasakiaa urunguitaniira.

⁵ Mausina avalua o aghaauliaa etaimim va, poli ngam ghe aiesoala ta Karisto, am uungu esarasarakana tani masi taumattu, me tee am uungu esarasarakana tani kila God me sa ateva ealoanna va am gheleia, ⁶ me tani apala sesa aloannaaimim, me am toka akorokorongana tale sesa nau, me tani usilaa salane God, ⁷ me am aielousi nongina tue me nenga atoa, me tani aielousiaa tee taumattu ngakapa atoa. ⁸ Me arova am ghaa isaa o masi voto me la pinosa aoroi etaimim, aue la gheleiem va aalomasaanganiaaimim ta Vauita ateva Iesu Karisto karika aue nim peisaane, ta aue ealutu masi uene. ⁹ Me arova isaa o voto karika ta teva taumattu, ia o taumattu ngateva nongina llo taumattu taataraane tukuna, o nongina mata salusalu eteva ang ghe aikkaluaala va God ang ghe ghelei eraarangisanaiela tale kanna ssavoto. ¹⁰ Liuna avalua o me, kapughu etoa, am tani aitokaa tani kilaaili va God ghe koloamla me ghe suimatoongainamla. Poli arova am ghelei isaa o voto, karika aue am katuu. ¹¹ Me aue la masimasi tani souem tani kupi sso tale ararimangalina ateva Iesu Karisto, Vauita ia me tau ngai asaangiita ia, ia aue kingi nau ekapa atoa.

Inangari niaulia ngamuemue tale Uru ngai Manga ateva

* **1:1:** Tale inangari nge Grik, Simion. **1:6:** Gal 5:22-23.

¹² Mausina avalua o me, arongona ta am kilakila isaa o voto me am tiitingina akorokorongana tale voto koronna ghaine isaa etaimim, aue amene toka auliaa kieimim tale isaa o voto. ¹³ Aghannaa va masina tani mene aravaiem nau maulue ieghi, ¹⁴ poli akilakila va ghaisa ngarighi amate, nongina Vauita ateva Iesu Karisto ghe aulia ngamasalikaala etaghi. ¹⁵ Me aue atootoonga tani uungu esarasarakana tani tara va nau eteva karika ieghi, aue am roo tani nnaa isaa oia voto.

¹⁶ Nau ami ghe auliaala etaimim sarasarakaniaane Vauita ateva ta Iesu Karisto aue emene oghi mae, karika ami ghe aimulisi teela isaa o kiukiu laghe nim gheleila. Ta ami, ami ghe tarala ta mataimami isaa o naanamungaane me sarasarakaniaane Karisto. ¹⁷ Ta ia ghe ghaala nioneoneaa me nianamunamungaane ta God Tamane nau eteva lingi ngalo ateva ghe mae sio tale maamallangiaane urukookoo ateva, me ghe uela va, “Ia o natughu eteva, aghaailousiangailiia, ta ngetana amasimasiangailiia.” ¹⁸ Ami, ami ghe nongoala ia o lingi ngalo ateva ghe mae sio epona liu, nau ami ghe tokatoka aitauaa tee Karisto tale motouru eteva manga ia.

¹⁹ Me ita kilakila va inangariira propete atoa koronnaaili, me am tani aimuli teeila, poli nongina mallanga ateva emaamallanga tale voto saurrom, isaa o inangariira aue eapasunga voto koronna ta Karisto, lomosina ta Iesu ekiri sio, nongina ange paipai me katto pai eteva† esaesae tale urunguitaniimim. ²⁰ Tale voto akapaaili, am rou mene kkaluaa va karika righi inangari niaulia ngamuemue tale Uru ngai Manga ateva ghe nim mae sio tale nim nannaaira propete atoa. ²¹ Ta inangari niaulia ngamuemue karika ghe nim tiuaala tale nim aloaloanna taumattu, ta taumattu ghe aippooaa tale inangari ghe maemae ta God nau eteva Spirit Manga ateva ghe kaakatulainila.

2

Tau ngai aapasunga ngatoa kamena ila

¹ Emua arau propete kamekame atoa laghe tingina saela elome ta kapuna taumattu ngatoa God. Me tale ia o salana atikirighi tau ngai aapasunga ngatoa kamena ila aue la tingina sae elome etaimim me la auliaa llo kamena me la ue va koronna, me isaa o voto kamena aue eghelei saasakiaa taumattu ngatoa. Ila o tau ngai aapasunga ngatoa aue la liu viliira ta Vau eteva, lo ateva ghe ghaa oghilala. Aue la ghelei evalua o me gharovaea nonga ta God aue eturungila. ² Oroieili taumattu aue la usilaa asease uunguaaira atoa sesa ila; me isaa o voto aue eghelei taumattu ngatoa la auliaa saasakiaa tale salana koronna. ³ Ila o tau ngai aapasunga ngatoa la kamekameam tale oroi kiukiu kamena tani ghaa uneimim viliki veu. God ang ghe aimonomosiaala uneira niaisakei eteae, me aue eturungila.

⁴ Am kilakila va emua arau, God karika ghe amaramara teela ensolo atoa nau laghe gheleila sesa voto, ta ghe sau vella siola tale voto ateva siosionaaili ia me saurromienaaili tee ia, va la toitoi nau niaisakei eteva. ⁵ God karika ghe amaramara teela taumattu tale kosa ateva oia nau laghe liula viliira etana, karika, ta ghe tau sio mae manu ghagga ateva etaira me laghe matela; ghe asaangi nongala Noa, poli ia nongaaili ghe auliaa me ghe aapasunga voto ghulughuluena, tee mene ghaitu (7) taumattu. ⁶ God ghe auliaa teela masaliki taatara aluae eSodom me eGomorra va aue lalu ghaa

1:14: 2 Ko 5:1; Jon 21:18-19. **1:16:** Mat 17:1-5. **1:17:** Mat 17:5. † **1:19:** katto pai eteva Utara Nambas 24:17; Niaulia ngaotu 22:16. **1:21:** 2 Tim 3:16; 1 Pita 1:11-12. **2:1:** Mat 24:11; Jiud 1:4. **2:4:** Jiud 6. **2:5:** Aitiutiu 6-8; 2 Pita 3:6. **2:6:** Aitiutiu 19:24; Jiud 7.

sesa aipolipoli. Ghe turungilalueta tale kura atea me au nonga ghe tokala. God ghe ghelei evalueta o tani eapasunga etaita saa voto aue elutu tale llo taumattu la liuliu viliira ta ngetana. ⁷ Ghe asaangila Lot, ghulughuluena ia, poli karika ghe masimasiaa sesa gheegheleiaaira tau ngai ghelei ssavoto nge Sodom atoa. ⁸ Koronna, ia o ghulughuluena ateva taumattu ghe tokatoka elome etaira, me isaa akapa nau ghe ghaaghaa nimmarikana me nialousiusi tale nannaane nau ghe taatara me nongonongo sesa gheegheleiaaira. ⁹ Isaa avalua o me Vau ngepona ateva ekilakila vaalua tani asaangi lo atoa la nongonongo usilainia nau nitootoonga eghaaghaaila, me ekilakila vaalua tani akaravusu lo atoa karika ghulughuluena ila me aue la ghaa kinatama sessaiaane ateva God tale maamauluaaira me la toitoi nau niaisakei eteva. ¹⁰ Isaa o voto tani koronnaaili ta ila o tau ngai aapasunga ngatoa kamena ila la ghaimuli tee aaloannaaira sesa emaemae tale vilikiira, me tee llo matuutuliena la tam aloanna.

La sarasarakana tani nnaainila nonga me karika la maamatautu tani auliaa saasakiaa tee kapuna ensolo atoa la ghaaghaa nioneoneaa. ¹¹ Arongona ta ensolo atoa sarasarakanaaili ila me ila karika la ghaauliaa saasakiaa tee isaa o taumattu la ghelei niaisakei etaira ta matane Vau eteva. ¹² Me ila o taumattu ngatoa, la ghaauliaa saasakiaa tale voto ila la tam kilakila amasina. Ila nongina ghaata kkena atoa, me la ghaaimuli tee aloanna vilikiira, laghe nim lutula va la ghaaila, me la turungila. Me nongina ghaata kkena atoa, ila tee aue la raua. ¹³ Aue la ghaa aipoliira sesa tale voto sesa laghe gheleila. Ila masimasieili tani ghelei kinatama ninamanama me niropi tale tummatavanga. Me nau la namanama teiem tale ale manga ateva, la nannainila nonga, me la ghelei saasakiaa arariira ale manga atoa. ¹⁴ Mataira epasupasu tani lai sari lo atoa vause karika va maneira ila. Karika la ruuruu poi tani ghelei ssavoto. La kamekame lo atoa karika la aikaia ngasarasarakana ta Karisto me la kaakatulainila lao tale ssavoto. Me muennaaili ila tani raungaa me kuruetu. Ang ghe ssuaa vellala. ¹⁵ Ngila ghe laula salana ghulughuluena me ngila ghe kasula tani laa ghaimuli tee salane Baelam natuna ia Beo, ia ghe aielousiaa aipolipoli tale uunguaa sesa salana. ¹⁶ Donki eteva ghe auliaala etana va voto eghelei karika masina, ia o donki eteva karika esamasama, ghe samala nongina taumattu ngateva, ghe ghelei rungaala propete ateva tani ghelei voto alokapakapanna.

¹⁷ Isaa oia taumattu nongina ateo mata vubbu karika righi manu ta ngetana, me urukookoo ateva, ttasi eteva ekuukuueinia see. Saurrom ateva aavoonaaaili ia etoitoila. ¹⁸ La auliaa inangari karika righi malloeana tani tau sae nannaaira, me la auliaa ta taumattu ngatoa va la rooroo tani usilaa sesa nannaaira, me la kaakatulainila lao tale salana ngila ghe oghi vulula. ¹⁹ La ghaauliaa inangari nialokoi ta taumattu ngatoa va karika aue la toka tale aloannaane mene kateva; me karika ta ila tee, karika la tokatoka tale aloannaaira, karika righi sarasarakaniaaira tani ghelei rungainila tale voto sesa — poli arova teva etau velu teva voto emuemueinia, ia nongina taumattu ngateva karika etokatoka tale aloannaane. ²⁰ Nau laghe kilala kapuita Vau eteva me tau ngai asaangita ngateva Iesu Karisto, laghe kasu vulila voto sesaaili tale kosa ateva. Me nau oia ngila ghe mene oghi lao sio tani mene ghelei isaa o voto sesaaili, me isaa oia nau esesaaili ta ngetaira. ²¹ Aue ghele masina marova karika la ghele mene kila salana tani ghulughuluena, ta nau eteva laghe kilala, me la mene oghioghi vulu, aue

2:7: Aitiutiu 19:1-16. **2:10:** Jiud 7-8, 16. **2:11:** Jiud 9. **2:12:** Jiud 10. **2:15:** Nam 22:7; Jiud 11; Aotu 2:14. **2:16:** Nam 22:28-35. **2:17:** Jiud 12-13. **2:20:** Mat 12:45. **2:21:** Luk 12:47-48.

esesaaili ta matane God. ²² Tale isaa o voto, kateva tuku inangari koronna ia, eue va: “Paua ateva eoghioghi lao tale luekina ateva,” me, “Mosu eteva nau ange raarangisanala, emene ooghioghi lao tale suesuena ateva.”

3

Nauna ateva Vau eteva

¹ Masi kapughu etoa, aiaaghalua atikirighi oia uneghi uru ngai apitipitie atu etaimim, tale ilalua o uru ngai eluekirighi agheelei nannaaimim va emasalike tani mene nnaa isaa o masi voto. ² Aghaaloniaiem tani nnaa parasi isaa o inangari propete atoa manga ila laghe auliaala emua arau, me tee saa voto kapuita Vau ngepona ateva me tau ngai asaangiita ia ghe aulieiniela ta apostolo atoa, me apostolo atoa laghe auliaala etaimim.

³ Aitiutiu eteva voto aghanna tani aulieinia etaimim ia avalua toko, va tale airuuruu tale nau kasina taumattu aue la mae tale sesa nannaaira me la auliaa saasakiaa me la kaili ekamena voto koronna me aue la pilosiem ⁴ tani ue va, “Ghe uela tale inangari nialokoi va aue emene sio, va? Eaa ange reerekata? Tamaita me tuvuita atoa angila ghe matela, me ila akapaaili voto atoa ila tokatoka nongina arau aitiutiu tale kosa ateva me nau ghaine tee.”

⁵ Laghe ghaa vella tale nannaaira va God ghe nim aippooaala me epona liu ghe lutula, me kosa ateva oia ghe kaurekatila tale manu, me tale manu ghe gheleila kosa ateva. ⁶ Me tale manu eteva, ghe tturuula kosa ateva oia tale kinatama manu ghagga ateva. ⁷ Tale ie nonga o inangarina ateva God eunaakookoo me elomarase me kosa ateva oia ghaine am taataraiia, God ghe aimonomosieinilala tani ghaa kura atea, tale nau niaisakei etea, ia o nau eteva taumattu ngatoa karika la uusilaa masi salana kanna God, God aue eturungila.

⁸ Me am rau mene kkaluaa ie toko voto ateva, masi kapughu etoa, va, ta Vau ngepona ateva, kateva nau nim nongina va kateva airari (1,000) ninamanama, me kateva airari (1,000) ninamanama nim nongina va kateva nau. ⁹ Vau ngepona ateva karika eaimaomaoaa tale kanna inangari nialokoi ghe gheleila, nongina kasina taumattu la annaa va eaimaomaoaa. Karika, ta ekaakaarasi tani toitoi mausiimim, me karika ealoanna va teva etaimim eraua, ta ealoanna akapaaiem va am nna ngaioghioghia.

¹⁰ Me nauna ateva Vau ngepona ateva aue emae nongina tau niainao ateva, karika ita kilakila maemaeane. Eunaakookoo aue ekapa tale kinatama mangalia ateva, me ila akapaaili voto atoa God ghe gheleilala aue kura atea eata akapaailiila, me tale ia o nau eteva, voto akapaaili tale kosa ateva aue eotu.

¹¹ Am nim nnaa marova voto atoa aue God eturungi evaluateila o, me am aue vaalua etaimim? Am tani toka tale ase nitoka manga me tale aloaloannaane God. ¹² Nau am toitoi nauna ateva God va emae am tee am ailuiluieinia. Ia o nau eteva aue kura atea eata eunaakookoo me elomarase, me ila akapaaili voto atoa aue la nim manu tale lallangina ateva. ¹³ Me tani nnaa inangarina inangari nialokoi ita taatara lao emua tale ouna ateva epona liu me ouna ateva kosa, voto ghulughuluena etokatoka etana.

¹⁴ Liuna avalua o masi kapughu etoa, poli am taatara lao emua tale isaa o voto, am tani toka va God aue etaraiem va raarangisana iem me aue erau mene aliu teiem tale voto sesa, me am toka ta ngetana tee luei. ¹⁵ Am tani nnaa va Vauita ateva karika emaamangoo tani toitoi, poli eaaloanna

2:22: Nitoka 26:11. **3:2:** Jiud 17. **3:3:** 1 Tim 4:1; Jiud 18. **3:4:** Mat 24:48. **3:5:** Aitiutiu 1:6-9. **3:6:** Aitiutiu 7:11; 2 Pita 2:5. **3:8:** Sams 90:4. **3:9:** Abak 2:3; 1 Tim 2:4. **3:10:** Luk 12:39; 1 Tes 5:2; Mat 24:29, 35. **3:13:** Ais 65:17; 66:22; Aotu 21:1, 27. **3:15:** Rom 2:4.

va mene katoa la mene saanga, nongina masi kapuita ateva ta Pol ia tee ghe pitipitila ta ngetaimim tale nialomasaanga God ghe tau lao sio etana.

¹⁶ Tale unna uru ngai ekapa ghe pitipiti tale ia nonga o salana atikirighi, ghe aauliaa ta ngetaira isaa oia voto. Tale unna uru ngai ghe aauliaa kasina tana voto aanasa tani alomasaanga tee, liuna avalua o me llo taumattu karika masi gheeleiaaira me aikaiaaira karika korokorongana, la kirikiri saasakiaa inangarina Pol, me la gheelei evalua tee o tale mene kasina inangari tale Uru ngai Manga ateva. Liuna avalua o me la gheelei va God aue eturungila.

¹⁷ Mausina avalua o, masi kapughu etoa, nongina ngam ghe kilala isaa o voto, am tani taatara amasina me inangariira lo atoa taumattu karika la ghaaimuli tee masi salana, la rau mene mae ghelei saasakiaa nannaaimim tani tiuaa kalipiem va am katuu vulu aikaiaaimim ngam ghe korokonganala etana. ¹⁸ Me, tale maamasinaane, am pinosa tale alomasaanganiaaimim ta Vauita ateva me tau ngai asaangita ateva Iesu Karisto. Ta ngetana ita taue sae ghaine me nau ekapa atoa! Koronna!

Aitiutiu etikirighi uru ngai Jon ghe pitila Inangari emuemua

Oroi tau ngalomasaanga la nannaa va lo ateva ghe pitila 1 Jon, 2 Jon me 3 Jon, Jon apostolo ia, me tee ghe pitila Masi kiukiu me Aulia ngaotu.

Tale ia oia uru ngai etikirighi, Jon ghe pitila voto tani sausi ale manga ateva tani kila va see ila tau ngai aapasunga ngatoa kamena ila. Katoa laghe ue va Iesu karika taumattu tuungi ia, me mene katoa laghe ue va la kilakilaaili voto tale spirit, me karika poi la gheelei ssavoto. Jon ghe aulia ngasarasarakana voto ita kilakila, me tee vaalua ita rooroo tani kila va taumattu eaiesoa ngakoronna arova eaieulousiaa mene katoa tau ngaiesoaa. Ghe piti teela mene ghalua nitoonga tani kila va see ia tau ngaiesoaa tuungi: la nongonongo usilaa God, me la aiesoaa voto koronna. Jon ghe aielousiaa lo atoa ghe pitipitila etaira, me ghe aselala va natuna ila.

Tani kila amuemua

Aitiutiu tale inangari 1:1-4

Tani toka tale mallanga ateva 1:5-2:29

Tani toka nongina natuna atoa God 3:1-5:12

Voto ita atoka tuutuliita etana 5:13-21

Inangari maulue

¹ Inangari eteva maulue ia ghe tokatoka tale aitiutiu, me ami ghe nongoala, me ami ghe taraiela ta mataimami, me ami ghe posoala ta nimaimami, ia o inangari eteva ami aulia ngaotua. ² Lo ateva etautau maulue ateva ghe kaurekatila, ami ghe taraiela me ami aaulieinia me ami poppooainia etaimim. Ia o maulue ateva tokatoka liu ia me ghe tokatoka tee Tamana, me ang ghe kaurekatila etaimami. ³ Ami poppooa ngaotu sa ateva ami ghe taraiela me ami ghe nongoala, mausina avalua o me am rooroo tani mae aitaaua teiemami me ita aighui eitaaua, me kaluimami niaighui eitaaua ta Tamaita me Natuna ta Iesu Karisto. ⁴ Ami pitipiti voto tani ghelei va masimasiaaita enamungaili.

Tani kasu tale mallanga

⁵ Inangari eteva oia ami ghe nongoala etana me ami aulia ngaotua etaimim va God mallanga ia, me ta ngetana karika poi righi saurrom. ⁶ Arova ita ue va ita aighui eitaaua teeia me karika, ta ita kasukasu tale gheeleiaa saurrom, ita nim kamekame me karika ita uusilaa voto koronna. ⁷ Me arova ita kasukasu tale mallanga nongina ia elome tale mallanga, aue ita aighui eitaaua tee mene kateva kateva etaita, me raena ateva Iesu Natuna ia egheeghelei eraarangisanaita tale kaluita ssavoto akapa.

⁸ Arova ita ue va ita karika righi kaluita ssavoto, ita nim kamekameta, me voto koronna karika isaa elome etaita. ⁹ Arova ita aulia ngaotu kaluita ssavoto, ia egheelei voto ghe uela va eghelei, me ia aue etani kkalua ngakapaaili sesa gheeleiaaita me eghelei eraarangisanaita tale isaa akapaaili gheegheleiaaita karika ghulughuluena. ¹⁰ Arova ita ue va ami

karika ami ghe gheleila righi ssavoto, ita gheleia va ia tau nikamekame ia, me inangarina ateva karika ia tale urunguitaniita.

2

Iesu aisausiita ia

¹ Masi natughu etoa, apitipiti etaimim va karika am mene ghelei ssavoto. Me arova teva eghelei ssavoto, kateva taumattu aisausiita ia eaippooaa tee Tamane ta poli ita, Iesu Karisto etana ghulughuluena ia. ² Ia ghe matela tani ghaa aipolipoli tale kaluuta ssavoto, karika va kaluuta ssavoto nonga, ta kaluira tee taumattu ngatoa tale kosa akapaaili eteva oia.

³ Ita kilakila va, arova ita nongo usilaa llo eaauliaa, angita ghe kilaiela. ⁴ Lo ateva taumattu eue va, “Aghi akilakilaia,” me karika enongonongo usilaa tee llo eaauliaa, tau nikamekame ia, me voto koronna karika isaa etana. ⁵ Me arova kateva etaita enongo usilaa inangarina, ailousiaane ateva God etokatoka akoronna etana me ghulughuluena ia. Tale isaa o salana, aue ita kila va ita etana: ⁶ lo ateva eue va etokatoka tee Iesu, etani kasu nongina Iesu ekasukasu.

⁷ Masi kapughu etoa, karika amene pitipiti righi ouna voto tani usilaa, ta pokane, llo oia ngam ghe ghaala tale aitiutiu. Isaa oia voto pokane ngam ghe nongola. ⁸ Arongona ta pokane, amene pitipiti tani auliaa ouna voto tani usilaa, me am roo tani tara kanna voto koronna ta Iesu me ta ngetaimim, poli saurrom ateva ange kapakapa, me koronna ateva mallanga ang ghe llaala.

⁹ Arova teva eue va ia tale mallanga ateva, me esessa tee tuena o nengane ateva, ia karika ghe kasu vuli saurrom ateva. ¹⁰ Lo ateva eaielousiaa tuena o nengane ateva, etokatoka tale mallanga, me karika righi voto erooro tani gheleia va ekatuu. ¹¹ Me lo ateva esessa tee tuena o nengane ateva, ia tale saurrom, me ekasukasu elome tale saurrom, me karika ekilakila va eaa elaolao, poli saurrom ateva eaakou runga matana me karika etaatara.

¹² Apitipiti etaimim masi aliki etoa,
poli God ang ghe kkaluaala kaluimim ssavoto poli uunguaane ateva Iesu.

¹³ Apitipiti etaimim tamatama atoa,
poli ngam ghe kilala lo ateva ghe tokatoka tale aitiutiu.

Apitipiti etaimim aliki taita atoa,
poli ngam ghe apalala sesa taumattu ngateva.

Apitipiti etaimim masi aliki etoa,
poli ngam ghe kilala Tamaita ateva.

¹⁴ Apitipiti etaimim tamatama atoa,
poli ngam ghe kilala lo ateva ghe tokatoka tale aitiutiu.

Apitipiti etaimim aliki taita atoa,
poli am sarasarakana iem,
me inangarina ateva God, ia etaimim,
me ngam ghe apalala sesa taumattu ngateva.

Am rau mene aielousiaa kosa ateva

¹⁵ Am rau mene aielousiaa kosa ateva oia me voto etokatoka etana. Arova teva eaielousiaa kosa ateva, karika erooro tani aielousiaa Tamaita. ¹⁶ Ta isaa akapaaili voto tale kosa ateva oia: aaloanna vilikiira taumattu ngatoa, sesa voto mataira etaatara la aloannaaili, me nitau sae nannaaira tale

2:1: Hib 7:25-26; 9:24. **2:2:** Jon 1:29; Kol 1:20; 1 Jon 4:10. **2:5:** Jon 14:21, 23. **2:7:** Jon 13:34; 2 Jon 5-6. **2:8:** Rom 13:12; Jon 1:9. **2:9:** 1 Jon 4:20. **2:10:** Rom 14:13. **2:11:** Jon 12:35. **2:15:** Rom 8:7. **2:16:** Rom 13:14.

peiira; isaa o voto karika emaemae ta Tamaita, ta emaemae tale kosa ateva oia. ¹⁷ Kosa ateva me aaloannaane aue ekapa, me lo ateva taumattu eaimuli tee aaloannaane God, aue etoka liu.

Tau ngai ssateena atoa Karisto aue la mae

¹⁸ Masi aliki etoa, airuuruu oia nau, me ngam ghe nongola va tau ngai ssateena ateva Karisto aue emae, me tale isaa oia nau oroi tau ngai ssateena atoa Karisto angila ghe mae sio. Liuna avalua o me ita kilakila va airuuruu oia tale nau. ¹⁹ Kasina taumattu oia ghe tokatoka teeita, me isaa oia angila ghele kasu vulitala. Karika va koronna va kapuita ila, ta arova kapuita ila aue la ghele toka teeita. Kasukasuaaira eaapasunga va ila karika va ita aitaauaa.

²⁰ Me am, lo ateva manga ia ghe amangaiemla me am akapaaili ngam ghe kilala llo koronna. ²¹ Karika va apitipiti etaimim poli karika am kilakila inangari koronna. Karika, ta am kilakila. Me poli am kilakila va nikamekame karika emaemae tale voto koronna. ²² See tau nikamekame ia? Lo ateva taumattu eue va Iesu karika va Mesaea ia. Ia o ase taumattu ngateva, tau ngai ssateena ia Karisto, me eliuliu vilina ta Tamaita me Natuna. ²³ Lo ateva eliuliu vilina ta Natuna ateva God, Tamana karika ia etana. Me lo ateva eaulia ngaotu Natuna ateva God, Tamana ia etana.

²⁴ Llo inangari am ghe nongola tale aitiutiu, am poso parasi. Arova am poso parasi, Natuna ateva God me Tamane aue lalu toka teeiem tale nau ekapa atoa. ²⁵ Inangari nialokoi ia ghe auliaala, va maulue ateva tokatoka liu ia.

²⁶ Apitipiti atu inangari toko tani aulia ngaotu kieimim tale taumattu ekamekame. ²⁷ Karisto ghe amangaiemla, liuna avalua o me karika am tuutukuna tale alomasaanga, ta poli Spirit Manga ateva, ia etaimim, eaapasunga ngakapaaili voto etaimim me inangarina akapaaili koronna, karika righi kamena. Liuna avalua o me am tokatoka aitaauaa tee Karisto, nongina Spirit Manga ateva ghe apasungaala etaimim.

Natuna atoa God

²⁸ Me liuna avalua o, masi natughu etoa, am toka aitaauaa teeia, ta nau eteva ekaurekati, aue ita tingina akorokorongana me karika aue ita palata nau eteva emae. ²⁹ Arova am kilakilaia va ia ghulughuluena ia, ngam nim kilala va lo atoa la gheeghelei voto ghulughuluena laghe lutula etana.

3

¹ Karika pisike ia niaielousi eteva God Tamaita ghe gheleiela etaita, ta ghe kolotala va ita natuna ita, me koronna ia. Taumattu tale kosa ateva karika la kilakila God, liuna avalua o me karika la kilakilaia. ² Kapughu etoa, ang ghe natuna itala God me auena vaalua ita toka, karika ghe auliaala etaita. Me ita kilakila va nau eteva ekaurekati, aue ita nongina ia, poli aue ita taraia va ia vaalue ia. ³ Lo atoa la aatoka tuutuliira etana, la gheeghelei eraarangisanaila nongina ia raarangisana ia.

⁴ Lo atoa la gheeghelei ssavoto, la gheeghelei saasakiaa inangari nipaopao, poli ssavoto egheeghelei saasakiaa inangari nipaopao kanna God. ⁵ Am kilakila va ia ghe kaurekatila tani ghaa velu ssavoto, me ia karika righi ssavoto etana. ⁶ Lo ateva etokatoka etana, karika egheelei ssavoto, me lo ateva egheelei ssavoto, karika ghe taraia me karika ghe kilaia.

2:17: Mat 7:21. **2:18:** Mat 24:5, 24; 2 Jon 7. **2:19:** Apoc 20:30. **2:20:** 1 Ko 2:15; 2 Ko 1:21; 2 Jon 2. **2:22:** 1 Jon 4:3; 2 Jon 7. **2:23:** Jon 5:23; 1 Jon 4:15; 5:1. **2:27:** Jon 16:13. **2:29:** 1 Jon 3:10. **3:1:** Jon 1:12-13; 16:3. **3:2:** 2 Ko 3:18. **3:5:** Jon 1:29; 1 Pita 2:22-24; 1 Jon 2:2.

⁷ Natughu etoa, am rau mene tau veluem va katoa ppae la ttiuaa kalipiem. Ta lo ateva egheghelei voto ghulughuluena, ghulughuluena ia nongina Karisto ghulughuluena ia. ⁸ Lo ateva egheghelei ssavoto kapuna ia Satana, poli Satana ghe tiua ngakasinala tani ghelei ssavoto emua arau. Liuna avalua o me Natuna ateva God ghe sio mae tani tturu uunguaane Satana. ⁹ Lo ateva taumattu ghe lutula ta God karika erooroo tani ghelei ssavoto, poli inangarina ateva God etokatoka etana. Ia avalua o me karika erooroo tani ghelei ssavoto, poli ang ghe lutula ta God. ¹⁰ Ia avalua o me aue ita tara kila va see ila natuna atoa God me see ila natuna atoa Satana: lo atoa ghegheleiaaira karika masina karika va natuna ila God, tee me lo ateva karika eailousiaa tuena o nengane.

Tani aielousiaa kateva kateva

¹¹ Inangari eteva ngam ghe nongoala tale aitiutiu va ita aielousiaa kateva kateva. ¹² Ita rau mene nongina Kein kapuna ia sesa taumattu ngateva me ghe uvi ematela nengane. Masi saa me ghe uvi emateala? Poli ghegheleiaane sesa me ghegheleiaane nengane ghulughuluena. ¹³ Liuna avalua o me am rau mene soghi, kapughu etoa, arova taumattu ngatoa tale kosa ateva oia la ssa teeiem. ¹⁴ Ita kilakila va angita ghe kasu vulila nimate me ita tale pai maulue ativilau, poli ita, ita aielousiaa tueita me nengaita atoa. Lo atoa la tam aaielousi, ila la tokatoka tale nimate. ¹⁵ Lo atoa la sessa tee tueira o nengaira atoa ila nongina tau niaiuvu emate atoa, me am kilakila va tau niaiuvu emate atoa, maulue ateva tokatoka liu ia, karika ia etaira.

¹⁶ Ia avalua o me ita kilakila va vaalue ia niaiuelousi eteva: Iesu ghe tau vella maamauluaane etaita, me ita, ita mene tau velu maamauluaaita tale tueita me nengaita atoa. ¹⁷ Arova see righi peina, me etam kila tuena o nengane ateva karika righi peina va aue esausia, vaalua ailousiaane ateva God aue etoka etana? ¹⁸ Masi natughu etoa, karika ita mene aielousiaa tale paaita, ta tale niuungu me tale voto koronna. ¹⁹ Ia o eaapasunga va ita kilakila va ita elome tale inangari koronna, me urunguitaniita ateva tee etokatoka amasina ta matane God ²⁰ nau urunguitaniita ateva eue va angita sesala, poli God enaanamuu tale urunguitaniita ateva, me ekilakila akapa voto.

²¹ Kapughu etoa, arova urunguitaniita ateva karika eue va angita sesala, ita atoka tuutuliita ta God, ²² me aue ita ghaa voto ita kookolomi etana, poli ita nongonongo usilaa voto eaulliaa me ita gheghelei voto eaamasimasia. ²³ Me inangarina ghe auliaala toko, va tani aikaaiiaa tale ararina atea Natuna ateva ta Iesu Karisto, me tani aielousiaa kateva kateva, nongina ghe auliaala etaita. ²⁴ Lo atoa la nongonongo usilaa llo eaauliaa, la tokatoka etana me ia etaira. Ghe tau mae Spiriti eteva etaita, mautina avalua o me ita kilakila va ia etokatoka etaita.

4

Am tootoonga ase spiriti etoa

¹ Kapughu etoa, am rau mene aikaaiia ngakapa tale ase spiriti etoa. Poli oroi ila propete kamekame atoa angila ghe kasu ekapa seela tale kosa ateva oia, am tootoonga spiriti ekapa atoa tani tara va laghe kasula ta God o karika. ² Aue utara kila kapuna ateva spiriti God ia avalua toko: va lo ateva spiriti eaaulia ngaotu va Iesu Karisto ghe taumattuula. ³ Me lo ateva spiriti

3:8: Jon 8:44. **3:9:** 1 Jon 5:18. **3:11:** Jon 13:34. **3:12:** Aitiutiu 4:8. **3:13:** Jon 5:18-19. **3:14:** Jon 5:24. **3:15:** Aotu 21:8. **3:16:** Jon 13:1; Gal 1:4. **3:17:** Diut 15:7. **3:18:** Jms 2:15-16. **3:21:** Hib 4:16. **3:23:** Jon 6:29; 13:34. **3:24:** 1 Jon 4:13. **4:1:** Mat 7:15; 1 Jon 2:18; 2 Jon 1:7; 1 Tes 5:21. **4:2:** 1 Ko 12:3. **4:3:** 1 Jon 2:18.

karika eaaulia ngaotu Iesu, karika ghe kasula ta God. Ia o ase spiriti eteva, tau ngai ssateena ia Karisto, am ghe nongoala va aue emae, me ia oia ang ghele rekatala.

⁴ Am, aliki etoa, am kapuna iem God, me ngam ghe apalala propete kamekame atoa, poli lo ateva etokatoka etaimim sarasarakanaaili ia me elaulau lo ateva tale kosa ateva. ⁵ Ila tale kosa ateva oia, me la aauliaa voto tale kosa ateva oia, me taumattu ngatoa tale kosa ateva la nongonongo usilainila. ⁶ Ita kapuna ita God, me lo atoa la kilakila God, la nongonongo usilainita. See karika ia ta God karika enongonongo usilainita. Tale isaa o salana, ita rooroo tani kila koronna ateva spiriti me kamena ateva spiriti.

Kanna God niaielousi me kaluita

⁷ Masi kapughu etoa, ita aielousiaa kateva kateva, poli niaielousi eteva ghe mae sio ta God. Lo ateva eaaielousiaa ghe lutula ta God, me ekilakila God. ⁸ Lo ateva etam aaielousiaa karika ekilakila God, poli God tau ngaielousi ia. ⁹ God ghe apasungaala aielousiaane ateva etaita avalua toko: va ghe suula kateva nonga ia Natuna ateva ghe mae sio tale kosa ateva, me mausina avalua o me ita maamaulue. ¹⁰ Ia o niaielousi eteva: karika va ita, va ita ghe aielousiaala God, ta God ghe aielousieinitala, me ghe suula Natuna tani ghaa aipolipoli tale kaluita ssavoto. ¹¹ Kapughu etoa, poli God eaielousieinita, ita tee ita tani mene aielousiaa kateva kateva. ¹² Karika teva ghe tara God, me arova ita aielousiaa kateva kateva, God etokatoka etaita, me ia o niaielousi eteva egheelei niuungu ghe uela va ita ghelei.

¹³ Ita kilakila va ita, ita tokatoka etana, me ia etaita, poli ghe tau mae sio kapuna Spirit Manga ateva etaita. ¹⁴ Me angita ghe tarala me angita ghe aulia ngaotula va Tamane ghe suula Natuna tani sio asaangi taumattu tale kosa ateva. ¹⁵ Lo ateva eaulia ngaotu va Iesu Natuna ia God, God etokatoka etana, me ia ta God. ¹⁶ Me mausina avalua o me ita kilakila me ita aatoka tuutuliita tale aielousiaane ateva God etaita.

God tau ngaielousi ia, me lo ateva etokatoka tale niaielousi, etokatoka ta God, me God etokatoka etana. ¹⁷ Tale isaa o salana, niaielousi eteva egheelei niuungu ghe uela va ita ghelei, me aue ita rooroo tani tingina akorokorongana tale nau niaisakei eteva, poli ita nongina Iesu tale kosa ateva oia. ¹⁸ Karika righi nimatautu tale niaielousi eteva, ta ghulughuluena ateva niaielousi eghaaghaa velu nimatautu eteva, poli matautu eteva aipolina sesa. Lo ateva emaamatautu, ghulughuluena ateva niaielousi karika ia etana.

¹⁹ Ita aielousiaa God poli ia ghe aielousia ngakasinaitala. ²⁰ Arova teva eue va, “Aghi aghaielousiaa God,” me esessa tee nengane o tuena ateva, tau nikamekame ia, ta lo ateva karika eaielousiaa nengane o tuena ateva etaataraila, karika erooroo tani aielousiaa God karika etaataraila. ²¹ God ghe tau mae sio niuungu tani ghelei, va lo ateva eaielousiaa God etani aielousiaa tee nengane o tuena ateva.

5

Niaikaaiaa ta Natuna ateva God

¹ Lo atoa la ghaikaaiaa va Iesu Mesaea ia, natuna ila God, me lo atoa la ghaielousiaa Tamana, la ghaielousiaa tee natuna atoa. ² Arova ita aielousiaa me nongonongo usilaa God, ita kilakila va aue ita aielousiaa natuna atoa. ³ Tani aielousiaa God, malloeana va ita aimuli tee voto eaauliaa va ita ghelei,

4:4: Mat 12:29; 1 Jon 5:4-5. **4:5:** Jon 8:47; 15:19. **4:9:** Jon 3:16. **4:10:** Rom 5:8-10; 1 Jon 2:2. **4:12:** Jon 1:18. **4:13:** 2 Ko 1:22; 1 Jon 3:24. **4:21:** Mak 12:29-31. **5:1:** 1 Jon 4:15. **5:3:** Jon 14:15, 23-24.

me inangarina God karika aue aanasa tani ghelei. ⁴ Ta lo akapa atoa ita ghe lutula ta God, ita ghaapala sesa tale kosa ateva. Ia o lo ateva niapala: ita aikaaiiaa ta God. ⁵ See ia lo ateva eaapala kosa ateva? Lo ateva nonga eaikaaiaa va Iesu Natuna ia God.

⁶ Ia o lo ateva ghe mae sio tale manu ghe ghaala niasuu me tale rae ghe akalala tale aikotoo, Iesu Karisto etana, karika ghe mae sio nonga tale manu, ta ghe mae sio tale manu me rae. Isaa o voto Spirit Manga ateva ghe auliaala, ita kilakila va koronna ia, poli Spirit Manga ateva koronna ia. ⁷ Kotolu voto lotolu aulia ngaotua: ⁸ Spiriti eteva, manu eteva me rae ateva.* Lotolu ghe asokoi eitauaala. ⁹ Taumattu ngatoa la aakoronna llo voto taumattu ghe tarala me eaauliaa. Tale ia o salana atikirighi taumattu etani akoronna llo voto God eaaulia ngaotu Natuna, ta poli God koronna ia. ¹⁰ Lo ateva eaaiesoaa tale Natuna ateva God, ia ghe aiesoala inangarina ateva God ghe aulia ngaotuela, me lo ateva etam aaesooa ta God egheelei va God tau nikamekame ia, poli karika eaikaaiaa llo voto God eaaulia ngaotu Natuna. ¹¹ Me inangari koronna isaa avalua toko, va God ang ghe tau mae sio etaita maulue ateva tokatoka liu ia, me ia o maulue ateva, ie ta Natuna. ¹² Lo ateva eaighui tee Natuna, eghaaghaa maulue ateva. Me lo ateva karika eaighui tee Natuna ateva God, karika aue eghaa maulue ateva.

Airuuruu tale inangari

¹³ Apitipiti voto toko etaimim lo atoa am aikaaiiaa tale ararina atee Natuna ateva God tani gheleiem va am rooroo tani kila va maulue ateva tokatoka liu ia, ia etaimim. ¹⁴ Ita atoka tuutuliita ta God va arova ita kolomi righi voto tale aloaloannaane, aue enongota. ¹⁵ Me arova ita kila va enongonongota, saa llo ita kolomi, angita kilala va angita ghaala.

¹⁶ Arova teva etaimim etara teva nengana o tuena va egheelei ssavoto ateva karika aue ekatulainia lao tale nimate, elooloo sae mausina, me God aue etau lao maulue etana. Amene aauliaa lo atoa kaluira ssavoto karika ekaakatulainila lao tale nimate. Ta kateva ssavoto ekaakatulainila lao tale nimate. Karika aue va am looloo sae tale ia o ase ssavoto ateva. ¹⁷ Isaa akapaaili sesa gheegheleiaaita, ssavoto ia, me kasina ssavoto karika ekaakatulainita lao tale nimate.

¹⁸ Ita kilakila va lo akapa atoa laghe lutula ta God karika la gheeghelei ssavoto. Natuna ateva God, Iesu etana, eaitarainila, me sesa taumattu ngateva karika erooroo tani ghelei saasakieinila. ¹⁹ Ita kilakila va ita kapuna ita God, me taumattu ngakapaaili tale kosa ateva la tokatoka tale sarasarakaniaa sesa taumattu ngateva. ²⁰ Me ita kilakila va Natuna ateva God ghe mae sio me ghe tau mae sio alomasaanga etaita va aue ita kila God koronna ia, me ita etana, me Natuna ta Iesu Karisto. Ia koronna ateva God me etautau maulue ateva tokatoka liu ia.

²¹ Masi natughu etoa, am alekalekaiem tale tootoo goto atoa.

5:6: Jon 1:29-34. **5:8:** Jon 15:26. * **5:8:** Kasina uru ngai laghe pitila tale inangari nge Latin me mene ghaata tale inangari nge Grik laghe pitila auena ta ninamanama 1300, la ghe pitila 7 Kotolu voto lotolu aulia ngaotu epona liu: Tamana, Inangari eteva me Spirit Manga ateva, me lotolu ghe asokoi eitauaala. **8** Me kotolu voto lotolu aulia ngaotua tale kosa ateva: Spiriti eteva, manu eteva me rae eteva. **5:9:** Jon 5:32-37. **5:10:** Jon 5:36-40; Gal 4:6. **5:12:** Jon 3:36. **5:13:** Jon 20:31. **5:14:** Jon 14:13-14; 1 Jon 3:21-22. **5:16:** Mat 12:31. **5:18:** 1 Jon 3:9.

Aiaaghaluene atikirighi uru ngai Jon ghe pitiela Inangari emuemua

Jon ghe pitila ia oia uru ngai etikirighi tale kateva ale manga, me easeasea va “masi kapughu vause ateva, God ghe suiematoongainiola, me natum atoa.” Ghe auliaala va la aielousiaa God, me malloeana va la aimuli usi etana me la aielousiaa mene katoa. Ghe auliaala kieira tale tau ngai aapasunga ngatoa kamena ila.

Tani kila amuemua

Aitiutiu tale inangari 1-3

Tani usilaa God me aielousiaa mene katoa 4-6

Niaulia ngatootoonga ta tau ngai aapasunga ngatoa kamena ila 7-11

Airuuruu 12-13

¹ Aghi Jon, namu ngateva,

Apitipiti uru ngai etikirighi eatuetu etam, masi kapughu vause ateva, God ghe suiematoongainiola, me natum atoa. Aghaielousieinam tale voto akapa koronna, me karika va aghi nonga ta lo atoa tee la kilakila voto koronna.

² Aghaielousieinam poli voto koronna etokatoka etaita me aue etoka etaita nau ekapa atoa.

³ Alooole sae va maamasinaane, alousiusiaane, me luei kanna God Tamaita ia me Iesu Karisto Natuna ia God, aue etoka aitauaa teeita poli am ghe aiesoala me am aielousiaa voto koronna ghe auliaala.

⁴ Etautau mae kinatama nimasimasi etaghi tani kila va katoa natum la kasukasu tale salana koronna nongina Tamaita ateva ghe auliaala va ita ghelei. ⁵ Me ia oia, masi kapughu vause ateva, karika apitipiti etam tani auliaa righi ouna voto tani ghelei, ta anim auliaa voto ita ghe ghaala tale aitiutiu, va God ekookolomi va ita aielousiaa kateva kateva. ⁶ Me niaielousi eteva ia avalua toko, va ita kasu tale ninongo usilaa tale voto ghe auliaala va ita ghelei, nongina am ghe nongola tale aitiutiu. Voto ghe auliaala isaa avalua toko va am kasu tale niaielousi.

Tau ngai aapasunga ngatoa kamena ila

⁷ Oroieili tau nikamekame atoa, karika la aulia ngaotu va Iesu Karisto ghe taumattula. Ngila ghe kasu ekapa seela tale kosa ateva, me isaa o ase taumattu, tau nikamekame ila, me tau ngai ssateena ila Karisto. ⁸ Am paniem ta tau nikamekame atoa ta am rau velu voto ita ghe uunguaala, ta aue am ghaa akapaaili aipolipoli. ⁹ Lo ateva eilou emuemue me eruu tani kasu tale niapasunga kanna Karisto, God karika ia etana, me lo ateva ekorokorongana tani kasu tale isaa o niapasunga, Iesu me Tamane lalu tokatoka etana. ¹⁰ Arova teva emae etaimim me karika eatuaa isaa oia niapasunga, am rau mene ghaaia va esso tanganueimim me am rau mene aikoloainia. ¹¹ Lo ateva eaikoloainia, ie tee eghelei isaa o uunguaane sesa.

Airuuruu

¹² Oroieili voto aghanna tani piti tau aatu etaimim, me karika aghalona tani piti tale uru ngai me aipitipiti etiulu, poli aghaiesoaa tale ninannaa

va aue amae taraiem, me ita aippooaa. Nau ita aitara, aue masimasiaaita enamungaili.

¹³ Natuna atoa nengam vause ateva God ghe suimatoongainiela la suula masimasiaaira etam.

Aiaakotonna atikirighi uru ngai Jon ghe pitiela Inangari emuemua

Jon ghe pitila ia oia uru ngai etikirighi ta kateva taita, ararina atea ta Gaeas. Ghe auliaala masimasiaane tani nongo va Gaeas etiitingina akorokorongana tale voto koronna. Ghe auliaala kiena tale kateva namuu tale ale manga, ararina atea ta Diotrepes, ghe gheelei erunga tau ngai aapasunga ngatoa koronna ila tani mae apasunga tale ale manga.

Tani kila amuemua

Aitiuti tale inangari, me inangari nimasimasi 1-8

Niaulia ngatootoonga ta Diotrepes 9-10

Niaulia ngamasina ta Demetrius 11-12

Airuuruu 12-14

¹ Aghi Jon, namu ngateva,

Apitipiti etam, masi kapughu eteva Gaeas, aghailousieinio tale voto koronna.

² Masi kapughu eteva, alooloo sae va umasimasi tale masi nitoka me isaa akapa voto aue emasina etam, nongina akilakila va maamauluaam ta Vau ngepona masina. ³ Nimasimasi eteva namungaili ia ghe ghaaieghila nau katoa kapuita ita aikaia ngaitauaa laghe mae sio me laghe auliaala vaalua karika ughe kasu vulila voto koronna. ⁴ Nau eteva anongonongo va natughu etoa la kasukasu tale salana koronna, masimasiaaghi namungaili.

⁵ Masi kapughu eteva, ugheelei emasina uunguaam ta tau ngai kasuaa inangari etoa arongona ta utam kilakila katoa etaira. ⁶ Ailousiaam laghe auliaala tale ale manga. Urau mene ruu tani sausila tale aloannaaira, poli ia o ase salana atikirighi eaamasimasi God. ⁷ Ta poli ararina atea Iesu me laghe kasula, karika laghe annala tani ghaa righi niaisausi ta lo atoa karika la kilakila God. ⁸ Liuna avalua o me ita tani sausi isaa o ase taumattu tani uungu eitauaa teeila tale voto koronna.

⁹ Agha pitipiti lao sio ta taumattu ngatoa tale ale manga ateva, me Diotrepes, eaanna nonga tani muemueinila, karika aue eanna tani nongo usilaa voto aghauliaa. ¹⁰ Liuna avalua o me marova amae, aue aghapasunga ngamasina voto egheelei me voto eauliaa teeieghi karika masina. Me karika va egheelei nonga llo, ta etam aikoloaa tee lo atoa la ghaaikaiaa me epaopao lo atoa vara la ghelele isaa o voto, me etiuti vella tale ale manga.

¹¹ Masi kapughu eteva, urau mene aimuli tee taumattu sesa, ta uaimuli tee taumattu masina. Lo ateva egheelei voto masina kapuna ia God, me lo ateva egheelei voto sesa, karika ghe kila God. ¹² Ila akapa taumattu ngatoa la ghaauliaa masi gheeleiaane Demetrius, me gheeleiaane elaolao aitauaa tee inangarina God koronna. Aghi tee aghauliaa masi gheeleiaane me am kilakila va kiukiu aghauliaa koronna.

¹³ Oro voto aghanna tani auliaa etam, me karika aghanna tani piti tale uru ngai, ¹⁴ poli aghaiesoaa tale ninanna va ghaisa ngarighi amae me italu aitaria me italu aippoaa.

¹⁵ Alooloo sae va luei aue etoka etam, me kapum atoa oia la suula masimasiaaira ta ngetam, me uauliaa masimasiaaghi ta kateva kateva ta kapuitalua atoa ona.

Uru ngai etikirighi Jiud ghe pituela Inangari emuemua

Oroi tau ngalomasaanga atoa la nannaa va Jiud nengane ia Jeimis, ia o nengane ia Iesu. Tale inangari nongina llo Pita ghe pitila (2 Pita 2), eaaulia ngatootoonga ta tau ngai aapasunga ngatoa kamena ila, me aipolipoliira. Ealoanna va lo atoa la ritiriti la tingina akorokorongana tale voto koronna laghe ghaala tale nau laghe aiesoala masi kiukiu eteva.

Tani kila amuemua

Aitiutiu tale inangari 1-2

Niaulia ngatootoonga ta tau ngai aapasunga ngatoa kamena ila 3-16

Am poso parasi tale niaikaiaa me voto koronna 17-23

Niarangise 24-25

¹ Aghi Jiud, kapuna tau ngai uungu ieghi Iesu Karisto, me nengane ieghi Jeimis,

Apitipiti ta am lo atoa God ghe koloamla, me God Tamaita ia eaailousieiniem me eaaitarainiem mausi Iesu Karisto.

² Alooosae va God aue earangiseiem tale oroieili alousiusiaane, luei, me nailousi eteva.

Niaisakei tale kamena atoa tau ngai aapasunga

³ Masi kapughu etoa, aghe annaailila va aghe pitipiti aatu etaimim tani auliaa uunguaa nisaanga God eghelei etaita, ta aghe ateateaala va apitipiti me aghaulia ngakorokorongana etaimim tani ppooaa kotokotoo tale voto koronna God ghe taula katengaata ta kapuna atoa manga ila. ⁴ Poli katoa ase taumattu ngila ghe kupi einao ssola elome etaimim, emua arau laghe pitila va aue sesa voto elutu etaira. Karika la oneoneaa God. La aikolikoliaa maamasinaane kapuita God ateva elaolao tale aloannaaira sesaaili, me la ratirati Iesu Karisto, ie nonga kapuita namuu ia me Vauita ia.

⁵ Ngam ghe kilala kiukiu, me aghanna tani mene auliaa etaimim va Vau ngepona ateva ghe ghaa oghila kapuna taumattu ngatoa eIjip, me emulina ghe tturuula lo atoa karika la aiesoaa etana. ⁶ Ngam ghe kila teela ensolo atoa karika laghe ghelei emasinala uunguaaira nongina laghe tokatoka me laghe kasu vuli tanganueira, God ghe irilala tale sene atoa karika la roorroo tani tapate me la toitoi tale saurrom ateva tani aisakei tale kinatama nau niaisakei eteae. ⁷ Tale isaa nonga o ase salana, eSodom me eGomorra me llo masaliki taatara kalakalaa etairarua laghe ghaala sesa aipolipoli ta laghe tau vella vilikiira tani ghelei nailai salosalooa me laghe laula salana ghulughuluena tale uunguaa nilai. Liuna avalua o me la aimatoonga va am akekkeliem tale kura ateaie karika eroorroo tani pala.

⁸ Tale isaa o nonga ase salana, isaa o taumattu ila elome etaimim, tau niasoasopoi ila, la ghelei ekulukulutana vilikiira tale uunguaa nailai salosalooa, me la ratirati voto matuutuliena, me la auliaa saasakiaa tee kapuna ensolo atoa God mallanga ila. ⁹ Me kapuira namu ngateva ensolo atoa ta Maekol karika ghe aimuli tee isaa o salana. Nau ghe aissakeana

1:1: Mat 13:55. **1:4:** Gal 2:4; 2 Pita 2:1. **1:5:** Eks 12:51; Nam 14:29-30. **1:6:** 2 Pita 2:4.
1:7: Aitiutiu 19:1-25; 2 Pita 2:6, 10. **1:9:** Den 10:13, 21; 12:1; 2 Pita 2:11; Aotu 12:7; Sek 3:2.

tee Satana, va see kaiaa Moses, karika ghe auliaa saasakiaala tee God tani ghelei niaisakei ta Satana, ta ghe nim uela etana va, “Aue Vau ngepona ateva eghelei niaisakei etam tale voto sesa ugheelei.” ¹⁰ Me ila o taumattu ngatoa la auliaa saasakiaa tee llo voto aloira karika emaamasaanga, me llo la ghalomasaanga tani ghelei la gheelei nonginaaili ghaata kkena atoa karika righi nannaaira, me isaa o voto etani tuuturungila.

¹¹ Alousiusi etaira, ta ngila aimuli tee salane Kein, me la ghe ailuilui nonginaaili sesa gheeleiaane Baelam laghe gheelei tani ghaa viliki veu. Aue la turungila nongina laghe turungila Kora poli ghe aamakatakata.

¹² Isaa o taumattu nongina atu eteva etokatoka runga sao atikirighi tale uneimim niaighui me kinatama ninamanama atoa. La namanama teeiem me karikaaili emoimoila. Tau ngai toi sipsipi ila la angiinginila nonga; ila urukookoo ila karika la ghalakuti vaoo me enim kuukuueinila see. Me ila arova ai eteae nauna tani kune me karika ekunekuneeaa uene ta matena ia me la mene mukemukeia. ¹³ Paapalataaira tale gheeleiaaira eotuotu arova viiso kotoo ngelo malionge atoa la ghaasuu, me ila nongina katto atoa la nim ilou ekapa see, me saurrom ateva avoonaaili ia God ghe aimonomosieiniela etaira tokatoka liu ia.

¹⁴ Inok, aiaaghaituna (7) ia ta Adam, ghe aulia ngamuemua alokoila inangari tale isaa oia ase taumattu, ghe uela va, “Tarala, Vau ngepona ateva ange maemae tee airari me airari kapuna ensolo atoa manga ila ¹⁵ tani ghelei niaisakei ta taumattu ngakapa atoa me tani apasunga sesa gheeleiaaira lo akapa atoa taumattu karika la oneoneaa God, me tale isaa akapaaili sesa voto laghe gheleila tale sesa salana, me tale sesa inangariira ila o tau ssavoto atoa laghe auliaa teeiela.” ¹⁶ Ila o taumattu ngatoa tau niauliuliaa ila me la sessa tee mene katoa. La aimuli tee sesa aloaloannaaira me la tautau sae nannaaira me la ghaaruaa mene katoa tani nim asaesae arariira.

Nikolokolo tani poso parasi

¹⁷ Me masi kapughu etoa, am nnaa sa ateva kapuna apostolo atoa Vauita ateva Iesu Karisto laghe aulia ngamuemua alokoila. ¹⁸ Laghe uela etaimim va, “Aue airuuruu tale nau, lo atoa la aanamisaa God aue la aimuli tee aloannaaira karika masina.” ¹⁹ Isaa o taumattu aue eatoka apolapolaiem, la aimuli tee nannaaira, me Spiriti eteva karika ia etaira.

²⁰ Me am, masi kapughu etoa, am asarasarakanaiem tale uneimim niaikaaiiaa mangaaili, me am looloo sae tee Spirit Manga ateva me esausiem. ²¹ Me am toka tale aielousiaane ateva God nau am toitoi Vauita ateva Iesu Karisto tani tau aatu maulue ateva tokatoka liu ia, poli ghe apasungaala alousiusiaane etaimim.

²² Am alousiusi tee lo atoa nannaaira eghaaghalua. ²³ Am asaangi lo atoa la ghanna tani saanga nongina va am ghe asaangilala tale kura atee. Am apasunga alousiusiaaimim ta mene katoa tee nimoia, am akekkeliem tale kaluira ssavoto, egheleila la kulukulutana.

Niarangise

²⁴ God sarasarakana ia me eroo tani sausiem me karika am rooroo tani katuu. Erooroo tani ghaaiem me elaoainam tale voto ateva mal-langina ateva etokatoka etana, nau etaraiem, karika aue etara righi sesa gheeleiaaimim. Me aue eroo tani tau aatu kinatama nimasimasi etaimim.

²⁵ Ia nongaaili kapuita Goto ia, tau ngai asaangita ia, ta ngetana mallanga,

1:10: 2 Pita 2:12. **1:11:** Aitiutiu 4:7-8; 1 Jon 3:12; 2 Pita 2:15; Nam 16:1-35. **1:12:** 2 Pita 2:13, 17. **1:14:** Aitiutiu 5:18, 21-24. **1:18:** 2 Pita 3:3. **1:20:** Kol 2:7. **1:23:** Sek 3:2; Aotu 3:4. **1:25:** Rom 16:27; 2 Pita 3:18.

namuu ia tale voto akapaaili, sarasarakana, me matuutuliena tale uunguaane Iesu Karisto, kapuita Vau palepale ateva, tale isaa akapa nau emua arau, ghaine me nau ngemuli. Koronna.

Niaulia ngaotu eaauliaa Iesu Karisto Inangari emuemua

Oroi ila lo atoa la nannaa va apostolo ateva Jon ghe pitila ia oia vuku eteva, me katoa la ue va mene kateva ppae Jon. Vuku eteva oia, uru ngai etikirighi ghe lao sio ta ghaitu (7) ale manga tale provinsi eteva eEisia, tale anua ateva ghaine ita aseasea va Teki. Jon ghe auliaala unna nitaatara atea ta Iesu, vara me ghe pitila uru ngai tale kateva kateva ale manga. Sapta 4-22 eaauliaa unna nitaatara Jon, ghe tarala voto epona liu, me voto atoa aue la lutu epona liu me tale kosa ateva oia. Jon ghe pitila tale oroi niaimatootongana, me karika malumina tani kila malloeana. Jon eaauliaa airuuruu eteva niaisakei, me tokatokaaira kapuna atoa God tale ouna ateva anua eJerusalem.

Tani kila amuemua

Aitiutiu tale inangari 1:1-8
 Ghaitukirighi uru ngai 1:9-3:22
 Ghaitu airarrangasi 4:1-8:6
 Ghaitu taue 8:1-11:19
 Ghaitu aimatootongana 11:15-16:1
 Ghaitu vilau pelete 15:1-16:21
 Ghaitu nippooaa 16:17-19:21
 Ouna ateva epona liu me kosa 20:1-22:7
 Airuuruu tale inangari 22:8-21

¹ Niaulia ngaotu eaauliaa Iesu Karisto, God ghe taula isaa oia inangari etana, tani apasunga ta kapuna tau ngai nongonongo anna atoa sa ateva ghaisa ngarighi elutu. Ghe suula kapuna ensolo ateva tani sio apasunga ta Jon, kapuna tau ngai nongonongo anna ia. ² Aghi Jon aghe tara akapaailiila voto akapaaili me aghaasaoki va inangari oia inangarina God, me inangari inangarina Iesu Karisto, me aghi aue va, inangari oia koronna. ³ Niarangise ta lo ateva eritiriti inangari tale isaa oia inangari propesi. Me niarangise ta lo atoa la nongonongo me la usilaa saa llo aghe pitila, poli nau ange aakalakalaa.

Jon ghe piti lao sio inangari ta ghaitu ale manga

⁴ Uru ngai Jon ghe piti lao sio ta ghaitu (7) ale manga tale provinsi eteva eEisia.

Alooloo sae va maamasinaane me luei aue etoka etaimim, ekasukasu ta God etokatoka ghaine, me ghe tokala arau me auena emae, me ta ghaitu spiriti la tokatoka emua tale unna aitokatoka ateva God, kingi ia, ⁵ me ta Iesu Karisto, ia eaaulia ngakoronna inangarina akapa God, me aitiutiu ia tani totu ta lo atoa matena ila, me eaaitoiaa kingi ekapa atoa tale kosa ateva.

Ta ngetana ghe aielousieinitala, me ghe asaangitala tale kaluita ssavoto tale raena ateva, ⁶ ghe suitoongainitala va ita kingi me pristi tani uungu ta kapuna God ateva, Tamane ia. Ita taue sae me aue eaitoiaa voto akapa nau ekapa atoa. Koronna.

⁷ Tarala, aue emae tale urukookoo,

1:1: Aotu 22:6. **1:3:** Aotu 22:7, 10. **1:4:** Eks 3:14-15; Aotu 3:1; 4:5. **1:5:** Kol 1:18; Sams 89:27. **1:6:** 1 Pita 2:9; Aotu 5:10; 20:6. **1:7:** Den 7:13; Sek 12:10; Mat 24:30; Jon 19:34-37; 1 Tes 4:17.

me taumattu ngakapa atoa aue la taraia,
me lo atoa laghe soaiela

me taumattu ngakapaaili etoa tale kosa ateva aue la alousiusi mausina.
Ue, koronna.

⁸ Vau ngepona ateva God ghe uela va, “Aghi alpa me omega* ieghi,† atokatoka ghaine me aghe tokala arau me auena amae. Aghi God ateva sarasarakanaaili ieghi.”

Nitaatara atea tale Natuna ateva Taumattu ngateva

⁹ Aghi Jon, kapuimim tau ngaiesoaa ieghi, me kapuimmi ieghi tale nimmarikana, me ararimangali me nitingina akorokorongana, isaa o llo ita ghaaghaa mausi Iesu. Laghe atokaieghila tale patunganua ateva ePatmos mausi inangarina ateva God me tee inangarina ateva Iesu. ¹⁰ Tale nauna ateva Vau ngepona ateva kapuna Spiriti eteva God ghe tokala etaghi, me emuli etaghi aghe nongola lingi ngalo ateva arova taue ateva. ¹¹ Ghe uela etaghi va, “Upiti tale vuku eteva saa llo angu tarala me utau lao tale ale manga ghaitu, eIpises, Smena, Pegamom, Taeataera, Sadis, Piladelpia, me Laodesia.”

¹² Vara me aghe kirieghila tani taatara lao tale lingi ngalo ateva ghe samasama teeieghi, me nau eteva aghe kirieghila, aghe tarala ghaituae aitingina lam laghe gheleila tale gol. ¹³ Elome tale ghaituae (7) aitingina lam, kateva taumattu arova natuna ia taumattu ngateva,‡ kaliona atiulu ghe aakou llusi sio kkena, me tuku kalio ateva (arova ses ateva) ghe vaovaoa ta sauna ateva, laghe gheleila tale gol. ¹⁴ Uu nguruna usousoanaaili nongina uu sipsipi, me usousoane tee nongina urukookoo ateva usousoana ia, me matana alua nongina ramerame kura atea. ¹⁵ Kkena aluelange ravaravaianaaili nongina brasi laghe tungila tale kura atea, me lingi ngalona ateva nonginaaili kotoo ateva eaasuu. ¹⁶ Nimana muenna atelange ghe posoposo katto ghaitu, me baenata ateva pai ekapa aluevilau matarroke ilalua ghe ghoa ta paana. Me matane ghe lallaa nonginaaili mallangi sinaka ateva.

¹⁷ Nau aghe taraiela, aghe katuula ta liue kkena arova matena aghi. Ghe saoaala nimana muenna atelange etaghi, me ghe uela va, “Urau mene matautu. Aghi aitiutiu ieghi me airuuruu ieghi. ¹⁸ Aghi oia maulue ieghi, aghe matela, me tarala, maulue ieghi tale nau ekapaaili etoa, me aghi auunusi kii etoa tale nimate me Hades.

¹⁹ “Liuna avalua o me upiti elokoi sio saa voto angu tarala, voto ghaine me voto auena elutu. ²⁰ Katto ghaitu utarala tale nimaghi muenna atelange me ghaituae aitiitinginane lam, malloeane isaa avalua toko. Katto ghaitu, eaaimatoonga ensolo atoa§ tale ghaitu ale manga, me ghaituae aitingina lam eaaimatoonga ghaitu ale manga.

2

Inangari tale ale manga ateva eIpises

¹ “Upiti isaa toko inangari elao ta ensolo ateva* tale ale manga ateva eIpises.

1:8: Aotu 21:6; 22:13. * **1:8:** alpa me omega Alpa aitiutiu eteva tale mata nginangari nge Grik, me omega airuuruu eteva. † **1:8:** Kasina uru ngai laghe pitila, laghe mene uela va, me aghi aitiutiu ieghi me airuuruu ieghi. **1:13:** Den 7:13; 10:5. ‡ **1:13:** kateva taumattu arova natuna ia taumattu ngateva Utara Deniol 7:13. § **1:14:** Esik 43:2; Den 7:9; 10:6; Aotu 2:18; 19:12. **1:16:** Hib 4:12; Aotu 2:12; 19:15. **1:17:** Ais 44:6; 48:12; Aotu 2:8; 22:13. § **1:20:** ensolo atoa o tau ngai kasuaa inangari etoa. **2:1:** Aotu 1:16. * **2:1:** ensolo ateva o tau ngai kasuaa inangari eteva.

“Inangarina toko lo ateva eposoposo ghaitu katto tale nimane muenna atelange me ekasukasu elome tale ghaituae aitingina lam laghe gheleila tale gol. ² Akilakila gheeleiaam me uunguaam aanasa, me karika ughe sio asoasooa nau ughe ghaala nimmarikana. Akilakila va karika ughe anna sesa taumattu ngatoa. Ughe tootoongainilala lo atoa la ue va apostolo ila o me karika, me ughe kilala va la nim kamekame. ³ Karika ughe laa sio asoasooa nau ughe soula maate mausi ararighi eteae me karika ughe mangoola.

⁴ “Me isaa oia karika nga maamasieinio poli ughe kasu vulila aitiutiu eteva niaielousi. ⁵ Umene nnaa eaa ughe tokatoka me angu ghe katuu vulula ia o voto ateva. Unna ngaioghioghiaa me ughelei llo ughe ghelei ekasina. Arova utam nna ngaioghioghiaa aue amae etam me aghaa velu unem aitingina lam atea nongina etiitingina. ⁶ Me kateva masi voto ugheleia ghulughuluena ia: Utam anna voto lo atoa la usilaa Nikolaos la ghelei, aghi tee atam anna.

⁷ “Lo ateva talingane manee tani nongo, aue enongo llo Spiriti eteva eaaulieinia tale ale manga atoa. Lo ateva eapala aue atau velua me enama uene ai maulue atea etiitingina tale umana paa ngutana atingiu God.’

Inangari tale ale manga ateva eSmena

⁸ “Upiti isaa toko inangari elao ta ensolo ateva tale ale manga ateva eSmena.

“Inangarina toko lo ateva aitiutiu ia me airuuruu ia, ghe matela, me ghe mene sakesakela. ⁹ Akilakila mmarikana uaateatea me karika tue peipeina io me karika, ta tau peipeina io. Akilakila va lo atoa la ue va ajiu ila o me karika, ta alena nivelu eitauaa ila Satana, la aauliaa teeio. ¹⁰ Urau mene matauta voto ange anna tani gheleio ummarikana. Aghauliaa kiem va Raroai eteva ange anna tani atoka sso katoa etaimim tale ale mata voovoo tani tootoongainam, me aue ummarikana nau la ghelei voto karika masina aue eroo kasangaulu (10) nau. Uaikaia ngakororongana arongona ta arova umate, me aue atau aatu kou nguru maulue ateva.

¹¹ “Lo ateva talingane manee tani nongo, aue enongo sa ateva Spiriti eteva eaaulieinia tale ale manga atoa. Lo ateva eapala karika aue eghaa sesa tale aiaaghaluene atea nimate.’

Inangari tale ale manga ateva ePegamom

¹² “Upiti isaa toko inangari elao ta ensolo ateva tale ale manga ateva ePegamom.

“Inangarina toko lo ateva euunusi baenata ateva matarroke pai ekapa aluevilau. ¹³ Akilakila eaa utokatoka, utokatoka tale voto ateva Satana eaaitarainia. Me karika, ta uaakoronna tale ararighi eteae, karika ughe oghi vulu aikaiaam etaghi nau tee ta nau Antipas, ghe aulia ngakoronna inangarina akapa God, me laghe uvi emateala tale masalikim atea, masaliki taatara ia Satana etokatoka etana.

¹⁴ “Me kasina voto karika amaamasiaa etam. Kasina taumattu elome etam, la posoposo parasi llo voto Baelam ghe apasungaala. Ghe apasungaala ta Balak vaalua tani kame aIsraeli etoa me la ghelei ssavoto nau laghe namala inana laghe gheleila aiaavusuvusuena sae ta tootoo goto atoa etana, me laghe kupi tee ssola tale uunguaa niilai salosalooa.

¹⁵ Tale ia nonga o ase salana atikirighi katoa elome etam la aaimuli tee

lo atoa laghe aaimuli tee inangarina Nikolaos. ¹⁶ Liuna avalua o me unna ngaioghioghiaa poli arou mae parasi etam me aghaiuvii tee isaa o taumattu tale baenata ateva matarroke akapa pai eluevilau tale paaghi eteva.

¹⁷ “Lo ateva talingane manee tani nongo, aue enongo sa ateva Spiriti eteva eaaulieinia tale ale manga atoa. Lo ateva eapala aue ataula kasina tani mena aisuliaane. Aue ataula tee atu eteva usousoana ia ouna atea arari pitipiti ia etana, karika teva aue ekila ia o arari eteae ta llo nonga ateva aue ghaaia.’

Inangari tale ale manga ateva eTaeataera

¹⁸ “Upiti isaa toko inangari elao tale ensolo ateva tale ale manga ateva eTaeataera.

“Inangarina toko Natuna ateva God, matane arova kura atea eram-erame, me kkena arova brasi ravaravaienaaili. ¹⁹ Akilakila gheeleiaam, aailousiaam, aikaaiaam, me niuungu ugheelei me karika usio asoasooa nau ughe ghaaghaa nimmarikana. Me tale isaa oia nau ugheelei oroieili voto elaulau voto ughe gheelei ekasina.

²⁰ “Me kasina llo karika amaamasiaa etam. Isaa avalua toko va, utautau velu ia o vause ateva Jesebel etana, eue va propete ia, tale voto eaapasunga, ekamekame kapughu tau ngai uungu etoa, la kupikupi sso tale uunguaa niailai salosalooa me tani nama inana la gheelei sae aiaavususuena etana tale tootoo goto atoa. ²¹ Aghe taula nauna tani nna ngaioghioghiaa tale uunguaane niailai salosalooa see me karika eaaloanna. ²² Liuna avalua o me aue aghalokoie sio tale komo nighaa mmarikana, me aue aghelei lo atoa la laolao etana aue la mmarikana saasakiaa, arova la tam nna ngaioghioghiaa tale uunguaane atoa. ²³ Aue auvi emate lo atoa la ghaaimuli teeia tale nimate atea. Me ila akapa ale manga atoa aue la kila va aghi lo ateva etaatara aikoliaa urunguita me nannaa, me aue aliu aipoliimim kateva kateva tale voto am gheelei. ²⁴ Me ta lo atoa ona eTaeataera am ghe tam aimuli teela llo ghe aapasunga, me karika am ghe annala tani kila voto la asease va “kanna voto Satana aisuliaane,” karika aue asooa sae mene righi maate etaimim. ²⁵ Isaa o voto etaimim, am poso parasi lomosi ta amae.

²⁶ “Ta lo ateva eapala me egheelei aaloannaaghi lomosi ta elaa ghaa airuuruu, aue ataula matuutuliena tani aitaraa mene katoa patunganua.

²⁷ “ ‘Me ia aue eaitoieinila tale aikkatulu etiulu aeana ia me aue eparu reerekatainila nongina sospena ateva gheelei ia tale kosa maramarakana,”

nongina aghi aghe ghaala matuutuliena ta Tamaghi. ²⁸ Me aue atau teela katto pai eteva. ²⁹ Lo ateva talingane manee tani nongo, aue enongo sa ateva Spiriti eteva eaaulieinia tale ale manga atoa.’

3

Inangari tale ale manga ateva eSadis

¹ “Upiti isaa toko inangari elao ta ensolo ateva* tale ale manga ateva eSadis.

“Inangarina toko lo ateva eposoposo ghaitu (7) spiriti kanna God me ghaitu katto. Akilakila uunguaam, uunguaam egheelei taumattu la

2:17: Eks 16:4, 14-15, 33-34; Jon 6:48-50; Ais 62:2. **2:18:** Aotu 1:14-15. **2:20:** 1 Ki 16:31; 2 Ki 9:22. **2:23:** Sams 7:9; Jer 17:10; Aotu 20:12-13. **2:25:** Aotu 3:11. **2:26:** Sams 2:8-9. **2:28:** Aotu 22:16. **3:1:** Aotu 1:4, 16. * **3:1:** ensolo ateva o tau ngai kasuaa inangari eteva.

ghaannaa va mauue io, me karika, ta matena io. ² Anguu taatarala! Me uakorokorongana tuku airuuruu erighi niuungu, erau mate akapa. Karika aghe tarala righi voto ughe ghelei eroorooaala ta matana kapughu Goto ateva. ³ Annaa lao sio sa ateva ughe ghaaiela me ughe nongoala. Uaimulusi tee, me unna ngaioghioghiaa, me arova utam anguu taatara atoka, aue amae nongina teva tau niainao me karika aue ukila saa nau eteva aue arekata mae etam.

⁴ “Ghaisa pai nonga kapum taumattu eSadis, karika laghe ghelei ekulukulutanala uneira aiaasae. Aue la kasu eitauaa teeieghi, me aue la asae aiaasae ateva usousoana ia, poli masinaaili gheegheleiaaira. ⁵ Lo ateva eapala aue easae aiaasae ateva usousoana ia nongina ila, me karika aue aseï velu ararina tale vuku mauue ateva, me aue aghauliaa ta Tamaghi me kapuna ensolo atoa va kapughu ila. ⁶ Lo ateva talingane manee tani nongo, aue enongo sa ateva Spiriti eteva eaaulieinia tale ale manga atoa.’

Inangari tale ale manga ateva ePiladelpia

⁷ “Upiti isaa toko inangari elao ta ensolo ateva tale ale manga ateva ePiladelpia.

“Inangarina toko lo ateva manga ia me koronna ia, eposoposo kii eteva ta Deivit, sa ateva eotia, karika teva erooroo tani kavatia, me sa ateva ekavatia, karika teva erooroo tani otia. ⁸ Akilakila uunguaam. Tarala, ngaotila atamana atea ta matam, karika teva aue ekavatia. Akilakila va sarasarakaniaam ghaunaaili, me ughe aitaraa inangarighi me karika ughe ue va karika ukilakila ararighi eteae. ⁹ Aue aghelei lo atoa tale alena ale nivelu eitaua ngateva Satana, la ue va ila ajiu ila, me karika va ajiu ila, ta tau nikamekame ila, aue agheleila la mae me la tturru sio tale liue kkem, me aue la aulia ngaotu va aghaailousieinio. ¹⁰ Poli ughe tani aimuli usi tee inangari aghe aauliaa tani tingina akorokorongana nau ughaaghaa nimmarrkana, aue aghaitarainio tale nau nitootoonga emae tale kosa akapa ateva oia tani tootoonga lo atoa la tokatoka etana.

¹¹ “Ghaisa ngarighi amae. Isaa o voto etam, uposo parasi, me karika teva aue eghaa unem kou nguru eteva. ¹² Lo ateva eapala aue aghatinginaia nongina ttulu tale alena ale manga ateva kapughu Goto ateva, me karika aue ekasu vulia. Aue apiti epona etana ararina atea kapughu Goto ateva, me arari masalikina atea kapughu Goto ateva, ouna ateva eJerusalem, ekasu epona liu tale kapughu Goto ateva, me aue apiti tee ararighi eteae ouna ia etana. ¹³ Lo ateva talingane manee tani nongo, aue enongo sa ateva Spiriti eteva eaaulieinia tale ale manga atoa.’

Inangari tale ale manga ateva eLaodesia

¹⁴ “Upiti isaa toko inangari elao ta ensolo ateva tale ale manga ateva eLaodesia.

“Inangari toko inangarina lo ateva koronna ia, eaaulia ngakoronna inangarina akapa God, eaaitoiaa voto akapaaili God ghe gheleila. ¹⁵ Akilakila uunguaam, karika va makarringe io o aanasa io, aghanna va ughele kateva etairarua. ¹⁶ Poli mala aanasa io, karika makarringe io me karika aanasa io, ghaisa ngarighi aue akanusu veluo ghoa ta paaghi. ¹⁷ Uue va, “Aghi tau peipeina aghi me ngaghele ghaa tokala peighi

3:3: Mat 24:43-44; Aotu 2:5; 16:15; 1 Tes 5:2. **3:4:** Jiud 23. **3:5:** Eks 32:32-33; Mat 10:32; Luk 12:8. **3:7:** Ais 22:22. **3:8:** 1 Ko 16:9. **3:9:** Aotu 2:9. **3:10:** Luk 21:19; 2 Tim 2:12. **3:12:** Ais 62:2; 65:15; Aotu 14:1; 21:2. **3:15:** Rom 12:11. **3:17:** 1 Ko 4:8; Luk 12:21.

etoa, karika amene aloanna righi voto,” me karika ukilakila va karika umasimasi, la aalousiusi mausim, karika righi peim, mata salusalu io me karika kaliom. ¹⁸ Aghaauliaa tootoonga etam va upoli mae etaghi golo ateva laghe tungi eraarangisanaiela tale kura atea, me aue utau peipeina, me upoli usousoana ateva aiaasae tani asae runga tale vilikim, tani akou runga palata ateva etam, me upoli marasina mata ateva tani atokaia tale matam me aue utaataa amasina.

¹⁹ “Lo atoa aghailousieinila aparuparula tale sesa gheegheleiaaira va la masina. Am anna ngamasina me am nna ngaioghioghiaa. ²⁰ Aghi toko atitingina tale atamana atea me amirimiri me akolokolo, arova lo ateva enongo lingi aloghu eteva me eoti atamana atea, aue akupi sso tani namanama teeia, me aue enamanama teeieghi.

²¹ “Ta lo ateva eapala aue aghauliaa etana tani toka sio teeieghi tale uneghi aitokatoka ateva unna ia king, nongina aghi aghe apalala me aghe toka teela Tamaghi tale unna aitokatoka ateva unna ia king. ²² Lo ateva talingane manee tani nongo, aue enongo sa ateva Spiriti eteva eaaulieinia tale ale manga atoa.’”

4

Aitokatokane ateva kingi epona liu

¹ Vara me aghe mene taatarala, me emua etaghi aghe tarala atamana atea ghe otioti etingina ia epona liu, me aghe nongola lingi ngalo ateva ngaghe nongoala amua arova taue ateva ghe uela va, “Sae mae toko, me aghapasunga etam sa ateva aue elutu auena.” ² Arovaeangaili ta Spiriti eteva ghe tokala etaghi me emua etaghi aghe tarala aitokatokane ateva kingi epona liu me kateva ghe tokatoka etana. ³ Me lo ateva ghe tokatoka, taataraane arova masi atu eteva la aseasea va jaspera ia me mene kateva masi ngatu raeraeana ia la aseasea va kanalien. Me renbo ateva eaaimatoonga kala ngateva soanna ia la aseasea va emerol, ghe taataliaa aitokatokane ateva kingi. ⁴ Mene ghaluengaulu ghaata (24) aitokatokane kingi uneira ghaluengaulu ghaata (24) namuu laghe taatalia ngatoka aitokatokane ateva kingi. Laghe molumolu tale ghinna usousoana me kou nguru laghe aatoka ta uruira, laghe gheleila tale gol. ⁵ Ravaravaia ateva ghe kasukasu tale aitokatokane ateva kingi, me palapalanga ateva ghe aakurrua. Emua tale aitokatokane ateva kingi ghaituae (7) lam ghe ramerame, isaa o ghaitu (7) spirit kannu God. ⁶ Me tee emua tale aitokatokane ateva kingi kateva voto taataraane arova manu eteva laghe gheleleia tale ghalasi me masalaangeaili ia arova voto ateva la aseasea va kristol.

Ghaata (4) voto maulue laghe tokatoka elome, taliaa aitokatokane ateva kingi, mataira isaa emua me emuli. ⁷ Aitiutiu eteva llo maulue ia arova laeoni eteva, aiaaghalua ateva arova taita ateva vulumakao, me aiaakotolu eteva matane arova taumattu ngateva, me aiaaghaatane ateva arova savaakoroara ateva elooloo. ⁸ Kateva kateva ta ilaata o voto maulue ghaonomo (6) kaekaena, me ghe pasupasu tale mata atoa laghe taatalieinia, me laghe tokatoka pakeaa tee tale kaekaeira. Karika laghe ainoana ellaa me eleivoo tani ue va,
 “Manga, manga, manga
 Vau eteva God, sarasarakanaaili ia,
 ghe tokala me ie etokatoka me aue etoka tale nau too emaemae.”

3:18: Ais 55:1. **3:19:** 1 Ko 11:32; Hib 12:6; Aotu 2:5. **3:20:** Jon 14:23. **4:1:** Aotu 1:1, 10.
4:2: Ais 6:1. **4:3:** Esik 1:28. **4:4:** Aotu 3:18. **4:5:** Esik 1:13; Sek 4:2; Aotu 1:4; 8:5; 11:19;
 16:18. **4:6:** Esik 1:5-10, 22; 10:14. **4:8:** Ais 6:2, 3; Esik 1:18; 10:12.

⁹ Me nau voto ghaata mauue la tautaula nitau sae inasanina me nikaili emasina ta lo ateva etokatoka tale aitokatokane ateva kingi, me etokatoka nau ekapa atoa, ¹⁰ ghaluengaulu ghaata (24) namuu la tuuturru sio tapaa kosa emua ta lo ateva etokatoka tale aitokatokane ateva kingi me la kakkauaa lo ateva aue etoka nau ekapa atoa. Me la atoka sio uneira kou nguru emua tale aitokatokane ateva kingi. Me la ue va,

¹¹ “Vau ngepona ateva me kapuimami Goto ateva,
io urooro va ughaa nitau sae me nioneoneaa me sarasarakana
poli ughe gheleila voto akapaaili,
me tale aloaloannaam laghe lutula
nau ughe gheleilala.”

5

Uru ngai eteva talitali ia me natu sipsipi erighi

¹ Vara me aghe tarala nimane muenna atelange lo ateva ghe tokatoka tale aitokatokane ateva king, ghe posoposo uru ngai eteva pitipiti ekapa pai eluevilau laghe rrangasi rungainiela tale ghaitu airarrangasi. ² Me aghe tarala ensolo ateva sarasarakanaaili ia ghe aippooa nganamungailiila me ghe uela va, “See teva taumattu masinaaili urooro tani ghelei evolovoloki llo laghe ghelei erungaala me uoti uru ngai eteva talitali ia?” ³ Karika poi teva taumattu epona liu, me epona tale kosa ateva oia, me elo pakena etana, erooro tani oti uru ngai eteva talitali ia me etaatara sso etana. ⁴ Aghe tiuaala tani ngala anamungaili poli karika poi laghe tarala teva taumattu masina erooro tani oti uru ngai eteva talitali ia me tani taatara sso etana. ⁵ Vara me kateva tana namuu ghe uela etaghi va, “Urau mene ngala! Tarala, laeoni eteva eaaimatoonga ararimangalina ateva Jiuda, tuvuna ia Deivit, ange apalala, erooro tani oti uru ngai eteva talitali ia laghe rrangasi rungainiela tale ghaitu airarrangasi.”

⁶ Me aghe tarala sipsipi erighi, taataraane va arova laghe uvi emateala, ghe tiitingina nongina aitokatokane ateva king, ghaata voto mauue me namu ngatoa laghe tokatoka talieinia. Ghaituae unna kom me ghaitu matana, ila o ghaitu Spiriti kapuna ila God ghe sungilala tani lao akapa see tale kosa ateva oia. ⁷ Ghe mae sio me ghe ghaala uru ngai eteva talitali ia tale nimane muenna atelange lo ateva ghe tokatoka tale aitokatokane ateva king. ⁸ Me nau eteva ghe ghaaiela, voto mauue ghaata me ghaluengaulu ghaata (24) namuu laghe tturru siola eue tale natu sipsipi erighi, kateva kateva etaira laghe uunusi aikaukau me laghe uunusi tee pelete atoa gheeghelei tale golo me pasu tale voto tani ghelei asu eteva masi ngusungusuaane, isaa o voto kaluira pure kapuna taumattu ngatoa God.

⁹ Me laghe ueila kkinari eteae ounaaili ia, eue va

“Io nonga masina io tani ghaa uru ngai eteva talitali ia
me ughelei evolovoloki airarrangasi
poli laghe uvi emateola me tale raem ateva ughe polila kapuna taumattu
ngatoa God
tale ararimangali me tale ase nisama
me tale taumattu me tale patunganua akapa atoa.

¹⁰ Ughe gheleilala va la kingi me pristi tani uungu tale kapumami Goto ateva, me aue la aitaraa kosa ateva.”

4:10: Aotu 7:10; 19:4. **5:1:** Ais 29:11; Esik 2:9-10. **5:5:** Aitiutiu 49:9; Ais 11:1, 10; Aotu 22:16.
5:6: Sek 4:10; Jon 1:36; Aotu 13:8. **5:8:** Aotu 8:3-4; Sams 141:2. **5:9:** Sams 96:1; 98:1. **5:10:**
Eks 19:6; Ais 61:6; Aotu 1:6; 20:6.

¹¹ Aghe taatarala me aghe nongola lingi aloira ensolo atoa erooroo airari etoa, kasangaulu airari me mene oroieili kasangaulu airari etoa, laghe taatalia ngatoka voto maulue me namu ngatoa. ¹² Me laghe kikkinari enamungaili me laghe ue va,

“Natu sipsipi erighi laghe uvi emateala,

ia nonga erooroo tani tue peipeina me tani ghaa sarasarakana, nialomasaanga me nikorokorongana,

me nioneoneaa me nikaili emasina me niarangise.”

¹³ Vara me aghe nongola isaa akapaaili voto maulue epona liu me epona tale kosa ateva me elo pakena tale kosa ateva me elome tale paamanu eteva me isaa akapaaili voto atoa o laghe kikkinari sae etana,

“Lo ateva etokatoka tale aitokatokane ateva king me natu sipsipi erighi, aue lalu ghaa niarangise, nioneoneaa me sarasarakana,

nau etoa me nau ekapa atoa.”

¹⁴ Ghaata voto maulue laghe ue va, “Koronna.” Me namu ngatoa laghe tturru siola euu me laghe kkaueinilalueta.

6

Ghaitu airarrangasi laghe rrangasi rungaala uru ngai eteva talitali ia

¹ Aghe tarala nau eteva natu sipsipi erighi ghe ghelei evolovolokila mua ateva tana ghaitu airarrangasi laghe rrangasi rungaala uru ngai eteva talitali ia, vara me aghe nongola kateva tana ghaata voto maulue ghe samala nongina palapalanga ateva, ghe uela va, “Mae sio.” ² Aghe taatara me aghe tarala ooso ateva usousoana ia. Lo ateva ghe iilou etana ghe posoposo bunara ateva, me kateva ghe tau lao sio kou nguru eteva etana, me ghe iilou nongina lo ateva ange apalala niaiuvii me eaaloanna tani mene apala.

³ Nau eteva natu sipsipi erighi ghe ghelei evolovolokila aiaaghaluene ateva airarrangasi laghe rrangasi rungaala uru ngai eteva talitali ia, me aghe nongola ghaluene ateva voto maulue ghe uela va, “Mae sio.” ⁴ Vara me mene kateva ooso ghe mae sio, raeraeana ia nongina ramerame kura atea. Lo ateva ghe iilou etana, kateva ghe tau lao sio sarasarakana tani ghaa velu luei tale kosa ateva, me tani ghelei taumattu ngatoa la toka aiuvieinila, me tee ghe tau lao sio baenata ateva namungaili ia.

⁵ Nau eteva natu sipsipi erighi ghe ghelei evolovolokila kotonna ateva tana airarrangasi laghe rrangasi rungaala uru ngai eteva talitali ia, aghe nongola aiaakotonna ateva voto maulue ghe uela va, “Mae sio.” Aghe taatara, me aghe tarala voovongiena ateva ooso. Lo ateva ghe iilou etana ghe posoposo sikeli eteva tani ghaa maamaataniaa voto. ⁶ Vara me aghe nongola lo ateva ghe angarila nonginaaili lingi ngalo ateva elome tale ghaata voto maulue, ghe ue va, “Kateva beke uiti eroo kateva silva koen,* me kotolu beke bali erooroo tee kateva silva koen, me karika umene ghelei saasakiaa oeli me uaeni.”

⁷ Nau eteva natu sipsipi erighi ghe ghelei evolovolokila aiaaghaatane ateva airarrangasi laghe rrangasi rungaala uru ngai eteva talitali ia, aghe nongola lingi ngalona ateva aiaaghaatane ateva voto maulue ghe uela va, “Mae sio.” ⁸ Aghe taatara me aghe tarala ooso ateva taataraane nim mala usousoana ia. Lo ateva ghe iilou etana la kolokoloa va Nimate, me Hades ghe aimuli ekalakala ngatoka etana. Me kateva ghe tau lao sio etairarua matuutuliena tale tuku kateva tale pai ghaata tale kosa ateva, tani aiuvi

5:11: Den 7:10; Hib 12:22. **6:1:** Aotu 4:6; 5:1. **6:2:** Sek 1:8; 6:1-6. * **6:6:** silva koen silva koen (denarius) apolina kateva nau. **6:8:** Esik 14:21; 5:17; Jer 15:1-3.

emate tale baenata, maloo me isiki, me llo ghaata kkena karika la aitaraa tale kosa ateva.

⁹ Nau eteva ghe ghelei evolovokila ghalimane ateva airarrangasi laghe rrangasi rungaala uru ngai eteva talitali ia, aghe tarala elo pakena tale liu nighelei aiaavusuvusuena ateva, taumattu laghe uvi ematela poli inangarina ateva God me tale kiukiu laghe aaulia ngaotu. ¹⁰ Laghe sama anamungailiila, laghe uela va, “Vau palepale eteva, manga io me koronna io, lovisaa eghaa nau uma e ghelei niaisakei tale taumattu tale kosa ateva me uliu lao ta lo atoa laghe gheleila raemami ghe akalala?” ¹¹ Me kateva kateva etaira ghe ghaala aiaasae ateva usousoana ia. Me God ghe uela etaira va la toka toitoi mene righi mua nau, lomosina ta la uvi emate kasina aruu tana tau ngai uungu me tau ngaiesoa ngatoa nongina ila tani rooaa isaa o voto.

¹² Nau eteva ghe ghelei evolovokila aiaaghaonomina ateva airarrangasi laghe rrangasi rungaala uru ngai eteva talitali ia, me kinatama rukeruke ateva, me sinaka ateva ghe voovongienala nongina teva aiaasae la ghaasae tale nau nialousiusi, laghe gheleila tale uu meemee, me ulana akapa ateva ghe raeraeanala nongina rae, ¹³ me katto atoa laghe katuula elomarase me laghe sio mae tale kosa ateva, nonginaaili uene fig ateae ghe tam matue me ekaokao nau eteva kinatama kuukuu eteva. ¹⁴ Elomarase ghe aikapakapaiila nongina uru ngai talitali eteva la talitalia. Patunganua akapa atoa me motouru ekapa atoa laghe kasu vulila nongina laghe tokatoka.

¹⁵ Me ila akapa kingi tale kosa ateva, namu ngatoa, tau ngai toitoi tale tau ngai uvii etoa, tau peipeina atoa, sarasarakana atoa, lo atoa la uungu karika la tokatoka tale aloannaaira, me lo atoa la nim tokatoka tale aloannaaira, ila akapa laghe aaisulia tale lienga me tale kinatama atu etoa tale motouru, ¹⁶ me laghe kolokolo lao tale motouru etoa me tale atu etoa va, “Am katuu saooa etaimami me am aisulieinamami tale lo ateva etokatoka tale aitokatokane ateva kingi me tale sessaiaane natu sipsipi erighi, ¹⁷ ta poli kinatama nau eteva sessaiaairarua ange mae sio, me see aue eroo tani tingina akorokorongana?”

7

144,000 gheeghelei runga

¹ Vara me aghe tarala ensolo ghaata laata ghe tiitingina tale aighoughou ghaata tale kosa ateva. Laata ghe posoposo parasi etoka kuukuu ghaata tale kosa ateva tani ghelei erunga ase kuukuu etoa va la rau mene kuu saasakiaa elae me tale paamanu me epona tale ai etoa. ² Vara me aghe tarala mene kateva ensolo ghe kasula tale pai sinaka esae ativilau, ghe posoposo aimatootoongana ateva unna ia God. Ghe kolokolo anamuu lao sio tale ensolo ghaata laata ghe posoposo sarasarakana tani ghelei saasakiaa kosa ateva me paamanu eteva. ³ Ghe ue va, “Karika am mene ghelei saasakiaa kosa ateva me paamanu eteva me ai etoa, lomosina ta ami atoka aimatootoongana tale patilakaira kapuna tau ngai uungu etoa kapuita Goto ateva.” ⁴ Vara me aghe nongola kateva ghe asela lo atoa laghe ghaala aimatootoongana ateva kanna ia God: kateva ai me ghaatingaulu ghaata airari (144,000) taumattu tale ila akapa ararimangali etoa eIsraeli.

6:11: Aotu 7:9, 13; 19:14. **6:12:** Mat 24:29; Apos 2:20; Aotu 8:12; 11:13; 16:18. **6:13:** Ais 34:4.
6:14: Aotu 16:20. **6:15:** Ais 2:10, 19, 21. **6:16:** Luk 23:30. **6:17:** Joel 2:11; Mal 3:2. **7:1:** Jer 49:36; Den 7:2. **7:3:** Esik 9:4, 6; Aotu 9:4. **7:4:** Aotu 14:1, 3.

⁵ Tale ararimangalina ateva Jiuda, 12,000 taumattu laghe ghaala aima-tootoongana ateva kanna ia God,
 me tale ararimangalina ateva Ruben, 12,000,
 me tale ararimangalina ateva Gad, 12,000,
⁶ me tale ararimangalina ateva Asa, 12,000,
 me tale ararimangalina ateva Naptalae, 12,000,
 me tale ararimangalina ateva Manasa, 12,000,
⁷ me tale ararimangalina ateva Simion, 12,000,
 me tale ararimangalina ateva Livae, 12,000,
 me tale ararimangalina ateva Isika, 12,000,
⁸ me tale ararimangalina ateva Sebulon, 12,000,
 me tale ararimangalina ateva Josep, 12,000,
 me tale ararimangalina ateva Benjamin, 12,000.

Oroieili taumattu ngatoa laghe molumolu tale usousoana aiaasae

⁹ Vara me aghe tarala taumattu ngatoa oroienaaili ila, karika teva erooroo tani ioila, tale anua atoa, me tale ararimangali etoa, me tale taumattu ngatoa, me tale asease nisama atoa, laghe tiitingina emua tale aitokatokane ateva kingi me emua tale natu sipsipi erighi. Laghe aasae aiaasae usousoana me laghe posoposo laa ootou ta nimaira. ¹⁰ Me laghe tautau sae ararina atea God me laghe ue va,
 “Salana tani saanga kanna kapuita Goto ateva,
 ia etokatoka tale aitokatokane ateva kingi,
 me tee natu sipsipi erighi.”

¹¹ Ensolo atoa laghe tiitingina talia aitokatokane ateva kingi me laghe tiitingina talia namu ngatoa me ghaata voto maulue. Ila akapa laghe tuuturru siola euu tani kkaua God. ¹² Laghe ue va,
 “Koronna!
 Nitau sae, me inasanina
 me nialomasaanga me nikaili emasina me nioneoneaa
 me nisarasarakana
 elao ta kapuita Goto ateva aue etoka nau ekapa atoa.
 Koronna!”

¹³ Vara me kateva tana namuu ghe kolomieghila va, “Lo atoa la molumolu tale usousoana — see ila, me eaa laghe kasula?”

¹⁴ Aghe liula me aghe uela va, “Vau eteva, ukilakila.”

Me ghe uela va, “Lo atoa ona laghe kupi ghoa mae tale kinatama nau sesaaili. Laghe porala ghinnaniira me laghe ghelei eusousoanala tale raena ateva natu sipsipi erighi. ¹⁵ Liuna avalua o me,
 “la tiitingina emua tale aitokatokane ateva God,
 me la uungu ta ngetana llaa me voo elome tale alena ale manga ateva;
 me lo ateva etokatoka tale aitokatokane ateva king aue epule me eakoula
 tale unna kandisi eteva.

¹⁶ Karika aue la mene maloo,
 karika aue la mene kangngata,
 sinaka ateva karika aue epalangila,
 me karika aue esinaki ekulukulukila.

¹⁷ Ta natu sipsipi erighi elome tale aitokatokane ateva king aue kapuira tau ngai toitoi ia,
 aue ekasueinila lao tale ateo akaakala atoa tokatoka liu ila,
 me God aue esei velu rarum mata tale mataira.”

8

Ghaituna ateva airarrangasi gheeghelei runga ia me aikaai niaiaavusuvusuena ateva

¹ Nau eteva ghe ghelei evolovokila ghaituna ateva airarrangasi laghe rrangasi rungaala uru ngai eteva talitali ia, me epona liu karika righi niaimasamasaanga ghaisa ngarighi ghe roo pai kativilau tale kateva aoa.

² Me aghe tarala ghaitu (7) ensolo nau ekapa atoa la tiitingina emua ta God, me laghe tau lao sio ghaitu taue etaira.

³ Kateva tana ensolo ghe uunusi aikaai niaiaavusuvusuena gheegheleia tale gol, ghe mae sio me ghe tingina valaala tale liu nighelei aiaavusuvusuena ateva. Laghe tau lao sio oroienaaili voto tani ghelei masi ngusun-gusuaane tani ghelei aiaavusuvusuena, me tee kaluira nilooloo sae kapuna taumattu ngatoa God epona tale olta ngateva gheelei ia tale gol emua tale aitokatokane ateva king. ⁴ Asu niaiaavusuvusuena ateva me kaluira nilooloo sae kapuna taumattu ngatoa God laghe saela ta God tale aikaai niaiaavusuvusuena ateva ensolo ateva ghe uunusia. ⁵ Vara me ensolo ateva ghe ghaala aikaai niaiaavusuvusuena ateva me ghe kaaila kura atea tale liu nighelei aiaavusuvusuena ateva me ghe kao velue siola tale kosa ateva, me palapalanga ateva ghe akurruela, me ravaravaia ateva ghe ravaiela me ghe rukela kosa ateva.

Ghaitu taue

⁶ Vara me ghaitu ensolo laghe posoposo ghaitu taue laghe aipanipaniaala tani vuu.

⁷ Aitiutiu eteva ensolo ghe vuula unna ateva tani taue, me vaoo ateva korokoronganiaane nongina atu, me kura atea, me rae ateva, lotolu ghe mae aitauaa sio tale kosa ateva, nau laghe sau velu sio mae tale kosa ateva. Me ghe atala aiaakotolu etivilau pai tale kosa ateva me tee ghe atala aiaakotolu etivilau pai tale ai etoa me rarrasa akapa atoa maulue ila.

⁸ Aiaaghaluene ateva ensolo ghe vuula unna ateva taue, me kinatama voto ateva arova motouru eteva ghe rameaala me ghe velue ghoala elamana, me aiaakotolu etivilau pai tale manu eteva ghe raela, ⁹ me aiaakotolu etivilau pai tale voto atoa maulue ila tale paamanu eteva laghe matela, me aiaakotolu etivilau pai tale paanaka atoa me anua atoa tale ia o paamanu eteva laghe turungilala.

¹⁰ Aiaakotonna ateva ensolo ghe vuula unna ateva tani taue, me kinatama katto ateva ghe katu sio mae eunaakookoo, mallangina ateva nonginaaili teae usulu ghe ramerame, ghe sio mae tale aiaakotolu etivilau pai tale kinatama ateo akaakala atoa, me tale lutu ateo atoa. ¹¹ Katto ateva ararina atea ta Kaakaalina. Aiaakotolu etivilau pai tale ateo atoa ghe kaakaalinala, me oroieili taumattu ngatoa laghe matela tale manu kaakaalina.

¹² Aiaaghaatane ateva ensolo ghe vuula unna ateva taue, me aiaakotolu etivilau pai tale sinaka ateva, me ulena ateva me katto atoa, laghe saurromla, me aiaakotolu etivilau pai tale llaa karika ghe mallangala, me tee aiaakotolu etivilau pai tale voo ngateva karika ghe mallangala.

¹³ Vara aghe toka taatara me aghe nongola savaakoroara ateva ghe looloo elomarase me ghe ovaova ghe ue va, "Alousiusi, alousiusi, alousiusi ta lo atoa am tokatoka tale kosa ateva oia, poli sa ateva aue elutu etaimim nau eteva ensolo kotolu airuuruu lotolu vuu uneirotolu taue."

9

¹ Aiaaghalima ateva ensolo ghe vuula unna ateva taue, me aghe tarala katto ateva ghe katu sio mae eunaakookoo me ghe sio mae tale kosa ateva, laghe tau lao sio kii eteva pei tale liu eteva karika righi aioghioghi etana. ² Nau eteva ghe otila liu eteva, asu eteva ghe sae mae nongina va asu kinatama nginei eteva. Sinaka ateva me elomarase ghe saurromla tale asuna ateva liu eteva. ³ Me tale asu eteva toto atoa laghe sio mae tale kosa ateva me laghe tau lao sio sarasarakana ta toto atoa nongina sarasarakaniaa onioni tale kosa ateva. ⁴ Laghe uela etaira va la rau mene tturuu rarrasa me voto epiipinosa me ai etoa tale kosa ateva. La tturuu nonga taumattu ensolo ateva karika ghe atokala unna aimatootongana ateva God tale patilakaira. ⁵ Karika laghe tau lao sio sarasarakana tani uvi ematela, ta la nim toka ghelei emmarikanaila tale ghalima ulana, me nimmarikana la ghaa aue nongina onioni eteva eonioni. ⁶ Tale isaa o nau, taumattu aue la pae nimate me karika aue eghaaila, me aue la alonaaili tani mate, me nimate ateva aue eilou vulila.

⁷ Toto atoa taataraira nongina ooso atoa la aimanomanosiaa tani laa aiuvii. Epona tale uruira la aatoka voto nongina kou nguru etoa gheeghelei tale gol, me mataira akapa atoa nongina mataira taumattu ngatoa. ⁸ Uu nguruira nongina uu nguruira vause atoa, me ngalungaluiria nongina ngalungalu laeoni. ⁹ Aighelei runga kassauira nongina llo aighelei runga kassauira taumattu ngatoa gheeghelei tale aeana, me lingi kaekaeira ghe aangari nongina oroieili ooso atoa la aeae ai-ilou la iilou tani laa aiuvii. ¹⁰ Uiira nongina onioni eteva eonioni, me sarasarakaniaaira etokatoka tale uiira tani ghelei saasakiaa taumattu ngatoa erooroo ghalima ulana. ¹¹ Kapuira kingi eteva eaaitara ngakapaila, ia o ensolo ateva tale liu, ararina atea tale inangari nge Hibu la ue va Abaddon, me ta Grik la ue va Apolion.*

¹² Aitiutiu eteva sesa nau ang ghe lange sio, me kasi ghalua sesa nau karika lalu ghe mae.

¹³ Aiaaghaonomina ateva ensolo ghe vuula unna ateva taue, me aghe nongola lingi ngalo ateva ghe mae sio tale ghaata aissopiaa tale olta ngateva ghelei ia tale gol nongina God etokatoka. ¹⁴ Ghe ue tale aiaaghaonomina ateva ensolo ghe uunusi taue ateva va, “Tau vella ensolo ghaata la ghe iri etokailaatala tale kinatama ateo akaakala atea eIupreitis.” ¹⁵ Me ilaata o ensolo ghaata laata ghe nim toka aimanomanosiaa tale ia o aoa ngateva, nau eteva, ulana ateva me ninamanama atea, laghe tau vellaata tani uvi emate taumattu tale aiaakotolu etivilau pai tale kosa ateva. ¹⁶ Isaa akapaaili tau ngai uvii laghe iilou tale ooso aghe nongola erooroo 200,000,000.

¹⁷ Tale uneghi nitaatara atea aghe tarala avalue toko va: ooso atoa me lo atoa la ghe iilou etaira, uneira aighelei runga kassauira raeraeana nongina kura atea me savuluvulungana me talakiena nongina salpa ngateva, uruira ooso atoa taataraira nongina uruira laeoni etoa, me kura me asu me salpa ghe ghoora ta paaira. ¹⁸ Aiaakotolu etivilau pai tale taumattu tale kosa ateva laghe uvi ematelala tale kotolu voto sesa: kura me asu me salpa ghe ghoa ta paaira. ¹⁹ Sarasarakaniaa ooso atoa isaa ta paaira me ta uiira, poli uiira nongina katu ngatoa, uruira atoa ghe aavakovako taumattu ngatoa.

²⁰ Me llo taumattu karika ghe matela tale maate ooso atoa laghe gheleila etaira, laghe ratirati tani nna ngaioghioghiaa tale kaluira sesa niuungu

9:1: Aotu 20:1. **9:2:** Aitiutiu 19:28; Joel 2:2, 10; Eks 10:12-15. **9:4:** Aotu 7:3. **9:6:** Job 3:21; Jer 8:3. **9:7:** Joel 2:4. **9:8:** Joel 1:6. **9:9:** Joel 2:5. * **9:11:** Malloeana Abaddon me Apolion va “tau ngai tturuu”. **9:15:** Aotu 8:7-12. **9:20:** Aotu 16:9, 11; Sams 115:4-7; 135:15-18; Den 5:23.

laghe gheelei ta nimaira; karika laghe ruu tani kkauaa raroai etoa, me tootoo atoa gheelei tale golo me silva me brasi me ai, tootoo atoa karika la rooroo tani tara me karika la nongonongo me karika la aaikasuaa. ²¹ Me tee karika laghe nna ngaioghioghiaala tale kaluira niaiuvu emate, me nialaala, me uunguaa niailai salosalooa see, me niainao.

10

Ensolo ateva me ghauna arighi skrol

¹ Vara me aghe tarala mene kateva ensolo sarasarakanaaili ia ghe sio mae epona liu. Ghe molumolu tale urukookoo, me renbo ateva epona tale uruna ateva, me matane ghe maamallanga nongina mallangi sinaka ateva, me kkena aluelange nongina ttulu eluulu lalu ghe ramerame nongina kura ataata atea. ² Ghe posoposo atingina ta nimane natu uru ngai erighi la aseasea va skrol, otioti ia. Ghe atingina ghoala kkena muenna atelange elamana me kkena uaise atelange ghe atinginaiela elae, ³ me ghe aore anamungailiila nongina teva laeoni. Nau eteva ghe aorela, lingi ngalaira ghaitu palapalanga laghe samala. ⁴ Nau ghaitu palapalanga laghe samala me ngaghe aainasiaa tani pitipiti, me aghe nongola lingi ngalo ateva epona liu ghe uela va, “Ghelei rungaala vuku eteva, karika umene piti llo ghaitu palapalanga laghe auliaala.”

⁵ Vara me aghe tarala ensolo ateva ghe tiitingina elamana me elae ghe ssuaa saela nimane muenna atelange epona liu. ⁶ Me ghe aulia ngakoronna saela ta lo ateva tokatoka liu ia, ghe gheleila epona liu me isaa akapaaili voto etana, me kosa ateva me voto akapa etana, me paamanu eteva me voto akapa etana, me ghe uela va, “Karika aue mene righi niaiolateaa! ⁷ Ghaituna ateva ensolo aue evuu unna ateva tana taue, me isaa o nau, voto aisulianna kannu God aue elutu ekapa, nongina ghe aulia ngaotula tale kapuna tau ngai nongonongo anna atoa, propete ila.”

⁸ Vara me aghe nongola lingi ngalo ateva aghe nongo amuela epona liu ghe mene aippooaa teeieghila, ghe uela va, “Kasula me ulaa ghaa skrol ateva otioti ia ta nimane atelange ensolo ateva etiitingina elamana me elae.”

⁹ Me aghe lao sio tani kolomi ensolo ateva va etau mae natu skrol ateva. Ghe uela etaghi va, “Ghaaiela me unamaia. Aue eghelei kovam ateva esesa, me tale paam ateva aue onose nongina iruena ateva.” ¹⁰ Aghe ghaala natu skrol arighi ta ensolo ateva me aghe namaiela, namina onoseailli ta paaghi nongina iruena ateva, me ta kovaghi eteva ghe sesala. ¹¹ Vara me ghe mene uela etaghi va, “Umene ppooa ngaotu inangarina God ta taumattu ngatoa, me patunganua atoa, me asease nisama atoa me kingi etoa.”

11

Uitnesi elua

¹ Me kateva ghe tau mae sio aitootoongi eteae arova aikkatulu etiulu. Me God ghe uela etaghi va, “Laa toongi alena ale manga ateva God me liu nighelei aiaavusuvusuena ateva, me uira tau ngai kkaua ngatoa. ² Me urau mene toongi ale ngeleka atiulu tale ale manga ateva, poli aghe tauela ta tau ngeleka atoa. Aue la sapeleaa masaliki taatara atea manga ia ta ghaatingaulu ghalua (42) ulana. ³ Me aue ataula sarasarakana ta kapughu uitnesi elua, aue lalu asae ghinna nialousiusi, me aue lalu aulia ngaotu inangarighi eroo kateva airari ghalua ai me ghaonomongaulu (1,260) nau.”

⁴ Ilalua oliv ai ilalua, me aitingina lam ilalua lalu tiitingina emua ta Vau eteva eaaitaraa kosa ateva. ⁵ Arova teva eaanna tani ghelei saasakiaa etairarua, kura ateaue aue ekupi ghoa ta paairarua, me eata akapa tau ngai ssateirarua atoa. Lo ateva eaanna tani ghelei saasakiaa etairarua, aue emate avalua o. ⁶ Ilalua o taumattu ngalua sarasarakana ilalua tani ghelei runga eunaakookoo me karika emene vaoo tale nau lalu aulia ngaotu inangarina God. Me sarasarakaniaairarua erooroo tani ghelei manu ekoli lao tale rae, me tani ghelei asease sesa tale kosa ateva tale aaloaloannaairarua.

⁷ Nau lalu ruu ekapaaili tani auliaa voto God ghe taula va lalu auliaa, kinatama ghaata kkena ateva aue ekasu tale liu eteva karika righi aioghioghi etana, aue euatela, me euvi ematelalua. ⁸ Aue euvi emate alokoilalueta tapaa salana tale masaliki taatara ateaue matuutuliena ia, eaaimatoonga eSodom me eIjip. Tale ia o voto ateva, Vauirarua ateva laghe avukalaie saela tale aikotoo. ⁹ Aue eroo kotolu nau me pai kativilau tale mene kateva nau, isaa akapa taumattu tale anua atoa, me tale ararimangali etoa, me tale taumattu ngatoa, me tale asease nisama atoa aue la tara vilikiirarua, me karika aue la ghanna tani kaieinilalua. ¹⁰ Me taumattu etokatoka tale kosa ateva oia aue la masimasi me la ghelei maakiikii mausiirarua. Aue la ghaitauaa masi voto atoa elome etaira, poli ilalua o propete alua lalu ghe taula nimmarikana ta taumattu tale kosa ateva oia.

¹¹ Vara kotolu nau me pai kativilau tale mene kateva nau ghe lange sio, me God ghe mene tau lao sio ainoa mauhue etairarua, me lalu ghe tingina saela, me nimoia ghe ghaala lo atoa laghe tarailalueta. ¹² Me lalu ghe nongola kinatama lingi ngalo ateva ghe kaurekatila epona liu me ghe uela etairarua va, “Amalu sae mae toko.” Me lalu ghe saela epona liu tale urukookoo ateva nau tau ngai ssateirarua atoa laghe taatara.

¹³ Me tale ia nonga o nau eteva, kinatama rukeruke ateva ghe tturuula aiaakasangaulu etivilau pai tale masaliki taatara ateaue. Ghaitu airari (7,000) taumattu rukeruke ateva ghe uvi ematela. Me lo atoa laghe saangala laghe matautula me laghe tau saela God epona liu.

¹⁴ Aiaaghaluene ateva sesa nau ghe lange sio, me aiaakotonna ateva ghaisa ngarighi emae.

Aiaaghaitu eteva taue

¹⁵ Aiaaghaitu eteva (7) ensolo ghe vuula unna taue ateva me kinatama lingi ngalo atoa epona liu laghe uela va,
 “Sarasarakana tani aitarara kosa akapa ateva ange tokala tale aitarane kapuita Vau ngepona me kapuna Mesaea ngateva,
 me aue eaitoiaa nau ekapa atoa.”

¹⁶ Me ghaluengaulu ghaata (24) namuu laghe tokatoka tale uneira aitokatokata atoa king, emua ta matane God laghe tturru siola euu me laghe kkauaala God. ¹⁷ Laghe ue va,
 “Ami kaakaili emasina etam, Vau ngepona God sarasarakanaaili io,
 lo ateva utokatoka me ughe tokala arau,
 poli angu ghe ghaala kinatama sarasarakaniaam
 me angu ghe tiuaala tani aitoiaa kosa ateva.

¹⁸ Patunganua atoa ghe sessailala,

11:4: Sek 4:11-14. **11:5:** 2 Sam 22:9; Sams 97:3. **11:6:** 1 Ki 17:1; Eks 7:17-20; 1 Sam 4:8. **11:7:** Den 7:21; Aotu 12:17; 13:7; 17:8. **11:8:** Luk 13:34. **11:11:** Esik 37:5, 10. **11:12:** 2 Ki 2:11. **11:13:** Aotu 6:12; 16:18. **11:14:** Aotu 9:12. **11:15:** Eks 15:18; Sams 10:16; Den 2:44; 7:14. **11:18:** Sams 110:5; Rom 2:5; Aotu 20:11-13; Sams 115:13.

me sessaiaam ange rekatala.
 Ange naula tani ghelei niaisakei ta matena atoa
 me kapum tau ngai nongonongo anna atoa propete ila, la ghaa aipoliira,
 me lo atoa kapum manga ila me lo atoa la oneoneaa ararim atea,
 me tee lo atoa tue peipeina ila me lo atoa karika.
 Me ange naula tani tturuu lo atoa la tuturuu kosa ateva.”

¹⁹ Me alena ale manga ateva God epona liu ghe otiela me elome
 tale ale manga ateva aghe tarala vokisi eteva aikaai inangari niaippooa
 ngaitauaa. Ravaravaia ateva, kurruna palapalanga ateva, rukeruke ateva,
 me kinatama ttasi vaoo ateva korokorongana ia nongina atu ghe sio mae.

12

Vause ateva me otuena ateva

¹ Kinatama niaimatootoongana ateva ghe kauerekatila elomarase. Vause
 ateva ghe aitiitii tale sinaka ateva, me ulana ateva ghe tokatoka tale pake
 lapalapa kkena, me kou nguru eteva ta uruna erooro kasangaulu ghalua
 (12) katto etana. ² Vause ateva ghe kakkaai natuna ateva. Nauna tani
 molena me ghe piipii etingina poli ghe anoonongi etingina ia. ³ Mene
 kateva niaimatootoongana ghe kauerekatila elomarase. Kinatama otuena
 ateva raeraeana ia, ghaitu uruna me unna kom kasangaulu me ghaitu kou
 nguru tale ghaitu uruna. ⁴ Ghe leeaala uina atiulu me ghe paru velu sio
 mae aiaakotolu etivilau pai tale katto atoa, me laghe katuu sio mae tale
 kosa ateva. Otuena ateva ghe tinginala emua ta vause ateva nau ange
 aloanna tani molena, poli ghe aaloanna tani olomi aliki eteva nau eteva
 elutu. ⁵ Vause ateva ghe molenaala aliki erighi taita ia, ia aue emuemua
 ngakapa anua atoa, me aue eposo aikkatulaira atiulu kingi etoa aeana
 ia. Me gharavaeataaili ta aliki eteva ensolo ateva ghe ghaaie saela epona
 liu tani toka tee God tale unna aitokatoka ateva king. ⁶ Vause ateva ghe
 iloula ghe ssola tale voto ateva karika righi taumattu etana. God ghe
 aimanomanosieiniela va elaa toka etana, me aue eaitarainia erooro kateva
 airari, ghalua ai me ghaonomongaulu (1,260) nau.

⁷ Me niaiuvii eteae ghe tiuaala epona liu, Maekol me kapuna ensolo atoa
 laghe aiuvii teela otuena ateva me kapuna atoa tani ensolo. ⁸ Poli otuena
 ateva karika sarasarakana ia, ia me kapuna atoa ensolo, laghe sau vella
 sio mae epona liu. ⁹ Kinatama otuena ateva laghe sau velue sio mae la
 kolokoloa va Raroai eteva me Satana, ghe kamela kosa akapa ateva, ia me
 kapuna ensolo atoa laghe sau velu eitaueinila sio mae tale kosa ateva.

¹⁰ Me aghe nongola lingi ngalo ateva namungaili ia epona liu, ghe uela va,
 “Isaa oia nisaanga, me sarasarakaniaane ararimangalina ateva God ange
 mae sio,

me aaitoiaane kapuna Mesaea ngateva.

Lo ateva eaatingina kapumami etoa tale niaisakei,
 eaatinginaila tale niaisakei ta matane God, llaa me voo,
 ia o laghe sau velue sio mae.

¹¹ Laghe apalaiela

tale raena ateva natu sipsipi eteva,
 me tale inangari eteva laghe aulia ngaotu.

Poli karika laghe annaala maamauluaaira,
 karika laghe matautula tani mate.

11:19: Hib 9:4; Aotu 8:5; 15:5; 16:21. **12:2:** Maeka 4:10. **12:3:** Den 7:7. **12:4:** Den 8:10.
12:5: Sams 2:9; Aotu 19:15. **12:7:** Jiud 9. **12:9:** Aitiutiu 3:1, 14; Luk 10:18; 22:31; Aotu 20:2.
12:10: Job 1:9-11; Sek 3:1.

¹² Liuna avalua o am masimasi lo atoa am tokatoka epona liu, me nialousiusi aue etoka tale kosa ateva me paamanu eteva, ta raroai eteva ang ghe sio mae etaimalua.

Sessaiaane namungaili,
poli ekilakila va nauna tukunaaili.”

¹³ Nau eteva otuena ateva ghe tarala va angila ghe sau velue sio mae tale kosa ateva, ghe usila vause ateva ghe molenaala aliki eteva taita ia. ¹⁴ Vause ateva laghe tau lao sio kaekaena alua nongina kaekae savaakoroara ateva va eloo elao tale voto ateva angila ghe aimanomanosieiniela va elaa toka etana karika righi taumattu etana. Me aue la aitarainia tale nau, nau etoa me pai kativilau tale nau eteva, me karika otuena ateva eroo tani ghaaia. ¹⁵ Otuena ateva ghe luela manu eteva tale paana ateva nongina ateo atea eakaakalaa tani akalaa velu vause ateva. ¹⁶ Me kosa ateva ghe sausila vause ateva, me ghe otila paane ateva me ghe ropi ematiila ateo atea, otuena ateva ghe lueiela tale paane ateva. ¹⁷ Me otuena ateva ghe sessaieiliela ta vause ateva, ghe lao sio tani aiuvii tee natuna atoa vause ateva, lo atoa la aaimuli usi tee inangari nipaopao kanna God me la sarasarakana tani aimuli tee inangarina ateva Iesu. ¹⁸ Me otuena ateva ghe tinginala* elosamarra.

13

Ghaata kkena ateva ghe kauerekatila etapaa manu

¹ Me aghe tarala ghaata kkena ateva ghe pangusu sae mae etapaa manu erooro kasangaulu (10) unna kom, ghaitu (7) uruna me kasangaulu kou nguru tale unna kom. Me kateva kateva uruna pitipiti asease inangari etoa tani auliaa va ia Goto ia. ² Ghaata kkena ateva aghe taraiela marova lepod ateva, kkena nongina kkena beaa ngateva, me paane ateva nongina laeoni eteva. Otuena ateva ghe tau vella ia o ghaata kkena ateva tani ghaa sarasarakaniaane me matuutuliena. ³ Kateva uruna laghe avakovakoala me ghe mene masinala. Taumattu ngakapa atoa laghe ounala tani taraia me laghe usiela. ⁴ Taumattu ngatoa laghe kakkauaa otuena ateva poli ghe tau lao sio matuutuliena ta ghaata kkena ateva, me laghe kakkauaa tee ghaata kkena ateva me laghe ue va, “See nongina ghaata kkena ateva? Me see erooro tani aiuvii teeia me eapalaia?”

⁵ God ghe tau vella ghaata kkena ateva tani tau sae nannaane me ghe auliaa saasakiaa ta God. Ghe ghelei aloannaane ghe antani ghelei ghe roola ghaatingaulu ghalua (42) ulana. ⁶ Me ghe otila paane ateva, tani auliaa saasakiaa ta God, me tale ararina atea, masalikina atea, me lo atoa la tokatoka etana. ⁷ God ghe taula sarasarakana etana tani laa aiuvii tee kapuna taumattu ngatoa God, me tani apalaila. God ghe taula sarasarakana tani muemua ararimangali ekapa atoa, me taumattu ngatoa me asease nisama atoa me tale anua atoa. ⁸ Lo atoa la tokatoka tale kosa ateva la kakkauaa ghaata kkena ateva, lo atoa karika pitipiti arariira tale vuku maulue ateva unna ia natu sipsipi eteva, ia laghe uvi emateala tale aitiutiu tale kosa ateva.

⁹ Lo ateva talingane manee, aue enongo.

¹⁰ Arova see God ang ghe uela va elao tale ale mata voovoo,

12:12: Ais 44:23; 49:13. **12:14:** Den 7:25; 12:7. **12:17:** Aotu 11:7. * **12:18:** otuena ateva ghe tinginala Kasina uru ngai laghe pitila laghe uela va aghe tinginala. **13:1:** Aotu 12:3; 17:3, 7-12. **13:2:** Den 7:4-6. **13:3:** Aotu 17:8. **13:5:** Den 7:8, 25; 11:36; Aotu 11:2. **13:7:** Aotu 11:7. **13:8:** Sams 69:28; Aotu 17:8; 20:12, 15; 21:27. **13:10:** Jer 15:2; 43:11; Aotu 14:12.

aue elao tale ale mata voovoo.
 Arova see God ang ghe uela va emate tale baenata ateva,
 aue emate tale baenata ateva.
 Nau isaa o ase voto ange lutulutu, kapuna atoa God aue la tingina
 akorokorongana ta God me la poso parasi aikaiaaira.

Ghaata kkena ateva ghe kauerekatila tale kosa ateva

¹¹ Vara me aghe tarala mene kateva tani ghaata kkena ghe kauerekatila
 tale kosa ateva, ghalua unna kom nongina natu sipsipi eteva, ghe samasama
 nonginaaili teva otuena. ¹² Ghe aapasunga ngakapala sarasarakaniaane
 aitiutiu eteva ghaata kkena ta matane, me ghe gheleila taumattu ngatoa
 tale kosa ateva laghe kkauaala aitiutiu eteva ghaata kkena ia o laghe
 avakovakoala me ghe mene masinala. ¹³ Me ghe ghelei niaimatoongana
 atoa namungaili ila. Ghe kolola kura atea epona liu ghe sio mae tale
 kosa ateva ta mata taumattu ngatoa. ¹⁴ God ghe tau lao sio sarasarakana
 etana tani ghelei isaa o niaimatootoonga tani aimatoonga sarasarakaniaane
 aitiutiu eteva ghaata kkena. Poli ghe ghelei isaa o niaimatootoonga, ghe
 saikamela taumattu ngatoa tale kosa ateva. Ghe sungilala tani atingina sae
 tootoo ateva tani oneoneaa ghaata kkena ateva ia o laghe avakovakoala tale
 baenata ateva me ie etokatoka. ¹⁵ God ghe tau vella ghaata kkena ateva
 tani tau lao sarasarakana tani tau lao maulue tale aitiutiu eteva tootoo me
 ia aue eaippooaa me eghelei lo atoa la tam aaloanna tani kkauaa tootoo
 ateva la mate. ¹⁶ Ghe suusulungi ekapaila, ghauna me namuu, tue peipeiena
 me karika tue peipeiena, lo atoa karika la tokatoka tale aloannaaira me lo
 atoa la tokatoka tale aloannaaira, tani ghaa aimatootongana tale nimaira
 muenna atelange o ta patilakaira. ¹⁷ Aue karika teva eppoli me eaitauaa
 voto arova etam ghaa aimatootongana ateva, ia o ararina atea ghaata
 kkena ateva o namba ngateva eaaimatoonga ararina atea.

¹⁸ Tani kila isaa o voto, utani nanna ngamasina. Lo ateva taumattu masina
 nannaane erooroo tani nna ngamasina, me ekila tani ira namba ngateva,
 poli ia o namba ngateva unna ia taumattu ngateva. Unna namba ngateva
 toko va, ghaonomo ai, ghaonomongaulu me ghaonomo (666).

14

Natu sipsipi eteva me 144,000

¹ Aghe mene taatarala me emua etaghi natu sipsipi eteva ghe tiitingina
 tale motouru eteva eSaeon. Kateva ai, ghaatingaulu me ghaata airari
 (144,000) taumattu laghe tiitingina teeia, ararina atea me ararina atea
 Tamane pitipiti elokoi emua tale patilakaira. ² Me aghe nongola kateva
 lingi niaangari epona liu nonginaaili ateo atea eakaakalaa atingina me
 nongina palapalanga ateva. Niaangari eteva aghe nongoala nonginaaili va
 lo atoa la kaukau uneira aikaukau. ³ Kateva ai, ghaatingaulu me ghaata
 airari (144,000) taumattu laghe tiitingina emua tale aitokatokane ateva king
 unna ia God, me emua tale ghaata voto maulue me namu ngatoa. Laghe
 ueei kkinari etea ouna ia, karika mene toa la kilakilaia ta lo nonga atoa
 laghe saangala tale kosa ateva la kilakilaia. ⁴ Isaa o taumattu karika righi
 sesa gheleiaaira poli karika laghe kila vause, poli laghe akekkelilala tale
 voto sesa. Laghe aaimuli tee kasukasuaane natu sipsipi eteva nongina eaa
 ghe laolao. Isaa o taumattu God ghe ghaa oghilala tale taumattu tale kosa

13:13: Mat 24:24; 1 Ki 18:24-39; Aotu 19:20. **13:16:** Aotu 14:9-11; 16:2; 20:4. **14:2:** Aotu 1:15;
 19:6. **14:3:** Ais 42:10; Aotu 5:9; 7:4.

ateva. Ila mata ngemua ila ta God me natu sipsipi eteva. ⁵ Karika righi nikamekame ghe mae sio ta paaira me karika righi sesa gheeleiaaira.

Ensolo kotolu

⁶ Vara me aghe tarala kateva ensolo, ghe looloo elomarase me ghe posoposo masi kiukiu eteva tokatoka liu ia tani ppooainia ta lo atoa la tokatoka tale kosa ateva, tale anua akapa atoa, tale ararimangali etoa, me tale asease nisama atoa me tale taumattu ngatoa. ⁷ Me ghe sama anamuula me ghe uela va, “Am oneoneaa God, me am kkaueinia, poli nauna tani ghelei niaisakei tale taumattu ange rekatala. Am kkaueinia ta ia ghe gheleila epona liu, kosa ateva, paamanu, me ateo vubbuaa.”

⁸ Aiaaghalua ateva ensolo ghe aimulila me ghe uela va, “Masaliki taatara atea namuu ia eBabilon angila ghe tturungiela! Laghe tturungiela! Ghe gheleila anua akapa atoa laghe ropila sesa manu eteva, me laghe lailai sari maneira atoa katoa tani taita me vause.”

⁹ Aiaakotonna ateva ensolo ghe aimulila etairarua, ghe sama anamungailila me ghe uela va, “Lo ateva ukakkaua ghaata kkena ateva me tootoona ateva, me ughe ghaala aimatootongana ateva ta patilakam o ta nimam, ¹⁰ io aue ughaa sessaiaane ateva God namungaili ia nongina kapa uaeni eteva, me aue ummarikana tale kura atea me atu etoa ramerame ila emua ta mataira ensolo atoa manga ila me natu sipsipi eteva. ¹¹ Asu tale uneira nimmarikana aue esae, me esae aue karika righi niaioghioghi etana. Aue karika righi niainoane llaa me voo, ta lo atoa ila kakkaua ta ghaata kkena ateva me tootoona ateva, o laghe ghaala aimatootongana ateva eaimatoonga ararina atea.” ¹² Nau isaa o ase voto ange lutulutu, kapuna atoa God aue la tingina akorokorongana ta God, me la nongo usilaa inangari nipaopao kanna God, me la poso parasi aikaaiiaaira ta Iesu.

¹³ Vara me aghe nongola lingi nisama ateva epona liu ghe uela va, “Pitila llo toko. Ghaine ange tiuaala me nau emaema lo atoa la aikaaiia ta Vau eteva me la mate, niarangise aue etoka etaira.”

Spiriti eteva eue va, “Ue. Aue la ainoana tale uunguaaira poli uunguaaira aue eusila.”

Nau nimukemuke tale kosa ateva

¹⁴ Vara aghe taatara me emua etaghi aghe tarala urukookoo ateva usousoana ia, me taumattu ngateva ghe tokatoka etana nonginaaili va Natuna ateva Taumattu ngateva. Unna kou nguru eteva ta uruna gheeleia tale golo, me ta nimane iema ateva matakereganaaili ia. ¹⁵ Mene kateva ensolo ghe kupi ghoa mae tale ale manga ateva, ghe kolokolo anamungaili lao sio ta lo ateva ghe tokatoka tale urukookoo ateva. Ghe uela va, “Ghaala iemam ateva me usai inana tale utana atingiu, poli nauna ange mae sio tani ghaaia ta ange matuela.” ¹⁶ Lo ateva ghe tokatoka tale urukookoo ateva ghe leea sio mae iemane ateva tale kosa ateva me ghe saila inana tale kosa ateva.

¹⁷ Mene kateva ensolo ghe kupi ghoa mae tale ale manga ateva epona liu, ia tee ghe posoposo iema ateva matakereganaaili ia. ¹⁸ Me mene lo ateva ensolo ghe aaitaraa kura aiaavusuvusuena atea ghe ghoa mae tale liu nighelei aiaavusuvusuena me ghe kolokolo anamungailiila ta lo ateva ghe posoposo iema ateva. Ghe uela va, “Ghaala iemam ateva me ughaaitauaa ue ngai tale uaeni atea tale kosa ateva, poli ue ngai ange masso akapala.”

14:8: Ais 21:9; Jer 51:7-8; Aotu 17:2; 18:2, 3. **14:9:** Aotu 13:12-17. **14:10:** Ais 51:17, 22; Jer 25:15-16; Sams 75:8; Esik 38:22; Aitiutiu 19:24; Aotu 16:19; 20:10; 21:8. **14:11:** Ais 34:10. **14:12:** Aotu 13:10. **14:14:** Den 7:13. **14:18:** Joel 3:13.

¹⁹ Ensolo ateva ghe leeaala iemane ateva tale kosa ateva. Ghe sai ekapala ue ngai tale uaeni me ghe velu kaaila ta aiposoaa uaeni eteva, eaaimatoonga sessaiaane God. ²⁰ Me laghe pooposoaa uaeni eleka tale masaliki taatara atea. Rae ateva ghe kupi ghoa mae tale aiposoaa uaeni eteva eairooaa tee sae oasa atikirighi tale paa ooso ateva, me aaluseaane eroroo kotolu ai (300) kilomita.*

15

Ghaitu ensolo ghe posoposo ghaitu voto sesa

¹ Aghe taatara ssola epona liu me aghe mene tarala kateva kinatama masi niaimatootoongana. Ghaitu ensolo laghe posoposo ghaitu airuuruu tana voto sesa — airuuruu tale isaa oia voto sesa, poli sessaiaane God aue eruu tale isaa oia voto sesa. ² Aghe tarala voto ateva taataraane arova manu eteva laghe ghelelela tale ghalasi, eaaisavisavila tee kura atea. Me epona etana, taumattu ngatoa laghe apalala ghaata kkena ateva me tootoona ateva, me namba tale ararina atea, laghe tiitingina etana. Laghe posoposo aikaukau kannu God ghe tau lao sio etaira. ³ Laghe ueei unna kkinari etea Moses, kapuna tau ngai nongonongo anna ateva God, me kkinarina atea natu sipsipi eteva. Laghe ue va,

“Namuu me masinaaili uunguaam,
Vau eteva God sarasarakana io.
Ghulughuluena me koronna salam,
kingi io tale nau ekapa atoa.

⁴ Taumattu ngakapa atoa aue la oneoneainio, Vau eteva,
me la tau sae ararim atea.
Poli io nonga manga io.

Anua akapa atoa aue la mae kkaueinio,
ta uunguaam ghulughuluena ang ghele kaurekatila.”

⁵ Vara me aghe taatara ssola epona liu me aghe tarala ale manga ateva, ia o ale kandisi ia eaapasunga va God etokatoka, ghe otiela. ⁶ Ghaitu ensolo laghe kupi ghoa mae tale ale manga ateva laghe uunusi ghaitu sesa voto. Laghe molumolu tale raarangisana kalio ravaravaiena, me laghe vaovao tuku kalio ateva tale saura, ghelele ia tale golo. ⁷ Vara me kateva tale ghaata voto maulue ghe tau lao sio ta ghaitu ensolo ghaitu pelete ghelele tale golo, me pasu tale sessaiaane God, etokatoka nau ekapa atoa. ⁸ Me ale manga ateva ghe pasula tale asu tale maamallangiaane God me tale sarasarakaniaane. Karika poi teva ghe rooroo tani kupi sso tale ale manga ateva lomosina ta ghaitu sesa voto tale ghaitu ensolo laghe ruula uunguaaira.

16

Ghaitu vilau pelete ekaakaai sessaiaane God

¹ Vara me aghe nongola kinatama lingi ngalo ateva ghe mae sio tale ale manga ateva, ghe ue ta ghaitu (7) ensolo va, “Am kasula me am laa kao see tale kosa ateva sessaiaane God tale isaa o ghaitu vilau pelete.” ² Aitiutiu eteva ensolo ghe kasula me ghe kaola unna ativilau tana pelete epona tale kosa ateva, me usai etoa sesaaili taataraira me mmarikanaaili ila laghe

14:20: Ais 63:3; Aotu 19:15. * **14:20:** kotolu ai (300) kilomita Tale inangari nge Grik, kateva airari me ghaonomo ai (1,600) stadia. **15:3:** Eks 15:1; Sams 139:14; 145:17. **15:4:** Jer 10:6-7; Sams 86:9. **15:5:** Eks 38:21. **15:8:** 1 Ki 8:10-11; 2 Kro 5:13-14; Ais 6:4. **16:2:** Eks 9:10; Aotu 13:12-17.

tokala ta taumattu ngatoa laghe ghaala unna aimatootongana ghaata kkena ateva me laghe kakkauaa tootoona ateva.

³ Aiaaghaluene ateva ensolo ghe kaola unna ativilau tana pelete epona tale paamanu eteva, me paamanu eteva ghe raeraeanala tani nonginaaili raeira taumattu ngatoa matena ila. Me isaa akapaaili voto maulue etokata toka tale paamanu eteva ghe mate akapala.

⁴ Kotonna ateva ensolo ghe kaola unna ativilau tana pelete epona tale ateo akaakala atoa me ateo vubbu etoa, me laghe raeraeana voroila. ⁵ Me aghe nongola ensolo ateva eaaitaraa ateo atoa ghe ue va,

“Io ghulughuluena io tale niaisakei etoa,

utokatoka ghaine me angu ghe toka vella arau, me manga io

poli angu tau rooroaala aipoliira tale gheegheleiaaira.

⁶ Ta laghe uvi ematela kapum taumattu me propete atoa,

me angu tau lao sio rae me ngila ropila poli mausi gheegheleiaaira.”

⁷ Me aghe nongola liu nighelei aiaavusuvusuena ateva ghe asokoila va,

“Ue, Vau eteva God sarasarakanaaili io,

koronna me ghulughuluena kalum niaisakei.”

⁸ Ghaatane ateva ensolo ghe kaola unna ativilau tana pelete epona tale sinaka ateva, me ghe tau lao sio sarasarakana tale sinaka ateva tani sinaki ekulukuluki taumattu ngatoa tale aanasaane ateva. ⁹ Vilikiira ghe sinaki ekulukulukila tale kinatama aanasaane ateva me laghe aauliaa saasakiaa sae tale ararina atea God, ia ghe aaitaraa isaa oia sesa voto, me karika poi laghe anna tani nna ngaioghioghiaa me la anamunamunganeia.

¹⁰ Aiaaghalimane ateva tana ensolo ghe kaola unna ativilau tana pelete tale aitokatokane ateva king unna ia ghaata kkena ateva, me isaa akapaaili masaliki ghe aitariaa ghe saurromla. Taumattu ngatoa laghe katakata ramuramuti paaira poli kinatama mmarikana ateva, ¹¹ me laghe aauliaa saasakiaa ta God epona liu poli tale kinatama mmarikana tale usaiira atoa. Me karika poi laghe alona tani nna ngaioghioghiaa tale voto laghe gheleila.

¹² Ghaonomina ateva ensolo ghe kaola unna ativilau tana pelete epona tale kinatama ateo atea elupreitis me ghe matila tani aipanipaniaa salaira kingi etoa tale pai sinaka esae. ¹³ Vara me aghe tarala kotolu sesa spiriti taatarailotolu arova roparopa atoa; kateva ghe kupi ghoa mae tale paane ateva otuena ateva, me kateva tale paane ateva ghaata kkena ateva, me kateva tale paane ateva kamena ateva propete. ¹⁴ Ila spirit tale raroai ila la gheeghelei naimatootoongana atoa, me la kasukasu ekapa see tale kingi etoa tale kosa akapa ateva oia, tani ghelei eitaueinila tale niaiuvii etea tale kinatama nauna ateva God sarasarakanaaili ia.

¹⁵ “Tarala, aue amae nongina tau niainao ateva! Aue emasinaaili ta lo ateva karika easeasekanue, me eaimonomosiaa unna aiaasae, me karika aue evelu kalio va aue epalata.”

¹⁶ Me kingi etoa laghe velu eitauaala tale voto ateva tale inangari nge Hibru la kolokoloa va Amagedon.

¹⁷ Ghaituna ateva ensolo ghe kaola unna ativilau tana pelete elomarase, me elome tale ale manga ateva kinatama lingi ngalo ateva ghe mae sio tale unna aitokatoka ateva king ghe uela va, “Ange kapala!” ¹⁸ Vara me ravaravaia ateva ghe ravaiela, me palapalanga ateva ghe akurruela, me kinatama rukeruke ateva ghe rukela. Karika teva rukeruke ghe lutu poi nongina lo ateva oia rukeruke nau eteva taumattu ghe tiuaala tani toka tale

16:3: Eks 7:17-21. **16:7:** Sams 19:9; Aotu 15:3. **16:9:** Aotu 9:20-21. **16:10:** Eks 10:22; Ais 8:21-22. **16:12:** Ais 11:15. **16:14:** Aotu 19:19. **16:15:** Mat 24:43-44; Aotu 3:3. **16:16:** Sek 12:11. **16:18:** Aotu 4:5; 8:5.

kosa ateva oia. ¹⁹ Kinatama masaliki eteae eBabilon ghe tarurrutila me ghe kotoluvilaula pai, me kinatama masaliki etoa tale patunganua atoa laghe turrungilala. God ghe annaala kinatama masaliki eteae eBabilon me ghe tau lao sio kapa uaeni eteva pasu ia tale sessaiaane. ²⁰ Patunganua atoa laghe kapala me karika laghe rooroo tani tara motouru etoa. ²¹ Paka vaoo ateva korokorongana ia nongina atu ghe katuula maamaataniaane erooroo ghaatingaulu ghalima (45) kilo ghe kaakatuu saooa ta taumattu ngatoa, me laghe auliaa saasakiaa ta God ta poli laghe aateatea saasakiaa nau eteva vaoo ateva ghe kumkumla.

17

Vause ateva epona tale ghaata kkena ateva

¹ Kateva tale ghaitu (7) ensolo ghe posoposo ghaituvilau pelete ghe mae sio, me ghe uela etaghi va, “Mae sio, me aghapasunga etam aipolipolina lo ateva vause emuemueaa niaivae atee, etokatoka tale oroi ateo atoa. ² Ta ngetana ia oia vause ateva kingi tale kosa akapa ateva la asoaso teeia me lo atoa la tokatoka tale kosa ateva angila ghe ropi saasakiaa voroila, tale kanna sesa manu eteva eaaimatoonga ssavoto.”

³ Vara me ensolo ateva ghe kasueinaghila tale spiriti eteva, ghe laoainaghi sio tale voto ateva karika righi taumattu ghe tokatoka etana, me aghe tarala ghaata kkena ateva raeraeana ia, ghe koukouaa inangari niauliaa saasakia ngatoa, ghaitu uruna me kasangaulu unna kom, me vause ateva ghe tokatoka epona etana. ⁴ Vause ateva ghe molumoluaa aiaasae ateva ghueghuenna ia me raeraeana ia, me ghe molumoluaa voto atoa gheeilei ila tale golo laghe ravaravaiela, me masi atu etoa, me pel atoa, ghe posoposo kapa ateva airopiropi ia laghe ghelelela tale golo, pasu ia tale voto atoa mauuna ila ta mata God me mauuna gheegheleiaane vause ateva tani aivae.

⁵ Arari eteae laghe pitiela tale patilakane, eue va,

Voto aisulianna

Babilon namuu ia

Kinaira ia lo atoa la vaevaea

me voto mauuna tale kosa ateva.

⁶ Aghe tarala vause ateva ang ghe ropi saasakiaala tale raeira kapuna taumattu ngatoa God, raeira taumattu ngatoa la auliaa inangarina ateva Iesu.

Nau eteva aghe taraiela, namuu ta aghe soghiaala isaa oia voto. ⁷ Vara me ensolo ateva ghe uela etaghi va, “Vaalua me angu soghiaala? Aue akiri tau atu malloeana isaa o voto aisulianna tale vause ateva me ghaata kkena ateva eiilou etana. Ia o ghaata kkena ateva uruna ghaitu (7) me kasangaulu (10) unna kom. ⁸ Ghaata kkena ateva utaraiela, ang ghe toka muela, me ghaine karika ia, me aue ekaurekati sae tale liu eteva karika aioghioghi etana, tani lao tale unna nimate ateva. Lo atoa taumattu la tokatoka tale kosa ateva, me karika laghe pitila arariira tale vuku maulue ateva tale aitiutiu tale kosa ateva, aue la soghi nau la tara ghaata kkena ateva, poli ang ghe toka muela, me ghaine karika ia, me aue emene mae.

⁹ “Taumattu nannaane alomasaanga erooroo tani kila isaa o voto. Ghaitu uru eaaimatoonga ghaitu motouru vause ateva etokatoka etana, ¹⁰ me tee ghaitu kingi. Ghalima (5) ang ghe matela, me kateva ie etokatoka, me mene kateva aue emae. Nau eteva emae, tokatokaane karika aue ealuse. ¹¹ Ghaata

16:19: Aotu 14:10. **16:20:** Aotu 6:14. **16:21:** Eks 9:23-24; Aotu 11:19. **17:1:** Jer 51:12-13.

17:2: Ais 23:17; Jer 51:7; Aotu 14:8. **17:3:** Aotu 13:1. **17:4:** Jer 51:7; Aotu 18:16. **17:6:** Aotu 18:24; 19:2. **17:7:** Aotu 13:1. **17:8:** Den 12:1; Aotu 11:7; 13:7.

kkena ateva ghe toka akasinala, me ia oia karika ia, aiaaghaoalu (8) eteva kingi ia, ie tee elome tale ghaitu kingi, ie tee elaolao tale nimate.

¹² “Kasangaulu kom utarala eaaimatoonga kasangaulu kingi, karika laghe ghaa matuutuliena tani kingi, me aue la ghaa sarasarakana tani kingi tee ghaata kkena ateva tale kateva nonga ia aoa ngateva. ¹³ Kateva nonga ia nannaaira tani tau lao sarasarakana me matuutuliena tale ghaata kkena ateva. ¹⁴ Aue la aiuvii tee natu sipsipi eteva, me natu sipsipi eteva aue eapalaila, poli ia Vau ia tale vau ekapa atoa, me kingi ia tale kingi ekapa atoa. Me lo atoa la aimuli teeia, God ghe kololala me ghe suimatoongainilala va kapuna ila me la ghaaiesoangaili etana.”

¹⁵ Vara me ensolo ateva ghe uela etaghi va, “Oroi ateo utarala vause ateva emuemueaa niaivae atea etokatoka etana, eaaimatoonga taumattu ngatoa me mene oroieili taumattu, patunganua atoa, me ase nisama atoa. ¹⁶ Ghaata kkena ateva me kasangaulu unna kom utarala aue la aissessaii tee vause ateva emuemueaa niaivae atea. Aue la gheleia epeisaane me aue la ghaa velu kaliona, aue la nama malatauna me la taue sae tale kura. ¹⁷ Poli God ang ghe atoka velu ssola ta urunguitaniira sa ateva aue la gheleia tani ghelei roorooaa voto ghe uela va aue elutu, aue la nim asokoi va ue tani tau lao matuutuliena tale ghaata kkena ateva, lomosina ta inangarina God aue eghelei roorooaa. ¹⁸ Me ia o vause ateva utaraiela, eaaimatoonga kinatama masaliki taatara atea eaaitoia ngakapaaili kingi etoa tale kosa ateva.”

18

Laghe tturungila eBabilon

¹ Emuli tale isaa o voto aghe mene tarala mene kateva ensolo ghe sio mae epona liu, matuutulienaane namungaili, me mallangina ateva ghe mallangi ekapala kosa ateva. ² Ghe sama anamungailiila, ghe ue va, “Ang ghele tarurrutilla! Ang ghele tarurrutilla, kinatama masaliki taatara atea eBabilon!

Ang ghele tanganueira iela raroai etoa,
me sesa spiriti etoa
me ghila atoa karika raarangisana ila, me tee sesa ghaata kkena atoa
karika raarangisana ila.*

³ Poli anua akapa atoa angila ghe ropila
kanna uaeni korokorongana, eaaimatoonga uunguaa niailai salosalooa
see,
me kingi ekapaaili tale kosa ateva angila ghe lailai ssola etana,
me lo atoa tau bisnis ila tee laghe ghaala oroieili viliki veu tale niuungu
karika ghe paapalata tani ghelei.”

⁴ Vara me aghe nongola mene kateva lingi ngalo epona liu ghe ue va,
“Am kupi velue ghoa mae, kapughu etoa,
am tee am rau kupi sso tale gheeleiaane
va am ghaa sesa aipolipoli eteva aue eghaiaa.

⁵ Poli sesa gheeleiaane ange namungailiila me ange saela arau epona liu,
me God eannaa isaa o sesa gheeleiaane.

⁶ Am mene liu lao etana ase salana ghe ghelei lao ta katoa,
am tani liu ghaluaata eaikokkonoria tee gheeleiaane,

17:12: Den 7:7, 24. **17:16:** Aotu 18:8. **18:2:** Aotu 14:8; Ais 13:21; 34:11-14; Jer 50:39. * **18:2:** Kasina uru ngai laghe pitila, karika laghe pitila va me tee sesa ghaata kkena atoa karika raarangisana ila. **18:4:** Ais 48:20; Jer 50:8; 51:6, 45; 2 Ko 6:17. **18:5:** Aitiutiu 18:20-21; Jer 51:9. **18:6:** Sams 137:8; Jer 50:15, 29; 2 Tes 1:6.

me tale unna kapa ateva ghe kaokao apasua,
am kao apasua me am ghelei ghaluaata nongina ghe gheelei.

⁷ Nau etoa ghe saasaeaa nannaane me ghe ghaaghaa oroi masi voto,
tale isaa oia nau utau lao nimmarikana tale vilikina me nialousiusi tani
airooaa,

poli ia ghe ue va, ‘Aghi kuiini ieghi,
me aghi karika va vause raue vulu ieghi,
me karika aue aghateatea nialousiusi.’

⁸ Ia avalua o me aue eateatea sesa voto atoa tale kateva nonga nau;
nimate, nialousiusi me kinatama maloo,

me aue kura atea eata voroia,
poli Vau ngepona ateva God sarasarakanaaili ia aue eghelei niaisakei
eteae etana.

⁹ “Vara me lo atoa kingi tale kosa ateva laghe asoaso teeia tani ghelei
ssavoto, me laghe masimasi eitauaa teeia, aue la ngala me la alousiusi nau
eteva la tara asuna ateva elaa saesae, nau kura atea eataataia. ¹⁰ Aue la
tingina amasau tani taatara lao poli la maamatautu tani tara nimmarikana
ateva, me aue la ue va,

“ ‘Alousiusi, alousiusi etam, masaliki nitaatara atea,
Babilon, sarasarakanaaili io!

Tale kateva nonga aoa ngateva me niaisakei ange ghaaiola!’

¹¹ “Tau bisnisi etoa tale kosa ateva aue la ngala me la alousiusi teeia,
poli karika toa aue la mene poli peiira. ¹² Peiira nongina golo, silva,
masi ngatu etoa, pel atoa, kalio malallake, kalio ghueghuenna, kalio silk,
kalio raeraeana, asease voto atoa gheeghelei tale ai masi ngusungusuaane,
me asease voto atoa gheeghelei tale ngisi elepen, me asease voto atoa
gheeghelei tale ai aipolina namuu, brons, aeana, me atu eteva mabolo
ia, ¹³ sinamon me mene katoa spais, aiaavusuvusuena, murr, frankinsens,
uaeni, oliv oeli, palaoa, uiti, vulumakao, sipsipi, ooso, ai-ilou, me lo atoa la
uungu me karika la tokatoka tale aloannaaira.

¹⁴ “Tau bisnisi etoa laghe ue etana va, ‘Masi voto atoa ughe aloanna tani
tue peipeiena tee ang ghele aikapakapaiila, peim atoa me masi taataram
atoa ang ghele kapala, karika aue umene tara poi.’ ¹⁵ Tau bisnisi etoa laghe
aippoliaa me laghe aitaauaa isaa o voto etam me laghe tau peipeienala, aue
la nim tingina amasau mae poli la maamatauta nimmarikana ateva etam,
me aue la ngala me la ghalousiusi, ¹⁶ me aue la ue va,

“ ‘Alousiusi, alousiusi, masaliki taatara atea,
ughe molumoluaa masi kalio atoa, ghueghuenna me raeraeana kalio,
me ughe molumoluo tale golo me tale asease atu etoa masi taataraira
atoa, me pel atoa.

¹⁷ Poli tale kateva nonga ia aoa ngateva isaa akapa kinatama masi voto atoa
ngila tturungilala.’

“Me ila akapaaili kapteni etoa tale anua atoa me lo atoa la aikaai etaira me
mene katoa la uungu elamana tani ghaa viliki veu aue la tingina amasau.

¹⁸ Me aue la sama anamuu nau eteva la tara asu kura atea nau eteva
eataataia, me la ue va, ‘Karika mene teae masaliki taatara nongina lo atea
oia.’ ¹⁹ Me aue la velu sae au ta uruira me la aore atingina me la ngala me
la alousiusi me la ue va,

“ ‘Alousiusi, alousiusi etana, masaliki taatara atea,
isaa o anua evuuvukala elamana

18:7: Ais 47:7-9. **18:8:** Aotu 17:16. **18:9:** Esik 26:17; 27:30-35. **18:11:** Esik 27:36. **18:12:**
Esik 27:12-13, 22. **18:15:** Esik 27:31, 36. **18:16:** Aotu 17:4. **18:17:** Ais 23:14; Esik 27:27-29.
18:18: Esik 27:32.

- la ghaaghaa peiira etam!
 Poli kateva nonga ia aoa ngateva me angu ghele peisaanela.’
- ²⁰ Am masimasieiniela, lo atoa epona liu,
 me am kapuna taumattu ngatoa God, me apostolo atoa me propete atoa,
 ta God ang ghele gheleila niaisakei me sesa akapaaili ang ghele lao sio
 etana tale ase voto ghe ghelei etaimim.”
- ²¹ Vara me kateva ensolo korokoronganaaili ia ghe saula kinatama atu
 eteva, naanamungaane nongina lo ateva atu la ghelei eputuputu uiti etana
 me ghe sau velue siola ta paamanu, me ghe uela va,
 “Tale ia o ase kinatama sarasarakana ateva
 Babilon, kinatama masaliki taatara atea, aue la tturungia,
 me karika aue la mene taraia.
- ²² Me karika aue la mene nongo etam
 righi lingi aikaukau, me tau kkinari, me lo atoa la vuuvuu flut me taue.
 Karika aue la tara
 righi asease tau ngai uungu etam.
 Lingi ngalo tale liu ngai ghelei eputuputu uiti
 karika aue la mene nongo.
- ²³ Me tee karika aue la tara
 righi mallangi lam etam.
 Karika aue la nongo righi lingi ngaloira lo atoa la aaloanna tani lai.
 Kapum tau bisnisi etoa sarasarakanaaili ila tale kosa ateva
 me tee ughe alaala me ughe kamekame patunganua akapa atoa tale
 kosa ateva, me ughe tiuaa ppaelala.
- ²⁴ Raeira propete atoa me kapuna taumattu ngatoa God, ghe akalala tale
 salam,
 me tee raeira lo akapa atoa laghe uvi ematelala tale kosa ateva.”

19

Kkinari nimasimasi epona liu

- ¹ Nau eteva namu ngateva ensolo ghe ruula tani aippooaa, aghe nongola
 paka mangalia ateva nonginaaili taumattu ngatoa oroieili ila laghe kikki-
 nari epona liu. Laghe ue va,
 “Ita tau sae inasanina God!
 God tau ngai asaangiita ia! Nioneoneaa me sarasarakana kanna God.
- ² Poli kanna niaisakei eghelei koronna me ghulughuluena.
 God ang ghe gheleila niaisakei ta ia o vause ateva laghe aaiavaeainia
 ghe ghelei saasakiaala kosa ateva oia tale kanna nivaevae atea.
 Me ghe uvi ematela kapuna tau ngai uungu etoa God, me God ange liuliu
 kanna ssavoto ghe gheleila.”
- ³ Mene ghaluene, taumattu ngatoa laghe mene kkinari enamungailiila laghe
 ue va,
 “Ita tau sae inasanina God!
 Asuna ateva eBabilon ange saela me karika aue ekapa.”
- ⁴ Ghaluengaulu ghaata (24) namuu me ghaata ase voto maulue ila, laghe
 tturru siola tani kkauaa God, ghe tokatoka epona tale aitokatokane ateva
 king, me laghe ue va,
 “Ue, koronna, ita tau sae inasanina God!”
- ⁵ Vara me lingi ngalo ateva ghe mae sio tale aitokatokane ateva king ghe
 uela va,

“Am kkauaa saela kapuita Goto ateva.
Am akapaaili kapuna tau ngai uungu etoa,
lo atoa am oneoneainia,
am akapaaili ghauna me namuu!”

Nilai eteae tale natu sipsipi eteva

⁶ Vara me aghe nongola lo ateva ghe aangari nongina lingi ngaloira taumattu ngatoa, me nongina ateo eakaakalaa me tee nongina palapalanga ateva eaakurrua. Ghe uela va,
“Ita tau sae inasanina God!

Poli Vau palepale kapuita Goto ia, sarasarakanaaili ia eaaitoia ngakapa voto.

⁷ Ita masimasieinia
me ita taula nianamunamungaane!

Poli nilai tale natu sipsipi eteva ange mae sio
me vause ateva natu sipsipi eteva elai etana ang ghele aimanomanosi-aala.

⁸ God ghe tau lao sio masi aiaasae pei tale nilai,
gheghelei tale masi kalio, raarangisanaaili.”

(Eaaimatoonga masi ghegheleiaaira kapuna taumattu ngatoa God.)

⁹ Vara me ensolo ateva ghe uela etaghi va, “Pitila llo toko: ‘Aue emasinaaili ta lo atoa laghe kololala va la mae tale unna nilai eteae natu sipsipi eteva.’ ”
Me ensolo ateva ghe mene uela va, “Isaa oia inangari koronna kanna God.”

¹⁰ Nau eteva aghe nongola aghe tturru siola tale liue kkena tani kkaueinia, me ghe uela etaghi va, “Urau mene ghelei evalua o! Aghi nim tau ngai uungu ieghi nongina io me nengam me tuem atoa, ila o lo atoa la posoposo parasi tale inangari inangarina Iesu. Ukkauaa nonga God! Poli inangari inangarina Iesu spiriti ia tale propesi.”

Lo ateva ghe iilou tale ooso ateva usousoana ia

¹¹ Vara me aghe tarala epona liu ghe otiela, me usousoana ateva ooso ghe tiitingina, lo ateva ghe iilou etana la kolokoloa va “Lo ateva egheelei emasinaaili uunguaane” me “Koronna ia”. Me egheelei niaisakei tale salana ghulughuluena ia me egheelei naiuvii. ¹² Matana alua nonginaaili kinatama kura atea ghe ramerame, me oroieili kou nguru etoa ta uruna, me arari eteae pitipiti ia etana, karika teva ekilakilaia ta ie nonga. ¹³ Ia ghe molumolu tale aiaasae ateva laghe asuuela tale rae, me ararina atea la kolokoloa va Inangarina ateva God. ¹⁴ Tau ngai uuvii ngepona liu etoa laghe molumolu tale aiaasae usousoana me raarangisana laghe gheleila tale masi kalio laghe iilou tale ooso atoa usousoana ila, me laghe aaimuli tee lo ateva ghe iilou tale usousoana ateva ooso. ¹⁵ Tale paane ateva baenata ateva matakeregana ia ghe kupi ghoa mae tani apala anua atoa. Aue eaitoieinila tale aikkatulu etiulu aeana ia, me easa uaeni tale aiasa uaeni eteva, eaaimatoonga sessaiaane God sarasarakanaaili. ¹⁶ Tale unna aiaasae ateva ghe aakou au kkena muenna atelange, arari eteae pitipiti ia eue va,

Kingi tale kingi ekapa atoa me

Vau tale vau ekapa atoa.

¹⁷ Me aghe tarala ensolo ateva ghe tiitingina epona tale sinaka ateva. Namungaili ta ghe kolokoloaala ghila atoa laghe looloo elomarase, ghe ue va, “Am mae aitaaua sio tale kinatama ninamanama atea kanna ia God.

19:6: Aotu 14:2. **19:7:** Ais 61:10; Aotu 21:2. **19:9:** Mat 22:2-3. **19:10:** Apos 10:25-26; Aotu 22:8-9. **19:11:** Aotu 1:5; 6:2; Sams 96:13; Ais 11:4. **19:12:** Den 10:6; Aotu 1:14; 2:17. **19:13:** Ais 63:1-3; Jon 1:1, 14. **19:15:** Sams 2:9; Aotu 1:16; 14:20. **19:16:** Aotu 17:14. **19:17:** Esik 39:17-20.

¹⁸ Ta am mae nama malatauirea kingi etoa me lo atoa la muemueaa tau ngai uvii etoa, me tau ngai uvii etoa sarasarakanaaili ila, me tee am nama malatauirea ooso atoa me lo atoa la iilou etaira, me malatauirea taumattu ngakapa atoa, la tokatoka tale aloannaaira me lo atoa la uungu me karika la tokatoka tale aloannaaira, me tee lo atoa arariira me lo atoa karika arariira.”

¹⁹ Vara me aghe tarala ghaata kkena ateva me kingi etoa tale kosa ateva oia me kapuira tau ngai uvii etoa laghe velu eitauaala tani aiuvii tee lo ateva ghe iilou tale ooso ateva me kapuna tau ngai uvii etoa. ²⁰ Laghe velu eitauaa tani aiuvii me lo ateva ghe iilou tale ooso ateva ghe akaravusula ghaata kkena ateva me tee propete kamekame ateva ghe gheelei mirikol me aimatootongana atoa tale sarasarakaniaane ghaata kkena ateva. Ghe gheleilala tani kame lo atoa laghe ghaala unna aimatootongana ateva ghaata kkena ateva me tee lo atoa la kakkauaa tootoona ateva. Laghe sau esakesakelalueta me laghe sau vellalue saela tale kura atea. ²¹ Me ghe pasa amatela kapuirarua etoa airuuruu ila tale baenata ateva ghe kupi ghoa mae tale paane ateva lo ateva ghe iilou epona tale ooso ateva, me ghila atoa laghe namala malatauirea atoa, me ghe ssoilala.

20

Kateva airari (1,000) ninamanama

¹ Aghe tarala ensolo ateva ghe kupi ghoa mae epona liu ghe uunusi kii tale paka liu eteva karika aioghioghi etana me kinatama sene ateva.

² Ghe kune atokala otuena ateva, ia o katu ngateva pei ngemua arau ia, ia Raroai ia me Satana etana, me ghe iri etokaiela va etoka ta kateva airari (1,000) ninamanama. ³ Ensolo ateva ghe sau velue siola tale liu eteva karika righi aioghioghi etana me ghe kavati rungainiela me ghe llokimi ekorokoronganailela, va karika emene kame anua atoa ta etani ruu kateae airari ninamanama. Me nau isaa o voto eruu me ensolo ateva evira tau velua tani ghelei voto tale aloannaane tale tukunaaili tuku nau erighi.

⁴ Vara me aghe tarala uneira aitokatoka kingi etoa, me tau ngai toitoi etoa laghe tokatoka etaira. Isaa o taumattu God ghe taula sarasarakana etaira tani ghelei niaisakei. Me aghe tarala lo atoa laghe sai pulela aloira ta poli inangariira ta Iesu me inangarina ateva God. Karika laghe kakkauaa ghaata kkena ateva me tootoona ateva me karika laghe ghaala unna namba ngateva tale patilakaira me ta nimaira. Laghe sakesakela me laghe toka teela Karisto tani namuu me aitoiaa teeia tale kateva airari ninamanama. ⁵ Ia o lo atea nitotu tale nimate, aitiutiu ia. Matena akapa atoa, lo atoa karika laghe totula tale aitiutiu eteae nitotu, karika aue la sakesake lomosina ta kateva airari ninamanama eruu. ⁶ Niarangise aue etoka ta lo atoa ila tale aitiutiu eteae nitotu, me manga ila. Ta niaiaaghalua atea nimate karika righi sarasarakaniaane ta ngetaira, ta aue la pristi ta God me ta Karisto me aue la toka tani aitoiaa teeia ta kateva airari ninamanama.

Airuuruu eteva niaiuvii

⁷ Nau eteva kateva airari ninamanama eruu, Satana aue ekupi ghoa tale karavusu, ⁸ me aue elaa kasu see tani kame anua atoa tale aighoughou ghaata tale kosa ateva oia, la aseasela va Gog me Megog, aue la mae aitauaa tale kinatama niaiuvii eteae, oroieili ila nongina rira ateva elosamarra. ⁹ Me aue la lao aitauaa tale voto ateva namuu ia me mmaiina ia tani tingina talia masalikiira atea kapuna taumattu ngatoka God, masaliki taatara atea

God eaielousieinia. Vara me kura ateaue aue esio epona liu me aue eata akapaailiila. ¹⁰ Me ia o Satana ateva, tau nikamekame ia, aue la sau velue sso tale kinatama kura ateaue me atu etoa ramerame ila, nongina laghe sau velu ssola ghaata kkena ateva me propete kamekame ateva, aue la mmarikana llaa me voo nau ekapa atoa.

Niaisakei eteaue ta matena atoa

¹¹ Vara me aghe tarala kinatama aitokatokane ateva king usousoanaaili ia, me lo ateva ghe tokatoka epona etana; kosa ateva me epona liu lalu ghe ilou emasaula ta ngetana, karika lalu ghe tarala righi liuirarua tani toka. ¹² Me aghe tarala taumattu ngatoa matena ila, katoa arariira manee me katoa karika, laghe tiitingina emua tale aitokatokane ateva king, vara me vuku etoa ghe otillala, me mene kateva vuku ghe mene otielda, vuku maulue ia. Vara me laghe tiuaala tani ghelei niaisakei ta lo atoa matena ila tale gheeleiaaira laghe piti ssola tale isaa o vuku. ¹³ Elamana me Nimate me Hades laghe tau vella matena atoa tani lao tale niaisakei eteaue, me kateva kateva taumattu ghe aisakei tale gheegheleiaane. ¹⁴ Vara me Nimate ateva me Hades laghe velulalue ssola tale kinatama kura ateaue. Ia o kura ateaue, aiaaghaluene ateaue o nimate. ¹⁵ Me arova teva taumattu karika teae ararina tale vuku maulue ateva, ia o taumattu ngateva laghe velue ssola tale kinatama kura ateaue.

21

Ouna ateva epona liu me ouna ateva kosa

¹ Vara me aghe tarala ouna ateva epona liu me ouna ateva kosa, poli lo ateva akasina epona liu me lo ateva akasina kosa ghe kapala, me paamanu eteva tee ghe kapala. ² Me aghe tarala masaliki taatara ateaue manga ia, ouna ateva eJerusalem, ghe sio mae ta God epona liu, masinaaili taataraane nonginaaili teva vause emolumolu tani laa sou taitanna ateva. ³ Me aghe nongola kinatama lingi ngalo ateva ghe mae sio tale aitokatokane ateva king, ghe ue va, “Tarala! God ange gheleila tanganuena elome tale taumattu ngatoa, aue etoka teeila, me ila aue ekapuna taumattu ila, me ia God aue etoka teeila.* ⁴ Ia aue esei velu rarum mataira me karika aue mene righi nimate me niale amate me ningala me nimmarikana, poli isaa o voto tale pokane ateva kosa ekapa.”

⁵ Me ia o lo ateva ghe tokatoka tale aitokatokane ateva king ghe uela va, “Tarala! Ngaghelele eouna isaa akapaaili voto!” Vara me ghe ue etaghi va, “Piti siola isaa o inangari, poli urooro tani atoka tuutulim tale isaa o inangari koronna.”

⁶ Me ghe mene uela etaghi va, “Nga ghele ghelele ekapala isaa o voto! Aghi alpa me omega ieghi, aghi aitiutiu ieghi me airuuruu ieghi. Ta lo ateva ekaakangngata tani ropi aue atoa lao manu karika pei nipoli tale ateo vubbu eteaue maulue ia. ⁷ Lo ateva eapala aue eghaa isaa akapaaili o voto, me aue ekapuna Goto ieghi me ia aue enatughu ia. ⁸ Lo atoa la maamatautu me karika korokorongana ila, lo atoa karika la aikaaiaa, lo atoa sesaaili gheegheleiaaira, lo atoa la aiuvi emate, lo atoa la ailai salosalooa, lo atoa

20:10: Sams 11:6; Aotu 19:20; 21:8. **20:12:** Den 7:9-10; Mat 25:31-46; Apos 17:31; 2 Ko 5:10; Aotu 13:8. **20:13:** Rom 2:6; 1 Pita 1:17; Aotu 2:23; 22:12. **21:1:** Ais 65:17; 2 Pita 3:13. **21:2:** Ais 52:1; 61:10; Hib 11:16; 12:22; Aotu 3:12. **21:3:** Lev 26:11-12; Esik 37:27; Sek 2:10; 2 Ko 6:16.

* **21:3:** Kasina uru ngai laghe pitila, laghe mene uela va, me aue ekapuna Goto ia. **21:4:** Ais 35:10; 65:19; Aotu 7:17. **21:5:** 2 Ko 5:17. **21:6:** Ais 55:1; Jer 2:13; Jon 7:37; Aotu 1:8, 17; 22:17. **21:7:** 2 Sam 7:14; 1 Kro 17:13; Sams 89:26-27. **21:8:** Mat 25:41; Aotu 20:15; 22:15.

la alaala, lo atoa la kakkauaa tootoo goto me lo akapa atoa tau nikamekame ila, aue asau vella sso tale kinatama kura atea. Ia o aiaaghaluene atea nimate.”

⁹ Me kateva ta ghaitu (7) ensolo, laghe uunusi ghaituvilau pelete pasu tale ghaitu airuuruu voto sesa, ghe mae sio etaghi me ghe uela va, “Mae sio me aghapasunga vause ateva aue vausea ia natu sipsipi eteva.” ¹⁰ Vara me ensolo ateva ghe kasueinaghila tale Spiriti eteva me ghe saueghi saela tale kinatama motouru eteva me ghe apasungaala Jerusalem, masaliki taatara atea manga ia, ghe sio mae epona liu nongina God etokatoka. ¹¹ Masaliki taatara atea pasu ia tale mallangina ateva God; ghe maamalanga nonginaaili masi atu eteva la aseasea va jaspaa ia, masalaangeaili ia arova voto ateva la aseasea va kristol. ¹² Me aivativatina masau sae me korokoronganaaili, kasangaulu ghalua (12) atamana etana, me kasangaulu ghalua ensolo la tiitingina etaira, me arari kasangaulu ghalua ararimangali nge Israeli laghe piti saela tale atamana. ¹³ Kotoluae atamana tale pai nge sinaka esae ativilau, me kotoluae tale pai not ativilau, me kotoluae atamana tale pai saot ativilau, me kotoluae atamana tale pai nge sinaka esuu. ¹⁴ Aivativatina masaliki taatara atea ghe toka saoaala tale kasangaulu ghalua atu tani asarasarakania, me epona etaira laghe pitila kasangaulu ghaluae arariira kapuna apostolo atoa natu sipsipi eteva.

¹⁵ Ensolo ateva ghe aippoaa teeieghila ghe uunusi aikkatulu etiulu golo ia tani toongi masaliki taatara atea me atamanina me aivativati etana. ¹⁶ Ensolo ateva ghe toongila masaliki taatara atea tale aikkatulu etiulu, ghe toongiela ghe roola ghalua airari ghalua ai (2,200) kilomita,† aaluseaane me naanamungiane me saesaeane epona. ¹⁷ Ghe toongila naanamunga aivativati eteva nongina taumattu ngatoa la tootoongi, me tee nongina ensolo atoa la tootoongi, ghe roola ghaonomongaulu ghalima (65) mita.‡ ¹⁸ God ghe gheleila aivativati tale atu eteva la kolokoloa va jaspaa, me masaliki taatara atea ghe gheleie nongala tale golo, soalannaaili ia nongina ghalasi. ¹⁹ Aivativati eteva tale masaliki taatara atea ghe toka saoaala tale kasangaulu ghalua asease masi atu etoa, aitiutiu eteva tale jaspaa, aiaaghaluene ateva ta sapae, aiaakotonna ateva kalkedoni, aiaaghaata ateva emrol, ²⁰ aiaaghalima ateva sadonix, ghaonomina ateva kanalien, aiaaghaituna ateva krisolit, aiaaghaoalu eteva beril, aiaaghasio ateva topaz, aiaakasangaulu eteva krisopreis, aiaakasangaulu kateva jasint, me aiaakasangaulu ghalua ateva ametist. ²¹ Kasangaulu ghaluae atamana gheeghelei tale pel, me tale kateae kateae atamana laghe atulula tale kateva nonga ia pel, me kinatama salana atoa laghe gheleilala tale gol, soalannaaili ila nongina ghalasi.

²² Karika aghe tarala teva ale manga tale masaliki taatara atea, poli Vau eteva God sarasarakanaaili ia me natu sipsipi eteva ale manga ilalua. ²³ Tale masaliki taatara atea karika aue la taatara tale mallangi sinaka ateva me tee ulana ateva, ta God aue emallanga etaira me natu sipsipi eteva aue ekuraira lam ia. ²⁴ Me aue anua atoa aue la kasu tale mallangina ateva, me kingi ekapa atoa tale kosa ateva aue la taula uneira masi voto etana. ²⁵ Atamanina masaliki taatara atea karika aue la kavati elo alai, poli aue karika teva voo. ²⁶ Aue la maeaa masi voto akapa atoa me masi peiira

21:10: Esik 40:2. **21:11:** Ais 60:1-2, 19. **21:12:** Esik 48:30-35. **21:15:** Esik 40:3; Aotu 11:1. † **21:16:** ghalua airari ghalua ai (2,200) kilomita Tale inangari nge Grik, kasangaulu ghalua airari (12,000) stadia. ‡ **21:17:** ghaonomongaulu ghalima (65) mita Tale inangari nge Grik, kateva ai ghaatingaulu ghaata (144) kiubit. **21:18:** Ais 54:11-12. **21:23:** Ais 60:19-20; Aotu 22:5. **21:24:** Ais 60:3, 5. **21:25:** Ais 60:11.

taumattu ngatoa tale kosa ateva tale masaliki taatara atea. ²⁷ Karika righi voto karika ghulughuluena aue esso etana, me llo taumattu egheeghelei voto mauuna me ekamekame karika poi aue la kupi sso, ta lo atoa nonga arariira pitipiti elokoi tale vuku maulue ateva unna ia natu sipsipi eteva.

22

Ateo maulue atea

¹ Vara me ensolo ateva ghe mene apasungaala ateo maulue atea, soalan-naaili ia nongina ghalasi, eakaakalaa ghoa elo pakena tale aitokatokane ateva king uneirarue ia God me natu sipsipi eteva, ² elome tale kinatama salana atikirighi tale masaliki taatara atea. Me tale pai eluevilau tale ateo maulue atea, ai maulue atea etiitingina, ekuukuneeaa uene kasangaulu ghaluaata (12) tale kateae ninamanama, katengaata ta kateva kateva ulana, me uruna ai etea oia aue eghelei emasina anua atoa. ³ Me karika aue mene righi nikasikiena, me aitokatokane ateva king uneirarua God me natu sipsipi eteva aue etoka tale masaliki taatara atea, me kapuna tau ngai uungu etoa aue la kkaueinia. ⁴ Aue la tara matane, me ararina atea aue la pitia tale patilakaira. ⁵ Aue karika teva voo, me karika aue la taatara tale righi lam me mallangi sinaka ateva, poli Vau ngepona ateva God aue emallangila, me aue la toka nongina king tani aitoiaa nau ekapa atoa.

⁶ Me ensolo ateva ghe uela etaghi va, “Urooro tani atoka tuutulim tale isaa toko inangari koronna. Vau eteva God, esuusuu kapuna Spiriti eteva ta kapuna propete atoa, ia ghe sungila ensolo ateva tani apasunga tale kapuna tau ngai uungu etoa, saa voto ghaisa ngarighi aue elutu.”

Iesu ange maemae

⁷ (“Nongola! Ghaisa ngarighi amae! Aue emasinaaili ta lo atoa la nongo usilaa inangari tale propesi laghe pitila tale lo ateva oia vuku.”)

⁸ Aghi Jon aghe nongola isaa oia voto me aghe tarala, me aghe tturru siola tale liue kkena ensolo ateva ghe apasungaala isaa o voto etaghi, me aghe aloanna tani kkaueinia. ⁹ Me ghe uela etaghi va, “Karika umene ghelei evalua o! Aghi tau ngai uungu ieghi ta God tee me io me kapum atoa propete ila, me tee lo atoa la nongonongo usilaa inangari tale lo ateva oia vuku. Ukkauaa God.”

¹⁰ Vara me ghe uela etaghi va, “Karika umene ghelei runga inangari propesi easoaso elome tale lo ateva oia vuku, poli nau ange aakalakalaa. ¹¹ Ta lo atoa la ghelei saasakiaa, la rooro tani toka ghelei saasakiaa, me lo atoa sesaaili gheleiaaira, la rooro tani toka ghelei evalua o ssavoto. Me lo atoa ghulughuluena gheleiaaira, la rooro tani toka ghelei ghulughuluena tana voto, me lo atoa manga ila, la rooro tani toka mangamanga.”

¹² “Nongola! Ghaisa ngarighi amae, me amaemaeaa tee aipolipoli tani poli kateva kateva tale niuungu laghe gheleila. ¹³ Aghi alpa me omega ieghi, aghe toka akasinala me aghairuuruu. Aghi aitiutiu ieghi me airuuruu ieghi.

¹⁴ “Aue emasinaaili ta lo atoa la porapora kalioira, ta aue la usikatae ai maulue atea, me aue la kupi sso tale atamana atea tale masaliki taatara atea. ¹⁵ Eleka tale ia o masaliki taatara atea tana paua atoa me tau nialaala

21:27: Ais 52:1; Esik 44:9; 1 Ko 6:9-10. **22:1:** Esik 47:1. **22:2:** Esik 47:12; Aitiutiu 2:9; Sek 14:8; Joel 3:18. **22:4:** Mat 5:8; Aotu 3:12. **22:5:** Den 7:18, 27; Aotu 5:10; 20:6; 21:23, 25. **22:6:** Aotu 1:1. **22:7:** Aotu 1:3. **22:8:** Aotu 19:10. **22:11:** Den 12:10. **22:12:** Ais 40:10; Jer 17:10; Aotu 2:23. **22:13:** Ais 44:6; Aotu 1:8, 17; 21:6. **22:14:** Aitiutiu 2:9; 3:22.

atoa me lo atoa la aivaeainila me lo atoa la aiiuvi emate, me lo atoa la kakkauaa tootoo goto me isaa akapaaili taumattu la tani aloannaaili tani toka kamekame.

¹⁶ “Aghi Iesu, asuula ensolo ateva tani mae auliaa etaimim isaa akapaaili voto tale ale manga atoa. Aghi oaira ieghi me natuira ieghi mangalina atoa Deivit, me aghi katto pai eteva eramerame elue talaua.”

¹⁷ Me Spirit Manga ateva me vausenna ateva natu sipsipi eteva lalu ue va, “Mae sio!” Me lo ateva unongonongo, umene ue va, “Mae sio!” Lo ateva ekaakangngata tani ropi, erooro tani mae. Me lo ateva eaaloanna tani ropi, erooro tani ropi ateo maulue atea, karika aipolipoli etana.

¹⁸ Aghaaulia ngaotu ta lo atoa la nongonongo inangari propesi tale lo ateva oia vuku: arova teva taumattu emene piti saooa righi nim kann, God aue emene saooa sae etana llo sesa lo ateva oia vuku eaauliaa. ¹⁹ Me arova teva taumattu eghaa velu kasina inangari tale lo ateva oia vuku, God aue eghaa velu uelane atea tale ue ngai etea etautau maulue, elome tale manga atea masaliki taatara, ia oia vuku eteva eaaulia ngatootoongainia.

²⁰ Lo ateva eaaulia ngaotu isaa oia voto, eue va, “Ue, aghi ghaisa ngarighi amae!”

Koronna! Mae sio, Vau eteva Iesu!

²¹ Alooloo sae va maamasinaane ateva Vau eteva Iesu aue etoka aitauaa teeiem akapaaili.* Koronna.†

22:16: Nam 24:17; Ais 11:1, 10; Rom 1:3; Aotu 2:28; 5:5. **22:17:** Ais 55:1; Aotu 21:6. **22:18:** Diut 4:2; 12:32. **22:20:** Mat 24:30-31; 1 Ko 16:22. * **22:21:** teeiem akapaaili Kasina uru ngai laghe pitila, laghe uela va, aue etoka tee kapuna atoa God. † **22:21:** Kasina uru ngai laghe pitila, karika laghe uela va, Koronna.

Malloeana inangari

Aikotoo ARom atoa laghe gheeleei niaisakei tale taumattu ghe uviuvi emate kateva me ghe sausau ghinnaniira. Kinatama nipalata ta llo taumattu ghe sae vuuvukala tale aikotoo. Taumattu ngateva la tuitui evukalaia tale aikotoo eaateatea nimmarikana. Lo atoa la aloanna tani aimuli ta Iesu la sunuki uneira tani aikotoo. Malloeana va la ghaa mmarikana nongina Iesu ghe mmarikanala, ta poli la aiesoaa ta Iesu.

Airuui ngalo Nau nialousiusi, inangari tani aippooa ngaisausiaa ta lo ateva etokatoka tale nialousiusi.

Alabasta Gharighi ase atu la gheeleei aieku manu me aikaai manu, o aikaai oeli, etana.

Ale kandisi Emua arau, anua ateva ta Israeli ghe kasukasu see etapaa tuvui. God ghe uela ta Moses va, “Uatulu teva aleghe. Am ghaa vilikiira ghaata kkena atoa me ghinna raarangisanaaili.” Nau laghe kasukasu laghe ghoughou kalio me laghe suusunuki me laghe kasukasu. Atu elua pitipiti inangari nipaopao laghe aatokailalua tale mangaaili etiulu rum tale ale kandisi. Emua arau, aJiu etoa laghe kakkauaa elome tale ale kandisi eteva. Emulina king Solomon ghe atulula ale manga ateva tale atu me ai.

Ale manga (1) Aleira ale manga ateva aJiu etoa ghe tokala eJerusalem. Jerusalem masaliki namuu ia tale masaliki taatara atoa eIsrael. King Solomon ghe atulu ekasinala aitiutiu eteva ale manga. Voto manga laghe uunguaa tale ale manga ateva kandisi ia, laghe mene ssoaala tale ale manga ateva. Ghe tiuaala o laghe gheeleei nonga aiaavususuvusuaena tale ale manga ateva. AJiu etoa laghe veluvelu eitaaua tani kkauaa God tale ale manga ateva. Tale uneira nivelu eitaaua laghe saesae nonga eJerusalem.

Valavala ateva ghe taatalia ngatoka ale manga ateva me kasina taumattu tale anua namuu laghe kupikupi sso tale aitiutiu etiulu rum. Mene katiulu rum elome tale namu ngatiulu rum, aJiu nonga atoa laghe sosso etana. Mene katiulu rum, taita nge Jiu nonga atoa laghe sosso etana. Airuuruu etiulu rum, pristi nonga atoa laghe sosso etana tani gheleei aiaavususuvusuaena me laghe sso uviuvi emate ghaata kkena. Ale manga tuunga ateva ghe tokatoka elome. Ghalua nonga rum etana, lo atiulu manga ia me lo atiulu mangaaili ia. Lo atiulu rum manga ia righi tana voto aiuungu tale ale manga ghe tiitingina etana. Kalio atiulu namungaili ia ghe vuuvukala runga lo atiulu manga ia me lo atiulu mangaaili ia. Namuu ta pristi etoa ghe sosso katengaata ta kateae ninamanama tale lo atiulu rum mangaaili ia. Nau Iesu ghe matela kalio atiulu ghe tarrii longotila ghe tiuaa epona me ghe laa sio ruu euu. Ia o voto ateva ghe apasungaala va ila akapaaili taumattu ngatoa la ghaaiesoaa ta Iesu Karisto la rooroo tani sso tale maamallanganiaane God.

(2) Emua arau tau ngai kkaua ngatoa laghe veluvelu eitaaua tanganueira katoa tau ngai kkauaa, poli karika righi ale nikkauaa. Tale Uru ngai Manga ateva tale inangari nge Musao, mata nginangari eteva ta “ale manga” karika malloeana nonga va ale aikkauaa ngatoa taumattu eatuutulu, ta malloeana va taumattu la veluvelu eitaaua.

Ale nivelu eitaaua Ale nivelu eitaaua ta aJiu etoa. Laghe veluvelu eitaaua ta nau manga ateva. Nau ta Iesu masaliki taatara atoa laghe veluvelu eitaaua tale alena nivelu eitaaua ngateva. Tale ale nivelu eitaaua laghe asease inangari tale Uru ngai Manga ateva, me laghe aapasunga

inangari nipaopao kanna God. Taumattu ngatoa laghe looloo sae me laghe kakkauaa. Kasina nau laghe gheeleei niaisakei tale ale nivelu eitaua ngatoa.

Aloi Masi ngusungusuaane masi neina la gheeleei tale ue ngai. Ajiu etoa laghe aalokoi tale ghinnaniira matena atoa.

Apostolo Uunguaaira apostolo atoa tani auliaa voto laghe tarala ta Iesu me laghe nongola etana. Laghe katulaala taumattu ngatoa laghe nongo usilaala apostolo atoa me laghe aiesoala ta Iesu.

Ararimangalina ateva God Ararimangalina ateva God egheeleei taumattu me God ekaakateva nonga. God nongina kingi eteva ta poli eaitaraa taumattu me etautaula inana me ghinna me ekaakatulainila. Taumattu tale ararimangalina ateva God la aaimuli usi tee God. Iesu ghe sio mae tani oti salana atikirighi tani lao ta God.

Babilon Masaliki taatara ia. Emua arau kingi nge Babilon ateva, ghe uviuvi tee oroi mene katoa anua me ie nonga namuu ia. ABabilon atoa laghe aiuvii tee aIsraeli etoa me laghe apalailala. Taumattu nge Israeli etoa laghe nim uungu eBabilon me karika laghe toka tale aloannaaira. Laghe tokala eBabilon eroroo ghaitungauluae (70) ninamanama (Matiu 1:11-12, 17; Apostolo 7:43).

Tale vuku Niaulia ngaotu Babilon malloeana va, taumattu ngatoa karika laghe nannaa God. Ta 1 Pita 5:13, Rom la ue va Babilon etana.

Bali Bali taataraane nongina uiti eteva. La gheeleei tee verete tale bali.

Beaa Beaa ngateva asease ghaata kkena ateva. Namuu ia me sesa taataraane. Eroo tani uvi emate taumattu. Etokatoka tale motouru me etapaa tuvui.

Disaepolo Lo atoa laghe tokatoka tee Iesu, laghe nongonongo inangarina me laghe taataraia, kapuna tau ngai uungu ila.

Elomarase Nongina katto atoa, sinaka me ulana ateva la tokatoka.

Ensolo Tau ngai kasuaa inangarina ia God. God ghe taula uunguaaira ensolo atoa tani gheleei uunguaane me tani laa ppooaa inangarina ta taumattu ngatoa. Uunguaaira tee tani aitarara kapuna taumattu ngatoa God.

Namunganiira ensolo atoa, ararina atea ta Maekol (Michael) (Jiud 9), mene kateva namuu ararina atea ta Gabriel (Luk 1:19, 26).

Epikuria Tau ngai aapasunga ngatoa la uusilaa inangarina Epikurus, ghe apasungaala va mata ngemua ateva voto, nimasimasi eteva.

Epona liu Nongina God etokatoka.

Eunaakookoo Nongina urukookoo me ghila atoa la looloo.

Frankinsens Emua arau laghe gheeleei tale ue ngai masi ngusungusuaane nau la tungitungia. Ase ai eteva oia ghe piipinosa nonga eArabia. Ajiu etoa laghe la ghaaghaaia tale masaeili anua, liuna avalua o me laghe ue va aipolina isaa arau epona.

Gehenna Tale inangari nge Hibru, malloeana "Gehenna" va malaale ateva eHinnom, aituu sovu ia eleka eJerusalem. Ta ajiu etoa, emaamalloeanaa tanganueira sesa taumattu ngatoa matena ila.

God (1) Ta Hibru etoa '*elohim* la ue va "God". Namuu ia, la oneoneainia, ararina atea manga ia.

(2) Ta Hibru etoa Vau Palepale la kolokoloa va "Yahweh", LORD, ararina atea God.

Hades Tanganueira matena atoa.

Hermes Hermes kateva tana kapuira goto aGrik atoa. Laghe aikaaiaa va Hermes ghe kaakasuaa inangariira goto atoa ghe laolaoaa ta taumattu ngatoa.

Inangari niaippooa ngaitauaa (Covenant) Taumattu ngalua lalu aloanna tani auliaa righi inangari va ekateva nonga nannaairarua tale inangari niaippooa ngaitauaa. Pokane inangari niaippooa ngaitauaa God ghe auliaala tale motouru eSaenae. Karika teva taumattu erooro tani raarangisana me ghulughuluena ta poli karika la rooro tani usilaa inangari nipaopao. Ouna ateva inangari niaippooa ngaitauaa God ghe aulieiniela va taumattu ngatoa la aimuli tee nonga Iesu Karisto, aue la ghulughuluena me la raarangisana poli Iesu ghe mmarikanala tale kaluira ssavoto.

Inangari nialokoi Ange asola tale ninannaa, ia o lo ateva ange gheleila, aue ia etani ghelei nongina ange aulia ngalokoila.

Inangari nipaopao Inangari nipaopao easoaso tale vuku ghalima Moses ghe pitila. God ghe taula inangari nipaopao ta Moses va esausi taumattu.

Isopi Mene kateva ase kone, kone nge Ijipi ia. Pristi etoa laghe aasuu uruna tale rae ghaata kkena atoa me laghe reerepataa see ta taumattu ngatoa va laghe manga.

Jiu Jiu etoa ararimangalina ila Abraham. Aitiutiu eteva ta Jiu etoa ta Jiuda. Jiuda kateva ararimangali nge Israel. Emuli aJiu etoa ila akapaaili laghe alIsraeli ila.

Kamololo Kamololo ateva ase ghaata kkena ateva. Namungaili ia me la iilou etana. Esausau voto maate.

Kandake Kandake karika va arari kuiini ia, ta arariira ia lo atoa la aaitoiaa eItiopia, nongina Peroo eIjip.

Kapuna ensolo ateva Vau Palepale Kapuna tau ngai nongonongo anna ateva God, ekaakasuaa me epoppooa inangarina God.

Karisi Ai-ilou eteva, ooso atoa la ghaeaea.

Karisto AGrik atoa la asease va Karisto taumattu ngateva laghe aman-gaiela tale oeli. Tale inangari nge Hibru, Mesaea malloeana va Karisto. Emua arau marova laghe aloanna va taumattu ngateva ekingi laghe aamangaia tale oeli eteva. Liuna avalua o me nau God ghe auliaala kateva inangari nialokoi va aue esuu tau ngai asaangi eteva tani asaangi kapuna taumattu ngatoa me tani atoka ararimangalina ateva God, ghe aseasea va Mesaea o Karisto tani apasunga va God ghe suitoongainiela.

Kasangauluae Masaliki Taatara Dikapolis malloeana va kasangauluae masaliki taatara tale kinatama masaliki eteae ta pai nge saot tale ateo talia ngateae eGalilii.

Kerub, keruvin Laghe aaitoiaa ai maulue atee, me laghe aaitaraa aka ateva ghe tokatoka tale mangaailetiulu rum tale ale manga ateva. Epona taataraane taumattu, me euu arova ghaata kkena ateva, me kaekaena alua.

Kohot Tale tau ngai uvii etoa eRom, kateva liijen erooro ghaonomo airari (6,000) tau ngai uvii, me kateva liijen erooro kasangaulu (10) kohot, me kateva kohot erooro ghaonomo ai (600) tau ngai uvii, me namu ngateva emuemua kateva ai (100) tau ngai uvii.

Kou nguru Ghalua ase kou nguru: Kateva kou nguru kingi etoa la aatokaia. Mene kateva kou nguru, lo atoa la aikaratii, lo ateva aitiutiu ia tani apala, ia eghaaghaaia.

Liijen Tale tau ngai uvii etoa eRom, kateva liijen erooro ghaonomo airari (6,000) tau ngai uvii.

Liu nighelei aiaavusuvusuena Ajiu etoa laghe ghelei niaiaavusu-vusuena sae ta God. Laghe uviuvi emate ghaata kkena ateva nongina sipsipi eteva o meeme ateva o vulumakao ateva, tani ghelei aiaavusuvusuena

etana. Tani ghelei liu nighelei aiaavusuvusuena, laghe aatoka atu euu me laghe alokoi sae kuraa me ghaata kkena ghe asoaso sae epona tale kuraa.

Nau ta Moses me emulina, pristi nonga atoa laghe gheleila aiaavusuvusuena tale ale kandisi eteva me emulina tale ale manga ateva eJerusalem, tale liu nighelei aiaavusuvusuena laghe gheleila ta brasi.

Livae Tau ngai uungu eteva tale ale manga, esaasausi pristi etoa.

Masi kiukiu Inangarina God la ue va masi kiukiu, ta poli God ghe suula Natuna ateva tani sio tale kosa ateva tani ghaa oghi taumattu ngatoa. Iesu Karisto ghe asaangila taumattu me la rau mene ghaa nimmarikana tale ssavoto. Iesu ghe gheleila salana tale taumattu tani mene oghiaa mae me natuna ila God.

Mastet Mastet ase ai eteae katuna pisikeaili.

Mesaea Utara inangari Karisto.

Murr Ai eteae masi ngusungusuaane raeraeana nnane laghe ghaaghaa elome tale vilikina. Laghe ghelei masi aiaaoo me masi aimolumolu me marasina ia. Laghe kaakaai tee uaeni tani ghaa velu manoonongana.

Nadi Vause ateva ghe kaola masi ngusungusuaane oeli eteva ta kkena Iesu (Mak 14:3; Jon 12:3), la aseasea va nadi. La ghe gheleia tale manu ngai eteae.

Nanna ngaioghioghiaa Ninanna ngaioghioghiaa tale voto sesa ita auliaa me ita ghelei. Ita kookolomi God va ekkaluaa voto sesa ita ghelei.

Natuna sipsipi eteva God Jon tau ngai aasuu ghe asease Iesu va arova sipsipi eteva natuna ia God. Ajiu etoa laghe ghelei aiaavusuvusuena tale natu sipsipi va God aue ghe kkaluaa kaluira ssavoto. La asease va Iesu nongina natu sipsipi eteva God poli ghe matela etaira tani kkaluaa kaluira ssavoto.

Nau manga Nau manga ateva nau niainoana ia. Ajiu etoa oroieili inangariira nipaopao tale nau manga ateva. Laghe ue va ajiu etoa karika la rooroo tani uungu tale nau manga ateva. Ghe sessaila nau Iesu ghe ghelei emasina taumattu tale nau manga ateva. Ajiu etoa ghe sessailala nau disaepolo atoa laghe ghaala uiti raisi ta nau manga ateva me laghe sapisapulaala me laghe namala.

Niaiaavusuvusuena (1) Ngusungusuaane masinaaili. Laghe ghelei niaiaavusuvusuena tale ue ngai, uru ngai, me ua ngai eteae. Tale ale manga ateva pristi etoa laghe tuutuu niaiaavusuvusuena nau taumattu ngatoa la looloo sae.

(2) Nau pokane ateva inangari niaippooa ngaitauaa, emua arau, God ghe aloanna va taumattu ngatoa la ghelei aiaavusuvusuena me God aue ekkaluaa kaluira ssavoto. Aipolina ssavoto ateva, nimate atea. Kapuna atoa God laghe uviuvi ghaata kkena elo ale tale ale manga me ghaata kkena ateva ghe matemate tani ghaa liuira. Pristi etoa laghe uviuvi emate ghaata kkena. Ghaata kkena raarangisanaaili vilikiira me karika righi usai me karika righi sessaira. Iesu Karisto ghe matela ta ngetaira akapaaili nongina va ia aiaavusuvusuena ia.

Niaippooa ngaitauaa Utara inangari Inangari niaippooa ngaitauaa.

Niarangise Masi voto Vau ngepona ateva etautau mae.

Niasuu Ukupi sio tale manu eteva me utotu sae tani mene ghaa mauue. Ukila va Iesu ang ghe kkaluaala kalam ssavoto. Uaimuli ta Iesu nau utokatoka lomosi ta umate.

Oliv Oliv, ase ngai eteae ekuukunea uene. Arari uene la asease va oliv. Ajiu etoa laghe tuutuu inana tale oeli uene ateva. Oliv oeli ajiu etoa laghe aloannaailia. Kalakalangina eJerusalem motouru eteva ararina atea ta Oliv.

Otuena Namunganiira ateva raroai etoa ararina atea ta otuena, tale inangari nge Inglis, la kolokoloa va “dragon”. Eaimatoonga Satana.

Paresi Nau ta Iesu ghe tokatoka tale kosa ateva oia, masi taumattu ngatoa la ghe aseasela va Paresi etoa. Laghe kilakilaaili inangari nipaopao God ghe tau lao sio ta Moses. Paresi etoa laghe nim alokoi saoaala kasina nannaaira tale inangari nipaopao. Laghe aloanna va taumattu ngakapa atoa la aimuli tee nannaaira. Paresi etoa laghe nanna va ila nonga namuu ila, me laghe tam aloanna Iesu me laghe uvi emateala. Iesu ghe aselala va usimaghalue ila, poli karika laghe aimuli tee llo laghe aauliaa.

Pasova Nivelu eitaua ngateae laghe nnaala nau eteva aIsraeli etoa laghe kasu vuli eIjip. Laghe atokala rae tale atamana, me ensolo ateva ghe tam uvi ematela natuira mua atoa aIsraeli etoa, ta aljip nonga atoa. Utara Eksodis 11-13.

Pel Pel, la asease va katu ghaulu eteva. Pisikeaili ia me aipolina nonga namuu. Masinaaili taataraane me usousoanaaili ia. La ghaatoka tale airiira me vurra me pasipasi.

Pentikos Nau Pasova eruuruu, laghe mene veluvelu eitauaa tale aiaaghalimangauluna (50) ateva nau, la ghaseasea va Pentikos. Utara Eksodis 23:16; 34:22; Levitikos 23:15-21.

Peroo Peroo ararina ia vau palepale nge Ijipi eteva. Taumattu namuu laghe asease va Peroo.

Pristi Pristi etoa laghe gheelei aiaavusuvusuena ta God mausi kaluira ssavoto taumattu ngatoa elome tale ale manga ateva eJerusalem. Pristi etoa mangalina ila Eron, tuvuna ila Livae. Namu ngateva ta pristi etoa, ie nonga erooro tani kupi sso tale mangaaaili etiulu rum tale ale manga ateva, katengaata nonga tale kateae ninamanama.

Propete Propete atoa God ghe aippooaa teeila me ila laghe laa ghaauliaa inangarina God ta mene katoa taumattu. Tale nau pokane ateva inangari niaippooa ngaitauaa oroieili propete atoa laghe aulia ngaotu va Mesaea aue elutu emua. Oroieili ninamanama ghe lange sio me voto propete atoa laghe aulia ngamuemuela va aue elutu ta Iesu ghe lutu ekoronala. Laghe aulia ngaotu teela oroi voto aue elutu nau Iesu emene oghiaa mae. Ouna ativilau ppae taumattu ghe aippooaa tale korokoronganiaane Spirit Manga laghe ue va propete ila.

Raarangisana Ajiu etoa laghe ue va lo atoa raarangisana ila la rooro tani uungu elome tale ale manga ateva. God ghe uela va llo inana me voto karika raarangisana urou mene poso me urou mene nama ta karika raarangisana. Taumattu karika raarangisana etani ghelei voto God eaauliaa va eghelei me emene raarangisana.

Rabae Ajiu etoa laghe ue va lo atoa alomasaanga ila laghe asease arariira etea va rabae, malloeana va tau ngai aapasunga. Nau laghe kolokoloa va rabae, laghe ue va namuu ia, me laghe oneoneainia.

Raroai Raroai etoa kapuna tau ngai nongonongo anna ila Satana. Nau ekapaaili la kamekame taumattu ngatoa va la rou mene aimuli usi tee God ta la aimuli teeila. Kasina nau la laolao tale taumattu ngatoa me la kamekame tani ghaa oghila ta Iesu.

Ret Sii Manu eteva, kasina nau, voto etana epiipinosa egheeleie raeraeana manu eteva.

Sadiusi Ta ajiu etoa, Sadiusi etoa namuu ila me tau peipeiena ila. Laghe aikaaiaa inangari nipaopao God ghe taula ta Moses, me karika laghe aloanna mene kasina inangari nipaopao Paresi etoa laghe auliaala. Paresi

etoa laghe aikaaiia va taumattu matena aue etotu me Sadiusi etoa karika laghe aaikaaiaa va koronna.

Satana Satana namuu ia tale sesa spiriti etoa me ghe sessaia ta God. Ekamekame taumattu va ssavoto la gheelei karika God aue ekkaluaa. La asease va Satana kingi tale kosa ateva oia.

Selot Kateva kapuna disaepolo Iesu ta Saemon la aseasea va Selot ia. Kateva malloeana inangari “selot” va etani aimuli tee inangari nipaopao. Mene kateva malloeana va taumattu ngatoa laghe aloanna tani aiuvii tee aRom atoa.

Siisa Siisa la asease va kapuira kingi ia aRom atoa.

Silva koen Silva koen (denarius) aipolipoli tale kateva nau.

Sipsipi Israeli etoa laghe aaitaraa sipsipi ta laghe uviuvi emate me laghe gheelei kalio tale uuna, me malatauna laghe gheeghelei aiaavusuvusuenta etana.

Sius Kateva tani kapuira goto atoa aGrik atoa. Laghe aikaaiia va Sius kingi ia ta goto atoa.

Stoik Tau ngai aapasunga ngatoa la uusila inangarina Sino, ghe apasungaala va mata ngemua ateva voto, tani anna ngamasina, me uunguaa masi nitoka.

Taita sipsipi Sipsipi eteva taita ia, komna ghalua.

Tasussuku Tasussuku eteva ghe tokatoka tale viliki taumattu. Lo ateva ange ghaala tasussuku eteva ghe kasukasu vuli masina atoa taumattu me ghe laa tokatoka ppae.

Tau ngai aapasunga tale inangari nipaopao Tau ngai pitipiti ila, me laghe aapasunga inangari nipaopao tale pokane ateva inangari niaippooa ngaitauaa, tale vuku ghalima Moses ghe pitila.

Tau ngai ghaa takis Ta nau Iesu, lo atoa laghe ghaaghaa viliki veu me laghe laolaoaa ta aRom atoa. Lo atoa laghe ghaaghaa takisi aJiu ila, me laghe saasausi aRom atoa tani ghelei taumattu va la tani tau lao takis ta Siisa tani poli tau ngai uvii etoa aRom ila. Liuna avalua o me aJiu etoa karika laghe aaloanna tau ngai ghaa takisi etoa. Laghe ghaaghaa oroieili viliki veu me laghe aaisulia kasina me laghe laolaoaa nonga kasina ta aRom atoa.

Ue uaeni Ase ue ngai eteva karika va ai ia, ta arova uasa ateva la paapalaia me erarraa. La gheelei uaeni ita ropiropi ta ngetana.

Usimaghalua Taumattu, enim auliaa voto, me karika eaimuli tee.

Vau ngepona Utara inangari God.

Vau palepale Utara inangari God.